

New Testament

Chin, Bawm Language

Chin, Bawm - Bible - New Testament

Mathai	3	
Mark	89	
Luk	144	
Johan	235	
Thilti	304	
Rom	391	
1 Korin	428	
2 Korin	465	
Galatia	489	
Ephesi	502	
Philipi	514	
Kolosa	523	
1 Thesalonika	531	
2 Thesalonika	539	
1 Timothe	544	
2 Timothe	554	
Tita	561	
Philemon	566	
Hebrai	568	
Jem	595	
1 Peter	604	
2 Peter	614	
1 Johan	620	
2 Johan	629	
3 Johan	631	
Jud	633	
Thuphuang	636	



Chin, Bawm - Bible - New Testament

Mathai

Mathai 1

¹Abraham thlâk, David thlâk, Jisu Krist thlâktu tla anna thlâk zia thâwnghâng chu:

²Abraham fa chu Isak asi, Isak fa chu Jakob, Jakob fa chu Juda leh a unau tla, Juda nih Tamar hen Perez Hezron, Hezron fa chu Ram, Ram fa chu Aminadab, Aminadab fa chu Nason, Nason fa chu Salmon, Salmon nih Rahab hen Boaz an ring, Boaz nih Ruth hen Obed an ring, Obed fa chu Jese, Jese fa chu lalchem David.

⁶David nih Uria nupi hen Solomon an ring le, Solomon fa chu Rehoboam, Rehoboam fa chu Abizah, Abizah fa chu Asa, Asa fa chu Jehosaphat, Jehosaphat fa chu Jehoram, Jehoram fa chu Uziah, Uziah fa chu Jotham, Jotham fa chu Ahaz, Ahaz fa chu Hezekiah, Hezekiah fa chu Manaseh, Manaseh fa chu Amon, Amon fa chu Josiah, Babulon leiah sal ah an kalpi na liau khan Josiah fa chu Jehoiakin leh a unau tla.

¹²Chun, Babulon leiah sal ah an kalpi na nûnah Jehoiakin fa chu Sialtiel, Sialtiel fa chu Zerubabel, Zerubabel fa chu Abiud, Abiud fa chu Eliakim, Eliakim fa chu Azor, Azor fa chu Zadok, Zadok fa chu Akim, Akim fa chu Eliud, Eliud fa chu Eleazar, Eleazar fa chu Mathan, Mathan fa chu Jakob, Jakob fa chu Josef, Mari pasal chu chu Mari lakah chun Jisu, Mesia an ti mi hi a hawng suak rawh.

¹⁷Chuvachun, san zawzawng chu Abraham thawk hen David tiang hen san leili asi; David thawk hen Babulon leiah sal ah an kalpi na tiang hen san leili asi le, Babulon leiah sal ah an kalpi na mi thawk hen Mesia tiang hen san leili asi.

¹⁸Chun, Jisu, Mesia a hawng suak zia chu hi hâwi asi: A nu Mari chu Josef hen anna halh liauah, anna tawng lânah, Thlarau Thenhlimh nih a râtir ti a hawng theih rawh.

¹⁹Chun, a pasal Josef chu mi rep tak asi le, tâng zanhtir a duh lo le, a thup hen bângtâk a tum.

²⁰Sikhawmsele, chubang thu chu a dawn liauah, ngâinik, a mang ah Lalpa vânmifial a sinah â langh le, "Josef, nang David fapa, na nupi Mari chu umpi ding ãih lah; a nau pâwi chu Thlarau Thenhlimh lakah mi asi.

²¹Fapa a ring lai le, a min ah Jisu na sak lai; anih nih chun a mi tla an thilsual ti lakah mi ruang a suah na awt ruangah," a ti.

²²Chun, Lalpa nih khuavâng kê ah, "Ngâinik, nungâk thenhlimh chu a rôi lai le, fapa a ring lai le, a min ah Immanuel an sak lai," ti hen a sim mi kha a hawng tlung khonâk ding hen, chubang chu a hawng um asi. (Immanuel chu, "Kan sinah Pathian a um," tinâk asi.)

²⁴Chun, Josef chu a it mi a thawk le, Lalpa vânmifial nih a sinah thu a pêk hâwi hen chun a ti le, a nupi chu a umpi rawh.

²⁵Sikhawmsele, fapa a ring lân lo chu anna tawng lo. Chun Josef nih a min ah Jisu a sak rawh.

Mathai 2

¹Chun, lalchem Herod a lal liauah Judai ram ah Bethlehem ah Jisu a hawng suak liauah, ngâinik, khawsak lei thawk hen mifing tla Jerusalem khua ah an hawng kal le, "Kha zeiah Juda tla lalchem a hawng suak mi chu?

²Khawsak leiah a ârfi kan muh le, amah mâimûk ding hen kan hawng kal asi," an ti.

³Chun, lalchem Herod nih chun chu chu a theih kê hen a lawksawng rawh. Jerusalem mi zawzawng khawm an lawksawng bâk.

⁴Chun, bawlpu lal tla leh Dân sîntirtu tla zawzawng chu a pumh na le, Mesia suaknâk ding chu a deih na.



⁵Chun, annih nih chun a sinah, "Judai ram ah, Bethlehem ah, hi hâwi hen khuavâng nih a rîn mi kha,

⁶Nang, Bethlehem, Juda ram ah mi, Juda khuapi lakah na mêchem rîlmâl lo! Na sung thawk hen lâirêltu a hawng suak awt ruangah, ka mi Israel tla vêngtu ding chu, ti hi,' " an ti.

⁷Chu nûnah chun Herod nih a thup hen mifing tla chu a kawh na le, fiang tak hen ârfi langh liau chu a deih na.

⁸Chun, annih chu Bethlehem ah a kaltir na le, "Kal ule, nautê thu chu fiang tak hen deih u; chun kei khawm nih amah chu mâi ka hawng mûk khonâk ding hen nan muh kê hen hawng ka simh u," a ti.

⁹Chun, lalchem thu chu an theih le, an kal rawh; chun, ngâinik, khawsak leiah ârfi an muh mi kha nautê umnâk tlûn zâwn ah tlung hen a dîr lân lo chu an mâi leiah a kal vima. Chun, ârfi chu an muh rawh chun thungâi anna lâwm.

¹¹Chun, in sungah an va lût le, a nu Mari sinah nautê chu an muh le, an bawk le, mâi an mûk; chun, an robâwm tla an awng le, a sinah chun lâwmman ngûn tla, bawraw tla leh murrah tla an pêk.

¹²Chun, Herod sinah kêr nawlh lo ding hen an mang ah Pathian simh hen an um ruangah anmah kua leiah lam dang hen an tlung rawh.

¹³Chun, an tlung nûnah, ngâinik, Lalpa vânmifial chu Josef sinah a mang leiah â langh le, "Thawk le, nautê leh a nu put na le, Aigupta ram ah tek rawh, ka nan simh nawlh lân lo chu chunah chun um kumza; Herod nih nautê veih ding hen a hâwl awt asi," a ti.

¹⁴Chun, Josef chu a thawk le, mûi leh zân ah nautê leh a nu chu a put na le, Aigupta ram ah a kal;

¹⁵chun, Herod thih lânlo chu chunah chun a um kumza; Lalpa khuavâng kê ah, "Ka fapa chu Aigupta ram ah mi ka kawh," ti hen a sim mi kha a hawng tlung khonâk ding hen.

¹⁶Chu liau chun Herod nih mifing tla nih an perpet asi ti a theih kê hen a thinthawk, mi a fial le, a tik fiang tak hen mifing tla a deih na hâwi khan, Bethlehem leh a kiangkam zawzawng ah mipa ngâksia kum nih rî hen a tanglei mi chu an ektê hen a thah hep na.

¹⁷Chun, khuavâng Jeremia nih,

¹⁸"Ram khua ah hâu an theih, ɽap tla, mithi ngâi hen rûm leh âi tla, Rakel nih chun a fa tla a ɽapnawh na le, an umlo rawh ruangah lungngamh kho asi lo," ti hen a sim mi kha a dik asi.

¹⁹Sikhawmsele, Herod chu a thi nûnah, ngâinik, Lalpa vânmifial Aigupta ram ah chun Josef sinah a mang ah â langh le,

²⁰"Thawk le, nautê leh a nu put na le, Israel ram ah kal rawh; nautê thah tumtu tla kha an thi rawh," a ti.

²¹Chun, a thawk le, nautê leh a nu chu a put na le, Israel ram ah a lût rawh.

²²Sikhawmsele, Arkelaus a pa Herod ruangrûl ah Judai ram ah a lal ti a theih rawh chun chunah va kal a ɽih; chun a mang leiah simh hen a um ruangah Galili leiah a kal ving le, khua pakhat Nazaret an ti mi ah chun a va um rawh.

²³"Anih chu 'Nazaret mi' an ti lai," ti hen khuavâng tla kê ah a sim mi kha a hawng tlung khonâk ding hen.

Mathai 3

¹Chun chu liau chu Baptistu Johan nih chun,

²"Rim u, Vân Ram chu a nâi rawh," ti hen, Judai ramkaro ah thusim hen a hawng kal.

³Amah chu asi khuavâng Isai nih, "Ramkaro ah mi âu hâu nih chun, 'Lalpa lampi sial ule, a lam tla dingtir u!' " ti hen, a sim mi kha.

⁴Chun, Johan nih chun sangâwngsâu mul puan â aih le, a tâi chu savun tâisâwm hen â sâwm le, a buh chu khâubawh leh ram khuaitizû asi.

⁵Chu liau chun Jerusalem mi tla, Judai ram ah mi zawzawng tla leh Jordan Va dung kiangkam mi tla an suak le, amah sinah an kal le,

⁶an sual tla thutluang vâwr hen Jordan Va ah chun amah sinah baptis an si rawh.

⁷Sikhawmsele, Farisai tla leh Sadukai tla tamtak baptis ding hen an hawng kal mi a muh kê hen an sinah, "Rûl thlâk tla, thinrunhnâk hawng tlung ding mi hi tektâk ding hen âu nih an simh na?"

⁸Nan rim rawh ti zauhtir ding hen thilti hen langhtir u.

⁹'Abraham hawng kan thlâktu asi lo mazei?' ti hen a sung-û tir lah u; Pathian nih hi bang lung tla hi Abraham thlâk tla ah a changtir kho, ka nan ti na hi.

¹⁰Tu thawk hen reitlung thing phûr kipah an siah rawh; chuvachun, thing kip rah tha hen rah lo mi vial an hâu le, mei ah an paih tâwn.

¹¹Kei lam nih chun nan rimnâk ding hen tî hen ka nan baptis na; sikhawmsele, ka dunglei ah a hawng kal ding mi chu keimah ngâk hen a rokual dauh le, a pheikawk put tlâk khawm ka si lo, anih nih chun Thlarau Thenhlimh leh mei hen a nan baptis na lai.

¹²A kut hen a zâpnâk a put lai le, a chîlnâk mun ah a zâp phin lai le, a siahnâk ah fâng a râwn lai, a hî lam chu mei mit kholo hen a duah hep lai.

¹³Chu liau chun a sinah baptis ding hen Jisu Galili ram thawk hen Jordan Va ah Johan sinah a hawng kal.

¹⁴Johan lam nih chun, "Na hawng ka baptis ka herh dauh mi, ka sinah na hawng dauh mu?" ti hen khap a tum.

¹⁵Sikhawmsele, Jisu nih a sinah, "Tuah rem ti râm rawh, hi hâwi hen Pathian nih a herh a ti mi vial ti hi kan rangah a tha asi," ti hen a sâng. Chun, Johan nih rem a ti.

¹⁶Chun, Jisu baptis asi ka hen ti a mi a suak sawm le, chun, ngâinik, a rangah vâw a awng le, Pathian Thlarau chu vaṭhu hâwi hen a hawng tum hen, a tlûnah a fû mi a muh.



¹⁷Chun, ngâinik, vâw thawk hen aw-hâu nih, "Hi hi ka Fapa duhtak, thungâi ka lawmh mi chu asi," a ti.

Mathai 4

¹Churawhchun Jisu chu Diabol nih lêm ding hen ramkaro ah Thlarau Thenhlimh nih put hen a um rawh.

²Chun, ni sâwmli leh zân sâwmli buh a ngei nûnah a sungvâng rawh.

³Chun, Diabol chu a hawng kal le, "Pathian Fapa na si chun hi bang lung hi sang ah chang ding hen thu pêk rawh," a ti.

⁴Sikhawmsele, anih nih chun, "Minung hi sang cho hen an nung lai lo le, Pathian kê thu kip suak hen an nung dauh lai, ti rîn asi," ti hen a sâng.

⁵Churawhchun Diabol nih Khua Thenhlimh ah chun a lûtpi le, Pathian Biakin tlûn sîp zum ah a siah le,

⁶chun a sinah, "Pathian Fapa na si chun a khâwk rawh; 'Nang lakah chun a vâwmifial tla thu a pêk lai le, an kut hen an nan dawmh lai le, chu hâwi asi lo chun na kê hen lung na suih lebang lai, ti Pathian lasui thu nih a sim ruangah," a ti.

⁷Jisu nih a sinah, "Lalpa na Pathian niksak dêl lah, ti rîn asi" a ti.

⁸Chun, Diabol nih chun tlâng sâng tak ah a kalpi nawlh le, laikulh ram zawzawng leh an rokualnâk a zauhtir.

⁹Chun, a sinah, "Bawkbukhup hen hawng ka sawnh le, hi bang zawzawng hi ka nan pêk ver lai," a ti.

¹⁰Chu ka hen Jisu nih a sinah, "Setan, kal ving!" Lalpa na Pathian sawnh le, amah rian cho ÷uan rawh, ti rîn asi," a ti.

¹¹Churawhchun Diabol nih a kaltâk rawh. Chun, ngâinik, vâwmifial tla nih a rian an ÷uan piak rawh.

¹²Chun, Johan an tleih ti Jisu nih a theih kê hen Galili ram ah a kal ving le,



¹³chun, Nazaret a kaltâk le, Kapernaum ah a va um le, chu chu Zebulun leh Naphtali bial ah rilî kap ah um mi asi.

¹⁴Khuavâng Isai kê ah,

¹⁵"Rilî leiah, Jordan varâl ah, Zebulun ram leh Naphtali ram, Phundang tla Galili ram!

¹⁶Múi nâwng ah to tla nih chun chêu fâk tak an muh lai, Thihnâk mun leh a thlaliah ah um mi tla tlûnah chun, Chêu a hawng suak rawh,' ti hen, a sim mi kha a hawng tung khonâk ding hen.

¹⁷Chu ri rawh chun Jisu nih chun, "Rim u, Vân Ram a nâi rawh," ti hen sim a dawmh rawh.

¹⁸Chun, Galili Rilî kap ah a kal pah hen, unau panih, Simon, (Peter an ti mi chu) a unau Andri hen rilî ah chun lên vawrh hen a muh na; ngarâltu an si rerêng.

¹⁹Chun, Jisu nih chun an sinah, "Hawng ka zûl u, chun minung tleihtu ah ka nan siam na lai," a ti.

²⁰Chun, lên tla chu kaltâk hen an zûl sawm rawh.

²¹Chun, chu thawk hen a kal vima le, unau dang panih Zebedai fapa Jem leh a unau Johan chu an pa Zebedai sinah lawng ah an lên tla remh hen a muh na, chun annih chu a kawh na rawh.

²²Chun, lawng leh an pa chu an kaltâk le, Jisu an zûl sawm rawh.

²³Chun, Jisu nih anna pûmnâk in tla ah sîntir na hen Ram Thâwngthâng T̄ha chu sim hen, mi le tla lakah nganfâk kip leh chaklonâk kip damh hen Galili ram zawzawng a t̄awl.

²⁴Chun, Siria ram zawzawng ah a thâwng a thang le, chun mi damlo zawzawng damlonâk leh nganfâknâk kip tuar tla, khuri vawnh tla, rualthlû tla, mi khêng tla a sinah an hawng put le, a damh ver na.

²⁵Galili ram thawk hen, Dekapoli thawk hen, Jerusalem thawk hen, Judai ram thawk hen, Jordan râl thawk hen mi zapi cherkhet nih an zûl.

Mathai 5

¹Chun, Jisu nih mi zapi tla chu a muh na rawh chun tlâng ah a kâi le, a to le, a thiruai tla a sinah an hawng kal le;

²chun thu a sim le, anmah tla a sîntir na:

³"Thlarau leikângah thinlung hamh mi tla chu an thaw a suak; Vên Ram an tâ asi ruangah!

⁴"Ngaihsia tla chu an thaw a suak, Pathian thlangamh hen an um awt ruangah!

⁵"Â dawnh kho mi tla chu an thaw a suak, tual hi an luah awt ruangah!

⁶"Repnâk ruangah sungvâng tîhâl tla chu an thaw a suak, an khim awt ruangah!

⁷"Mi khuaruat kho tak tla chu an thaw a suak, Pathian khuaruatnâk anna ting awt ruangah!

⁸"Thinlung ah thenhlimh tla chu an thaw a suak, Pathian an muh awt ruangah!

⁹"Remnâk siamtu tla chu an thaw a suak, Pathian fa ah sak hen an um awt ruangah!

¹⁰"Repnâk ruangah nehsawh tuar rawh tla chu an thaw a suak; Vên Ram an tâ asi ruangah!

¹¹"Mi nih keimah ruangah an fâi na hen, an nehsawh na hen, âwkrâwl hen sual kip hen an phiar na tikah nan thaw a suak lai.

¹²Lâwm ule, lâwptlo hen um u; vên ah nan lâwmman a tam ruangah. Chu hâwi ber hen nanmah lânah khuavâng um tla khawm an nehsawh na tâwn.

¹³"Minung zawzawng rangah chitê hâwi nan si. Sikhawmsele, chitê hi a dâwng rawh chun zeî hen an al tir nawlh lai? Churawhchun lawnh hen, minung tla chîl salam ding lo chun zeirang khawmah a tlâk loh.

¹⁴"Laikulh chêu nan si. Tlâng tlûnah khua um chu thuh kho asi loh.

¹⁵Mi nih khâwnvâr kaih hen tâwng tangah an siah dah lo, a siahnâk mun ah an siah dauh tâwn; chun in sungah mi zawzawng a cherh tâwn.

¹⁶Chu hâwi ber hen nan chêu chu mi mitmuh ah chêu seh, chuvachun nan thil tha ti tla an muh lai le, nan Pa vân ah mi an chawnglawmh kho lai."

¹⁷"Mosi Dân thu mawh khuavâng tla sîntirnak thu mawh veih ding a hawng kal hen hawng ka ruat lah u; veih ding hen hawng kal ka si lo le, rangtling tir ding hen hawng kal ka si dauh.

¹⁸Thungâi tak hen ka nan simh na, tual leh vân hi a vei lân lo chu Dân thu ah mi lasui ɿaltê mawh lasui ɿaltê khingkhuai mawh pakhat khawm a vei lai lo, a ektê hen a tlungkim lân lo chu.

¹⁹Chuvachun, âuzawng hi bang thupêk mêchem lakah hin pakhat mawh buar hen, chu hâwi ti bâk ding hen mi le tla sîntirtu zawng chu Vân Ram ah mi mêchem an ti lai; khawmsele, âuzawng Dân zâwt hen, sîntir bâktu zawng chu Vân Ram ah chun mi lian an ti lai.

²⁰Nanna repnâk nih Dân sîntirtu tla leh Farisai repnâk hi a khûp lânlo chu Vân Ram ah nan lût kho lai loh ti ka nan simh na."

²¹"Tuan liau mi tla sinah chun, 'Mi na thah ding asi lo,' an ti mi leh 'Âuzawng mi thahtu vial chu lâirêlnâk ah dîr ɿihnungkâi tak hen a um lai,' an ti, ti nan theih rawh.

²²Kei lam nih chun, 'Âuzawng a unau tlûnah thinruntu vial chu lâirêlnâk ah dîr ɿihnungkâi tak hen a um lai le, âuzawng a unau sinah, 'Nang, mido-tla-lo,' titu vial chu lâirêltu tla rêl piak ding ɿihnungkâi tak hen a um lai; chun, âuzawng 'Nang mi â' titu vial chu Gehena mei ah lawnh ɿihnungkâi tak hen a um lai ti ka nan simh na.

²³Chuvachun, mâichâm bul ah na thilpêk na ap liauah na unau nih na tlûnah lungsilônâk a nei ti na theih nawlh chun,

²⁴chu mâichâm kiangah chun na thilpêk chu mâk thlap le, va kal le, na unau remh tâ rih le, chu nûnah chun na thilpêk chu hawng ap rawh.

25"Na leido chu lampi ah munkhat hen nan kal liauah remh sawm rawh, chu lo chun na leido nih chun lâirêltu an tlehtir lai le, lâirêltu nih chun kawrsen sinah a nan pêk lai le, rêngin ah a nan khumh sual lai.

26Thungâi tak hen ka nan simh, quadran tê men na lîm lân lo chu chunah mi chu na suak rîlmâl lai lo.

27" 'Tângdang na pawmtâk ding asi lo,' an ti, ti nan theih rawh.

28Kei lam nih chun, âuzawng nunau duhnâk nei hen zauhtu vial chu a thinlung ah tângdang a pawmtâk ving rawh ti ka nan simh na.

29Chun, na mit vawrhlei nih a nan sualtir chun chawih zek le, lawnh ving! Na taksa a pum hen Gehena ah lawnh ngâk hen na taksa têng pakhat vei chu na rangah a t̄ha dauh asi.

30Chun, na kut vawrhlei nih a nan sualtir chun, tan le, lawnh ving! Na taksa a pum hen Gehena ah kal ngâk chun na taksa têng pakhat vei chu na rangah a t̄ha dauh asi.

31"Âuzawng nupi mâktu zawng nih chun mâknâk lasui a sinah pêk seh, an ti.

32Kei lam nih chun, âuzawng tlangvâl duh ruangah silo hen nupi mâktu vial nih chun amah chu tângdang a pawmtir asi; chun, âuzawng mi mâk chia umpitu chu tângdang a pawmtâk asi ti ka nan simh na.

33" Tuan liau mi tla sinah, Âwkrâwl hen siat tleih lah, Lalpa sinah na siat tleih chu lîm rawh,' an ti, ti nan theih rawh.

34Kei lam nih chun ka nan simh na, siat rerêng tham lah u; vâ n min sim hen tham lah u, chu chu Pathian laltophah asi ruangah; tual min sim hen tham lah u, chu chu a kê thângnâk asi ruangah.

35Jerusalem sim hen khawm tham lah, chu chu Lalchem rokual tak khuapi asi ruangah.

36Na lû sim hen na tham ding asi lo, sam zâi pakhat khawm na ngotir hen na dum tir kholo.

³⁷Nan thusim chu asi mi chu si seh, 'Silo mi chu silo ko seh,' chu ngâk hen a lei mi chu Setan lakah suak asi.

³⁸" 'Mit ruangrûl ah mit, hâ ruangrûl ah hâ,' an ti, ti nan theih rawh.

³⁹Kei lam nih chun ka nan simh na, misual do lah u; na vawrhlei biang ah a nan benghtu zawng chu khat leikâng khawm dawnh.

⁴⁰Chun, âuzawng na lakah thunawk tuah hen na kawrdawh lâk a tum chun na puan khawm lâktir dâidua.

⁴¹Chun, mêl khat kal ding hen an êngtu zawng sinah chun mêl nih kal rawh.

⁴²An deihtu sinah chun pêk le, na lakah pûk duhtu chu ngaihlo lêm thlâk lah.

⁴³" 'Na zâwlbâwm tla dâwt le, na mêlma hua na, an ti, ti nan theih rawh.

⁴⁴Kei lam nih chun ka nan simh na, nan mêlma tla dâwt na ule, an nehsawh natu chu thlacham piak u,

⁴⁵nan Pa vân a mi fa tla nan si khonâk ding hen. Anih nih chun misual tla leh mi ða tla tlûnah chun a nî a suaktir tâwn le, mi rep tla leh mi replo tla tlûnah khawm ruah a sûtir tâwn asi.

⁴⁶An dâwt natu cho nan dâwt chun lâwmman zeï me nan tawng lai? Siah khawlhtu tla khawm nih chu hâwi hen an ti bâk lo mazei?

⁴⁷Chun, nan unau cho chibai nan bûk chun zeï tipi me midang tla ngâk hen a lei nan ti? Phundang tla khawm nih chu hâwi hen an ti bâk asi lo mazei?

⁴⁸Chuvachun, nan Pa vân a mi a ða rangtling hâwi hen nan ða rangtling ding asi.

Mathai 6

¹"Nan thil ða ti tla mi muh dingah, minûng mitmuh ah tilo ding hen a thiamthih u; chu lo chun nan Pa vân a mi sinah lâwmman nan nei lai loh.

²"Chuvachun, mi sinah zeïlo na pêk chun, mi perpê tla nih mi sawr an lawh khonâk ding hen, pumhnâk in tla ah, zâwllâi tla ah an ti tâwn hâwi hen na

mâika ah tâwtawrâwt tumtir lah. Thungâi tak hen ka nan simh na, an lâwmman chu an tawng thluh rawh.

³Nang lam nih chun, mi sinah zeilo na pêk chun, na kut vawrhlei hen na ti mi chu na kut kehlei nih theih lah seh,

⁴na zeilo pêk chu a thup hen a um khonâk ding hen; chuvachun, na Pa a thup hen muh tâwntu nih chun a nan rulh lai.

⁵"Chun, thla nan cham chun mi perpê tla hâwi hen nan ti ding asi lo; mi nih an muh khonâk ding hen pumhnâk in tla ah, zâwllâi lamthum tla ah dîr bû hen thlacham an sunhsak tâwn. Thungâi tak hen ka nan simh na, an lâwmman chu an tawng thluh rawh.

⁶Nang lam nih chun thla na cham chun na in kardang sung ah lût le, na in khâr le, na Pa a thup hen um mi sinah thlacham rawh; chun, na Pa a thup hen muh tâwntu nih chun a nan rulh lai.

⁷"Chun, thla nan cham chun Phundang tla hâwi hen nawlh salam lah u; an sim tam ruangah Pathian nih a ngâi piak na ding hen an ruat asi.

⁸Chuvachun, amah tla hâwi hen um lah u; amah nan deih lânah nan Pa nih chun zeî me nan herh ti a theih ko ruangah.

⁹Chuvachun, nannih nih chun hi hâwi hen thlacham u: 'Kan Pa vâh ah mi, Na min zah hen um seh,

¹⁰Na Ram hawng tlung seh, na duhzia vâh ah an ti mi hâwi hen, tual ah mi nih ti seh.

¹¹Tusûn hin kan ei khawp buh hawng kan pêk.

¹²Kan thilti palhnâk tla hawng kan ngaihdam, midang tla thil palhnâk tla kan ngaihdam na hâwi hen.

¹³Sual ding hen lêmnâk ah hawng kan kaltir lah le, Misual thawk hen ruang hawng kan suah rawh,' ti hen.

¹⁴"Mi an buar mi tla nan ngaihdam chun nan Pa vâh ah mi nih a nan ngaihdam na bâk lai.

15Sikhawmsele, mi buarnâk tla nan ngaihdam lo chun, nan Pa nih nan buarnâk tla a nan ngaihdam na bâk lai lo.

16"Buh nan ngei tik khawmah mi perpê tla hâwi hen zûr mêl put lah u; annih nih chun mi mitmuh ah buh an ngei mi an langh khonâk ding hen an mêl an zûrtir tâwn. Thungâi tak hen ka nan simh na, an lâwmmann chu an tawng dih rawh.

17Nang lam nih chun, buh na ngei tikah sariak a thuh le, na mâi a phiah le,

18chuvachun na Pa a thup hen um mi mitmuh ah cho lo chun minung mitmuh ah buh ngei hen na lang lai lo; chun na Pa a thup hen muh tâwntu nih chun a nan rulh lai.

19"Tual ah rûlchawn leh a êk nih a einâk ah, mifîr tla nih an phûl hen an fîrnâk ah nan ro tla khawng lah u.

20Vân ah rûlchawn leh a êk nih a ei lonâk ah mifîr tla nih an phûl hen an fîr lonâk ah chun nan ro tla khawng lehlam u.

21Na ro umnâk kipah na thinlung khawm a um lai.

22"Taksa khâwnvâr chu mit hi asi: chuvachun na mit a fîm chun na taksa a pum hen a chêu hep lai.

23Na mit â râwk lam chun na taksa pum hen a mûi hep lai. Chuvachun, na sungah chêu chu mûi si sele, mûi chu a fâk awt chiam e!

24"Âukhawm nih hotu panih rian an ÷uan kêp kho lo, pakhat hua hen pakhat a duh lai, asi lo leh, pakhat ÷anh hen pakhat a zauhnawmh lai. Pathian leh sum rian nan ÷uan kêp kho lai lo.

25"Churuangah, ka nan simh na, zeï me ka ei lai le, zeï me ka din lai aw?' ti hen, 'Nan nungnâk thu leh zeï me ka aih lai aw?' ti hen nan taksa thu lungkham lah u. Ei ding ngâk hen nungnâk a sung-û dauh lo mazei? Nipuan ngâk hen taksa khawm a sung-û dauh lo mazei?



²⁶Chungzuang vâ tla khi zauh u, kûi an tuh lo le, an ât lo, fângbâwk ah an râwn lo; sikhawmsele, nan Pa vâ a mi nih chun a châwm asi. Nannih chu vâ tla ngâk hen nan sung-û dauh khun lo mazei?

²⁷Chun, nan lakah âu nih lungkham ruangah mah dung dâwng khat a sângtir kho?

²⁸"Chun, nipuan thu zeirangah nan lungkham? Mâng tuktîn pâr a ðhang zia hi ðha tak hen ruat u; rian an ðuan lo, la an kher lo.

²⁹Sikhawmsele, ka nan simh na, Solomon men a rokualnâk zawzawng hen â thuam khawmah hi bang tuktîn pâr pakhat tluk khawm hen thuamh hen a um lo.

³⁰Chuvachun, mâng belh, tusûn ding a nung, a thâituan ah tappi ah tih nawlh salam ding men Pathian nih chu hâwi tluk a thuamh chun, nannih lung tâwm tla, nipuan a nan pêk tuktarâi na awt lo mazei? Nan lung tâwm chiam e!

³¹Chuvachun, 'Zei me ka ei lai?' mawh, 'Zei me ka din lai?' mawh, 'Zei aih hen me ka um lai?' mawh, ti lungkham lah u.

³²Phundang tla nih chubang zawzawng chu an hâwl tâwn asi. Chubang zawzawng chu nan herh ti nan Pa vâ a mi nih a theih ko asi.

³³Pathian Ram leh a repnâk chu hâwl masa dauh u, chuvachun chubang zawzawng chu a nan pêk sap na awt asi.

³⁴Chuvachun, thâi rang ding lungkham lah u, thâi nih chun amah rang dingah a lungkham sawm awt ruangah. Ni khat rangah ni khat hamh chu â tâwk asi.

Mathai 7

¹"Simsâwi lah u, simsâwi hen nan umlonâk ding hen.

²Nan simsâwi na hâwi ber hen an simsâwi na lai; nan tahnâk tê hen an tah piak nawlh na lai.

³Chun, zeirangah me mah mit ah mi kân um mi chu ruat lo hen na unau mit ah mi fungrêutê um mi chu na muh zia?

- ⁴Asi lo leh, zeitin me na unau sinah, 'Na mit ah mi fungrêutê kha hawng ka thuaktir rawh,' na ti kho lai, nangmah mit ngelchel ah kân um ko hen.
- ⁵Mi perpê! Na mit ah mi kân kha lâk masa rawh; chuvachun, na unau mit ah mi fungrêutê thuak ding mi chu fiang tak hen na muh lai.
- ⁶Ui tla sinah thil thenhlimh chu pêk lah u; an hawng a her hen an seh na lebang lai; vawk mâika ah nan âitikep lung tla lawnh lah u, an chîl salam lai.
- ⁷Deih u, chun a nan pêk na lai; hâwl u, chun nan tawng lai; kik u, chun a nan awng piak na lai.
- ⁸Âuzawng a deihtu nih chun an tawng tâwn le; âuzawng a hâwltu nih chun an tawng tâwn; âuzawng a kiktu chu an awng piak awt asi.
- ⁹Asi chun, nan lakah âutal a fapa nih sangtlêp deih sele, âu nih lung pêk lai?
- ¹⁰Asi lo leh, ngâ deih sele, âu nih rûl a pêk lai?
- ¹¹Chuvachun, nannih misual men nih nan fa tla thil ̣ha pêk ding dân nan theih chun, nan Pa vâh ah mi nih chun a deihtu tla chu thil ̣ha a pêk dauh khun lai lo mazei?
- ¹²Chuvachun, thil zeizawng mi nih nan tlûnah ti sele, nan duh hâwi hen mi tlûn khawmah ti bâk u; chu chu Dân leh khuavâng tla thu asi rêng asi.
- ¹³Kawtkâ bî ah chun lût u; tlâunâk ah kalnâk kawtkâ chu a kâu le, a lampi khawm a kâu le, chu leiah lût mi chu tam khawm thungâi an tam.
- ¹⁴Nungnâk ah kalnâk kawtkâ chu a bî le, a lam khawm a tawr le, a tawngtu tla khawm tâwmtê an si.
- ¹⁵Khuavâng telê lakah a thiamthih u; chu tla chu dawrâ vun aih hen nan sinah an hawng kal tâwn le, an sung leiah lam chun chingngia râwḷtâm an si ruangah.
- ¹⁶Anmah tla chu an rah lakah nan theih ko lai. Zûn lingnei lakah grep rah an kawih dah tâwn mazei? Bualingnei lak khawmah theipi an kawih dah tâwn mazei?
- ¹⁷Thing ̣ha zawng a rah a ̣ha tâwn le, thing sia lam chu a rah a ̣ha lo.

- ¹⁸Thing tha a rah a sia kho lo le, thing sia khawm a rah a tha kho lo.
- ¹⁹Thing kip a rah a tha lo mi zawng chu an hâu le, mei ah an paih tâwn.
- ²⁰Churuangah anmah chu an rah lakah nan theih ko lai.
- ²¹" 'Lalpa, Lalpa, hawng ka titu namên Vân Ram ah an lût lai lo; ka Pa vân ah mi duhzia titu lam chu an lût lai.'
- ²²Chu ni ah chun mi cherkhet nih, 'Lalpa, Lalpa na min hen thu tla kan sim hen, na min hen khuri tla kan nar le, na min hen thilchê tamtak kan ti tâwn lo mazei?' an ti teh lai.
- ²³Chu ni ah chun 'Nannah thilsual titu tla, ka nan theih na loh, ka sin thawk hen kal u,' ti hen, annih chu ka simh na teh lai.
- ²⁴"Chuvachun, mikip hi bang ka thu theih hen zâwttu zawng chu, mi fing lungpi tlûnah in saktu hen tahthimh ding asi.
- ²⁵Ruah tla a hawng sâr le, tî tla a hawng lian le, thli tla a hawng râng le, chu in chu a khup khup hen a hawng nam le; sikhawmsele, a chim lo le; lungpi tlûnah sak thlir asi ruangah.
- ²⁶"Chun, mikip hi bang ka thu theih hen zâwtlotu chu, mi â sep tlûnah in saktu hen tahthimh asi.
- ²⁷Ruah a sâr le, tî a hawng lian le, thli a hawng râng le, chu in chu a khup khup hen a hawng nam le, a chim rawh; a râwk zia thungâi a fâk asi, a ti.
- ²⁸Chun, hi hâwi hi asi le, Jisu nih chubang thu chu a sim thluh kê hen, mi zapi tla nih a thu sîntir chu thungâi chê an ti le,
- ²⁹Dân sîntirtu tla hâwi silo hen, thuneihnâk nei hâwi tak hen a sîntir na ruangah.

Mathai 8

- ¹Chun, tlâng ah mi a hawng tum nûnah mi zapi cherkhet nih amah an hawng zûl rawh.

- ²Chun, a sinah phâr a hawng kal le, "Lalpa, na duh chun na ka thenhlimhtir kho," ti hen, mâi a mûk.
- ³Chun, Jisu nih a vuanh le, a tham le, "Ka duh, hawng thiawng rawh," a ti. Chun, zeikarlo ah a phâr chu a hawng thenhlimh sawm rawh.
- ⁴Chun, Jisu nih a sinah, "Âukhawm simh lo ding hen a thiamthih rawh; khawmsele chu bâwlpû sinah vâ a zauhtir le, Mosi nih thilpêk ding a ruat mi kha ap rawh, an theihfiangnâk ding hen," a ti.
- ⁵Chun, Kapernaum ah a lût rawh chun a sinah Rom kawrsen zâ hotu a hawng kal le,
- ⁶"Lalpa, ka to-aw a khêng le, in ah a rîl ko, thungâi a nganfâk a zual asi," ti hen, a ngiar chiam.
- ⁷Chun anih nih chun, "Ka hawng kal lai le, ka damh lai," a ti.
- ⁸Chun, kawrsen zâ hotu nih chun, "Lalpa, ka in sung na lûtnâk tlâk asi lo; thu cho sim le, ka to-aw a dam ko lai.
- ⁹Kei khawm mi thu hen um ka si le, ka tangah kawrsen tla an um le, chu minung chu, 'Kal rawh,' ka ti chun a kal tâwn, midang sinah khawm, 'Hawng,' ka ti chun, a hawng tâwn. Ka to-aw sinah khawm, 'Hi hi ti rawh,' ka ti chun, a ti tâwn," ti hen, a sâng.
- ¹⁰Chun, Jisu nih chubang thu chu a theih chun thungâi chê a ti le, a zûltu tla sinah chun, "Thungâi tak hen ka nan simh na, Israel tla lak khawmah hi tluk rak hen lungnâk fâk hi ka muh lo.
- ¹¹Ka nan simh na, sak leh thlang thawk hen mi tamtak an hawng kal lai le, Vân Ram ah chun Abraham tla, Isak tla, Jakob tla sinah an to lai.
- ¹²Ram fa tla lam chu lênglei mûi ah chun suah hen an um lai le, chun ah chun ÷ap leh hachang rial chu a um lai," a ti.
- ¹³Chun, Jisu nih kawrsen zâ hotu sinah chun, "Kal ko rawh, na lung hâwi hen na tlûnah hawng tlung seh," a ti. Chun, to-aw chu chu dâr tak ah chun a hawng dam rawh.

- 14Chun, Jisu chu Peter in ah a lût le, a nupi nu chu damlo hen it mi a muh.
- 15Chun, a kut a tham piak le, a damlo chu a reh rawh; chun a thawk le, an eibâr a timhtuah piak na rawh.
- 16Chun zânleibâi ah chun a sinah khuri vuanh tla tamtak an hawng put le; chun thu hen khuri tla a nar le, damlo zawzawng tla chu a damh na le:
- 17Khuavâng Isai nih, "Amah ngelchel nih kan chaklonâk tla a lâk le, kan nganfâk tla a phurh," ti hen a sim mi chu a hawng tlung khonâk ding hen.
- 18Chun, Jisu nih mi zapi cherkhet a kiangkam ah mi a muh rawh chun khatlei varâl ah kal ding hen thu a pêk.
- 19Chun, Dân sîntirtu pakhat a hawng kal le, a sinah, "Sîntirtu, na kalnâk kipah ka nan zûl lai," a ti.
- 20Chun, Jisu nih a sinah, "Kâwlui tla nih kua an nei le, tlûn zuang vâ tla nih bû an nei le, Minung Fapa lam nih chun a lû ngauhnâk a nei lo," a ti.
- 21Chun, a ðhiruai tla lakah midang nih a sinah, "Lalpa, ka pa hawng ka vûitir tâ rih," a ti.
- 22Sikhawmsele, anih nih chun a sinah, "Hawng ka zûl rawh; mithi nih anmah mithi chu vûi seh," a ti.
- 23Chun, lawng ah â chuan le, a ðhiruai tla nih an zûl.
- 24Chun, lâkkhatko ah rilî ah chun thlipi fâk tak a hawng râng le, chuvachun titlingtlawk nih lawng chu a khup khup hen a hawng vurh le; Jisu lam chu a it thlit.
- 25Chun, a sinah an hawng le, an thawh le, "Lalpa, hawng kan hum rawh, kan vei awt hi!" an ti.
- 26Chun, Jisu nih chun an sinah, "Lung tâwm tla, zeirangah nan ðih?" a ti. Churawhchun a thawk le, thli leh rilî chu a fâi le; chun a hawng reh dup ko.
- 27Chun, mikip nih thungâi chê an ti le, "Hi minung hi zei minung me asi; thli leh rilî tiangmâng khawm nih a thu an ngâi!" an ti.

²⁸Chun, varâl lei Gadarin mi tla ram chu a va tlung rawh chun, khuri vuanh panih thlân khur thawk hen suak mi nih an hawng tawng le; òihnung an kâi thlo le, chuvachun chu lampi ah chun âukhawm an kal ngam lo.

²⁹Chun, annih nih chun, "Pathian Fapa, kannih leh nang zeï kanna tlâinâk um? Tik tiamh tling lânah hawng kan rêp ding hen na hawng mi masi?" ti hen an âu.

³⁰Chun, an umnâk thawk hen lâat ual ah vawk rual tamtak an tlawng.

³¹Chun, khuri tla nih chun, "Na kan nar chun vawk rual paw sungah khin hawng kan kaltir," ti hen, a sinah an ngiar.

³²Chun, Jisu nih chun an sinah, "Kal ko u me," a ti. Chun, an suak le, vawk paw sungah chun an va lût; chun, vawk rual zawzawng chu kham ah anna khâwk chiam le, rilê ah chun an lût le, tî lakah chun an vei rawh.

³³Chun, a vulhtu tla chu an tek le, khua ah chun an kal le, zeizawng an sim rawh, khuri vuanh tla tlûnah thil hawng tlung mi tla khawm chu.

³⁴Chun, kkuatê hen Jisu dawng ding hen an hawng suak le; chun Jisu an muh kâ hen an ram thawk hen suak ding hen an ngiar chiam.

Mathai 9

¹Chun, Jisu chu lawng ah â chuan le, rilê chu a kanh le, a umnâk khua chu a tlung.

²Chun, mi khêng pakhat ihkhun ah it bû hen a sinah an hawng zawnh. Chun, Jisu nih an lung zia a muh hen mi khêng sinah chun, "Ka fa, lungngam tak hen um rawh; na sual tla ngaihdam asi rawh," a ti.

³Chun, Dân sîntirtu tla zeimaw mi tla nih chun an thinlung hen, "Hi minung nih hin Pathian a simsiat asi hi," an ti.

⁴Chun, Jisu nih an dawn mi tla chu a theih le, "Zeirangah me nan thinlung ah sual hen nan ruat?"

⁵'Na sual tla ngaihdam asi rawh,' ti leh, 'Thawk le, kê hen kal rawh,' ti hi a zeï mi a sim awl dauh?

⁶Zeikhawm si sele, laikulh ah Minung Fapa nih hin sual ngaihdam khonâk a nei ti nan theih khonâk ding hen," a ti le, mi khêng sinah chun, "Thawk le, na tangphah lâk le, na in ah kal rawh," a ti.

⁷Chun, a thawk le, a in ah a lâwi rawh.

⁸Chun, mi zapi tla nih chun chu chu an muh rawh chun an ðih le, minung tla sinah chu hâwi thuneihnâk pêtktu Pathian chu an sawr rawh.

⁹Chun, Jisu chu chu thawk hen chun a kal vima le, siah châwinâk mun ah a to mi, minung pakhat a min, Mathai a muh; chun, a sinah, "Hawng ka zûl rawh," a ti. Chun, a thawk le, a zûl rawh.

¹⁰Chun, hi hâwi hi asi le, in ah chun buh an ei liauah siah khawlhtu tla leh misual tla tamtak an hawng kal le, Jisu leh a ðhiruai tla chu an eipi na.

¹¹Chun, Farisai tla nih chu chu an muh rawh chun a ðhiruai tla sinah, "Zeirangah me nan sîntirtu nih siah khawlhtu tla leh misual tla sinah a ei le?" an ti.

¹²Sikhawmsele, Jisu nih chu chu a theih kê hen, "Mi chak tla nih chun daktawr an herh lo le, mi damlo tla lam nih chun an herh asi.

¹³Chuvachun, 'Bâwlnâk duhlo hen khuaruatnâk ka duh,' ti hi a umzia va a sîn u; mirep tak tla lam ding hen hawng kal ka si lo le, misual tla lam ding hen hawng ka si dauh," a ti.

¹⁴Chu liau chun Johan ðhiruai tla chu Jisu sinah an hawng kal le, "Zeirangah me kannih leh Farisai tla nih hin buh kan ngei lemang tâwn, na ðhiruai tla lehlam nih an ngei lo," an ti.

¹⁵Chun, Jisu nih an sinah, "Mo lawmhtu tla sinah a pasal ding mi a um kar vial chu mo lawmhtu tla nih chun an ulh kho mazei? Sikhawmsele, a pasal ding mi chu an sinah mi kalpi ving ni tla a tlung teh lai, chu tikah lam chun buh an ngei teh lai.

¹⁶Chun, âukhawm puan li, tî t̄um suk dahlo mi puan thar tliar hen an belh dah lo; a belhnâk nih chun puan chu a thlêk lehlam lai le, a tlêk khun awt ruangah.

¹⁷Âukhawm nih uain thar sâvun uain d̄ur li tla ah an râwn dah lo; an râwn chun savun d̄ur tla chu a kek lai le, uain chu a tlê lai le, savun d̄ur tla khawm chu a râwk lai; uain thar chu savun uain d̄ur thar tla ah an râwn dauh tâwn asi, chun t̄ha tak hen a um vevê tâwn," a ti.

¹⁸Chubang thu chu an sinah a sim liau takah hotu pakhat a hawng le, mâi a m̄uk, "Ka fanu tuhin a thi le, sikhawmsele, hawng kal le, a tl̄unah na kut ngauh le, a nung nawlh ko lai," a ti.

¹⁹Chun, Jisu a thawk le, a z̄ul rawh; t̄hiruai tla khawm nih an z̄ul bâk.

²⁰Chun, nunau pakhat, kum leinih th̄i suak hen a damlo mi, a dung leiah a hawng kal le, a puan sâr a tham.

²¹"A puan sâr cho khawm tawnggh sele damh hen ka um ko lai," ti thinlung a nei.

²²Chun, Jisu â her le, amah chu a muh, "Ka fanu, lungngam tak hen um rawh, na lungnâk hi na dampi asi," a ti. Chun, nunau chu, chu dârkar thawk chun a dam rawh.

²³Chun, Jisu chu hotu in ah a lût le, theikhang tumtu tla leh mi zapi tlawk chur mi tla a va muh rawh chun, "Suak u, ngâksia chu a thi lo, a it mi asi dauh," a ti.

²⁴Chun, annih nih chun Jisu chu an nihsanh.

²⁵Sikhawmsele, mi zapi tla chu a nar na n̄unah chun a lût le, a kut ah a tleih le, nunau ngâksia chu a thawk rawh.

²⁶Chun, chu thawk hen chun a thâwngthâng chu ram zawzawng ah chun a hawng thang khap rawh.

²⁷Chun, Jisu chu chu thawk hen chun a kal vima le, mitchâw panih nih, "David Fapa, kan tl̄unah khuaruat rawh," ti hen, âu hen an z̄ul.

²⁸Chun, in ah a lût rawh chun mitchâw tla chu a sinah an hawng kal le; chun Jisu nih an sinah, "Hi hi ti kho ding hen nan ka zumh ma?" a ti. Annih nih chun a sinah, "Zumh ta a, Lalpa," an ti.

²⁹Chun, anih nih chun an mit a tham le, "Nan ka zumh hâwi hen nan tlûnah tlung seh," a ti.

³⁰Chun, an mit chu a hawng dei rawh. Chun, Jisu nih an sinah, "Âukhawm theihlo ding hen a thiamthih u," a ti thlir.

³¹Sikhawmsele, annih chu an suak le, chu ram zawzawng ah chun a thâwngthâng an thangtir rawh.

³²Chun, an suak liau chirah, ngâinik, hawlh kholo mi khuri vuanh pakhat a sinah an hawng put.

³³Chun, khuri chu a nar kê hen hawlh kholo mi chu a hawlh rawh. Chun, mi zapi tla nih chun thungâi chê an ti le, "Israel tla lakah hi hâwi hi kan muh dah lo," an ti.

³⁴Farisai tla nih chun, "Khuri lal asi ruangah khuri tla a nar tâwn mi hi," an ti.

³⁵Chun, Jisu nih anna pûmnâk in tla ah sîntir na hen, Ram Thâwngthâng ða chu sim hen, damlo kip leh nganfâk kip tla damh hen, khua lian leh kkuatê tla zawzawng a ðawl.

³⁶Chuvachun, mi zapi tla chu a muh le, vêngtu neilo dawrâ tla hâwi hen hamh leh rek phun hen an um ruangah thungâi a siherh na.

³⁷Chun, a ðhiruai tla sinah chun, "Fângzûn ding thungâi a tam le, sikhawmsele a ðuantu tla an tâwm.

³⁸Chuvachun, fângzûn ding hen ðuantu ding tla fial ding hen fâng dâwngpu sinah chun ngiar u," a ti.

Mathai 10

¹Chun, a ðhiruai leinîh tla chu a kawh na le, khuri nâwmtâm tla nar kho ding hen leh damlo kip leh nganfâk kip damh khonâk ding hen thuneihnâk a pêk na.



- ²Chun, thiruai leinih tla min chu hi bang hi an si: A masachem ah chun, Peter an ti mi Simon leh a unau Andri; Zebedai fapa Jem leh a unau Johan;
- ³Philip leh Bartholomai, Thom leh siah khawlhtu Mathai, Alphai fapa Jem leh Thadai,
- ⁴Kana mi Simon leh a tleihtirtu Juda Iskariot tla hi.
- ⁵Chubang leinih tla chu Jisu nih a fial na le, an sinah hi hâwi hen thu a pêk: "Phundang tla lampi ah kal lah ule, Samari khua rerêng ah khawm lût lah u;
- ⁶Sikhawmsele, Israel phun dawrâ tlâu tla sinah chun kal dauh u.
- ⁷Chun, nan kal liauah, "Vân Ram chu a hawng nâi rawh," ti hen, sim vima u.
- ⁸Damlo tla damh ule, mithi tla thawh ule, phâr tla thenhlimhtir ule, khuri tla nar u; a thawt hen nan tawng le, a thawt hen pêk u.
- ⁹Nan tâisâwm tla lakah ngûn tangka mawh, tangka mawh, dâr tangka mawh put lah u;
- ¹⁰khualtlâwngnâk dingah zâl mawh, kawrdawh mawh pheikawk mawh, thianthunh mawh put lah u; rianthuantu chu a ei ding tawng tlâk asi ruangah.
- ¹¹"Chun, khua lian ah mawh kkuatê ah mawh nan lûtnâk kipah an tlungtir na ding hen a tlâk ding mi hâwl ule, nan suak nawlh lân lo chu chunah chun tlung kumza u.
- ¹²Chun, in ah chun nan lût awt bâiah chibai bûk na u.
- ¹³Chun, in ah mi tla chu chibai bûk tlâk an si chun nan lungngamnâk thu chu an tlûnah tlung seh; an tlâk lo lam chun nan lungngamnâk thu chu nan tlûnah hawng kîr nawlh seh.
- ¹⁴Chun, âuzawng an lawmh na lo hen, nan thu khawm ngâilotu zawng, chu in thawk hen mawh, chu khua thawk hen mawh nan suak tikah chun nan kezaphah lakah mi valeidip khâwng u.
- ¹⁵Thungâi tak hen ka nan simh na, lâirêl ni ah chun chu khua tla tuar ngâk chun Sodom leh Gomorah ram tuar ding chu a ziachâng a um dauh lai.

- ¹⁶Ngâinik u, chingngia nâwngah dawrâ um hâwi hen ka nan fial na hi: chuvachun, rûl hâwi hen fing hen, vaṭhu hâwi hen pawî khawih lo hen um u.
- ¹⁷Sikhawmsele, minung lakah chun a thiamthih u; lâirêltu tla a nan tleihtir na lai le, pumhnâk in tla ah an vuak na lai le;
- ¹⁸asi, keimah ruangah governor tla leh lalchem tla mâikaah anmah leh phundang theihnâk ding hen an put na lai.
- ¹⁹Sikhawmsele, an tleihtir na tikah chun, "Zeitin me, zeî thu me ka sim lai?" ti hen lawksawng lah u; nan sim ding mi chu a tik takah chun a nan theihtir na awt ruangah.
- ²⁰A simtu chu nanmah nan si awt lo le, nan Pa Thlarau nih nanmah lakah a sim dauh awt asi.
- ²¹Chun, thah ding hen unaupa leh unaupa anna tleihtir lai le, pa khawm nih a fa a tleihtir ber lai; fa tla khawm nih an nu leh pa tla an do lai le, an thahtir na lai.
- ²²Keimah min ruangah mi zawzawng huat nan si lai; sikhawmsele, a dawng tiang hen tuar huamtu zawng chu, chu tak chu ruangsua h hen a um lai.
- ²³Chuvachun, khua khat ah an nehsawh na tikah khua dangah tektâk u; thungâi tak hen ka nan simh na, Minung Fapa a hawng kal lânah Israel khua tla chu nan ṭawl thluh lai lo.
- ²⁴Sîntu a sîntirtu tlûnah a um lo; to-aw khawm a pu tlûnah a um lo.
- ²⁵Sîntu chu a sîntirtu hâwi hen a hawng um mi leh to-aw chu a pu hâwi hen a hawng um mi chu â tâwk. In dâwngpu hen 'Belzebul' an ti chun, a dâwngsung tla chu an ti ding rêng asi!
- ²⁶Chuvachun, annih tla chu ṭih lah u; langlo ding hen thuh zeikawm a um lo, theihlo ding hen pheh zeikhawm a um lo.
- ²⁷Mûi lakah ka nan simh na mi hi chêu ah sim u; nâ ah nan theih mi hi in tlûnah a chuan hen âu u.

- ²⁸Chun, taksa thah kho hen thlarau thah kholotu tla chu ÷ih lah u; Gehena ah thlarau leh taksa veih khotu lam chu ÷ih lehlam u.
- ²⁹Phâisenphittê panih assarion khat hen an zuar tâwn lo mazei? Sikhawmsele, an lakah pakhat khawm nan Pa thu lo hen tual ah a tlâ lai lo.
- ³⁰Nan samzâtê tiang khawm rêl hep asi.
- ³¹Churuangah ÷ih lah u; Phâisenphittê tamtak ngâk hen nan sung-û dauh asi.
- ³²"Chuvachun, mi le tla mâika ah hawng ka ÷anhtu zawng ka Pa vân ah mi mâika ah ka ÷anh bâk lai.
- ³³Sikhawmsele, âuzawng mi le tla mâika ah an hawng ka phehtu zawng ka Pa vân ah mi mâika ah ka pheh bâk lai.
- ³⁴"Laikulh ah hin rem lêngtir ding hen hawng kal hen hawng ka ruat lah u. Rem lêngtir ding hen hawng kal ka si lo le, nâmsâu lêngtir ding hen hawng kal ka si dauh.
- ³⁵Mi a pa dotir ding hen, fanu a nu dotir ding hen, mo a ni dotir ding hen hawng kal ka si.
- ³⁶Mi a mêlma tla chu amah dâwnsungkhur lakah mi ngelchel an si lai.
- ³⁷"Âuzawng a nu mawh a pa mawh keimah ngâk hen dâwt dauhtu chu ka mi si tlâk asi lo. Âuzawng a fanu mawh a fapa mawh keimah ngâk hen dâwt dauhtu khawm chu ka mi si tlâk asi lo.
- ³⁸Âuzawng a kraws put hen hawng ka zûl lo mi chu ka mi si tlâk asi lo.
- ³⁹Âuzawng a nungnâk tawngtu nih chun a dawktu nih chun a tawng lai.
- ⁴⁰"Âuzawng an lawmh natu chu keimah lawmhtu an si le, âuzawng hawng ka lawmhtu chu hawng ka fialtu lawmhtu asi.
- ⁴¹Âuzawng khuavâng chu khuavâng asi ruangah lawmhtu nih chun khuavâng lawmh man a tawng lai le, âuzawng mi rep chu mi rep asi ruangah lawmhtu nih chun mi rep lawmh man a tawng lai.

⁴²Chun, âuzawng hi bang hawng ka zûltu tla lakah a mêchem mi pakhat sinah hin, ka ðhiruai asi ruangah, tî dâi hâi khat cho khawm pêktu zawng chu, thungâi tak hen ka nan simh na, an lâwmman chu an dawk rîlmâl lai lo," a ti.

Mathai 11

¹Chun, hi hâwi hi asi le, Jisu nih a ðhiruai leinih tla chu thu a pêk thluh kê hen chu thawk chun khua nâi tla ah sîntir leh thusim hen a kal rawh.

²Chun, Baptistu Johan nih Krist thilti tla chu rêngin ah a theih rawh chun ðhiruai zeimaw mi a sinah a fial.

³"Hawng kal ding mi ma na si, midang kan ngâk lai rih ma?" ti hen, a ðhiruai tla nih Jisu rangah an deih.

⁴Chun, Jisu nih an sinah, "Kal nawlh ule, thil nan muh mi leh nan theih mi hi Johan sinah va simh u:

⁵mitchâw tla an mit a dei rawh, kekhêng tla kê hen an kal rawh, phâr tla an thiang rawh, nasêt tla khawm an nâ a fîm rawh, mithi tla khawm thawh hen an um rawh, mipâm tla sinah Thâwngthâng Tha sim asi rawh.

⁶Âuzawng ka tûnah zumhmai hnâk neilotu chu an thaw a suak," ti hen a sâng.

⁷Chu minung tla chu an tlung ka hen Jisu nih mi zapi sinah chun Johan thu a sim rawh, "Zei zauh ding hen me ramkaro ah nan kal mi kha? Lâiluang thli nih a sêm mi ma?

⁸Asi lo leh, zei zauh ding chem hen me nan kal mi kha? Puannêm aih ma? Puannêm aih tla chu lalchem in tla ah silo ma an um?

⁹Asi lo leh, zeiruang chem hen me nan kal mi kha? Khuavâng zauh ding hen ma? Asi rîlmâl ka nan ti na, khuavâng ngâk hen khawm rokual dauh.

¹⁰Zauhnik, ka mifial na mâi leiah ka fial asi. Anih nih chun na mâi leiah na lam a sial lai, ti hen a thâwngthâng an rîn mi kha hi minung hi asi.

¹¹Thungâi tak hen ka nan simh na, nunau ring mi lakah Baptistu Johan ngâk hen rokual dauh an suak lo rih; sikhawmsele, Vân Ram ah mi mêchem khawm anih ngâk hen chun an rokual dauh.

¹²Baptistu Johan umnâk thawk hen tutiang hen Vân Ram nih chun zângnâwrnâk a tawng tâwn le, zângnâwrtu tla nih chun zângran hen an lâk tâwn.

¹³Khuavâng tla zawzawng leh Mosi Dân thu nih chun Johan a hawng um tiang khan an simkan tâwn asi.

¹⁴Nan lung duh lam chun, chu chu Elija, hawng kal ding mi chu asi.

¹⁵Âuzawng theihnâk ding hen nâ nei nih chun theih seh.

¹⁶"Sikhawmsele, tusan mi tla hi zeï hen me ka tahthimh lai? Ngâksia sumtuah mun tla ah to hen, an hâwi tla auh hen,

¹⁷'Theikhang ka nan tum piak na le, nan lâm tung lo; thungâi kan tap le, nan ir nan chumh tung lo,' ti mi tla hâwi an si.

¹⁸Johan chu a hawng kal le, a ei hen a din lo le, Khuri nih a luah ma hi, an ti.

¹⁹Minung Fapa a hawng kal le, a ei hen a din, 'Zauhnik u, buh ei chak, uain din chak, siah khawlhtu tla leh misual tla hâwipa khi,' an ti fâwn. Sikhawmsele, a thilti rah tla nih a dik asi ti a zauhtir," a ti.

²⁰Chun, an rim lo ruangah a thilchê ti tamnâk chem khua tla chu a fâi rawh:

²¹"Korazin, na tlûn a pit, Betsaida, na tlûn a pit, nan lakah thilchê ti mi tla kha Tura leh Sidon ah ti si sele, salâpuan aih hen valeidip nâwngah to hen an rim ving lai rawh.

²²Sikhawmsele, ka nan ti na, lâirêl ni ah chun nannih tuar ngâk hen Tura leh Sidon tuar ding chu a ziachâng a um dauh lai.

²³Chun, nang Kapernaum, vân tiang hen chawnglawmh na si awt mazei? Mithi khua tiang hen na kal awt asi. Nangmah lakah thilchê tak ti mi tla kha Sodom ah ti mi si sele, tutiang hen a um kumza lai.

²⁴Sikhawmsele, ka nan simh na, lâirêl ni ah chun na tuar ding mi ngâk chun Sodom ram tuar ding mi chu a ziachâng a um dauh lai," a ti.

²⁵Chu liau chun Jisu nih, "Aw ka Pa, tual leh vân Lalpa, nangnih mifing leh mi fâifîm tla sinah hi bang thu hi na pheh, nausêm tla sinah na phuang ruangah hin ka nan sawr.

²⁶Asi, ka Pa, chu hâwi ti chu nangmah ngaih hen a ðha asi.

²⁷"Ka Pa nih thil zeizawng hawng ka kiltir rawh. Pa lo nih chun âukhawm nih Fapa hi an theih loh. Fapa leh an sinah Fapa nih a phuang duhnâk tla cho lo nih chun âukhawm nih Pa chu an theih loh.

²⁸"Nannah riançuan hamh leh thilrit phurh zawzawng tla, ka sinah hawng kal ule, keimah nih ka nan dîntir na lai.

²⁹Ka liangbat a bat ule, ka sinah a sîn u; dawnh kho mi leh thinslung ah â nâutir mi tak ka si; chun, nan thlarau rangah dinhnâk nan tawng lai.

³⁰Ka liangbat chu a nuam le, ka phurh khawm a zâng asi," a ti.

Mathai 12

¹Chu liau chun, Jisu chu Dinhni ah fâng mun a pal le, a ðhiruai tla chu an sungvâng le, favûi tla an khiak le, an ei rawh.

²Chun, Farisai tla nih chu chu an muh le, a sinah, "Zauhnik, na ðhiruai nih Dinhni ah ti ding a zarh mi chu an ti hi," an ti.

³Anih lam nih chun an sinah, "David a sungvâng liauah a hâwi tla hen an thil ti kha nan rêl lo mazei?

⁴Kha hâwi hen Pathian in ah a lût le, amah leh a hâwi tla ei a zarh mi, bawlpu tla cho nih ei a thiang mi sang siah mi an ei mi thu kha?

⁵Asi lo leh, Dinhni ah Pathian Biakin ah bawlpu tla nih chun Dinhni an buar khawmah an mawh lo vima ti Dân thu ah chun nan rêl lo mazei?

⁶Zeikhawm si sele, Pathian Biakin ngâk hen rokual dauh hinah a um ti ka nan simh na.



- ⁷Sikhawmsele, 'Bâwlnâk duhlo hen khuaruatnâk ka duh,' ti hi a umzia theih rawh mi si u le chu, mi a mawh lo mi tla chu nan mawhtir lo ding mi.
- ⁸Minung Fapa hi Dinhni Lal asi ruangah," a ti.
- ⁹Chun, chu thawk hen chun a kal le, anna pumhnâk in ah a va lût.
- ¹⁰Chunah mi pakhat kutkhêng a um. Chun, an phiar khonâk ding hen, "Dinhni ah damh a thiang ma?" ti hen, Jisu an deih.
- ¹¹Chun, Jisu nih chun an sinah, "Nan lakah âutal nih dawrâ pakhat nei ule, chu chu Dinhni ah khursaduap ah tâ sele, âu nih me tleih hen nûk lo lai?"
- ¹²Dawrâ pakhat ngâk hen minung pakhat chu thungâi a sung dauh a! Churuangah Dinhni ah, thattir a thiang," a ti.
- ¹³Chu kê hen chu minung sinah, "Na bân phar," a ti. Chun, a phar le, khatlei kâng hâwi hen a dam ver.
- ¹⁴Churawhchun Farisai tla chu an suak le, amâh an thah khonâk ding dân ruat hen anna thluk.
- ¹⁵Sikhawmsele, Jisu nih chun chu chu a theih rawh chun chu thawk hen chun a kal ving.
- ¹⁶Chun, mi tamtak nih amah an zûl le, an ektê hen a damh khap na le, a thâwngthâng phuang lo ding hen an sinah a ti thlir.
- ¹⁷Khuavâng Isai nih,
- ¹⁸"Zauhnik, ka to-aw ka thîm mi, ka duhtak, ka thinlung nih thungâi a lawmh mi hi. A tlûnah ka Thlarau ka siah lai le, chun phundang tla sinah lâirêlnâk thu a sim lai.
- ¹⁹A êl lai lo le, âukhawm a âu lai lo le, zâwllâi tla khawmah âukhawm nih a hâu an theih lai loh.
- ²⁰Neh ding hen lâirêlnâk ah a fial lân lo chu lâiluang fawp a thlawng lai lo, la khû khawm a mih lai loh.

²¹A min chu Phundang tla nih an umsan lai," ti hen, a sim mi kha a hawng tlung khonâk ding hen.

²²Chu liau chun mitchâw hawlh kho lo mi, khuri vuanh pakhat an hawng put le; chun, anih nih chun a damh le, chun a hawlh kho lo mi chu a hawng hawlh kho hen a hawng muh kho rawh.

²³Chun, mi zapi tla zawzawng nih chun thungâi chê an ti le, "Hi minung hi David Fapa asi lo mazei?" an ti.

²⁴Sikhawmsele, Farisai tla nih chun chu chu an theih kê hen, "Hi minung nih hin khuri lal Belzebul thiltikhonâk ruangah lo chun khuri tla a nar lai lo," an ti.

²⁵Chun, Jisu nih an ruât mi tla chu a theih le, an sinah, "Zei ram khawmah mah leh mah anna do mi zawng an vei tawn; zeि khua khawmah dawng khat khawm mah leh mah anna do mi zawng an um khuasuak lai lo.

²⁶Chun Setan nih Setan ber a nar chun mah a do mi asi lai lo ma, a ram chu zeitin me a dîr kho lai?

²⁷Chun, kei Belzebul thiltikhonâk ruangah khuri tla nar tâwn ka si chun nan fa tla nih âu ruangah ne an nar tâwn ne? Churuangah annih chu nanmah lâirêltu ding tla an si lai.

²⁸Sikhawmsele, kei Pathian Thlarau ruangah khuri tla nar tâwn ka si chun Pathian Ram nan sinah a tlung rawh asi lai.

²⁹"Chu hâwi asi lo chun mi nih mi chak chu a phuar tâ masa lo chun zeitin mi chak in mi lût hen a sum a lâk piak kho lai? Chu nûn lam chun a in chu a phûl piak kho lai.

³⁰Âuzawng keimah leiah tâng lo mi chu hawng ka do asi; âuzawng hawng ka khawmphi lotu nih chun a thektham asi.

³¹Churuangah, ka nan ti na, mi an sualnâk kipah leh an simsiatnâk kipah chun ngaihdam an si lai: Thlarau Thenhlimh ngâi simsiat lam chu ngaihdam piak asi lai lo.

³²Chun, âuzawng Minung Fapa simsâwitu zawng chu an simsiatnâk chu ngaihdam piak asi lai; âuzawng Thlarau Thenhlimh ngâi simsâwitu zawng lam chu an simsâwinâk chu tu dam sung khawmah, tik hawng tlung ding mi khawmah chun ngaihdam piak asi lai lo.

³³"Thing chu a ða, a rah khawm a ða nan ti lo dâidua chun, thing chu a sia, a rah khawm a sia ti dâidua u; thing chu a rah lakah â theih ruangah.

³⁴Rûl thlâk tla, nannih sual ko bû hen zeitin me thu ða nan sim kho lai? Thinlung ah khat hen a liam mi chu kê nih a sim tâwn asi.

³⁵Mi ða nih a robâwm ða lakah mi thil ða tla a suah tâwn le, misual nih chun a robâwm sia lakah mi thil sia tla a suah tâwn.

³⁶"Chun, ka nan simh na, mi nih thu-do-tla-lo an sim kipah chu thu thâwnghâng chu lâirêl ni ah chun an sim lai.

³⁷Na thu tla chu lâi a nan rêl ding hen mang asi lai le, na thu lîlâ nih a nan mawhtir awt asi," a ti.

³⁸Chu liau chun Dân sîntirtu leh Farisai tla lakah mi âu nih mawh an sawnh le, a sinah, "Sîntirtu, na sin thawk hen singsiahnâk muh kan duh," an ti.

³⁹Anih nih chun an sinah, "Tusan sual tak leh ðângdang pawmtâk mang tak mi nih chun singsiahnâk an hâwl le, sikhawmsele khuavâng Jona singsiahnâk cho lo chu an sinah singsiahnâk rerêng pêk an si lai lo:

⁴⁰Jona chu ni thum leh zân thum ngapi paw sungah a um hâwi khan Minung Fapa hi ni thum leh zân thum tual sungah a um bâk awt asi.

⁴¹Ninevi khua mi tla chu lâirêl ni ah chun tusan mi le tla sinah hin an dîr lai le, an mawhtir na lai, Jona thusim lakah an rim ruangah; ngâinik u, Jona ngâk hen rokual dauh hinah hin a um asi.

⁴²Simlei lalnu kha lâirêl ni ah chun tusan mi tla sinah hin a thawk bâk lai le, an mawhtir na lai; Solomon finghnâk ngâi ding hen men kâwlkil thawk hen a hawng kal ruangah. Ngâinik u, Solomon ngâk hen rokual dauh hinah hin a um.

⁴³Chun, khuri nâwmtâm chu mi paw sungah mi a suak rawh chun dînnâk hâwl ê hen tî umlonâk mun tla ah â sawk lemanh le, a tawng lo.

⁴⁴Chun, 'Ka suaknâk in ah khan ka kîr nawlh ko lai,' a ti le; chun a va tlung rawh chun lâwng tlo hen, thiang ver phiat hen, thuamh ziar hen a muh.

⁴⁵Chu kê hen a va kal le, amah ngâk hen sual dauh mi khuri dang pasarih a put na le, chunah chun an lût le, an um kumza tâwn le; chu minung umzia nehnûn lei chu a lân ngâk hen a t̄ha lo khun tâwn. Chu hâwi ber hen tusan sual tla tlûnah hin a um teh lai," ti hen, a sâng.

⁴⁶Mi zapi tla sinah thu a sim liauah chun a nu leh a unau tla chu amah sawnh ding tum hen lênglei ah an dîr.

⁴⁷Chun, minung pakhat nih a sinah, "Zauhnik, na nu leh na unau tla nangmah sawnh ding hen lênglei ah an dîr ko," a ti.

⁴⁸Anih lam nih chun a simhtu sinah chun, "Ka nu chu âu mesi? Ka unau tla khawm chu âu me an si?" ti hen a sâng.

⁴⁹Chun, a t̄hiruai tla leiah a bân a phar le, "Zauhnik u, ka nu leh ka unau tla hi!

⁵⁰Âuzawng ka Pa vâh ah mi duhzia titu zawng chu ka unau tla, ka farnu tla, ka nu tla an si," a ti,

Mathai 13

¹Chu ni chun Jisu chu in ah mi a suak le, rilî kap ah chun a to.

²Chun, a sinah mi zapi cherkhet an hawng a pûm le, chuvachun lawng ah â chuan le, a to le; mi zapi zawzawng chu Seppho ah an dîr.

³Chun, tah̄thimh thu hen thu tamtak an sinah a sim le: "Fachî vawrhtu fachî vawrh hen a kal.

⁴Chun, a vawrh liauah a zeimaw mi lam vâu ah a tlâ le, va tla nih an tlanh hep.

⁵Chun, a zeimaw mi lungpher tual pannâk mun ah a tlâ; tual a sah lo ruangah a kho sawm le;

⁶sikhawmsele, nê a sâng dauh rawh chun a emh le, a uai tlek le, ram a nei lo ruangah a mawt ko.

⁷Chun, a zeimaw mi belh lingnei nâwngah a tlâ le, bua chu a hawng sâng vima le, a dawrh kêk.

⁸Chun, a zeimaw mi tual tha lakah a tlâ le, a zeimaw mi a leh zâ hen, zeimaw mi a leh sâwmruk hen, a zeimaw mi a leh sâwmthum hen lebang a rah rawh.

⁹Âuzawng nê nei nih chun theih seh," a ti.

¹⁰Chun, thiruai tla chu Jisu sinah an hawng kal le, a sinah, "Zeirangah me an sinah tahthimh thu hen na sim an ti.

¹¹Chun, anih nih chun a sâng le, an sinah, "Vân Ram thuthup tla chu nannih theih lam chu siang asi, annih theih lam chu siang asi lo.

¹²Âuzawng a neitu chu an pêk sap lai le, an nei thlo lai; sikhawmsele, âuzawng a neilotu chu a neihlem mi khawm lâk piak asi lai.

¹³Churuarangah chun tahthimh thu hen an sinah ka sim asi; muh na khawmsele an muh tâwn lo le, nê hen theih na khawmsele an theih tâwn lo le, a ngaihtawnh dân khawm an theih tâwn lo ruangah.

¹⁴Chun, Isai thusim kha an tlûnah a hawng tlung mahi: Nê hen chun nan theih narêng hen a ngaihtawnh dân lam chu nan theih rîlmâl lai lo; muh lam chu nan muh narêng hen theih lam chu nan theih rîlmâl lai lo.

¹⁵Hi phun tla thinlung hi a mawlâwt rawh le, an nê tla a ngawng ver le, an mit an sîm le, Chu lo chun kan mit hen kan muh lai le, kan nê nih a theih lai le, kan thinlung hen kan theih ber lai le, kanna lêt nawlh lai le, anih nih hawng kan damh sual lebang lai,' an ti, a ti mi kha.

¹⁶"Nannih mit lam chu a vân tha asi, a muh tâwn ruangah; nan nê khawm a vân tha asi, a theih tâwn ruagah.

¹⁷Thungâi tak hen ka nan simh na, khuavâng tamtak tla leh mi rep tamtak tla khawm nih nan thil muh tla hi muh an duh le, sikhawmsele an muh lo; nan thil theih tla khawm hi theih an duh le, sikhawmsele an theih lo.

- 18"Chuvachun, fachî vawrhtu tahthimh thu chu theih u.
- 19Âuzawng nih Ram thu chu nâ nih a theih hen, a ngaihtawnh dân a theih lêm lo chun Setan chu a hawng kal le, a thinlung ah vawrh chia chu a suh ving tâwn. Chu minung chu lam vâu ah vawrh mi chu asi.
- 20Chun, lungpher mun ah vawrh mi chu, thu chu theih hen lâwm tak hen tleih tâwntu hi asi:
- 21Sikhawmsele, amah lakah chun ram a um lo le, sâwtlotê cho a um le; chun thu ruangah chun hamhnâk mawh nehsawhnâk mawh a hawng um hen a zumhnâk a bâng sawm tâwn.
- 22Chun, bualingnei nâwngah vawrh mi chu, thu theih tu asi le, sikhawmsele laikulh lungkhamnâk leh neihnâk nih chun thu chu a dawrh le, rah lo hen a hawng um tâwn.
- 23Chun, tual tha tlûnah vawrh mi chu, thu chu nâ nih theih hen, a ngaihtawnh dân khawm theih hi asi le, chu minung chu a rah taktê le, zeimaw mi a leh zâ hen, zeimaw mi a leh sâwmruk hen, zeimaw mi a leh sâwmthum hen a pung tâwn," a ti.
- 24Tahthimh thu dang an sinah a sim nawlh le: "Vân Ram chu mi a lo ah chî tha vawrhtu hen tahthimh asi;
- 25sikhawmsele, mi an it thit karah a mêlma a hawng kal le, fâng lakah chun fâng telê a vawrh le, a kal nawlh ving.
- 26Chun, fâng chu a hawng kho le, a hawng vûi le, fâng telê chu a hawng lang rawh.
- 27Chun, in dâwngpu to-aw tla chu an hawng kal le a sinah, Ka pu, na lo ah chî tha na vawrh lo na maw? Fâng telê khi kha ze lei thawk hen a hawng um mi mesi?' an ti.
- 28Chun, anih nih chun an sinah, 'Mêlma nih a hawng ti mi ma chu!' a ti. Chun, to-aw tla nih chun, Asi chun chubang tla chu va pumh ko sele rem na ti ma?' an ti.

²⁹Anih lam nih chun, 'Ti lai le a, fâng telê chu nan pumh chun fâng nan phâwi sih سوال lai.

³⁰Fâng ât tiang hen munkhat hen kho ko na seh; chun fâng ât tikah fâng âttu tla sinah, 'Fâng telê chu pumh masa tâ ule, duah ding hen têt u, fâng lam chu ka fângbâwk ah thiar u, ka ti teh lai,' a ti, a ti.

³¹Tahthimh thu dang an sinah a sim nawlh le: "Vân Ram chu anțam chî mal khat mi nih a lâk le, a lo ah a vawrh mi hâwi chu asi.

³²Chu chu chî zawzawng ngâk hen a mêchem le, sikhawmsele a kho hen a sâng tikah chun thlâi tla ngâk hen chun a lian dauh le, thing a hawng si tâwn le, chuvachun tlûn zuang va tla chu an hawng kal le, a ngê tla ah chun an riak," a ti.

³³Tahthimh thu dang an sinah a sim nawlh le: "Vân Ram chu thilnu nunau nih a lâk le, sangvut Seah thum lakah a ektê hen zunh ver tiang hen a phûm mi hâwi chu asi," a ti.

³⁴Chubang zawzawng chu Jisu nih tahthimh thu hen mi zapi tla sinah a sim le, tahthimh thu lo hen an sinah zeikhawm a sim lo:

³⁵Khuavâng nih, "Tahthimh thu hen ka kê ka âng lai le, tual tuah tîr thawk hen thil thup chu ka sim lai," ti hen a sim mi kha a hawng tlung khonâk ding hen.

³⁶Chu liau chun mi zapi tla chu a kaltâk na le, in ah chun a lût rawh; chun a thiruai tla chu a sinah an hawng kal le, "Lo ah fâng telê tahthimh thu kha hawng kan simhfiang," an ti.

³⁷Chun, anih nih chun a sâng le,

³⁸"Chî ța vawrhtu chu Minung Fapa hi asi; lo chu laikulh hi asi le, chî ța chu Pathian Ram fa tla an si le, fâng telê chu Setan fa tla an si.

³⁹Mêlma, a vawrhtu chu Diabol asi; fâng ât chu laikulh dawngnâk ding asi; fâng âttu tla chu vânmifial tla an si.

⁴⁰Chuvachun, fâng telê tla chu an pumh hen mei ah an duah hâwi hen laikulh dawngnâk ah chun a um lai.

⁴¹Minung Fapa nih hin a vânmifial tla chu a fial lai le, a ram thawk hen sualtirtu tla leh thilsual titu tla zawzawng chu a khawk na lai le,

⁴²meipi ah an lawnh na lai; chunah chun ɽap leh hachang rial chu a um lai.

⁴³Chu tikah chun mi rep tla chu an Pa Ram ah nî hâwi hen an chêu lai rawh. Nâ nei nih chun theih seh!

⁴⁴"Vân Ram chu lo ah ro a thup hen phûm mi hâwi asi; chu chu mi nih a muh le, a thuh le, â lâwm ruangah a neih zawzawng chu a zuar le, chu lo chu a chhawk rawh.

⁴⁵"Chun, Vân Ram chu sawlehtu âitikep lung ɽha tak hâwltu hâwi chu asi fawn:

⁴⁶Chun, anih nih chun âitikep lung sung tak pakhat a tawng le, a neih zawzawng chu a zuar le, a chhawk rawh.

⁴⁷"Chun, Vân Ram chu lêngkhang tisumsumriat ah vawrh hen, chi kip fûn khup mi hâwi chu asi nawlh fawn:

⁴⁸chu chu a khat kê hen vakap leiah an nûk le; chun an to le, a ɽha mi vial chu bâwm ah an khumh le, a sia mi lam chu an lawnh.

⁴⁹Laikulh dawng tikah chun chu hâwi ber hen a um lai. Vânmifial tla chu an hawng suak lai le, mi rep lakah mi misual tla chu an thlei na lai;

⁵⁰meipi lakah an lawnh lai; chunah chun ɽap leh hachang rial chu a um lai," a ti.

⁵¹Jisu lîlâ nih an sinah, "Chubang zawzawng chu nan theih ma?" a ti. Annih nih chun, "Theih ta a," an ti.

⁵²Chun, anih nih chun an sinah, "Chu hâwi asi chun, Dân sîntirtu Vân Ram lampi sîntir hen um mi vial chu in dâwngpu a robâwm lakah mi thil thar tla leh thil li tla thuak tâwntu hâwi chu asi," a ti.

⁵³Chun, hi hâwi hi asi le, Jisu nih chubang tahthimh thu tla chu a sim thluh kê hen chu thawk hen chun a kal rawh.

⁵⁴Chun, a umnâk khua lei chu a va tleng le, anna pûmnâk in ah chun anmah a sîntir na le, chuvachun thungâi chê an ti le, "Hi minung nih hin hi finghnâk leh hi bang thiltikhonâk tla hi zeî thawk hen me a tawng?"

⁵⁵Hi minung hi thing hen thil siamtu fapa kha asi lo mazei? A nu chu Mari an ti mi asi lo mazei? A unau tla khawm Jem, Josef, Simon leh Juda an ti mi tla chu an si lo mazei?

⁵⁶A farnu tla khawm kan sinah an um ver lo mazei? Hi minung nih hin zeî thawk rîlmâl hen me hi bang zawzawng hi a tawng?" an ti.

⁵⁷Chun, amah an zumh lo. Sikhawmsele, Jisu nih an sinah, "Khuavâng chu amah khua leiah leh amah in leiah cho lo chun chawnglawmh lo hen a um dah loh," a ti.

⁵⁸Chun, an lung lo ruangah chunah chun thilchê tam a ti lo.

Mathai 14

¹Chu liau chir chun lal Herod nih Jisu thâwnghâng chu a theih le,

²a to-aw tla sinah, "Chu chu Baptistu Johan kha asi ma chu; mithi lakah mi a thawknawlh ma chu; churugah chubang thiltikhonâk tla nih amah lakah a tuan ma chu!" a ti.

³Herod nih chun a unau nupi Herodi ruangah Johan chu a tleih le, a phuar le, rêngin ah a khumh rawh asi.

⁴Johan nih chun a sinah, "Anih na umpi hi dân asi lo," a ti piak ruangah.

⁵Chun, Johan chu thah ding a awt chun mi zapi a ÷ih le, khuavâng ah an ruat ruangah.

⁶Sikhawmsele, Herod suak cham ni chu a hawng tung le, Herodi fanu chu a lâi ah a lâm le, Herod chu a lawmhtir rawh.

⁷Churugah chun a deih mi zawng pêk ding hen siat tleih hen a tiamh.



⁸Chun, anih nih chun a nu fawrh hen, "Hinah hin khêng hen Baptistu Johan lû hawng ka pêk," a ti.

⁹Chun, lal chu a thinlung a lawksawng rawh; sikhawmsele, a thutiam a buh dumpitu ruangah chun pêk ding thu a pêk.

¹⁰Chun, mi a fial le, rêngin ah Johan lû chu a tantir.

¹¹Chun, a lû chu khêng hen an hawng put le, nunau ngâksia sinah chun an pêk. Anih nih chun a nu sinah a kalpi rawh.

¹²Chun, ðhiruai tla nih a ruak chu an va lâwm le, an phûm le; chun Jisu an va simh.

¹³Chun, Jisu nih chu chu a theih rawh chun, chunah mi chu lawng hen mi kingnâk mun ah a dang hen a kal rawh. Sikhawmsele, mi zapi tla nih chun an theih kê hen khua thawk hen kê a kal hen an zûl rawh.

¹⁴Chun, anih chu vakap ah a suak rawh chun mi zapi cherkhet a muh le, thungâi a siherh na, damlo tla a damh na.

¹⁵Chun, zânleibâi a hawng si hen ðhiruai tla chu a sinah an hawng kal le, "Hi hi mi kingnâk mun asi le, a zânleibâi ual rawh; khua tla ah kal hen an rangah ei ding an châwk khonâk ding hen mi zapi tla hi kaltir na me," an ti.

¹⁶Jisu lam nih chun an sinah, "Annih kal a ngâi lo, nanmah nih ei ding pêk na u," a ti.

¹⁷Chun, annih nih chun, "Hinah sangtlêp panga leh ngâ panih cho kan nei asi," an ti.

¹⁸Chun, anih nih chun, "Hinah ka sinah hawng put u," a ti.

¹⁹Chun, ramhthep tlûnah to ding hen mi zapi tla chu thu a pêk. Sangtlêp panga leh ngâ panih chu a lâk le, vên lei zauh hen mal a sâwm le, a phel le, sângtlêp tla chu a ðhiruai tla sinah a pêk. Chun, ðhiruai tla nih chun mi zapi tla sinah an pêk.

²⁰Chun, an ektê hen an ei le, an khim khap le, an ei bang neknâwi khawm chu an rût le, khobung leinih a khat.

- ²¹A eitu tla chu nunau leh ngâksia sim lo hen upa karo khawm sângnga ding asi.
- ²²Chun, mi zapi tla chu a òaktir na karah a kal lânah khat lei râl ah kal masa ding hen òiruai tla chu lawng ah a chuantir râm na.
- ²³Chun, mi zapi chu a òaktir na nûnah thlacham ding hen tâng ah a dang hen a kal le; chun, zânleibâi a hawng si rawh chun, chunah chun amah cho hen a um rawh.
- ²⁴Lawng lam chu rilî lâi chir ah a um le, thli nih amah lo leikângah a sêm ruangah tî tlinglawk nih a lawh lemanh.
- ²⁵Chun, khawfîm chat awt bâi ah rilî tlûnah kê hen a kal le, anmah lei a fûk.
- ²⁶Chun, òiruai tla nih chun amah chu rilî tlûnah kê hen a kal mi an muh rawh chun, "Mithla ma khi!" ti hen, an thla a kâm le, lâu hen thungâi an âu.
- ²⁷Sikhawmsele, Jisu nih anmah a sawnh sawm na rawh, "Lungngam tak hen um u, keimah ka si, lâu lah u," a ti.
- ²⁸Peter nih a sâng le, a sinah, "Lalpa, nang na si chun tî tlûnah na sinah hawng ding thu hawng ka pêk," a ti.
- ²⁹Chun, anih nih chun, "Hawng kal ko me," a ti. Peter chu lawng lak mi chu a tum le, Jisu leikâng fûk hen tî tlûnah kê hen a kal.
- ³⁰Sikhawmsele, thli a râng mi chu a muh le," a lâu; chun, a pil awt le, "Lalpa, hawng ka hum rawh," ti hen, a âu rawh.
- ³¹Chun, Jisu nih a banh sawm le, amah chu a tleih le, a sinah, "Nang, lung tâwm, zeirangah na zumhmayh?" a ti.
- ³²Chun, lawng ah anna chuan rawh chun thli chu a bâng ko rawh.
- ³³Chun, lawng lakah um mi tla nih chun, "Pathian Fapa na si tak ngâk mahi," ti hen, amah mâi an mûk.
- ³⁴Chun, khatlei râl an kâi rawh chun, Genesaret ram an tleing rawh.

³⁵Chun, chu mun mi tla nih chun amah an theih kê hen, chu kiangkam ram zawzawng ah chun mi an fial le, damlo zawzawng chu a sinah an hawng put.

³⁶Chun, a puan sâr tal tham kho ding an deih chiam le; chun a thamtu zawng chu an dam vima rawh.

Mathai 15

¹Chu liau chun Jerusalem thawk hen Farisai tla leh Dân sîntirtu tla Jisu sinah an kal le,

²"Zeirangah me na ðhruai tla nih thlâktu thurovuih chu an buar tâwn? Sang an ei chun an kut an ðâwl lo," an ti.

³Chun, anih nih chun an sinah, "Nannah khawm nih zeirangah nan thurovuih ruangah Pathian thupêk nan buar ne?"

⁴Pathian nih, 'Na nu leh na pa chawnglawmh rawh, 'Âuzawng a nu mawh a pa mawh simsiattu chu thi ngelchel seh,' a ti ruangah.

⁵Nannah lam nih chun, 'Âuzawng a nu mawh a pa mawh sinah na ka mangnâk ding hi Pathian sinah pêk asi rawh, titu zawng chu a nu mawh a pa mawh chawnglawmh ding asi lo,' nan ti tâwn.

⁶Chun, nan thurovuih ruangah Pathian thu chu nan thlâu phah rawh mahi.

⁷Mi perpê tla, Isai nih hin nan thu a simkan mi hi thungâi a dik ko!

⁸Hi minung tla nih hin an kê hen an ka chawnglawmh le, an thinlung lam nih chun an ka lâp tâwn.

⁹Zeikhawm si sele, an sîntirnâk ah minung thupêk an sîntir na ruangah, an ka sawnh tâwn hi a thawt salam asi,' a ti," a ti le, a sâng.

¹⁰Chun, mi zapi tla chu a kawh na le, an sinah, "Ngâi ule, a ngaihtawnh dân thiam u:

¹¹Kê ah lût mi chu minung nawmhtu asi lo le, kê thawk suak mi chu, chu tak chu minung nawmhtu asi dauh," a ti.



¹²Chu liau chun a ʒhiruai tla an hawng kal le, a sinah, "Farisai tla nih kha thu kha an theih le, an thinthawk mi kha na theih ma?" an ti.

¹³Anih lam nih chun, "Kûng zawzawng ka Pa vên ah mi nih a phun lo mi chu phâwi hen a um lai.

¹⁴Annih chu zeikhawm siar lah u; ruitu mitchâw an si. Chun, mitchâw nih mitchâw lîlâ a rui chun khursaduap ah munkhat hen an tlâ vevê lai," a ti le, a sâng.

¹⁵Chun, Peter nih a sinah, "Tahʒhimh thu kha hawng kan simhfiang me ne?" a ti piak.

¹⁶Chun, anih nih chun, "Tutiang hen nannih khawm nih theihnâk neilo hen nan um nget rih mu?

¹⁷Kâ ah lût mi vial chu paw lakah a tlâ le, pâwng kalnâk ah lawnh hen a um ti nan theih lo ma?

¹⁸Kâ thawk suak lam chu thinlung thawk hen a hawng suak le; chu tak nih chun minung a nawmh tâwn asi.

¹⁹Thinlung ah hin dawnnâk sual tla, mi thahnâk tla, ʒângdang pawmnâk, duhnâk, fîrnâk, phiarnâk, simsiatnâk tla a hawng suak tâwn.

²⁰Chubang chu minung nawmhtu asi; kut ʒâwl lo hen buh ei lam nih chun mi a nawmh lo," a ti.

²¹Chun, Jisu chu chunah mi chu a suak. Tura leh Sidon bial ah a kal rawh.

²²Chun, chu ram mi chu Kanaan nunau pakhat a hawng suak le, "Lalpa, David Fapa, hawng ka zângfah rawh, ka fanu khuri nih a tleih thlir asi," ti hen a âu.

²³Anih lam nih chun kâ khat hen men a sâng lo. Chun, a ʒhiruai tla nih chun, "Kan dung leiah a âu lemanh mi, kaltir ko ma a," ti hen an hawng ngiar.

²⁴Anih lam nih chun, "Israel mi tla dawrâ tlâu sinah lo chun fial ka si lo," a ti le, a sâng.

²⁵Sikhawmsele, nunau chu a hawng kal le, "Lalpa, hawng ka ʒangpi rawh," ti hen mâi a mûk.

²⁶Chun, anih nih chun, "Fa tla sang lâk piak hen ui tla sinah lawnh chu â dawh lo," a ti le, a sâng.

²⁷Anih nih chun, "Lalpa, si lam chu asi; sikhawmsele, ui tla khawm nih an pu dawhkân lakah mi sang neknâwi a tlâ mi chu an ei tâwn lo mazei?" a ti.

²⁸Chu kê hen Jisu nih chun a sinah, "Nunau, na lungnâk a fâk tuktarâi; na duh hâwi hen na tlûnah um seh," a ti le, a sâng. Chun, a fanu chu chu dâr thawk chun a hawng dam ko rawh.

²⁹Chun, Jisu chu chu thawk hen chun a kal le, Galili Rilî kiang a tleng le; chun tlâng ah chun a kê le, chunah chun a to rawh.

³⁰Chun, mi zapi cherkhet ke khêng, mitchâw, hawlh kholo, suaksual tla damlo tla tamtak an hawng put na le, a sinah an hawng kal le, a kê kiang ah an siah; chun, a damh khap na.

³¹Chuvachun, mi zapi nih chun hawlh kho lo tla an hawng hawlh kho hen, a suaksual mi tla an hawng a remh hen, kekhêng tla kê hen an hawng kal hen, mitchâw tla an hawng muh kho mi an muh rawh chun thungâi chê an ti le; chun Israel tla Pathian chu an sawr rawh.

³²Chun, Jisu nih a thiruai tla chu a kawh na le, "Mi zapi tla hi tuah ni thum ka sinah an um rawh le, ei ding zeikhawm an nei lo ruangah thungâi ka lungkham na asi; sungvâng bû hen kîrtir na ka duh lo, chu lo chun lam lakah an vâiphâl lai," a ti.

³³Chun, thiruai tla nih chun a sinah, "Mi zapi hi tluk rak khawp rê ding hen sangtlêp chu tluk rak ramkaro ah kha ze mi me kan tawng lai?" an ti.

³⁴Chun, Jisu nih an sinah, "Sângtlêp zeizat nan nei?" a ti. Chun, annih nih chun, "Tlêp sarîh leh ngâ tâwmtê," an ti.

³⁵Chun, anih nih chun tual ah to ding hen mi zapi chu thu a pêk.

³⁶Chun, sangtlêp pasarih leh ngâ tla chu a lâk le, lâwmthu a sim le, a phel le, thiruai tla sinah a pêk. Chun, thiruai tla nih chun mi zapi tla sinah an pêk.

³⁷Chun, an ektê hen an ei le, an khawp khap; an ei bang neknâwi khawm chu khobung sarih an rût le, a khat.

³⁸A eitu tla chu nunau leh ngâksia sim lo hen, upa karo khawm sâng li an si.

³⁹Chun, mi zapi tla chu a ãiaktir na nûnah lawng ah â chuan le, Magadan ram leiah a tlung.

Mathai 16

¹Chun, Farisai tla leh Sadukai tla an hawng kal le, amah nikhâk ding hen vân thawk hen singsiahnâk anmah zauhtir ding hen an deih.

²Sikhawmsele, anih nih chun an sinah, "Zânleibâi a hawng si rawh chun, 'Ni khua a ãa awt si lai, vân kam a sen tât, nan ti tâwn.

³Chun, zîng ah chun, 'Tusûn chu ni khua a ãa awt lo si lai, vân kam a sen, ni khua a dâwm,' nan ti tâwn. Ni khua umzia chu nan theihthiam le, sikhawmsele tik singsiahnâk tla hi nan theihfiang kho lo.

⁴Tusan minung sual tak leh ãangdang pawmtâk mang tak tla nih chun singsiahnâk an hâwl le, sikhawmsele Jona singsiahnâk cho lo chu an sinah singsiahnâk rerêng pêk asi lai lo," a ti le, a sâng. Chun, anmah a mâk na le, a kaltâk ving na.

⁵Chun, ãhruai tla chu khatlei râl ah an tlung rawh chun sang put an philh.

⁶Chun, Jisu nih an sinah, "Farisai tla leh Sadukai tla thilnu lakah chun a vêng ule, a thiamthih u, a ti.

⁷Chun, annih nih chun, "Sang kan put lo thlo," ti hen anna dawnruat.

⁸Chun, Jisu nih chu chu a theih le, "Lung tâwm tla, zeirangah sang nan nei lo ruangah nan dawn?

⁹Tu khawmah nan thinlung hen nan theih lo nget rih ma? Mi sângnga sinah sangtlêp panga nan ãhen mi leh khobung nan rût zat kha nan theih ko lo rih ma?

¹⁰Mi sâng li sinah sangtlêp pasarih nan ãhen mi leh khobung nan rût zat kha?

11Sang thu nan sinah ka sim lo ti zeitin zia nan theih lo? Farisai leh Sadukai thilnu lakah chun a thiamthih u," a ti.

12Churawhchun, sang thilnu lakah a thiamthih ding hen a simh na lo le, Farisai leh Sadukai tla sîntirnâk lakah thiamthih ding hen anmah a ti dauh na ti an theih rawh.

13Chun, Jisu chu Philipi Kaisari bial chu a va tlung rawh chun a thiruai tla sinah, "Mi le nih Minung Fapa hi âu si ding hen an ruat?" ti hen, a deih na.

14Chun annih nih chun, "Mi zeimaw mi nih, 'Baptistu Johan asi,' an ti; zeimaw mi nih, 'Elija asi,' an ti; zeimaw mi nih, 'Jeremia mawh khuavâng âumawh asi,' an ti," an ti.

15Anih nih chun an sinah, "Asi chun, nannih nih âu si ding hen nan ka ruat?" a ti.

16Chun, Simon Peter nih, "Mesia, Pathian nung Fapa chu na si," a ti le, a sâng.

17Chun, Jisu nih a sinah, "Simon, Johan fapa, na thaw a suak; minung nih a nan theihtir mi asi lo le, ka Pa vân ah mi nih a nan theihtir mi asi dauh.

18Chun, nang Peter na si ti ka nan simh; hi lungpi tlûnah hin ka kawhmi ka dirh lai le, thihnâk nih chun a neh lai lo.

19Vân Ram renh tla ka nan pêk lai le, tual tlûnah zeizawng na khap mi vial vân ah khap asi lai; tual tlûnah zeizawng na phal mi vial vân ah phal asi lai," a ti le, a sâng.

20Churawhchun, Mesia asi ti âukhawm simh lo ding hen thiruai tla chu thu a kilh thir.

21Chu ri rawh chun, Jisu nih Jerusalem ah a kal ding tla, upa tla, bawlpu lal tla leh Dân sîntirtu tla lakah thil tamtak a tuar ding zia tla, thah hen a um ding zia tla, ni thum ni ah thawk hen a um ding zia tla chu a thiruai tla theihtir a dawmh rawh.

22Peter nih chun a dangtê hen a kalpi le, "Lalpa, Pathian nih khuaruat seh; chubang chu na tlûnah a tlung rîlmâl lai loh," ti hen, a khap.

²³Anih lam chu â her le, Peter sinah chun, "Setan, ka dung leiah kal, ka rangah tlûknâk na si; Pathian thil tla ruat lo hen minung thil tla na ruat dauh mahi," a ti.

²⁴Chun, Jisu nih a thiruai tla sinah, "Âuzawng hawng ka zûl a duh mi nih chun mah hamhnâk siarlo hen, a kraws put hen hawng ka zûl seh.

²⁵Âuzawng a nungnâk hum duhtu vial a dawk lai; âuzawng keimah ruangah a nungnâk dawktu vial nih a tawng lai.

²⁶Mi nih laikulh hi a pum hen a ting sele, a nungnâk dawk sele, a rangah zeï a thatnâk a um lai? Asi lo leh, mi nih a nungnâk rûlah zeï me a pêk lai?

²⁷Minung Fapa hi a vânmifial tla hen a Pa rokualnâk a thum hen a hawng kal awt ruangah; chu tik chun mikip an thilti hâwi vima hen a rulh chiau lai.

²⁸Thungâi tak hen ka nan simh na, hinah dîr tla zeïmaw mi hi Minung Fapa a Ram ah hawng mi an muh lân lo chu thihnâk tem lo thlo ding mi an um," a ti.

Mathai 17

¹Chun, ni ruk nûnah chun, Jisu nih Peter, Jem leh a unau Johan tla chu a kalpi na le, a dang hen tlâng sâng takah a kâipi na.

²An mâika ah chun a mêl umzia chu a hawng a dang rawh. A mêl chu nî hâwi hen a hawng chêu le, a nipuan tla chu chêu hâwi hen a hawng vâ rawh.

³Chun, Mosi leh Elija chu amah hen a sâwn hen an sinah anna langh.

⁴Chun, Peter nih Jisu a sawnh le, "Lalpa, kan rangah hinah um hi a tha; na duh chun hinah hin basâ pathum ka khuar lai; nang rangah pakhat, Mosi rangah pakhat, Elija rangah pakhat," a ti.

⁵A sim liau chir ah, sûm vâ rawh tak nih anmah a phenh na rawh; chun, sûm thawk hen aw-hâu nih, "Hi hi ka Fapa duhtak, ka lawmh mi chu asi, amah thu ngâi u," a ti.

- ⁶Chun, ðhíruai tla nih chu chu an theih rawh chun tual lei an buk le, thungâi an lâu.
- ⁷Chun, Jisu nih annih chu a tham na le, "Thawk ule, lâu lah u," a ti.
- ⁸Chun, an vân an tâu le, Jisu cho lo chu âukhawm an muh lo rawh.
- ⁹Chun, tâng ah mi chu an ðum liauah Jisu nih an sinah, "Minung Fapa hi mithi lakah mi a thawknawlh lân lo chu hi muhtirnâk nan muh mi kha âukhawm simh lah u," ti hen thu a pêk na rawh.
- ¹⁰Chun, a ðhíruai tla nih chun a sinah, "Dân sîntirtu tla nih, 'Elija a hawng kal masa dîng asi,' zeitin zia hen ti me an si le?" ti hen, an deih.
- ¹¹Chun, anih nih chun, "Elija chu a hawng kal awt masa rêng asi, zeizawng a hawng remh lai.
- ¹²Sikhawmsele, ka nan simh na, Elija chu a hawng kal rawh rêng asi, amah chu an theih lo le, a tlûnah an duh duh hen an ti dauh lehlam. Chu hâwi ber hen Minung Fapa khawm nih hin an lakah a tuar bâk awt asi," a ti le, a sâng.
- ¹³Chu kê hen ðhíruai tla nih chun Baptistu Johan thu an sinah a sim mi ti an theih rawh.
- ¹⁴Chun, mi zapi sinah an hawng tlung rawh chun, minung pakhat a sinah a hawng kal le, a mâika ah siksidîr hen,
- ¹⁵"Lalpa, ka fapa khi zângfah rawh, rualthlû asi, thungâi a tuar zia a fâk; vei tamtak mei ah a tlû le, vei tamtak tî lakah a tlû tâwn asi.
- ¹⁶Chun, na ðhíruai tla sinah ka hawng put le, an damh kho fâwn lo," a ti.
- ¹⁷Chun, Jisu nih, "Tusan lungnâk neilo leh simh har tla, zeî tiang me nan sinah ka um lai le, zeî tiang me ka nan sang kho na lai? Amah chu ka sinah hin hawngpi u," a ti le, a sâng.
- ¹⁸Chun, Jisu nih khuri chu a fâi le, a sung ah mi a suak rawh; chu dâr thawk hen chun ngâksia chu a dam rawh.
- ¹⁹Chu nûnah chun ðhíruai tla chu a dang hen Jisu sinah an hawng kal le, "Zeî tin zia me kannih nih kan nar kho lo," an ti.

²⁰Chun, anih nih chun an sinah "Nan lung tâwm ruangah. Thungâi tak hen ka nan simh na, anțam chî fang khat hâwi lungnâk nan nei chun, hi tlâng sinah hin, 'Hi thawk hen khinah khin va a țhinh, nan ti lai le, â țhial ko lai;

²¹nan rangah ti kho lo zeikhawm a um lai loh," a ti.

²²Chun, Galili ram ah an hawng a pûm liauah Jisu nih an sinah, "Minung Fapa hi minung tla kut ah tleihtir hen a um awt asi.

²³Chun, an thah lai le, ni thum ni ah thawknawlh hen a um lai," a ti. Chun, a țhiruai tla chu thungâi an lawksawng rawh.

²⁴Chun, Kapernaum chu a hawng tleng rawh chun Biakin thawhlâwm khawlhtu tla chu Peter sinah an hawng kal le, "Nan sîntirtu nih Biakin thawhlâwm chu a pêk bâk tâwn lo ma?" an ti.

²⁵Peter nih chun, "Pêk bâk ta a," a ti. Chun, in ah a va lût le, Jisu nih a sinah "Simon, zeî hâwi hen na ngaih? Tual ah lal tla nih siah mawh sum neih man mawh âu sinah me an lâk tâwn? An fa tla lakah ma, asi lo leh, midang lakah ma?" ti hen a sim khalh.

²⁶Chun, Peter nih, "Midang lakah," a ti kê hen, Jisu nih a sinah, "Chu hâwi asi chun, fa tla chu an âwl lai ma chu.

²⁷Sikhawmsele, nang rilî ah va kal le, siau va thlâk le, ngâ a hawng suak masa mi chu tleih rawh. Chun a kê na kêu kê hen stater khat na muh lai; chu chu lâk le, kei leh nangmah rangah an sinah pêk na, chu lo chun annih chu an lung kan sitir lo lebang lai," a ti.

Mathai 18

¹Chu liau tak chun țhiruai tla chu Jisu sinah an hawng kal le, "Vân Ram ah âu me rokual chem lai?" an ti.

²Chun, anih nih chun ngâksiatê a kawh le an lakah a dîrtir le,

³"Thungâi tak hen ka nan ti na, nanna lêt hen ngâksiatê hâwi nan silo chun Vân Ram ah nan lût rîlmâl lai lo.

- ⁴Chun, hi ngâksiatê hâwi hen â nâutir mi zawng, chu minung chu Vân Ram ah a rokual chem lai.
- ⁵Chun, âuzawng ka min ruangah hi hâwi ngâksiatê pakhat lawmhtu zawng chu keimah an ka lawmh mi asi lai.
- ⁶"Sikhawmsele, âuzawng hi bang an ka zumhtu mi mê tla lakah pakhat mawh an ka zumhnâk khamtirtu zawng chu an ngâwng ah fângrialnâk lung lianpi awihtir hen tisumsumriat sungah thlâk ving sele a rangah a ̣ha dauh lai.
- ⁷Mi zapi tla zumhnâk khamtirtu thil tla ruangah laikulh tlûn a pit! Tlûknâk chu um ding rêng asi. Sikhawmsele, tlûknâk umtirtu tlûn chu a pit!
- ⁸Chun, na kut nih mawh na kê nih mawh a nan sualtir chun tan le, lawnh ving. Kut panih mawh kê panih mawh nei hen zungzâl mei ah lawnh ngâk chun suak sual hen mawh kekhêng hen mawh nungnâk ah lût na rangah a ̣ha dauh.
- ⁹Chun, na mit nih a nan sualtir chun chawih zek le, lawnh ving. Mit khiang khinih nei hen Gehena mei ah lawnh ngâk chun mit khiang khat nei hen lungnâk ah lût na rangah a ̣ha dauh.
- ¹⁰"Hi bang mi mê tla lakah pakhat khawm hi zauhnawmh lo ding hen a thiamthih u; an vânmifial tla nih vâh ah ka Pa vâh ah mi mêl chu an muh kumza tâwn ti ka nan simh na hi.
- ¹²"Zei hâwi hen nan ngaih? Mi âu nih mawh dawrâ zâ nei sele, an lakah pakhat peu sele, sâwmkua leh pakua chu mâk hen, tlâng ah kal hen a tlâu mi chu a hâwl lai lo mazei?
- ¹³Thungâi tak hen ka nan simh na, a tawng nawlh vêk chun sâwmkua leh pakua a tlâu lo mi tla tlûn ngâk hen chun a tlûnah â lâwm dauh lai.
- ¹⁴Chu hâwi ber hen mi mê tla lakah pakhat a vei mi khawm hi nan Pa vâh ah mi duhzia asi lo.

15"Chun, na unau nih na tlûnah thilsual ti sele, kal le, amah leh nangmah cho theih hen a sualnâk chu simhfâi. A nan ngâi piak chun na unau chu na neh mi asi lai.

16A nan ngâi piak lo lam chun, midang pakhat mawh panih mawh na sinah put le, chuvachun thu zeizawng chu theihthu panih mawh pathum mawh kâ lakah birhtir hen a um khonâk ding hen.

17Chun, annih khawm chu a ngâi piak na lo chun, kawhmi tla sinah tlunh le; chun kawhmi tla khawm a ngâi piak na lo chun anih chu Phundang leh siah khawlhtu hâwi hen ruat si seh.

18"Thungâi tak hen ka nan simh na, tual tlûnah zeizawng nan phuar mi vial vâh ah phuar asi lai; tual tlûnah zeizawng nan phelh mi vial vâh ah phelh asi lai.

19"Thungâi tak hen ka nan simh nawlh na, tual tlûnah hin nan lakah minung panih an thil deih leikângah thu anna rual chun, ka Pa vâh ah mi nih ti piak hen an um lai.

20Minung panih mawh pathum mawh ka min hen anna pûmnâk zawngah an lakah ka um tâwn," a ti.

21Chu liau chun Peter a hawng le, a sinah, "Lalpa, ka unau nih vei zeizat thilsual ti sele ka ngaihdam ding? Vei sarikh tiang ma si lai," a ti.

22Jisu nih a sinah, "Vei sarikh tiang hen ka nan ti lo, vei sarikh mun sâwmsarikh tiang hen, ka nan ti dauh asi," ti hen, a sâng.

23"Churuangah chun, Vâh Ram chu, lalchem âu nih mawh a to-aw tla sinah sum thâwngthâng ruat fiang ding mi hen tahthimh asi.

24Chun, ruat fiang ding hen a hawng dawmh rawh chun minung pakhat talent sîng khat battu a sinah an hawng put.

25Chun, pêk ding a nei lo ruangah a pu nih chun amah hen a nupi hen, a fa tla hen, a neih zawzawng zuar hen rulh ding thu a pêk.



- ²⁶Chuvachun, to-aw nih chun, 'Ka pu, hawng ka ngâk dauh rih le, a ektê hen ka nan pêk ver lai, ti hen a bawk le, mâi a mûk.
- ²⁷Chun, chu to-aw pu nih chun thungâi a zângfah le, a thlah le, â bat mi chu a ngaihdam rawh.
- ²⁸"Sikhawmsele, chu to-aw chu a suak le, a to-aw hâwi tla lakah pakhat denari zâ battu a muh le; chun a theih le, 'Na bat mi kha hawng ka pêk rawh,' ti hen, a rawm a dît.
- ²⁹Chuvachun, a to-aw hâwi chu a bawk le, 'Hawng ka ngâichâng rih le, ka nan pêk teh lai, ti hen a ngiar chiam.
- ³⁰Sikhawmsele, a duh lo le, â bat mi chu a lîm lân lo chu rêngin ah a khumh.
- ³¹Chuvachun, a to-aw hâwi tla nih chun a thilti chu an muh le, thungâi an lawksawng le, a thilti zawzawng chu an pu sinah an va simh rawh.
- ³²Chu kê hen a pu nih chun anih chu a kawh le, a sinah, 'To-aw sual, na ka ngiar ÷ualmâl ruangah na bat mi zawzawng kha ka nan ngaihdam le,
- ³³ka nan zângfah hâwi khan nang khawm nih na to-aw hâwi chu na zângfah ding si lo mazei?' a ti.
- ³⁴Chun, a pu chu a thinthawk le, â bat mi zawzawng a lîm lân lo chu rêptu tla sinah a pêk rawh.
- ³⁵Mi kip nih thinlung tak hen nan unau tla nan ngaihdam lo chun ka pa vân ah mi khawm nih chu hâwi ber hen nan tlûnah a ti bâk lai," a ti.

Mathai 19

- ¹Chun, tihin asi le, Jisu nih chubang thu chu a sim dih ka hen Galili ram mi a suak le, Jordan Varâl leiah Judai ram leiah a kal.
- ²Chun, mi zapi cherkhet nih an zûl le, chunah chun anmah chu a damh na rawh.
- ³Chun, Farisai tla a sinah an hawng kal le, amah nîknâk ding hen, "Zeiruang zawngah mi nih nupi mâk dân asi ma?" an ti.

⁴Chun, anih nih chun, "A tîr thawk hen an siamtu nih khan nunau leh mipa a siam le,

⁵'Hi ruang hin mipa nih a nu leh a pa a kaltâk lai le, a nupi a sihawh lai; chun, an panih hen pum khat an si lai rawh,' a ti ti nan rêl lo mazei?

⁶Chuvachun, panih an silo rawh le, pumkhat an si rawh asi. Churuangah Pathian nih a sihawh rawh mi chu minung nih ðhen lah seh," a ti le, a sâng.

⁷Annih nih chun, "Asi chun, zeirangah me Mosi nih mâknâk lasui pêk hen mâk ding thu a pêk ne?" an ti.

⁸Anih nih chun an sinah, "Mosi nih nan thinlung khauh ruangah ma kha nan nupi tla mâk a siang mi kha; sikhawmsele, a tîr thawk hen chu hâwi asi lo.

⁹Kei nih chun ka nan ti na, âuzawng midang hen duhnâk ruangah silo hen, nupi mâk hen midang umpitu zawng chu ðangdang a pawmtâk asi, mâk chia umpitu khawm ðangdang a pawmtâk asi," a ti.

¹⁰Þhiruai tla nih chun a sinah, "Nupi leikângah mipa thu chu hâwi asi chun umhnâk hi a ðha lo," an ti.

¹¹Anih lam nih chun an sinah, "Chu thu chu mi zârân nih an zâwt kho lo, a pêk mi tla cho lo nih chun.

¹²Mi tilkhei an nu paw sung thawk hen chu hâwi a suak mi rêng khawm an um le, mi tilkhei, minung kut hen khei mi khawm an um; mi tilkhei, Vên Ram ruangah tilkhei hen anna siam mi khawm an um. Âuzawng a zâwt kho mi vial nih zawt seh," a ti.

¹³Chu liau chun an tlûnah a kut thâng hen thla a cham piak na ding hen a sinah ngâksia tetê an hawng put na le; chun ðhiruai tla nih chun an fâi na.

¹⁴Jisu lam nih chun, "Ngâksia tetê ka sinah hawng kaltir ule, nar lah na u; Vên Ram chu hi bang hâwi mi tla tâ asi ruangah," a ti.

¹⁵Chun, an tlûnah a kut a thâng le, chunah mi chu a kal rawh.

¹⁶Chun, minung pakhat Jisu sinah a hawng kal le, "Sîntirtu, zungzâl nungnâk ka nei khonâk ding hen thil ðha ze me ka ti lai?" a ti.



¹⁷Chun, anih nih chun, "Thil ða thu zeirangah na ka deih? A ða mi chu pakhat cho a um; zeikhawm si sele, nungnâk ah lût na duh chun thupêk tla chu zâwt rawh," a ti.

¹⁸Chun, anih nih chun, "A zeï tak hi me?" a ti. Chun, Jisu nih, "Mi na thah ding asi lo, ðangdang na pawmtâk ding asi lo, na fîr ding asi lo, na phiar ding asi lo;

¹⁹na nu leh na pa chawnglawmh rawh," ti mi tla leh, 'Nangmah na dâwt hâwi hen na zâwlbâwm tla na dâwt ding asi,' ti hi," a ti.

²⁰Tlangvâl nih chun a sinah, "Chubang thu zawzawng chu ka zâwt tâwn; zeï ka tâng rih?" a ti.

²¹Jisu nih a sinah, "Þa rangtling hen um na duh chun, kal le, na neih chu zuar le, mipâm tla sinah pêk rawh; chuvachun vâh ah ro na nei lai, chun hawng le, hawng ka zûl," a ti.

²²Tlangvâl lam nih chun chu thu chu a theih hen ngaihsia tak hen a kal ving, sum tamtak nei mi asi ruangah.

²³Chun, Jisu nih a ðhruai tla sinah, "Thungâi tak hen ka nan simh na, minei rangah Vâh Ram ah lût chu har tak asi:

²⁴Chun, ka nan simh nawlh na, minei Pathian Ram ah lût ngâk hen sangâwngsâu ðhim kua ah lût a awl dauh," a ti.

²⁵Chun, ðhruai tla nih chu chu an theih hen thungâi chê an ti le, "Âu me rangsuak si kho lai?" an ti.

²⁶Chun, Jisu nih annih chu a zauh le, an sinah, "Chu chu minung rangah ti kho asi lo le, Pathian rangah lam chun zeizawng ti kho asi," a ti.

²⁷Chun, Peter nih a sim le, "Zauhnik, kannih nih zeizawng kaltâk hen ka nan zûl le, zeï me kan tawng lai ne?" a ti le, a deih.

²⁸Chun, Jisu nih an sinah, "Thungâi tak hen ka nan simh na, Siamtharnâk ah chun Minung Fapa a rokualnâk tophah ah a to tikah, nannih hawng ka zûltu

tla hi, Israel phun leinih tla chu lâirêl hen, laltophah leinih lakah nan to bâk teh lai.

²⁹Chun, mikip, in tla mawh, unau tla mawh, farnu tla mawh, pa mawh, nu mawh, fa tla mawh, ram tla mawh, ka min ruangah kaltâktu zawng nih chun a leh zâ a tawng lai le, zungzâl nungnâk anna ting lai.

³⁰Sikhawmsele, mi tamtak, masachem um tla chu madungchem ah an um teh lai; madungchem ah umtu tla khawm masachem ah an um teh lai," a ti.

Mathai 20

¹"Vân Ram chu, in dâwngpu a grep dûm ah rianṭuantu tla ṭuantir na ding hen zîngtê ah suak mi hâwi chu asi.

²Chun, anih nih chun rianṭuantu tla hen ni khat ah denari khat lawh ding hen an thlûk ka hen a grep dûm ah a fial na rawh.

³Chun, dâr kua ding liauah a va suak le, midang sumtuah mun ah dîr salam mi tla a muh le;

⁴chun, an sinah, "Nannih khawm grep dûm ah va kal bâk u, a dâwh tâwk ding hen ka nan pêk na lai," a ti.

⁵Chun, an kal rawh. Chun dâr leinih leh dâr thum ding ah a va suak nawlh le, chu hâwi ber hen a ti fâwn.

⁶Chun, dâr nga ding liauah a va suak le, midang dîr mi tla a muh le, chun an sinah, 'Zeirangah me nî tlâk hen hinah nan dîr salam?' a ti.

⁷Annih nih chun a sinah, 'Âukhawm nih lawh hawng kan lâk lo ruangah,' an ti. Anih nih chun an sinah, 'Nannih khawm grep dûm ah kal bâk u, a ti.

⁸"Chun, zânleibâi rawh chun grep dûm dâwngpu nih chun a sum kilkâwitu sinah, 'Rianṭuantu tla kha kawh na le, a madungchem ah dawmh hen a masachem tiang hen an lawh pêk na rawh,' a ti.

⁹Chun, dâr nga tik dingah a mang na mi tla chu an hawng kal le, denari khat seng an tawng.



¹⁰Chun, a masachem tla chu an hawng kal le, tam dauh tawng ding anna ruat le; sikhawmsele, annih khawm chu denari khat seng an tawng bâk.

¹¹Chun, an tawng rawh chun, 'Hi bang madungchem tla nih hin dâr khat cho an ÷uan.

¹²Kannah sîn ah hamh leh thawsat tuartu tla tluk hen na siam ÷ung fâwn,' ti hen in dâwngpu tlûnah an chipchiar rawh.

¹³Anih lam nih chun an lakah minung pakhat sinah, 'Kâwi, na tlûnah zeikhawm ka soal lo a, denari khat lawh ding hen rem kan ti mi silo mazei?

¹⁴Na tâ kha lâk le, kal ko; nangmah ka nan pêk mi hâwi hen hi madungchem mi sinah khawm hin pêk ding ka duh asi.

¹⁵Ka tâ asi mi chu ka thu thu hen ka ti ding asi lo ma? Asi lo leh, kei ka ÷a ruangah nangnih na nahsuah mu?' ti hen, a sâng.

¹⁶Chu hâwi hen madungchem tla chu masachem an si teh lai, masachem tla khawm chu madungchem an si teh lai," a ti.

¹⁷Chun, Jisu Jerusalem ah a kal liauah ÷hiruai leinih tla chu a dang hen a kalpi na le, lampi ah chun an sinah,

¹⁸"Ngâinik u, Jerusalem ah kan kal awt hi; Minung Fapa hi bâwlpulal tla leh Dân sîntirtu tla kut ah tleihtir hen a um awt asi. Chun annih nih chun thi ding hen a tlûnah thu an thlûk lai le;

¹⁹nihsuak siamnâk ah mang ding leh vuak ding leh kraws ah khenh ding hen Phundang tla sinah an pêk lai; chun ni thum ni ah thawk hen a um lai," a ti.

²⁰Chu liau chun Zebedai fapa tla nu chu a fapa panih tla put hen a sinah a hawng kal le, mâi a mûk le, thil zeimawh a deih.

²¹Chun, anih nih chun, "Zei na duh?" a ti. Chun, anih nih chun a sinah, "Hi ka fapa panih tla hi na Ram ah, na vawrhlei ah pakhat, na kehlei ah pakhat an to khonâk ding hen thu pêk," a ti.

²²Jisu nih, "Nan deih mi chu nan theih lo asi. Ka hâi din ding mi chu nan din kho lai mazei " a ti le, a sâng. Annih nih a sinah, "Ti kho e," an ti.

²³Anih nih chun an sinah, "Ka hâi din ding mi chu nan din ngelchel lai; sikhawmsele, ka vawrhlei ah leh ka kehlei ah to ding thu chu kei pêk ding asi lo le, ka Pa nih a timhtuah piak mi tla rangah asi dauh lai," a ti.

²⁴Chun, parâ tla nih chun chu chu an theih rawh chun unau panih tlûnah chun an thinrun rawh.

²⁵Jisu lam nih chun annih tla chu a kawh na le, "Phundang tla tlûnah lâirêltu tla chu an tlûnah thungâi an lal fâk le, an mi lian tla nih chun thungâi thu an nei tâwn ti nan theih.

²⁶Sikhawmsele, nannah lakah lam chun chu hâwi asi lai lo; âuzawng nanmah lakah mi lian si ding duhtu vial chu nan to-aw ah a um ding asi.

²⁷Âuzawng nan lakah a masachem si ding duhtu vial chu nan to-aw ah a um ding asi.

²⁸Minung Fapa hi mi nih rianțuan piak ding hen a hawng lo le, rianțuan ding leh mi tamtak tlanhnâk dingah a nungnâk pêk ding hen a hawng dauh asi," a ti.

²⁹Chun, Jeriko thawk hen an suak liauah mi zapi cherkhet nih Jisu chu an zûl.

³⁰Chun, mitchâw panih lam vâu ah to mi nih chun Jisu a hawng kal ti an theih kê hen, "Lalpa, David Fapa, hawng kan zângfah," ti hen, an âu.

³¹Chun, mi zapi tla nih chun dâisip ding hen an fâi na le; sikhawmsele, annih nih chun, "Lalpa, David Fapa, hawng kan zângfah," ti hen, fâk khun hen an âu.

³²Chun, Jisu a dîr le, anmah a kawh na le, "Nan tlûnah zeitin an ti na sele nan duh?" a ti.

³³Annih nih chun a sinah, "Mit dei kan duh," an ti.

³⁴Chun, Jisu nih thungâi a lungkham na le, an mit a tham le, chun an muh kho sawm le, amah chu an zûl rawh.

Mathai 21



- ¹Chun, Jerusalem ah an lût awt ah, Bethphage Oliv Tlâng chu an tlung rawh chun Jisu nih thiruai panih a fial na le,
- ²an sinah, "Mâilei zâwn khua ah khin va kal ule, sanatung rêng mi, a kiangah a fatê hen nan muh ko lai; sût ule, ka sinah hawng ruai u.
- ³Chun, âuzawng nih nan sinah zeizawng an sim chun, 'Lalpa nih a duh asi,' nan ti lai le; chun anih nih chun a hawng fial sawm ko lai," a ti.
- ⁴"Zauhnik, na Lalchem chu nâutir tak hen sanatung tlûnah leh sanatung fa tlûn takah to hen,
- ⁵na sinah a hawng kal awt ti hen, Zion fanu chu simh rawh," ti hen, khuavâng kê ah a sim mi kha a hawng tlung khonâk ding hen chubang chu a hawng um rawh asi.
- ⁶Chun, thiruai tla chu an va kal le, Jisu nih an sinah thu a pêk na hâwitê hen an ti.
- ⁷Sanatung leh a fa chu an hawng ruai le, an tlûnah chun an puan tla an phah le, Jisu chu â chuan rawh.
- ⁸Chun, mi zapi lakah tam dauh nih lampi ah chun an puan tla an phah le; midang nih thing nah an sât le, lampi ah an phah.
- ⁹Chun, mi zapi a mâi leiah kal mi tla leh a zûltu tla nih chun, "David Fapa sinah Hosana! Lalpa min hen a hawng kal mi chu a thaw a suak. Chungnungchem ah khin Hosana!" ti hen, an âu.
- ¹⁰Chun, Jerusalem ah a hawng lût rawh chun, kkuatê hen, "Hi minung hi âu me si?" ti hen, an ri tul.
- ¹¹Chun, mi zapi tla nih chun, "Hi minung hi khuavâng Jisu, Galili ram ah Nazaret mi chu asi," an ti.
- ¹²Chun, Jisu chu Pathian Biakin ah a lût le, biakin ah zeilo zuartu tla leh châwktu tla chu a nar na le, tangka thlengtu dawhkân tla leh vaṭhu zuartu tla tophah tla khawm chu a thlûk piak ver na le;

13an sinah, " 'Ka in chu thlachamnâk in an ti lai,' ti rîn asi; nannih lam nih chun rawkmang tla pûk ah nan siam dauh tâwn asi, a ti.

14Chun, Pathian Biakin ah mitchâw tla leh kekhêng tla a sinah an hawng kal le; anmah a damh na.

15Sikhawmsele, bawlpu lal tla leh Dân sîntirtu tla nih a thilchê ti tla leh Pathian Biakin ah, "David Fapa, Hosana!" ti hen, ngâksia âu tla an muh rawh chun, thungâi an lungsi lo le,

16a sinah, "Hi bang tla thusim hi na theih ma?" an ti. Chun, Jisu nih an sinah, "Theih ta a," 'Nausêm leh nûk din liau tla kê ah suak mi nih chun sawrnâk na rangtlingtir rawh,' ti mi hi nan rêl dah lo ma?" a ti.

17Chun, annih chu a kaltâk na le, khuapi lakah mi chu a suak le, Bethani ah a kal le; chunah chun a riak rawh.

18Chun, zîng ah khuapi leiah a kêr nawlh liauah a sungvâng rawh.

19Chun, lam vâu ah chun theipi kûng a muh le, a va fûk le, a nah cho lo chu zeikhawm a muh lo. Chun, a sinah, "Zungzâl hen hawng rah lah rawh," a ti. Chun, theipi chu a uai sawm rawh.

20Chun, ðhiruai tla nih chun chu chu an muh le, "Zei zia me theipi hi a uai sawm ko?" ti hen, thungâi chê an ti.

21Chun, Jisu nih an sinah, "Thungâi tak hen ka nan simh na, lungnâk nan nei hen, nan zumhmaid lo chun, theipi lakah ti mi cho hi nan ti lai lo le, hi tlâng sinah khawm hin hawnga ðhial le, tisumsumriat ah hawng a lawnh rawh, nan ti chun, nan ti hâwi hen a hawng um lai.

22Chun, zeizawng lung bû hen nan deih mi zawng chu nan tawng lai," a ti le, a sâng.

23Chun, Pathian Biakin ah a lût nûnah a sîntir na liauah chun bawlpu lal tla leh zatlâng upa tla chu an hawng kal le, a sinah, "Âu thu hen me hi bang thil hi na ti? Âu nih thu a nan pêk?" an ti.

²⁴Chun, Jisu nih an sinah, "Kei khawm nih thu kê khat ka nan deih na bâk lai, chu chu nan ka simh chun, âu thu hen me hi bang thil hi ka ti ka nan simh na bâk lai.

²⁵Johan bap̄tisma kha zeĩ lei mi thu mesi? Vâñ ah mi thu ma, minung thu?" ti hen a deih na. Chun, anna ruat le, " 'Vâñ ah mi thu,' kan ti chun, 'Zeirangah a thu nan lung lo ne?' hawng kan ti fâwn lai.

²⁶Chun, 'Minung thu,' kan ti chun, mi zapi chu kan t̄ih fâwn; mi zawzawng nih Johan chu khuavâng ah an ruat ruangah," an ti.

²⁷Chun, Jisu rangah an sâng le, "Kan theih loh," an ti. Anih khawm nih chun, "Kei khawm nih âu thu hen me hi bang thil hi ka ti t̄ih ka nan simh na bâk awt lo," a ti.

²⁸"Sikhawmsele, nannih nih zeitin nan ngaih? Mi âu nih mawh fapa panih a nei. Pakhat sinah chun a va kal le, 'Ka fa, tusûñ ah grep dûm ah rian va t̄uan' a ti.

²⁹Anih nih chun, 'Ka duh loh,' a ti le, a sâng. Sikhawmsele, a nehnûñ ah a th̄inlung chu a hawng a lêt le, a kal rawh.

³⁰Chun, pakhat sinah khawm a va kal le, chu hâwi ber hen a ti. Chun, anih nih chun, 'Pa, ka kal lai,' a ti le, a sâng. Sikhawmsele, a kal t̄ung fâwn lo.

³¹Chu minung panih nih chun zeĩ mi dauh nih me an pa duhzia an ti?" a ti. Annih nih chun, "A masa dauh mi nih," an ti. Jisu nih an sinah, "Thungâi tak hen ka nan simh na, siah khawlhtu tla leh nunau â zuar mi tla nih chun Pathian Ram an lût khalh na awt ma hi!

³²Johan chu repnâk leikângah chun nan sinah a hawng kal le, amah chu nan lung lo le, siah khawlhtu tla leh nunau â zuar mi tla lam nih chun amah chu an lung le; nanmah nih chu chu nan muh nûñ khawmah amah chu nan lung khonâk ding hen nan rim lêm lo.

³³"Tah̄thimh thu dang ngâi u: mi âumawh in dâwngpu a um le, chu nih chun grep dûm a siam le; dâi hen a kulh le, grep surnâk khur a chawh le, in sâng a

sak le; chun a bultu tla sinah a thlawh lawh ding hen a ap na le, ram dang ah a kal rawh.

³⁴Chun, a rah kawih a zâ awt rawh chun a rah lâk ding hen a bultu tla sinah a sal tla a fial.

³⁵Chun, a bultu tla nih chun a sal tla chu an tleih le, pakhat chu an vuak le, pakhat chu an thah le, pakhat chu lung hen an seh.

³⁶Chun, sal dang a masa mi tla ngâk hen tam dauh a fial nawlh na le; annih tla tlûnah khawm chun chu hâwi ber hen an ti nawlh na.

³⁷Chu nûnah lam chun, 'Ka fapa hi chu an zah lai,' ti hen, a fapa chu an sinah a fial.

³⁸Sikhawmsele, a bultu tla nih chun a fapa an muh kê hen, 'Hi minung hi rotingtu ding asi, kan thah lai le, a ro ting ding mi hi kan ting tâk ving lai, an ti.

³⁹Chun, anih chu an tleih le, grep dûm thawk hen lêngleih ah an lawnh le, an thah rawh.

⁴⁰"Chuvachun, grep dâwngpu a hawng tikah a bultu tla tlûnah chun zeitin a ti na lai rawh ne?" a ti.

⁴¹Annih nih chun a sinah, "Chubang misual tla chu hamh tak hen a tlâutir na lai le, grep dûm bultu dang, a kawih tik kipah a rah tla chu a sinah pêk vimatu ding tla sinah a thlawh a lawh ding hen a pêk na lai," an ti.

⁴²Jisu nih an sinah, "Pathian lasuibu ah: 'In saktu tla lung duh lo kha, chu tak chu a kil ah lung herh chem a hawng si rawh. Chu chu Lalpa ti asi le, kan mitmuh ah a chê asi,' ti hi nan rêl lo mazei?"

⁴³Churuangah chun Pathian Ram chu nan sinah mi suh asi lai le, a rah suah ding mi phun tla sinah pêk asi lai ti ka nan simh na.

⁴⁴Chun, chu lung tlûnah tlû mi chu a kuai dip lai; a denh mi châng chu dip ver a rial lai," a ti.

⁴⁵Chun, bâwlpu lal tla leh Farisai tla nih chun a tahthimh thu chu an theih le, anmah thu a sim ti an theih rawh.

⁴⁶Chun, amah chu tleih an tum le; sikhawmsele mi zapi chu an tih fawn, khuavâng ah an ruat ruangah.

Mathai 22

¹Chun, Jisu nih anmah a sawnh na le, an sinah tahthimh thu hen a simh nawlh na le,

²"Vân Ram chu lalchem âumawh a fapa rangah lâwinâk puai tuah mi hen tahthimh asi.

³Chun, lâwinâk puai ei ding hen a sâwm na mi tla chu kawh ding hen a to-aw tla a fial le, sikhawmsele an hawng duh lo.

⁴Chun, anih nih chun, 'Ka sâwm na mi tla sinah khan, ngâinik u, ka puai chu ka timhtuah thluh rawh; ka chawchal tla leh ka ran chawm bit tla ka thah le, zeizawng lîm asi rawh; lâwinâk puai ei ding hawng kal u rawh' ti u," ti hen, to-aw dang tla a fial nawlh.

⁵Sikhawmsele, zeikhawm an siar piak lo le, an kal ving, pakhat chu a lo ah a kal le, pakhat chu a sawlehnâk ah;

⁶midang tla nih chun a to-aw tla chu an tleih le, ningzakkâi tak hen an siam le, an thah ving.

⁷Chun, lalchem chu a thinthawk rawh; a kawrsen tla a fial le, chubang mi thahtu tla chu a veih dep na le, an khua khawm a duah piak hep na rawh.

⁸Chun, to-aw tla sinah chun, 'Lâwinâk puai timhtuah thluh asi rawh, ka sâwm na mi tla lam kha chu ei tlâk an si lo.

⁹Chuvachun, lamthuum tla ah kal ule, mi nan muh mi kip lâwinâk puai ei ding hen sâwm na u,' a ti.

¹⁰Chun chubang to-aw tla chu an suak le, lam tla ah chun an kal le, an muh mi kip misual leh mi tha tla khawm an pumh hep na le; chun lâwinâk puai einâk mun chu sâwm mi tla hen an khat rawh.

- 11**"Sikhawmsele, lalchem chu sâwm mi tla zauh ding hen a hawng lût rawh chun, umhnâk puan aih lo mi minung pakhat chunah chun a muh le;
- 12**chun, a sinah, 'Kâwi, zeî zia me umhnâk puan aih lo hen hinah na hawng lût le?' a ti. Chun, anih chu a dâisip.
- 13**Chun, lalchem nih chun a to-aw tla sinah, 'A kut leh kê phuar ule, lêngleî ah mûi ah lawnh u; chunah chun ÷ap leh hachang rial chu a um lai,' a ti.
- 14**"Sâwm tla chu tamtak an si le, thîm tla lam chu tâwmtê an si," a ti.
- 15**Chu liau chun Farisai tla nih chun a thusim lakah an tleîh khonâk ding kâng anna thluk.
- 16**Chun, an ÷hiruai tla, Herod murui sinah mi tla hen, a sinah an fial le, chubang tla nih chun, "Sîntirtu, mi dik tak na si le, dik tak hen Pathian leikâng thu na sîntir na tâwn le, sunhsak khun mi khawm na nei lo ti kan theih le; âukhawm thliar leh dangnâk na nei lo.
- 17**Chuvachun, zeî hâwi hen na ngaih hawng kan simh nik? Rom lalchem sinah siah châwi hi dân asi ma si lo?" an ti.
- 18**Sikhawmsele, Jisu nih an sual zia chu a theih le, "Mi perpê tla, zeîrangah nan ka nik?
- 19**Siah tangka chu hawng ka zauhtir u," a ti.
- 20**Chun, a sinah denari khat an hawng put. Chun, anih nih chun an sinah, "Hi hi âu ruk leh âu min mesi?" a ti.
- 21**Annih nih chun a sinah, "Lalchem," an ti. Chun, anih nih an sinah, "Chu hâwi asi chun, Kaisar thil tla chu Kaisar sinah pêk ule, Pathian thil tla chu Pathian sinah pêk ko u me" a ti.
- 22**Chubang thu chu an theih rawh chun thungâi chê an ti le, amah chu an kaltâk le, an kal ving.
- 23**Chu ni ber ah chun, Sadukai tla thawknawlhnâk um lo titu tla chu Jisu sinah an hawng kal.

²⁴"Sîntirtu," "Mosi nih, mi fa neilo hen thi sele, a unaupa nih a nupi chu umpi hen a unaupa a thi mi rangah chi a thlâk piak ding asi, an ti.

²⁵Asi chun ne, kan lakah pasal pasarih an um le, a upachem mi nih nupi a nei le; a thi le; chun, chi a thlâk lo ruangah a nupi chu a unaupa thâwn ding hen a roh;

²⁶Chu hâwi ber hen panihnâk khawm nih, pathumnâk khawm nih, pasarih tiang hen an umpi chiau.

²⁷Chun, an ektê hen an thih nûnah chun nunau khawm a thi rawh.

²⁸Chun, thawknawlh tikah an pasarih lakah a zeî mi nupi dauh chem asi lai? An ektê hen an umpi chiau dangâiah," ti hen, an deih.

²⁹Jisu nih an sinah, "Pathian lasui thu leh Pathian thiltikhonâk nan theih lo ruangah nan ngaihpalh tâwn asi.

³⁰Thawknawlnhâk ah chun nupi pasal anna umh awt lo le, vâh ah vânmifial tla hâwi an si dauh awt asi.

³¹Chun, mithi thawknawlnhâk thu chu, Pathian nih, 'Kei Abraham Pathian, Isak Pathian, Jakob Pathian ka si, ti hen nan sinah a sim mi kha nan rêl lo mazei? Pathian chu mithi Pathian asi lo le, a nung mi Pathian asi dauh," a ti le, a sâng.

³³Chun, mi zapi tla nih chun chu chu an theih le, a thu sîntir chu thungâi chê an ti.

³⁴Farisai tla lam nih chun Jisu nih Sadukai tla chu a êl le, a dawngh thlo na ti an theih hen anna pûm rawh.

³⁵Chun, an lakah minung pakhat, Dân sîntirtu nih amah nikhâk ding hen thu a deih.

³⁶"Sîntirtu, Dân thu ah zeî thupêk hi me a rokual chem?" ti hen.

³⁷Chun, anih nih chun a sinah, " 'Lalpa na Pathian chu na thinlung zawzawng hen, na thlarau zawzawng hen, na dawnruatnâk zawzawng hen na dâwt ding asi, ti hi.

³⁸Chu chu thupêk rokual chem leh herh chem asi.

³⁹Chun, a sangtu chu hi hi asi: 'Nangmah na dâwt hâwi hen na zâwlbâwm tla khawm na dâwt ding asi,' ti hi.

⁴⁰Chu thupêk panih lakah chun dân leh khuavâng tla thu zawzawng â ngauh hep asi," a ti.

⁴¹Chun, Farisai tla chu anna pûm liau chun, Jisu nih annih tla chu thu a deih na,

⁴²"Mesia chu zei hâwi nan ngaih? Âu fapa mesi?" a ti. Annih nih chun a sinah, "David Fapa," an ti.

⁴³Anih nih chun an sinah, David nih Thlarau Thenhlimh hen,

⁴⁴'Lalpa nih chun ka Lalpa sinah, na mêlma tla na kezaphah tangah ka siah lân lo chu ka vawrhlei ah to rawh,' a ti, ti hen, zeitin zia hen me anih chu Lalpa a ti ne?

⁴⁵David nih anih chu, 'Lalpa' a ti asi chun, zeitin a fapa asi kho?" a ti.

⁴⁶Chun, âukhawm nih kê khat khawm an sâng kho lo le, chu mi ri rawh chun âukhawm nih thu dang khawm an deih ngam lo rawh.

Mathai 23

¹Chun Jisu nih mi zapi tla leh a thiruai tla sinah thu a sim le,

²"Dân sîntirtu leh Farisai tla chu Mosi tophah lakah an to tâwn le;

³churuangah an simh na mi zawng chu ti ule; zâwt vima u; an thilti hâwi lam chu ti bâk lah u, sim lam chu an sim tâwn le, an ti tung tâwn lo asi.

⁴Ritphurh hamhkâi tak an siam le, mi tak tînah an thâng tâwn le, anmah lam nih chun an kut dawng khawm hen an thial duh lo.

⁵An thilti zawzawng chu minung muh dingah asi an ti dauh tâwn. An thil bunn tla leh khimh tla chu an lian tir, an puansâr mûm an bawrtir tâwn.

⁶Puaituahnâk tla ah mun tha chem ah, pumhnâk in ah tophah tha chem tla ah;

- ⁷sumtuah mun ah chibai bûk tla, mi nih 'Sîntirtu,' an ti na mi tla an duhzia tâwn.
- ⁸Nannih lam chu 'Sîntirtu,' ti ding hen um lah u, an sîntir natu chu pakhat asi le, nannih vial chu unau nan si.
- ⁹Chun, tual tlûnah hin âukhawm ka pa ti lah u, nan Pa chu pakhat cho asi, vân ah mi khi.
- ¹⁰Ruitu ti ding hen um lah u, nan Ruitu chu pakhat cho asi, Mesia chu.
- ¹¹Nan lakah rokual chem mi chu nan to-aw ah um ding asi.
- ¹²Âuzawng â sung-û tir mi vial an nâu lai le, âuzawng â nâutir mi vial chawnglawmh hen an um lai.
- ¹³"Nannih Dân sîntirtu leh Farisai perpê tla, nan tlûn a pit! Vân Ram lampi chu midang tla nan khâr piak na tâwn. Nannih tâ nih nan lût lai lo, mi lût ding tla khawm nan siang fâwn lo.
- ¹⁴"Nannih Dân sîntirtu leh Farisai perpê tla, nan tlûn a pit! Numei tla sum nanmah nih nan ei hep le; chun, an in tla nan rawk le, chun mi muh ding hen sâwt tak thla nan cham le; hi ruangah hin mawhnâk lian dauh nan tawng lai.
- ¹⁵"Nannih Dân sîntirtu leh Farisai perpê tla, nan tlûn a pit! Phun lût pakhat tê siam ding hen tisumsumriat leh mual nan hêl rê le, chun chu hâwi asi kê hen anih chu nanmah hâwi hen letnih hen rêp mun ah kal ding tlâk hen nan siam!
- ¹⁶"Nannih ruitu mitchâw, 'Âuzawng Pathian Biakin sim hen siatsirh mi vial, chu chu zeikhawm asi lo; âuzawng Pathian Biakin ah ngûn min sim hen siatsirhtu vial nih chun lîm ding asi, titu tla, nan tlûn a pit!
- ¹⁷Nannih mi â, mitchâw tla! A zeî mi me rokual dauh, ngûn ma, Pathian Biakin, ngûn thenhlimhtirtu chu?
- ¹⁸'Chun, âuzawng mâichâm min sim hen siatsirhtu vial chu zeikhawm asi lo, a tlûnah thilpêk min sim hen siatsirhtu vial lam nih chun lîm ding asi,' nan ti.

- 19**Nannih mitchâw tla! A zeï mi me rokual dauh, thilpêk ma mâichâm, thilpêk thenhlimhtirtu chu?
- 20**Chuvachun, âuzawng mâichâm min sim hen siatsirhtu vial nih chun mâichâm leh a tlûnah um zawzawng min sim hen siat a sirh tâwn.
- 21**Âuzawng Pathian Biakin min sim hen siatsirhtu vial nih chun Pathian Biakin leh a sungah luahtu min sim hen siat a sirh tâwn.
- 22**Âuzawng vâh min sim hen siatsirhtu vial nih chun Pathian laltophah leh a tlûnah to mi chu sim hen siat a sirh tâwn asi.
- 23**"Nannih Dân sîntirtu leh Farisai perpê tla, nan tlûn a pit! Pudina tla, mohuri tla, zira tla chu parâ lû ah pakhat nan pêk tâwn le, Dân thu pawisherh dauh-repnâk, khuaruatnâk leh zumhkâinâk tla chu nan dâithlanh tâwn. Chubang tla chu asi nan ti ding mi chu, a dang tla chu tlawlh lêm lo hen.
- 24**Nannih ruitu mitchâw, marhsâng hap hen sangâwngsâu dawlh tungtu tla!
- 25**"Dân sîntirtu leh Farisai perpê tla! Nan tlûn a pit! Hâi leh khêng lênglei nan tawh thiàng le, a sunglei lam chu a thup hen lêpnâk leh sôm kholonâk hen a khat tung.
- 26**Farisai mitchâw, hâi leh khêng sunglei chu tawh masa rawh, a lênglei khawm a hawng thiàng khonâk ding hen.
- 27**"Dân sîntirtu leh Farisai perpê tla, nan tlûn a pit! Thlân ngo tîk hen bawih mi, lênglei ah dawh tak a lang, a sunglei lam chu mithi ruh tla leh nâwmtâm kip hen khat mi hâwi chu nan si.
- 28**Nannih khawm chu hâwitê hen lênglei ah chun minung mitmuh hen rep tak hen nan lang tâwn le, nan sunglei ah lam chun perpetnâk leh sualnâk hen nan khat fâwn.
- 29**"Nannih Dân sîntirtu leh Farisai perpê tla! Nan tlûn a pit! Khuavâng tla thlân in tla nan sak le, mi rep thlân tla khawm nan thuamh;
- 30**'Kan pu tla dam liau khan um menza bâk khawmsele an thahnâk ah chun kanna tel lai lo, nan ti tâwn.

- ³¹Chuvachun, khuavâng tla thahtu tla fa nan si ti nanna theihtir asi.
- ³²Nan pu tla nih an dawmh mi chu lîm dâidua u.
- ³³Rûl tla, rûl thlâk tla, Gehena lâirêlnâk chu zeitin nan âwl kho lai?
- ³⁴Churuang chun nan sinah khuavâng tla, mifing tla, Dân sîntirtu tla ka hawng fial awt; zeimaw mi nan thah lai le, kraws ah nan khenh lai, zeimaw mi nanna pumhnâk in tla ah savun ri hen nan vuak lai le, khua kip ah nan nehsawh vima na lai.
- ³⁵Chuvachun, Abel mi rep tak thahnâk thawk hen Pathian Biakin leh mâichâm karah Barakia fapa Zekaria nan thah mi tiang khan, tual tlûnah mi rep an thah mi zawzawng chu nanmah tlûnah rêpnâk a hawng tung kho lai.
- ³⁶Thungâi tak hen ka nan simh na, chubang zawzawng chu tusan mi tla tlûnah a hawng tung lai.
- ³⁷"Aw Jerusalem, Jerusalem! Khuavâng tla thahtu, na sinah an hawng fial mi tla lung hen thi thlo hen sehtu! Ârpinu nih a fa tla a thla tangah a khurh na hâwi hen na fa tla vei zeizat me khurh ka tum mi kha! Sikhawmsele, na duh lo.
- ³⁸Zauhnik u, nan Pathian Biakin chu a karo hen mâk hen a um rawh.
- ³⁹Ka nan simh na, 'Lalpa min hen a hawng mi chu a thaw a suak,' nan ti lân lo chu tu thawk hen nan ka muh lai lo rawh mahi," a ti.

Mathai 24

- ¹Chun, Jisu chu Pathian Biakin ah mi a suak le, a kal awt ving. Chun, a thiruai tla chu Pathian Biakin zauhtir ding hen a sinah an hawng kal.
- ²Anih lam nih chun an sinah, "Hi bang zawzawng hi nan muh mu? Thungâi tak hen ka nan simh na, chimtir lo hen lung â tiang mi rerêng hinah a um lai lo," a ti le, a sâng.
- ³Chun, Oliv Tlâng ah chun a to liauah thiruai tla anmah lâwng hen a sinah an hawng kal le, "Chubang chu zeitik ah me a hawng um lai? Na hawng kal nawlhnâk singsiahnâk chu zei me si lai? Hawng kan simh rawh," an ti.

- ⁴Jisu nih a sâng na le, "Âukhawm nih an perpet na lo ding hen a thiamthih u.
- ⁵Mi tamtak nih, 'Mesia chu ka si,' ti hen, keimah min sâl hen an hawng kal lai le, mi tamtak an perpet awt ruangah.
- ⁶Chun, tuknâk thuthang nan theih teh lai; nan lawksawng lonâk ding hen a thiamthih u; chubang tla chu a hawng tung ding rêng asi. Sikhawmsele, dawngnâk chu asi lai lo rih.
- ⁷Phun dang leh phun dang anna do lai le, ram dang leh ram dang anna do lai. Mun dang dangah pâm a tung lai le, lî tla â nîn lai.
- ⁸Chubang zawzawng chu nunau nganfâk dawmhnâk asi.
- ⁹"Chu tikah chun hamh tuar ding hen a nan tlehtir na lai le, an thah na lai; ka min ruangah phun zawzawng huat nan si lai.
- ¹⁰Chu tikah chun mi tamtak an zumhnâk an bângtâk lai le, anna tlehtir tawnh lai, anna hua tawnh lai.
- ¹¹Chun, khuavâng telê tamtak khawm an hawng suak lai le, mi tamtak an perpet lai.
- ¹²Chun, sualnâk a pung awt ruangah mi tam dauh dâwnâk chu a dâi teh lai.
- ¹³Sikhawmsele, a dawngh tiang hen tuar huamtu vial chu, chu tak chu ruangsuaah hen a um lai.
- ¹⁴Chun, hi Ram Thâwngthâng Tha hi phun zawzawng theihtirnâk ding hen laikulh zawzawng ah sim hen a um lai; churawhchun a dawngnâk a tung lai.
- ¹⁵"Chuvachun, thiautu Fihnungkâi khuavâng Danial sim mi kha, mun thenhlimh ah dîr hen nan muh tikah (a rêl mi zawng nih a umzia theih seh),
- ¹⁶Judai ram ah um tla chu tâng ah tek na seh.
- ¹⁷In tlûnah um mi chu in ah zeilo lâk ding hen tum lah seh.
- ¹⁸Chun, lo ah um mi chu a puan lâk ding hen kîr nawlh lah seh.
- ¹⁹Chubang ni ah chun a rai mi tla leh nauno nei tla tlûn chu a pit lai!

- ²⁰Nan tek tik ding busik ah mawh, Dinhni ah mawh a hawng tlung lonâk ding hen thlacham u.
- ²¹Chu tikah chun hamhnâk fâk tak a um awt ruangah; chu hâwi hen a fâk mi chu tual umtir thawk hen tutiang hen a um dah lo le, um khawm zeitik khawmah a um nawlh lai lo rawh.
- ²²Chun, chu ni tla chu tâwitir lah sele, minung rerêng dam hen an suak lai lo. Sikhawmsele, thîm tla ruangah chun chubang ni tla chu tâwitir asi lai.
- ²³"Chu tikah chun âuzawng nih nan sinah, 'Zauhnik, Mesia chu hinah a um,' mawh 'Hinah hi,' mawh an ti chun lung lah u.
- ²⁴Mesia telê leh khuavâng telê tla an hawng suak awt ruangah; chu tla nih chun ti kho sele thîm tla men an perpet khonâk ding hen singsiahnâk leh thilchê rokual tak tla an ti lai.
- ²⁵Ngâinik u, ka nan simhkan na hi.
- ²⁶"Chuvachun, nan sinah, 'Zauhnik u, ramkaro ah a um, a nan ti na chun suak lah u; 'Zauhnik u, in kardang sungah a um, a nan ti na chun lung lah u.
- ²⁷Mîmthlâ sak leiah a hawng lek le, thlanglei tiang khawm hen a lang tâwn le, Minung Fapa a hawng kal nawlhnâk chu chu hâwi chu asi awt ruangah.
- ²⁸"Kha zeizawng ah sa ruak umnâk kipah ruaklâwmmû tla anna pûm lai.
- ²⁹"Sikhawmsele, chubang hamhnâk ni tla nûntê ah, 'Nî mûitir hen a um lai, thlâ a chêu lai lo rawh le, vânthawk hen ârfi tla an tlâ lai le, vânthiltikhonâk tla chu ninh asi lai.
- ³⁰Chu tik ah chun Minung Fapa singsiahnâk chu vândum ah a lang lai. Chu tik ah chun tual ah chi kip nih an ir an chumh lai le, chun Minung Fapa hi thiltikhonâk leh rokualnâk fâk hen vânsûm tlûnah a hawng kal mi an muh lai.
- ³¹Chun, a vânmifial tla chu tâwtawrâwt hâu fâk tak hen a fial na lai. Chun thîm mi tla chu kâwlkil li ah mi dawngnâk thawk hen khatlei dawnghtiang hen an pumh lai.

- 32"Chun, theipi kûng ah hin tahthimh thu a sîn u; a têng a hawng no le, a nah a hawng chawrh chun thâlpini a hawng suak awt ti nan theih tâwn.
- 33Chu hâwi ber hen nannih khawm nih chubang zawzawng chu nan muh tikah amah chu a hawng nâi rawh, kawtkari ah a um ti theih u.
- 34Thungâi tak hen ka nan simh na, chubang zawzawng chu a tlungkim lân lo chu tusan minung tla hi an vei lai lo.
- 35Tual leh vâh a vei lai le, ka thu lam chu a vei lai lo.
- 36"Sikhawmsele, chu ni leh a tik thu Pa cho lo nih chun âukhawm nih, vâh ah vânmifial khawm nih, Fapa khawm nih an theih loh.
- 37Chun, Noa dam liau hâwi khan Minung Fapa hawng kal nawlhnâk chu asi lai.
- 38Chu ni tla ah buanso tlung lân tla ah chun Noa lawng ah a lût ni tiang hen an ei hen an bâr le, nupi pasal anna umh tâwn.
- 39Buanso a hawng tlung le, an ektê hen a lâk ver na lân lo chu zeikhawm an theih lo. Minung Fapa hawng kal nawlhnâk chu chu hâwi ber asi lai.
- 40Chu tikah chun, lo ah minung panih an um lai le, pakhat chu kalpi ving hen a um lai le, pakhat chu mâk hen a um lai.
- 41Nunau panih fâng rialnâk ah chun fâng rial hen an um lai le, pakhat chu kalpi ving hen a um lai le, pakhat chu mâk hen a um lai.
- 42Churuang chun a ringrâwn u, zeï ni ah me nan Lalpa a hawng kal awt nan theih lo ruangah.
- 43Sikhawmsele, hi hi theih u, mifîr a hawng kal tik ding in dâwngpu nih theih sele, a vêng lai le, a in a rawktir lai lo.
- 44Churuangah, nannih khawm râlrîng kumza hen um u, nanna râlrîng lo tikah Minung Fapa a hawng kal awt ruangah.
- 45"То-aw zumhkâi, fing tak, a pu nih a tik kipah an buh ting ding then piak ding hen a dâwngsung tla tlûnah hotu ah a siam mi chu, a zeï mi chem me asi lai?

⁴⁶A pu a hawng kal tik ah to-aw chubang hâwitê ti hen a hawng muh mi chu a thaw a suak lai.

⁴⁷Thungâi tak hen ka nan simh na, a neih zawzawng tlûnah hotu ah a siam lai.

⁴⁸Sikhawmsele, to-aw sual nih chun a thinlung hen, 'Ka pu a hawng sawm lai lo,' ti hen,

⁴⁹a to-aw hâwi tla vuak hen, mi a rî mi tla sinah ei hen bâr sele,

⁵⁰chu to-aw pu chu â rârling lo ni ah, a theih lo karah a hawng kal lai le;

⁵¹tan nih hen a hawng suah lai le, mi perpê tla tingvo hâwi a tingtir lai. Chunah chun ãap leh hachang rial chu a um lai.

Mathai 25

¹Chu tik chun Vân Ram chu nungâk thenhlimh parâ an khâwnvâr put hen mo dâwngpu dawng ding hen suak mi tla hen tahthimh asi rawh lai.

²An lakah panga an â le, panga an fing.

³An â mi tla nih chun an khâwnvâr tla an put le, a hâng lam chu an put sih lo.

⁴A fing mi tla lam nih chun an khâwnvâr tla an put le, an dîr tla lakah a hâng khawm an put sih.

⁵Chun, mo dâwngpu chu a hawng tung tlâi ruangah an ektê hen an ngû le, an it thlit rawh.

⁶"Chun, zân lâi chirah chun, 'Ngâinik u, mo dâwngpu a hawng kal rawh, amah dawng ding hen hawng suak u!' ti hen, âu hâu a hawng um rawh.

⁷Chu kê chun nungâk thenhlimh tla chu an thawk hep le, khâwnvâr tla an timhtuah.

⁸Chun, a â mi tla nih a fing mi tla sinah, 'Nan khâwnvâr hâng kha hawng kan pêk bâk u; kan khâwnvâr tla a mit awt, an ti.



- ⁹Sikhawmsele, a fing mi tla nih chun, 'Kannih leh nannih rangah a tinh lai loh; a zuartu tla sinah kal ule, châwk bâk u,' ti hen, an sâng.
- ¹⁰Chun, châwk ding hen an kal kar chun mo dâwngpu chu a hawng tlung rawh. Chun, a rârling mi tla chu amah hen lâwinâk puai ah an lût le, chun, in chu an khâr rawh.
- ¹¹"Chu nûnah chun nungâk thenhlimh dang tla khawm chu an hawng tlang le, 'Ka pu, ka pu, in hawng kan awnh!' an ti.
- ¹²Anih lam nih chun, 'Thungâi tak hen ka nan simh na, ka nan theih na lo asi, a ti le, a sâng.
- ¹³Chuvachun, ringrâwn hen um u, a ni leh a tik chu nan theih lo ruangah.
- ¹⁴"Mi ram dang ah kal awt hen, a to-aw tla kawh hen, a sum tla an sinah a kiltir na mi hâwi chu asi.
- ¹⁵To-aw pakhat sinah talent nga a pêk le, to-aw dang sinah talent nih a pêk le, to-aw dang sinah talent khat a pêk. An ti kho tâwk chiau hen a pêk na le, chun a kal rawh.
- ¹⁶Chun, talent nga tingtu chu, chu hen chun saw a leh sawm le, talent nga dang a suah.
- ¹⁷Chu hâwi ber hen talent nih tingtu khawm nih chun talent nih dang a suah rawh.
- ¹⁸Talent khat tingtu lam chu a va kal le, khur a chawh le, a pu tangka chu a thuh rawh.
- ¹⁹"Chun, sâwt tak nûnah chun chu to-aw tla pu chu a hawng tlung le, an sinah a sum thâwngthâng a chek.
- ²⁰Chun, talent nga tingtu chu a hawng kal le, talent nga dang a hawng put le, 'Ka pu, nangnih talent nga na ka kiltir mi kha; zauhnik talent nga dang ka suah,' a ti.

²¹Anih nih chun a sinah, 'To-aw ɬa leh zumhkâi, na ti zia a ɬa, tâwmtê tlûnah zumh na kâi le, tamtak tlûnah ka nan umtir lai; na pu lâwmnâk ah lût rawh, a ti.

²²"Chun, talent nih tingtu khawm chu a hawng kal le, Ka pu, nangnih talent nih na hawng ka kiltir mi kha; zauhnik, talent nih dang ka suah, a ti.

²³A pu nih chun a sinah, 'To-aw ɬa leh zumhkâi na ti zia a ɬa; tâwmtê tlûnah zumh na kâi le, tamtak tlûnah ka nan umtir lai; na pu lâwmnâk ah lût rawh, a ti.

²⁴"Chun, talent khat tingtu khawm chu a hawng kal le, 'Ka pu, mi tengkher na si ti ka nan theih le, na tuh lonâk khawmah na ât tâwn le, na vawrh lo mi khawm na pumh tâwn asi.

²⁵Chun, ka lâu le, ka va kal le, na talent kha tual ah ka thuh le; zauhnik, na tâ tê kha na muh nawlh hi,' a ti.

²⁶"A pu nih chun a sinah, 'To-aw rualo leh zângzêpa, ka tuh lonâk khawmah ka ât mi leh ka vawrh lonâk ah ka pumh tâwn ti na theih mu?

²⁷Chu hâwi asi chun, ka tangka chu sawlehtu tla sinah siah rawh ding na si, chuvachun ka hawng tlung tikah ka tâ hi a pung hen ka tawng nawlh ding asi.

²⁸Chun, a talent khat kha lak piak ule, talent râ neitu sinah pêk u.

²⁹Âuzawng a nei mi chu an pêk sap na lai le, an nei tam lai. Âuzawng a neilo mi lam chu a neihlem khawm an lâk piak lai.

³⁰Chun, to-aw mang tlâklo kha lênglei mûi ah chun lawnh u; chunah chun ɬap leh hachang rial a um lai, a ti le, a sâng.

³¹"Sikhawmsele, Minung Fapa hi, a vânmifial tla zawzawng hen, a rokualnâk hen a hawng kal tikah a rokualnâk laltophah ah a to lai.

³²Chun, a mâika ah phun kip anna pûm lai le, dawrâ vêngtu nih kêl lakah mi dawrâ a thlei hâwi hen annih tla chu a thlei lai.



³³Chun, dawrâ tla chu a vawrhlei ah a siah lai le, kêl tla chu a kehlei ah a siah lai.

³⁴Chu tikah chun Lalchem nih chun a vawrhlei ah mi tla sinah, 'Ka Pa malsâwm mi tla, hawng ule, laikulh siam tîr thawk hen nan rangah Ram timhtuah mi chu a ting u.

³⁵Ka sung a vâng liauah nannih nih ei ding nan ka pêk le; ka tî a hâl liauah din ding nan ka pêk le; khual ka si liauah nan ka tungtir.

³⁶Takkaro ka si liauah puan nan ka aihtir le; ka damlo liauah nan ka veh; rêngin ah ka um liauah ka sinah nan hawng kal asi, a ti lai.

³⁷"Chu tikah chun mi rep tla nih chun, 'Lalpa, zeitik ah sungvâng hen kan muh le, ei ding kan nan pêk? Tîhâl hen kan muh le, din ding kan nan pêk?

³⁸Zeitik ah khual hen kan muh le, kan nan tungtir? Takkaro hen kan muh le, nipuan kan nan aihtir?

³⁹Zeitik ah damlo hen mawh rêngin ah mawh kan nan muh le, na sinah kan hawng kal? ' ti hen, an sâng lai.

⁴⁰Chun, Lalchem nih chun an sinah, 'Thungâi tak hen ka nan simh na, hi bang ka unau mêchem mi tla lakah pakhat tlûnah nan ti mi chu ka tlûnah ti nan si, ti hen, a sâng na lai.

⁴¹"Chu thluh chun, a kehlei ah mi tla sinah khawm chun, 'Siatbarh mi tla, zungzâl mei diabol leh mifial tla rangah an timhtuah mi lakah chun hawng ka kaltâk u,

⁴²ka sung a vâng liauah nannih nih ei ding nan ka pêk lo; ka tî a hâl liauah din ding nan ka pêk lo;

⁴³khual ka si liauah nan in ah nan ka tungtir lo; takkaro ka si liauah puan nan ka aihtir lo; damlo leh rêngin ah ka um liauah nan ka veh lo,' a ti lai.

⁴⁴Chu tikah chun annih khawm nih, Lalpa, zeitik ah me sungvâng hen mawh, tîhâl hen mawh, khual hen mawh, takkaro hen mawh, damlo hen mawh, rêngin ah mawh kan muh le, na rian kan ÷uan piak lo?' ti hen, an sâng lai.

⁴⁵Chun, anih nih chun, an sinah, "Thungâi tak hen ka nan simh na, hi bang mi mêchem tla lakah pakhat tlûnah nan ti lo chun ka tlûnah ti lo nan si, ti hen, a sâng na lai.

⁴⁶Chun, chubang chu zungzâl rêpnâk ah an kal lai; mi rep tla lam chu zungzâl nungnâk ah an kal lai," a ti.

Mathai 26

¹Chun hi hâwi hi asi le, Jisu nih chubang thu zawzawng chu a sim thluh rawh chun, a ðhiruai tla sinah,

²"Ni nihnâk ah Kalkanh Kût a hawng um awt ti nan theih, Minung Fapa hi khenh ding hen an tlehtir awt asi," a ti.

³Chu liau chun Bâwlpu Lalchem Kaiapha an ti mi inkulh sung tualmâi ah chun bâwlpu lal tla leh zatlâng upa tla chu anna pûm;

⁴Jisu chu ngamlêm pêk hen tleih hen an thah khonâk ding hen anna thluk le;

⁵sikhawmsele, Kût sung chun si lah seh, chu lo chun zatlâng lakah nawknâk a hawng um sual lai," an ti,

⁶Chun, Jisu chu Bethani ah, phâr Simon in ah a um liauah,

⁷nunau pakhat alabasta bâwm ah sariak rimthâw man har tak put hen a sinah a hawng kal le, buh a ei liauah a lû ah a tawih.

⁸Sikhawmsele, ðhiruai tla nih chun chu chu an muh chun an thinthawk le, "Zeirangah me hi hâwi hen a veih salam?"

⁹Hi sariak hi man tamtak zuar hen, mipâm tla sinah pêk kho asi mi!" an ti.

¹⁰Jisu lam nih chun chu chu a theih le, an sinah, "Nunau hi zeirangah nan nawktir? Ka tlûnah thil ðha tak a ti asi.

¹¹Mipâm tla chu nan sinah um kumza ding an si lo mazei, kei lam chu nan sinah um kumza ding ka si lo.

¹²Hi sariak rimthâw hen ka taksa a tawih mi hi, an hawng ka vûinâk ding mi rangah a timhtuah asi.

13Thungâi tak hen ka nan simh na, laikulh zawzawng ah hi Thâwnghâng Ƨha an simnâk zawngah hi nunau thilti khawm hi amah theihkumzanâk ding hen an sim vima bâk lai," a ti.

14Chu nûnah chun leinîh tla lakah pakhat Juda Iskariot an ti mi chu bâwlpulal tla sinah a kal le,

15"Amah chu kan tlehtir na lai le, zei nan ka pêk lai?" a ti. Chun, tangka shekel sâwmthum pêk ding an tiamh.

16Chu nûnah chun tleih ding hen remkâng tik a hâwl rawh.

17Chun, Sang Thilnu telhlo ni, ni masachem ah Ƨhiruai tla chu Jisu sinah an hawng kal le, "Kalkanh Kût buh einâk ding hen kha zeiah me an timhtuah piak sele na duh?" an ti.

18Chun, anih nih chun, "Khuapi ah âumawh sinah kal ule, a sinah, 'Sîntirtu nih chun ka tik a nâi rawh; ka Ƨhiruai le hen Kalkanh Kût na in ah kan mang lai, a ti,' va ti u," a ti.

19Chun, Jisu nih an sinah a ti mi hâwi hen Ƨhiruai tla nih chun an ti, chun Kalkanh Kût buh chu an timhtuah rawh.

20Chun, zânleibâi asi rawh chun, Ƨhiruai leinîh tla hen buh an dûm le;

21chun, an ei liauah anih nih chun, "Thungâi tak hen ka nan simh na, nan lakah minung pakhat nih a hawng ka tlehtir lai," a ti.

22Chun, thungâi an lawksawng le, a sinah, "Lalpa, keimah ma?" an ti chiauh.

23Chun, anih nih chun, "Khêng hawng ka purhpitu tak nih a hawng ka tlehtir lai.

24Minung Fapa hi a thâwnghâng an rîn hâwitê khan a kal awt asi. Sikhawmsele, Minung Fapa tlehtirtu ding minung tlûn chu a pit! Chu minung chu suak lah sele a rangah a Ƨha dauh lai," ti hen a sâng.

25Chun, a tlehtirtu ding mi Juda nih a sâng le, "Rabbi, keimah ma?" a ti. Anih nih chun a sinah, "Si ta a," a ti.

²⁶Chun, an ei liauah Jisu nih sang a lâk le, mal a sâwm le, a phel le; chun a ðhiruai tla sinah a pêk le, "Lâk ule, ei u; hi hi ka taksa asi," a ti.

²⁷Chun, hâi a lâk le, lâwmthu a sim le, an sinah a pêk le, "Nan ektê hen din u;

²⁸hi hi ka thisen, soal tla ngaihdamnâk dingah mi tamtak rangah suak mi thutiamnâk chu asi.

²⁹Sikhawmsele, ka nan simh na, ka Pa Ram ah nanmah tla hen a thar ka din ni a tung lân lo chu tu thawk hen grep zûn rah lakah mi hi ka din nawlh lai lo rawh," a ti.

³⁰Chun, la an sak thluh rawh chun an suak le, Oliv Tlâng ah chun an kal rawh.

³¹Chun, Jisu nih an sinah, "Tuzân hin nan ektê hen nan ka kaltâk ver lai; 'Dawrâ vêngtu chu ka vuak lai le, dawrâ rual chu anna rek ver lai,' ti rîn asi ruangah.

³²Sikhawmsele, ka thawknawlh nûnah Galili ram ah nan mâi leiah ka kal lai," a ti.

³³Peter lam nih chun a sinah, "An ektê hen an kaltâk khawm sele, kei lam chu ka nan kaltâk rîlmâl lai lo," ti hen a sâng.

³⁴Jisu nih a sinah, "Thungâi tak hen ka nan simh, tuzân ah âr khuang lânah veithum na ka pheh lai," a ti.

³⁵Peter nih a sinah, "Na thihnâk ah chun thi bâk awt khawmsele ka nan pheh rîlmâl lai lo," a ti. Chu hâwi hen ðhiruai tla zawzawng nih chun an ti chiau.

³⁶Chu thluh chun Jisu chu anmah tla hen munkhat hen Getsemani an ti mi chu an tleung le, chun a ðhiruai tla sinah, "Khinah thla ka cham kar vial chu hinah hin to u," a ti.

³⁷Chun, Peter leh Zebedai fapa panih chu a put na le, a ngaihsia hen thungâi a lawksawng.

³⁸Chun an sinah, "Ka thinlung thungâi a ngaihsia, thihnâk rê asi; hinah hin um ule, hawng ka vêngpi u," a ti.

³⁹Chun, tâwm hen mâi leiah a va kal le, a bawkbukhup le, "Ka Pa, tikho asi chun hi hâi nih hin hawng ka lanh seh; sikhawmsele keimah thu silo hen, nangmah thu thu si dauh seh," ti hen thla a cham.

⁴⁰Chun, thiruai tla sinah a hawng kal le, annih chu it riap hen a muh na, chun Peter sinah, "Nannah nih dârkar khat men nan ka vêngpi kho lo mu?"

⁴¹Lêmnâk ah nan lût lonâk ding hen râring kumza hen thlacham u. Thlarau lam nih chun a huam le, taksa lam chu a chak lo asi," a ti.

⁴²Chun, veinihnâk ah a va kal le, thla a cham nawlh le, "Ka Pa, din lo hen hi hâi nih hin hawng ka lanh kho lo thlo chun nangah thu thu si seh," a ti.

⁴³Chun, a hawng kal nawlh le, annih murui chu it riap hen a muh nawlh na le, thungâi an itmu a suak ruangah.

⁴⁴Chun, a kaltâk na nawlh le, veithumnâk ah a thusim lîlâ thla a cham nawlh.

⁴⁵Chu thluh chun thiruai tla sinah a hawng nawlh le, an sinah, "Tuah lam chun it ule, a dîn u rawh. Zauhnik u, a tik chu a tlung rawh, Minung Fapa hi misual tla kut ah an tlehtir awt hi.

⁴⁶Thawk ule, kan kal lai. Zauhnik u, hawng ka tlehtirtu ding chu a nâi rawh hi," a ti.

⁴⁷Chun, a sim liau chirah Juda, leinih tla lakah pakhat chu a hawng tlang rawh. Amah rual hen bâwlpu lal leh zatlâng upa tla sin thawk hen mi zapi cherkhet nâmsâu leh talhbo put hen an hawng tlang bâk.

⁴⁸Chun, a tlehtirtu ding mi nih chun singsiahnâk ding a simhkan ver na, "Ka châwchawk mi chu amah chu asi lai, tleih u," ti hen.

⁴⁹Chun, Jisu chu a va fûk sawm le, "Chibai, Rabbi" ti hen, a châwchawk chiam.

⁵⁰Chun, Jisu nih a sinah, "Kâwi, na hawng san chu ti rawh," a ti. Chu kê hen Jisu chu an fûk le, an tleih rawh.

⁵¹Chun, Jisu murui lakah mi pakhat nih chun a kut hen a banh le, nâmsâu a phâwi le, Bâwlpu Lalchem sal chu a lengh le, a nakhaw tla phak hen a themh.

- ⁵²Chun, Jisu nih a sinah, "Na nâmsâu kha a siahnâk ah siah nawlh, nâmsâu lektu tla vial chu nâmsâu ber hen an thi awt asi.
- ⁵³Tu khawmah vânmifial sâng ruk mun leinih ngâk a tam dauh hawng ka fial piak ding hen ka Pa sinah ngiar kho lo hen ma na ka ruat?
- ⁵⁴Sikhawmsele, ngiar menza khawmsele zeitin Pathian lasui thu hi hâwi hen a hawng um ding mi thu hi a hawng tung kho lai?" a ti.
- ⁵⁵Chu liau tak chun Jisu nih mi zapi tla sinah chun, "Nâmsâu tla, talhbo tla put hen rawkmang tleih ding hâwi hen hawng ka tleih ding hen nan hawng suak mu? Pathian Biakin ah nisiai sîntir na hen ka to le, nan ka tleih tung lo.
- ⁵⁶Sikhawmsele, khuavâng lasuirîn tla chu a tung khonâk ding hen hi bang zawzawng hi a hawng um rawh asi hi," a ti. Chu liau chun thiruai tla zawzawng nih chun amah chu an thlahthlamh le, an tek ver.
- ⁵⁷Chun, Jisu tleih tu tla nih chun Bâwlpu Lalchem Kaiapha in ah Dân sîntirtu tla leh upa tla anna pûmnâk ah chun anih chu an kalpi rawh.
- ⁵⁸Sikhawmsele, Peter nih lâk tak thawk hen amah chu a zûl le, Bâwlpu Lalchem in kulh sung tualmâi tiang hen; chun, a va lût le, a dawngnâk muh ding hen vêngtu tla lakah a va to bâk.
- ⁵⁹Chun, amah chu an thah khonâk ding hen bâwlpu lal tla leh lâirêltu tla zawzawng nih chun Jisu phiarnâk an hâwl le;
- ⁶⁰âwkrâwl saksi tamtak hawng kal na khawm sele zeitin khawm an tawng lo.
- ⁶¹A nehnûnah lam chun minung panih an hawng kal le, "Hi minung nih hin 'Pathian Biakin siat hen ni thum sung ah ka sak nawlh kho lai,' a ti," an ti.
- ⁶²Chun, Bâwlpu Lalchem chu a dîr le, a sinah, "Zeitin khawm na sâng lo mu? Hi bang tla nih an phiarnâk hi ze ti zia mesi?" a ti.
- ⁶³Jisu lam chu a dâisip. Chun, Bâwlpu Lalchem nih chun a sinah, "Pathian nung min hen ka nan fâi. Mesia Pathian Fapa chu na si ma? Hawng kan simh," a ti.

⁶⁴Jisu nih a sinah, "Si ta a. Sikhawmsele, ka nan simh, hi nûnah Minung Fapa hi thiltikhonâk vawrhlei ah to hen, a vên sôm tlûnah a hawng kal mi nan muh awt asi," a ti.

⁶⁵Chun, Bâwlpu Lalchem nih chun a nipuan tla a thlêk le, "Pathian a simsiat rawh; theihpitu dang zeï kan herh lai rawh? Pathian a simsiat zia tuah nan theih rawh, zeitin nan ngaih?" a ti.

⁶⁶Annih nih chun, "Thi tlâk asi," ti hen, an sâng.

⁶⁷Chun, a mêl ah chil an sah le, an vuak le; zeimaw mi nih chun,

⁶⁸"Nang, Mesia, âu nih a nan bengh? Hawng kan simh," ti hen, an bengh.

⁶⁹Chun, Peter chu lêng ah inkulh sung tualmâi ah a to le; chun nungâk pakhat a sinah a hawng kal le, "Nang khawm Jisu sinah Galili ram ah um mi kha na si hi," a ti.

⁷⁰Sikhawmsele, anih nih chun, "Na thusim chu ka theih lo thlo," ti hen an ektê mâika ah a pheh.

⁷¹Chun in kulh kawtkâ ah a va suak kê hen nungâk dang nih anih chu a muh le, chunah mi tla sinah chun, "Hi khawm hi Nazaret mi Jisu sinah um mi kha asi hi," a ti.

⁷²Chun, "Chu minung chu ka theih loh," ti hen siatsirh hen a pheh nawlh.

⁷³Chun, sâwtlotê nûnah a kiangah dîr mi tla nih chun Peter sinah, "Nang khawm hi an sinah mi na si ngelchel, na hawlh ah â thei ko," an ti.

⁷⁴Chun, anih nih chun, "Chu minung chu ka theih loh," ti hen hawlh siat â barh le, siat â sirh rawh. Chun, âr a khuang sawm.

⁷⁵Chun, Peter nih chun, Jisu nih, "Âr a khuang lânah nangnih veithum na ka pheh lai," a ti mi thu kha a hawng theih nawlh rawh. Chun, a suak le, ngaihsia tak hen a ÷ap rawh.

Mathai 27

¹Chun, zîngleï a hawng si rawh chun bâwlpu lal tla leh zatlâng upa tla zawzawng chu Jisu thah ding hen thu anna thluk.

- ²Chun, an phuar le, an kalpi le, governor Pilat sinah an pêk rawh.
- ³Juda, a tlehtirtu nih khan Jisu an mawhtir ti a theih kê hen â sîr le, tangka shekel sâwmthum kha bâwlpu lal tla leh upa tla sinah a hawng put nawlh le,
- ⁴"Sual neilo ka tlehtir mi kha thil ka ti sual asi," a ti. Annih nih chun, "Chu chu kan rangah zeî a pawî lai? Nangmah duhzia zawng hen ti," an ti piak.
- ⁵Chun, anih nih chun tangka shekel chu mun thenhlimh sungah a lawnh le, a kal ving le, thi thlo hen â âwk rawh.
- ⁶Chun, bâwlpu lal tla nih chun tangka shekel tla chu an lâk le, "Hi hi Biakin thawhlâwm bâwm ah siah a thiang lo, thisen man asi ruangah," an ti.
- ⁷Chun, anna thluk le, khual tla vûinâk ding hen bêl hêmtu mun chu an châwk rawh.
- ⁸Churangah asi, chu mun chu tutiang hen 'Thisen Mun' an ti mi chu.
- ⁹Chu liau chun khuavâng Jeremia nih, "Chun tangka shekel sâwmthum an hauh mi man, Israel thlâk âu tla nih mawh an hauh mi man chu an lâk le,
- ¹⁰Lalpa nih hawng kan tiamh hâwi hen bêl hêmtu mun rangah an pêk," ti hen, a sim mi kha a hawng tung rawh asi.
- ¹¹Chun, Jisu chu governor mâika ah chun a dîr le, chun governor nih chun, "Juda tla Lalchem na si ma?" ti hen, a deih. Jisu nih a sinah, "Si ta a," a ti.
- ¹²Chun, bâwlpu lal tla leh upa tla nih an phiar liauah zeitin khawm a sâng lo.
- ¹³Chun, Pilat nih a sinah, "Hi tluk an phiar mi hi na theih lo ma?" a ti.
- ¹⁴Sikhawmsele, kê khat khawm hen a sâng lo; chun governor nih thungâi chê a ti.
- ¹⁵Chun, governor nih kût ni ah chun rêngtlâ pakhat, an duh mi zawng mi zapi chu a suah piak tâwn.
- ¹⁶Chun, chu liau chun rêngtlâ, min thang tak, Baraba, an ti mi chu an nei.
- ¹⁷Chun, an hawng le, Pilat nih an sinah, "Âu me an suah piak na sele nan duh? Baraba ma, Jisu Mesia an ti mi chu?" a ti.

- ¹⁸Nahsuahnâk ruangah anih chu an tleihtir ti a theih ruangah.
- ¹⁹Chun, lâirêlnâk tophah ah chun a to liauah, a nupi nih, "Kha mi rep tak tlûnah khan zeikhawm ti lah; tusûn hin amah ruangah mang leiah thil tamtak ka tuar asi," ti hen, a chah.
- ²⁰Chun, bâwlpu lal tla leh upa tla nih Baraba deih hen Jisu veih ding hen mi zapi tla chu an lêm.
- ²¹Governor nih chun annih tla chu a sawnh na le, "An panih lakah a zeï mi dauh me an suah piak na sele nan duh?" a ti nawlh. Chun, annih nih chun, "Baraba," an ti.
- ²²Pilat nih an sinah, "Jisu Mesia an ti mi hi zeitin ka ti lai rawh ne?" a ti. An ektê hen, "Anih chu kraws ah khenh rawh," an ti.
- ²³Chun, anih nih chun, "Zeïrangah me? Zeï me a sual?" a ti. Sikhawmsele, annih tla chu, "Kraws ah kenhhtir rawh," ti hen an âu chiam.
- ²⁴Chun, Pilat nih zeitin khawm a ti kho lo le, a nawk awt dadauh ti a theih le, tî a lâk le, mi zapi mâika ah chun a kut a tawl le, "Hi mi rep thahnâk lakah hin ka thiang; nannah nih nanmah ti hen va ti u," a ti.
- ²⁵Chun, zatlâng zawzawng nih, "A thihnâk mawh chu kanmah tlûnah leh kan fa tla tlûnah um seh," ti hen, an sâng.
- ²⁶Chu thluh chun Baraba chu a suah piak na le; Jisu lam chu a vuak le, kraws ah khenh ding hen a pêk na rawh.
- ²⁷Chu thluh chun governor kawrsen tla nih chun Jisu chu lal in ah an kalpi le, an murui lakah mi zawzawng an sinah an pumh na.
- ²⁸Chun, a puan tla an lît piak le, puan sen an ahtir.
- ²⁹Chun, ling lukhuh an phiar le, an khuhtir le, a kut vawrhlei ah lâiluang an puttir; a mâika ah an siksidâr le, "Chibai, Juda tla Lalchem!" ti hen, nihsuak siamnâk ah an mang.
- ³⁰Chun, amah chu chil an sah le, lâiluang chu an suh le, a lû ah an vuak.

- ³¹Chun, nihsuak siamnâk ah an mang thluh chun puan chu an lît piak le, amah puan chu an aihtir nawlh le, kraws ah khenh ding hen an kalpi rawh.
- ³²Chun, an suak liauah, Kurini mi, a min Simon an muh le; chu minung chu a kraws put ding hen an tleih.
- ³³Chun, Golgotha, luruh mun an ti mi mun chu an hawng tleng le,
- ³⁴uain thur, zei lo khâ hen chawmh mi, a din ding hen an pêk.
- ³⁵Sikhawmsele, a tem le, a din duh lo. Chun, kraws ah an khenh thluh rawh chun chamchawh hen a nipuan tla anna ðhen.
- ³⁶Chun, chunah chun an to le, an vêng.
- ³⁷A phiarnâk, "HI JISU HI JUDA TLA LALCHEM ASI," ti hen rîn mi a lû tlûnah an bêk.
- ³⁸Chun, amah rual hen rawkmang panih an khenh na bâk, a vawrhlei ah pakhat, a kehlei ah pakhat.
- ³⁹Chun, mivel kip nih an lû an sut le,
- ⁴⁰"Nang, Pathian Biakin siat hen ni thum ah sak nawlhtu, a hum rawh; Pathian Fapa na si chun kraws thawk hen hawng ðum ko me," ti hen an sîrleih.
- ⁴¹Chu hâwi ber hen bawlpu lal tla nih chun Dân sîntirtu leh upa tla hen,
- ⁴²"Midang chu hum tâwn hen mah chu â hum kho lo. Israel Lalchem asi lo mazei, tuah kraws thawk hen hawng ðum ko seh me, chun amah chu kan zumh lai.
- ⁴³Pathian a lung si lo ma, amah hi a duh chun tuhin Pathian nih ruangsuaah seh, 'Pathian Fapa ka si,' a ti dangâiah," an ti.
- ⁴⁴Rawkmang an khenh mi tla khawm nih chun, chu hâwi ber hen an sîrleih.
- ⁴⁵Chun, dâr leinih thawk hen dâr thum tiang hen laikulh a hawng mûi ver rawh.

⁴⁶Chun, dâr thumnâk dingah chun Jisu chu hâu fâk tak hen, "Eli, Eli, lema sabakthani?" ti hen a âu le, chu chu 'Ka Pathian, ka Pathian, zeirangah na ka kaltâk?' tinâk asi.

⁴⁷Chun, a kiangah zeimaw mi dîr tla nih chu chu an theih le, "Hi minung nih hin Elija a kawh asi," an ti.

⁴⁸Chun, an lakah minung pakhat a tek sawm le, hâng dâwp kho mi a lâk le, uain thur lakah a chiah le, fung lakah a târ le, a dintir.

⁴⁹Chun, midang tla nih chun, "Um ko seh, amah hum ding hen Elija a hawng lai mawh kan zauh lai," an ti.

⁵⁰Chun, Jisu chu hâu fâk tak hen a âu nawlh le, a nûkrî a chat rawh.

⁵¹Chun, Pathian Biakin puanzâr chu a tlûnlei thawk hen a tanglei tiang hen suak dak hen a tlêk rawh. Chun, lî a hawng nîn le, lungpi tla an kak le;

⁵²thlân tla â awng le, mi thenhlimh it rawh mi tla taksa tamtak khawm thawk hen an um rawh.

⁵³Chubang tla chu Jisu thawknawlh nûnah chun thlân ah mi chu an suak le, Khua Thenhlimh ah chun an lût le, mi tamtak sinah anna langh rawh.

⁵⁴Chun, kawrsen zâ hotu leh a sinah Jisu vêng hen um bâk mi tla nih chun lînîn leh thil umzia tla chu an muh rawh chun thungâi an ÷ih le, "Hi Minung hi Pathian Fapa asi chiammâm," an ti.

⁵⁵Chun, chunah chun nunau tamtak a rianṭuan piak vima hen Galili ram thawk hen Jisu hawng zûltu tla chu an um le, a râltlâng hen an chawnh.

⁵⁶Chubang tla lakah chun Mari Magdala mi, Mari Jem leh Josef nu leh Zebedai fapa tla nu le anna tel.

⁵⁷Chun, zânleibâi a hawng si rawh chun, minei, a min Josef Arimathai thawk hen mi a hawng kal le, amah khawm chu Jisu ÷hiruai asi bâk.

⁵⁸Chu minung chu Pilat sinah a va kal le, Jisu ruak chu a deih. Chun, Pilat nih lâk ding thu a pêk.

⁵⁹Chun, Josef nih chun ruak chu a lâk le, puan mangthia thiàng tak hen a tuam le,

⁶⁰amah thlân thar lung a ker mi lakah chun a zâutir le; thlân kawtkâ ah chun lung lianpi mi hen a khâr le, a kal rawh.

⁶¹Chun, Mari Magdala mi leh Mari dang chu chunah chun an um, thlân kawtkâ zâwn ah chun an to.

⁶²Chun, a thâituan ah chun chu chu Timhtuah ni nûnah bawlpu lal tla leh Farisai tla chu Pilat sinah an hawng a pûm.

⁶³"Ka pu, chu perpettu nih chun a dam liauah khan, 'Ni thum nûnah ka thawknawlh lai,' a ti mi kan theih ko.

⁶⁴Chun, thlân chu ni thum ni tiàng hen vêng ding hen thu pêk. Chu hâwi asi lo chun, a thiruai tla nih amah chu an fîr lebang lai le, zatlâng sinah, 'Mithi lakah mi a thawknawlh rawh asi,' an ti lebang lai; chun perpetnâk madung chu a masa mi ngâk hen a tha lo khun lai," an ti.

⁶⁵Pilat nih an sinah, "Vêngtu kawrsen tla nan nei kha ta a; kal ule, nan ti kho zia zawng hen tha tak hen vêngtir ko u me," a ti.

⁶⁶Chun, vêngtu kawrsen tla hen an va kal le, thlân chu an vêngtir na le, lung chu an singsiah.

Mathai 28

¹Chun, Dinhni nûnah chun zarhkar ni masachem ah khuadei bâi ah, Mari Magdala mi leh Mari dang chu thlân zauh ding hen an kal.

²Chun, lâkkhatko ah lî fâk tak hen â nîn le; Lalpa vânmifial vân thawk hen a hawng tum le, lung chu a thial le, a tlûnah a to rawh.

³A mêl umzia chu mîmthlalek hâwi asi le, a nipuan tla chu vûr hâwi hen a vâ.

⁴Amah an thîh ruangah vêngtu tla chu an thir le, a thi mi hâwi hen an um rawh.

⁵Chun, vânmifial nih chun nunau tla chu a sawnh na le, an sinah, "Nannih nih chun ðih lah u, Jisu an khenh mi kha nan hâwl ti ka theih.

⁶Hinah a um lo rawh; a sim mi hâwitê hen a thawknawlh rawh. Hawng ule, a itnâk mun hi hawng zauhnik u.

⁷Chun, kal rereh ule, a ðhiruai tla sinah, 'Mithi lakah mi a thawknawlh rawh asi; chun Galili ram ah nan mâi leiah a kal; chunah chun amah chu nan muh lai, ti hen, simh na u. Ngâinik u, ka nan simh na rawh hi," a ti.

⁸Chun, lâu leh lâwm tak bû hen thlân thawk hen chun an kal rereh le, a ðhiruai tla simh na ding hen an tek rawh.

⁹Chun, lâkkhatko ah, Jisu nih annih chu a tawng na le, "Chibai," a ti. Chun, annih nih chun a kezaphah tla chu an tham le, an mâimûk.

¹⁰Chun, Jisu nih an sinah, "Lâu lah u, kal ule, Galili ram ah kal ding hen ka unau tla va simh na u; chunah chun nan ka muh lai," a ti.

¹¹Chun, nunau tla chu an va kal liau chun vêngtu kawrsen zeimaw mi chu khuapi ah an lût le, thil umzia zawzawng chu bâwlpu lal tla sinah an va simh.

¹²Chun, upa tla hen anna pûm le, anna thluk rawh; chun kawrsen tla sinah tangka cherkhet an pêk na le,

¹³"Zânah kan it karah 'A ðhiruai tla chu an hawng le, amah chu an fîr rawh asi, ti u.

¹⁴Chun, governor nih chu chu a hawng theih rawh chun amah chu kan lêm lai le, lawksawng lo ding hen kan siam na lai," an ti.

¹⁵Chun, tangka chu an lâk le, an simh na mi hâwi hen chun an ti rawh. Chun, tutiang hen chu thu chu Juda tla lakah an sim chur asi.

¹⁶Þhiruai leikhat tla chu Galili ram ah, Jisu nih tlâng a ruat piak na mi leiah an kal.

¹⁷Chun, amah an muh rawh chun mâi an mûk; zeimaw mi nih chun an zumhmaidh.

¹⁸Chun, Jisu chu an sinah a hawng kal le, annih tla chu a sawnh na, "Tual leh vâh ah mi thuneihnâk zawzawng ka sinah pêk asi rawh.

¹⁹Chuvachun, kal ule, phun kip lakah mi thiruai tla ah siam na ule, Pa leh Fapa leh Thlarau Thenhlimh min hen baptis na ule, thu ka nan pêk na mi zawzawng zâwt ding hen sîntir na u.

²⁰Chun, ngâinik u, kei zungzâl hen laikulh dawnggh tiang hen nan sinah ka um vima lai," a ti.



Mark

Mark 1

- ¹Hi hi Pathian Fapa Jisu Krist Thawngthang Ṭha tlung dawmhtîrnâk chu asi.
- ²Khuavâng Isai lasuibu ah: "Ngâinik, ka mifial na mâi leiah ka fial lai le, anih nih chun na lampi a siam lai.
- ³Ramkaro ah mi âu hâu nih chun, Lalpa lampi sial ule, a lam tla dingtir u," a ti, ti hen, rîn hâwi khan.
- ⁴Johan ramkaro ah Baptistu kha sual ngaihdamnâk ding rimnâk bapisma thu sim hen a hawng kal.
- ⁵Chun, Judai ram mi zawzawng leh Jerusalem mi zawzawng tla an suak le, a sinah an kal le, an sual tla thutluang vâwr hen Jordan Va ah chun a sinah baptis an si rawh.
- ⁶Chun, Johan chu sangâwngsâu mul puan hen â thuam le, a tâi savun tâisâwm hen â sâwm le, khâubawk leh ram khuaitizû a ei.
- ⁷Chun, "Ka dung leiah keimah ngâk hen rokual dauh a hawng kal liau asi; kûn hen a pheikawk ri sût tlâk khawm ka si lo.
- ⁸Kei nih chun tî hen ka nan baptis na tâwn le; anih lam nih chun Thlarau Thenhlimh hen a nan baptis na lai," ti hen, a sim.
- ⁹Chun, chu liau chun tihin asi le, Jisu chu Galili ram ah Nazaret thawk hen a hawng kal le, Jordan Va ah chun Johan sinah baptis asi rawh.
- ¹⁰Tî ah mi a suak kê hen vâwng le, Thlarau Thenhlimh vaṭhu hâwi hen a tlûnah a hawng ṭum mi a muh.
- ¹¹Chun, "Nang, ka Fapa duhtak na si le, na tlûnah thungâi ka lâwm asi," ti hen, vâwng thawk hen aw-hâu a hawng suak.
- ¹²Chun, Thlarau nih chun ramkaro ah a fial sawm.
- ¹³Chun, Setan lêm bû hen ramkaro ah ni sâwmli a um le, ramsa tla nâwngah a um le; vâwmifial tla nih chun an zauhkhenh rawh.

- 14Chun, Johan chu rêng an thlâk nûnah Jisu chu Pathian Thâwngthâng Ƨha sim hen Galili ram ah a hawng kal le,
- 15"Tik chu a hawng tlung rawh, Pathian Ram khawm a hawng nâi rawh; rim ule, Thâwngthâng Ƨha hi lung u," a ti vima.
- 16Chun, Galili Rilî kap a râwng liauah Simon leh a unau Andri chu rilî ah chun lên vawrh hen a muh na le; ngarâltu an si rêng asi.
- 17Chun, Jisu nih an sinah, "Hawng ka zûl u, minung hâwltu ah ka nan siam na lai," a ti.
- 18Chun, lên tla chu kaltâk hen an zûl sawm.
- 19Chun, lât lo tê a kal rawh chun Zebedai fapa Jem leh a unau Johan chu a muh na le, chu tla chu lên Ƨhît hen lawng ah ber an um.
- 20Chun, anih nih chun anmah chu a kawh sawm na le; chun an pa Zebedai chu lawh an lâk mi tla hen lawng ah an kaltâk na le, an zûl rawh.
- 21Chun, Kapernaum khua ah a va lût le; chun Dinhni ah chun pumhnâk in ah a va lût le, a sîntir sawm na.
- 22A thu sîntirnâk chu chê an ti thlo; Dân sîntirtu tla hâwi silo hen, thuneihnâk nei hâwi tak hen anmah tla a sîntir na ruangah.
- 23Chun, anna pumhnâk in ah chun khuri nâwmtâm vuanh mi pakhat a um le; anih nih chun,
- 24"Nazaret Jisu, kannih leh nang ze me kanna tlâinâk um? Hawng kan veih ding hen na hawng mi masi? Nang ka nan theih, Pathian Mi Thenhlimh na si," ti hen a âu sawm rawh.
- 25Chun, Jisu nih a fâi le, "Dâisip, a sungah mi hawng suak rawh," a ti.
- 26Chun, khuri nâwmtâm nih chun amah a sûlneng le, aw-hâu fâk tak hen a sungah mi a suak rawh.
- 27Chun, an ektê hen thungâi chê an ti. Chuvachun, "Hi hi ze me si le? Sîntirnâk thar asi ma hi! Khuri nâwmtâm tla khawm thu nei tak hen thu a pêk le, a thu anna âwi vima ko râu," ti hen, anna cheih.

- ²⁸Chun, Galili ram kiangkam zawzawng ah ram kipah a thâwnghâng a thang sawm.
- ²⁹Chun, pumhnâk in ah mi chu a suak rawh chun, Jem leh Johan hen Simon leh Andri in ah chun an lût sawm.
- ³⁰Chun, Simon nupi nu chu a dam lo le, a rîl ko; chun, a thâwnghâng chu Jisu an simh sawm.
- ³¹Chun, anih nih chun a kut a tleih le, a thawh rawh; chun a zâwt chu a reh le, an eibâr a timhtuah piak na rawh.
- ³²Chun, zânleibâi ah nî a tlâ nûnah chun damlo zawzawng leh khuri vuanh tla a sinah an hawng put.
- ³³Khuatê hen kawtkari ah chun an hawng a pûm khup.
- ³⁴Chun, mi cherkhet nganfâk kip hen fâk tla chu a damh na le, khuri cherkhet a nar na; khuri tla nih chun amah an theih ruangah an hawlh ding a siang lo.
- ³⁵Chun, a thâizîngtê, khuadei lânah a thawk le, in ah mi chu a suak. Khuapi thawk hen mun king nakah ah a va kal le, chunah chun thla a cham.
- ³⁶Chun, Simon leh a hâwi tla nih chun a dung leiah an zûl.
- ³⁷Chun, anih chu an tawng rawh chun a sinah, "Mi zawzawng nih an hâwl asi, an ti.
- ³⁸Chun, anih nih chun an sinah, "Mun dangah khua nâi tla ah chun kan kal lai, chubang tla ah khawm thu ka sim khonâk ding hen; chu chu ka hawng kal san asi," a ti.
- ³⁹Chun, thusim leh khuri tla nar vima hen Galili ram zawzawng ah pumhnâk in tla ah a lût vima.
- ⁴⁰Chun, Jisu sinah phâr a hawng kal le, "Na duh chun na hawng ka thiangtir kho," ti hen, a mâika ah siksidîr hen a ngiar chiam.
- ⁴¹Chun, anih nih chun thungâi a zângfah le, a banh le, a tawng, "Ka duh e, hawng thiang rawh," a ti.

⁴²Chun, zeikarlo ah a phâr chu a reh sawm le, a hawng thiang rawh.

⁴³Chun, Jisu nih chun, "Âu sin khawmah sim lo ding hen a thiamthih rawh;

⁴⁴sikhawmsele, bâwlpu sinah va a zauhtir le, na thianhnâk ding hen Mosi nih thil a ruat mi tla kha ap rawh, an theihthiam khonâk ding hen," a ti thlir le, a kaltir sawm.

⁴⁵Sikhawmsele, anih chu a suak le, chu thâwngthâng chu thungâi a phuang le, a zanh. Chuvachun, Jisu chu lang hen khua ah a lût kho lo rawh. Ramkaro mun ah a um le, chun mun kipah mi a sinah an hawng kal tâwn.

Mark 2

¹Chun, ni zeimaw zat ding nûnah, Kapernaum ah a lût nawlh liauah, in ah chun a um ti thu a hawng thang rawh.

²Chun, kawtkari khawmah umnâk umlo rê hen mi cherkhet an hawng a pûm rawh; chun an sinah thu a sim rawh.

³Chun, mi khêng pakhat, minung pali nih zawnh hen a sinah an hawngpi.

⁴Chun, zapi ruangah a kiang tekah an kal kho lo ruangah a umnâk in tlûn an siat le; chun, an pemh thluh rawh chun a tangphah chu a tlûnah mi khêng zâu bû hen an thlâk.

⁵Chun, Jisu nih an lung zia chu a muh rawh chun mi khêng sinah, "Ka fa, na sual tla ngaihdam asi rawh," a ti.

⁶Chun, Dân sîntirtu zeimaw mi tla chu chunah chun an to le,

⁷"Hi minung nih hin zeirangah me hi hâwi hen thu a sim? Pathian a simsâwi asi hi; mi pakhat, Pathian cho lo nih chun âu nih me sual tla ngaihdam kho?" ti hen, an thinlung hen anna ruat.

⁸Chun, Jisu nih an thinlung ah chu hâwi hen an ruat ti a thinlung hen a hawng theih sawm le, an sinah, "Chubang thu chu zeirangah me nan thinlung ah nan ruat?"

⁹Mi khêng sinah hin, 'Na sual tla ngaihdam asi rawh,' ti leh, 'Na tangphah lâk le, kê hen kal rawh, ti hi, a zei mi a sim awl dauh'?



- ¹⁰Zeikhawm si sele, laikulh ah Minung Fapa nih soal ngaihdam khonâk a nei ti nan theih khonâk ding hen mi khêng sinah chun,
- ¹¹"Thawk le, na tangphah lâk le, na in ah kal rawh ka nan ti," a ti.
- ¹²Chun, anih chu a thawk le, a tangphah a lâk sawm le, an ektê muh hen a suak rawh. Churawhchun, an ektê hen thungâi chê an ti le, "Hi hâwi rerêng hi kan muh dah lo," ti hen, Pathian an sawr rawh.
- ¹³Chun, Jisu chu a suak nawlh le, rilê kapah chun a kal le; chun mi zapi zawzawng chu a sinah an va kal le, a sîntir na rawh.
- ¹⁴Chun, a kal pah hen, Levi, Alphaï fapa chu siah châwinâk mun ah to mi a muh le, a sinah, "Hawng ka zûl rawh," a ti. Chun, a thawk le, a zûl rawh.
- ¹⁵Chun, hi hâwi hi Jisu nih chun Levi in ah chun buh khêng a dûm le, siah khawlhtu tla leh misual cherkhet nih Jisu leh a ðhiruai tla chu an dûmpi na. An tam ngâi dangâiah Jisu chu an zûl bâk tâwn.
- ¹⁶Chun, Farisai tla lakah Dân sîntirtu tla nih chun Jisu nih misual tla leh siah khawlhtu tla a dûmpi na mi an muh rawh chun, a ðhiruai tla sinah chun, "Zei zia me siah khawlhtu tla leh misual tla sinah a ei hen a din?" an ti.
- ¹⁷Chun, Jisu nih chu chu a theih le, an sinah chun, "Mi chak tla nih daktawr an herh lo le, miþia lo tla nih an herh dauh asi; mi rep tak tla lam ding hen hawng kal ka si lo le, misual tla lam ding dauh hen hawng kal ka si," a ti.
- ¹⁸Chun, Johan ðhiruai tla leh Farisai tla nih chun buh an ngei le; chun, mi an hawng kal le, Jisu sinah, "Zeirangah me Johan ðhiruai tla leh Farisai ðhiruai tla nih buh an ngei le, na ðhiruai tla nih an ngei tâwn bâk lo?" an ti.
- ¹⁹Jisu nih an sinah, "Mo ruaitu tla sinah a pasal ding mi a um kar vial mo ruaitu tla nih chun buh an ngei kho mazei? A pasal ding mi chu an sinah a um kar zawng an ngei kho lai loh.
- ²⁰Sikhawmsele, a pasal ding mi chu an sinah mi kalpi ving ni tla a tlung lai le, chu ni ah lam chun an ngei lai."

²¹"Âukhawm puan li, puan tiṭum suk lo mi tliar hen an belh dah lo; belh nik sele a belhnâk nih chun a thlêk lehlam lai; a thar nih chun a li mi chu a thlêk lai le, a tlêk khun lai.

²²Chun, âukhawm nih uain thar uain dūr li tla ah an râwn dah lo; râwn nik sele, uain nih chun savun dūr tla chu a tâwn phet lai le, uain leh savun dūr tla chu an vei vevê lai. Uain thar chu savun uain dūr thar tla ah an râwn dauh tâwn asi," a ti.

²³Chun, tihin asi le, Jisu chu Dinhni ah chun fâng mun tla a pal le, chun a thiruai tla nih chun an kal pah hen favûi tla chu an khiak rawh.

²⁴Chun, Farisai tla nih chun a sinah, "Zauhnik, zeirangah Dinhni ah a thiangolo mi chu an ti?" an ti.

²⁵Chun, anih nih chun an sinah, "David leh a hâwi tla an samphâng le, an sungvâng liauah a thilti kha nan rêl lo mazei?"

²⁶Kha hâwi hen Abiathar Bâwlpu Lalchem asi liauah Pathian in ah a lût le, bâwlpu tla cho lo nih chun ei a thiang lo mi sang an siah mi chu a ei le, a hâwi tla sinah a pêk bâk mi thu kha?" a ti.

²⁷Chun, amah ber nih chun an sinah, "Dinhni hi minung rangah siam asi le, minung hi Dinhni rangah siam asi lo.

²⁸Chuvachun, Minung Fapa hi Dinhni lak khawmah Lal asi," a ti.

Mark 3

¹Chun, Jisu chu pumhnâk in ah chun a lût nawlh le, chunah chun minung pakhat kutkhêng a um.

²Chun, amah an phiar khonâk ding hen Dinhni ah a damh awt leh awt lo an thlingthlâk.

³Chun, anih nih kutkhêng sinah chun, "A lâi ah dîr rawh," a ti.

⁴Chun, an sinah chun, "Dinhni ah hin ṭhattir ma a thiang siattir? Ruangsuah ma a thiang thah?" ti hen, a deih na. Sikhawmsele, an dâisip.

- ⁵Chun, an thinslung chang zia chu thungâi pawî ti piak hen, thinthawk bû hen anmah tla a zauh na nûnah chu minung sinah chun, "Na kut zangh rawh," a ti. Chun, a van zangh le, a kut chu a dam rawh.
- ⁶Chun, Farisai tla chu an suak le, amah an thah kho zia ding ruat hen Herod murui tla hen chun anna thluk sawm.
- ⁷Chun, Jisu chu a thiruai tla hen rilî leiah chun anna thing ving. Chun, Galili ram thawk hen mi zapi cherkhet nih an zûl rawh.
- ⁸Chun, a thilti rokual zia chu an theih rawh chun Judai ram thawk hen, Jerusalem thawk hen, Idumai ram thawk hen, Jordan râl thawk hen, Tura leh Sidon khua kiangkam thawk hen, mi zapi cherkhet a sinah an hawng kal.
- ⁹Chun, mi zapi ruangah chun a rangah lawnglêng ruat piak ding hen a thiruai tla a simh na, "Chu lo chun an hawng ka eng dûlmâl lebang lai," a ti.
- ¹⁰Mi cherkhet a damh na le; chun nganfâk nei mi vial nih amah an tawngkhonâk ding hen an fûk thur.
- ¹¹Khuri nâwmtâm tla khawm nih amah chu an muh kip hen a mâika ah bawkbukhup hen, "Nang, Pathian Fapa chu na si," ti hen, an âu tâwn.
- ¹²Chun, anih nih chun a thâwngthâng chu phuang lo ding hen an sinah thu a kilh vima na.
- ¹³Chun, Jisu chu tâng ah chun a kâi le, amah nih a duh mi vial chu a kawh na; chun annih chu a sinah an va kal.
- ¹⁴Chun, a sinah an um khonâk ding hen leh thusim ding leh
- ¹⁵khuri tla narnâk thu nei ding hen a fial na khonâk ding hen leinih a ruat.
- ¹⁶Chu tla chu Simon (Jisu nih Peter ti hen a auh mi),
- ¹⁷Zebedai fapa Jem leh a unau Johan, (chu tla chu Boanerge a sak, chu chu Khuarît fa tla tinâk asi);
- ¹⁸Andri, Philip, Bartholomai, Mathai, Thom, Alphai fapa Jem, Thadai, Kana mi Simon leh

- ¹⁹a tlehtirtu Juda Iskariot tla an si.
- ²⁰Chun, Jisu chu in ah a lût rawh. Chun, mi zapi chu an hawng a pûm nawlh le, chuvachun sang ngangâi men an ei kholo rawh.
- ²¹Chun, a dâwnsung tla nih chun chu an theih rawh chun, "A â ma chu," ti hen, amah tleih ding hen anna thawh.
- ²²Chun, Dân sîntirtu tla Jerusalem thawk hen hawng tum mi tla nih chun, "Belzebul nei asi hi," an ti; "Khuri lal ruangah asi lo mazei khuri tla a nar tâwn mi," an ti.
- ²³Chun, Jisu nih Dân sîntirtu tla chu a kawh na le, tahthimh thu hen an sinah, "Setan nih Setan ber zeitin a nar kho lai?"
- ²⁴Ram khawm mah leh mah a do chun, chu ram chu a dîr kho lai lo.
- ²⁵Dâwnsung khat khawm mah anna do chun, chu dâwnsung chu a dîr kho lai lo.
- ²⁶Churungah Setan ram chu thenkhuai hen a um chun a dîr kho lai lo le, a vei thlo lai.
- ²⁷Âukhawm nih mi chak in ah lût hen a sum chu a lâk piak kho tâwn lo, mi chak chu a phuar masa tâ lo chun. Chu nûnah lam chun a in chu a rawk kho lai.
- ²⁸"Hi hi theih u! Minung fa tla hi an sualnâk zawzawng ah leh Pathian an simsiatnâk ze lei zawngah khawm an simsiatnâk tla chu ngaihdam an si lai.
- ²⁹Sikhawmsele, âuzawng Thlarau Thenhlimh ngâi simsiattu lam chu zeitik khawmah ngaihdamnâk a tawng lai lo, zungzâl sualnâk ah chun mawh hen a um lehlam lai," a ti.
- ³⁰"Khuri nâwmtâm a nei asi," an ti ruang khan chu chu a sim asi.
- ³¹Chun, Jisu nu leh a unau tla an hawng le, lêng ah an dîr le, amah va kawh ding hen mi an fial.
- ³²Chun, a kiangah chun mi zapi anna tohâwng le, chun a sinah chun, "Zauhnik, lênglei ah na nu leh na unau tla nih an hâwl," an ti.

³³Chun, anih nih chun an sinah, "Ka nu leh ka unau tla chu âu me?" ti hen, a sâng.

³⁴Chun, a kiangah to tla chu a zauh na le, "Zauhnik u, ka nu leh ka unau tla hi!

³⁵Âuzawng Pathian duhzia titu vial chu ka unau, ka far, ka nu tla an si," a ti.

Mark 4

¹Chun, Jisu nih Galili rilî kapah chun, a sîntir nawlh na rawh. Chun, mi zapi tla cherkhet a sinah an hawng a pûm le, chun rilî ah chun lawng ah â chuan le, a to le; zapi tla zawzawng chu rilî kap tlâng ah chun an um.

²Chun, tahthimh thu hen thu cherkhet a sîntir na; a sîntirnâk ah chun an sinah:

³"Ngâi u! Fachî vawrhtu fachî vawrh hen a kal le;

⁴chun, hi hâwi hi asi le, a vawrh liauah a zeimaw mi lam vâu ah a tlâ le, vâ tla nih an ei hep.

⁵Chun, a zeimaw mi lungpher tlûn tual pannâk ah a tlâ le, tual a sah lo ruangah a keuh sawm.

⁶Sikhawmsele, nî a hawng sâng dauh rawh chun uai tep hen a emh, ram a nei lo ruangah a rawp ko rawh.

⁷Chun, a zeimaw mi bualingnei nâwngah a tlâ le, bua chu a hawng sâng le, a dawrh hep le, rah rerêng a rah lo rawh.

⁸Chun, a zeimaw mi tual tha lakah a tlâ le, a kho le, a thang le, a rah rawh; sâwmthum, sâwmruk, zâ lebang hen a pung," a ti.

⁹Chun, amah nih, "Âuzawng theihnâk ding hen nâ nei nih chun theih seh," a ti.

¹⁰Chun, mi kingnâk ah Jisu chu a um liauah leinih tla leh amah zûltu tla nih tahthimh thu tla chu an deih.

¹¹Chun, anih nih chun an sinah, "Pathian Ram thuthup chu nannih theih lam chu siang asi le, lêng ah mi tla rangah lam chun zeizawng taht̄himh thu hen ti asi.

¹²Chuvachun, 'Muh lam chu an muh kho narêng hen, theih lam chu an theih kho lonâk ding hen leh, Nâ hen an theih narêng hen a ngaihtawnhnâk lam chu an theih kho lonâk ding hen. Chu lo chun anna her nawlh lai le, ngaihdam an hawng si sual lebang lai," a ti.

¹³Chun, Jisu nih an sinah, "Hi taht̄himh thu hi nan theih kho lo ma? Chu hâwi asi chun, zeitin taht̄himh thu dang zawzawng tla chu nan theih zia lai?

¹⁴Fachî vawrhtu nih chun thu chu a vawrh asi.

¹⁵Chun, lam vâu ah a thu vawrhnhâk tla chu hi tla hi an si: Thu an theih kê hen Setan nih chun an thinlung ah thu vawrh mi chu a lâk piak sawm tâwn.

¹⁶Chun, chu hâwi ber hen lungpher tlûnah vawrh mi chu hi tla hi an si: Thu an theih kê hen lâwm tak hen tleih sawmtu tla hi;

¹⁷sikhawmsele, anmah lakah chun ram an nei lo, sâwtlotê cho an um le; chu nûnah chun thu ruangah hamhnâk mawh nehsawhnâk mawh a hawng um ka hen an tlû sawm tâwn.

¹⁸Chun, midang tla chu bualingnei lakah vawrh mi chu an si: Chubang tla nih chun thu chu an theih rawh le,

¹⁹sikhawmsele laikulh lungkhamnâk tla, neihnâk tla, bumnâk tla, thil dang duhnâk tla chu a hawng lût le, thu chu a dawrh le, rah lo hen a hawng um tâwn.

²⁰Chun, tual t̄ha lakah vawrh mi chu hi bang hi an si: Thu chu theih hen, tleih hen, a leh sâwmthum, sâwmruk, zâ lebang hen rah tla hi an si," a ti.

²¹Chun, Jisu ber nih an sinah, "Khâwnvâr chu a siahnâk ah siah lo hen, tâwng tangah mawh ihkhun tangah mawh, siah ding hen an lâk tâwn mazei?

²²Puang lo ding hen pheh zeikhawm a um lo, lang lo ding hen thuh zeikhawm a um lo.

- ²³Âuzawng nih theihnâk ding hen nâ nei nih chun theih seh," a ti.
- ²⁴Chun, amah nih an sinah, "Nan ngâi mi chu zeï me asi a thiamthih u; nan tahnâk lîlâ hen an tah piak na lai le, an pêk tam khun na lai.
- ²⁵Âuzawng a nei mi chu an pêk sap lai le, âuzawng a nei lo mi chu a neihlem khawm an lâk piak lai," a ti.
- ²⁶Chun, Jisu ber nih a sim vima le, "Pathian Ram chu hi hâwi hi asi: Mi nih tual ah hin chî vawrh sele,
- ²⁷zân ah it thlit hen sîn ah thawk tâwn sele, chî chu zeitin mi zât asi ti theihlo hen a hawng keuh hen a hawng ʒhang rawh.
- ²⁸Tual nih amah rah a hawng suahtir tâwn. A tîr chem ah a kûng, chu nûnah chun a vûi; chun chu nûnah a vûi lakah chun fângmal bit.
- ²⁹Sikhawmsele, rah chu a hawng min tikah fâng ât a chû ruangah favah chu a thuak sawm tâwn, a ti.
- ³⁰Chun, Jisu nih, "Pathian Ram chu zeï hen me kan tahʒhimh lai? Asi lo leh, zeï tahʒhimh thu hen me kan tahʒhimh lai?
- ³¹Anʒam chî mal khat tual ah an vawrh le: tual ah chî zawzawng ngâk hen mêchem khawmsele,
- ³²a vawrh nûnah lam chun a kho le, thlâi zawzawng ngâk hen a hawng lian dauh rawh. ʒeng lian tatak a nei le, chuvachun tlûn zuang vâ tla chu a dâidul ah an bû an tuah le, an um," a ti.
- ³³Chun, chu hâwi tahʒhimh thu tamtak hen, an theih kho rirî hen thu chu an sinah a sim tâwn.
- ³⁴Sikhawmsele, tahʒhimh thu lo hen an sinah thu a sim lo. Amah ʒhiruai tla sinah lam chun mi kingnâk ah zeizawng a simhfiang na tâwn.
- ³⁵Chun, chu ni lîlâ ah chun, zânleibâi ah, Jisu nih chun an sinah, "Khatlei râl ah khin kan kal lai," a ti.
- ³⁶Chun, mi zapi tla chu kaltâk hen amah chu a um chia tê hen, lawng ah chun an kalpi sawm rawh. Lawng dang tla khawm a sinah an um.

³⁷Chun, thli chawp tak a hawng râng le, tî tlingtlawk tla chu lawng ah chun a lût chukmak le, chuvachun lawng chu a khat awt ko rawh.

³⁸Chun, anih chu sanhtling tlinh a it hen, lawng taw leiah chun a um. Chun, an thawh le, a sinah, "Sîntirtu, kan vei ding mi hi pawî na ti lo ma?" an ti.

³⁹Chun, anih chu a hawng a ðang le, thli chu a fâ le, rilê sinah khawm chun, "Dâisip le, um ziar rawh!" a ti. Chun, thli chu a bâng le, a reh dup ko.

⁴⁰Chun, anih nih chun an sinah, "Zeirang chu tluk rak hen nan lâu le? Lungnâk rerêng nan nei lo rih mu?" a ti.

⁴¹Chun, dîntuai hen an ðih lo le, "Hi minung hi âu me si le, thli leh rilê tiang khawm nih a thu an ngâi râu!" an ti.

Mark 5

¹Chun, rilê râl Gerasin mi tla ram chu an hawng tlung.

²Chun, Jisu chu lawng ah mi a suak nûnah chun minung pakhat, khuri nâwmtâm nei, thlân thawk hen a hawng suak mi nih a tawng sawm le;

³chu minung nih chun thlân tla lakah chun umnâk a nei tâwn le, âukhawm nih thîr chikchîn hen khawm an phuar kho lo rawh le;

⁴rêng leh thîr chikchîn tla khawm hen an phuar kumza rawh le; sikhawmsele, thîr chikchîn tla chu a sah le, rêng tla khawm chu a khiak dip tâwn; âukhawm nih an ti kho lo.

⁵A sîn a zân hen thlân tla ah leh tâng tla ah chun a âu a âu tâwn le, lung hen khawm â ât kumza tâwn.

⁶Chun, lât tak thawk hen Jisu chu a muh kê hen a tek le, a mâimûk.

⁷Chun, aw-hâu fakpi a âu hen, "Jisu, Pathian Chungnungchem Fapa, kei leh nang zeî me kanna tlâinâk um? Hawng ka rêp lo ding hen Pathian min hen ka nan ngiar chiam asi," a ti.

⁸(Jisu nih chun a sinah, "Nang, khuri nâwmtâm, minung sungah mi hawng suak rawh," a ti rawh dangâiah.)



- ⁹Chun, anih nih chun, "Na min zeï mesi?" ti hen, a deih. Chun, anih nih chun, a sinah, "Ka min chu khuri zapi asi, cherkhet kan si," a ti.
- ¹⁰Chun, chu ram thawk hen chun anmah tla nar lo ding hen Jisu sinah an ngiar chiam.
- ¹¹Chun, chu tlâng pangdâr ah chun vawk rual tamtak an tlawng.
- ¹²Chun, khuri nâwmtâm tla nih chun, "Vawk tla sinah hawng kan fial, an sungah kan lût khonâk ding hen," ti hen, a sinah an ngiar chiam.
- ¹³Chun, anih nih chun thu a pêk. Chun, khuri nâwmtâm tla chu an suak le, vawk paw sung tla ah chun an lût le, chun vawk rual chu (sâng nih tluk ding an si) kham ah anna khâwk le; rilî lakah an lût ver; chun rilî ah chun tî thalh hen an thi rawh.
- ¹⁴Chun, a vulhtu tla chu an tek le, khua ah leh lo tla ah chun an sim. Mi zapi tla chu zeï thil me a hawng si rawh ti zauh ding hen an hawng kal.
- ¹⁵Chun, Jisu sinah an hawng tleng le, khuri vuanh, khuri zapi nih a luah mi kha, puan aih hen, thinslung fîm put hen, to mi an hawng muh le; chun an tîh rawh.
- ¹⁶Chun, a theihtu tla nih chun khuri tleih tlûnah thil tung zia leh vawk thâwngthâng tla chu, chubang tla chu an simh na.
- ¹⁷Chun, chu tla nih chun an ram ah mi suak ding hen an ngiar chiam rawh.
- ¹⁸Chun, lawng ah â chuan awt liau takah khuri vuanh rawh mi nih khan Jisu sinah um ding a ngiar.
- ¹⁹Sikhawmsele, Jisu nih a siang lo le, a sinah, "Na in ah na hâwi tla sinah tung le, Lalpa nih na rangah thil a nan ti piak mi a rokual zia leh a nan zângfah zia hi va sim rawh," a ti rawh.
- ²⁰Chun, a kal le, Dekapoli ah chun Jisu nih a rangah thil a ti piak mi rokual zia chu a phuang rawh. Chun, mi zawzawng nih chê an ti.
- ²¹Chun, Jisu chu lawng ah khatlei râh ah a kâl nawlh rawh chun mi zapi cherkhet a sinah an hawng a pûm. Chun, anih chu rilî kapah a um.

- ²²Chun, pumhnâk in hotu tla lakah pakhat, a min Jaira chu a hawng kal le; Jisu a muh ka hen a kebul ah a bawkbukhup le,
- ²³"Ka fanu ngâksiatê a thi awt ngâi le, â panh hen a hawng dam khonâk ding hen hawng kal le, a tlûnah na kut thâng ding hen ka nan ngiar," ti hen, a ngiar chiam.
- ²⁴Chun, Jisu chu a sinah a va kal. Chun, mi zapi cherkhet nih an zûl le, an eng chukmak.
- ²⁵Chun, nunau pakhat kum leinih thî suak hen a hat kho lo le,
- ²⁶daktawr tamtak lakah cherkhet a tuar rawh le, a neih zawzawng khawm a veih hep rawh le, that lei ngâk hen a zual dauh lehlam.
- ²⁷Chu nih chun Jisu thâwnghâng thu tla a theih le, a dung leiah mi zapi lakah chun a hawng kal le, a puan a tawnggh.
- ²⁸"A puan cho khawm tawnggh sele damh hen ka um ko lai," ti a ruat asi.
- ²⁹Chun, zeikarlo ah a thî suak chu a hawng reh sawm le, a nganfâk chu damh asi rawh ti a taksa ah a theih rawh.
- ³⁰Chun, Jisu nih chun a sungah mi thiltikhonâk suak tâwn mi chu a suak ti a theih le, mi zapi lakah chun â hawi le, "Âu me ka puan tla tawnghtu kha?" a ti.
- ³¹Chun, a thiruai tla nih chun a sinah, "Mi zapi nih an eng chukmak mi hi na muh ko mi, 'Âu nih an ka tawnggh?' zeitin zia hen ti me le?"
- ³²Chun, anih nih chun chu thil titu chu muh ding hen â hawi.
- ³³Chuvachun, nunau nih chun a tlûnah thil a ti piak mi chu theih hen, lâu leh thir bû hen a hawng kal le, a mâika ah a bawkbukhup le, a sinah thu dik tak hen a simh ver rawh.
- ³⁴Chun, anih nih chun a sinah, "Ka fanu, na lungnâk hi na dampi asi, lungngam tak hen kal le, na nganfâknâk chu hawng dam pawt seh," a ti.
- ³⁵A hawlh liau chirah, pumhnâk in hotu in thawk hen mi an hawng kal le, "Na fanu a thi rawh; zeirangah Sîntirtu hi na hamhtir nget awt?" an ti.

³⁶Jisu lam nih chun an thusim chu ngaihlo lêm thlâk hen, pumhnâk in hotu sinah chun, "Lâu lah, lung ko," a ti.

³⁷Chun, Peter, Jem leh a unau Johan tla cho lo chu âukhawm amah zûl bâk ding a siang lo rawh.

³⁸Chun, pumhnâk in hotu in chu a va tlung le, Jisu nih an nawk chur mi leh an ãap chur mi leh an râk chur mi chu a muh.

³⁹Chun, a va lût rawh chun an sinah, "Zeirangah nâ sêt huam hen nan ãap? Ngâksia chu a thi lo, a it asi," a ti.

⁴⁰Chun, annih nih chun an nih sanh ko. Anih lam nih chun an ektê hen a nar phin na le, ngâksia nu leh pa leh a ãhiruai pathum tla chu a ruai na le, ngâksia umnâk ah chun a va lût.

⁴¹Chun, ngâksia kut chu a tleih le, a sinah chun, "Talitha, koum," a ti, chu chu "Kuih nu, thawk rawh ka nan ti!" tinâk asi.

⁴²Chun, nunau ngâksia chu a hawng thawk le, a kal sawm ko; amah chu kum leinih mi asi rawh. Chun, annih nih chun chê an ti rarâu lo.

⁴³Chun, anih nih an sinah, "Hi hi âukhawm nih theih lah seh,' a ti thlir; chun ei ding pêk ding hen thu a pêk.

Mark 6

¹Chun, chu thawk hen chun Jisu chu a suak le, a umnâk khua lei chu a tlung le, a ãhiruai tla nih chun an zûl vima.

²Chun, Dinhni a hawng si le, pumhnâk in ah a sîntir na le, chun, mi cherkhet a thu theih tu tla nih chun, "Hi minung nih hi bang thu hi kha ze mi me a theih le? Hi minung sinah finghnâk pêk asi mi hi ze finghnâk me si le? A kut hen hi tluk rak thilchê a ti mi hi ze zia mesi?"

³Hi minung hi Mari fapa Jem, Josef, Juda, Simon leh a unaupa thing hen thil siamtu kha asi lo mazei? A farnu le khawm hinah kan sinah um an si lo mazei?" an ti le, thungâi chê an ti. Chun, a tlûnah an lungsilo rawh.



⁴Chun, Jisu nih an sinah, "Khuavâng chu amah khua lei tla ah, amah rualsia tla lakah, amah in tla ah cho lo chun chawnglawmh lo hen a um dah lo," a ti.

⁵Chun, mi damlo tâwmtê tlûnah kut thâng hen a damh mi cho lo chu chunah chun thilchê rêng a ti kho lo.

⁶An lung lo ruangah thungâi chê a ti. Chun, sîntir pah vima hen khua tla chu a ɽawl.

⁷Chun, leinih tla chu a kawh na le, panih vima hen a fial na rawh. Khuri nâwmtâm tla tlûnah thuneihnâk a pêk na.

⁸Chun, an khualtlâwngnâk ding rangah ɽhianɽhunh cho lo chu zeikhawm, sang khawm, zâl khawm, tâisâwm ah tangka khawm put lo ding hen a ti thlir.

⁹Pheikawk lam chu ruk ding a ti. "Kawrdawh panih a ruk lah u," a ti.

¹⁰Chun, amah nih an sinah, "Kha zeï khawmah nan tlungnâk in ah chun, chunah mi nan suak lân lo chu tlung kumza u.

¹¹Chun, zeï khua khawmah an lawmh na lo hen, nan thu an ngâi lonâk zawngah chu thawk hen nan suak tikah chun anmah theihtir na ding hen nan kezaphah tangah valeidip kawp mi chu khâwng u," a ti.

¹²Chun, an suak le, rimnâk thu an sim le;

¹³khuri tamtak khawm an nar le, damlo tamtak khawm sariak an thuh le, an damh.

¹⁴Chun, lalchem Herod nih chun a theih le, Jisu min chu a thang rawh dangâiah. Mi le tla nih chun, "Baptistu Johan kha mithi lakah mi a thawknawlh rawh le, chubang thiltikhonâk tla nih chun amah lakah a ɽuan asi chu!" an ti.

¹⁵Midang lam nih chun, "Elija ma chu," an ti; midang nih, "Khuavâng ma chu, tuan ah mi khuavâng tla lakah pakhat hâwi kha," an ti.

¹⁶Herod lam nih chun a theih rawh chun, "Johan, a lû ka tan mi tak kha a hawng thawknawlh rawh ma chu!" a ti.



¹⁷Amah Herod nih chun a unau Philip nupi Herodi ruangah mi a fial le, Johan chu a tlehtir le, rêngin ah phuar bû hen a khumh rawh dangâiah. Herodi chu nupi ah a umpi rawh le;

¹⁸Johan nih chun Herod sinah, "Na unau nupi na umpi mi hi a thiang lo asi," a ti rawh asi.

¹⁹Churugah Herodi nih chun amah chu a râl thlo le, thah a duh le, sikhawmsele a ti kho lo.

²⁰Herod nih Johan chu mi rep leh thenhlimh tak asi ti a theih ruangah amah chu a ãih le, a hum thlir asi, a thu a ngâi chun a lawksawng ngâi tâwn.

²¹Chun, Herod suakcham ni ah chun a mi rokual tla, kawrsen hotu lian tla, Galili ram ah mi lian tla rangah zân ah puai a hawng um le, Herodi rang chun tik remchâng a hawng um rawh.

²²Herodi fanu chu a hawng lût le, a lâm le, Herod leh a buh dûmpitu tla chu a lawmhtir na. Chun, lalchem nih chun nunau ngâksia sinah, "Na duh mi zawng hawng ka deih, ka nan pêk lai," a ti.

²³"Zei tal na ka deih mi zawng chu, ka ram khingkhuai khawm ka nan pêk lai," ti hen, a sinah siat a sirh.

²⁴Chun, anih chu a suak le, a nu sinah chun, "Zei me ka deih lai?" a va ti. Anih nih, "Baptistu Johan lû," a ti.

²⁵Chun, anih chu khulrang tak hen lalchem sinah chun a va lût sawm le, "Khêng hen Baptistu Johan lû na ka pêk sawm ka duh asi," ti hen, a deih.

²⁶Chun, lalchem chu thungâi a lawksawng. Sikhawmsele, a siatsirh tla leh a buh dûmpitu tla ruangah chun a êl duh lo.

²⁷Chun, lalchem nih chun a vêngtu kawrsen pakhat a fial sawm le, a lû hawng put ding thu a pêk. Chun, anih chu rêngin ah a va lût le, a lû a va tan le,

²⁸a lû chu khêng hen a hawng put le, nunau ngâksia sinah chun a pêk rawh. Chun, nunau ngâksia nih chun a nu sinah a pêk.

- ²⁹Chun, a ðhiruai tla nih chun an theih kê hen a ruak chu an va lâwm le, thlân ah chun an vûi rawh.
- ³⁰Chun, mifial tla chu Jisu sinah an hawng a pûm le, zeizawng an thilti leh an sîntir mi vial an simh.
- ³¹Chun, anih nih chun an sinah, "Nanmah tla lâwng hen ramkaro mun ah a dang hen hawng ule, a dîn rih u," a ti. Mi tamtak anna lanh zulmal le, buh ngâi men an ei manh lo.
- ³²Chun, ramkaro mun ah anmah lâwng hen a dang hen an va kal.
- ³³Chun, mi nih an kal liau chu an muh na le, mi tamtak nih anmah tla chu an theih na le, anna pûm le, an lehkhanh rawh.
- ³⁴Chun, Jisu chu vakap ah a suak le, mi zapi cherkhet a muh na le, vêngtu neilo dawrâ tla hâwi an si ruangah thungâi a zângfah na le, thu tamtak a sîntir na rawh.
- ³⁵Chun, zânleibâi khet ah, a ðhiruai tla chu a sinah an hawng kal le, "Hi hi mi kingnâk mun asi le, a zânlei ving rawh dangâiah;
- ³⁶annih tla hi kan kiangkam lo ah leh khua tla ah kal hen, an ei ding zeimaw tal an châwk khonâk ding hen kaltir na me," an ti.
- ³⁷Anih lam nih chun an sinah, "Nanmah nih ei ding pêk na u," ti hen, a sâng. Chun, annih nih chun a sinah, "Sang denari zanih man va châwk hen ei ding kan pêk na awt masi?" an ti.
- ³⁸Chun, anih nih chun an sinah, "Sangtlêp zeizat me nan nei? Va zauhnik u," a ti. Chun, an neih zat an theih ka hen, "Sangtlêp panga, ngâ panih hen," an ti.
- ³⁹Chun, anih nih chun an ektê hen ramhthep tlûnah chun a murui vima hen totir ding hen an sinah thu a pêk.
- ⁴⁰Chun, a tlar hen, zâ tla, sâwmnga tla vima hen an to.
- ⁴¹Chun, anih nih chun sangtlêp panga leh ngâ panih chu a lâk le, vân lei hawi hen mal a sâwm le, sangtlêp tla chu a phel le, an mâika ah hunh na ding hen

a ðhruai tla sinah chun a pêk le, ngâ panih khawm chu mi zawzawng lakah a ðhen.

⁴²Chun, an ektê hen an ei le, an khim chiau.

⁴³Chun, sang neknâwi leh ngâ neknâwi khobung leinîh an rût le, a khat.

⁴⁴Sangtlêp eitu tla chu patling lir sângnga an si.

⁴⁵Chun, Jisu nih mi zapi chu a ðiaktir na karah varâl leiah Betsaida ah va kal masa ding hen a ðhruai tla chu lawng ah a chuantir sawm na.

⁴⁶Chun, annih chu a ðiaktir na nûnah chun thlacham ding hen tlâng ah a kal rawh.

⁴⁷Chun, zânleibâi ah lawng chu rilî lâi takah chun a um le, anih chu amah lâwng hen tlâng ah chun a um.

⁴⁸Chun, an lawng vei lakah chun an lawksawng hen a muh le, thli nih amahlo leikângah a nam ruangah, khuafîmchat lei zo ah rilî tlûnah kê hen kal hen anmah lei a hawng fûk le, anmah tla lanh a tum.

⁴⁹Sikhawmsele, annih nih chun anih chu rilî tlûnah kê hen a kal mi an muh rawh chun mithlâ bei an ti le, an âu chiam le,

⁵⁰an ektê hen amah an muh le, an thla a kâm. Sikhawmsele, anih nih chun anmah chu a sawnh sawm na le, an sinah, "Lungngam tak hen um u; keimah ka si, lâu lah u," a ti.

⁵¹Chun, lawng ah chun an sinah â chuan le, thli chu a bâng ko rawh. Chun, an thinlung hen thungâi chê an ti.

⁵²Sangtlêp thu chu a ngaihtawnh dân an theihthiam lo dangâiah, an thinlung a chang ruangah.

⁵³Chun, varâl leiah an kâi rawh chun, Genesaret ram tlâng an tlung le, vakap ah chun lawng chu an rêng.

⁵⁴Chun, lawng ah mi an suak nûnah chun mi tla nih anih chu an theih sawm le;

⁵⁵Chu ram kiangkam zawzawng ah an tek chur le, a um ti an theihnâk zawngah damlo tla an tangphah lakah it bû hen an hawng zawnh sup.

⁵⁶Chun, kkuatê leh khua lian tla ah, lo tla ah, kha zeizawng ah a lûtnâk kipah damlo tla chu sumtuah mun tla ah an zâutir na, a puansâr tla tawnggh kho an deih chiam le, chun amah tawnghtu zawng chu an dam vima.

Mark 7

¹Churawhchun, Farisai tla leh Dân sîntirtu tla lakah mi âu tla mawh Jerusalem thawk hen hawng kal tla chu a sinah an hawng a pûm.

²Chubang tla nih chun a ðhiruai a zeimaw mi tla kut nâwm hen sang an ei mi an muh. "Nâwm" ti hi tawl lo tinâk asi.

³(Farisai tla leh Juda tla zawzawng nih chun upa thurovuih chu an tleih thlir ruangah an kut ngenh tak hen an tawl lo chun an ei dah lo.

⁴Chun, sumtuah mun thawk hen an tlung khawmah tak anna khawlh lo chun an ei dah lo. Chun, thu dang tamtak an tleih thlir ding hen an lâk singsuan mi chu a um, hâi tla, bêl tla, dârbêl tla tawl tla hi.)

⁵Chuvachun, Farisai tla leh Dân sîntirtu tla nih chun, "Zeirangah me na ðhiruai tla nih upa thurovuih ziatê a um lo hen, kut nâwm hen sang an ei tâwn?" ti hen an deih.

⁶Anih nih chun an sinah, "Isai nih hin nannih mi perpê tla thu hi a simkan mi a dik tak ko a! 'Hi minung tla nih an kê hen an ka chawnglawmh le, an thinlung lam nih chun an ka lâk.

⁷Zeikhawm si sele, an sîntirnâk ah minung thupêk tla an sîntir ruangah an ka sawnh tâwn hi a thawt asi,' ti hen a rîn hâwi khan.

⁸"Pathian thupêk tla chu thlahthlamh hen minung thurovuih chu nan tleih thlir asi," a ti.

⁹Chun, amah nih an sinah, "Nanmah thurovuih chu nan tleih khonâk ding hen Pathian thupêk tla nan duh lo hi a ziazâng thungâi nan theih a!

¹⁰Mosi nih, 'Na nu leh na pa chawnglawmh rawh,' ti leh, 'Âuzawng a nu mawh a pa simsiattu zawng chu thi ding asi,' a ti khateh.

¹¹Nannih lam nih chun hi hâwi hen nan ti tâwn, 'Mi nih a nu mawh a pa mawh sinah, "Na ka mang ding mi hi Korban asi rawh," a ti chun (chu chu 'Pathian sinah pêk,' tinâk asi),

¹²a nu rangah mawh a pa rangah mawh ti piak zeikhawm nan siang tâwn lo rawh.

¹³Mi sinah nan thurovuih singsuan nih hin Pathian thu hi a veih tâwn asi; chu hâwi thil chu tamtak nan ti tâwn," a ti.

¹⁴Chun, mi zapi tla chu a kawh nawlh le, an sinah, "Nan ektê hen ka thu hi ngâi chiau ule, theihthiam u:

¹⁵Minung lênglei thawk hen a paw sungah lût mi nih amah nawmh kho zeikhawm a um lo; minung paw sung thawk hen hawng suak tla chu minung nawmhtu asi dauh.

¹⁶Theihnâk ding hen nâ nei nih chun theih seh," a ti.

¹⁷Chun, mi zapi tla in ah a lût tâk na nûnah a thiruai tla nih chun tahthimh thu amah an deih fiang rawh.

¹⁸Chun, anih nih chun an sinah, "Nannih khawm chu tluk rak hen theihnâk neilo nan si mu? Zeizawng lênglei thawk hen minung paw sungah lût mi zawng,

¹⁹a thinlung sungah lût lo hen, a paw sungah lût hen vâu kalnâk ah a suak ruangah amah chu a nawmh kho lo ti nan theih lo mazei?" a ti. (chu chu ei ding mi zawng ei a thiang tinâk asi.)

²⁰Chun, amah nih, "Minung paw sung thawk hen suak nih chun, chu tak nih chun minung a nawmh tâwn asi.

²¹Paw sungah mi, minung thinlung tla thawk hen ruatdawnnâk sual tla a hawng suak tâwn ruangah; pung-leh-lêngnâk tla, fîrnâk tla, mi thahnâk tla,

- ²²ṭangdang pawmtâknâk tla, ngarhnâk tla, sualnâk tla, bumnâk tla, simsiatnâk tla, khâwngnâk tla leh âtnâk tla hi.
- ²³Chubang thilsual zawzawng tla chu paw sung thawk hen a hawng suak le, minung chu a nawmhtir tâwn," a ti.
- ²⁴Chun, Jisu chu a thawk le, chu thawk hen chun Tura leh Sidon kiangkam ah a kal. Chun, in ah a lût le, âu theih khawm a duh lo. Sikhawmsele â thup kho lo.
- ²⁵Chuvachun, nunau pakhat, fanu ngâksiatê khuri nâwmtâm vuanh nei mi nih chun a thâwnghâng a theih le, a kebul ah a va bawkbukhup sawm.
- ²⁶Nunau chu Greek mi asi le, phun leikângah chun Siria ah Phoiniki ram ah suak mi asi. Anih nih chun a fanu paw sungah mi khuri nar ding hen a ngiar.
- ²⁷Chun, anih nih chun a sinah, "Fa tla chu khawp masa na seh; fa tla sang lâk piak hen ui tla sinah lawnh chu â dawh lo," a ti.
- ²⁸Anih nih chun a sinah, "Lalpa si chu si ngâk, sikhawmsele dawhkân tangah ui tla khawm nih fa le tla sang neknâwi chu a ei tâwn asi," ti hen a sâng.
- ²⁹Chun anih nih chun a sinah, "Na thusim ruangah chun kal rawh le, khuri chu na fanu paw sungah mi a suak rawh," a ti.
- ³⁰Chun, a in ah chun a va tlung le, a fa chu khuri nih a suaktâk rawh hen ihkhun ah it mi a muh rawh.
- ³¹Chun, Tura ram thawk hen Jisu chu a suak nawlh le, Sidon pal hen Dekapoli ram lan vima hen Galili rilî chu a tlung rawh.
- ³²Chun, mi pakhat nasê, hawlh khawm hawlh fiang kho lo mi a sinah an hawng ruai le, a tûnah a kut thâng ding hen an ngiar.
- ³³Chun, anih nih chun zapi nâwngah mi amah cho a dang hen a ruai le, a kutmar hen a nakua tla a tham le, chun chil a sâk le, a lei a tham piak le;
- ³⁴chun vâh lei zauh hen a thaw a suah le, a sinah, "Ephphatha," a ti. (chu chu "A awng rawh," tinâk asi.)

³⁵Chun, a nâ tla chu a âwng le, a lei phuarnâk tla khawm chu â sût le, fiang tak hen a hawlh kho rawh.

³⁶Chun, anih nih chun a sinah âukhawm simh lo ding hen a ti thlir. Sikhawmsele, a khap fâk bilik leh an phuang zia a zual khun tâwn.

³⁷"Anih nih chun zeizawng t̄ha tak hen a ti le, nasêt tla a theihtir le, hawlh kho lo tla khawm a hawlh tir tâwn," an ti le, dîntuai hen chê an ti lo.

Mark 8

¹Chu ni tla ah chun mi zapi tla cherkhet an hawng um nawlh le, ei ding zeikhawm an neilo liauah chun Jisu nih a t̄hiruai tla chu a kawh na le, an sinah,

²"Mi zapi tla hi tuah ni thum ka sinah an um rawh le, ei ding zeikhawm an neilo ruangah thungâi ka zângfah na asi.

³Buh ngei hen an in ah ka tlungtir na chun lam lakah an vâiphâl awt dangâiah; zeimaw mi tla châng chu an hawng kalnâk thungâi a lât mi," a ti.

⁴Chun, a t̄hiruai tla nih chun, "Mi nih hinah ramkaro mun ah hin kha ze mi sang hen me hi bang tla hi an khawptir kho lai?" ti hen, amah an sâng.

⁵Chun, anih nih chun, "Sangtlêp zeizat me nan nei?" ti hen annih chu a deih na. Chun, annih nih chun "Tlêp sarih," an ti.

⁶Chun, mi zapi tla chu tual ah to ding hen thu a pêk le; chun sangtlêp pasarih chu a lâk le, lâwmthu a sim thluh nûnah a phel le, an mâika ah hunh ding hen a t̄hiruai tla sinah a pêk. Chun, mi zapi tla sinah chun an hunh rawh.

⁷Ngatenek tâwmtê an nei ber; chun Jisu nih chun lâwmthu sim hen mal a sâwm le, t̄hiruai tla sinah chubang tla khawm chu an mâika ah hunh ding hen thu a pêk na.

⁸Chun, an ei le, an khawp chiauh; annih tla chu mi sâng li ding an si. An ei bang chu t̄hiruai tla nih khobung sarih an khah. Chun, Jisu nih chun annih chu a t̄iaktir na rawh.



- ¹⁰Chun, anih chu a ðhiruai tla sinah lawng ah chun â chuan sawm le, Dalmanutha ram chu a tlung rawh.
- ¹¹Chun, Farisai tla an hawng suak le, Jisu nikhâk ding hen a lakah vâh a mi singsiahnâk hâwl hen anih chu an êl rawh.
- ¹²Chun, anih chu a thinlung hen a rûm le, "Zeirangah me tusan mi tla nih hin singsiahnâk an hâwl? Thungâi tak hen ka nan simh na, tusan minung tla sinah hin singsiahnâk rerêng pêk asi lai lo," a ti.
- ¹³Chun, annih chu a kaltâk na le, lawng ah chun â chuan nawlh le, varâl leiah a kal rawh.
- ¹⁴Chun, a ðhiruai tla nih chun sang put an philh le, sangtlêp pakhat cho lo chu lawng ah chun sang dang rerêng an nei lo.
- ¹⁵Chun, anih nih chun an sinah, "Farisai tla leh Herod thilnu lakah chun a vêng ule, a thiamthih u," a ti thlir.
- ¹⁶Chun, annih nih chun, "Sang kan nei lo thlo," ti hen anna ruah.
- ¹⁷Chun, Jisu nih chu chu a theih le, an sinah, "Zeirangah sang nan nei lo ruangah nanna ruatdawn? Tu khawmah nan thinlung hen nan theih lo nget rih ma? A ngaihtawnhnâk khawm nan theih lo nget rih mu? Nan thinlung chu a mâwlâwt rawh na maw?"
- ¹⁸Mit nei ko hen nan muh lo mazei? Nâ nei ko hen nan theih lo mazei? Nan theihkumza lo ma?
- ¹⁹Sângnga sinah sangtlêp panga ka phel liauah khan a neknâwi kha khobung zeizat me nan khah?" a ti. Chun, annih nih chun a sinah, "Leinih," an ti.
- ²⁰"Chun, sâng li sinah sangtlêp pasarih ka phel liauah khan a neknâwi kha khobung zeizat me nan khah?" a ti. Chun, annih nih chun a sinah, "Khobung sarih," an ti.
- ²¹Chun, anih nih chun an sinah, "Tu khawmah a ngaihtawnh dân nan thiam lo rih ma?" a ti.

²²Chun, Betsaida ah a hawng tlung. Chun, Jisu sinah mitchâw an hawng ruai le, amah tawnggh ding hen an ngiar.

²³Chun, anih nih chun mitchâw kut chu a tleih le, khua lêng ah a suakpi le; chun a mit ah chil a sah le, a tlûnah kut a thâng thluh rawh chun, "Khua na muh kho ma?" ti hen a deih.

²⁴Chun, a vân a tâu le, "Minung tla ka muh le, thing kal hâwi hen ka muh fâwn," a ti.

²⁵Chun, a mit ah a kut a thâng nawlh le, chun anih nih chun a zauh ko le, a hawng dam le, zeizawng fiang tak hen a muh rawh.

²⁶Chun, anih nih chun, "Khua khawmah lût lah," ti hen a in ah a tlungtir rawh.

²⁷Chun, Jisu leh a thiruai tla chu an suak le, Philipi Kaisari kkuatê tla ah chun an kal. Chun, kal pah hen a thiruai tla sinah, "Mi nih âu me asi 'an ka ti?" ti hen a deih na.

²⁸Chun, annih nih chun, "Baptistu Johan asi," a nan ti; midang nih, 'Elija asi,' a nan ti; a zeimaw mi lam nih chun, "Pathian khuavâng tla lakah pakhat asi,' a nan ti," ti hen an simh.

²⁹Chun, anih nih chun an sinah, "Asi chun ne, nannih nih âu asi nan ka ti?" ti hen a deih na. Peter nih chun a sinah, "Mesia chu na si," ti hen a sâng.

³⁰Chun, anih nih chun a thâwngthâng âukhawm simh lo ding a ti thlir na.

³¹Chun, Minung Fapa nih chun thil tamtak a tuar ding mi leh upa tla, bawlpu lal tla, Dân sîntirtu tla duhlo hen a um ding mi tla, thah hen a um ding mi tla, ni thum ni ah a thawknawlh ding mi tla chu a sîntir na rawh.

³²Chubang thu chu fiang tak hen a sim asi. Chun, Peter nih chun anih chu a dang hen a ruai le, nun a simh rawh.

³³Anih lam chu â her le, a thiruai tla chu a zauh le, "Setan, ka dung leiah kal rawh, Pathian thil tla dawn lo hen, minung thil tla na dawn asi hi," ti hen, Peter nun a simh rawh.

³⁴Chun, mi zapi tla chu a thiruai tla hen a kawh na le, an sinah, "Âuzawng nih hawng ka zûl a duh chun mah a pheh hen a kraws put hen hawng ka zûl seh.

³⁵Âuzawng a nungnâk hum duhtu zawng nih a thlâu lai le; âuzawng keimah ruangah leh Thâwngthâng Ṭha ruangah a nungnâk thlâutu nih chun a him lai.

³⁶Mi nih laikulh hi a pum hen nei sele, a nungnâk thlâu sele, a rangah zeï me a thatvknâk um lai?

³⁷Mi nih a nungnâk ruangrûl ah zeï me a pêk kho lai?

³⁸Âuzawng tusan zumhkâilo leh thilsual ti mang tla lakah keimah leh ka thu zahpitu zawng chu, Minung Fapa nih hin vânmifial thenhlimh tla hen a Pa rokualnâk ah a thuam hen a hawng kal tikah chun chu minung chu a hawng zahpi bâk lai," a ti.

Mark 9

¹Chun, Jisu nih an sinah, "Thungâi tak hen ka nan simh na, hinah dîr tla, a zeïmaw mi tla hi Pathian Ram thiltikhonâk hen hawng tlung mi an muh lân lo chu thihnâk tem lo thlo ding mi an um," a ti.

²Chun, ni ruk nûnah chun Jisu nih Peter, Jem leh Johan tla chu a ruai na le, a dang hen tlâng sâng takah anmah tla cho a kâipi na; an mâika ah chun a mêl umzia chu a hawng dang rawh.

³Chun, a nipuan tla chu tual ah puan suktu nih an suk vâk kho lo rê tiang a vâk tîk hen a lek zur rawh.

⁴Chun, Elija leh Mosi chu an sinah an hawng a langh le, Jisu hen anna sâwn.

⁵Chun, Peter nih Jisu a sawnh le, "Rabbi" kan rangah hinah um hi a ṭha; basâ pathum kan khuar lai, nang rangah pakhat, Mosi rangah pakhat, Elija rangah pakhat," a ti.

⁶An ṭih ngâi ruangah sim ding lêm khawm an theih lo.

- ⁷Chun, anmah tla liah hen sôm a hawng zîng le, chun sôm ah chun aw a hawng suak le, "Hi hi ka Fapa duhtak asi, amah thu ngâi u," a ti.
- ⁸Chun, an kiangkam an zauh sawm le, anmah tla sinah Jisu cho lo chu âukhawm an muh lo rawh.
- ⁹Chun, tlâng ah mi chu an ÷um liauah Minung Fapa mithi lakah mi a thawknawlh nûnah cho lo chun an thil muh tla chu âukhawm simh lo ding a ti thlir.
- ¹⁰Chun, chu thu chu an chîng thlir le, "Mithi lakah mi thawknawlh chu zeitînâk me si lai?" ti hen anna deih tawnh.
- ¹¹Chun, annih nih a sinah, "Zei ti zia me Dân sîntirtu tla nih, 'Elija chu a hawng kal masa ding asi, an ti zia," ti hen an deih.
- ¹²Chun, anih nih chun an sinah, "Elija chu a hawng kal masa ding asi rerêng; zeizawng a remh awt asi; thil tamtak tuar hen mi zauhnawmh hen a um ding asi ti Minung Fapa thâwngthâng zeit hâwi hen me an rîn?"
- ¹³Sikhawmsele, ka nan simh na, Elija chu a hawng kal ving rawh asi. Chun, a thâwngthâng an rîn hâwitê khan a tlûnah an duh duh hen an ti ber rawh asi," a ti.
- ¹⁴Chun, a ÷hiruai tla sinah an va tlung rawh chun an kiangkam ah mi zapi cherkhet tla leh Dân sîntirtu tla nih an êl na liau an va muh.
- ¹⁵Chun, mi zapi zawzawng nih chun Jisu an muh ka hen chun chê an ti ngâi le, a sinah an tek sawm le, chibai an va bûk.
- ¹⁶Chun, anih nih chun an sinah, "Annih tla hen zeit thu me nanna êl?" ti hen a deih na.
- ¹⁷Chun, mi zapi lakah mi pakhat nih a sinah, "Sîntirtu, ka fapa khuri vuanh hawlh kholo chu na sinah ka hawng put le,
- ¹⁸a tleihnâk kipah a thlûk chiam tâwn le; chun a buanbarâ tla a tlâ le, a hachang a rial le, â zûk dadauh tâwn. Chun, na ÷hiruai tla hi nar ding hen ka simh na le, an ti kho lo," ti hen a sâng.

¹⁹Chun, anih nih chun an sinah, "Tusan lungnâk neilo le tla, zeï ri me nan sinah ka um lai le? Zeï ri me ka nan sang kho na lai? Amah chu ka sinah hawng ruai u," ti hen a sâng.

²⁰Chun, amah chu a sinah an hawng ruai. Chun, khuri nih chun anih chu a muh kê hen ngâksia chu cherkhet hen a sũlneng sawm rawh. Chun, tual ah a tlũ le, a buanbarâ a tlâ le, a tâl chiam.

²¹Chun, anih nih chun a pa sinah, "Hi hâwi hen a hawng umtirnâk hi zeï tluk a sâwt rawh?" ti hen a deih. Anih nih chun, "A ngâksiatê thawk hen asi;

²²chun amah veih ding hen vei tamtak mei ah leh tĩ ah khawm a tũl rawh le; sikhawmsele nangnih zeitin mawh tal na ti kho chun hawng kan zângfah le, hawng kan ãangpi rawh," a ti.

²³Chun, Jisu nih a sinah, "Na ti kho chun a! Lungnâk neitu rangah chun zeizawng tikho asi," a ti.

²⁴Chun, ngâksia pa nih chun, "Ka lung, ka zumhmainhâk ah hin hawng ka ãangpi rawh," ti hen a âu sawm rawh.

²⁵Chun, Jisu nih mi zapi an hawng tek le, anna pũm liau a muh rawh chun khuri nâwmtâm chu a fâi le, a sinah, "Nang, khuri hawlh kho lo leh nasê, thu ka nan pêk, a sungah mi suak le, lût nawlh lah rawh," a ti.

²⁶Chun, a âu le, cherkhet a sũlneng rawh chun a suak rawh. Chun, ngâksia chu thi hâwi hen a um rawh. Chuvachun, mi tam dauh nih chun, "A thi asi," an ti.

²⁷Jisu lam nih chun a kut a tleih le, a thawh; chun a hawng thawk rawh.

²⁸Chun, Jisu chu in ah a va lût rawh chun a ãhiruai tla nih, "Zeïrangah me kan nar kho lo le?" ti hen, mi kingnâk ah an deih.

²⁹Chun, anih nih chun an sinah, "Hi hâwi hi thlacham cho lo nih chun zeitin khawm a nar kho lo," a ti.

³⁰Chun, chunah mi chu a suak le, Galili ram chu an lan le, âukhawm nih an theih ding a duh lo.

³¹A ̣hiruai tla a ṣintir na dangâiah; an sinah, "Minung Fapa hi minung tla kut ah tleihtir hen a um ding asi, an thah lai le; chun an thah ṇunah ni thum ni ah a thawknawlh lai," a ti.

³²Sikhawmsele, a thusim chu a ngaihtawnhnâk an theih lo le, amah tâ nih an deih ngam lo.

³³Chun, Kapernaum chu an hawng tlung le, chun in sungah a um liauah chun an sinah, "Lampi ah khan zei thu me nanna êl?" ti hen, a deih na.

³⁴Sikhawmsele, lampi ah chun, kan lakah âu me a rokual chem lai ne? ti thu anna êl ruangah an dâisip.

³⁵Chun, anih chu a to le, leinih tla chu a kawh na le, an sinah, "Âuzawng nih masachem si a duh chun, mi zawzawng ngâk hen madungchem ah a um ding asi, mi zawzawng to-aw ah a um ding asi," a ti.

³⁶Chun, ngâksiatê a ruai le, an lâiah a ḍirtir; chun a kuah le, an sinah,

³⁷"Âuzawng ka min ruangah hi hâwi ngâksiatê pakhat khawm lawmhtu vial chu keimah lawmhtu an si lai; âuzawng kei hawng ka lawmhtu zawng chu keimah cho lawmhtu an si lo le, hawng ka fialtu lawmh khawm an si lai," a ti.

³⁸Johan nih chun a sinah, "Ṣintirtu, âu nih mawh na min hen khuri tla a nar mi kan muh le, hawng kan ẓul bâk lo ruangah kan khap ko rawh," a ti.

³⁹Jisu lam nih chun, "Khap lah u rawh; âukhawm ka min hen thilchê ti hen hawng ka simsiat sawm kho an um lo asi.

⁴⁰Âuzawng hawng kan do lotu chu kanmah lei ṭangtawm an si.

⁴¹Âuzawng ka mi nan si ruangah ṭi hâi khat din ding an p̣ek natu chu, thungâi tak hen ka nan simh na, a lâwmman chu a dawk ṛilmâl lai loh.

⁴²Âuzawng hi bang hawng ka zumhtu mi mê tla lakah pakhat khawm tḷuktirtu zawng chu an ngâwng ah f̣ang rialnâk lung lianpi awihtir hen tisumsumriat ah thlâk sele an rangah a ̣tha dauh ding asi.

⁴³Chun, na kut nih a nan tḷuktir chun tan ko;

⁴⁴kut panih nei hen Gehena ah an tholung thih lonâk ah leh mei mit kho lo ah kal ngâk chun, siat leh râwk hen nungnâk ah lût na rangah a ʔha dauh.

⁴⁵Chun, na kê nih a nan tlûktir chun, tan ko;

⁴⁶kê panih nei hen Gehena ah an tholung thih lonâk ah leh mei mit kho lo ah lawnh ngâk chun, khêng leh bai bû hen nungnâk ah lût na rangah a ʔha dauh asi.

⁴⁷Chun, na mit nih a nan tlûktir chun, chawih zek;

⁴⁸mit khiang khinih nei hen Gehena ah an tholung thih lonâk ah leh mei mit kho lo ah lawnh ngâk chun, mit khiang khat nei hen Pathian Ram ah lût na rangah a ʔha dauh.

⁴⁹"Mi kip mei hen alhtir an si lai.

⁵⁰"Chitê hi a ʔha; sikhawmsele, chitê hi a dâwng rawh chun zeï hen me an altir nawlh lai? "Nanmah lak takah chitê nei ule, a rem u, a ti.

Mark 10

¹Chun, Jisu chu a thawk le, chu thawk hen chun Judai ram ah leh Jordan râl ah a kal le; chun, mi zapi tla chu a sinah an hawng a pûm nawlh le; chun, a ti dân kumza hâwi hen a sîntir nawlh na.

²Chun, Farisai zeimaw mi a sinah an hawng kal le, amah nikhâk ding hen, "Mi nih nupi mâk a thiang ma?" ti hen an deih.

³Chun, anih nih chun an sinah, "Mosi nih zeï thu me a nan pêk na?" ti hen, a sâng.

⁴Chun, annih nih chun, "Mosi nih chun mâknâk lasui rîn hen mâk a siang tâwn asi," an ti.

⁵Sikhawmsele; Jisu nih an sinah, "Nan thinlung khauh ruangah asi chu thupêk chu a nan rîn piak na mi chu.

⁶Sikhawmsele, tual leh vân tuahtîr thawk hen annih chu nunau leh mipa ah a siam asi.

- ⁷Churuang chun mipa nih a nu leh a pa a kaltâk lai le, a nupi a sihawh lai;
- ⁸chun, an panih hen chun taksa pumkhat an si lai rawh. Chuvachun, panih an si lo rawh le, taksa pumkhat an si lehlam rawh asi.
- ⁹Chuvachun, Pathian nih a sihawh na rawh mi chu minung nih ðhen lah seh," a ti.
- ¹⁰Chun, in ah an lût nawlh rawh chun chubang thu chu Jisu rangah an deih nawlh.
- ¹¹Chun, anih nih chun an sinah, "Âuzawng a nupi mâk hen midang umpitu nih chun a nupi chu ðangdang a pawmtâk asi.
- ¹²Anih khawm nih chun a pasal a ðhen hen midang a umpi chun ðangdang a pawmtâk bâk," a ti.
- ¹³Chun, Jisu tawnggh ding hen a sinah ngâksia tetê an hawng ruai na le; chun, ðhiruai tla nih an fâi na.
- ¹⁴Sikhawmsele, Jisu nih chu chu a muh rawh chun thungâi a lungsi lo; ðhiruai tla sinah chun, "Ngâksia tetê tla ka sinah hawng kaltir ule, nar lah na u; Pathian Ram chu hi bang mi tla tâ asi.
- ¹⁵Thungâi tak hen ka nan simh na, âuzawng Pathian Ram chu ngâksiatê nih a lawmh mi hâwi hen lawmh lotu zawng chu a sungah an lût rîlmâl lai loh," a ti.
- ¹⁶Chun, anmah tla chu a kuah na le, an tlûnah kut thâng hen mal a sâwm na rawh.
- ¹⁷Chun, kal ding hen Jisu a suak liauah minung pakhat amah leiah a hawng tek le, a mâika ah a siksidîr le, a sinah, "Sîntirtu ðha, zungzâl nungnâk ka ting khonâk ding hen zeï me ka ti lai?" ti hen a deih.
- ¹⁸Chun, Jisu nih a sinah, "Zeïrangah me mi ðha na ka ti? Minung pakhat cho lo chu âukhawm mi ðha an um lo, chu chu Pathian asi.

¹⁹Thupêk tla chu na theih ko khateh, 'Mi thah lah, tângdang pawmtâk lah, fîr lah, theihpitu âwkrâwl ah suak lah, bum lah, na nu leh na pa zah rawh,' ti tla hi," a ti.

²⁰Chun, anih nih chun a sinah, "Sîntirtu, chubang thu zawzawng chu ka ngâksiatê thawk hen ka zâwt tâwn," a ti.

²¹Chun, Jisu nih amah chu a zauh le, a zângfah le, a sinah, "Kâng khat na bat rih; kal le, na neih zawzawng zuar le, mipâm tla sinah pêk rawh, chun, vân ah ro na nei lai; chun hawng kal le, hawng ka zûl," a ti.

²²Sikhawmsele, chubang thu lakah chun a mêl chu a hawng mûi khup le, ngaihsia tak hen a kal rawh; sum tamtak nei mi asi ruangah.

²³Chun, Jisu nih a kiangkam a zauh le, a t̄hiruai tla sinah chun, "Sum leh p̄i chawng tla rangah chun Pathian Ram ah lût a har awt â!" a ti.

²⁴Chun, t̄hiruai tla nih chun a thusim chu thungâi ch̄e an ti. Jisu nih a sâng nawlh na le, "Ka fa tla, sum rinhsantu tla rangah Pathian Ram ah lût a har â!

²⁵Minei Pathian Ram ah lût ngâk hen sangâwngsâu t̄him kua ah lût a awl dauh," a ti.

²⁶Chun, annih nih chun thungâi ch̄e an ti le, a sinah, "Asi chun âu me ruangsuaik sikho lai ne?" an ti.

²⁷Jisu nih annih chu a zauh na le, "Chu chu minung nih tikho asi lo le, Pathian lam nih chun tikho lo asi loh; Pathian nih chun zeizawng a ti kho asi," a ti.

²⁸Peter nih a sinah, "Ngâinik, kannih nih zeizawng kaltâk hen kan nan zûl rawh," ti hen, sim a dawmh rawh.

²⁹Jisu nih chun, "Thungâi tak hen ka nan simh na, âuzawng keimah ruangah leh Thâwnghâng T̄ha ruangah in mawh, unaupa mawh, farnu mawh, nu mawh, pa mawh, fa tla mawh, ram tla mawh kaltâk rawh mi nih chun,

³⁰tu dam sung lîlâ hin in tla, unaupa tla, farnu tla, nu tla, fa tla, ram tla a let zâ hen, nehsawhnâk tla hen, tawng lo ding âukhawm an um lo; tik hawng tlung ding mi ah zungzâl nungnâk hen.

³¹Sikhawmsele, mi tamtak masachem ah um tla chu madungchem ah an um lai, madung chem tla khawm chu masachem ah an um lai, a ti.

³²Chun, Jerusalem ah kâi ding hen lam lakah an um le, Jisu chu an mâi leiah a kal le; annih nih chun thungâi chê an ti; a hawng zûltu tla nih chun an ãih. Chun, anih nih chun leinîh tla chu a dang hen a ruai nawlh na le,

³³"Ngâinîk u, Jerusalem ah kan kâl awt hi; Minung Fapa hi bâwlpu lal tla leh Dân sîntirtu tla sinah tlehtir hen a um awt asi.

³⁴Chun, annih nih chun a tlûnah thi ding hen thu an thlûk lai le, Phundang tla sinah an pêk lai; chun annih nih chun nihsuak siamnâk ah an mang lai le, chil an sah lai le, an vuak lai le, an thah lai; chun, ni thumnâk ah a thawknawlh lai," ti hen, a tlûnah thil hawng tlung ding mi tla chu an sinah a sim rawh.

³⁵Chun, Zebedai fapa Jem leh Johan nih chun Jisu chu an hawng naih le, a sinah, "Sîntirtu, na sinah kan deih mi zawng na hawng kan ti piak kan duh," an ti.

³⁶Chun, anih nih chun an sinah, "Nan rangah zeî me an ti piak na sele nan duh?" a ti.

³⁷Chun, annih nih chun a sinah, "Na rokualnâk ah chun na vawrh leiah pakhat, na kehlei ah pakhat hawng kan totir," an ti.

³⁸Jisu lam nih chun, an sinah, "Nan deih mi chu nan theih lo asi. Ka hâi din ding mi chu nan din kho mazei? Baptis ka sinâk ah khawm nanna baptis kho mazei?" a ti.

³⁹Chun, annih nih chun a sinah, "Kan ti kho," an ti. Chun, Jisu nih an sinah, "Ka hâi din ding mi chu nan din lai le, ka baptis si ding khawm chu nan si bâk lai.

- ⁴⁰Sikhawmsele, ka vawrhlei ah mawh ka kehlei ah mawh to ding thu chu kei pêk ding asi lo le, an timhtuah piak na mi tla rangah asi dauh lai," a ti.
- ⁴¹Chun, parâ tla nih chun chu chu an theih rawh chun Jem leh Johan tlûnah chun thungâi an lungsi lo.
- ⁴²Jisu lam nih chun annih tla chu a kawh na le, an sinah, "Phundang tla tlûnah lâirêltu ah an ruat mi tla chu an tlûnah thungâi anna lal tâwn le, an mi lian tla nih chun an tlûnah thungâi thu an nei tâwn ti nan theih.
- ⁴³Sikhawmsele, nan lakah lam chun chu hâwi asi lai loh; âuzawng nan lakah mi lian si duh mi zawng chu nan to-aw ah a um ding asi.
- ⁴⁴Âuzawng nan lakah masachem si duh mi zawng chu mi zawzawng sal ah a um ding asi.
- ⁴⁵Minung Fapa khawm nih hin rianṭuan piak ding hen a hawng lo le, rianṭuan ding leh mi tamtak tlanhnâk ah a nungnâk pêk ding hen a hawng kal asi," a ti.
- ⁴⁶Chun, Jeriko ah an hawng tlung rawh. Jisu chu Jeriko thawk hen chun a thiruai tla leh mi zapi cherkhet hen a suak liauah kutdawnh mitchâw, Timai fapa Bartimai chu lam vâu ah a to.
- ⁴⁷Chun, Nazaret Jisu asi ti a theih ka hen, "Jisu, David Fapa, hawng ka zângfah rawh," ti hen, a âu rawh.
- ⁴⁸Chun, mi tamtak nih dâisip ding hen an fâi. Sikhawmsele, anih nih chun, "David Fapa, hawng ka zângfah rawh," ti hen, a âu dadauh.
- ⁴⁹Chun, Jisu chu a dîr le, "Amah chu kawh u," a ti. Chun, mitchâw chu an kawh le, a sinah chun, "Lungngam tak hen um le, thawk rawh; a nan kawh," an ti.
- ⁵⁰Chun, anih nih chun a puan a lawnh le, a thawk lawt le, Jisu sinah a hawng kal.

⁵¹Chun, Jisu nih chun amah chu a hawng sawnh le, "Na lakah zeitin an ti sele na ka duh?" a ti. Chun, mitchâw nih chun a sinah, "Rabboni" muh kho ka duh," a ti.

⁵²Chun, Jisu nih a sinah, "Kal rawh, na lungnâk hi na dam phah asi," a ti. Chun, a muh kho sawm le, lampi ah chun Jisu a zûl rawh.

Mark 11

¹Chun, Jerusalem an naih dâwp ah, Oliv Tlâng Bethphage leh Bethani kiang an tlung rawh chun a ðhiruai lakah mi panih a fial na le,

²an sinah, "Nan mâilei khua ah khin va kal ule, chun nan lût tîrah Sanatung fa rêng mi, âukhawm chuan dah lonâk nan va muh sawm lai; chu chu sût ule, hawng ruai u.

³Chun, âutal nih, 'Kha kha zeirangah nan ti awt?' an ti na chun, 'Lalpa nih a duh asi, hinah a hawng thaktir nawlh sawm lai, ti u, a ti.

⁴Chun, an kal le, zâwllâi ah inkhâr lênglei ah Sanatung fa rêng mi an va muh le; chun chu chu an sût rawh.

⁵Chun, chunah chun dîr mi âu tla nih mawh an sinah, "Sanatung fa kha zeirangah nan sût?" an ti.

⁶Chun, annih nih chun Jisu sim hâwitê khan an sinah an sim le; chun kal ding an siang rawh.

⁷Chun, sanatung fa chu Jisu sinah an hawng ruai le, a tlûnah chun an puan tla an phah le; chun a tlûnah â chuan rawh.

⁸Chun, mi tamtak nih lampi ah chun an puan an phah le; midang nih lo mi sâwlring sât hen an phah.

⁹Chun, a mâi leiah kal tla leh a dung leiah zûltu tla nih chun, "Hosana! Lalpa min hen a hawng kal mi chu a thaw a suak.

¹⁰Ram hawng tlung ding mi, kan pa David Ram chua thaw a suak, Chungnungchem ah khin Hosana!" ti hen, an âu.



- ¹¹Chun, Jisu chu Jerusalem ah Pathian Biakin ah chun a lût rawh. Chun, zeizawng a zauh thluh rawh chun, zânleibâi khawm asi rawh le, a suak le, leinìh tla hen Bethani ah an kal rawh.
- ¹²Chun, a thâituan ah chun, Bethani thawk hen Jisu chu a suak nûnah a sung a vâng rawh.
- ¹³Chun, theipi kûng nah nei râl lât hen a muh le, a rah muh ding hen a va kal le; chun a va tlung rawh chun a nah cho lo chu zeikhawm a muh lo le; theipi rah tik asi lo rêng asi.
- ¹⁴Chun, Jisu nih thing chu a sawnh le, "Tu thawk hen kumleza hen na lakah âukhawm nih rah ei lah rawh seh," a ti. A òhiruai tla nih chun chu chu an theih.
- ¹⁵Chun, Jerusalem ah chun an tlung rawh. Pathian Biakin ah Jisu chu a va lût le, chunah mi zuartu tla leh châwktu tla chu a nar na le, tangka thlengtu tla dawhkân tla leh vaṭhu zuartu tla tophah tla khawm chu a thlûk piak na le;
- ¹⁶chun, Pathian Biakin ah chun âukhawm nih thil-le-rî an lanpi a siang lo.
- ¹⁷Chun, an sinah chun, " 'Ka in chu phun kip rangah thlachamnâk in an ti lai, ti rîn asi lo mazei? Nannih lam nih chun rawkmang tla pûk ah nan siam," ti hen, a sîntir na rawh.
- ¹⁸Chun, bâwlpu lal tla leh Dân sîntirtu tla nih chun chu chu an theih le, amah chu an òih ruangah a veihnâk ding zia an hâwl. Mi zapi zawzawng nih chun a sîntirnâk chu thungâi chê an ti.
- ¹⁹Chun, zânleibâi a hawng si rawh chun Jisu leh a òhiruai tla chu khuapi ah mi chu an suak rawh.
- ²⁰Chun, zîng ah an kal pah hen theipi kûng chu a ram tiang uai ver hen an muh rawh.
- ²¹Chun, Peter nih a theih pup le, a sinah, "Rabbi zauhnik, theipi kûng hawlhsiat na barh mi kha a uai ver rawh," a ti.
- ²²Chun, Jisu nih an sinah, "Pathian zumh u.

²³Thungâi tak hen ka nan simh na, âuzawng hi tlâng sinah hin, Hawng a ÷hnh le, tisumsumriat ah a lawnh rawh,' ti hen, a thihlung ah zumhmaih lo hen a sim mi chu a tlung ngelchel lai ti lungtu nih an sim zia zawng hen an muh lai.

²⁴Churuangah ka nan ti na, zeizawng thla nan cham hen nan deih mi zawng chu tawng rawh hen a ruat ule, chun nan tawng lai.

²⁵Chun, thlacham hen nan đĩr tik zawngah âu lak khawmah thupawi zeimawh nan nei chun ngaihdam u; nan Pa vâh ah mi khawm nih nan buarnâk tla chu a nan ngaihdam na khonâk ding hen.

²⁶(Chun, nan ngaihdam lo chun nan Pa vâh ah mi nih nan buarnâk tla a nan ngaihdam na bâk lai loh," a ti le, a sâng.)

²⁷Chun, Jerusalem ah chun an tlung nawlh le, chun Pathian Biakin ah Jisu chu a kal liauah bâwlpu lal tla leh Dân sîntirtu tla leh upa tla chu a sinah an kal le,

²⁸a sinah, "Âu thu hen me hi bang thil hi na ti? Hi bang thil hi ti ding hen âu nih me thu a nan pêk?" an ti.

²⁹Chun, Jisu nih an sinah, "Kei khawm nih thu kê khat ka nan deih na bâk lai, hawng ka sâng ule; chun âu thu hen me hi bang thil hi ka ti ka nan simh na lai.

³⁰Johan baptisma kha vâh ah mi thu ma, minung thu? Hawng ka sâng u," a ti.

³¹Chun, anna ruat le, "Vâh ah mi thu, kan ti chun, 'Zeirangah a thu nan âwi lo ne?' a kan ti ÷ung lai,

³²'Minung thu,' kan ti lai dek maw aw?" an ti. (Sikhawmsele, mi zapi chu an ÷h le, mi zawzawng nih Johan chu khuavâng tatak ah an ruat khap ruangah.)

³³Chun, Jisu an sâng le, "Kan theih lo," an ti. Chun, Jisu nih an sinah, "Kei khawm nih âu thu hen me hi bang thil hi ka ti ka nan simh na bâk awt lo," a ti.

Mark 12



- ¹Chun, tahtimh thu hen Jisu nih an sinah a sim rawh: "Âu nih mawh grep dûm a siam le, dâi hen a kulh le, grep sûrnâk khur a chawh le, in sâng a sak le, a bultu tla sinah thlawh lawh ding hen a pêk le, ram dangah a kal rawh.
- ²Chun, kawih a chû rawh chun dûm ah a rah mi chu a tingvo bultu tla sinah mi lâk ding hen a bultu tla sinah chun sal pakhat a fial.
- ³Chun, chu minung chu an tleih le, an vuak le, kut karo hen an kîrtir nawlh rawh.
- ⁴Chun, sal dang an sinah a fial nawlh le; chu khawm chu a lû ah an liamh, ningzakkâi tak hen an siam.
- ⁵Chun, sal dang a fial nawlh le; chu minung chu an thah. Sal dang tamtak khawm zeimaw mi an vuak le, zeimaw mi an thah.
- ⁶Chun, pakhat, fapa duhtak a nei rih; 'Ka fapa hi chu an zah lai,' ti hen, anih chu a madungchem ah an sinah a fial.
- ⁷Sikhawmsele, chubang a bultu tla nih chun, 'Hi minung hi rotingtu ding chu asi; kan thah lai! Chun, a roting ding mi hi kan tâ asi ko lai,' anna ti.
- ⁸Chun, anih chu an tleih le, an thah le, grep dûm ah mi chu an lawnh rawh.
- ⁹"Chuvachun, dûm dâwngpu nih chun zeitin a hawng ti lai? Bultu tla chu a hawng veih na lai le, dûm chu midang tla a pêk lai.
- ¹⁰Hi Pathian lasui thu hi nan rêl lo mazei? 'In saktu tla duhlo mi lung kha, chu tak chu a kil ah lung herh chem a hawng si rawh.
- ¹¹Chu chu Lalpa ti asi le; kan mitmuh ah a chê asi,' ti hi," a ti.
- ¹²Chun, amah chu tleih an tum le, sikhawmsele, mi zapi chu an tih le; chu tahtimh thu chu anmah tla tisan hen a sim ti an theih dangâiah. Chun, amah chu an kaltâk le, an kal rawh.
- ¹³Chun, a thusim ah tleih ding hen Farisai tla leh Herod murui lakah mi âu tla mawh a sinah an fial.
- ¹⁴Chun, annih chu an hawng tlung rawh chun a sinah, "Sîntirtu, mi dik tak na si le, âukhawm tih leh zah khun na nei lo ti kan theih, âukhawm thliar leh

dang lo hen, sîset hen Pathian lei thu na sîntir tâwn asi. Kaisar sinah siah châwi hi dân asi ma si lo? Kan pêk lai ma, pêk lai lo?" an ti.

¹⁵Anih lam nih chun an perpet zia chu theih hen an sinah, "Zeirangah nan ka nik? Denari khat hawng put ule, ka zauh lai," a ti.

¹⁶Chun, an hawng put. Chun, anih nih chun an sinah, "Hi hi âu lem leh âu min mesi?" a ti. Chun, annih nih chun a sinah, "Kaisar," an ti.

¹⁷Chun, Jisu nih an sinah, "Kaisar thil tla chu Kaisar sinah pêk ule, Pathian thil tla chu Pathian sinah pêk u," a ti. Chun, thungâi chê an ti.

¹⁸Chun, Sadukai tla, thawknawlnhâk a um lo titu tla chu Jisu sinah an hawng kal le, a sinah,

¹⁹"Sîntirtu, Mosi nih, 'Âuzawng a unaupa nih fa nei lo hen a nupi thih tâk sele, a unaupa nih chun a nupi chu umpi hen a unaupa rangah chi a thlâk piak ding asi,' ti hen hawng kan rîn piak asi.

²⁰Unau pasarih an um le, upachem nih nupi a nei le, chi thlah lo hen a thi.

²¹Chun, a panihnâk nih chun a umpi le, chi thlah lo hen a thi nawlh le; a pathumnâk nih chu hâwi ber hen.

²²Chun, unau pasarih chu chi rerêng thlah lo hen an thi vima. A madungchem ah nunau khawm chu a thi rawh.

²³Thawknawlh tikah anmah lakah âu nupi me asi lai? An pasarih nih chun nupi ah an umpi dangâiah," ti hen, an deih.

²⁴Jisu nih an sinah, "Hi ruangah hin silo ma, nan ngaih palh tâwn, Pathian lasui thu leh Pathian thiltikhonâk nan theih lo ruangah hin?"

²⁵Mithi lakah mi an thawknawlh tikah chun mipa leh nunau tla anna umh lai lo rawh le, vâh ah vânmifial tla hâwi hen an si awt lehlam asi.

²⁶Chun, mithi tla thawh hen an um ding thu chu--Mosi lasuibu ah, Thingbû thu ah khan Pathian nih, 'Kei Abraham Pathian, Isak Pathian, Jakob Pathian ka si,' ti hen, a sawnh zia kha nan rêl lo mazei?

²⁷Anih chu mithi Pathian asi lo le, minung Pathian asi dauh; thungâi nan ngaih sual asi," a ti.

²⁸Chun, Dân sîntirtu lakah mi pakhat a hawng kal le, anna êl mi chu a hawng ngâi. Jisu nih annih tla chu ̣ha tak hen a sâng ti a theih le, a sinah, "Thupêk zawzawng lakah a zeï hi me a herh chem?" ti hen a deih.

²⁹Jisu nih, "Thupêk herh chem chu hi hi asi: 'Israel tla, ngâi u, Lalpa kan Pathian chu Lalpa pakhat cho asi le;

³⁰Lalpa na Pathian chu na thinlung zawzawng hen, na thlarau zawzawng hen, na dawnruatnâk zawzawng hen, na chaknâk zawzawng hen na dâwt ding asi, ti hi.

³¹A sangtu chu hi hi asi: 'Nangmah na dâwt hâwi hen na zâwlbâwm tla na dâwt ding asi,' ti hi. Hi ngâk hen thupêk rokual rerêng a um lo," ti hen, a sâng.

³²Chun, Dân sîntirtu nih chun a sinah, "Asi ngâk, sîntirtu, amah chu pakhat cho asi le, amah lo chu Pathian dang rêng an um lo,

³³amah chu thinlung zawzawng hen, theihthiamnâk zawzawng hen, chaknâk zawzawng hen, mah a dâwt hâwi hen zâwlbâwm tla dâwt hi pum duah thilpêk leh bâwlnâk zawzawng ngâk hen a ̣ha dauh khun ti hi, na sim dik tak ko, a ti.

³⁴Chun, fing tak a sâng ti Jisu nih a theih rawh chun a sinah, "Pathian Ram na lât lo," a ti. Chu rî rawh chun âukhawm nih thu rerêng an deih ngam lo rawh.

³⁵Chun, Jisu nih Pathian Biakin ah a sîntir liauah anmah tla a sawnh na le, "Mesia chu David fapa asi ti Dân sîntirtu tla nih zeï zia hen sim me an si?

³⁶David tak nih Thlarau Thenhlimh hen, 'Lalpa nih chun ka Lalpa sinah, na mêlma tla na kê sirhsanh ah ka siam lân lo chu ka vawrhlei ah to rawh,' a ti.

³⁷David tak nih chun anih chu, 'Lalpa,' a ti dangâiah, zeitin a fapa asi lai?" a ti. Chun, mi zapi vântlâng nih chun lâwm tak hen a thu an ngâi.

³⁸Chun, a sîntirnâk ah chun, "Dân sîntirtu tla lakah a thiamthih u; annih nih chun kawrdawh fual ruk hen tawih an duh tâwn le,

³⁹sumtuah mun ah chibai bûk tla, pumhnâk in ah tophah tha chem tla, puaituahnâk ah mun tha chem tla an ngiat tâwn.

⁴⁰Numei sum an ei le, mi muh ah sâwt tak thla an cham tâwn; chubang tla nih chun a mawh an phurh zual khun lai," a ti.

⁴¹Chun, thawhlâwm bâwm zâwn ah chun Jisu chu a to, thawhlâwm ah mi zapi tla tangka thlâk zia chu a zauh le; minei tamtak nih cherkhet an tlâk.

⁴²Chun, numei pâm tak a hawng kal le, lepta panih a thlâk le, chu chu quadran khat tluk asi.

⁴³Chun, Jisu nih chun a thiruui tla chu a kawh na le, an sinah, "Thungâi tak hen ka nan simh na, thawhlâwm bâwm ah thlâktu dang zawzawng ngâk hen hi numei pâm tak nih a thlâk tam dauh.

⁴⁴Hi bang zawzawng nih hin an neih a lei mi an thlâk asi; anih lam nih chun a duh liau tak, a neihlemtê, a um san mi zawzawng chu a thlâk ver asi, a ti.

Mark 13

¹Chun, Pathian Biakin ah mi chu a suak liauah a thiruui tla lakah mi pakhat nih a sinah, "Sîntirtu, zauhnik, a lung leh a in tla hi a rokual châwk a!" a ti.

²Jisu nih a sinah, "Hi bang in rokual tak tla hi na muh mu? Chimtir lo hen lung â chuanh mi rerêng hinah a um lai loh," a ti.

³Chun, Oliv Tlang ah Pathian Biakin zâwn ah a to liauah, Peter, Jem, Johan leh Andri tla nih chun a sinah,

⁴"Chubang chu zeï tikah a hawng um lai? Chubang zawzawng chu a hawng tung awt tikah singsiahnâk zeï me a um lai? Hawng kan simh," ti hen, a thup hen an deih.

⁵Chun, Jisu nih an sinah "Âukhawm nih an perpet na lonâk ding hen a thiamthih u.

⁶Mi tamtak nih, 'Mesia chu ka si,' ti hen, keimah min sâl hen an hawng kal lai le, mi tamtak an perpet lai.

⁷Chun, râltuk thu leh râltuk thuthang tla nan theih tikah lawksawng lah u; chubang chu hawng tlung ding rêng asi; sikhawmsele, dawnghnâk chu asi lo rih.

⁸Phun dang leh phun dang anna tuk lai le, ram dang leh ram dang anna tuk lai le; mun dang dangah lî tla â nîn lai, pâm tla a tlung lai; Chubang chu nau nei nganfâk dawmhtirnâk asi;

⁹"Sikhawmsele, a thiamthih u; lâirêltu tla an tlehtir na lai le, pumhnâk in tla ah an vuak na lai. Keimah ruangah governor tla leh lalchem tla mâika ah anmah tla theihtirnâk ding hen nan dîr teh lai.

¹⁰Chun, Thâwngthâng Ṭha hi phun zawzawng sinah sim masa ding asi.

¹¹Chun, an ruai na hen, an tlehtir na tikah chun, 'Zeime ka sim lai,' ti hen, a dawnkan lah u; a tik takah chun a nan theihtir na mi zawng; chu tak chu sim u; a simtu chu nanmah nan si awt lo le, Thlarau Thenhlimh asi dauh awt.

¹²Chun, thah ding hen a unaupa nih a unaupa a tlehtir lai le, pa khawm nih a fa a tlehtir lai; fa tla khawm nih an nu leh an pa tla an do lai, an thahtir lai.

¹³Keimah min ruangah mi zawzawng huat nan si lai; sikhawmsele, a dawnghtiang hen tuar huamtu zawng chu, chu tak chu ruangsuaq hen a um lai.

¹⁴"Sikhawmsele, 'Ṭhiautu Fihnungkâi' chu a dîr lonâk ding mun ah dîr nan muh tikah, (a rêltu zawng nih a umzia theih seh), chu tikah chun Judai ram ah um tla chu tlâng ah tek seh.

¹⁵Chun, in tlûnah um mi chu ṭum lah seh; a in ah zeilo lâk ding hen lût lah seh.

¹⁶Chun, lo ah um mi chu a puan lâk ding hen kîr lah seh.

¹⁷Chubang ni ah chun râi tla leh nauno pawm tla tlûn chu a pit lai.

¹⁸Chun, chubang chu busik ah a tlung lonâk ding hen thlacham u.

¹⁹Chubang ni chu hamhnâk ni asi awt dangâiah, chu hâwi hamh chu Pathian siam tual tuah tîr thawk hen tutiang hen a um dah lo le, zeitik khawm a um lai lo rawh.

²⁰Chun, Lalpa nih chubang ni chu tâwitir lah sele, minung rerêng dam hen an suak lai loh; sikhawmsele, mi thîm, a ruat mi tla ruangah chun ni tla chu a tâwitir.

²¹"Chun, chu tikah chun âuzawng nih nan sinah, 'Zauhnik u, Mesia hinah a um,' mawh 'Zauhnik u, hinah khi!' mawh an ti na chun lung lah u.

²²Mesia telê tla leh khuavâng telê tla an hawng suak awt dangâiah. Chu tla nih chun singsiahnâk leh thilchê tla an ti lai; tikho sele, thîm tla men an perpet khonâk ding hen.

²³Nannah lam chu a thiamthih u, zeizawng ka nan simhkan na rawh hi.

²⁴"Sikhawmsele, chubang ni ah, chubang hamhnâk nûnah chun nî thimtir hen a um lai le, thlâ a chêu lai lo le,

²⁵vân thawk hen ârfi tla an hawng tlâ lai le, vân ah thiltikhonâk um tla chu ninh asi lai.

²⁶Chu tikah chun Minung Fapa hi thiltikhonâk fâk tak leh rokualnâk fâk tak hen sîm lakah a hawng kal mi an muh lai.

²⁷Chu tikah chun vânmifial tla chu a fial lai le, a thîm mi tla chu kâwlkil li ah mi tual dawng thawk hen vân dawng tiang hen a lâwr hen a pumh lai.

²⁸"Chun, theipi kûng ah hin tahthimh thu a sîn u; a chawrh a hawng no le, a nah a hawng chawrh chun thâlpini a suak awt ti nan theih tâwn.

²⁹Chu hâwi ber hen nannah khawm nih chubang chu a hawng tung mi nan muh tikah chun amah chu a hawng nâi rawh le, kawtkarî ah a um ti theih u.

³⁰Thungâi tak hen ka nan simh na, chubang zawzawng chu a hawng tung lân lo chu tusan mi tla hi an tlâu lai loh.

³¹Tual leh vân a tlâu lai le, ka thu lam chu a tlâu lai loh.

³²Sikhawmsele, a ni leh a dâr thu chu pa cho lo nih chun âukhawm nih, vân ah vânmifial tla khawm nih, Fapa khawm nih an theih lo.

³³Thiamthih ule; ringrâwn kumza hen um u; a tik chu nan theih lo dangâiah.

³⁴Mi, a in kaltâk hen, a sal tla chu thuneitir hen, an rianțuan ding pêk chiauh hen, inkhâr vêngtu khawm râring ding thu pêk tâ hen, ram lâk takah khualtlâwng ving mi hâwi asi.

³⁵Chuvachun, ringrâwn kumza hen um u; in dâwngpu hawng tung tik ding chu zân leiah ma, thanțim ah ma, zîng ah ma asi awt nan theih lo.

³⁶Chu hâwi asi lo chun, a hawng tung khup chun it thlit hen a nan muh sual na lebang lai.

³⁷Chun, nan sinah ka sim mi hi mi zawzawng sinah sim ka si, ringrâwn hen um kumza u," a ti rawh.

Mark 14

¹Chun, ni nihnâk ah chun Kalkan Kût leh Sang Thilnu telhlo Kût a um awt le; bawlpu lal tla leh Dân sîntirtu tla nih chun amah chu ngamlêm pêk a tleih hen an thah khonâk ding zia an hâwl an hâwl le,

²"Kût sung chun si lah seh, asi lo chun mi zapi vântlâng lakah nawknâk a hawng um sual lebang lai," an ti.

³Chun, Bethani ah phâr Simon in ah chun Jisu chu a um liauah, buh a dâm liauah nunau pakhat alabasta dâr ah spiknard sariak rimthâw a man har tak put hen a hawng kal le, a dâr chu a khuai le, a lû ah a tawih.

⁴Sikhawmsele, mi zeimaw mi chu an ro a thâwk le, "Zeirangah me sariak rimthâw hi a veih salam?"

⁵Hi sariak hi denari zathum ngâk a tam dauh zuar hen, mipâm tla sinah pêk kho asi mi," an ti. Chun, a tlûnah an chipchiar rawh.

⁶Jisu lam nih chun, "Zeitun khawm ti lah u; zeirangah nan nawktir? Ka tlûnah thil tha tak a ti asi.



⁷Mipâm tla chu kumleza hen nan sinah um an si le, nan duh tik zawngah annih chu nan zângfah kho mi; kei lam chu kumleza hen nan sinah um ding ka si lo.

⁸A ti kho tâwk a ti asi; ka taksa hi phûm ding hen a chulh kan asi hi.

⁹Chun, thungâi tak hen ka nan simh na, laikulh zawzawng ah, kha zeizawng ah, Thâwngthâng Ṭha an simnâk zawngah hi nunau thilti khawm hi amah theihkumzanâk ding hen an sim vima bâk lai," a ti.

¹⁰Chun, Juda Iskariot, leinîh tla lakah mi pakhat nih khan Jisu chu an sinah a tleihtir khonâk ding hen bâwlpu lal tla sinah a va kal.

¹¹Chun, annih nih chun an theih kê hen anna lâwm thlo le, a sinah tangka pêk ding hen an tiamh rawh. Chun, a tleihtirnâk ding zia remkâng a hâwl rawh.

¹²Chun, Sang Thilnu telhlo Kût, ni masachem, Kalkanh Kûtnâk dawrâ fa an thah tâwnnâk ni ah chun, a ṭhiruai tla nih a sinah, "Kalkanh Kût buh na ei khonâk ding hen kha zeiah va timhtuah sele na duh?" an ti.

¹³Chun, a ṭhiruai tla lakah mi panîh a fial le, an sinah, "Khuapi ah va lût ule, chunah chun mipa tibêl put hen a nan tawng na lai; amah chu zûl ko u.

¹⁴Chun, a lûtnâk zawngah, chu in dâwngpu sinah chun, Sîntirtu nih ka ṭhiruai tla hen Kalkanh Kût buh kan einâk ding hen, khual in kardang chu kha zeiah me? a ti,' va ti u.

¹⁵Chun, amah nih a tlûn chuanh kardang kê tak, thil-le-rî um chia, timh chia a nan zauhtir na lai; chunah chun kan rangah timhtuah u," a ti.

¹⁶Chun, ṭhiruai tla chu an suak le, khuapi ah chun an va lût le, an sinah a sim hâwitê hen an muh le, chun, Kalkanh Kût buh chu an timhtuah rawh.

¹⁷Chun, zânlei asi rawh chun anîh chu leinîh tla hen an va kal rawh.

¹⁸Chun, an dûm le, an ei liauah Jisu nih, "Thungâi tak hen ka nan simh na, nan lakah mi pakhat ka sinah ei bâk mi tak nih hin a hawng ka tleihtir lai," a ti.

¹⁹Chun, thungâi an lawksawng le, pakhat khat nih a sinah, "Keimah masi?" an ti chiau.

²⁰Chun, anih nih chun an sinah, "Leinìh tla lakah mi pakhat, a sang khêng ah hawng ka nîmpitu hi asi.

²¹Minung Fapa hi a thâwngthâng an rîn mi hâwitê khan a kal awt asi; sikhawmsele, Minung Fapa tlehtirtu ding minung tlûn chu a pit! Chu minung chu suak lah sele a rangah a tha dauh lai," a ti.

²²Chun, an ei liauah Jisu nih sang a lâk le, mal a sâwm thluh rawh chun a phel le, an sinah a pêk le, "Lâk u; hi hi ka taksa asi," a ti.

²³Chun, hâi a lâk le, lâwmthu a sim thluh rawh chun an sinah a pêk le; chun an ektê hen an din chiau rawh.

²⁴Chun, anih nih chun an sinah, "Hi hi ka thisen, mi tamtak rangah suak ding mi thudântuk chu asi.

²⁵Thungâi tak hen ka nan simh na, Pathian Ram ah a thar ka din ni a tlung lân lo chu grep zûn rah lakah mi ka din nawlh lai lo rawh," a ti.

²⁶Chun, la an sak thluh rawh chun an suak le, Oliv Tlâng ah chun an va kal rawh.

²⁷Chun, Jisu nih an sinah, "Nan ektê hen nan ka tektâk ver lai le, nan ka mâk thlap lai, Dawrâ vêngtu chu ka vuak lai le, dawrâ tla chu anna thêk lai, ti rîn asi.

²⁸Sikhawmsele, ka thawknawlh nûnah Galili ram ah nan mâilei ah ka kal lai," a ti.

²⁹Peter lam nih chun a sinah, "An ektê hen an tektâk khawm sele, kei lam chu ka nan tektâk lai loh," a ti.

³⁰Chun, Jisu nih a sinah, "Thungâi tak hen ka nan simh, tusûn ah tuzân lîlâ ah hin âr veinìh a khuang lânah nangnih veithum na ka pheh lai," a ti.

³¹Anih lam nih chun fâk tak hen, "Na thihnâk ah thi bâk awt khawmsele ka nan pheh lai loh," a ti chiam. Chun, chu hâwitê chun an ti chiau.



- ³²Chun, Getsemani an ti mi mun chu an tlung le, chun Jisu nih a thiruai tla sinah, "Thla ka cham kar zawng hinah hin to u," a ti.
- ³³Chun, Peter, Jem leh Johan tla chu a ruai na le, thungâi a thlakâm hen a lawksawng rawh.
- ³⁴Chun, an sinah, "Ka thinlung thungâi a lawksawng le, thihnâk khawp rê asi; hinah hin um ule, a rârling kumza u," a ti.
- ³⁵Chun, tâwm hen mâi leiah a va kal dauh le, tual ah a bawk le, tikho si sele, chu tik nih chun amah lanh ding hen thla a cham.
- ³⁶" Abba, ka pa, zeizawng na ti kho le, hi hâi hi ka sinah mi thial rawh; sikhawmsele, keimah duhzia silo hen nangmah duhzia si dauh seh," a ti.
- ³⁷Chun, a hawng kal le, annih tla chu it hen a hawng muh na le; chun Peter sinah, "Simon, na it na maw? Dârkar khat khawm rârling kumza hen nan um kho lo mu?"
- ³⁸Lêmnâk ah nan lût lonâk ding hen rârling kumza hen thlacham u. Thlarau lam nih chun a huam le, taksa lam chu a chak lo asi," a ti.
- ³⁹Chun, a va kal nawlh le, a thusim lîlâ sim hen thla a cham nawlh.
- ⁴⁰Chun, a hawng nawlh rawh chun annih tla chu it hen a hawng muh nawlh na, an itmu a suak ngâi dangâiah; a sâng duandân an theih loh.
- ⁴¹Chun, a hawng kal veithumnâk ah chun, an sinah, "Tuah lam chun it ule, a dîn u. A tâwk rawh! A tik chu a hawng tlung rawh! Zauhnik u, Minung Fapa hi misual tla kut ah an tlehtir awt hi.
- ⁴²Thawk ule, kan kal lai; zauhnik u, hawng ka tlehtirtu ding mi chu a hawng nâi rawh hi," a ti.
- ⁴³Chun, a sim liauah, Juda, leinîh tla lakah pakhat chu a hawng tleng sawm le, amah rual hen chun bâwlpu lal tla leh Dân sîntirtu tla leh upa tla sinah mi, mi zapi tla chu nâmsâu leh talhbo put hen an hawng tleng.

⁴⁴Chun, a tlehtirtu ding mi nih chun, "Ka châwchawk mi zawng chu amah chu asi lai; tleih ule, ṭha tak hen kalpi u," ti hen, singsiahnâk ding a simhkan zet na.

⁴⁵Chun, a tleng kê hen amah a va fûk sawm le, "Rabbi," ti hen, a châwchawk chiam.

⁴⁶Chun, anih chu a vuanh le, an tleih rawh.

⁴⁷Chun, a kiang ah dîr tla lakah mi âu nih mawh a nâmsâu a phâwi le, bâwlpu lalchem sal chu a tuk le, a nâ a themh piak phak.

⁴⁸Chun, Jisu nih annih tla chu a sawnh na le, an sinah, "Nâmsâu tla, talhbo tla put hen rawkmang tleih ding hâwi hen hawng ka tleih ding hen nan hawng suak mu?"

⁴⁹Pathian Biakin ah nisiar hen nan sinah ka um tâwn le, nan ka tleih lo mi. Sikhawmsele, Pathian lasui thu chu a hawng tlung khonâk ding hen asi hi," a ti.

⁵⁰Chun, an ektê hen amah chu an thlahthlamh le, an tek ver.

⁵¹Chun, tlangvâl âu nih mawh, puan mangṭhia cho aih hen amah chu a zûl le; chun anih chu an tleih le,

⁵²sikhawmsele, a puan mangṭhia chu a kaltâk le, taklâwng hen a tek rawh.

⁵³Chun, Jisu chu Bâwlpu Lalchem sinah an ruai le, chun amah rual hen chun bâwlpu lal tla, upa tla, Dân sîntirtu tla zawzawng an hawng a pûm.

⁵⁴Chun, Peter nih chun lâtpi thawk hen amah chu a zûl le, Bâwlpu Lalchem in kulhsung tualmâi tiang hen; chun vêngtu tla sinah mei aih hen a to bâk.

⁵⁵Chun, Jisu an thah khonâk ding hen bâwlpu lal tla leh lâirêltu tla zawzawng nih chun amah phiarnâk an hâwl le, an tawng lo.

⁵⁶Mi tamtak nih âwkrâwl hen an phiar le, sikhawmsele an phiarnâk thu chu â bang lo.

⁵⁷Chun, âu tla mawh an dîr le, âwkrâwl hen an phiar le,

58"Hi minung nih hin, 'Hi Pathian Biakin hi ka siat lai le, ni thum karah biakin dang, kut hen sak lo mi, ka sak lai, a ti, ti kan theih," an ti.

59Sikhawmsele, chu hâwi hen khawm chun an phiarnâk thu chu â bang kho lo.

60Chun, Bâwlpu Lalchem chu a lâi ah a dîr le, Jisu sinah, "Zeikhawm hen na sâng lo mu? Hi bang tla nih a nan phiarnâk hi ze zia me asi?" ti hen a deih.

61Anih lam chu a dâisip le, zeikhawm hen a sâng lo. Bâwlpu Lalchem nih chun a sinah, "Mesia Thawsuak Fapa chu na si ma?" ti hen a deih nawlh.

62Chun, Jisu nih, "Ka si; Minung Fapa hi thiltikhonâk vawrhlei ah to hen, vân sôm lakah a hawng mi nan muh awt asi," a ti.

63Chun, Bâwlpu Lalchem nih chun a nipuan tla a thlêk le, "Theihpitu dang ze me kan ngâi lai rih?

64Pathian a simsiat zia chu nan theih rawh le, zeitin nan ngaih?" a ti. Chun, an ektê hen anih chu thi tlâk asi ti hen an thlûk.

65Chun, a zeimaw mi nih chun chil an sah mâimî le, a mêl an tuam le, an sut le, a sinah, "Âu nih an vuak, sim rawh," an ti. Chun, vêngtu tla nih chun an tleih dîr le, thungâi thlâk hen an bengh.

66Chun, Peter chu tanglei in kulhsung tualmâi ah chun a um liauah Bâwlpu Lalchem zûlvêltu nungâk lakah pakhat a hawng kal le;

67Peter mei aih chu a hawng muh le, "Nang khawm hi Jisu Nazaret mi sinah um kha na si hi," a ti.

68Anih lam nih chun, "Na thusim chu ka theih lo thlo, a ngaihtawnh dân rêng khawm ka theih lo," ti hen, a pheh. Chun, intipûm ah chun a va suak le; chun âr a khuang rawh.

69Chun, nungâk nih chun a muh le, a kiangah dîr mi tla sinah chun, "Hi minung hi an sinah mi asi," a ti nawlh.

⁷⁰Sikhawmsele, a pheh nawlh. Chun, sâwtlotê nûnah a kiangah dîr mi tla nih chun, Peter sinah, "An lakah mi na si chammâm, Galili ram ah mi na si dangâiah," an ti.

⁷¹Anih lam nih chun, "Chu minung nan sim mi chu ka theih lo," ti hen, hawlh siat barh hen siat a sirh rawh.

⁷²Chun, ârkhuang veinihnâk chu a khuang sawm rawh. Chun, Peter nih chun Jisu nih a sinah, "Âr veinih a khuang lânah nangnih veithum na hawng ka pheh lai," a ti mi thu kha a theih nawlh rawh. Chun, chu chu a dawn le, a ÷ap rawh.

Mark 15

¹Chun, zînglei a hawng si kê hen bâwlpu lal tla chu upa tla leh Dân sîntirtu tla zawzawng hen anna thluk le, Jisu chu an phuar le, an ruai le, Pilat sinah an pêk sawm rawh.

²Chun, Pilat nih chun a sinah, "Juda tla Lalchem na si ma?" ti hen, a deih. Chun, anih nih chun a sinah, "Na sim hâwi hen ka si," ti hen, a sâng.

³Chun, bâwlpu lal tla nih chun kâng tamtak hen an phiar.

⁴Chun, Pilat nih a deih nawlh le, a sinah, "Zeikhawm na sâng lo mu? Ngâi rawh, an phiarnâk rîlmâl hi!" a ti.

⁵Jisu lam nih chun zeikhawm hen a sâng lo rawh le; chuvachun, Pilat nih thungâi chê a ti.

⁶Chun, Pilat nih chun Kût ni ah chun rêngtlâ pakhat an ngiar mi zawng chu a suah piak na tâwn:

⁷Chun, minung pakhat Baraba an ti mi chu hel tla lakah rêngin ah a tâng ko; chu tla nih chun helnâk ah chun mi an thah asi.

⁸Chun, mi zapi an va kal le, an rangah a ti piak na tâwn hâwi a ti ding hen an ngiar rawh.

⁹Chun, Pilat nih a sâng le, an sinah, "Juda tla Lalchem hi an suah piak na sele nan duh ma?" a ti.

- ¹⁰Bâwlpu lal tla nih nahsuahnâk ruangah an hawng ruai ti a theih dangâiah.
- ¹¹Sikhawmsele, bâwlpu lal tla nih chun mi zapi tla chu Baraba lam suah piak dauh ding hen an fawrh.
- ¹²Chun, Pilat nih chun an sinah, "Juda tla Lalchem nan ti mi hi zeitin ka ti lai rawh ne?" ti hen, a sâng nawlh.
- ¹³Chun, annih tla chu, "Kraws ah khenhbêk rawh," ti hen, an âu nawlh.
- ¹⁴Chun, Pilat nih chun an sinah, "Zeirangah? Zei me a sual," a ti. Sikhawmsele, annih tla chu, "Kraws ah khenhbêk rawh," ti hen an âu chiam.
- ¹⁵Chun, Pilat nih chun mi zapi lungâwitir a duh le, Baraba chu a suah piak na rawh. Chun, Jisu chu a vuak thluh rawh chun kraws ah khenhbêk ding hen a pêk rawh.
- ¹⁶Chun, kawrsen tla nih chun in kulhsung tualmâi Praitorion an ti mi ah chun amah chu an lûtpi le, an murui lakah mi zawzawng an pumh.
- ¹⁷Chun, puan senduk an aihtir le, ling lukhuh an phiar le, an khuhtir.
- ¹⁸Chun, "Chibai, Juda tla Lalchem!" ti hen, chibai an bûk rawh.
- ¹⁹Chun, a lû ah chun lâiluang hen an vuak le, chil an sah le, siksidîr hen chibai an bûk.
- ²⁰Chun, nihsuak siamnâk ah an mang thluh rawh chun puan senduk chu an lît le, amah puan an aihtir nawlh le, kraws ah khenhbêk ding hen an ruai rawh.
- ²¹Chun, mi velvâ pakhat, ram lei thawk hen khuapi lei a hawng mi, kawrsen tla nih chun Jisu kraws put ding hen an nawrh. (Simon hi Kurini ah mi Alekzandar leh Rufa pa asi.)
- ²²Chun, Jisu chu Golgotha an ti mi mun ah chun an ruai le, chu chu "Luruh mun," tinâk asi.
- ²³Chun, uain murreh hen chawmh mi an pêk le, sikhawmsele a duh lo.

²⁴Chun, kraws ah an khenhbêk le, anna ting ding chiau theihnâk ah chamchawh hen a nipuan tla chu anna ðhen.

²⁵Chun, Jisu an khenhbêk mi chu zîng dâr kuanâk asi.

²⁶Chun, a phiarnâk lasui a tlûn leiah an rîn le, "JUDA TLA LALCHEM," ti hen.

²⁷Chun, amah rual hen chun rawkmang panih an khenhbêk na bâk; a vawrhlei ah pakhat, a kehlei ah pakhat.

²⁸Pathian lasui thu, "Chun, anih chu misual tla ah ngaih asi rawh," ti mi chu a hawng tlungkim rawh.

²⁹Chun, mi anna vel mi kip nih an lû lei bû hen, "I hi! Nang Pathian Biakin siat hen ni thum ah sak nawlhtu, a damh le,

³⁰kraws ah mi kha hawng ðum me!" an ti.

³¹Chu hâwi ber hen bawlpu lal tla nih chun Dân sîntirtu tla hen anmah tla lakah amah zauhnawmh hen, 'Midang men a damh tâwn le, amah chu â damh kho lo.

³²Kan muh hen kan lung khonâk ding hen, Mesia, Israel Lalchem chu, tuhin kraws ah mi chu hawng ðum se me," an ti. Chun, amah rual hen an khenhbêk na mi tla nih chun anih chu an fâi.

³³Chun, sîn dâr leinihnâk liau chirah chun sînnilei dâr thum tiang hen laikulh a hawng thim ver.

³⁴Chun, sînnilei dâr thumnâk ah chun aw-hâu fâk tak hen, "Eloi, Eloi, lema sabakthani?" ti hen, a âu le, chu chu, "Ka Pathian, ka Pathian, zeirangah na ka kaltâk?" tinâk asi.

³⁵Chun, a kiangah dîr mi zeimaw mi tla nih chun chu chu an theih rawh chun, "Ngâinik u, Elija a kawh asi," an ti.

³⁶Chun, mi pakhat a tek le, sponge uain thur ah khat phak chiah hen lâiluang fung pâr ah a târ le, a dintir. "Um ko seh, amah lâk ding hen Elija a hawng mawh kan zauh lai," a ti.

³⁷Chun, Jisu chu hâu fâk tak hen a âu le, a nûkrî a chat rawh.

³⁸Chun, Pathian Biakin puanzâr chu a tlûnlei thawk hen a tanglei tiang hen suak dak hen â thlêk rawh.

³⁹Chun, a mâilei zâwn kraws kiangah kawrsen zâ hotu dîr mi nih chun chu hâwi Jisu thih dân a muh rawh chun, "Hi minung hi Pathian Fapa asi tatak asi," a ti.

⁴⁰Chun, nunau tla khawm nih lâk tak thawk hen an chuanh le; chubang tla lakah chun Mari Magdala mi, Jemtê leh Josef nu Mari leh Salomi tla anna tel.

⁴¹Chu tla chu Galili ram ah a um liauah amah zûl hen a rianṭuan piak tâwntu tla chu an si. Nunau dang tamtak Jerusalem ah amah rual hen kal mi tla chu anna tel bâk.

⁴²Chun, zânleibâi a hawng si rawh chun Timhtuah ni asi ruangah, chu chu Dinhni lânah mi ni hi asi.

⁴³Josef Arimathai khua mi, lâirêltu zahkâi tak, Pathian Ram lungum bâk mi, a hawng le, râltḥa tak hen Pilat sinah a lût le, Jisu ruak chu a deih rawh.

⁴⁴Chun, Pilat nih chu hâwi hen Jisu a thih tuan chu thungâi chê a ti. Chun, kawrsen zâ hotu chu a kawh le, a thihnâk a sâwt rawh ma ti a deih.

⁴⁵Chun, kawrsen zâ hotu kâ ah a theih rawh chun a ruak chu Josef sinah a pêk.

⁴⁶Chun, anih nih chun puan mangṭhia a châwk le, amah chu a lâk le, puan mangṭhia hen chun a tuam le, thlân lung hawrh mi lakah a vûi le, thlân kawtkâ ah chun lungphêngpi rilh hen a khâr.

⁴⁷Chun, Mari Magdala mi leh Josef nu Mari nih chun an vûinâk chu an muh.

Mark 16

¹Chun, Dinhni chu a hawng lanh rawh chun, Mari Magdala mi, Jem nu Mari leh Salomi tla nih chun Jisu taksa chulh ding hen an va kal khonâk ding hen zeilo rimthâw an châwk.

²Chun, ni sarikh ni masachem ah, zîngtê ah, nî suak nûnah thlân chu an va tleng.

- ³Chun, Thlân kawtkâ ah mi lung chu âu nih me a kan rilh piak ving lai aw?"
- ⁴anna ti liau chirah an va chuanh le, lung chu rilh chia hen an muh le, lung chu a lian thlo asi.
- ⁵Chun, thlân lungah an lût le, tlangvâl pakhat puan vâv aih mi, vawrhlei kângah to an muh le; an lawksawng rawh.
- ⁶Chun, anih nih chun, an sinah, 'Lawksawng lah u; Jisu Nazaret mi, an khenhbêk mi kha nan hâwl asi; a thawknawlh rawh; hinah a um lo rawh, zauhnik u, an vûinâk hi!
- ⁷Sikhawmsele kal ule, a thiruai tla leh Peter sinah chun, 'Galili ram ah nanmah lânah a kal awt; nan sinah a sim hâwitê khan chunah chun nan muh lai,' ti hen, simh na u," a ti.
- ⁸Chun, an thir le, chê an ti ruangah an suak le, thlân thawk hen chun an tek chiam le; an thir ruangah âu sinah khawm zeikhawm an sim lo.
- ⁹[Nunau tla chu Peter leh a hâwi tla sinah an kal le, thâwngthang an sinah simh hen a um mi zawzawng chu a tâwikâng hen an simh na.
- ¹⁰Chu nehnûnah, Jisu ngelchel nih suahlei thawk hen tlâklei ah a thiruai tla chu zungzâl ruangsuhnâk thu thenhlimh leh nung chu phuang ding hen a fial na.]
- ¹¹Sikhawmsele, annih nih chun, a nung nawlh le, muh khawm a muh ti an theih ko na hen an lung lo.
- ¹²Chun, chu mi nûnah chun an lakah mi panih ram lei fûk hen an kal liauah mêl dang put hen an sinah â langh.
- ¹³Chun, annih nih chun thiruai dang tla an va simh le, annih khawm chu an lung lêm lo.
- ¹⁴Chun, chu nûn khawmah chun, buh an dûm liauah leikhat tla sinah tak â langh le, a thawknawlh nûnah a muhtu tla thu chu an lung lo ruangah leh an thinlung chang leikâng thu ah a fâi na rawh.

- ¹⁵Chun, an sinah, "Laikulh zawzawng ah kal ule, thilsiam zawzawng sinah chun Thâwngthâng Ṭha hi sim u.
- ¹⁶A lung hen baptis hen a um mi chu ruangsuaak hen a um lai le, a lunglotu lam chu mawh hen a um lai.
- ¹⁷Chun, hi bang singsiahnâk tla nih hin lungtu chu a zûl vima lai: Ka min hen khuri tla an nâr lai le, hawlh thar hen an hawlh lai le;
- ¹⁸rûl tla kut hen an lâk lai le, thihnâk tûr zei tal din khawmsele zeikhawm a pawl lai lo. Damlo tla tlûnah an kut an thâng lai le, an dam vima lai," a ti.
- ¹⁹Chuvachun, Lalpa Jisu chu an sinah thu a sim thluh rawh chun vân leiah lâk hen a um le, Pathian vawrhlei ah a to rawh.
- ²⁰Chun, annih chu an suak le, ram kipah thu an sim rawh le, Lalpa nih anmah tla a ṭuanpi na le; a zûltu singsiahnâk tla hen thu chu a birhtir vima.]



Luk

Luk 1

- ¹Theophil duhtak: Mi tamtak nih kan lakah thil a hawng tlung mi tla thâwnghâng rîn an tum rawh le;
- ²a tîr thawk hen muhtu tla leh thu rianțuantu tla nih kanmah hawng kan simh hâwi khan an rîn asi.
- ³Churuarangah a bul thawk hen zeizawng rep tak hen ka zâwt le, a sang vima hen na rangah rîn sele a țha lai ka ti asi.
- ⁴A lânah thu an sîntir na mi kha dik tak asi ti na theih khonâk ding hen.
- ⁵Herod chu Judai ram lalchem asi liauah, Abijah murui ah mi a min Zekaria bâwlpu pakhat a um le; chu nih chun Aron thlâk lakah mi nupi ah a umpi le, a min chu Elizabet asi.
- ⁶An panih hen Pathian mitmuh ah rep tak hen an um le, simsâwi kawp lo hen Lalpa thupêk leh dân zâwzawng zâwt hen an um tâwn.
- ⁷Sikhawmsele, Elizabet a ching ruangah fa an nei lo le, an panih hen an upa thlo rawh.
- ⁸Chun, hi hâwi hi asi le, hâwi le ti dân hâwi vima hen Pathian mâika ah bâwlpu rian a țuan liauah,
- ⁹bâwlpu dân hâwi hen Lalpa Biakin ah a lût le, rimthâw a duah.
- ¹⁰Chun, rimthâw a duah liauah mi zapi nih an ektê hen lêng ah thla an cham.
- ¹¹Chun, Lalpa vânmifial pakhat rimthâw duahnâk mâichâm vawrhlei ah dîr hen a sinah â langh.
- ¹²Chun, Zekaria nih a muh kê hen a lawksawng le, țih khawm a țih.
- ¹³Sikhawmsele, vânmifial nih chun a sinah, "Zekaria, țih lah, Pathian nih na deih mi kha a theih asi, na nupi Elizabet nih fapa a nan ring piak lai, a min ah Johan na sak ding asi.

- ¹⁴Chun, nang na lâwptlo hen na lâwm lai le; amah a suak tikah mi cherkhet anna lâwm lai.
- ¹⁵Lalpa mitmuh hen milian asi lai le, uain leh zû rerêng a din lai loh, a suaknâk thawk hen Thlarau Thenhlimh hen a khat lai.
- ¹⁶Israel thlâk tla tamtak Lalpa an Pathian leiah a hawitir nawlh lai.
- ¹⁷Chun, pa le tla thinlung chu fa tla leiah hawitir ding hen leh mi thu ngâilo tla chu mi rep tak finghnâk leiah hawitir ding leh Lalpa rangah mi a tîm zet ding lebang ah timhtuah ding hen Elija thinlung leh a thiltikhonâk put hen Lalpa mâika ah a kal lai," a ti.
- ¹⁸Chun, Zekaria nih vânmifial sinah chun, "Chu chu zeitin ka theih lai? Kei tarpa ka si le, ka nupi khawm tarnu asi mi," a ti.
- ¹⁹Chun, vânmifial nih chun a sâng le, a sinah, "Gabriel, Pathian mâika ah dîr mi ka si le; a nan sawnh ding leh chubang thu ̣ha chu a nan simh ding hen fial ka si.
- ²⁰Ngâi rawh, ka thusim tla a tik takah a hawng tung ding mi na lunglo ruangah chubang thil chu a hawng tung lân lo chu na dâisip lai le, hawlh khawm na hawlh kho lai loh," a ti.
- ²¹Chun, mi zatlâng tla nih chun Zekaria chu an ngâk le, Pathian Biakin sungah a um sâwt ruangah chun thungâi chê an ti.
- ²²Chun, a suak rawh chun an sinah thu a sim kho lo. Chun, Biakin ah muhtirnâk a muh asi ti an theih le; chun, an sinah kut vai hen, hawlh kho lo hen a um ko rawh.
- ²³Chun, a rian̄tuannâk ni chu a lîm rawh chun in leiah a lâwi rawh.
- ²⁴Chun, chu nûnah chun a nupi Elizabet chu a rai le; chu thla nga kar chu â thup le,
- ²⁵"Mi sinah ka minsiat phenhnâk ding hen Lalpa nih a ka muh hen hi hâwi hen a ka ti piak rawh," a ti.

- ²⁶Chun, a thla ruknâk ah chun Pathian nih vânmifial Gabriel chu Galili ram ah khua pakhat Nazaret an ti mi ah chun,
- ²⁷nungâk thenhlimh pakhat sinah a fial le, chu nungâk chu David thlâk ah mi a min, Josef nupi ham asi: nungâk min chu Mari asi.
- ²⁸Chun, vânmifial chu a sinah a lût le, "Chibai, sunhsak bîk, Lalpa na sinah a um," a ti.
- ²⁹Chun, chu thusim ruangah chun thungâi a lawksawng le, "Zeitin zia hen chibai hawng ka bûk mi me si lai?" ti hen, a dawnruat.
- ³⁰Chun, vânmifial nih chun a sinah, "Mari, òh lah; Pathian sunhsaknâk na tawng.
- ³¹Ngâinik, na rôi lai le, fapa na ring lai le, a min ah chun Jisu na sak ding asi.
- ³²Anih chu milian asi lai le, Chungnungchem Fapa an ti lai. Lalpa Pathian nih a sinah a thlâktu David laltophah chu a pêk lai.
- ³³Jakob thlâk tla tlûnah zungzâl hen a lal lai le, a ram nih dawng ni a nei lai loh," a ti.
- ³⁴Chun, Mari nih vânmifial sinah chun, 'Chubang chu zeitin asi lai, pasal ka neilo mi?" a ti.
- ³⁵Chun, vânmifial nih chun a sinah, "Thlarau Thenhlimh na tlûnah a hawng tlung lai le, Chungnungchem thiltikhonâk nih a nan huhphenh lai. Churuangah mi thenhlimh hawng suak ding mi khawm chu Pathian Fapa an ti lai.
- ³⁶Chun, ngâinik, na unau nu Elizabet khawm nih a tar nûnah mipa a pâwi rawh; a ching an ti tâwn mi kha, tu thla hi a thla ruknâk asi rawh.
- ³⁷Pathian thu suak rerêng thil tikho lo hen a um lai loh," a ti.
- ³⁸Chun, Mari nih, "Ngâinik, Lalpa to-awnu ka si, na thu hâwi vima hen ka tlûnah tlung seh," a ti. Chun, vânmifial nih chun a kaltâk rawh.
- ³⁹Chu liau chun Mari chu a thawk le, tlâng ram ah, Judai ram ah khua pakhat ah chun a kal sawm le,

- ⁴⁰chun, Zekaria in ah a lût le, Elizabet chibai a bûk.
- ⁴¹Chun, hi hâwi hi asi le, Elizabet nih Mari chibai bûk chu a theih kê hen a paw sungah mi nautê chu a châng le, chun Elizabet chu Thlarau Thenhlimh hen a khat rawh.
- ⁴²Chun, hâu fâkpi hen a âu le, "Nang chu nunau lakah thawsuak na si, na sungah suak ding mi khawm a thaw a suak asi.
- ⁴³Ka Lalpa nu ka sinah na hawng kal hi zei zia me si le?
- ⁴⁴Ngâinik, na chibai bûk hâu ka nâ ah a lût kê hen â lâwm ruangah nautê ka paw sungah a châng asi.
- ⁴⁵A lungtu nu khawm a thaw a suak asi, a sinah Lalpa nih thu a sim mi kha a hawng tlung awt dangâiah," a ti.
- ⁴⁶Chun, Mari nih, "Ka thinlung nih Lalpa a chawnglawmh,
- ⁴⁷ka thlarau khawm ruang hawng ka suahtu Pathian ah â lâwm.
- ⁴⁸A to-awnu phun nâu zia a muh le, a zângfah ruangah. Tu thawk hen mi zawzawng nih na dingchang an ka ti awt asi.
- ⁴⁹Pathian chak nih khan ka tlûnah thil rokual tak tla hawng ka ti piak ruangah. A min khawm â thenhlimh asi.
- ⁵⁰A ãhtu tla chu san nûnah san nawlh tiang hen, khua a ruat vima tâwn.
- ⁵¹A bân hen a tha chak zia a zauhtir le, an thinlung dawnruatnâk tla ah anna zûm mi tla chu a ãhtau phin.
- ⁵²An laltophah thawk hen lal tla chu a thlâk na le, nautâ tla chu a sangh na rawh.
- ⁵³Sungvâng tla chu thil ãha tla hen a khawptir na, minei tla chu kut karo hen a kaltir na.
- ⁵⁴Kan thlâktu sinah a sim hâwi khan, Abraham leh a thlâk tla chu zungzâl hen khua a ruat ding zia theihkumzanâk ding hen, a to-aw Israel tla chu a tangpi rawh," a ti.

- ⁵⁶Chun, Mari chu thla thum a sinah a um le, chun a in leiah a tung nawlh.
- ⁵⁷Chun, Elizabet fa ring chu a nikhua rawh le, chun fapa a ring.
- ⁵⁸Chun, a zâwlbâwm tla leh a rualsia tla nih chun Lalpa nih thungâi khua a ruat ti an theih le, an lawmphi.
- ⁵⁹Chun, hi hâwi hi asi le, a ni riat ni ah chun nausêm fêmtan ding hen an hawng kal le; a min ah a pa min lîlâ Zekaria ber sak an tum.
- ⁶⁰Chun, a nu nih, "Silo, anih chu Johan sak ding asi," a ti le, a sâng.
- ⁶¹Chun, annih nih chun a sinah, "Na rualsia lakah hi min put hi âukhawm an um lo," an ti.
- ⁶²Chun, a pa sinah chun kut vai hen, "A min ah zeï me na duh?" an ti.
- ⁶³Chun, lasui rînnâk tlêp a deih le, "A min chu Johan asi," ti hen a rîn. Chun, an ektê hen chê an ti ngâi.
- ⁶⁴Chun, zeikarlo ah Zekaria chu a hawng hawlh le, Pathian sawr â dawmh rawh.
- ⁶⁵Chun, an kiangkam ah um mi tla zawzawng nih chun an ùih rawh. Chun, chubang thu chu Judai tâng ram zawzawng ah a thang ver rawh.
- ⁶⁶Chun, a theih tu zawng nih an thinlung ah an kil le, "Chu nausêm chu zeitin dek um lai chu aw! " an ti; Lalpa kut nih amah a ùangpi dangâiah.
- ⁶⁷Chun, a pa Zekaria chu Thlarau Thenhlimh hen a khat le, a simkanh le:
- ⁶⁸"Lalpa, Israel Pathian chu sawr hen um seh! A mi tla chu a veh le, tlanhnâk a siam piak na.
- ⁶⁹A to-aw David dâwngsung tla lakah chun, Ruangsuahtu chak hawng kan dirh piak dangâiah.
- ⁷⁰A lânah thawk hen khuavâng thenhlimh tla kê ah a sim hâwi khan.
- ⁷¹Kan leido tla leh hawng kan huatu tla zawzawng lakah ruang hawng kan suah ding hen a tiamh.

⁷²Kan thlâktu tla khuaruatnâk ding leh a thudântuk thenhlimh theihkumzanâk ding hen;

⁷³kan thlâktu Abraham sinah siat a sirh kha,

⁷⁴kan leido tla lakah hawng kan hum lai le,

⁷⁵kan dam sung zawng a mitmuh ah thenhlimh leh rep tak a um hen, lâu lo hen a rian hawng kan ÷uantir.

⁷⁶Asi, ka fa, nang hi Chungnungchem khuavâng a nan ti lai. Lampi tla siam ding hen Lalpa mâika ah na kal awt dangâiah.

⁷⁷Kan Pathian thinlung ah a khuaruatnâk ruangah, an sual tla ngaihdamnâk ding hen a minung tla sinah ruangsuaahnâk thu theihtir ding hen; Churuang chun tlûnlei thawk hen ni suak nih hawng kan cherh lai.

⁷⁹Mûi nâwngah leh thihnâk dâidul ah to tla cherh ding hen leh lungngamnâk Lampi ah kan kê kârtir ding hen," a ti.

⁸⁰Chun, nausêm chu a hawng thang vima le, a thinlung lei a hawng bir dadauh le, Israel tla sinah a hawng a langh lân lo chu ramkaro ah a um ko.

Luk 2

¹Chun, chu liau chun hi hâwi hi asi le; Kaisar Awgasta nih laikulh zawzawng min rîn ding thu a pêk.

²Chu chu Siria ram ah Kurini chu governor asi liauah min rîn masachem chu asi.

³Chun, mi zawzawng chu an min rîn ding hen anmah khuapi chiau ah an kal.

⁴Chun, Josef khawm David dâwngsung tla leh a thlâk asi ruangah Galili ram ah Nazaret khua thawk hen,

⁵Mari, a nupi ham rai chawp tung hen min rîn ding hen Judai ram ah David khua Bethlehem an ti mi ah chun an kal rawh.

⁶Chun, Bethlehem ah an um liauah a fa ring chu a hun rawh.



- ⁷Chun, a fa tîr ah mipa a ring le; chun puan hen an tuam le, khual tlungnâk in ah mun a um lo ruangah ran râwl pêknâk khêng ah an ittir.
- ⁸Chun, chu ram ber ah chun dawrâ vêngtu tla an um le, zân ah dawrâ tla an vêng le, mâng ah an riak nawh.
- ⁹Chun, Lalpa vânmifial pakhat an kiangah a hawng dîr le, Lalpa rokualnâk nih an kiang chu a hawng cherh le; chun thungâi an tîh.
- ¹⁰Chun, vânmifial nih chun an sinah, "Tîh lah ule, ngâi u, mikip tâ ding thâwngthâng tha lawmh thanuam kâi tak ka nan thanh na.
- ¹¹Tusûn ah hin nan rangah David khua ah Ruangsuahthu, Sariak Thuh chu a suak rawh.
- ¹²Chun, hi hi nan rangah singsiahnâk ding asi: Nausêm puan hen tuam, ran râwl pêknâk khêng ah it mi nan muh lai," a ti.
- ¹³Chun, lâkkhatko ah vânmifial sinah chun vânmifial minung tla zapi an hawng um chiam le, Pathian an sawr le:
- ¹⁴"Chungnungchem ah Pathian rokual tak hen um seh. Tual tlûnah a lawmh ngâi mi minung tla sinah remnâk lêng seh," an ti.
- ¹⁵Chun, hi hâwi hi asi le, vânmifial tla nih vânmifial ah an kaltâk na kâ hen dawrâ vêngtu tla nih chun, "Tuah Bethlehem tiang hen kal sele, Lalpa nih thu hawng kan theihtir mi a hawng tlung mi chu kan zauh lai," an ti.
- ¹⁶Chun, an kal rereh le, chun Mari leh Josef leh nausêm ran râwl pêknâk khêng ah it mi chu an muh.
- ¹⁷Chun, an va muh rawh chun nausêm thâwngthâng vânmifial nih a sim mi kha an theihtir na.
- ¹⁸Chun, a theihthu zawng nih dawrâ vêngtu tla thusim chu thungâi chê an ti.
- ¹⁹Mari lam nih chun thusim zawzawng chu a thinlung ah a dawn le, a kil ko.
- ²⁰Chun, dawrâ vêngtu tla nih chun vânmifial sim hâwitê hen zeizawng an muh le, an theih ruangah Pathian chawnglawmh leh sawr bû vima hen an kîr nawlh rawh.

- ²¹Chun, a fêmtannâk ding ni riat a hawng tling rawh chun â sêm lânah vânmifial nih a sak chia, Jisu an sak rawh.
- ²²Chun, Mosi Dân hâwi hen anna thianh ni a tlung rawh chun anih chu,
- ²³(Lalpa Dân thu ah, "Mipa fa, fa tîr vial chu Lalpa rangah ruat an ti lai," ti rîn hâwi khan) Lalpa sinah ap ding hen leh
- ²⁴Lalpa Dân thu ah, "Vaṭhu bawp khat mawh lâilêng suan panih mawh bâwlnâk ah pêk ding," ti rîn hâwi khan, Jerusalem ah an kalpi.
- ²⁵Chun, Jerusalem ah chun minung pakhat a min Simeon a um. Chu minung chu mi rep tak leh Pathian sunhsak mi tak asi le; Israel tla thlangamhtu ding mi chu a ngâk kumza le, a tlûnah Thlarau Thenhlimh a um.
- ²⁶Chun, Lalpa Mesia chu a muh lân lo chu a thi lai loh ti Thlarau Thenhlimh nih a theihtir chia rawh.
- ²⁷Chun, Thlarau theihtir hen Pathian Biakin ah chun a va lût le; nausêm Jisu chu a nu leh a pa nih Dân hâwi hen a tlûnah ti piak ding hen an hawngpi liauah chun,
- ²⁸anah chu a kuah le, Pathian a sawr le:
- ²⁹"Lalpa, tuah na thu ziatê hen, na to-aw hi lungngam tak hen na kaltir awt le,
- ³⁰na ruangsuaahnâk mikip muh ah na siam mi kha ka mit nih a muh rawh.
- ³²Phundang tla sinah langhtirnâk chêu leh na mi Israel tla rokualnâk ding chu," a ti.
- ³³Chun, nausêm thu a sim mi chu a nu leh a pa nih chun thungâi chê an ti.
- ³⁴Chun, Simeon nih mal a sâwm na le, a nu Mari sinah, "Hi ngâksia hi Israel tla lakah mi tamtak tlûktir ding leh thawktir ding hen ruat asi; chun duhlo mi chu asi ti singsiahnâk ding chu asi;
- ³⁵mi tamtak thinlung tla dawnruatnâk tla chu a lang khonâk ding hen. Asi, nang thinlung khawm nâmsâu nih tlang dak hen a sunh lai," a ti.

³⁶Chun, mi pakhat, a min Anni khuavângnu, Phanuel fanu, Aser phun ah mi a um le; anih chu tar tak asi le, kum sarìh kar chu pasal nei hen a um le,

³⁷chun, chu nûnah kum sâwmriat leh kum li asi tiang â mei. Anih nih chun Pathian Biakin kaltâk lo hen a sîn a zân a buh ngei leh thlacham hen Pathian a sawnh tâwn.

³⁸Chun, chu liau takah chun anih chu a hawng kal le, Pathian sinah lâwmthu a sim le, Jerusalem tlanhnâk lungumtu zawng sinah chun Jisu thâwngthâng a sim.

³⁹Chun, Lalpa Dân hâwi vima hen thil zawzawng an ti rawh chun Galili ram ah anmah khua Nazaret ah chun an tlung nawlh rawh.

⁴⁰Chun, nausêm chu a ðhang vima le, a hawng chak dadauh le, finghnâk hen a khat le, Pathian zângfahnâk a tlûnah a um.

⁴¹Chun, kum siar hen Kût tikah chun a nu leh a pa chu Jerusalem ah an kal tâwn.

⁴²Chun, Jisu chu kum leinih asi liauah kût dân hâwi hen an va kal.

⁴³Chun, an òiak le, an tlung liauah ngâksia Jisu nih chun a umtâk na le, a nu leh a pa nih chun an theih lo.

⁴⁴Chuvachun, an murui tla sinah a um mawh an ti le, ni khat lam an kal le, an rualsia tla leh an mêltheih tla lakah an hâwl.

⁴⁵Chun, an tawng lo ruangah hâwl bû vima hen Jerusalem ah an kîr nawlh rawh.

⁴⁶Chun, hi hâwi hi asi le, ni thum nûnah chun Pathian Biakin ah sîntirtu tla sinah to hen, an thu ngâi hen leh deih na hen an tawng.

⁴⁷Chun, a thu theihthu zawng nih chun a theih zia leh a sâng zia chu thungâi chê an ti.

⁴⁸Chun, a nu leh a pa nih chun amah an muh rawh chun thungâi chê an ti le; chun a nu nih a sinah, "Ka fa, zeirangah tihin na hawng kan ti? Na pa leh kei nih thlakâm tak hen kan nan hâwl asi," a ti.

⁴⁹Chun, anih nih chun an sinah, "Zeirangah nan ka hâwl? Ka Pa in ah ka um ding asi ti nan theih lo mazei?" a ti.

⁵⁰Chun, an sinah a thusim chu a ngaihtawnh dân an theih lo.

⁵¹Chun, an sinah a kal le, Nazaret chu an va tleng le, an thu zâwt hen a um. Chun, a nu nih chun chubang thil zawzawng chu a thinlung ah a kil ko.

⁵²Chun, Jisu chu a fîng dadauh le, a lian dadauh le, Pathian leh minung sunhsâk hen a um vima.

Luk 3

¹Chun, Tiberia Kaisar a lal kum, kum leinga nâk ah Pontia Pilat chu Judai ram governor asi le, Herod chu Galili ram lal asi, a unau Philip chu Ituria leh Trakoniti ram lal asi le, Lusania chu Abilen ram lal asi le,

²chun Ana leh Kaiapha chu Bâwlpu Lalchem an si. Chu liau chun ramkaro ah Zekaria fapa Johan sinah chun Pathian thu a hawng tlung.

³Chun, anih chu Jordan Va kiangkam ram kipah a kal le, thilsual ti ngaihdamnâk ding hen rimnâk baptisma thu a sim vima.

⁴Khuavâng Isai lasuibu ah: "Ramkaro ah mi âu hâu nih chun, 'Lalpa lampi sial ule, a lam tla dîngtir u.

⁵Hawr kip silh asi ver lai le, tlâng leh mual kip niamh asi lai. Lampi ngâwi tla a hawng ding lai le, Chun lam rual lo tla a rual lai.

⁶Chun, mi zawzawng nih Pathian ruangsuaahnâk chu an tawng lai' ati," ti hen, rîn hâwi khan.

⁷Chun, anih nih chun baptis ding hen a sinah mi zapi hawng kal mi tla sinah chun, "Rûl thlâk tla!" "Thinrunhnâk hawng tlung ding mi hi tektâk ding hen âu nih nun an simh na?

⁸Nan umdân hen nan rim tatak ti zauhtir u; chun nan lakah, Abraham chu kan pa asi,' ti lah u; Pathian nih hi bang lung tla hi Abraham thlâk ah a dirh kho, ka nan ti na hi.



⁹Tu khawmah reitlung thing phûr kipah an siah rawh; chuvachun, thing kip rah tha hen rah lo mi vial an hâu le, mei ah an paih tâwn," a ti.

¹⁰Chun, mi zapi nih chun a sinah, "Zei me kan ti ding ne?" an ti le, an deih.

¹¹Chun, anih nih chun an sinah, "Âuzawng kawrdawh panih nei nih chun a nei lo mi sinah pêk seh; âuzawng ei ding nei mi nih chun chu hâwi ber hen ti seh," a ti le, a sâng.

¹²Chun, siah khawlhtu tla khawm baptis ding hen an hawng kal le, a sinah, "Sîntirtu, zeि me kan ti ding?" an ti.

¹³Chun, anih nih chun an sinah, "An rêl piak na mi nûnlêm chu va hauh lah u," a ti.

¹⁴Chun, kawrsen tla khawm nih a sinah, "Kannah khawm nih zeि me kan ti ding?" an ti le, an deih. Chun, anih nih chun an sinah, "Âukhawm nehsawh hen va phiar lah u; nan lawh tâwk ah lungâwi u," a ti.

¹⁵Chun, mi nih an lungum le, mi zawzawng nih Johan thu an thinlung ah, "Mesia asi lai dahmawh?" ti hen, an dawn liauah,

¹⁶Johan nih chun a sâng le, an ektê sinah, "Kei nih chun tî hen ka nan baptis na tâwn le; sikhawmsele, keimah ngâk hen mi rokual a hawng kal awt, a pheikawk rî sût tlâk khawm ka si lo; anih nih chun Thlarau Thenhlimh leh mei hen a nan baptis na lai.

¹⁷A kut hen a ळawlâwn a put lai le, a chîlnâk mun thiàng rel a zâp lai, a pang ah fâng a râwn lai; a hî lam chu mei mit kho lo hen a duah phin lai," a ti.

¹⁸Chun, fawrhânâk thu dang tamtak hen mi tla sinah Thâwngthâng T̄ha a sim tâwn.

¹⁹Sikhawmsele, lal Herod chu a unaupa nupi Herodi thu ah leh a thilsual ti zawzawng thu ah chun Johan nih a simhfâi ruangah

²⁰a thilsual ti zawzawng sap singsuan hen anih chu rêngin ah a khumh rawh.

²¹Chun, hi hâwi hi asi le, mi zawzawng nih baptis an si thluh rawh chun Jisu khawm baptis asi le, chun thla a cham liauah vâw â awng le,

²²chun Thlarau Thenhlimh chu taksa put hen vaṭhu hâwi hen a hawng ṭum le, a tlûnah a fû. Vên thawk hen aw a hawng suak le, "Nang ka Fapa duhtak na si, na tlûnah thungâi ka lâwm," a ti.

²³Chun, Jisu nih a rianṭuan a dawmh liau khan amah chu kum sâwmthum ding asi rawh; mi ngaih chun Josef fapa asi le, chu chu Heli fa asi,

²⁴Chu chu Mathat fa asi le, chu chu Levi fa asi le, chu chu Melki fa asi le, chu chu Janai fa asi le, chu chu Josef fa asi,

²⁵chu chu Matathia fa asi le, chu chu Amos fa asi le, chu chu Nahum fa asi le, chu chu Esli fa asi le, chu chu Nagai fa asi le,

²⁶Chu chu Maat fa asi le, chu chu Matathia fa asi le, chu chu Semein fa asi le, chu chu Josek fa asi le, chu chu Joda fa asi le,

²⁷Chu chu Joanan fa asi le, chu chu Resa fa asi le, chu chu Zerubabel fa asi le, chu chu Sialtiel fa asi le, chu chu Neri fa asi le,

²⁸Chu chu Melki fa asi le, chu chu Adi fa asi le, chu chu Kosam fa asi le, chu chu Elmadam fa asi le, chu chu Er fa asi le,

²⁹chu chu Josua fa asi le, chu chu Eliezar fa asi le, chu chu Jorim fa asi le, chu chu Mathat fa asi le, chu chu Levi fa asi le,

³⁰chu chu Simeon fa asi le, chu chu Juda fa asi le, chu chu Josef fa asi le, chu chu Jonam fa asi le, chu chu Eliakim fa asi le,

³¹Chu chu Melia fa asi le, chu chu Mena fa asi le, chu chu Matatha fa asi le, chu chu Nathan fa asi le, chu chu David fa asi le,

³²chu chu Jese fa asi le, chu chu Obed fa asi le, chu chu Boaz fa asi le, chu chu Salmon fa asi le, chu chu Nason fa asi le,

³³chu chu Aminadab fa asi le, chu chu Admin fa asi le, chu chu Ami fa asi le, chu chu Hezron fa asi le, chu chu Perez fa asi le, chu chu Juda fa asi le,

³⁴chu chu Jakob fa asi le, chu chu Isak fa asi le, chu chu Abraham fa asi le, chu chu Terah fa asi le, chu chu Nahor fa asi le,

³⁵chu chu Seruk fa asi le, chu chu Reu fa asi le, chu chu Pelek fa asi le, chu chu Eber fa asi le, chu chu Selah fa asi le,

³⁶chu chu Kainan fa asi le, chu chu Arpaksad fa asi le, chu chu Sem fa asi le, chu chu Noa fa asi le, chu chu Lamek fa asi le,

³⁷chu chu Methusel fa asi le, chu chu Enok fa asi le, chu chu Jared fa asi le, chu chu Mahalalel fa asi le, chu chu Kenan fa asi le,

³⁸Chu chu Enos fa asi le, chu chu Seth fa asi le, chu chu Adam fa asi le, chu chu Pathan fa asi.

Luk 4

¹Chun, Jisu chu Thlarau Thenhlimh hen a khat le, Jordan Va thawk hen a kîr nawlh rawh.

²Diabol lêm bû hen ramkaro ah ni sâwmli Thlarau kalpi hen a um. Chun, chu ni kar chun zeikhawm a ei lo; chun a dawngnâk ah chun a sung a vâng rawh.

³Chun, Diabol nih chun a sinah, "Pathian Fapa na si chun hi lung hi sang ah chang ding hen thu pêk rawh," a ti.

⁴Chun, Jisu nih a sinah, "Minung hi sang cho hen an nung lai loh, ti rîn asi," a ti le, a sâng.

⁵Chun, a kâipi le, zeikarlo ah laikulh ram zawzawng a zauhtir.

⁶Chun, Diabol nih chun a sinah, "Hi bang zawzawng tlûnah thuneihnâk leh rokualnâk hi ka nan pêk lai; ka sinah pêk asi rawh dangâiah, ka duh mi sinah zawng ka pêk tâwn asi.

⁷Chuvachun, mâi hawng ka mûk le, a ektê hen na tâ ver asi lai," a ti.

⁸Chun, Jisu nih a sinah, "Lalpa na Pathian mâimûk le, amah rian cho ÷uan rawh, ti rîn asi," a ti le, a sâng.

⁹Chun, Diabol nih chun Jerusalem ah a kalpi le, Pathian Biakin tlûn zum ah chun a siah le, chun a sinah, "Pathian Fapa na si chun a khâwk rawh;



¹⁰Nangmah an hum ding hen nang lakah chun a vânmifial tla thu a pêk lai,' ¹¹Chun an kut hen an nan dawmh lai le, chu lo chun na kê hen lung na suih sual lebang lai,' ti rîn asi ruangah," a ti.

¹²Chun, Jisu nih a sinah, "Lalpa na Pathian niksak dêl lah, ti asi," ti hen, a sâng.

¹³Chun, Diabol nih lêmnâk zât kip hen a lêm thluh nûnah chun â dêngkhâwng tik zawng rangah a kaltâk rawh.

¹⁴Chun, Jisu chu Thlarau thiltikhonâk put hen Galili ram ah a kîr le; chun a thâwngthâng chu, chu ram kiangkam kipah a thang rawh.

¹⁵Chun, anna pumhnâk in tla ah a sîntir vima na le, mi zawzawng sawr hen a um.

¹⁶Chun, a thangliannâk Nazaret chu a va tlung le; chun Dinhni ah a ti dân kumza hâwi hen pumhnâk in ah a lût le, rêl ding hen a dîr.

¹⁷Chun, khuavâng Isai lasuibu chu a sinah an pêk. Chun, lasuibuzual chu a samh le, hi thurînnâk hi a tawng le;

¹⁸"Riangvâi tla sinah Thâwngthang Tha sim ding hen sariak hawng ka thuh ruangah Lalpa Thlarau chu ka tûnah a um. Anih nih chun sal tla sinah suahnâk thu leh mitchâw tla sinah mitdei nawlhnâk thu sim ding hen, nehsawh tuar tla suaktirnâk ding tla

¹⁹Lalpa lungâwi kum thu sim ding hen hawng ka fial asi," ti hi.

²⁰Chun, lasuibu chu a zual le, kilkâwitu sinah a pêk nawlh le, a to rawh. Chun, pumhnâk in ah mi zawzawng mit chu amah lakah a um.

²¹Chun, an sinah, "Hi Pathian lasui thu hi tusûn ah hin nan nâ theih ah a hawng tlung rawh," ti hen sim a dawmh rawh.

²²Chun, an ektê hen amah an sawr le, a hawlhkâ suak zângfah thu tla thungâi chê an ti. Chun, "Hi minung hi Josef fapa asi lo mazei?" an ti.

²³Chun, anih nih chun an sinah, "Nannih nih hi tahthimh thu hi 'Daktawr, nangmah a damh rawh,' Kapernaum ah na thilti kan theih mi zawzawng kha

hinah nangmah khua leiah khawm hin ti bâk,' ti hen, nan ka ti ngelchel awt hi," a ti.

²⁴Chun, anih nih, "Thungâi tak hen ka nan simh na, khuavâng âukhawm mah khua leiah mi nih an lawmh dah lo.

²⁵"Chuvachun, dik tak hen ka nan ti na, Elija a dam liauah khan kum thum leh thla ruk vâh a pit le, laikulh ah pâmپی a hawng tlung liauah khan Israel ram ah numei tamtak an um le,

²⁶sikhawmsele an lakah âu sin khawmah Elija fial asi lo le, Sidon ram leiah Zarephat khua ah nunau pakhat numei sinah cho fial asi kha.

²⁷Chun, khuavâng Isai dam liau khawm khan Israel ram ah phâr tamtak an um le; sikhawmsele, an lakah âukhawm thenhlimhtir hen an um lo, Naaman Siria ram ah mi cho thenhlimhtir hen a um dauh kha," a ti.

²⁸Chun, pumhnâk in ah mi zawzawng nih chubang thu chu an theih kê hen thungâi an thinthawk le,

²⁹an thawk le, khua lênglei ah an suah le, lawnh ding hen an khua umnâk kham pâng ah an kalpi rawh.

³⁰Sikhawmsele, anih chu an karah a lan le, a kal vima.

³¹Chun, Galili ram ah khua pakhat Kapernaum ah chun a kal rawh. Chun, Dinhni ah mi tla a sîntir le;

³²chun thu nei tak hen a sim ruangah a thu sîntir chu thungâi chē an ti.

³³Chun, pumhnâk in ah chun khuri nâwmtâm thlarau vuanh mi a um le; anih chu hâu fâk tak hen,

³⁴"A! Nazaret Jisu, kannih leh nang zeime kanna tlâinâk um? Hawng kan veih ding hen na hawng mi masi? Nang ka nan theih asi, Pathian Mi Thenhlimh na si," ti hen a âu.

³⁵Chun, Jisu nih a fâi le, "Dâisip le, a sungah mi hawng suak rawh," a ti. Chun, khuri nih chun a lâi ah a thlûk le, nganfâk pêk lo hen a sungah mi chu a suak rawh.

³⁶Chun, an ektê hen chê an ti ngâi le, "Hi hi zeï thu me si le? Thu nei tak leh thiltikho tak hen khuri nâwmtâm tla thu a pêk le, an suak hi," ti hen anna sâwn.

³⁷Chun, chu ram kiangkam khua kipah a thâwng a thang rawh.

³⁸Chun, a thawk le, pumhnâk in ah mi chu a suak le, Simon in ah a lût rawh. Chun, Simon nupi nu chu a damlo a zual ngâi le, chun a rangah an ngiar piak.

³⁹Chun, a kiangah a dîr le, a râifanh chu a fâi le, a reh rawh le; chun a thawk sawm le, an herh phung a timhtuah piak na rawh.

⁴⁰Chun, nî tlâk awt bâiah nganfâk dang dang hen damlo tla, damlo a nei mi zawzawng nih a sinah an hawngpi le; chun an ektê tlûnah a kut a thâng chiauh le, a damh vima na.

⁴¹Chun, khuri tla khawm, "Pathian Fapa na si," ti hen, an âu le, mi tamtak paw sungah mi an hawng suak. Chun, anmah tla a fâi le, Mesia asi ti an theih le, an hawlh a siang lo.

⁴²Chun, khuadei kê hen a suak le, ramkaro mun ah a kal le, chun mi zapi tla nih chun an hâwl le, a sinah an hawng kal le, anmah a kaltâk na lonâk ding hen thlah an tum.

⁴³Sikhawmsele, anih nih chun an sinah, "Khua dang tla khawmah Pathian Ram Thâwngthâng T̄ha ka sim ding asi, chu ruangah chun fial ka si dangâiah," a ti.

⁴⁴Chun, Galili ram ah pumhnâk in tla ah thu a sim.

Luk 5

¹Chun, hi hâwi hi asi le, mi zapi nih Pathian thu an ngâi le, amah an naih dûlmâl liauah, anih chu Genesaret Rilî kap ah chun a dîr le,

²chun rilî kap ah chun lawng panih a um mi a muh le, sikhawmsele ngâ tleihtu tla chu an suak le, an lên tla an suk.



- ³Chun, lawng pakhat Simon tâ ah chun â chuan le, a sinah vakap ah mi tâwm tawlh ding hen a deih. Chun, a to le, lawng thawk hen chun mi zapi tla chu a sîntir na rawh.
- ⁴Chun, thusim a bâng rawh chun Simon sinah, "Tî thuknâk lei fûk le, ngâ tleih ding hen nan lên tla vawrh rawh," a ti.
- ⁵Chun, Simon nih a sinah, "Sîntirtu, hamh tak hen zân khuadei hen kan ti le, zeikhawm kan tawng lo, sikhawmsele na thu hen lên tla ka vawrh lai," a ti le, a sâng.
- ⁶Chun, an vawrh le, ngâ cherkhet a khuh le, an lên tla chu a tlêk thikthek rawh.
- ⁷Chun, lawng dang ah an hâwi tla chu anmah hawng bawmh ding hen kut hen an kawh na. Chun, an hawng kal le, lawng panih chu pil dedêng hen khat phak vevê hen an râwn.
- ⁸Chun, Simon Peter nih a muh rawh chun Jisu khup kiangah a bawkbukhup le, "Lalpa hawng ka kaltâk rawh, misual ka si," a ti.
- ⁹An ngâ tleih chu amah leh a hâwi tla hen thungâi chê an ti.
- ¹⁰Simon murui ber Zebedai fapa Jem leh Johan khawm nih thungâi chê an ti. Chun, Jisu nih Simon sinah, "Tîh lah, tu thawk hen minung na tleih lai rawh," a ti.
- ¹¹Chun, an lawng tla chu vakap ah an kalpi le, zeizawng kaltâk hen amah chu an zûl rawh.
- ¹²Chun, khua pakhat ah a um liauah mi pakhat a pum hen phâr mi a um. Anih nih chun Jisu a muh le, a bawk le, "Lalpa na duh chun na hawng ka thiangtir kho," a ti le, a ngiar chiam.
- ¹³Chun, Jisu nih chun a vuanh le, a tawng, "Ka duh, thenhlimh rawh," a ti. Chun, zeikarlo ah a phâr chu a tlâu rawh.

¹⁴Chun, a sinah, "Âukhawm simh lah, sikhawmsele bâwlpu sinah va a zauhtir le, na thianhnâk ding hen Mosi ruat hâwi hen pêk, mi tla theihtirnâk ding hen," a ti thlir.

¹⁵Sikhawmsele, a thâwng chu a thang zual khun; mi zapi cherkhet a thu theih duh leh nganfâk tla dam duh hen an hawng a pûm chiam.

¹⁶Sikhawmsele, anih chu ramkaro ah amah ê hen a kal le, thla a cham tâwn.

¹⁷Chun, ni khat chu a sîntir na liauah Farisai tla leh Dân sîntirtu tla an to le, chubang tla chu Galili leh Judai ram khua kip thawk hen leh Jerusalem thawk hen hawng mi tla an si le; chun mi damhtir ding hen Lalpa thiltikhonâk chu a sinah a um.

¹⁸Chun, mi pakhat a khêng mi ihkhun hen an hawng zawnh le; a mâika ah siah ding hen lûtpi ding an awt.

¹⁹Chun, mi zapi ruangah chun lûtnâk an tawng lo le, in tlûnah an kêi le, in tlûn an pemh le, a lâi takah Jisu mâika ah ihkhun hen an thlâk.

²⁰Chun, an lungnâk chu a muh le, a sinah, "Minung, na sual tla ngaihdam asi rawh," a ti.

²¹Chun, Dân sîntirtu tla leh Farisai tla nih chun, "Pathian simsiattu hi âu me si le? Pathian cho lo nih chun âu nih me sual tla ngaihdam kho?" ti hen, an ruat.

²²Chuvachun, Jisu nih an ruat mi chu a theih le, an sinah, "Nan thinlung ah zeî me nan ruat?"

²³'Na sual tla ngaihdam asi rawh,' ti leh, 'Thawk le, kê hen kal rawh,' ti hi a zeî mi me sim a awl dauh?

²⁴Zeikhawm si sele, laikulh ah hin Minung Fapa nih hin sual ngaihdam khonâk a nei ti nan theihnâk ding hen," a ti le, a khêng mi sinah chun, "Thawk le, na tangphah lâk le, na in ah kal rawh ka nan ti," a ti.

²⁵Chun, an mitmuh ah a thawk sawm le, a itnâk chu a lâk le, Pathian sawr bû vima hen a in ah a kal rawh.

- ²⁶Chun, an ektê hen thungâi chê an ti le, Pathian an sawr le, "Tusûn ah chun thilchê tak kan muh asi," an ti le, thungâi an lâu.
- ²⁷Chun, chu thluh rawh chun a suak le, siah châwinâk mun ah a to mi, siah khawlhtu pakhat a min, Levi a muh le; chun a sinah, "Hawng ka zûl rawh," a ti.
- ²⁸Chun, zeizawng a kaltâk le, a thawk le, a zûl rawh.
- ²⁹Chun, Levi nih chun a in ah Jisu rangah puai rokual tak a tuah le; chun, siah khawlhtu tla leh midang tla hen mi tamtak nih anmah tla an dûmpi na.
- ³⁰Chun, Farisai tla leh Dân sîntirtu tla hen, anmah murui lakah mi, a thiruai tla tlûnah an chipchiar le, "Zeirangah me siah khawlhtu tla leh misual tla sinah nan ei hen nan din?" an ti.
- ³¹Chun, Jisu nih an sinah, "A dam mi nih chun dâktawr a herh lo le, damlo mi tla nih an herh dauh asi.
- ³²Mi rep tak tla lam ding hen hawng kal ka si lo le, misual tla rimtir ding hen hawng kal ka si," a ti le, a sâng.
- ³³Chun, annih nih chun a sinah, "Johan thiruai tla nih buh an ngei lemanh le, thla an cham tâwn; Farisai tla khawm nih chu hâwitê hen an ti tâwn. Sikhawmsele, na thiruai tla nih chun an ei hen an din tâwn," an ti.
- ³⁴Jisu nih an sinah, "Mo lawmhpitu tla sinah a pasal ding mi a um kar vial mo lawmhpitu tla chu nan ngeitir kho na tâwn mazei?
- ³⁵Sikhawmsele, a pasal ding mi chu an sin thawk hen lâk ving ni a hawng tlung lai, chu ni ah lam chun an ngei teh lai," a ti.
- ³⁶Chun, an sinah tahthimh thu khawm a sim le: "Âukhawm nih puan thar thlêk hen puan li a belh dah lo, belh sele a thar mi chu a thlêk lai le, a thar tliar leh a li mi chu anna êp lai loh.
- ³⁷Chun, âukhawm nih uain thar savun dûr a li mi tla ah an râwn dah lo, râwn sele, uain thar nih chun savun dûr tla chu a tâwn phet lai le, a tlê lai le, savun dûr tla khawm chu a vei lai.

³⁸Uain thar chu savun uain dūr thar tla ah an rawn dauh ding asi.

³⁹Chun, âukhawm nih uain a li mi dintu nih chun a thar mi an duh dah lo; 'A li mi a tha dauh' an ti ruangah," a ti.

Luk 6

¹Chun, Dinhni ah chun fâng mun tla a pal le, a thiruai tla nih chun favûi tla an khiak le; an kut hen an nuai le, an ei.

²Chun, Farisai zeimaw mi tla nih, "Zeirangah me Dinhni nan buar?" an ti.

³Chun, Jisu nih a sâng le, "David a sung a vâng liauah a hâwi tla hen an thilti kha; khabang tla khawm kha nan rêl lo mazei?"

⁴Kha hâwi hen Pathian in ah a lût le, bawlpu tla cho lo nih chun ei a thiàng lo mi zarh sang chu a lâk le, a hâwi tla sinah a pêk bâk na mi thu kha," a ti.

⁵Chun, amah nih an sinah, "Minung Fapa hi Dinhni Lal asi," a ti.

⁶Chun, Dinhni dang ah chun pumhnâk in ah a lût le, a sîntir. Chunah chun minung pakhat kut vawrhlei khêng a um.

⁷Chun, Dân sîntirtu tla leh Farisai tla nih chun a phiarnâk ding an tawng khonâk ding hen Dinhni ah a damh awt leh awt lo an thlingthlâk.

⁸Sikhawmsele, anih nih an thinlung chu a theih le, kutkhêng sinah, "Thawk le, a lâi ah dîr," a ti. Chun, a thawk le, a dîr rawh.

⁹Chun, Jisu nih an sinah, "Dinhni ah hin thattir ma a thiàng, siattir? Ruangsuah ma a thiàng, thah? Ka nan deih na," a ti.

¹⁰Chun, an ektê hen chun a zauh na le, a sinah, "Na kut zangh," a ti. Chun, a zangh le, a kut chu a dam rawh.

¹¹Chuvachun, an thintawr hen an kek awt le, Jisu lakah an ti ding dân anna thluk.

¹²Chun, chu ni tla ah chun thlacham ding hen tlâng leiah a kâi le, chun zân khuadei hen Pathian sinah thla a cham.

- ¹³Chun, khua a dei kê hen a ðiruai tla chu a kawh na le, an lakah mi leinih a thîm na le, an min khawmah mifial ti hen a sak:
- ¹⁴Chu tla chu Simon, (Peter a sak mi ber) leh a unau Andri, Jem leh Johan, Philip leh Bartholomai,
- ¹⁵Mathai leh Thom, Alhai fapa Jem, Simon, (Zelot an ti mi)
- ¹⁶Jem fapa Juda leh a tlehtirtu Juda Iskariot tla an si.
- ¹⁷Chun, anmah rual hen a tum le, munrâwn ah a dîr le, a ðiruai tla mi zapi cherkhet hen, Judai ram ah mi zawzawng leh Jerusalem ah mi leh Tura leh Sidon khua lei mi tisumsumriat kap ah mi, mi tamtak hen; chubang tla chu a thu ngâi duh leh an nganfâk tla damhtir duh hen an hawng kal asi.
- ¹⁸Chun, khuri nâwmtâm nehsawh tla khawm an dam rawh.
- ¹⁹Chun, amah lakah mi thiltikhonâk a suak le, mikip a damh vima na ruangah mi zawzawng nih chun tawng an tum.
- ²⁰Chun, a vîn a tâu le, a ðiruai tla chu a zauh na le, "Nannih ngâktah tla, nan thaw a suak, Pathian Ram nan tâ asi ruangah!
- ²¹"Nannih tuah sungvâng tla, nan thaw a suak, nan khim awt ruangah!
"Nannih ðap le tla, nan thaw a suak, nan ni awt ruangah!
- ²²"Minung Fapa ruangah mi nih an hua na hen, an nawng na hen, an fâi na hen, nan min a ðha lo ti hen an lawnh tlak na tikah nan thaw a suak teh lai!
- ²³Chu ni ah chun a lâwm ule, lâwptlo hen a lawk u; vîn ah nan lâwmman a lian ruangah. Chu hâwi ber hen an thlâktu tla nih khuavâng tla tlûnah an ti tâwn kha.
- ²⁴"Sikhawmsele, nannih minei tla, nan tlûn a pit! Nan lungngamnâk nan tawng rawh ruangah.
- ²⁵"Nannih tuah khim mi tla, nan tlûn a pit! Nan sung a vâng awt ruangah.
"Nannih tuah nih-le-khêk mi le tla, nan tlûn a pit! Ngaihsia hen nan ðap awt ruangah.

26"Mi zawzawng nih an nan sawr na tikah nan tlûn a pit teh lai. Chu hâwi ber hen an thlâktu tla nih khuavâng telê tlûnah an ti kha.

27"Ka thu ngâitu tla, ka nan simh na, nan mêlma tla chu dâwt na ule, an hua natu chu thatnâk ding ti ule,

28hawlhsiat an barh natu chu malsâwm ule, an sûlneng natu tla chu thlacham piak na u.

29Biang khatlei an benghtu sinah chun khatlei khawm dawnh rawh; chun, na puan lâktu sinah chun na kawrdawh lâk khawm êl lah.

30A nan deihtu kip sinah pêk rawh; chun, na thil an lâk piaktu sinah chun deih nawlh lah.

31Chun, mi nih nan tlûnah an ti ding an nan duh na hâwi hen mi tlûn khawmah ti bâk u.

32"Chun, an dâwt natu cho nan dâwt chun zei lâwmman me nan tawng? Misual tla khawm nih mah dâwttu chu an dâwt bâk asi.

33Chun, nan tlûnah an tha mi tla sinah cho nan tha chun âu sawr me nan tawng? Misual tla khawm nih chu hâwi ber hen an ti tâwn asi.

34Chun, tawng nawlh ding lungumnâk sin cho ah thil nan pûktir chun, âu sawr me nan tawng? Misual tla khawm nih a lîlâ tawng nawlh ding hen misual tla sinah an pûktir tâwn.

35Sikhawmsele, nan mêlma tla dâwt ule, an thatnâk ding ti ule, pûktir u, lungdawng lo thlo hen, chun nan lâwmman a rokual lai, Chungnungchem fa tla nan si lai. Anih nih chun lâwm ding theih lo minung tla leh misual tla a dâwt tâwn.

36Nan pa nih mi a zângfah hâwi hen zângfah bâk u.

37"Simsâwi lah u, simsâwi hen nan um lai loh; mawhtir lah u, chun mawh hen nan um lai loh; ngaihdam u, chun ngaihdam hen nan um lai.

38Pêk u, pêk hen nan um lai; thanemsemsê ngâi tak a tah hen, beng zat hen, ninh zat hen, liam pualmâl hen, nan kut ah an pêk na lai. Nan tahnâk lîlâ hen an tah piak na awt dangâiah," a ti.

39Chun, an sinah tahthimh thu a sim le: "Mitchâw nih mitchâw a ruai kho lai mazei? An panih hen khursaduap ah an tlâ vevê lai lo mazei?

40Thiruai chu a sîntirtu tlûnah a um lo; mikip anna sîn thluh tikah an sîntirtu hâwi hen an um lai.

41"Chun, zeirangah me mah mit lakah mi kân um mi chu ruat lo hen na unau mit lakah mi fungrêu chu na muh zia?

42Mah mit lakah mi kân um mi chu muhlo hen na unau sinah, 'Unau na mit lakah mi fungrêu kha hawng ka thawhtir,' zeitin na ti kho le? Mi perpê, na mit lakah mi kân kha thawh masa rawh, chun na unau lakah mi fungrêu chu thawh ding hen fiang tak hen na muh lai,

43"Thing tha rerêng rah sia hen rah a um lo; thing sia khawm rah tha hen rah a um ber lo.

44Thing kip anmah rah chiauah â thei asi. Mi nih kûng lingnei lakah theipi an kawih dah lo, ling marai lakah grêp rah an kawih dah lo.

45Mi tha nih chun a thinlung robâwm tha lakah mi thil tha tla a suah tâwn le; misual nih chun a thinlung robâwm sia lakah mi thil sia tla a suah tâwn; a thinlung ah khat mi chu a kê nih a sim tâwn ruangah.

46"Chun, nannah nih zeirangah me ka thu zâwt tung lo hen, 'Lalpa,' nan ka ti lemanh?

47Mi kip ka sinah hawng kal hen, ka thu theih hen zâwttu zawng chu âu hawi me an si ka nan theihtir na lai.

48In saktu, thûkpi chawh hen, lungpi tlûnah lungphûm remh mi hâwi chu asi. Chun, tî a hawng lian chun tizangrual nih chu in chu a khawh le, a ninh kho lo le, a sak zia a ngenh ruangah.

⁴⁹Sikhawmsele, theih hen zâwtlotu chu, lungphôm lo hen, tual tlûn ko ah in saktu hâwi mi chu asi; chun, tizangrual nih chu in chu a khawh le, a chim sawm le, chu in râwk zia chu thungâi hen a fâk asi," a ti.

Luk 7

¹Chun, mi le tla nâ theih ah a thusim zawzawng a sim thluh rawh chun Kapernaum ah a lût rawh.

²Chun, kawrsen zâ hotu âumawh a to-aw duhtak a damlo le, a thi awt ngangâi.

³Chun, Jisu thâwngthâng a theih ka hen a to-aw damh ding hen ngiar chiam ding hen a sinah Juda murui upa tla a fial na.

⁴Chun, annih chu Jisu sinah an va tleng le, ðhanemsemsê ngâi tak hen an ngiar chiam le, "Anih hi, hi hi na ti piak tlâk asi;

⁵kan phun tla a dâwt le, kanna pumhnâk in khawm amah nih hawng kan sak piak asi," an ti.

⁶Chun, Jisu chu anmah hen a kal rawh; chun in a tlung awt bâiah kawrsen zâ hotu nih chun a sinah a hâwi tla a fial le, "Lalpa, a nawktir lah, ka in sungah na hawng lût ding hen a tlâk lo;

⁷churuangah na sinah hawng kal ding khawm tlâk hen ka ruat lo; thu cho sim le, ka ngâksia a dam ko lai.

⁸Kei khawm mi thu hen um mi ka si le, ka tangah kawrsen tla an um le; pakhat sinah, 'Kal rawh,' ka ti chun, a kal tâwn. Midang sinah khawm, 'Hawng,' ka ti chun, a hawng tâwn, ka sal sin khawmah, 'Hi hi ti,' ka ti chun, a ti tâwn," a ti.

⁹Chun, Jisu nih chubang thu chu a theih rawh chun amah chu chê a ti le, â hawi le, mi zapi amah zûltu tla sinah chun, "Ka nan simh na, Israel tla lak khawmah hi hâwi rak hen lungnâk fâk hi ka tawng lo," a ti.

¹⁰Chun, a mifial tla chu in ah an tlung nawlh le, to-aw chu dam hen an muh nawlh rawh.



- 11**Chun, sâwtlotê ah khua pakhat Nain an ti mi ah chun a kal le, a ðhiruai tla leh mi zapi cherkhet a sinah an kal bâk.
- 12**Chun, kulh kawtkhâr kiang ah a va tlung rawh chun mithi an hawng zawnh le, a nu nih a fapa neihlem mi asi le, amah tâ nih numei asi fâwn; an khua mi tla tamtak chu a sinah an um.
- 13**Chun, Lalpa nih chun numei chu a muh kê hen thungâi a siherh le, "T̄ap lah," a ti.
- 14**Chun, a va naih le, lîng chu a tawng h le; chun a zawnhtu tla chu an dîr rawh. Chun, "Tlangvâl, thawk rawh, ka nan ti," a ti.
- 15**Chun, mithi chu a to le, a hawlh rawh. Chun, Jisu nih chun a nu sinah a pêk rawh.
- 16**Chun, mi zawzawng nih an ðih le, Pathian an sawr le, "Kan lakah khuavâng rokual tak a hawng um rawh," an ti le, "Pathian nih a mi tla a hawng veh na rawh asi," an ti.
- 17**Chun, chu thu chu Judai ram zawzawng leh a kiangkam ram kipah a thang rawh.
- 18**Chun, Johan ðhiruai tla nih chun chubang thu zawzawng chu Johan rangah an simh.
- 19**Johan nih a ðhiruai tla panih a kawh na le, Lalpa sinah chun a fial na le, "Hawng kal ding mi ma na si, midang kan ngâichâng lai rih ma?" ti hen.
- 20**Chun, chu mi tla chu a sinah an hawng tlung rawh chun, "Baptistu Johan nih, 'Hawng kal ding mi ma na si, midang kan ngâichâng lai rih ma?' ti hen, na sinah hawng kan fial asi," an ti.
- 21**Chun, chu liau takah chun Jisu nih nganfâk tla, râipi vei tla, khuri vuanh tla tamtak a damh na le, mitchâw tamtak khawm an mit a deitir na.
- 22**Chun, an sinah, "Kal nawlh ule, thil nan muh mi leh nan theih mi hi Johan va simh u; mitchâw tla an mit a hawng dei rawh, kekhêng tla kê hen an kal rawh, phâr tla an thiang rawh, nasêt tla khawm an nâ a fîm rawh, mithi tla

thawh hen an um rawh, mipâm tla khawm nih Thâwngthâng T̄ha simh an tawng rawh.

²³Chun, âuzawng ka tlûnah lungsilonâk muh lotu chu an thaw a suak, a ti le, a sâng.

²⁴Chun, Johan mifial tla chu an tlung nûnah Jisu nih mi zapi sinah chun Johan thu a sim le, "Zei zauh ding hen me ramkaro ah nan kal mi kha? Lâiluang thli ninh ma?

²⁵Asi lo leh, zeu zauh ding chem me nan va kal mi kha? Puannêm aih ma? Puan rokual aih leh mi um nuam tla chu lal in ah tla an um.

²⁶Asi lo leh, zeu zauh ding chem hen me nan kal mi kha? Khuavâng ma? Asi chiammâm, ka nan ti na, khuavâng ngâk hen rokual dauh:

²⁷'Zauhnik, ka mifial na mâi leiah ka fial asi, anih nih chun na lam a siam lai,' ti, a thâwngthâng an rîn mi kha, hi minung hi asi.

²⁸Nunau ring mi lakah Johan ngâk a rokual dauh an um lo; sikhawmsele, Pathian Ram ah a mêchem mi khawm anih ngâk chun a rokual dauh, ka nan ti na," a ti.

²⁹Chun, mi zawzawng nih an theih rawh chun siah khawlhtu tla hen, Johan baptis si rawh mi tla an si le, Pathian an mawhtir lo.

³⁰Farisai tla leh Dân sîntirtu tla lam chu a sinah baptis rawh mi an si lo le, anmah rangah Pathian nih rem a ruat piak na mi kha an duh lo.

³¹Chun, Jisu ber nih "Tusan minung tla hi zeu hen me ka tahthimh lai? Zeu hâwi me an si?

³²Ngâksia tla sumtuah zâwl ah to hen, 'Theikhang kan tum piak na le, nan lâm t̄ung duh lo, kan t̄ap chiam le, nan t̄ap t̄ung lo' ti hen anna auh mi hâwi an si.

³³Baptistu Johan chu a hawng le, sang a ei lo le, uain khawm a din lo le, nannih nih, 'Khuri luah mahi! nan ti.

³⁴Minung Fapa a hawng kal le, a ei hen a din le, nannih nih, 'Zauhnik u, ei chak mi, uain din chak mi, siah khawlhtu tla leh misual tla hâwi khi, nan ti fâwn.

³⁵Sikhawmsele, Pathian finghnâk chu a dik asi ti a fa zawzawng nih an langhtir.

³⁶Chun, Farisai lakah mi pakhat nih a sinah buh ei ding hen a sâwm. Chun, Farisai in ah chun a lût le, buh a dôm.

³⁷Chun, chu khua ah nunau pakhat a um. Farisai in ah buh dôm hen a to ti a theih kê hen alabasta bawm hen sariak rimthâw a hawng put.

³⁸A dung leiah a kezaphab bul ah chun tap bû hen a dîr le, a mitthli hen a kezaphah a ching le, a sam hen a nâwt, a kezaphah chu a chawchawk chiam le, sariak rimthâw hen a chulh.

³⁹Chun, a sâwmtu Farisai nih chun chu chu a muh rawh chun a thinlung hen, "Hi minung hi khuavâng asi chun a tawnghtu nunau hi âu me asi, zeî hâwi mi me asi, theih ding mi tak, misual asi dangâiah," a ti.

⁴⁰Chun, Jisu nih a sinah, "Simon, na sinah thu kê khat sim ding ka nei," a ti le, a sâng. Chun, anih nih chun, "Sim ko me, Sîntirtu," a ti.

⁴¹Chun, Jisu nih, "Tangka pûktirtu pakhat sinah mi panih nih lei anna bat. Pakhat denari zâ â bêt le, pakhat nih sâwmnga.

⁴²Chun, a rulhnâk an nei lo le, a ngaihdam vevê na. Chuvachun, chu minung tla nih chun a zeî mi nih me anih chu a dâwt dauh lai?" a ti.

⁴³Simon nih chun, "A ngaihdam tam dauh mi nih si hen ka ruat," a ti le, a sâng. Chun, anih nih a sinah, "Na ruat dik ngâk," a ti.

⁴⁴Chun, nunau lei chu â hawi le, Simon sinah chun, 'Hi nunau hi na muh ma? Na in ah ka hawng lût le, nangnih ka kezaphah tawlnâk ding tî na ka pêk lo, anih lam nih chun a mitthli hen ka kezaphah a ching le, a sam hen a nâwt asi.

⁴⁵Nangnih na hawng ka châwchawk rerêng lo; anih lam nih chun ka hawng lût kê thawk hen ka kezaphah châwchawk a bâng lo.

⁴⁶Nangnih ka lû ah sariak na ka thuh lo, anih lam nih chun ka kezaphah ah sariak rimthâw a chulh.

⁴⁷Churuangah ka nan ti, a sual tamtak kha ngaihdam piak hen a um rawh; anih khawm nih thungâi a dâwt asi hi. Sikhawmsele, ngaihdam tâwm mi nih chun a dâwt tâwm tâwn," a ti.

⁴⁸Chun, nunau sinah chun, "Na sual tla ngaihdam asi rawh," a ti.

⁴⁹Chun, a buh dûmpitu tla nih, 'Sual tla khawm ngaihdam khotu hi âu me si le?" anna ti.

⁵⁰Chun, anih nih nunau sinah chun, "Na lungnâk hi ruang na suak phah asi, lungngam tak hen kal rawh," a ti.

Luk 8

¹Chun, a nehnûn dauh ah chun Jisu thusim leh Pathian Ram Thâwngthâng Thâ tlungtir hen khua lian leh khuatê tla a ɽawl vima le, a sinah leinih tla chu an um.

²Chun, unau zeimaw mi tla khuri vuanh dam mi tla leh nganfâk dam mi tla hen: Chubang nunau tla chu Mari, a paw sungah mi khuri pasarih an suak mi Magdala mi Mari an ti mi,

³Herod sum kiltu Chuza nupi Joana, Susana leh midang tamtak tla hen an si. Chubang tla nih chun mah neih hen an eibâr an timhtuah piak tâwn.

⁴Chun, mi zapi cherkhet an hawng a pûm le, khua kip mi a sinah an hawng kal le, tahthimh thu hen thu a sim:

⁵Fachê vawrhtu chu a fachê vawrh hen a kal le; chun, a vawrh liauah a zeimaw mi lam vâu ah a tlê le, mi nih an lamh le, chung zuang va tla nih an tlanh hep.

⁶Chun, a zeimaw mi lungpher tlûnah a tlê le, chun a keuh kê hen a dâm lo ruangah a uai ver.

⁷Chun, a zeimaw mi bualingnei lakah a tlâ le, bua hen rual cho hen an keuh le, a dawrh nek.

⁸Chun, a zeimaw mi tual tha lakah a tlâ le, a hawng keuh le, a let zâ hen a rah rawh," a ti. Chun, chubang thu a sim liauah a âu le, "Âuzawng theihnâk ding hen nâ nei nih chun theih seh," a ti.

⁹Chun, a thiruai tla nih chun a sinah, "Hi tahthimh hi ze tinâk mesi?" ti hen, an deih.

¹⁰Chun, anih nih chun, "Pathian Ram thu thup tla chu nannih theih lam chu siang asi le, midang sinah lam chun tahthimh thu cho hen sim asi; 'muh khawmsele, muhlo an si khonâk ding hen, nâ hen theih khawmsele, a ngaihtawnh dân an theih lonâk ding hen.'

¹¹"Tahthimh thu kha hi hi asi: Fachî chu Pathian thu asi.

¹²Chun, lam vâu ah chî a tlâ mi chu, thu theih rawh mi tla hi an si; chun diabol chu a hawng kal le, an lung lo ding hen ruangsuah an si kho lonâk ding hen an thinsung ah mi thu a lâk piak na tâwn.

¹³Chun, lungpher tlûnah chî a tlâ mi chu an theih kê hen thu chu lâwm tak hen tleih mi tla an si; sikhawmsele, ram an nei lo; sâwtlotê chu an lung le, lêmnâk tawng tikah an bângtâk nawlh tâwn.

¹⁴Chun, bualingnei lakah chî a tlâ mi tla chu hi bang minung tla hi an si; an theih nûnah an kal le, taksa lei lungkhamnâk tla, neihsiahnâk tla, damsung nuamchênnâk tla nih chun a dawrh le, an rah a min dah lo.

¹⁵Tual tha lakah chî a tlâ mi lam chu hi bang tla hi an si; thinsung rep leh tha hen thu an theih le, an ching thir le, felfê tak hen an rah tâwn.

¹⁶Âukhawm khâwnvâr kâih hen mâihûm hen an khuh dah lo, ihkhun tang khawmah an siah lo; a lût mi zawng nih a chêu an muh kho ding hen a siahnâk ah an siah tâwn asi.

¹⁷Puang lo ding hen pheh zeikhawm a um lo, theih lo ding hen leh lang lo ding hen thuh zeikhawm a um lo.

¹⁸Chuvachun, zeî hâwi hen se nan theih a thiamthih u; âuzawng a nei mi vial sinah an pêk sap lai le, âuzawng a nei lo mi vial nei hen anna ruat lem mi khawm an suh lai," ati.

¹⁹Chun, a nu leh a unau tla nih chun Jisu lei an hawng fûk le, sikhawmsele mi zapi ruangah chun a kiangah an tleng kho lo.

²⁰Chun, "Na nu leh na unau tla nih nangmah muh ding duh hen lênglei ah khin an dîr ko," ti hen, an simh.

²¹Chun, anih nih chun an sinah, "Hi bang Pathian thu theih hen zâwttu tla hi ka nu leh ka unau tla an si," a ti le, a sâng.

²²Chun, ni khat chu a ðhiruai tla hen lawng ah â chuan le, chun an sinah, "Rilî varâl leiah khin kan kal lai," a ti, Chun, lawng chu an sût le, an kal rawh,

²³Chun, an kal liauah Jisu chu a it thlit le, chun rilî ah chun thli a hawng râng le, an lawng chu tî hen a khat awt le, ðihnungkâi tak hen an um rawh.

²⁴Chun, a sinah an va kal le, an thawh le, "Sîntirtu, Sîntirtu, kan vei awt hi!" an ti. Chun, Jisu chu â ðhang le, thli leh titlingtlawk chu a fâi le; chun a bâng le, a reh rawh.

²⁵Chun, an sinah, "Zeiah me nan lungnâk?" a ti. Chun, an ðih le, thungâi chê an ti, "Hi hi âu me si le?" Thli leh tî tiang khawm thu a pêk le, anna awi e!" anna ti.

²⁶Chun, Galili ram zâwn ah Gerasin mi tla ram chu an tlung.

²⁷Chun, tâng a kâi rawh chun khua mi khuri vuanh âu nih mawh a tawng le; chu minung chu sâwt tak puan aih lo hen a um le, in khawm ah a um lo, thlân tla ah a um dauh tâwn.

²⁸Chun, Jisu a muh kâ hen a âu le, a mâika ah a bawkbukhup le, hâu fâk tak hen, "Jisu, Pathian Chungnungchem Fapa, kei leh nang zeî me kanna tlâinâk um? Hawng ka rêp rîlmâl lah, ka nan ngiar," a ti.

²⁹Jisu nih khuri nâwmtâm chu, chu minung paw sungah mi chu suak ding hen thu a pêk rawh ruangah. Chu minung chu vei tamtak khuri nih a tleih

tâwn asi, mi nih thîr chikchîn leh rêng an khimh le, an vêng kumza tâwn; sikhawmsele, a phuarnâk tla a sah le, khuri nih ramkaro leiah a khalh tâwn.

³⁰Chun, Jisu nih, "Na min zeî mesi?" ti hen a deih. Chun, anih nih chun, "Zapi," a ti le, a paw sungah khuri tamtak an lût ruangah.

³¹Chun, khur dawng neilo ah kal ding thu pêk lo ding hen Jisu sinah an ngiar.

³²Chun, chunah chun tlâng ah vawk rual tamtak an tlawng le, chun a sinah vawk paw sungah lût khonâk an ngiar. Chun, anih nih chun thu a pêk.

³³Chun, khuri tla chu minung paw sungah mi an suak le, vawk paw sungah an lût le, chun vawk rual chu kham ah anna khâwk chiam le, rilî ah an tek le, an tlâ le, tî thalh hen an thi rawh.

³⁴Chun, a vulhtu tla nih chun thil umzia chu an muh le, an tek phêt le, khua ah leh ram ah chun an sim.

³⁵Chun, "Zeise asi rawh ne?" ti hen zauh ding hen an suak. Chun, Jisu sinah an tlung le, khuri nih a suaktâk mi chu puan aih hen, thinlung kêl put hen Jisu kebul ah to mi an va muh; chun an ãih rawh.

³⁶Chun, a theihtu tla nih chun khuri vuanh a damh zia thu chu, chubang tla sinah chun an simh na rawh.

³⁷Chun, Gerasin ram kiangkam mi tla zawzawng nih chun thungâi an ãih ruangah anih chu an sinah mi kal ving ding hen an ngiar le; chun lawng ah â chuan le, a kîr nawlh rawh.

³⁸Chun, khuri nih a suaktâk mi lam nih chun Jisu sinah um kumza ding a ngiar. Sikhawmsele, Jisu nih,

³⁹"Na in ah tlung le, Pathian nih na rangah thil a nan ti piak mi hi va sim rawh," ti hen a kaltir rawh. Chun, a kal le, khuapi sung zawzawng ah chun Jisu nih a rangah thil a ti piak zia chu a phuang.

⁴⁰Chun, Jisu a hawng kîr nawlh rawh chun mi zapi nih amah an lawmh le, an ektê hen amah chu an ngâk ruangah.

⁴¹Chun, mi pakhat Jaira, pumhnâk in hotu chu a hawng kal le, Jisu kebul ah a bawkbukhup le, a in ah kal ding hen a ngiar.

⁴²Fanu pakhat cho kum leinih ding mi a nei le, chu chu thi awt tetem hen a rîl ko ruangah. Chun, Jisu a kal liauah mi zapi nih an eng dûlmâl.

⁴³Chun, nunau pakhat, kum leinih thî hat kholo mi a um le, a sum neih zawzawng chu dâktawr tla lakah a veih hep rawh le, âukhawm nih an damh kho lo rawh le;

⁴⁴chu minung chu a dung leiah a hawng kal le, a puan sâr a tawng le; zeikarlo ah a thî suak chu a hat sawm rawh.

⁴⁵Chun, Jisu nih, "Hawng ka tawnghtu kha âu me?" a ti. Chun, "Kei ka si lo," an ti chiauh. Peter leh a hâwi tla nih, "Sîntirtu, mi zapi nih an eng chukmak mi, an chîl chukmak khateh," an ti.

⁴⁶Sikhawmsele, Jisu nih, "Mi âu nih mawh hawng ka tawng asi, thiltikhonâk ka sungah mi a suak ti ka theih asi," a ti.

⁴⁷Chun, nunau nih chun â thup kholo ti a theih le, thir bû hen a hawng kal le, a mâika ah a bawkbukhup le, a tawng sawm le, zeikarlo ah a dam zia chu mi zawzawng mâika ah a sim rawh.

⁴⁸Chun, anih nih chun a sinah, "Ka fanu, na lungnâk hi na dam phah asi, lungngam tak hen kal rawh," a ti.

⁴⁹A hawlh liau chirah pumhnâk in hotu in ah mi chu minung pakhat a hawng kal le, "Na fanu a thi rawh, Sîntirtu hi nawktir lah," a ti.

⁵⁰Jisu nih chun chu thu chu a theih rawh chun, "Lâu lah lung ko, chun a dam nawlh lai," a ti le, a sâng.

⁵¹Chun, in chu a va tlung rawh chun Peter, Johan leh Jem leh ngâksia nu leh pa cho lo chu âukhawm lût a siang lo.

⁵²Chun, an ektê hen an ÷ap chur le, an ir anna chumh le; chun anih nih chun, "÷ap lah u, a thi lo, a it mi asi," a ti.

⁵³A thi rawh ti an theih ko dangâiah an nihsanh ko.

⁵⁴Jisu nih chun a kut a tleih le, "Kuihtê, thawk rawh," a ti le, a kawh.

⁵⁵Chun, a thlarau chu a hawng kêr nawlh le, a thawk sawm le; chun, zeilo ei ding thu a pêk.

⁵⁶Chun a nu leh a pa nih chun thungâi chê an ti. Sikhawmsele anih nih chun a thilti chu âukhawm nih theihlo ding hen a khap.

Luk 9

¹Chun, Jisu nih leinih tla chu a pumh na le, khuri zawzawng tlûnah thiltikhonâk leh thuneihnâk leh nganfâk tla damh khonâk a pêk.

²Chun, Pathian Ram thu sim ding leh damlo tla damh ding hen a fial na rawh.

³Chun, an sinah, "Nan khual tlâwngnâk ah thianthunh mawh zâl mawh, sang mawh tangka mawh zeikhawm put lah u; kawrdawh panih khawm put lah u.

⁴Chun, nan tlungnâk in zawngah tung kumza u, chu in thawk hen chun suak u.

⁵Chun, an lawmh lo natu zawng chu, chu khua thawk hen nan suak tikah chun anmah theihtirnâk ding hen nan kezaphah ah valeidip chu khâwng u," a ti.

⁶Chun, an kal le, khua an tawl vima le, ram kipah Thâwngthâng Tha an sim le, mi an damh vima.

⁷Chun, lal Herod nih a thilti zawzawng chu a theih le, a zeimaw mi nih, "Johan kha a nung nawlh mahi," an ti le,

⁸a zeimaw mi nih, "Elija a hawng a langh rawh asi hi," an ti le, a zeimaw mi nih, "Tuan liau mi khuavâng âumawh a thawknawlh asi hi," an ti ruangah a lawksawng rawh.

⁹Chun, Herod nih, "Johan chu a lû ka tan rawh mi; sikhawmsele, hi tluk rak hen a thâwng ka theih mi hi âu mesi?" a ti. Chun, amah chu muh a tum rawh.



¹⁰Chun, mifial tla chu an hawng tleng rawh chun an thilti tla a sinah an ruah. Chun, anih chu anmah tla put hen Betsaida an ti mi khua ah chun a dang hen a kal rawh.

¹¹Sikhawmsele, mi zapi tla nih chun an theih le, an zûl vima; chun anih nih chun annih chu a lawmh na le, Pathian Ram thu a sîntir na le, damh ding a herh mi vial a damh na.

¹²Chun zânleibâi zau asi rawh chun leinîh tla chu an hawng le, a sinah, "Kan kiangkam khua tla ah leh lo tla ah kal hen, tlungnâk leh ei ding an tawng khonâk ding hen mi zapi hi kaltir na; ramkaro mun ah um kan si mi," an ti.

¹³Anih nih chun an sinah, "Nanmah nih ei ding pêk na u," a ti. Chun, annih nih chun, "Hi bang minung zawzawng rangah hin ei ding kan va châwk piak na lo chun sangtlêp panga leh ngâ panîh cho lo chu zeikhawm, kan nei lo," an ti.

¹⁴(Upa vial khawm sângnga ding an si.) Chun, a ðhiruai tla sinah, "A murui hen totir na u, sâwmnga ding vima hen," a ti.

¹⁵Chu hâwi hen an totir na.

¹⁶Chun, sangtlêp panga leh ngâ panîh chu a lâk le, vîn lei zauh hen mal a sâwm le, a phel le, mi zapi mâika ah hunh ding hen a ðhiruai tla sinah chun a pêk.

¹⁷Chun, an ei le, an khawp ver le, an ei bang neknâwi tla chu an rût le, khobung leinîh a khat.

¹⁸Chun, Jisu amah lâwng hen thla a cham liauah a ðhiruai tla chu a sinah an um. Anih nih chun an sinah, "Mi zapi tla nih âu asi an ka ti?" ti hen, a deih na.

¹⁹Chun, annih nih chun, "Baptistu Johan asi," an ti; sikhawmsele, zeimaw mi nih, "Elija asi," an ti, zeimaw mi nih, "Tuan liauah mi khuavâng âu dauh mawh a thawknawlh rawh asi, an ti," ti hen, an sâng.

- ²⁰Chun, anih nih chun an sinah, "Asi chun, nannih nih âu asi nan ka ti?" a ti. Chun, Peter nih, "Pathian Mesia chu," ti hen a sâng.
- ²¹Chun, chu thu chu âukhawm simh lo ding hen a khap le, thu a pêk;
- ²²"Minung Fapa nih hin thil tamtak a tuar ding asi, upa tla, bâwlpu lalchem tla leh Dân sîntirtu tla duhlo hen a um ding asi; thah hen a um ding asi, chun ni thum ni ah thawh hen a um ding asi," a ti.
- ²³Chun, amah ber nih mi zawzawng sinah, "Âuzawng nih hawng ka zûl a duh chun, mah a pheh hen, nisiaar a kraws put hen hawng ka zûl seh.
- ²⁴Âuzawng a nungnâk hum duhtu zawng nih a thlâu lai le; âuzawng keimah ruangah a nungnâk thlâutu zawng nih, chu nih chun a hum lai.
- ²⁵Mi nih laikulh hi a pum hen a ting sele, mah a veih hen mawh a râwk sele a rangah zeï me ðhavak lai?
- ²⁶Âuzawng keimah leh ka thu zahpitu zawng, Minung Fapa nih hin, amah rokualnâk hen leh a Pa rokualnâk hen vânmifial thenhlimh tla rokualnâk hen a hawng kal tikah chun, chu minung chu a zahpi lai.
- ²⁷Dik tak hen ka nan simh na, hinah dîr mi a zeimaw mi tla hi Pathian Ram an muh lân lo chu thihnâk temlo thlo ding an um," a ti.
- ²⁸Chun, chubang thusim thawk hen ni riat dingah mawh, Jisu nih Peter, Johan leh Jem chu a kalpi na le, thlacham ding hen tâng ah an kal.
- ²⁹Chun, thla an cham liauah a mêl umzia chu a hawng a dang le, a nipuan chu a hawng vâh le, mit ser rê hen a hawng um rawh.
- ³⁰Chun, mi panih amah hen anna sâwn le, chu tla chu Mosi leh Elija an si.
- ³¹Rokualnâk hen an hawng a langh le, Jerusalem ah a thihnâk ding thu an sim.
- ³²Peter leh a hâwi tla lam chu an ngû le; chun an fîm kê hen a rokualnâk leh a sinah mi panih dîr mi chu an muh rawh.
- ³³Chun, Mosi leh Elija nih Jisu an ðhen awt liauah Peter nih Jisu sinah, "Sîntirtu, kan rangah hinah um hi a ðha; basâ pathum kan khuar lai le, nang

rangah pakhat, Mosi rangah pakhat, Elija rangah pakhat," a ti le, (A thusim khawm theih lo hen.)

³⁴Chun, chubang thu chu a sim liauah sôm a hawng zîng le, a liah na rawh; sôm ah an lût liauah an ÷ih.

³⁵Chun, sôm ah chun aw-hâu a hawng suak le, "Hi hi ka Fapa, ka thîm mi chu asi, amah thu ngâi u," a ti.

³⁶Chun, aw-hâu chu a reh kê hen Jisu chu amah lâwng hen an muh rawh. Chun, an dâisip le, an thil muh chu chu liauah âukhawm an ruah lo.

³⁷Chun, a thâituan ah tâng ah mi chu an ÷um nûnah mi zapi cherkhet nih amah chu an hawng dawng.

³⁸Chun, mipi lakah chun minung pakhat a âu le, "Sîntirtu, ka fapa zauh ding hen ka nan ngiar, ka fa neihlem asi.

³⁹Chun, khuri nih a tleih tâwn le, a dêng khuai rê lânlo chu a kaltâk duh lo.

⁴⁰Chun, na ÷hiruai tla sinah nar ding hen ka ngiar na le, an ti kho lo," a ti.

⁴¹Chun, Jisu nih, "Tusan minung lungnâk neilo leh lungkhung le tla, zeî tiang me nan sinah ka um lai le, ka nan sang kho na lai? Na fapa chu hinah hawng put," a ti le, a sâng.

⁴²Chun, a hawng kal liauah khuri nih chun a thlûk chiam le, cherkhet hamh a pêk. Sikhawmsele, khuri nâwmtâm chu a fâi le, ngâksia chu a damh le, a pa sinah chun a kaltir nawlh rawh.

⁴³Chun, mi zawzawng nih Pathian rokual zia chu thungâi chê an ti. Chuvachun, mi zawzawng nih chun a thilti zawzawng chu chê an ti liauah Jisu nih a ÷hiruai tla sinah,

⁴⁴"Chubang thu chu nan nâ ah lût seh: Minung Fapa hi minung tla kut ah tleihtir hen a um awt ruangah," a ti.

⁴⁵Sikhawmsele, a thusim chu a ngaihtawnh dân an thiam lo le, a thu umzia an theih lonâk ding hen an sinah thawk hen â thup asi; chu thusim thâwngthâng chu amah tâ nih an deih ngam lo.

- ⁴⁶Chun, "Kan lakah âu me rokual chem lai?" ti hen anna êl.
- ⁴⁷Chun, Jisu nih an thinlung ah anna ruah mi chu a theih le, ngâksiatê a kawh le, a sîrah a dîrtir.
- ⁴⁸Anih nih chun an sinah, "Âuzawng ka min ruangah hi ngâksiatê hi lawmhtu zawng chu keimah an ka lawmh asi; âuzawng kei an ka lawmhtu vial chu hawng ka fialtu lawmh an si; nan ektê lakah a mêchem mi hi asi rokual chem mi chu," a ti.
- ⁴⁹Chun, Johan nih chun, "Sîntirtu, âumawh na min hen khuri tla a nar mi kan muh le, kan nan zûlnâk ah â tel bâk lo ruangah kan khap asi," a ti le, a sâng.
- ⁵⁰Jisu nih a sinah, "Khap lah u rawh, âuzawng nanmah do lotu chu nanmah lei tângtawm an si," a ti.
- ⁵¹Chun, vân ah a kêi ding tik a tlung awt liauah Jerusalem ah kal ding hen â hawi thlir le, a lânkhân hen thu thanhtu tla a fial na le;
- ⁵²chun an kal le, amah rangah timhtuah piak ding hen Samari mi tla khua pakhat ah an lût.
- ⁵³Chun zauhnâk ah Jerusalem leiah kal ding hen a lang ruangah amah an lawmh lo.
- ⁵⁴Chun, thiruai Jem leh Johan nih chun an muh kê hen, "Lalpa, hi bang tla kâng vernâk ding hen vân ah mi mei thlâktir sele rem na ti ma?" an ti.
- ⁵⁵Anih chu â hawi le, a châk na.
- ⁵⁶Chun khua dang ah an kal rawh.
- ⁵⁷Chun, lampi ah an kal liauah, âu nih mawh a sinah, "Na kalnâk zawngah ka nan zûl lai," a ti.
- ⁵⁸Chun, Jisu nih a sinah, "Kâwlui tla nih kua an nei le, chungzuang va tla nih bû an nei le, Minung Fapa lam nih chun a lû ngauhnâk a nei lo," a ti.
- ⁵⁹Chun, midang sinah, "Hawng ka zûl rawh," a ti. Sikhawmsele, anih nih chun, "Lalpa, ka pa hawng ka vûitir tâ rih," a ti.

⁶⁰Anih nih chun a sinah, "Mithi nih anmah mithi chu vûi seh; nangnih chun Pathian Ram thu sim le, zanh rawh," a ti.

⁶¹Chun, midang khawm nih, "Lalpa, ka nan zûl lai; sikhawmsele, ka in ah mi tla aw-kâ nêh hen hawng ka thlahtir tâ rih," a ti.

⁶²Chun, Jisu nih a sinah, "Âuzawng tual nâwnnâk tleih hen dung leiah zauh mi chu Pathian Ram rangah a tlâk loh," a ti.

Luk 10

¹Chun, chu nûnah chun Lalpa nih midang sâwmsarih panih tla a ruat na le, a kalnâk ding khua kipah leh mun kipah, amah lânah panih vima hen a fial na.

²Chun, an sinah, "Fângât ding thungâi a tam le, sikhawmsele a ÷uantu tla an tâwm; chuvachun, a fângât ding hen ÷uantu ding tla fial ding hen fâng dâwngpu sinah ngiar u.

³Kal u; chingngia nâwngah dawrâ fa um hâwi hen ka nan fial na hi.

⁴Tangka sâwngkhâwi, zâl, pheikawk tla put lah u; chun, lampi ah âukhawm chibai bûk lah u.

⁵Chun, in nan lûtnâk kipah a masachem hen, "Hi in ah hin lungngamnâk tlung seh," ti u.

⁶Chun, chunah lungngamnâk fa a um chun nan lungngamnâk thu chu a tlûnah a um kumza lai; a um lo lam chun nan tlûnah a hawng kîr nawlh lai.

⁷Chu in ah chun um ko ule, an pêk na mi zawng din hen ei u; rian÷uantu chu lawh tawng tlâk asi. In kip lâwr lah u.

⁸Chun, khua nan lûtnâk zawngah an lawmh na chun an hunh na mi zawng chu ei u;

⁹damlo a um chun damh ule, an sinah, 'Pathian Ram nan kiangah a tlung rawh,' ti u.

¹⁰Khua nan lûtnâk kip ah an lawmh na lo lam chun, an zâwllâi tla ah suak ule,



- 11** 'Nan khua valeidip kan kezaphah ah kawp khawm hi nan lakah kan tât hi; sikhawmsele, Pathian Ram nan kiangah a hawng tlung rawh ti theih u,' ti u.
- 12** Ka nan ti na, chu ni ah chun chu khua tuar ding ngâk chun Sodom khua tuar ding chu a ziachâng um dauh lai.
- 13** "Korazin, na tlûn a pit! Betsaida, na tlûn a pit! Nan lakah thilchê tak ti hen a um mi tla kha Tura leh Sidon khua ah ti mi si sele, salâpuan aih hen vachâm lakah to hen an rim ving lai rawh.
- 14** Sikhawmsele, lâirêlnâk ah chun nannih tuar ding ngâk chun Tura leh Sidon khua tuar ding chu a ziachâng um dauh lai.
- 15** Chun, nang Kapernaum, vân tawng h khet hen chawnglawmh hen na um lai mazei? Mi thi khua tiang hen niamh na si lai.
- 16** Jisu nih a thiruai tla sinah, "Âuzawng nannih thu ngâitu chu keimah thu ngâi an si; âuzawng an duhlo natu chu keimah an ka duhlo mi asi; âuzawng kei hawng ka duhlo mi chu hawng ka fialtu duhlo asi," a ti.
- 17** Chun, sâwmsarih panih tla chu lâwm tak hen an hawng tlung le, "Lalpa, khuri tla khawm na min ruangah kan thu thu hen an um," an ti.
- 18** Chun, anih nih chun an sinah, "Mîmthlalek hâwi hen Setan chu vân thawk hen a hawng tlâ mi kha ka muh.
- 19** Rûl tla, tlâng cha-âi tla sirh khonâk thu leh mêlma thuneihnâk zawzawng neh khonâk thuneihnâk ka nan pêk na; zeikhawm nih nganfâk an pêk kho na lai loh.
- 20** Sikhawmsele, khuri tla nan thu thu hen an um ruangah a lâwm lah u; vân ah nan min rîn asi ruangah a lâwm dauh u," a ti.
- 21** Chun, chu liau takah chun Thlarau Thenhlimh nih lâwmnâk hen a khattir le, "Ka Pa, tual leh vân Lalpa, nangnih mifing leh mi fâifîm tla sinah hi bang thu hi na thuh le, nausêm tla sinah na phuang ruangah hin ka nan sawr asi. Pa, chu hâwi ti chu nang ngaih hen a tha asi.

²²"Ka Pa nih thil zeizawng hawng ka kiltir rawh; Pa cho lo nih chun Fapa chu âu mesi ti âukhawm nih an theih loh! Pa khawm chu âu me asi ti, Fapa leh an sinah Fapa nih a phuang duh mi tla cho lo nih chun âukhawm nih an theih loh," a ti.

²³Churawhchun, Jisu chu thiruai tla leiah â hawi le, a thup hen, "Nan thilmuh tla hi a muhnâk mit tla a vân a tha!

²⁴Ka nan ti na, khuavâng tamtak leh lalchem tla khawm nih nan thilmuh tla hi muh an duh tâwn le, sikhawmsele, an muh kho lo; nâ ah nan theih mi tla khawm hi theih an duh tâwn le, sikhawmsele, an theih lo asi," a ti.

²⁵Chun, Dân sîntirtu âumawh a dîr le, amah nîknâk ding hen "Sîntirtu, zungzâl nungnâk nei ding hen ze me ka ti lai?" a ti.

²⁶Chun, anih nih chun a sinah, "Dân ah ze me â rîn? Chunah chun ze me na rêl tâwn?" a ti.

²⁷Chun, anih nih chun, "Lalpa na Pathian chu na thinlung zawzawng hen, na thlarau zawzawng hen, na chaknâk zawzawng hen na dâwt ding asi. Chun, nangmah na dâwt hâwi hen na zâwlpâwm tla na dâwt ding asi," a ti le, a sâng.

²⁸Chun, anih nih chun a sinah, "Na sâng dik thap; chu hâwi hen ti le, na nung lai," a ti.

²⁹Sikhawmsele, anih nih chun mawh duhlo tuk ah, Jisu sinah, "Ka zâwlbâwm tla chu âu mesi?" a ti.

³⁰Jisu nih a sâng le, "Mi âumawh Jerusalem thawk hen Jeriko leiah a va kal le, rawkmang tla a tawng le, chu tla nih chun a nipuan an lît piak le, an vuak nek le, thi dêng hen an kaltâk.

³¹Chun, bâwlpu âumawh chu lampi ah chun a va kal kher le, a muh kê hen khat leikâng hen a rial ving.

³²Chun, chu hâwi ber hen Levi chi minung pakhat khawm chu chu mun ah chun a hawng tleng le, a muh kê hen khat leikâng hen a rial ving.

³³Sikhawmsele, Samari ram ah mi âumawh khualtlâwng a kal le, a umnâk chu a tlung le, a muh kê hen thungâi a lungkham.

³⁴A sinah a va kal le, a liam mâ lakah chun sariak leh uain a tawih le, a tuam le, a sa tlûnah a chuanh le, khual tlungnâk in ah a kalpi le, a bulsân rawh.

³⁵Chun, a thâituan ah chun denari panih a thuak le, khual tlungnâk in vêngtu sinah a pêk le, "Hawng bulsân le, hi lei na hêu mi vial chu ka hawng kê nawlh tikah ka nan rulh nawlh lai," a ti.

³⁶"Chu pathum lakah chun rawkmang tla tawngtu zâwlbâwm chu a zeï mi chem me si hen na ruat?" a ti.

³⁷Chun, anih nih chun a sinah, "A lungkhamtu chu," a ti. Chun, Jisu nih a sinah, "Nang khawm chu hâwi ber hen va ti bâk rawh," a ti.

³⁸Chun, an khualtlâwng pah hen zeï khua ah mawh an lût le; chun, nunau pakhat a min Marthi nih a in ah a tlungtir.

³⁹Anih nih chun unaunu pakhat a nei le, a min chu Mari asi, chu minung chu Lalpa kê bul ah a to le, a thu a ngâi.

⁴⁰Marthi chu eibâr timhtuah hen â nawk thlo le; chun a sinah a hawng kal le, "Lalpa ka unaunu nih keimah lâwng hen eibâr timhtuah ding hen hawng ka rinh thlap mi hi pawï na ti lo na maw? Hawng ka bawmh ding hen simh teme," a ti.

⁴¹Chun, Lalpa nih, "Marthi, Marthi, thil tamtak na dawn le, na nawk mahi;

⁴²thil pakhat cho a herh; Mari nih tingvo ðha chu a thîm le, chu chu lâk piak ding asi loh," a ti le, a sâng.

Luk 11

¹Chun, veikhat chu Jisu chu zeï mun ah mawh thla a cham. Thla a cham thluh rawh chun a ðhiruai pakhat nih a sinah, "Lalpa, thlacham dân Johan nih a sîntir na hâwi khan hawng kan simh bâk me," a ti.

²Chun, anih nih chun an sinah, "Thla nan cham chun hi hâwi hen ti u: Ka pa, Na min zahkâi seh, Na ram hawng tlung seh.



- ³Nislar hen kan ei khawp hen buh hawng kan p k,
- ⁴Kan sual tla hawng kan ng ihdam, kannih khawm kan sinah battu zawzawng kan ng ihdam t wn asi. L mn k ah hawng kan l ttir lah," a ti.
- ⁵Chun, amah nih an sinah, "Nan lakah mi  umawh k wi nei sele, z n l i ah a sinah kal hen, 'K wi, sangtl p pathum hawng ka p ktir;
- ⁶ka k wi khualtl wng ka sinah a hawng tlung le, a m ika ah hunh ding zeikhawm ka nei lo,' ti sele;
- ⁷anilh nih in sung thawk hen, 'Hawng ka nawktir lah; tuah chun in   kh  rawh le, ka fa tla khawm ka sinah ihkhun ah an it rawh; thawk hen ka nan p k kho lo,' ti hen s ng sele—
- ⁸ka nan ti na, a k wi asi ruangah thawk hen a p k lo nar ng hen deih r m tak hen a deih ruangah thawk hen a duh zat zawng a p k lai.
- ⁹"Chuvachun, ka nan ti na, deih u, chun an p k na lai; h wl u, chun nan tawng lai; "kik u, chun an awng piak na lai.
- ¹⁰ uzawng a deihtu vial nih chun an tawng t wn le,  uzawng a h wltu nih chun an tawng t wn le,  uzawng a kiktu chu an awng piak awt asi.
- ¹¹Nannih murui lakah pa si mi sinah a fapa nih sangtl p deih sele,  u nih lung p k lai? Asi lo leh, ng  deih sele,  u nih ng  rang chan ah r l p k lai?
- ¹²Asi lo leh,  rti deih sele, tl ng cha- i a p k lai mazei?
- ¹³Chuvachun, nannih misual men nih nan fa tla thil  a p k ding d n nan theih chun, nan Pa v n ah mi nih chun amah deihtu tla chu Thlarau Thenhlimh a p k tam khun lai!" a ti.
- ¹⁴Chun, Jisu nih khuri hawlh kholo pakhat a nar, chun khuri chu a suak k  hen hawlh kholo mi chu a hawlh rawh; chun, mi zapi tla nih thung i ch  an ti.
- ¹⁵Sikhawmsele, a zeimaw mi nih chun, "Khuri lal Belzebul ruangah asi khuri tla a nar t wn mi hi," an ti.

¹⁶Chun, a zeimaw mi nih chun amah nikhâk ding hen vâh ah mi singsiahnâk an deih.

¹⁷Anih nih chun an dawn mi tla chu a theih le, an sinah, 'Kha zei ram zawnghah mah anna do mi vial an vei tâwn; dâwnghungkhur khat khawm mah anna do mi chu a vei tâwn.

¹⁸Setan khawm mah anna do chun a ram zeitin a dîr lai? Belzebul ruangah khuri tla a nâr,' nan ka ti dangâiah.

¹⁹Chun, kei Belzebul ruangah khuri tla nar ka si chun nan fa tla nih âu ruangah me an nar tâwn ne? Churuangah annih chu nanmah lâirêltu ding tla an si lai.

²⁰Sikhawmsele, kei nih Pathian thiltikhonâk ruangah khuri tla nar tâwn ka si chun, Pathian Ram nan sinah a hawng tung rawh mi asi lai.

²¹"Mi chak nih chun riamnâm rangtling put hen a in a vêng kar chu a sum chu him ziar hen a um kumza tâwn.

²²Sikhawmsele, amah ngâk hen chak dauh nih chun a hawng do le, a neh tikah chun â râlringnâk râlthuum rangtling chu a suh le, a sum a lâk piak mi chu a then phin tâwn.

²³Âuzawng ka leiah tângtawm lo mi chu hawng ka do asi, âuzawng hawng ka pumphpi lo mi chu a thektham asi.

²⁴Khuri nâwmtâm chu mi paw sungah mi a suak rawh chun, dinhnâk hâwl hen tî umlonâk mun tla ah â sawk tâwn le; chun, dinhnâk rerêng a tawng lo le, 'Ka suaktâk mi in ah khan ka kîr nawlh ko lai,' a ti.

²⁵Chun, a va tung rawh chun, phiat ver hen, timhtuah hen a muh.

²⁶Churawhchun a va kal le; amah ngâk hen sual dauh mi khuri pasarih a hawng put le, chunah chun an lût le, an um kumza tâwn; chu minung umzia chu a lân ngâk hen a tha lo dauh tâwn asi," a ti.

²⁷Chun, chu thu chu a sim liauah, mi zapi nâwngah nunau âumawh a âu le, "A nan pâwinâk paw chu a vâh a tha, na din mi nûk khawm," a ti.



- ²⁸Sikhawmsele, anih lam nih chun, "Pathian thu theih hen zâwttu tla hi mi vânthâ an si dauh, ti sim a ðha dauh," a ti.
- ²⁹Chun, mi zapi tla chu a sinah an hawng a pûm liauah, Jisu nih, "Tusan minung tla hi soal tak an si; singsiahnâk an hâwl le; sikhawmsele, Jona singsiahnâk cho lo chu an sinah singsiahnâk rerêng pêk asi lai loh.
- ³⁰Jona chu Ninevi khua mi tla rangah singsiahnâk asi hâwi khan, Minung Fapa khawm tusan minung tla rangah hin singsiahnâk asi lai.
- ³¹Simlei lalnu kha lâirêl tikah chun tusan mi tla sinah hin a thawk bâk lai le, mawh a phurhtir na lai; Solomon finghnâk ngâi ding hen men kâwlkil ah mi a hawng kal ruangah; chun, zauhnik, Solomon ngâk hen rokual dauh hinah a um asi.
- ³²Ninevi khua ah mi tla chu lâirêl tikah chun tusan mi tla sinah hin an dîr bâk lai le, mawh an phurhtir lai, Jona thusim ruangah an rim dangâiah; zauhnik u, Jona ngâk hen rokual dauh hinah hin a um asi.
- ³³Âukhawm khâwnvâr an kaih hen mun thupnâk ah mawh tâwng tangah mawh an siah dah lo, a lût mi tla nih chun a chêu an muh khonâk ding hen a siahnâk ah chun an siah dauh tâwn asi.
- ³⁴Na taksa khâwnvâr chu na mit asi. Na mit a fîm chun na taksa khawm a pum hen a chêu tâwn, â râwk lam chun na taksa khawm a mûi ver tâwn.
- ³⁵Churuangah chun na sungah chêu um chu thim a hawng si soal lai, a thiamthih rawh.
- ³⁶Chun, na taksa hi a zeî ram khawm mûi lo hen a pum hen a chêu chun, khâwnvâr chêu tak nih a nan cherh hâwi hen na chêu hep lai," a ti.
- ³⁷Chun, a sim liauah, Farisai pakhat nih amah chu a sinah buh ei ding hen a sâwm le; chun, a lût le, buh a dôm.
- ³⁸Chun, Farisai nih a muh rawh chun, buh ei lânah kut a ðâwl lo mi chu thungâi chêu a ti.

³⁹Chun, Lalpa nih chun a sinah, "Nannah Farisai nih khêng leh hâi lênglei lam chu nan t̄awl thiàng tâwn; nan sunglei lam chu lēpnāk leh sual hen a khat fawn.

⁴⁰Mi â tla, lênglei siamtu nih sunglei khawm a siam lo mazei?

⁴¹Sikhawmsele, a sungah thil um chu mipâm sinah pēk ding hen mang u; chun, nan rangah zeizawng a thenhlimh lai.

⁴²"Nannah Farisai tla, nan tlûn a pit! Pudina, chawngrei leh, thlâi kip tla parâ lû ah pakhat nan pēk tâwn le, repnāk leh Pathian dâwtnāk chu nan thlahthlamh tâwn. Chubang tla chu asi nan ti ding mi chu, a dang tla chu tlawh lêmlo hen.

⁴³"Nannah Farisai tla, nan tlûn a pit! Pumhnāk in ah tophah t̄ha chem tla leh sumtuah zâwl ah chibai bûk lebang nan sunhsak tâwn.

⁴⁴Nan tlûn a pit! Thlân ti theihlo hen, a tlûnah mi an kal tâwnnāk hâwi chu nan si," a ti.

⁴⁵Chun, Dân sîntirtu pakhat nih a sinah, "Sîntirtu, hi thu na sim mi hi kannih khawm na kan fâi mi asi," a ti le, a sâng.

⁴⁶Chun, anih nih chun, "Dân sîntirtu tla, nannah khawm nan tlûn a pit! Thil phurh hamhkâi tak tla midang tla nan phurhtir tâwn le, nannah nih chun phurh ding chu nan kutdawng pakhat khawm hen nan tawng dah lo.

⁴⁷Nan tlûn a pit! Khuavâng tla thlân in nan sak tâwn le, nan thlâktu tla nih an thah mi an si.

⁴⁸Chuvachun, nan thlâktu tla thilti tla chu nan theih hen nan tipi na asi; annih nih an thah le, nannah nih an thlân in tla nan sak ruangah.

⁴⁹Churugah, Pathian finghnāk khawm nih, 'An sinah khuavâng tla leh mifial tla ka fial lai le, a zeimaw mi an thah lai le, a zeimaw mi an nehsawh lai.

⁵⁰Chuvachun, Abel thisen suak thawk hen Zekaria, mâichâm leh biakin karah thah mi thisen suak tiàng khan, khuavâng zawzawng thisen, tual um tîr

thawk hen suak mi chu, tûliau san mi tla tlûnah hin phû an lam kho lai,' a ti kha. Ka nan simh na, tûliau san mi tla tlûn khawm hin phû an lam lai.

⁵²"Nannih Dân sîntirtu tla, nan tlûn a pit! Finghnâk renh chu nan lâk ving le; nannih tâ nih nan lût lo, mi lût ding khawm nan kham thlo," a ti.

⁵³Chun, chunah mi chu a suak rawh chun Dân sîntirtu tla leh Farisai tla nih chun amah chu an râl le, thu tamtak an simtir râm le,

⁵⁴a hawlh sualnâk tleih tum hen an bawh tet.

Luk 12

¹Chu liauah, mi zapi tamtak lamh chukmâk rê hen an hawng a pûm rawh chun, Jisu nih a masachem hen a ðhiruai tla sinah, "Farisai tla thilnu perpetnâk lakah chun a thiamthih u.

²Langlo ding hen thuh zeikhawm a um lo; theihlo ding hen pheh zeikhawm a um lo.

³Churuangah mûi ah nan sim mi zawng kha chêu ah an theih lai le, in kardang sung ah nâ ka ah nan thusim kha in tlûnah a chuan hen an phuang lai.

⁴"Chun, hâwi le tla, ka nan simh na, taksa thah hen, chu nûnah zeidang khawm ti kholo rawhtu tla chu ðih lah u.

⁵Sikhawmsele, nan ðih ding mi chu âu me si ka nan simh na lai; thah nûn khawmah Gehena ah lawnh khonâk thuneitu Pathian chu ðih u; asi, ka nan simh na, amah tak chu ðih u.

⁶"Phâisenphittê panga assaria nih hen an zuar tâwn lo mazei? Sikhawmsele, an lakah pakhat khawm Pathian nih a relh dah lo.

⁷Nan samzâi tla tiang khawm hi rêl ver asi. ðih lah u; phâisenphittê tamtak ngâk hen nan sung dauh asi.

⁸"Chun, ka nan simh na, mi le mâika ah hawng ka ðanhtu zawng Pathian vânmifial tla mâika ah Minung Fapa nih a ðanh bâk lai.



- ⁹Sikhawmsele, mi le mâika ah hawng ka phehtu chu Pathian vânmifial tla mâika ah pheh asi bâk lai.
- ¹⁰"Chun, Minung Fapa simsâwitu zawng chu ngaihdam piak asi lai; Thlarau Thenhlimh simsâwi lam chu ngaihdam piak asi lai lo.
- ¹¹"Chun, pumhnâk in ah mi tla, lal tla leh hotu tla mâika ah an kalpi na tikah chun, 'Zeitin me, zeï thu me ka sâng lai, zeï thu me ka sim lai,' ti hen lawksawng lah u;
- ¹²a tik takah chun nan sim ding mi chu Thlarau Thenhlimh nih a nan simh na lai," a ti.
- ¹³Mi zapi lakah mi âu nih mawh Jisu sinah, "Sîntirtu, ka u sinah kan pa nih hawng kan rauh mi ro hawng ka ðenh bâk ding hen simh," a ti.
- ¹⁴Sikhawmsele, anih nih chun a sinah, "Minung, nannih tlûnah âu nih me lâirêltu ah leh sum ðenhtu ah hawng ka siam?" a ti.
- ¹⁵Chun, an sinah, "Thiamthih ule, ngarhnâk rerêng lakah chun a vêng u, neih leh siah hi minung dam san asi lo," a ti.
- ¹⁶Chun, an sinah tahðhimh thu a sim le, "Minei âumawh thungâi a bâwngmal le;
- ¹⁷chun a ruat le, zeitin ka ti lai aw? Ka mîm-le-fâng siahnâk ka nei lo, a ti.
- ¹⁸Chun, tihin ka ti lai; ka fângbâwk ka siat lai le, lian dauh hen ka sak lai le; chunah chun ka fâng leh ka neih zawzawng ka pumh lai.
- ¹⁹Chun, ka thlarau sinah, "Thlarau, kum tamtak rangah neih tamtak na khawng mi hi; a dîn le, ei hen bâr le, lâwptlo tak hen um rawh ka ti lai, a ti.
- ²⁰Sikhawmsele, Pathian nih a sinah, Mi â, tuzân hin na thlarau an lâk piak awt asi; na thil timhtuah tla kha âu tâ me si lai rawh ne?' a ti.
- ²¹"Mah rangah neih khawng hen, Pathian leiah khawng lo mi chu, chu hâwi chu asi tâwn," a ti.

²²Chun, thiruai tla sinah, "Churuangah ka nan simh na, Zei me ka ei lai aw?' ti hen nan nungnâk thu leh, 'Zei me ka fenh hen ka aih lai aw?' ti hen nan taksa thu lungkham lah u.

²³Ei ding ngâk hen nungnâk a sung dauh asi, nipuan ngâk hen taksa a sung dauh asi.

²⁴Langâk tla hi dawn nik u, fâng an tuh lo, an ât lo, pang leh fângbâwk tla khawm an nei lo; sikhawmsele, Pathian nih a châwm; nannih chu vô tla ngâk hen chun nan sung-û dauh asi.

²⁵Nannih lakah lawksawng ruangah âu nih me mah dung dâwng khat hen a sap kho?

²⁶Hi tê men nan ti kho lo mi, zeirangah me thil dang nan lawksawng tâwn?

²⁷Tuktin pâr thang zia hi ruat nik u; rian an tjan lo, lâ khawm an kher lo; sikhawmsele, ka nan simh na, Solomon a rokualnâk zawzawng hen â thum mi men hi bang tuktin pâr pakhat tluk khawm hen thumh hen a um lo.

²⁸Chuvachun, mâng belh, tusûn ah nung, a thâituan ah lungthu kê ah tih nawlh ding men Pathian nih chu tluk rak hen a thumh chun, aw nannih lung tâwm tla; chu ngâk chun nipuan an pêk khun na lai!

²⁹"Chun, nan ei ding tla, nan din ding tla hâwl lah u; lawksawng hen um lah u.

³⁰Laikulh phun kip nih chubang zawzawng chu an hâwl tâwn asi; chubang chu nan Pa nih nan herh ti a theih ko ruangah.

³¹Amah Ram hâwl dauh u, chun chubang thil tla khawm chu a nan pêk sap na lai."

³²"Murui tâwm tla, lâu lah u; ram an pêk na mi hi nan Pa lawmhkâng tak asi.

³³Nan neih zawzawng zuar ule, mipâm tla sinah pêk u; vâh ah mifir kal lonâk ah, rûlchawn nih a râwk lonâk ah chun, tangka sâwngkhâwi li kho lo tla, neih vei kho lonâk ah nan ro khawng u.

³⁴Nan ro umnâk kip ah nan thinlung khawm a um awt ruangah."

- 35" Nan tâisâwm sâwm zet hen, nan khâwnvâr khawm alh kumza hen um u;
- 36 chun, mi nih an pu lâwinâk puai ei a hawng lâwi tikah inkhâr a hawng kik kê hen, awng piak sawm kho ding hen an ngâk kumza hâwi hen um u.
- 37 An pu a hawng kal tikah ngâk kumza hen a muh na mi to-aw tla chu an thaw a suak. Thungâi tak hen ka nan simh na, anih nih chun a tâi a sâwm lai le, anmah tla buh dôm hen a totir na lai le, an eibâr a timhtuah lai.
- 38 Zân lâi ah mawh thawk tikah mawh hawng kal hen, chu hâwi hen a hawng muh chun, chu to-aw tla chu an thaw a suak lai.
- 39 Sikhawmsele, hi hi theih u, mifîr a hawng tik ding in dâwngpu nih theih sele, a vêng lai le, a in a pemhtir lai lo.
- 40 Nannah khawm rârling kumza hen um u, nanna rârling lo tikah Minung Fapa a hawng kal awt ruangah," a ti.
- 41 Chun, Peter nih, "Lalpa, hi tahthimh thu hi kanmah cho ma na kan simh, mi zawzawng ma?" a ti.
- 42 Chun, Lalpa nih, "Sum kiltu zumhkâi fing tak a pu nih a tik zawng ah an tingvo buh then piak ding hen a dawngsung tla lakah hotu ah a siam ding mi chu âu chem me si lai?"
- 43 A pu a hawng kal tikah to-aw chubang hâwi ti hen a hawng muh mi chu an thaw a suak lai.
- 44 Dik tak hen, ka nan simh na, a neih zawzawng tlûnah hotu ah a siam lai.
- 45 Sikhawmsele, chu to-aw nih chun a thinlung hen, 'Ka pu tuah a hawng tung tuan lai loh,' ti hen; to-awnu tla, to-awpa tla vuak sele, din leh ei hen rî sele,
- 46 Chu to-aw pu chu, â rârling lo ni ah, a theih lo liauah a hawng kal lai le, tan nih ah a hawng suah lai le, mi zumhkâilo tla ting hâwi a tingtir lai.
- 47 "To-aw a pu duhzia theih ko na hen rârling lo hen a pu duhzia hâwi khawm tilo mi chu vei tamtak vuak asi lai;

⁴⁸sikhawmsele, a pu duhzia khawm theihlo hen, vuak tlâk rê hen thil titu chu vei tâwmtê vuak asi lai. Âuzawng tamtak an pêk mi sinah chun tamtak an êng lai; âuzawng tamtak an kiltir mi sinah chun tam dauh an êng lai.

⁴⁹"Laikulh ah mei thlâk ding hen hawng ka si; tu thawk hen kâng rawh sele ka duh a!

⁵⁰Sikhawmsele, bapris si ding ka nei, chu lîm lân lo chu ka thâw a pit a!

⁵¹Laikulh ah remnâk lêngtir ding hen hawng kal mi hen ma nan hawng ka ruat? Silo e, ka nan simh na, ðhennâk lêngtir ding hen hawng kal ka si dauh!

⁵²Tu thawk hen mi panga dâwngsungkhur khat anna ðhen lai, pathum nih panih, panih nih pathum an do lai;

⁵³pa nih a fapa, a fapa nih a pa; a nu nih a fanu, a fanu nih a nu; a nînu nih a mo, a mo nih a nînu a do lai," a ti.

⁵⁴Chun, Jisu nih mi zapi sin khawmah chun, "Thlang leiah sôm a zîng mi nan muh chun, 'Ruah a sôr awt,' nan ti sawm tâwn; chun, asi taktê.

⁵⁵Chun, sim thli lêng nan muh chun, 'Thâw a sâ awt,' nan ti tâwn; chun, asi taktê tâwn.

⁵⁶Nannih mi perpê tla, tual leh vân umzia khawm nan theihthiam mi, zeirangah tûliau thil umzia hi nan theihthiam lo?

⁵⁷"Zeirangah me nanmah nih a dik mi chu nan ruat lo?

⁵⁸Chun, lâirêltu mâika ah na tawhpi mi hen nan kal tikah kal pah hen amah lakah lîmnâk hâwl râm rawh; asi lo chun lâirêltu mâika ah zângrah ko hen an kalpi lai le, lâirêltu nih chun mi tleih hotu an tlehtir lai le, mi tleih hotu nih chun rêng an thlâk sual lai.

⁵⁹Ka nan simh, lepton tê men na lîm lân lo chu, chunah mi chu na suak rîlmâl lai loh," a ti.

Luk 13



¹Chun, chu liau tak chun âu tla mawh an hawng um le, chu tla nih chun, Galili ram ah mi, Pilat nih an thisen an Pathian sawnhnâk sa thah tla lakah a telh piak na mi thâwnghâng chu Jisu an simh.

²Chun, anih nih chun an sinah, "Chu Galili ram ah mi tla chu, chu hâwi thil an tuar ruangah Galili ram ah mi zawzawng ngâk hen misual khun hen ma nan ruat?

³Si loh e, ka nan simh na, nannih khawm nan rim lo chun chu hâwi ber hen nan vei ver lai.

⁴Chun, Siloam in sâng nih mi leiriat a denh mi khawm kha Jerusalem ah an um mi tla ngâk hen misual khun si hen ma nan ruat?

⁵Si loh e, ka nan simh na, nannih khawm nan rim lo chun chu hâwi ber hen nan vei ver lai," a ti le, a sâng.

⁶Chun, hi tahthimh thu hi Jisu nih a sim le: "Âu nih mawh grep dûm ah theipi a phun mi pakhat a nei le; chun, a kûng ah chun a rah a hawng hâwl le, pakhat khawm a tawng lo.

⁷Chun, grep dûm zauhtu sinah, 'Zauhnik, kum thum sung hin hi theipi kûng ah hin a rah ka va hâwl tâwn le, pakhat khawm ka tawng lo; hâu ko; zeirangah mun luah tak hen a um kumza?' a ti.

⁸Chun, anih nih chun a sinah, 'Pu, tu kum tal hi um sele, kulh dak hen ka chawh lai le, êk hen ka vurh lai rih le;

⁹chu tikah a rah chun a tha lai, a rah lo lam chun hâu ko,' " a ti.

¹⁰Chun, Dinhni ah Jisu nih chun pumhnâk in pakhat ah a sîntir na.

¹¹Chun, kum leiriat khuri vuanh chak lo rivei nunau pakhat a um; chu minung chu a kûn kumza le, amah lung hen chun ding ziar hen a dîr kho lo.

¹²Chun, Jisu nih a muh kê hen a kawh le, a sinah, "Nunau, na chaklonâk nih chun a nan thlah rawh," a ti.

¹³Chun, a tlûnah a kut a thâng le, chun, zeikarlo ah a ding chawlh le, Pathian a sawr rawh.

¹⁴Chun, Jisu nih Dinhni ah a damh ruangah pumhnâk in hotu chu a thinthawk le, mi zapi chu a sawnh le, an sinah, "Minung rianțuannâk ding ni ruk a um khateh; chu karah chun hawng ule, a damhtir u, Dinhni ah hawng lo hen," a ti.

¹⁵Lalpa lam nih chun a sinah, "Nannih mi perpê tla, Dinhni ah mah chawpê mawh sanatung mawh a râwl einâk ah mi sût hen tî din ding hen nan kalpi chiau tâwn lo ma?

¹⁶Hi nunau hi Abraham fanu asi mi, Setan nih kum leiriat a phuar kumza mi hi Dinhni ah hi minung phuarnâk hi sût piak lo zia masi?" a ti le, a sâng.

¹⁷Chubang tla chu a sim liauah a mêlma tla zawzawng chu an ningzâk le, mi zapi lam chu a thil rokual ti zawzawng ruangah anna lâwm ver.

¹⁸Chuvachun, anih nih chun, "Pathian Ram chu zeî hâwi mesi? Zeî hen me ka tahțhimh lai?

¹⁹Anțam chî mal khat mi nih a lâk le, a dûm ah a vawrh mi hâwi chu asi: chu chu a hawng kho le, thing a hawng si le, chung zuang va tla chu a țeng tla ah chun an riak," a ti.

²⁰Chun, Pathian Ram chu zeî hen me ka tahțhimh lai? a ti nawlh.

²¹Thilnu nunau nih a lâk le, sangvut seah thum a ektê hen a runh ver tiang hen phûm hâwi chu asi," a ti.

²²Chun, anih nih chun sîntir vima hen, Jerusalem lei fûk hen, khuapi leh khuatê a pal vima.

²³Chun, mi âu nih mawh a sinah, "Ruangsuaah tla chu tâwmtê ma an si?" a ti. Chun, anih nih chun an sinah,

²⁴"Kawtkâ bî ah chun lût tum râm u; ka nan simh na, mi tamtak nih lût an tum lai le, an lût kho lai loh.

²⁵In dâwngpu a thawk hen, in a khâr nûnah chun, nannih lênglei ah dîr hen, 'Lalpa in hawng kan awnh,' ti hen, inkhâr nan hawng kik tikah anih nih: 'Kha zeî lei mi me nan si ka nan theih na lo;' ti hen a nan sâng na lai:

²⁶chu tikah chun, nannih nih, 'Na mitmuh khawmah kan din hen kan ei rawh khateh; kan zâwllâi tla khawmah na sîntir tâwn khateh,' nan ti teh lai.

²⁷Chun, anih nih, 'Ka nan simh na, kha zeï lei mi me nan si ka nan theih na lo' nannih thilsual ti zawzawng tla: ka sinah mi kal ver u,' a ti teh lai.

²⁸Abraham, Isak leh Jakob leh khuavâng zawzawng tla chu Pathian Ram ah um mi nan muh hen, nannih lênglei ah suah nan si tikah, chunah chun tap leh hachang rial a um lai.

²⁹Chun, sak leh thlang, sim leh mar thawk hen an hawng kal lai le, Pathian Ram ah an hawng to lai.

³⁰Chun, ngâinik u, madungchem tla khawm masachem ah um ding mi an um le, masachem tla khawm madungchem ah um ding an um," a ti.

³¹Chu liau takah chun Farisai âu tla mawh an hawng kal le, a sinah, "Suak le, hinah mi hi kal rawh; Herod nih thah ding an awt asi," an ti.

³²Chun, anih nih chun an sinah, "Chu kâwlui sinah chun hi thu hi va sim u; ngâi rawh, tusûn khawmah thâi khawmah khuri tla ka nar lai le, nganfâk tla khawm ka damh lai le, kip ah ka lîm lai.

³³Zeikhawm si sele, tusûn khawmah, thâi khawmah, kip khawmah ka kal vima ding asi; Jerusalem ah lo chun khuavâng thih kho asi lo," a ti.

³⁴"Aw, Jerusalem! Jerusalem! khuavâng tla thahtu, na sinah Pathian nih a hawng fial mi tla lung hen thi thlap sehtu, ârpinu nih a fa tla a thla tangah a khurh hâwi hen na fa tla vei zeizat me khurh ka tum mi kha! Sikhawmsele, na duh lo.

³⁵Zauhnik, nan in chu a karo hen an mâk piak na rawh. Ka nan simh na, 'Lalpa min hen a hawng kal mi chu a thaw a suak,' nan ti lân lo chu, nan ka muh lai lo rawh," a ti.

Luk 14

¹Chun, Dinhni ah Farisai hotu pakhat in ah buh ei ding hen a kal mi chu an thlingthlâk ko le,



- ²chun, a mâika ah chun damlo a phing mi âumawh a um.
- ³Chun, Jisu nih Dân sîntirtu leh Farisai tla chu a sawnh na le, an sinah, "Dinhni ah damh a thiang ma thiang lo?" a ti.
- ⁴Annih lam chu an dâisip. Chun, anih nih chun damlo chu a tleih le, a damh le, a kaltir rawh.
- ⁵Chun, an sinah, "Nannah lakah nan sanatung mawh nan chawpê mawh tikhur chawh ah tlâ sele, Dinhni ah khawm âu me nûk hen suah lo lai?" a ti.
- ⁶Chubang chu an sâng kho fâwn lo.
- ⁷Chun, an mi sâwm tla nih tophah ða chem an thîm zia Jisu nih a muh le, an sinah tahthimh thu a sim:
- ⁸"Lâwinâk puai ei ding hen âu nih mawh a nan sâwm tik chun tophah ða chem ah to lah; chu hâwi asi lo chun nangmah ngâk hen milian dauh a sâwm lebang lai le,
- ⁹chun a nan sâwmtu nih chun, 'Hi minung tonâk ding hi kianh,' a nan ti lai; chun nang ningzak tak hen tophah ða lo chem ah to nawlh ding ðung ko na si.
- ¹⁰An sâwm tik chun tophah ða lo chem ah va to rawh; chuvachun, a nan sâwmtu a hawng kal tikah na sinah, 'Kâwi, tophah ða dauh ah to rawh,' a nan ti lai. Chun, buh na dûmpi na mi tla mitmuh ah chawnglawmh hen na um lai.
- ¹¹Â sung-û tir mi zawng an nâu lai le, â nâutir mi chu chawnglawmh hen an um lai," an sinah a ti.
- ¹²Chun, a sâwmtu sinah khawm chun, "Sûn ah mawh, zân ah mawh puai na tuah tikah na kâwi tla, na unau tla, na rualsia tla, na zâwlbâwm minei tla chu sâwm lah; chu lo chun an sâwm bâk lai le, an rulh nawlh kher lai.
- ¹³Puai na tuah tik chun mipâm tla, suaksual tla, kekhêng tla, mitchâw tla, sâwm dauh na.

- ¹⁴Chun, chubang nih chun an rulhnâk ding an nei lo ruangah na thaw a suak lai; mi rep tla thawknawlh tikah Pathian nih a rulh na awt ruangah," a ti.
- ¹⁵Chun, buh a dûmpi mi âu nih mawh chubang thu chu a theih le, Jisu sinah, "Pathian Ram ah buh ei ding mi chu a thaw a suak," a ti.
- ¹⁶Chun, Jisu nih chun a sinah, "Mi âu nih mawh zân ah puai rokual tak hen a tuah le, mi tamtak a sâwm le;
- ¹⁷chun, a ei tikah chun a mi sâwm tla sinah, 'Hawng kal u rawh, tuah zeizawng tuah thluh asi rawh, ti ding hen to-aw a fial.
- ¹⁸Chun, an ektê hen bang ver hen phelhsawlhânâk an siam ver. A masachem nih a sinah, 'Lo ka châwk le, zauh ding hen ka kal a herh asi; zângfah hen ngaihdam hawng ka deih piak,' a ti.
- ¹⁹Chun, midang nih, 'Chawpê bawp nga ka châwk le, a sia a ṭha zauhfiang ding hen ka kal awt, zângfah hen ngaihdam hawng ka deih piak,' a ti.
- ²⁰Chun, midang nih, Nupi ka nei rawh le, churugah ka hawng kho lo,' a ti.
- ²¹"Chun, to-aw nih chun a pu sinah chubang zawng chu a simh le, chun in dâwngpu chu a thinthawk le, a to-aw sinah, 'Suak le, zâwllâi tla ah, a kenpak tla ah kal rereh le, mipâm tla, suaksual tla, mitchâw tla, kekhêng tla hinah hawng put na,' a ti.
- ²²Chun, to-aw nih chun, 'Pu, thu na ka pêk mi hâwi khan ka ti le, sikhawmsele, mun a lâwng nget rih, a ti.
- ²³Chun, a pu nih to-aw sinah chun, 'Suak le, lampi tla ah, khuavâu tla ah kal le, ka in khat ding hen hawng kaltir râm na rawh.
- ²⁴Ka nan simh asi, mi ka sâwm mi tla nih khan pakhat khawm nih ka puai an ei lai loh a ti," a ti.
- ²⁵Chun, mi zapi tla cherkhet a sinah an hawng kal bâk, chun anih chu â hawi le, an sinah,

26"Âuzawng ka sinah hawng kaltu nih chun a pa le, a nu le, a nupi le, a fa le, a unau le, a farnu le, amah nungnâk khawm a hua lo chun ka ðhiruai asi kho lai lo.

27"Âuzawng mah kraws put hen hawng ka zûl lo mi vial chu ka ðhiruai asi kho lai loh.

28"Nan lakah âuzawng nih in sâng sak tum ule, a tîrah to hen, sak dihnâk khawp sum nan nei le neilo theih ding hen a man zat ding âu nih me a sût lo lai?

29"Chu hâwi asi lo chun, lung phun zet rawh hen a sak dih kho lo chun a zauhtu zawng nih,

30"Hi minung nih hin a dirh thlap le, a sak dih kho fâwn lo, ti hen an nihsanh sual lai.

31"Chun, lalchem âu nih me lalchem dang do ding hen a kal awt ah, a tîrah to hen, minung sîng nih hen amah do ding a hawng kal mi chu, minung sîng hen a tâwn ngam awt le awt lo a thlûk tâ lo lai?

32"Chu hâwi asi lo âwk leh, lalchem dang chu lâk tak hen a um liauah remnâk lei thu thutiam deih ding hen rêl a fial lai.

33"Chu hâwi ber hen, nan lakah hin âuzawng a neih zawzawng kaltâk lo mi vial chu ka ðhiruai asi kho lai loh," a ti.

34"Chitê hi a ðha, sikhawmsele, chitê khawm a dâwng chun, zeï hen an altir nawlh lai?

35"Tual rangah khawm a ðha lai lo, chun churtirnâk rang khawmah a ðha lai loh. Mi nih a lawnh ko tâwn. Âuzawng theihnâk ding hen nâ nei nih chun theih seh," a ti.

Luk 15

1"Chun, siah khawlhtu tla leh misual tla zawzawng nih a thu theih ding hen a kiangah an hawng fûk.

- ²Chun, Farisai tla leh Dân sîntirtu tla nih chun, "Hi minung nih hin misual tla a kawmh le, an sinah lebang buh a ei tâwn," ti hen an chipchiar.
- ³Sikhawmsele, anih nih chun an sinah hi tahthimh thu hi a sim:
- ⁴"Nan lakah âuzawng nih dawrâ zâ nei sele, chu lakah pakhat tâu sele, ramkaro ah sâwmkua leh pakua chu mâk hen, a tâu mi chu a tawng lân lo chu âu nih a hâwl lo lai?"
- ⁵Chun, a tawng nawlh chun lâwm tak hen a liang ah a put tâwn.
- ⁶Chun, in a tlung kê hen a hâwi tla leh a zâwlbâwm tla a pumh le, an sinah, 'Hawng ka lawmhpi u, ka dawrâ tâu kha ka tawng nawlh rawh,' a ti tâwn.
- ⁷Ka nan simh na, chu hâwi ber hen mi rep sâwmkua leh pakua rim ding neilo tla ngâk hen chun misual pakhat a rim mi tlûnah hin vân ah lâwmnâk a um dauh lai."
- ⁸"Asi lo leh, nunau pakhat nih dragma parâ nei hen pakhat tâu sele, khâwnvâr kaih hen, in phiat hen, a tawng lân lo chu chiamchariamtê hen âu me hâwl lo lai?"
- ⁹Chun, a tawng nawlh chun a hâwi tla leh a zâwlbâwm tla a pumh na le, 'Hawng ka lawmhpi u, ka dragma tâu kha ka tawng nawlh rawh,' a ti tâwn.
- ¹⁰Ka nan simh na chu hâwi ber hen Pathian vânmifial tla lakah chun misual pakhat a rim mi tlûnah anna lâwm tâwn asi."
- ¹¹"Chun, mi âu nih mawh fapa panih a nei.
- ¹²A ngâksia dauh mi nih chun a pa sinah, 'Pa, ro ka tingvo hawng ka pêk,' a ti; chun a sum chu an sinah a then rawh.
- ¹³Chun, ni sâwtlotê ah â fapa a ngâksia dauh mi nih chun a tingvo a khawmh hep le, ram lât takah a kal. Chunah chun nuam tuktarâi hen a um le, a sum chu a veih salam rawh.
- ¹⁴Chun, a veih hep kê hen chu ram ah chun pâm thungâi a hawng tlung le, ei ding a sam rawh.

- ¹⁵Chun, chu ram ah mi pakhat sinah a va a dawr le; chu nih chun vawk râwl pêk ding hen a lo leiah a fial.
- ¹⁶Chun, zeilo kâwng vawk nih an ei mi tla chu thungâi ei bâk ding a duh; âukhawm nih zeikhawm an pêk lo ruangah.
- ¹⁷Chun, â theihfiang kê hen, 'Ka pa sinah lawh a kal mi tla buh ei châwk lo nei an tam tam hen, keimah lehlam chu hinah sungvâng hen ka thi awt ko rawh!
- ¹⁸Ka thawk lai le, ka pa sinah ka kal lai le, a sinah, Pa, Pathian lakah leh nangmah mitmuh hen thil ka soal; na fapa si tlâk ka si lo rawh.
- ¹⁹Na sinah lawh a kal mi pakhat hâwi hen hawng ka siam rawh ka ti lai,' a ti.
- ²⁰A thawk le, a pa sinah a kal rawh. "Chuvachun, lâk takah a um liauah a pa nih a muh le, thungâi a siherh le, a fûk phêt le, an ir anna tawnh le, a châwchawk chiam.
- ²¹Chun, a fapa nih a sinah, 'Pa, Pathian lakah leh nangmah mitmuh hen thil ka soal; na fapa si tlâk ka si lo, a ti.
- ²²Sikhawmsele, a pa nih chun a to-aw tla sinah, Puan ṭha chem kha hawng put rereh ule, aihtir u; a kut ah pizung leh a kezaphah ah pheikawk bunhtir u.
- ²³Chawpê fa bit tak kha hawng put ule, thah u, lâwm tak hen kan ei lai.
- ²⁴Hi ka fapa hi a thi le, a hawng nung nawlh rawh asi hi; a tlâu le, kan tawng nawlh rawh asi hi,' a ti. Chun, lâwm tak hen an um rawh.
- ²⁵"Sikhawmsele, a fapa a upa dauh mi chu lo ah a um le, chun in a hawng tlung bâiah zeilo tum hâu leh lâm hâu a theih rawh.
- ²⁶Chun, to-aw pakhat a kawh le, 'Chu! Chu! ze me si rawh?' ti hen a deih.
- ²⁷Chun, anih nih chun a sinah, 'Na nau a hawng tlung le, him tak hen a muh ruangah na pa nih chawpê fa bit tak kha a thah asi, a ti.
- ²⁸Chun, a thin a thawk le, a lût duh lo rawh. Chun, a pa a hawng suak le, a lêm.

²⁹Sikhawmsele, anih nih chun a pa sinah, 'Ngâi rawh, kum hi tiang hi na rian ka nan ÷uan piak le, na thu tâ nih ka êl dah lo; ka hâwi tla hen lâwmnâk ka siam dingah kêl fatê khawm na ka pêk lo.

³⁰Sikhawmsele, hi na fapa â zuar mi nunau sinah na sum veih heptu hi a hawng kê hen amah rangah chawpê fa bit tak kha na va thah piak rih,' a ti le, a sâng.

³¹Chun, anih nih chun a sinah, 'Ka fapa, ka sinah um kumza mi na si lo mazei, ka neih zawzawng hi na tâ asi.

³²Lâwptlo tak hen kan um ding asi, hi na nau hi a thi le, a hawng nung nawlh rawh; a tlâu le, kan tawng nawlh rawh asi hi,' " a ti.

Luk 16

¹Chun, Jisu nih a ÷hiruai tla sinah, "Minei âu nih mawh sum kiltu a nei le, chu nih chun sum a veih salam piak leukângah a sinah an phiar.

²Chun, anih nih chun amah chu a kawh le, a sinah, 'Na thu ka theih mi hi zeizia mesi? Na sum zauhkhenh thâwngthâng hawng ka rîn piak ver rawh; tu ri hen sum kiltu ah na um kho lai lo rawh,' a ti.

³Chun, sum kiltu nih chun a thinlung hen, 'Ka pu nih ka sum kil a ka phelh awt mi hi zeitin ka ti lai aw? Tual chawh tâ nih ka huam lo, kutdawnh tâ nih ka ningzàk fâwn.

⁴Sum kil a hawng ka phelh tikah an in ah an hawng ka umtir khonâk ding hen ka ti ding dân ka theih rawh, a ti.

⁵Chun, a pu sum battu tla chu a kawh khap na le, a masachem sinah chun, 'Ka pu sinah zeizat na bat?' a ti. Anih nih chun,

⁶'Bat zakhat rih oliv sariak,' a ti. Chun, anih nih chun a sinah, 'Na lasui lâk le, to rereh le, sâwmnga rîn rawh,' a ti.

⁷Chun, midang sinah, 'Nang zeizat na bat?' a ti. Anih nih chun, 'Fâng kor sâng khat,' a ti. Chun, anih nih chun a sinah, 'Na lasui lâk le, zariat rîn rawh,' a ti.

- 8"Chun, a pu nih chun sum kiltu reple chu ti dân a thiam ruangah a sawr rawh le, chêu fa tla ngâk hen hi laikulh fa tla hi anmah san chun an fing dauh asi.
- 9"Chun, ka nan simh na, sum telê hen nan rangah hâwi tla siam u; sum a veih tikah zungzâl umnâk ah chun an umtir na nâk ding hen.
- 10Âuzawng tâwmtê lakah zumhkâi chu tamtak lakah khawm zumh a kâi tâwn, âuzawng tâwmtê lakah zumhkâilo mi chu tamtak lak khawmah zumh a kâilo tâwn asi.
- 11Sum telê lakah men zumh nan kâilo chun âu nih me sum tak chu an kiltir na lai?
- 12Midang lak men ah zumh nan kâilo chun nanmah tâ chu âu nih me an pêk na lai?
- 13To-aw âukhawm nih hotu panih rian a kêp kho lo; pakhat hua hen pakhat a duh lai, asi lo leh pakhat tãnh hen pakhat a zauhnawmh lai. Pathian leh sum rian nan tãuan kêp kho lai loh," a ti.
- 14Chun, Farisai, tangka sunhsaktu tla nih chun chubang thu zawzawng an theih le, an nihsanh.
- 15Chun, anih nih chun an sinah, "Minung mitmuh ah a reptir mi cho nan si, sikhawmsele, Pathian nih nan thinlung a theih; minung lakah chawnglawmhnâk chu Pathian mitmuh hen nâwm tak asi.
- 16"Dân leh khuavâng tla thu chu Johan a hawng um tiang khan a um le; chu thawk chun Pathian Ram Thâwngthâng Tã an sim le, mikip zângrân ko hen an lût chiau.
- 17Sikhawmsele, Dân thu rîn zek tê tlâu ngâk chun vân leh laikulh tlâu a awl dauh lai."
- 18"Âuzawng nupi mâk hen nupi dang neitu zawng chu tângdang a pawmtâk asi; âuzawng mi nupi mâk umpitu zawng chu tângdang a pawmtâk asi:

- 19"Chun, minei âumawh a um. Puan senduk leh puan mangthia â aih le, nisia nuam ti tak hen a um tâwn.
- 20Chun, a min Lazar kutdawnh pakhat mâ hen a khat phak mi kawtkari ah an siah tâwn le,
- 21minei dawhkân ah mi thawk hen ei mi neknâwi tlâ mi tla chu ei a duh le; ui tla nih chun a mâ tla an liak piak tâwn.
- 22"Chun, kutdawnh chu a thi le, vânmifial tla nih an put le, Abraham tângkâ ah an siah. Minei khawm chu a thi le, phûm hen a um rawh.
- 23Chun, mithi khua ah chun nganfâk tuar rerêng hen a um le, a vâ a tâu le, lâk takah Abraham tângkâ ah Lazar um mi a muh rawh.
- 24Chun, a âu le, 'Pu, Abraham, hawng ka zângfah le, Lazar kha hawng fial, a kutdawng pâr tî ah ching sele, ka lei daihnâk ding hen; meialh ah hin thungâi ka hamh asi, a ti.
- 25"Sikhawmsele, Abraham nih, Ka fapa, nangnih na dam liau khan thil tha na ting le, chu hâwi ber hen Lazar nih thil tha lo â ting mi kha theih rawh; sikhawmsele, tuah anih chu hinah lungngam tak hen a um le, nang lam chu na hamh makha.
- 26Hi lo khawm ah, hi thawk hen nan sinah kal duh tla chu an kal kho lonâk ding hen leh âukhawm kha thawk hen kan sinah an hawng kho lonâk ding hen kannih leh nannih karah hin tual kak thûk tak an siam asi,' a ti.
- 27Chun, anih nih chun, 'Asi chun, anih chu ka pa in ah fial ding hen ka nan ngiar.
- 28Unau panga ka nei ruangah; hi nganfâknâk mun ah hin an hawng kal lebang lai, semsê ngâi tak hen simh na seh,' a ti.
- 29"Abraham lam nih chun, Mosi leh khuavâng tla an nei khateh; anmah thu ngâi na seh, a ti.
- 30Chun, anih nih chun, 'Pa Abraham, silo, mithi lakah mi ngelchel an sinah va kal sele an rim lai, a ti.

³¹Chun, anih nih chun a sinah, Mosi leh khuavâng tla thu an ngâilo chun âumawh a thi mi thawknawlh khawmsele an lung lêm lai lo,' " a ti.

Luk 17

¹Chun, Jisu nih a thiruai tla sinah, "Tlûknâk tla hi um lo kho asi lo, sikhawmsele, tlûknâk umtirtu tlûn chu a pit!

²Hi bang mi mê tla lakah pakhat khawm tlûktir ngâk chun a tlûktirtu ngâwng ah fâng rialnâk lung awihtir hen tisumsumriat ah thlâk sele a rangah a tha dauh lai.

³Thiamthih u! "Na unau nih thil a soal chun, nun simh rawh; chun â sîr chun ngaihdam rawh.

⁴Ni khat ah na tlûnah vei sarikh thil soal hen, vei sarikh, 'Ka sîr,' ti hen, nangmah leiah a hawng âwn chun na ngaihdam ding asi," a ti.

⁵Chun, thiruai tla nih chun Lalpa sinah, "Kan lungnâk pungtir," an ti.

⁶Chun, Lalpa nih chun, "Ançam châ fang khat hâwi lungnâk nan nei chun, hi theipi kûng sinah hin, 'Hawng a phâwi le, tisumsumriat ah va a phun, nan ti lai le, nan thu a âwi ko lai.'"

⁷"Sikhawmsele, nannih lakah âuzawng nih tual nâwn hen mawh dawrâ vêng hen mawh to-aw nei ule, a hawng tlung kê hen, 'Buh ei hawng a dawmh sawm,' âu nih nan ti lai?

⁸'Ka ei ding hawng ka tuah piak le, na tâi sâwm le, ka din leh ka ei dih lân lo chu hawng ka bul; chu nûnah chun nang na din hen na ei lai, âu nih ti dauh lo lai?

⁹Nan thu hâwi hen a ti ruangah nan to-aw sinah lâwmthu nan sim dah mazei?

¹⁰Chu hâwi ber hen nannih khawm nih nan sinah thupêk zawzawng hâwi hen nan ti nûnah, to-aw salam kan si, kan ti ding mi rêng asi,' ti u," a ti.

¹¹Chun, Jerusalem ah an kal awt ah, Samari leh Galili ram chu a lanh.



- ¹²Khua zeimawh ah a lût awt liauah mi phâr parâ nih an tawng. Chu tla chu lât takah an dîr le,
- ¹³chun hâu fâk tak hen, "Jisu! Sîntirtu! hawng kan siherh," an ti.
- ¹⁴Chun, anih nih chun chu chu a muh rawh chun an sinah, "Bâwlpu tla sinah va a zauhtir u," a ti. Chun, an kal liauah chun an thiang chawlh rawh.
- ¹⁵Chun, an lakah pakhat nih a dam tih â theih kê hen hâu fâk tak hen Pathian sawr bû hen a kêr nawlh rawh.
- ¹⁶Chun, Jisu kê bul ah a bawkbukhup le, a lâwmthu a sim. Chu minung chu Samari mi asi ngengê.
- ¹⁷Chun, Jisu nih a sâng le, "Mi parâ kha nan thiang rawh silo ma? Pakua tla kha zeiah?"
- ¹⁸Pathian sawr ding hen hawng kêr nawlh mi lakah, hi ram dang mi cho lo hi, âukhawm nih an tawng lo masi?" a ti.
- ¹⁹Chun, a sinah, "Thawk le, kal rawh, na lungnâk hi na dam phah asi," a ti.
- ²⁰Chun, Farisai tla nih Pathian Ram a hawng tung tik ding an deih ruangah an sinah, "Pathian Ram chu muh kho hen a hawng tung lo.
- ²¹'Zauhnik, hinah hi,' mawh 'Khinah khi,' mawh khawm an ti lai loh. Ngâinik u, Pathian Ram chu nan lakah a um asi," a ti le, a sâng.
- ²²Chun, thiruai tla sinah chun, "Minung Fapa dam liau ni tla hi ni khat tal nan muh duh ni a um teh lai, sikhawmsele, nan muh lai lo rawh.
- ²³Chun, nan sinah, 'Zauhnik u, khinah khi, zauhnik u, hinah hi,' an ti na lai. Kal lah ule, annih chu zûl lah u:
- ²⁴Kâwlkil khatlei dawmh thawk hen khatlei dawng thiang mîmthlâ a lek le, kâwlkil khatlei tiang a chêu hâwi khan Minung Fapa hi a hawng nawlh ni ah a um awt asi.
- ²⁵Sikhawmsele, chu lânah chun thil tamtak a tuar ding asi, chun tusan minung tla duhlo hen a um ding asi.

²⁶Chun, Noa dam liauah thil umzia hâwi khan, Minung Fapa a hawng kal nawlh ni ah khawm a um bâk lai.

²⁷Noa chu lawng ah a lût le, buanso a hawng tlung le, an ektê hen a thah ver na ni kha a tlung lân lo chu an din hen an ei le, nupi pasal anna um tâwn.

²⁸Chu hâwi ber hen, Lot dam liauah a hawng um; an din hen an ei le, an chhawk hen an zuar le, an ching le, an sak tâwn.

²⁹Sikhawmsele, Sodom khua thawk hen Lot a suak ni ah chun vân thawk hen mei leh kât a sâr le, an ektê hen a thah ver na.

³⁰Chu hâwi ber hen Minung Fapa hi a hawng a langh ni ah chun a um lai.

³¹"Chu ni ah chun âuzawng a sum in sungah um hen, amah in tlûnah a um mi chu lâk ding hen tum lah seh; chun lo ah um mi chu tlung lah seh.

³²Lot nupi theihkumza u.

³³Âuzawng a nungnâk hum tumtu nih chun a thlâu lai le, âuzawng a nungnâk thlâutu nih chun a hum lai.

³⁴Ka nan simh na, chu zân ah chun ihkhun pakhat ah minung panih it mi an um lai le, pakhat chu lâk hen a um lai le, pakhat chu mâk hen a um lai.

³⁵Nunau panih fâng rial hen an um lai le, pakhat chu lâk hen a um lai le, pakhat chu mâk hen a um lai," a ti.

³⁶Lo ah mi panih an um lai le, pakhat chu lâk hen a um lai le, pakhat chu mâk hen a um lai.

³⁷Chun, a thiruai tla nih chun a sinah, "Lalpa, zeiah me?" an ti le, an sâng. Chun, Jisu nih chun an sinah, "Ruak umnâk zawngah ruaklâwmmû tla khawm anna pûm lai," a ti.

Luk 18

¹Chun, lungdawng lo hen thla an cham kumza ding asi ti theihnâk ding hen thiruai tla sinah tahthimh thu a sim:

- ²"Zei khua ah mawh lâirêltu pakhat a um le, chu nih chun Pathian a ÷ih lo le, minung khawm a sunhsak lo.
- ³Chun, chu khua ah chun numei pakhat a um le, anih chu, 'Ka leido lakah phû hawng ka lâk piak, ti hen a sinah a kal kumza.
- ⁴Chun, sâwt tak a duh lo le; sikhawmsele a nehnûn ah chun a thinlung hen, 'Pathian ÷ihlo hen minung sunhsak lah khawmsele,
- ⁵hi numei nih hin a ka nawktir ruangah a phû ka lam piak lai, chu lo chun a hawng kal nget lai le, a hawng ka hamhtir lai,' a ti," a ti.
- ⁶Chun, Lalpa nih, "Lâirêltu replo thusim chu theih u.
- ⁷An lakah a dawnh rih khawmsele a mi thîm, a sûn a zân hen amah kawhtu tla phû chu Pathian nih a lam piak lai lo ma?
- ⁸Ka nan simh na, an phû a lam piak sawm lai. Sikhawmsele, Minung Fapa hi a hawng kal tikah chun laikulh ah hin lungnâk a hawng muh lai mazei?" a ti.
- ⁹Chun, mi rep a ruat hen, midang zawzawng zauhnawmh tâwntu âu tla mawh sinah chun hi tah÷himh thu khawm hi Jisu nih a sim:
- ¹⁰"Mi panih Pathian Biakin ah thlacham ding hen an kal le; pakhat chu Farisai asi le, pakhat chu siah khawlhtu asi.
- ¹¹"Farisai chu a dîr le, amah lâwng hen hi hâwi hen thla a cham: 'Pathian, midang hâwi hen lêp mang le, replo le, ÷ângdang pawmtâktu ka si lo ruangah leh hi siah khawlhtu hâwi khawm hi ka si lo ruangah na tlûnah ka lâwm.
- ¹²Dinhni kar khat kipah vei nih buh ka ngei tâwn, ka nei mi zawng parâ lû ah pakhat ka pêk tâwn, a ti.
- ¹³"Siah khawlhtu lam chu lât takah a dîr le, vîn lei khawm a zauh ngam lo. 'Pathian, kei misual hi hawng ka zângfah,' ti hen, a ir rerêng a chumh.
- ¹⁴Ka nan simh na, a masa ngâk hen chu minung chu mawh lo dauh hen a in ah a lâwi rawh. A sung-û tir mi zawng an nâu lai le, â nâutir mi chu chawnglawmh hen an um lai," a ti.

- ¹⁵Chun, mi zeimaw mi nih an fasêm tla tlûnah kut thâng ding hen Jisu sinah an hawng put. Thiruai tla nih chun chu chu an muh kê hen an fâi na.
- ¹⁶Sikhawmsele, Jisu nih annih chu a kawh na le, "Ngâksia tetê ka sinah hawng kaltir ule, nar lah u; Pathian Ram chu hi bang minung tla tâ asi ruangah.
- ¹⁷Thungâi tak hen ka nan simh na, âuzawng Pathian Ram chu ngâksiatê nih a lawmh hâwi hen lawmh lotu zawng a sungah an lût lai lo," a ti.
- ¹⁸Chun, hotu âu nih mawh Jisu sinah, "Sîntirtu tha, zungzâl nungnâk ting ding hen zeitin ka ti lai?" ti hen, a deih.
- ¹⁹Chun, Jisu nih a sinah, "Zeirangah tha na ka ti? Mi pakhat cho lo chu âukhawm tha an um lo, chu chu Pathian asi.
- ²⁰Thupêk tla na theih khateh, 'Tângdang pawmtâk lah, fîr lah; phiar lah, na nu leh na pa chawnglawmh rawh; ti tla hi,' " a ti.
- ²¹Chun, anih nih chun, "Chubang thu zawzawng chu ka ngâksiatê thawk hen ka zâwt vima tâwn," a ti.
- ²²Chun, Jisu nih chu chu a theih rawh chun a sinah, "Tu khawmah kâng khat na bat; na neih zawzawng zuar le, mipâm tla sinah then, chuvachun vân ah ro na nei lai; chun, hawng kal le, hawng ka zûl," a ti.
- ²³Anih lam nih chun chubang thu chu a theih rawh chun thungâi a zûr le, thungâi a nei ruangah.
- ²⁴Chun, Jisu nih amah chu a zauh le, "Mi nei tla chu Pathian Ram ah lût a har awt a!
- ²⁵Mi nei Pathian Ram ah lût ngâk hen sangâwngsâu thim kua lakah lût a awl dauh asi," a ti.
- ²⁶Chu chu theih tu tla nih chun, "Asi chun âu me rangsuak kho lai?" an ti.
- ²⁷Anih lam nih chun, "Minung ti kholo mi Pathian nih chun a ti kho asi, a ti.
- ²⁸Chun, Peter nih, "Zauhnik, kannih nih kan in leh kan lo kaltâk hen ka nan zûl ko rawh," a ti.

²⁹Chun, Jisu nih chun an sinah, "Thungâi tak hen ka nan simh na, âuzawng Pathian Ram ruangah a in mawh, nupi mawh, unau tla mawh nu leh pa mawh, fa tla mawh kaltâk mi zawng chu,

³⁰tu dam kar lîlâ ah hin chu ngâk a tam dauh tawng lo ding âukhawm an um lo, tik hawng tlung ding mi lakah zungzâl nungnâk hen," a ti.

³¹Chun, leinîh tla chu a dang hen a kalpi na le, an sinah, "Ngâinîk u, Jerusalem ah kan kal awt hi; khuavâng tla thurîn zawzawng kha Minung Fapa tlûnah hin a tlung lai.

³²Phundang tla sinah an pêk lai le, nihsuak siamnâk ah an mang lai le, ningzakkâi tak hen an siam lai le, chil an sah lai.

³³Chun, an vuak lai le, an thah lai le, chun ni thum ni ah a thawknawlh lai," a ti.

³⁴Chun, chubang thu rerêng chu a ngaihnâk an theih lo; chun thusim chu an lakah thuh hen a um le, zeî me a sim ti khawm an theih lo.

³⁵Chun, Jisu chu Jeriko a tlung awt ah, mitchâw âumawh lam vâu ah kutdawnh hen a to.

³⁶Chu nih chun mi zapi kal hâu a theih le, "Zeî me si?" ti a deih.

³⁷Chun, annîh nih chun Nazaret Jisu a kal asi ti an simh.

³⁸Chun, anîh chu "Jisu, David Fapa, hawng ka zângfah rawh," ti hen a âu rawh.

³⁹Chun, a mâi masa mi nih chun dâisip ding hen an fâi le, sikhawmsele anîh chu, "David Fapa hawng ka zângfah rawh," ti hen a âu dadauh.

⁴⁰Chun, Jisu a dîr le, a sinah hawngpi ding thu a pêk le, chun a kiangah an hawng tleng rawh chun,

⁴¹"Na lakah zeitin an ti piak sele na ka duh?" a ti le, a deih. Chun, anîh nih chun, "Lalpa, muh kho ka duh," a ti.

⁴²Chun, Jisu nih a sinah, "Muh kho rawh ne, na lungnâk hi na dampi asi," a ti.

⁴³Chun, zeikarlo ah a muh sawm le, Pathian sawr bû vima hen amah chu a zûl rawh; chun mi zawzawng nih chun an muh rawh chun Pathian an sawr.

Luk 19

¹Chun, Jisu Jeriko ah a lût le, a lan awt.

²Chun, minung pakhat a min Zakai a um le, chu minung chu siah khawlhtu hotu asi. Amah khawm thungâi a nei.

³Chun, Jisu chu zeî hâwi mi minung me asi ti muh a tum; mi zapi ruangah amah tâ nih a niam le, a muh kho lo.

⁴Chun, a lehkhanh le, Jisu zauh ding hen theipi kûng pâr ah a kâi le, chu lampi chu a hawng zawh ding asi ruangah.

⁵Chun, Jisu chu chu mun a tung rawh chun a vâa a tâu le, a sinah, "Zakai, hawng tum rawh; tusûn ah na in ah ka tung ding asi," a ti.

⁶Chun, mawhsareh hen a tum le, lâwm tak hen amah chu a tungtir rawh.

⁷Chun, chu chu an muh kâ hen an ektê hen, "Misual sinah tung ding hen a lût rawh khi! " an ti le, an chipchiar.

⁸Chun, Zakai chu a dîr le, Lalpa sinah chun, "Ngâinik, Lalpa, ka neih khingkhuai mipâm tla sinah ka pêk lai le, chun âu lakah tal zeî thil tal lêp khawmsele aleh li hen ka rulh nawlh lai," a ti.

⁹Chun, Jisu nih Zakai thu a sim le, "Tusûn ah hi in ah hin ruangsuaknâk a hawng tung rawh, anih khawm Abraham fapa asi ruangah.

¹⁰Tlâu leh vei hâwl leh ruangsuah ding hen Minung Fapa hi a hawng kal ngen asi, ' a ti.

¹¹Chun, chubang thu tla chu an ngâi liauah, Jerusalem a nâi rawh ruangah leh Pathian Ram hawng lang sawm ding hen an ruat ruangah tahthimh thu a simh na.

¹²Chuvachun, hi bang thu hi a sim, "Mi lian âumawh lalchem si ding hen thuneihnâk lâk hen hawng kîr nawlh ding hen lam lât takah a kal.



- ¹³A kal awt ah a to-aw parâ a kawh na le, an sinah ngûn tangka pakhat seng a pêk na le, an sinah, 'Ka hawng tlung nawlh lân lo chu hi hen sawleh u,' a ti.
- ¹⁴Sikhawmsele, a ram mi tla nih an hua le, Hi minung hi kan lalchem rangah kan duh lo,' ti hen a dung leiah mi an fial.
- ¹⁵"Chun, lalchem si ding hen thuneihnâk a lâk le, a hawng kîr nawlh rawh chun a to-aw tangka a pêk na mi tla chu an pungtir zat theih ding hen a kawhtir.
- ¹⁶Chun, a masachem mi chu a hawng kal le, Pu, na ngûn tangka kha parâ hen a pung,' a ti.
- ¹⁷Chun, anih nih chun a sinah, 'To-aw ʒa, na ti zia a ʒa; tâwmtê tlûnah zumh na kâi ruangah khua râ lakah hotu ah um rawh,' a ti.
- ¹⁸Chun, a sangtu chu a hawng le, 'Pu na ngûn tangka kha panga hen a pung,' a ti.
- ¹⁹Chun anih nih chun, anih sinah khawm chun, 'Nang khua panga lakah hotu ah um rawh,' a ti.
- ²⁰"Chun, midang a hawng le, 'Pu, zauhnik, na ngûn tangka kha! Thlan nâwtnâk puan hen ka kil kumza;
- ²¹mi râng tak na si ruangah ka nan ʒih asi; na siah lo mi khawm na lâk le, na tuh lo mi khawm na ât tâwn, a ti.
- ²²Chun, anih nih chun a sinah, "To-aw sual, na hawlhkâ suak ngelchel hen ka nan mawhtir.
- ²³Mi râng tak ka si le, ka siah lo mi khawm ka lâk tâwn le, ka tuh lo mi ka ât tâwn mi na theih ma?
- ²⁴"Chun, a kiangah dîr mi tla sinah, 'A ngûn tangka kha lâk piak ule, ngûn tangka parâ neitu sinah pêk u.
- ²⁵Chun, annih nih chun a sinah, Pu, ngûn tangka parâ a nei khateh,' an ti.
- ²⁶Ka nan ti na, a nei mi zawng an sap lai le, a nei lo mi chu a neihlem khawm an lâk piak lai.

- ²⁷Sikhawmsele, hi bang hawng ka dotu tla nih an tlûnah lalchem si ding hen an ka duhlotu tla hi hawngpi na ule, ka mâika ah thah u,' a ti," a ti.
- ²⁸Chun, chubang hâwi thu a sim thluh rawh chun Jerusalem leiah a kâlpi na.
- ²⁹Chun, Bethphage leh Bethani kiang, Oliv Tlâng an ti mi chu a tlung rawh chun thiruai tla lakah mi panih a fial le,
- ³⁰"Nan mâilei khua ah khin va kal ule; chunah chun nan lût târah sanatung fa rêng mi, âukhawm chuan dah lonâk nan va muh lai; chu chu sût ule, hawng ruai u.
- ³¹Chun, âuzawng nih, Zeirangah nan sût? ' ti hen an deih na chun, hi hâwi hen sim u, 'Lalpa nih a duh asi,' ti hen," a ti.
- ³²Chun, a fial mi tla chu an kal rawh le, an sinah a sim hâwitê hen a va muh.
- ³³Chun, sanatung fa an sût liauah chun a dâwngpu tla nih an sinah, "Sanatung fa kha zeirangah nan sût?" an ti.
- ³⁴Chun, annih nih chun, "Lalpa nih a duh asi," an ti.
- ³⁵Chun, Jisu sinah an hawng ruai le; chun sanatung fa tlûnah chun an puan tla an phah le, a tlûnah Jisu an chuantir.
- ³⁶Chun, a kalnâk ding lam lakah an puan tla an phah vima.
- ³⁷Chun, a tlung bâi ah, Oliv Tlâng liam awt ah chun thiruai mi zapi nih chun a thilchê ti zawzawng an muh ruangah anna lâwm le, hâu fâk tak hen,
- ³⁸"Lalpa min hen Lalchem a hawng kal mi chu a thaw a suak! Vân ah rem thu lêng seh. Pathian sinah rokualnâk um seh!" ti hen, Pathian an sawr rawh.
- ³⁹Chun, mi zapi lakah Farisai zeimaw mi nih a sinah, "Sîntirtu, na thiruai tla hi nunsimh rawh," an ti.
- ⁴⁰Anih lam nih chun,"Ka nan simh na, hi bang tla hi an dâisip chun lung tla tal an âu ding asi," a ti le, a sâng.
- ⁴¹Chun, a tlung bâi tem ah, khua chu a muh le, a ÷apnawh le,

⁴²"Aw, nang rîlmâl nih hin tu dam liau lungngamnâk ding thu hi hawng theih râm nik le! Sikhawmsele na muh lonâk ding hen â thup dangâiah.

⁴³Na mêlma nih na kiang hêl dak hen tual kulh an siam lai le, a nan bual lai le, na kiang hêl dak hen suak kho lo hen a nan um nawh lai.

⁴⁴Na dâwnsung lakah na fa tla, nangmah hen tual ah an lawnh chiam lai; na sungah lung chuanh mi rerêng an zuah lai lo; a nan veh liau na theih lo ruangah chu hâwi ni tla chu na tlûnah a hawng tlung teh lai," ti hen.

⁴⁵Chun, Pathian Biakin ah chun a lût le, zeilo zuartu tla chu a nar na le;

⁴⁶an sinah, " 'Ka in chu thlachamnâk in an ti lai' ti rîn asi; nannih lam nih chun rawkmang tla pûk ah nan siam dauh hi," a ti.

⁴⁷Chun, nisiar Pathian Biakin ah chun a sîntir tâwn; chun, bâwlpu lal tla leh Dân sîntirtu tla leh mi zatlâng lakah hotu dauh tla nih amah veih ding an tum.

⁴⁸Sikhawmsele, mi le tla nih semsê ngâi tak hen a thu an ngâi ruangah a ti ding dân an theih lo.

Luk 20

¹Chun, ni khat chu Pathian Biakin ah mi tla a sîntir na. Thâwnghâng Ṭha a sim liauah, bâwlpu lal tla leh Dân sîntirtu tla chu upa tla hen a sinah an hawng sut le,

²chun a sinah, "Âu thu hen me hi bang thil hi na ti? Âu nih thu a nan pêk? Hawng kan simh," ti hen an deih.

³Chun, anih nih chun an sinah, "Kei khawm thu kê khat ka nan deih na lai, hawng ka simh u;

⁴Johan baptisma thu kha vôn ah mi thu ma, minung thu?" a ti le, a sâng.

⁵Chun anna ruat le, " 'Vôn ah mi thu' kan ti chun, 'Zeirangah a thu nan âwi lo ne?' hawng kan ti ʈung lai.

⁶Chun, 'Minung thu,' kan ti chun, mi zawzawng nih lung hen hawng kan seh lai; Johan chu khuavâng si hen an ruat ruangah," an ti.



- ⁷Chun, an sâng le, "Zei lei thu dauh dek si kan theih loh," an ti.
- ⁸Chun, Jisu nih an sinah, "Kei khawm nih âu thu hen me ka ti ka nan simh na bâk awt lo," a ti.
- ⁹Chun, zatlâng sinah hi tahthimh thu hi a sim rawh: "Âu nih mawh grep dûm a siam le, a zauhtu tla sinah a ap le, sâwt tak râu ding hen ramdang ah a kal rawh.
- ¹⁰Chun, a kawih a chû rawh chun dûm ah mi rah chu a tingvo an hawng pêk ding hen a zauhtu tla sinah chun to-aw pakhat a fial le, sikhawmsele a zauhtu tla nih chun an vuak chiam le, kut karo hen an kaltir rawh.
- ¹¹Chun, to-aw dang a fial nawlh le, chu khawm chu an vuak nawlh fâwn le, ningzakkâi tak hen an siam le, kut karo hen ber an kaltir nawlh rawh.
- ¹²Chun, a pathumnâk a fial nawlh le, chu khawm chu an liamh le, an lawnh rawh.
- ¹³Chun, grep dûm neitupa nih chun, 'Zeitin ka ti lai aw? Ka fapa duhtak hi ka fial ko lai; anih hi an zah lai dahmawh,' a ti.
- ¹⁴Sikhawmsele, a zauhtu tla nih chun anih chu an muh kê hen, 'Hi minung hi rotingtu ding chu asi; kan thah lai, chuvachun a ro kanmah rangah asi lai, ti hen anna thluk.
- ¹⁵Chun, grep dûm ah mi chu an suah le, an thah rawh. Chuvachun, grep dûm neitupa nih chun an tûnah zeitin se a hawng ti lai?
- ¹⁶A zauhtu tla chu a veih na lai le, dûm chu midang a pêk lai," a ti. Chun, chu chu an theih le, "Chu ngâi chu tlung lah seh! " an ti.
- ¹⁷Sikhawmsele, anih nih chun annih tla chu a zauh le, "Hi thu an rîn mi hi zei me asi ne? 'In saktu tla nih lung an duh lo mi kha chu tak chu a kil ah lung herh chem a hawng si rawh,' ti hi.
- ¹⁸Âuzawng chu lung tûnah tû mi vial chu an kek dip lai; a denh mi châng chu a rial dip lai," a ti.

- ¹⁹Chun, chu liau takah chun Dân sîntirtu tla leh bâwlpu lal tla nih tleih an tum le, sikhawmsele mi zapi chu an ÷ih le, chu tahthimh thu chu anmah ti san hen a sim ti an theih ruangah.
- ²⁰Chun, amah chu governor lâirêlnâk leh thuneihnâk ah tlunh ding hen a thusim sualnâk lâk ding hen an bawh le, thlingthlâktu mi ÷ha hâwi hen anna tuah mi tla chu an fial.
- ²¹Annih nih chun a sinah, "Sîntirtu, dik tak hen thu na sim hen, âukhawm thliar leh dang neilo hen Pathian thu na sîntir tâwn ti kan theih;
- ²²Kaisar sinah siah kan châwi mi hi dân asi ma si lo?" ti hen, an deih.
- ²³Sikhawmsele, anih nih chun ngamlêm an pêk ti a theih le, an sinah,
- ²⁴"Tangka hawng ka zauhtir u. Âu lem leh âu min mesi?" a ti. Chun, annih nih, "Kaisar," an ti.
- ²⁵Chun, anih nih chun an sinah, "Chu hâwi asi chun, Kaisar thil tla chu Kaisar sinah pêk ule, Pathian thil tla chu Pathian sinah pêk ko u me," a ti.
- ²⁶Chun, mi zapi mâika ah a thusim soal lâk ding an theih lo le, a sângnâk chu thungâi chê an ti le, an dâisip.
- ²⁷Chun, Sadukai, thawknawlnhâk a um lo titu tla lakah âu tla mawh a sinah an hawng kal le,
- ²⁸a sinah, "Sîntirtu, Mosi nih âuzawng a unaupa nih nupi nei sele, fa neilo hen thi sele, a unaupa nih a nupi umpi hen, a unaupa rangah chi a thlah piak ding asi ti hawng kan rîn piak asi.
- ²⁹Asi chun, pasal pasarih an um le, a upachem nih nupi a nei le, fa neilo hen a thi.
- ³⁰A panihnâk nih chun a umpi le,
- ³¹a pathumnâk nih chun a umpi nawlh le, chu hâwi chiau hen pasarih chu fa neilo hen an thi ver.
- ³²Chu nehnûnah chun nunau khawm chu a thi rawh.

³³Chuvachun, thawknawlh tikah a zei mi chem nupi me asi lai? An pasarih hen chun nupi ah an umpi chiau dangâiah," ti hen an deih.

³⁴Chun, Jisu nih an sinah, "Hi laikulh minung tla hi nupi pasal anna um tâwn;

³⁵sikhawmsele, chubang tikah tel tlâk mi, mithi lakah mi thawknawlhnhâk ah tel tlâk ah ruat mi vial chu nupi pasal anna um awt lo rawh;

³⁶thi khawm an thi awt lo rawh asi, vânmifial tla tluk hen an um awt ruangah; thawknawlhnhâk fa tla an si ruangah Pathian fa tla an si lai.

³⁷Mithi thawh hen an um lai ti Mosi khawm nih Thing bû thu ah Lalpa chu, Abraham Pathian, Isak Pathian, Jakob Pathian, a ti liau khan a theihtir kha.

³⁸Anih chu mithi Pathian asi lo le, a nung mi Pathian asi dauh; anih ngaih chun minung zawzawng an nung ver ruangah," a ti.

³⁹Dân sîntirtu âu nih mawh, "Sîntirtu, na sim mi chu a dik ngâk," an ti le, an sâng.

⁴⁰Thu dang tâ nih an deih ngam lo rawh.

⁴¹Chun, anih nih chun an sinah, "Mesia chu David Fapa asi ti zei ti zia hen sim tâwn me an si?

⁴²Sawrnâk Labu ah David tak nih, 'Lalpa nih chun ka Lalpa sinah,

⁴³na mêlma tla na kê sirhsanh ah ka siam lân lo chu ka vawrhlei ah to rawh,' a ti, a ti.

⁴⁴Chuvachun, David nih anih chu 'Lalpa,' a ti ÷ung chun zeitin a fapa asi kho lai ne?" a ti.

⁴⁵Chun, mi zawzawng theih hen a ÷hiruai tla sinah,

⁴⁶"Dân sîntirtu tla lakah a thiamthih u; annih chu kawrdawh fual ruk hen tawih an duh tâwn le, sumtuah zâwl ah chibai bûk tla, pumhnâk in tophah ÷ha chem tla, puai tuahnâk ah mun ÷ha chem an sung-û tir tâwn le;

⁴⁷numei sum an ei le, mi perpet ding hen sâwt tak thla an cham tâwn; chubang tla nih chun mawh an phurh khun lai," a ti.

Luk 21

¹Chun, a chuanh le, mi nei tla nih thawhlâwm bâwm ah an thawhlâwm thlâk liau a muh.

²Chun, numei pâm tak âu nih mawh lepta nih a thlâk mi a muh.

³Chun, anih nih chun, "Thungâi tak hen ka nan simh na, hi bang zawzawng ngâk hen hi numei pâm tak nih hin tam dauh a thlâk:

⁴Hi zawng tla nih hin an neih a lei mi thawhlâwm ah an thlâk asi; anih lam nih chun a duh liau tak, a nungnâk dingah a neihlem mi a thlâk hep asi," a ti.

⁵Chun, âu tla nih mawh Pathian Biakin thu, lung ɥa tak leh thilpêk hen an thuamh zia an sim liauah anih nih chun,

⁶"Hi bang nan thilmuh hi, chimtir lo hen lung â tiang mi rerêng hinah a um lai lo; chubang hâwi ni chu a tlung teh lai," a ti.

⁷Chun, annih nih chun a sinah, "Sîntirtu, chubang chu zeikah a hawng um lai? Chubang chu a hawng tlung awt tikah singsiahnâk zeikah me a um lai?" ti hen an deih.

⁸Chun, anih nih chun, "An perpet na lonâk ding hen a thiamthih u. Mi tamtak nih, 'Amah chu ka si, a tik a tlung rawh,' ti hen, keimah min sâl hen an hawng lai; chu minung tla chu zûl lah na u.

⁹Chun, tuk thu leh nawknâk thu nan theih tikah ɥih lah u. Chubang chu a hawng tlung masa ding rêng asi. A dawngnâk lam chu a tlung sawm lai lo rih," a ti.

¹⁰Chun, an sinah, "Phun dang leh phun dang anna do lai le, ram dang leh ram dang anna do lai le,

¹¹lî fâk tak â nîn lai le, mun dang dang ah pâm a tlung lai le, rai a lêng lai le; vân thawk hen thil ɥihnungkâi tla leh singsiahnâk cherkhet tla a hawng um lai.



- ¹²Sikhawmsele, chubang thil zawzawng a hawng tlung lânah chun a nan tleih na lai le, an nehsawh na lai. Pumhnâk in tla ah an kalpi na lai le, rêngin tla ah an khumh na lai; lalchem tla leh governor tla mâika ah an kalpi na lai.
- ¹³Hi hi Thâwnghâng Tha sim ding hen nan tik dêngkhâwng asi lai.
- ¹⁴Chuvachun, a sâng ding dân ruatkan lo ding hen nan thinlung birhtir u;
- ¹⁵nan mêlma zawzawng an kham na hen an êl kho lo na nâk ding hen thu leh fîngnâk ka nan pêk na awt ruangah.
- ¹⁶Chun, nan nu leh pa tla, nan unau tla, nan rualsia tla, nan hâwi tla nih an tleihtir na lai; a zeimaw mi an nan thah na lai.
- ¹⁷Keimah min ruangah mi zawzawng huat nan si lai.
- ¹⁸Sikhawmsele, nan samzâi pakhat khawm a vei lai lo.
- ¹⁹Nan felfênâk nih nan nungnâk a hum lai.
- ²⁰"Sikhawmsele, kawrsen hotu tla nih Jerusalem an hual mi nan muh tikah a vei awt ti theih u.
- ²¹Chu tikah chun Judai ram ah um tla chu tlâng ah tek na seh; a sungah um mi tla nih chun suaktâk na seh; ram ah um mi tla chu a sungah lût lah seh.
- ²²Chubang ni tla chu phû lam ni asi, thu an rîn mi zawzawng a hawng tlung khonâk ding hen.
- ²³Chubang ni ah chun râi tla leh nauno pawmtu tla tlûn a pit lai, laikulh ah hin hamhnâk cherkhet a hawng tlung awt ruangah leh hi phun tla tlûnah hin Pathian thinthawknâk a tlung awt ruangah.
- ²⁴Chun, nâmsâu ah an thi lai le, phun kip sinah sal ah put hen an um lai; chun Phundang tla tik a dawng lân lo chu Jerusalem chu lamhbêk hen a um lai.
- ²⁵"Chun, nî, thlâ leh ârfi tla ah singsiahnâk a um lai. Tisumsumriat rûm leh a tlingtlawk ruangah tual ah khawm phun kip hamhnâk leh lawksawngnâk a tlung lai;

²⁶minung tla thlabâr ruangah leh laikulh ah thil hawng tlung ding mi chu dawn ruangah an nang lai; vân thiltikhonâk tla chu â nîn awt ruangah.

²⁷Chu tikah chun Minung Fapa hi thiltikhonâk leh rokualnâk fâk tak hen sôm lakah a hawng kal mi an muh lai.

²⁸Chun, chubang thil chu a hawng tlung tikah, tlûnlei zauh ule, chuanh u; nan ruangsuaknâk ding chu a nâi rawh ruangah," a ti.

²⁹Chun, an sinah tah̄thimh thu a sim le: "Theipi kûng leh thing zawzawng zauh u;

³⁰a chawrh no kê hen chu chu nan muh le, thâlpini a suak awt ti mah chiau nih nan theih tâwn.

³¹Chu hâwi ber hen nannih khawm nih chubang a hawng tlung mi nan muh tikah chun Pathian Râm a nâi rawh ti theih u.

³²"Thungâi tak hen ka nan simh na, thil zawzawng a hawng tlung kim lân lo chu tusan minung tla hi an tlâu lai lo.

³³Tual leh vân a tlâu lai le, ka thu lam chu a tlâu rêng lai lo.

³⁴"Sikhawmsele, a thiamthih u, chu lo chun ei khawp tuktarâi hen, zû rî hen, dam sung khawsat dawn hen nan thinlung a khat soal lai. Chu ni ah chun thang awh hâwi hen lâkkhatko ah nan tlûnah a hawng tlung khup lai.

³⁵Chu hâwitê hen laikulh pumpi ah um mi zawzawng tlûnah chun a hawng tlung awt chiau asi.

³⁶A ringrâwn u, Minung Fapa mâika ah nan dîr khonâk ding hen leh thil hawng tlung ding mi tla zawzawng ah him ding leh chaknâk nan nei khonâk ding hen thlacham u, a ti.

³⁷Chun, sîn ah chun Pathian Biakin ah a sîntir na tâwn le; zân ah chun a suak le, Oliv Tlâng an ti mi ah chun a riak tâwn.

³⁸Chun, zîng ah a thu ngâi ding hen mi zawzawng Pathian Biakin ah a sinah an hawng kal tâwn.

Luk 22



- ¹Chun, Sang Thilnu telhlo Kût, Kalkanh Kût an ti mi chu a nâi rawh.
- ²Chun, bawlpu lal leh Dân sîntirtu tla nih chun Jisu thah ding dân an hâwl; zatlâng an ÷ih fawn.
- ³Chun, leinih tla lakah mi Juda Iskariot an ti mi sungah chun Setan a lût.
- ⁴Chun, anih chu a va kal le, an sinah a tleihtir khonâk ding dân bawlpu lal leh hotu tla chu a va thlukpi na.
- ⁵Chun, annih chu anna lâwm le, a sinah tangka pêk an tiamh rawh.
- ⁶Chun, anih nih chun rem a ti le, mi zapi umlo karah tleihtirnâk remkâng a hâwl rawh.
- ⁷Chun, Sâng Thilnu telhlo ni, Kalkanh Kût nâk dawrâ fa thahnâk ni chu a hawng tlung rawh.
- ⁸Chun, Jisu nih Peter leh Johan sinah, "Kalkanh Kût buh kan ei khonâk ding hen kan rangah va timhtuah u," ti hen a fial na.
- ⁹Chun, annih nih a sinah, "Zeiah me va timhtuah sele na duh?" an ti.
- ¹⁰Chun, anih nih chun an sinah, "Ngâinik u, khuapi ah nan lût chun mipa tibêl put hen nanna tawng lai le, a lûtnâk in ah zûl u.
- ¹¹Chun, in dâwngpu sinah chun, 'Sîntirtu nih ka ÷hiruai tla hen Kalkanh Kût buh kan einâk ding hen khual tlungnâk kardang zeiah? a nan ti,' ti u.
- ¹²Chun, anih nih chun a tlûn chuanh kardang kâu tak, thil um chia, a nan zauhtir na lai; chunah chun timhtuah u," a ti.
- ¹³Chun, an kal rawh le, an sinah a sim hâwitê hen an muh le, Kalkanh Kût buh chu an timhtuah rawh.
- ¹⁴Chun, a ei tik rawh chun anih chu buh a dûm le, a ÷hiruai tla nih chun an dûmpi.
- ¹⁵Chun, an sinah, "Ka tuar lânah hi Kalkanh Kût buh hi an eipi na thungâi ka duh asi.

¹⁶Ka nan simh na, hi hi Pathian Ram ah a tatak asi lân lo chu ka ei nawlh awt lo rawh asi," a ti.

¹⁷Chun, hâi chu a lâk le, lâwmthu a sim thluh rawh chun, "Hi hi lâk ule, a then u;

¹⁸ka nan simh na, tu rî hen Pathian Ram a hawng tung lân lo chu grep rah lakah mi hi ka din nawlh awt lo rawh asi," a ti.

¹⁹Chun, sang a lâk le, lâwmthu a sim thluh rawh chun a phel le, "Hi hi ka taksa, nan rangah pêk ding chu asi; nan hawng ka theihkumzanâk ding hen hi hi ti tâwn u," a ti.

²⁰Chun, zânriah ei thluh ah chu hâwi ber hen hâi chu a lâk le, "Hi hâi hi ka thisen, thudântuk thar chu asi, nan ruangrûl ah suak ding chu asi.

²¹"Sikhawmsele, zauhnik u, hawng ka tlehtirtu ding kut chu ka sinah dawhkân tlûnah a um.

²²Minung Fapa hi an ruat hâwi hen a um awt asi; sikhawmsele, a tlehtirtu ding mi minung tlûn chu a pit!" a ti.

²³Chun, annih nih, "Kan lakah chu hâwi thil ti ding mi chu âu me si lai le?" ti hen anna deih.

²⁴Chun, an lakah âu me rokual chem hen ruat asi lai ti thu ah, êlnâk a hawng suak.

²⁵Chun, anih nih chun an sinah, "Phundang lalchem tla chu an mi le tla tlûnah thu an nei tâwn le, an tlûnah thuneitu tla chu, 'Mipi tla hâwikawmh' an ti na tâwn.

²⁶Sikhawmsele, nannih lam chu chu hâwi nan si lai lo; nan lakah a rokual chem mi chu ngâksia dauh hâwi hen um sele, a lal chem mi chu eibâr timhtuahtu hâwi hen um dauh seh."

²⁷Âu me rokual dauh, buh dûmtu ma, eibâr timhtuahtu? Buh dûmtu asi lo ma? Sikhawmsele, kei lam chu nan lakah eibâr timhtuahtu hâwi hen ka um hi.

- ²⁸"Niknâk tla ka tawng kar vial nannih hawng ka umpitu nan si;
- ²⁹chun ka ram ah ka dawhkân ah nan din hen nan ei khonâk ding hen ka Pa nih Ram hawng ka ruat piak mi hâwi hen Ram ka nan ruat piak na asi; chun, Israel phun leinih lâirêl piak hen laltophah ah nan to lai.
- ³¹"Simon, Simon, ngâinik, Setan nih fâng khei hâwi hen an khei khonâk ding hen nannih tla hi a nan deih na asi.
- ³²Sikhawmsele, na lungnâk a tlâu lonâk ding hen thla ka nan cham piak asi. Na sîr nawlh tikah nangmah nih na unau tla chaktir na," a ti.
- ³³Chun, anih nih chun a sinah, "Lalpa, na sinah chun rêngin leh thihnâk ah khawm kal bâk ka huam asi," a ti.
- ³⁴Chun, anih nih chun, "Peter ka nan simh, na hawng ka theihnâk ah hin veithum na ka pheh lân lo chu tuzân âr a khuang lai lo," a ti.
- ³⁵Chun, an sinah, "Tangka sâwngkhâwi, zâl leh pheikawk lo hen ka nan fial na liau khan thil nan samphâng rerêng ma?" a ti. Chun, annih nih chun, "Samphâng lo," an ti.
- ³⁶Chun, anih nih chun an sinah, "Tu lam chu âuzawng tangka sâwngkhâwi neitu nih chun put seh, zâl hen; âuzawng nâmsâu neilo mi nih chun a puan zuar sele châwk seh.
- ³⁷Ka nan simh na hi, 'Anih chu misual lakah an rêlsih rawh,' ti rîn kha ka tlûnah a hawng tlung ding asi; ka thâwngthâng thu tla kha a tlung dih awt rawh," a ti.
- ³⁸Chun, annih nih chun, "Lalpa, zauhnik, hinah nâmsâu panih a um," an ti. Anih nih chun an sinah, "Â tâwk," a ti.
- ³⁹Chun, Jisu chu a suak le, a ti dân hâwi nget hen Oliv Tlâng ah chun a kal le, a thiruai tla khawm nih an zûl.
- ⁴⁰Chun, a mun chu a va tlung rawh chun an sinah, "Lêmnâk ah nan lût lonâk ding hen thlacham u," a ti.

⁴¹Chun, lung seh phâk rî hen a dang hen a va kal le; chun a siksidîr le, thla a cham.

⁴²"Pa, rem na ti chun hi hâi hi ka sin thawk hen ðhinh rawh; sikhawmsele keimah thu silo hen nangmah thu si dauh seh," a ti.

⁴³Chun, vâh thawk hen vâhmifial pakhat amah panhlâutir ding hen a hawng a langh.

⁴⁴Chun, thungâi a thla a kâm le, semsê ngâi khun hen thla a cham; a thlan chu thî hâwi hen tual ah a zut.

⁴⁵Chun, thla a cham thluh ah chun a ðhiruai tla sinah chun a hawng le, lawksawng ruangah an it mi a muh rawh chun,

⁴⁶an sinah, "Zeirangah nan it? Lêmnâk ah nan lût lonâk ding hen thawk ule, thlacham u, a ti.

⁴⁷Chun, a sim liau chirah chun, mi zapi an hawng kal le, leinih tla lakah mi Juda an ti mi nih chun an mâi a ruai na le; chun, châwchawk ding hen Jisu a hawng fûk.

⁴⁸Sikhawmsele, Jisu nih chun a sinah, "Juda, Minung Fapa hi châwchawk hen na tleihtir awt masi?" a ti.

⁴⁹Chun, a kiangkam mi tla nih chun thil hawng tlung ding mi chu an theih rawh chun, "Lalpa, nâmsâu hen kan tuk lai ma?" an ti.

⁵⁰Chun, an lakah âu nih mawh bawlpu lalchem to-aw chu a tuk le, a vawrhlei nâ a themh phak.

⁵¹Chun, Jisu nih a sawnh le, "Hi ri hi hawng ka siang piak u," a ti. Chun, a nâ chu a tham le, a damh rawh.

⁵²Chun, Jisu nih a sinah an hawng mi bawlpu lal tla, Pathian Biakin hotu tla leh upa tla sinah chun, "Nâmsâu tla, talhbo tla put hen rawkmang tla tleih ding hâwi bang hen nan hawng mu?"

⁵³Pathian Biakin ah nan sinah nisiar ka um liau khan tleih ding hen nan ka awt lo. Sikhawmsele, tu hi nan changh tik asi, mûi thuneihnâk hen," a ti.



- 54Chun, an tleih le, an ruai le, bâwlpu lalchem in ah chun an kalpi rawh. Chun, Peter nih râllâtpi hen a zûl.
- 55Chun, in kulh sung zâwllâi ah mei an sêm le, anna topumh le, Peter chu an sinah a va to bâk.
- 56Chun, mei chêu ah a to liauah nungâk âu nih mawh a muh le, a zauh seset le, "Hi minung khawm hi a sinah a um bâk mi mahi," a ti.
- 57Peter lam nih chun, "Nunau, anih chu ka theih lo!" ti hen a pheh.
- 58Chun, a nehnûn dauh ah midang nih a hawng muh nawlh le, "Nang khawm an lakah mi na si hi!" a ti. Peter lam nih chun, "Kei ka si lo," a ti.
- 59Chun, dârkar khat dingah chun midang nih, "Hi minung khawm hi a sinah a um mi kha asi ngelchel ko; Galili ram ah mi asi hi teh," a ti thlo.
- 60Chun, Peter nih, "Na thusim chu ka theih lo," a ti. Chun, zeikarlo ah a hawlh liau takah chun âr a khuang sawm rawh.
- 61Chun, Lalpa chu a hawng a hawi le, Peter chu a zauh rawh chun, Peter nih chun, Lalpa nih, "Tusûn ah hin âr a khuang lânah veithum na ka pheh lai," a sinah a ti mi thu kha a hawng theih nawlh rawh.
- 62Chun, a suak le, a ÷ap chiam rawh.
- 63Chun, Jisu tleihtu tla nih nihsuak siamnâk ah an mang le, an vuak.
- 64Chun, a mit an tuam le, "Sim rawh, âu nih a nan vuak?" ti hen, an deih tâwn.
- 65Chun, thu dang tamtak hen an simsiat le, an fâi.
- 66Chun, khuadei ka hen zatlâng upa tla, bâwlpu lal tla leh Dân sîntirtu tla chu anna pûm le, an lâirêlnâk ah chun an kalpi le,
- 67"Mesia na si tak chun hawng kan simh," an ti. Chun, anih nih chun an sinah, "An simh na khawmsele nan lung lai loh;
- 68an deih na khawmsele nan sâng lai loh.

⁶⁹Sikhawmsele, tu rî hen chun Minung Fapa hi Pathian thiltikhonâk vawrhlei ah a to lai rawh," a ti.

⁷⁰Chun, an ektê hen, "Nang hi Pathian Fapa chu na si ma ne?" an ti. Chun, anih nih chun an sinah, "Si ta a," a ti.

⁷¹Chun, annih nih chun, "Zei theihnâk dang me kan ngâi lai rawh? Kanmah ngelchel nih amah kê suak kan theih rawh hi teh," an ti.

Luk 23

¹Chun, anna pûm mi vial chu an thawk le, Jisu chu Pilat sinah an kalpi.

²Chun, "Hi minung nih hin kan phun tla a râwk le, Kaisar sinah siah châwi a khap le, Mesia, Lalchem â ti mi kan theih," ti hen an phûm rawh.

³Chun, Pilat nih a sinah, "Juda tla lalchem na si ma?" ti hen a deih. Chun, anih nih chun a sinah "Si ta a," a ti le, a sâng.

⁴Chun, Pilat nih bâwlpu lal tla leh mi zapi tla sinah chun, "Hi minung lakah hin zeikhawm sualnâk ka theih lo," a ti.

⁵Sikhawmsele, annih nih chun, "Galili ram ah a dawmh le, hi mun tiang hen Judai ram khua kip ah sîntir hen, mi zawzawng a nawktir tâwn asi," ti hen an ti zual dadauh.

⁶Chun, Pilat nih chu chu a theih rawh chun, chu minung chu Galili ram ah mi asi leh silo a deih.

⁷Chun, Herod bial ah mi asi ti a theih kê hen Herod sinah a fial rawh, chu liau chun anih khawm Jerusalem ah a um bâk.

⁸Chun, Herod nih Jisu chu a muh rawh chun thungâi â lâwm le, a thâwnghâng a theih ruangah a lân thawk hen khawm muh a duh rêng le, a thilchê ti zeimaw tal muh ding a lungum.

⁹Chun, thu tamtak a deih le; sikhawmsele, zeikhawm hen a sâng lo.

¹⁰Chun, bâwlpu lal tla leh Dân sîntirtu tla nih chun dîr hen cherkhet hen an phiar chiam.

¹¹Chun, Herod leh a kawrsen tla nih chun Jisu an zauhnawmh le, nihsuak siamnâk ah an mang le, chun puan rokual tak aihtir hen Pilat sinah an fial nawlh rawh.

¹²Chun, chu ni tak chun Herod leh Pilat chu anna rem rawh le; chu lân zawzawng chu anna er thlo tâwn asi.

¹³Chun, Pilat nih bâwlpu lal tla, hotu tla leh mi zawzawng tla a pumh na le,

¹⁴an sinah, "Midang tla a râwk ti hen hi minung hi ka sinah nan hawng put mi kha asi le, nan mâika ah ka salh le, nan phiar mi thu lakah hi minung tlûnah hin zeikhawm sual ka muh lo asi;

¹⁵Herod khawm nih a muh bâk lo le; kan sinah a hawng fial nawlh rawh hi; thihnâk rê hen zeikhawm a ti lo.

¹⁶Chuvachun, ka vuak lai le, ka suah awt ko asi," a ti.

¹⁷Kût liauah chun an sinah mi pakhat chu a suah piak na tâwn asi.

¹⁸Sikhawmsele, a rual hen an âu le, "Hi minung hi chu veih le, Baraba kha hawng kan suah piak dauh rawh," an ti.

¹⁹Chu minung chu khuapi lakah helnâk ruangah leh mi a thah ruangah rêngtlâ asi.

²⁰Pilat lam nih chun Jisu suah a duh le, an sinah a sim nawlh le,

²¹sikhawmsele, an âu le, "Kraws ah khenhbêk rawh, kraws ah khenhbêk rawh," an ti.

²²Chun, anih nih chun a veithumnâk ah an sinah, "Zeirangah me? Hi minung nih hin zei thil me a sual? Thihnâk khawp rê hen a lakah zeikhawm ka muh lo; chuvachun, ka vuak lai le, ka suah awt ko asi," a ti.

²³Annih lam nih chun hâu fâk hen kraws ah khenh ding hen an deih êu. Chun, an aw-hâu nih chun a neh rawh.

²⁴Chun, Pilat nih chun an deih ziatê hen ti ding hen thu a thlûk rawh.



- ²⁵Helnâk leh mi thah ruangah rêngtlâ an deih mi kha a suah le, Jisu lam chu an duh duh ti dingah a pêk rawh.
- ²⁶Chun, an kalpi liauah chun Simon, Kurini khua mi, ram lei thawk hen a hawng mi an tleih le Jisu dunglei ah put ding hen a tlûnah kraws chu an thâng.
- ²⁷Chun, mi zapi tamtak leh nunau zeimaw mi tla nih ir chumh leh ÷ap bû hen an zûl.
- ²⁸Jisu lam chu anmah lei â hawi le, "Jerusalem fanu tla, hawng ka ÷appi lah u, nanmah leh nan fa tla rangah ÷ap dauh u.
- ²⁹Ngâinik u, a ni a tlung awt! Chubang ni ah chun, 'Nunau ching tla, nâu pâwi dahlonâk pâw tla, nâu din dahlo mi nûk tla chu an thaw a suak lai' an ti lai.
- ³⁰Chu tikah chun mi tla nih tlâng tla sinah, 'Hawng kan denh!' an ti teh lai; mual tla sinah, 'Hawng kan khuh,' an ti teh lai.
- ³¹Thing ring lak men ah hi hâwi an ti chun, a châr mi lak châng chun zeï tluk dek an ti lai?" a ti.
- ³²Chun, a sinah midang panih, misual thah ding hen an hawngpi na.
- ³³Chun, "Luruh," an ti mi mun chu an tlung rawh chun, chunah chun kraws ah an kenh le, misual tla hen, a vawrhlei ah pakhat a kehlei ah pakhat.
- ³⁴Chun, Jisu nih, "Pa, annih hi ngaihdam na rawh; an thilti hi an theih lo asi," a ti. Chun, chamchawh hen a nipuan tla chu anna ÷hen rawh.
- ³⁵Chun, zatlâng tla nih chun dîr hen an chuanh. Chun, hotu tla khawm nih, "Midang men a damtir mi; Pathian thîm mi Mesia asi tak chun amah khawm a damh seh," ti hen an sîrleih.
- ³⁶Chun, kawrsen tla khawm nih amah chu nihsuak siamnâk ah an mang le, a sinah an hawng le, uain thur an pêk le,
- ³⁷"Juda tla lalchem na si tak chun a damh rawh," an ti.

- ³⁸Chun, a tlûn leiah chun, "HI HI JUDA TLA LALCHEM ASI," ti hen lasui rîn a um.
- ³⁹Chun, misual khenh mi lakah pakhat nih chun Jisu a fâi le, "Mesia chu na si lo mazei? A damh le, kannih khawm hawng kan damh bâk," a ti.
- ⁴⁰Sikhawmsele, pakhat nih chun fâi pah hen a sâng le, "Pathian men na ÷ih lo ma? Bang cho hen hawng kan rêp hi.
- ⁴¹Kannih lam chu rêp ding rêng kan si; kan thilti diklo man kan tawng asi hi; hi minung nih hin zeikhawm a soal lo," a ti.
- ⁴²Chun, Jisu sinah, "Jisu na Ram na tlung tikah hawng ka theihkumza," a ti.
- ⁴³Chun, Jisu nih a sinah, "Thungâi tak hen ka nan simh, tusûn ah hin ka sinah Paradis ah na um bâk lai," a ti.
- ⁴⁴Chun, dâr leinîh thawk hen zânlei dâr thum tiang hen laikulh a mûi ver le,
- ⁴⁵nî chêu a reh rawh le, chun, Pathian Biakin puanzâr chu a lâi ah â thlêk rawh.
- ⁴⁶Chun, Jisu chu hâu fâk tak hen a âu le, "Pa, na kut ah ka thlarau ka nan kiltir," a ti. Chun, chu chu a ti thluh rawh chun a nukrî a chat rawh.
- ⁴⁷Chun, kawrsen zâ hotu nih chun thil umzia chu a muh rawh chun, "Hi minung hi zeî ti khawm hen mirep asi ngelchel lai," ti hen, Pathian a sawr rawh.
- ⁴⁸Chun, chu zauhnuam chu chuanh ding hen mi zapi an hawng a pûm mi tla zawzawng nih chun thil umzia chu an muh rawh chun an ir tla chumh lemanh hen an tlung nawlh rawh.
- ⁴⁹Chun, a mêltheih tla zawzawng leh nunau Galili thawk hen hawng zûltu tla chubang thil chu chuanh hen lât takah an dîr.
- ⁵⁰Chun, minung pakhat, a min Josef, lâirêltu, mi ÷ha tak, rep tak a um.
- ⁵¹Hi minung nih hin an lâirêl leh an thilti khawm rem a ti lo rêng asi. Juda le khua Arimathai ah mi asi le, Pathian Ram a lungum tâwn.

⁵²Chu minung chu Pilat sinah a kal le, Jisu ruak a deih.

⁵³Chun, a lâk le, puan mangthia hen a tuam le, thlân lung hawrh, âukhawm vûi dahlonâk ah a zâutir.

⁵⁴Chun, chu ni chu Timhtuah ni asi le, Dinhni a nâi tek rawh.

⁵⁵Chun, nunau, Galili ram thawk hen a sinah an hawng mi tla nih khan an zûl le, thlân leh a ruak zâutir zia chu an muh.

⁵⁶Chun, an lâwi nawlh le, zeilo rimthâw tla leh sariak rimthâw tla an siam. Chun, Dinhni ah chun thupêk hâwi hen anna dân rawh.

Luk 24

¹Ni sarhi ni masachem ah chun, khuadei rianruan ah, zeilo rimthâw an siam mi tla chu put hen thlân ah chun an va kal.

²Chun, thlân ah mi lung chu t̄inh hen an muh le;

³chun, an lût le, Lal Jisu ruak chu an muh lo.

⁴Chun, chubang ruangah an lawksawng liauah chun, minung panih, puan mit ser rê hen aih mi an kiangah an hawng d̄ir le;

⁵chun, an t̄ih le, an mêl tual tawng h rê hen an kûn liauah annih nih chun an sinah, "Zeirangah mithi lakah a nung mi nan hâwl?"

⁶Hinah a um lo rawh, a thawknawlh rawh; Galili ram ah a um liauah nan sinah a thusim kha theih nawlh u.

⁷Minung Fapa hi misual tla kut ah tlehtir hen a um lai le, kraws ah an khenhbêk lai le, ni thum ni ah a thawknawlh ding asi, 'a ti mi kha,' an ti.

⁸Chun, a thu chu an theih nawlh rawh le,

⁹thlân ah mi chu an tung nawlh le, leikhat leh midang zawzawng tla sinah chun chubang thil zawzawng chu an sim.

¹⁰Chubang tla chu Magdala mi Mari, Joana, Jem nu Mari tla an si; an sinah nunau dang tla khawm nih t̄hiruai tla sinah chun chubang thu chu an sim b̄ak.

- ¹¹Sikhawmsele, chubang thu chu thu salam ah an ruat le, an lung piak na lo.
- ¹²Sikhawmsele, Peter chu a thawk le, thlân ah chun a tek le; chun a kûn le, a bih le, puan mangthia a um mi dei a muh le; chun, thil umzia chu chê ti bû hen a in leiah a lâwi rawh.
- ¹³Chun, chu ni takah chun an lakah mi panih chu khua pakhat Emau an ti mi ah chun an kal awt le, chu khua chu Jerusalem thawk hen Stade sâwmruk asi.
- ¹⁴Chun, thil a hawng tlung mi zawzawng chu an sim vima.
- ¹⁵Chun, an sim le, anna deih liauah chun Jisu ngelchel nih a hawng fûk na le, an sinah a kal bâk rawh.
- ¹⁶Sikhawmsele, amah chu an theih lonâk ding hen an mit chu vâitir hen a um.
- ¹⁷Chun, an sinah, "Kal pah hen nan ruat mi kha, zeï thu me?" a ti. Chun, zûr tak hen an dîr rawh.
- ¹⁸Chun, a min Kleopa dauh nih chun a sinah, " Jerusalem ah nangmah cho hen na maw na um, tu liauah thil umzia hi na theih lo ma?" a ti le, a sâng.
- ¹⁹Chun, anih nih chun an sinah, "Zeï thil me?" a ti. Chun, annih nih chun a sinah, "Nazaret Jisu Pathian leh minung zawzawng mitmuh ah a thu ah leh a thilti ah khuavâng minthang tak thâwnghâng thu;
- ²⁰bâwlpu tla leh kan hotu tla nih thah ding hen an pêk le, kraws ah an khenhbêk zia thu tla kha.
- ²¹Kannah nih Israel tla tlanhtu si ding hen kan lungum rîlmâl hen, zeikhawm si sele, chubang thil tlungnâk chu tusûn hen ni thum asi rawh.
- ²²Chubang lo khawm chu kanmah murui ah mi nunau âu tla mawh zîng ah a thlân ah an va kal le, hawng kan lawksawngtir le;
- ²³a ruak muh ÷ung lo hen 'Pathian vânmifial â langh mi kan muh le, chu tla nih chun a nung nawlh ti an sim,' an hawng ti.

²⁴Chun, kan lakah mi âu tla mawh thlân ah chun an kal le, nunau tla sim hâwitê hen an muh le, sikhawmsele, amah chu an muh fâwn lo," an ti.

²⁵Chun, anih nih chun an sinah, "Mi â tla, khuavâng tla zawzawng thusim lung leikângah thinlung sê tla!

²⁶Mesia nih chubang thil chu tuar hen a rokualnâk ah a lût ding rêng asi lo mazei?" a ti.

²⁷Chun, Mosi leh khuavâng lasui thu thawk hen a dawmh le, Pathian lasui thu zawzawng ah amah thâwngthâng rîn mi vial chu anmah tla a simhfiang vima na.

²⁸Chun, an kalnâk ding khua chu an tlung awt rawh le, chun, anih chu lâ t dauh ah kal a tum hâwi hen a um.

²⁹Chun, kê hen an thlah le, "Kan sinah um ko me; a zânlei vung rawh, nî khawm a tlâ awt rawh," an ti. Chun, an sinah um ding hen a lût rawh.

³⁰Chun, an sinah buh dôm hen a to rawh chun sang a lâk le, mal a sâwm le, a phel le, an sinah a pêk.

³¹Chun, an mit a hawng dei le, a mêl an theih rawh le, chun, anih chu a vei ving rawh.

³²Chun, annih nih chun, 'Lampi ah hawng kan sawnh liauah Pathian lasui thu tla hawng kan simhfiang liau khan kan thinlung a fiang pum lo ngen mazei?" anna ti.

³³Chun, chu liau tak chun an thawk le, Jerusalem ah an kêr nawlh le, leikhat tla leh an hâwi tla anna pôm mi chu an muh le,

³⁴"Lalpa chu a thawknawlh tatak asi; Simon sin khawmah â langh rawh!" an hawng ti.

³⁵Chun, annih khawm nih lampi ah thil hawng tlung mi leh sang a phel le, a mêl an hawng liah rawh zia tla chu an simh na bâk.

³⁶Chun, chubang thu chu an sim liauah chun amah ngelchel chu anmah lakah a hawng dîr le, an sinah, "Nan tlûnah lungngamhnâk um seh," a ti.

- ³⁷Sikhawmsele, an lâu khít le, mithlâ muh hen anna ruat.
- ³⁸Chun, anih nih chun an sinah, "Zeirangah nan lawksawng? Zeirangah nan thínlung ah zumhainhâk a hawng um?"
- ³⁹Ka kut leh ka kezaphah tla hi zauh u, keimah tak kha ka si hi! Hawng ka tham ule, zauh u; nan hawng ka muh hâwi hen thlarau nih taksa leh ruh a nei lo," a ti.
- ⁴⁰Chun, chu chu a sim thlüh rawh chun a kut leh a kezaphah tla an sinah a zauhtir.
- ⁴¹Chun, anna lâwm tuk ruangah an lung lo nget rih le, chê an ti kar chun an sinah, "Hinah ei ding zeilo nan nei ma?" a ti.
- ⁴²Chun, ngâ rawh vo khat an pêk.
- ⁴³Chun, a lâk le, an mâika ah chun a ei rawh.
- ⁴⁴Chun, an sinah, "Hi hi ka thu kha asi, Mosi Dân ah, khuavâng lasuibu ah leh Sawrnâk labu tla ah ka thâwngthâng rîn mi vial a hawng tung ding zia nan sinah ka um liauah ka nan simh tâwn na kha," a ti.
- ⁴⁵Chun, Pathian lasui thu theihnâk ding hen an thínltng a fínghtir.
- ⁴⁶Chun, an sinah, "Hi hâwi hen rîn asi: 'Mesia nih chun hamhnâk a tuar lai le, ni thum ni ah mithi lakah mi a thawknawlh lai le,
- ⁴⁷amah min hen rimnâk thu leh sual ngaihdamnâk thu Jerusalem thawk hen phun kip sinah an sim lai,' ti hen.
- ⁴⁸Chubang thil zawzawng chu a theihtu nan si.
- ⁴⁹Chun, ka Pa thil tiamh chu nan tûnah ka hawng fial awt; sikhawmsele, tûn leiah mi thiltikhonâk hen thuamh nan si lânlo chu khuapi ah hin um kumza u," a ti.
- ⁵⁰Chun, Bethani khua vâu tiang hen annih chu a kalpi na le; chun, a bân a phar le, mal a sâwm na.

⁵¹Chun, mal a sâwm na liau takah chun annih chu a ðhen na le, vâh leiah lâk hen a um rawh.

⁵²Chun, an mâimûk le, lâwm tak hen Jerusalem ah an kîr nawlh rawh le;

⁵³chun, Pathian Biakin ah chun Pathian sawr hen an um kumza rawh.



Johan

Johan 1

- ¹A tîr ah Thu a um, Thu chu Pathian sinah a um; Thu chu Pathian asi.
- ²A tîr thawk hen Pathian sinah a um.
- ³Zeizawng a ektê hen amah siam asi; thilsiam zawzawng hi amah siamlo zeikhawm a um lo.
- ⁴Amah lakah chun nungnâk a um; chu nungnâk chu minung tla chêunâk asi.
- ⁵Chêu chu mûi lakah a hawng chêu le, mûi nih chu chu a neh lo.
- ⁶Pathian fial mi pakhat a um le, a min chu Johan asi.
- ⁷Theihpitu ding hen a hawng kal le, chêu thu chu theihtir ding hen; amah ruangah mi zawzawng nih an lung khonâk ding hen.
- ⁸Anih chu chêu chu asi lo, chêu thu chu theihtir ding hen hawng kal asi dauh.
- ⁹Chêu dik tak mikip chêtirtu kha laikulh ah a hawng kal liau asi.
- ¹⁰Anih chu laikulh ah a um, laikulh amah siam asi, laikulh nih amah an theih lo.
- ¹¹Amah ram ah a hawng kal le, amah mi tla nih an duh lo.
- ¹²Sikhawmsele, amah duhtu vial chu an sinah Pathian fa tla si khonâk ding a pêk, a min zumhtu tla chu.
- ¹³Minung thlâknâk thawk hen ring mi an si lo; taksa duhnâk thawk hen ring mi khawm an si lo; mipa duhnâk thawk hen ring mi khawm an si lo; Pathian thawk hen ring mi an si dauh.
- ¹⁴Thu chu minung ah a hawng a chang le, kan lakah a um rawh. A rokual zia kan muh. Zângfahnâk leh thudik hen a khat. Hi hi rokualnâk chu asi, Pa, Fapa neihlem hâwi a sinâk chu.
- ¹⁵Johan nih a thu a theihtir le, a âu le, "Ka dung leiah hawng ka zûltu nih khan hawng ka lehkhalth rawh asi, keimah lânah um asi rawh ruangah,' ti hen a thu ka sim mi kha amah hi asi," a ti.

- ¹⁶A rangtlingnâk kanna ting chiau, zângfah nûnah zângfah singsuannâk hen,
- ¹⁷Dân Mosi nih a pêk, zângfahnâk leh thudik Jisu Krist ruangah a hawng um.
- ¹⁸Âukhawm nih Pathian an muh dah lo, Fapa neihlem, Pa kiangah um mi tak nih khan, amah a theihtir rawh asi.
- ¹⁹Chun, Juda le nih "Âu me na si?" ti hen, deih ding hen, Jerusalem thawk hen a sinah bâwlpu tla leh Levi chi tla an fial liau khan hi hi Johan theihtirnâk chu asi;
- ²⁰pheh lo hen a phuang le, "Mesia ka si lo," ti hen a phuang.
- ²¹Chun annih nih chun a sinah, "Âu me na si ne?" Elija na si ma? an ti le, an deih. Chun, anih nih chun "Ka si lo," a ti. "Khuavâng chu na si ma?" an ti. Chun, anih nih chun, "Ka si lo," a ti le, a sâng.
- ²²Chun annih nih chun a sinah, "A si chun, âu me na si ne? Hawng kan fialtu tla kan sâng khonâk ding hen hawng kan simh ma ne? Na thâwnghâng rerêng zeime na sim awt?" an ti.
- ²³Chun, anih nih chun, " 'Lalpa lampi dingtir u,' ti hen, 'ramkaro ah âutu aw-hâu ka si,' " Khuavâng Isai sim hâwi khan, a ti.
- ²⁴An mifial tla chu Farisai tla le sinah mi an si.
- ²⁵Chun, annih nih chun a sinah, "Mesia tal, Elija tal, Khuavâng khawm chu na si lêmlo chun, zeirangah na baptis na ne?" an ti le, an deih.
- ²⁶Chun, Johan nih an sinah, "Kei nih tî hen ka baptis le, nan lakah mi pakhat nan theihlo mi a dîr asi.
- ²⁷Anih chu ka dung leiah hawng ding mi chu asi, a pheikawk rî sût tlâk khawm ka si lo," a ti le, a sâng.
- ²⁸Chubang thil chu Jordan lanh ah Bethani ah, Johan baptis nâk ah khan an ti asi.
- ²⁹Chun, a thâituan ah chun Johan nih Jisu a sinah a hawng kal mi a muh. Chun a sim le, "Zauhnik u, Pathian Dawrâ Fa laikulh soal kalpitu ding khi!

³⁰Hi hi asi, 'Minung pakhat hawng ka lehkhanh mi nih khan hawng ka zûl awt, ka lânah a um rawh asi, ka ti mi kha,'

³¹Amah chu ka theih lo, sikhawmsele, Israel tla sinah a hawng langhnâk ding hen, tî hen baptis ding hen ka hawng kal asi," a ti.

³²Chun, Johan nih a theihtir le, a sim le, "Thlarau chu vaṭhu hâwi hen vân thawk hen hawng ṭum ka muh le, a tlûnah a fû ko.

³³Amah chu ka theih lo le, sikhawmsele, tî hen baptis ding hen hawng ka fialtu nih khan ka sinah, 'Âu tlûn zawngah Thlarau hawng ṭum hen, a tlûnah um ko na muh mi chu, amah chu Thlarau Thenhlimh hen baptistu ding chu asi,' hawng ka ti.

³⁴Chu chu ka muh rawh le," "chun hi hi Pathian Fapa asi ti ka theihtir rawh," a ti.

³⁵Chun, a thâituan ah Johan a dîr le, a ṭhiruai le panih hen;

³⁶chun, Jisu kal liau a zauh le, "Zauhnik u, Pathian Dawrâ Fa khi," a ti.

³⁷Chun a ṭhiruai panih nih chun a thusim chu an theih le, Jisu an zûl rawh.

³⁸Chun, Jisu â hawi le, an hawng zûl mi a muh le, an sinah "Zei me nan hâw!" a ti. Chun, annih nih chun, "Rabbi, (chu chu Sîntirtu tinâk asi), zeah na um?" an ti.

³⁹Anih nih an sinah, "Hawng kal ule, nan muh lai," a ti. Chuvachun, an kal le, a umnâk chu an muh le, chu ni ah chun a sinah an um ko le, zânlei dâr li ding asi.

⁴⁰Johan thusim chu theih hen Jisu zûltu panih lakah pakhat chu Andri, Simon Peter unau asi.

⁴¹Anih nih chun a masachem hen a unau Simon a muh le; a sinah, "Mesia kan tawng rawh," a ti, (Sariak Thuh an ti mi chu),

⁴²churawhchun Simon chu Jisu sinah a hawngpi. Jisu nih anih chu a zauh le, "Johan fapa Simon na si, Kipha an sak lai," a ti le, (chu chu Peter tinâk asi, Peter chu lungpi tinâk asi.)

⁴³Chun, a thâituan ah chun Jisu chu Galili ah kal a tum le, Philip a muh le, a sinah, 'Hawng ka zûl rawh," a ti.

⁴⁴Philip chu Betsaida mi asi, chu chu Andri leh Peter umnâk khua asi.

⁴⁵Philip nih chun Nathanael a muh le, a sinah, "A thâwngthâng Mosi nih Dân lasuibu ah a rîn mi leh khuavâng tla nih an rîn mi kha, amah chu kan muh rawh. Nazaret Jisu Josef fapa chu," a ti.

⁴⁶Chun, Nathanael nih chun a sinah, "Nazaret ah thil ̣a a suak kho mazei?" a ti. Philip nih chun a sinah, "Hawng le zauh," a ti.

⁴⁷Jisu nih Nathanael a sinah a hawng mi a muh le, a thâwngthâng sim le, "Zauhnik u, Israel mi tak ngamlêmnâk rerêng neilo hi," a ti.

⁴⁸Nathanael nih a sinah "Nangnih zeitin na theih?" a ti. Jisu nih a sinah, "Philip nih a nan kawh lânah theipi phûr ah na um liau khan ka nan muh," a ti.

⁴⁹Nathanael nih, "Sîntirtu Pathian Fapa na si, Israel tla Lalchem na si hi," ti hen a sâng.

⁵⁰Jisu nih a sinah, "Theipi phûr ah ka nan muh, na sinah ka nan ti ruangah na lung mu? Hi ngâk hen thil rokual dauh hi na muh lai," a ti le, a sâng,

⁵¹Chun, Jisu nih a sinah, "Thungâi tak hen ka nan simh, vên â awng hen, Pathian vênmifial tla Minung Fapa tûnah hin ̣um leh kâi nan muh teh lai," a ti,

Johan 2

¹Ni thum ni ah, Galili ram ah Kana ah umhnâk a um le, chunah chun Jisu nu a um,

²Jisu leh a ̣hiruai tla khawm umhnâk ah an sâwm na,

³Chun, uain a tinh lo le, Jisu nu nih chun a sinah, "Uain an nei lo rawh," a ti,

⁴Chun, Jisu nih a sinah, "Nu, nangnih na ka theih piak ding zei me a um? Ka tik a tlung lo rih," a ti,



- ⁵Chun a nu nih lâiraw tla sinah, "Nan sinah a sim mi vial chu ti vima u," a ti,
- ⁶Chun, Juda tla ãawl thiàng dân hâwi hen lungbêl paruk, tahnâk nih mawh tahnâk thum mawh tlum chiauw, chunah chun an toh.
- ⁷Chun, Jisu nih an sinah, "Tibêl tla tî hen khah u," a ti. Chun, a kê rual hen an khah seng.
- ⁸Chun, an sinah, "Tuah than ule, lâiraw hotu sinah kalpi u," a ti. Chun, an kalpi rawh.
- ⁹Chun, lâiraw hotu nih chun tî uain â chang mi chu a tem le, zeithawk mi asi ti a theih loh, lâiraw tî thantu tla nih chun an theih. Mo pasal chu a kawh le,
- ¹⁰a sinah, "Mi kip nih a tîrah uain ãa an suah tâwn; chun, an din ual nûnah a ãa lo dauh mi chu an suah tâwn; nang lam nih chun tutiang hen uain ãa na kil," a ti.
- ¹¹Jisu nih singsiahnâk a ti masachemnâk hi Galili ram ah Kana ah chun a ti le, a rokual zia a langhtir rawh; chun, a ãhruai tla nih chun amah chu an zumh rawh.
- ¹²Chu nûnah chun Kapernaum ah a va kal le, a nu, a unau tla leh a ãhruai tla hen; chunah chun ni sâwtlotê an châm.
- ¹³Chun, Juda Kalkanh Kût a nâi rawh le, Jisu Jerusalem ah a va kal.
- ¹⁴Pathian Biakin ah châw, dawrâ, vañhu zuartu tla leh tangka thlengtu tla an to mi a muh.
- ¹⁵Chun, ritual hen vuaknâk a siam le, dawrâ leh châw an ektê hen Pathian Biakin thawk hen a nar na le; tangka thlengtu tla tangka chu a bunghe le, an dawhkân tla a thlûk piak na.
- ¹⁶Chun, vañhu zuartu tla sinah chun, "Hi bang tla hi kalpi u, ka Pa in sawlehnâk in ah mang lah u," a ti.
- ¹⁷"Na in ah ka semsê ngaihnâk nih hawng ka ei hep lai," ti rîn asi ti a ãhruai tla nih an theih nawlh rawh.

¹⁸Chuvachun, Juda tla nih a sinah, "Hi bang thil na ti mi hi singsiahnâk zeime na hawng kan zauhtir kho?" an ti le, an sâng.

¹⁹Jisu nih an sinah, "Hi Pathian Biakin hi râwk ule, ni thum karah ka dirh nawlh lai," a ti le, a sâng.

²⁰Chun, Juda tla nih chun, "Hi Pathian Biakin hi kum sâwmli leh kum ruk sak asi, nangnih ni thum karah na dirh awt mu?" an ti.

²¹Sikhawmsele, a taksa biakin thu a sim asi.

²²Churuangah, mithi lakah mi a thawknawlh liauah hi hi a sim ti a thiruai tla nih an theih nawlh rawh le; chun, Pathian lasui thu leh Jisu thusim chu an lung rawh.

²³Chun, Kalkanh Kût ah, Jerusalem ah a um liau chun a singsiahnâk ti tla an muh le, mi tamtak nih a min an zumh rawh.

²⁴Sikhawmsele, Jisu chu an sinah a lungngam thiam lo, mi zawzawng a theih le;

²⁵minung thu âukhawm simhfiang a herh lo, amah nih minung thinlung ah a um mi vial chu a theih ruangah.

Johan 3

¹Chun, Farisai tla lakah mi a min Nikodem, Juda le hotu pakhat a um;

²chu chu zân ah Jisu sinah a hawng kal le, a sinah, "Sîntirtu, Pathian sinah mi sîntirtu dingah hawng kal na si ti kan nan theih; Pathian an sinah a um lo chun hi singsiahnâk tla na ti hâwi hi âukhawm an ti kho lai loh," a ti.

³Chun, Jisu nih a sâng le, a sinah, "Thungâi tak hen ka nan simh, mi âukhawm a suaknawlh lo chun Pathian Ram a muh kho lai loh," a ti.

⁴Nikodem nih a sinah, "Mi a tar nûnah zeitin a suak kho lai? A nu paw sungah veinih lût hen a suak kho lai mazei?" a ti.

⁵Jisu nih a sâng le, "Thungâi tak hen ka nan simh, mi âukhawm tî ah leh Thlarau ah a suak lo chun Pathian Ram ah a lût kho lai loh.

- ⁶Taksa ah a suak mi chu taksa asi, Thlarau ah a suak mi chu Thlarau asi.
- ⁷Na suakthar ding ka nan ti mi hi chê ti lah.
- ⁸Thli kha zeï tal ah a duh duh hen a lêng tâwn, a hâu na theih, sikhawmsele, kha zeï thawk hen hawng mi me, kha zeï leiah a kal awt ti na theih lo; âuzawng Thlarau ah suak mi chu, chu hâwi hen an um, a ti.
- ⁹Chun, Nikodem nih a sâng le, a sinah, "Chu chu zeitin a um kho lai?" a ti.
- ¹⁰Jisu nih a sâng le, a sinah, "Israel tla sîntirtu minthang na si mi, chu chu na theihthiam lo ma?"
- ¹¹Thungâi tak hen ka nan simh, kannih nih kan theih mi chu kan sim tâwn, kan muh mi chu ka theihtir tâwn; sikhawmsele, kan theihtirnâk nan pawm lo.
- ¹²Laikulh thil tla kan simh na mi nan lung lo chun, vîn lei thil tla an simh na sele zeitin nan lung lai?
- ¹³Vîn ah âukhawm an kâi dah lo, Minung Fapa vîn thawk hen hawng tum mi cho lo hi chu.
- ¹⁴Chun, Mosi nih ramkaro ah rûl a thlâi hâwi khan, Minung Fapa hi thlâi hen a um ding asi.
- ¹⁵Âukhawm amah lungtu nih chun amah ruangah zungzâl nungnâk an nei khonâk ding hen.
- ¹⁶Pathian nih laikulh thungâi a dâwt le, churawhchun a Fapa neihlem a pêk, amah chu âuzawng a zumhtu vial thi lo hen, zungzâl nungnâk an nei khonâk ding hen.
- ¹⁷Laikulh mawhtir ding hen Pathian nih a Fapa laikulh ah a fial lo, laikulh amah ruangah ruangsuah hen an um khonâk ding hen a fial dauh asi.
- ¹⁸Âuzawng amah zumhtu chu mawh hen an um lo; âuzawng zumhlotu chu mawh chia hen an um, Pathian Fapa neihlem min an zumh lo ruangah.
- ¹⁹Hi hi mawhnâk asi, chêu laikulh ah a hawng kal le, sikhawmsele mi le tla nih chêu ngâk hen mûi an duh dauh, an thilti tla an sual ruangah.

- ²⁰Âuzawng thilti sual mi nih chêu an hua tâwn, chêu ah khawm an hawng lo, chu lo chun an thilti tla a lang lai.
- ²¹Sikhawmsele, âuzawng a ti dik mi vial an thilti tla Pathian ruangah ti an si ti a lang khonâk ding hen chêu ah an hawng kal," a ti.
- ²²Chu nûnah chun Jisu a thiruai tla hen Judai ram ah an kal le, chunah chun an sinah a um ko le, a baptis na tâwn.
- ²³Johan khawm nih Aion ah Salim khua kiangah a baptis na bâk, chunah chun tî a tam ruangah; chun mi an hawng le, baptis an si.
- ²⁴Johan chu rêngin ah an khumh lo rih.
- ²⁵Chun, Johan thiruai tla leh Juda pakhat, tawl thiang thu ah anna êl.
- ²⁶Chun, Johan sinah an hawng le, a sinah, "Sîntirtu, Jordan râlah na sinah um, a thu na theihtir mi nih khan, ngâinik, kha nih khan a baptis na le, mi zawzawng a sinah an hawng kal asi!" an ti.
- ²⁷Johan nih a sâng le, "Minung nih zeikhawm a nei kho lo, vâh ah mi pêk asi lo chun.
- ²⁸'Kei Mesia ka si lo, a mâi leiah fial ka si,' ka ti mi kha, nanmah tak hawng ka theihpitu nan si.
- ²⁹Mo neitu chu mo pasal chu asi; sikhawmsele, mo pasal hâwipa dîr hen a thu theihthu chu mo pasal aw ruangah thungâi hen â lâwm tâwn; churuarah, tuhin ka lâwmnâk a rangtling rawh asi.
- ³⁰Anih chu sung-û dadauh ding asi, kei lam chu nâu dauh ding ka si.
- ³¹"Tlûnlei thawk hen a hawng kal mi chu mi zawzawng ngâk hen chungnungchem asi; tual ah suak mi chu tual ah mi asi le, tual thu a sim tâwn, vâh thawk hen a hawng kal mi chu mi zawzawng ngâk hen chungnungchem asi.
- ³²A muh leh a theih mi zawng a theihtir tâwn asi, âukhawm nih a thu theihtirnâk an pawm lo.
- ³³A thu theihtirnâk pawm mi nih 'Pathian chu a dik asi,' ti a singsiah.

³⁴Pathian fial mi nih chun Pathian thu a sim tâwn; anih nih chun a Thlarau khatnâk rangtling a pêk.

³⁵Pa nih Fapa a dâwt le, a thiltikhonâk ah thil zeizawng a pêk rawh.

³⁶Âuzawng Fapa zumh mi zawng nih zungzâl nungnâk an nei rawh; sikhawmsele, âuzawng Fapa thu ngâilotu vial nih nungnâk an nei lai lo le, Pathian thinrunhnâk an tlûnah a um kumza dauh asi," a ti.

Johan 4

¹Chun, Jisu nih Johan ngâk hen thiruai tam dauh a siam mi leh a baptis ti Farisai tla nih an theih ti Lalpa nih a theih kê hen,

²(Sikhawmsele Jisu tak nih chun a baptis lo, a thiruai tla nih an baptis tâwn.)

³Judai ram chu a kaltâk le, Galili ram ah a kêr nawlh rawh.

⁴Chun, Samari ram a pal ding asi.

⁵Chuvachun, Samari ram ah khua pakhat, Saikar an ti mi chu a tleng le, Jakob nih a fa Josef sinah mun a pêk mi kiang kha;

⁶Jakob tikhurchawh khawm kha chunah chun a um. Chun, Jisu chu a lam kal dît ruangah tikhurchawh kiang ah a to: Sûn dâr leinih liau asi.

⁷Chun, Samari nunau pakhat tî than a hawng. Jisu nih a sinah, "Din ding hawng ka pêk," a ti.

⁸A thiruai lam chu ei ding châwk hen khua ah an kal rawh.

⁹Chuvachun, Samari nunau nih chun a sinah, "Nang Juda mi na si, kei Samari nunau ka si, zeitin zia hen ka sinah din ding na ka deih?" a ti. (Juda tla nih Samari tla zei lak khawmah an mang dahlo ruangah.)

¹⁰Chun Jisu nih a sâng le, a sinah, "Pathian thilpêk le, Din ding hawng ka pêk,' na sinah titu hi theih le chu, nangnih a sinah na deih dauh ding asi, chun, anih nih tî nung a nan pêk rawh ding asi," a ti.

¹¹Chun, nunau nih chun a sinah, "Pu, a thannâk zeikhawm na nei lo mi, tikhurchawh a thûk thlo mi, kha zei a mi tî nung na tawng?"



- ¹²Kan pu Jakob ngâk hen na rokual dauh mazei? Anih nih chun tikhurchawh hi hawng kân pêk le, amah khawm nih a din le, a fa le, a ran tla hen," a ti.
- ¹³Chun, Jisu nih a sâng le; a sinah, "Âuzawng hi tî dintu vial an tîhâl nawlh lai;
- ¹⁴âuzawng an sinah ka pêk ding mi tî dintu vial lam chu zungzâl hen an tîhâl lai loh, kei nih an sinah tî ka pêk ding mi chu an sung ah tî nung a um lai le, zungzâl nung tiang hen a irh lai," a ti.
- ¹⁵Chun, nunau nih chun a sinah, "Pu, chu tî chu hawng ka pêk, ka tîhâl lonâk ding leh hi bang tiang tî than ding hen ka hawng lonâk ding hen," a ti.
- ¹⁶Chun, Jisu nih a sinah, "Na pasal va kawh le, hinah hawng nawlh," a ti.
- ¹⁷Chun, nunau nih chun a sinah, "Pasal ka nei lo," a ti le, a sâng. Jisu nih a sinah, "Pasal ka nei lo, na ti mi hi, na dik ngâk;
- ¹⁸pasal panga na nei rawh, tuah mi hi na pasal asi lo asi, hi thu hi na sim dik ngâk," a ti.
- ¹⁹Nunau nih chun a sinah, "Pu, khuavâng na si ti ka theih.
- ²⁰Kannah thlâktu tla nih chun hi tlâng ah hin Pathian an sawnh tâwn; sikhawmsele, nannah nih chun, 'Minung nih Pathian an sawnhnâk mun ding chu Jerusalem ah a um,' nan ti tâwn," a ti.
- ²¹Chun, Jisu nih a sinah, "Nunau, ka thu lung rawh, hi tlâng kher lo khawm ah, Jerusalem kher lo khawm ah Pa nan sawnh tik a tlung awt rawh.
- ²²Nannah nih nan theih lo mi nan sawnh tâwn; kannah nih kan theih mi kan sawnh tâwn. Ruangsuaqnâk Juda tla sin thawk hen a hawng suak awt asi.
- ²³Chuvachun, a tik a tlung awt rawh, tu khawmah a tlung liau chir, chu tik chun Pathian sawnhtu tatak tla nih Thlarau leh thudik hen Pa an sawnh lai, Pa nih chu hâwi mi chu amah sawnhtu ding hen a hâwl asi.
- ²⁴Pathian chu Thlarau asi, a sawnhtu tla nih Thlarau leh thudik hen an sawnh ding asi," a ti.

- ²⁵Chun, nunau nih chun a sinah, "Mesia, (Sariak Thuh an ti mi chu) a hawng kal awt ti ka theih, anih chu a hawng kal tikah zeizawng hawng kan simh lai," a ti.
- ²⁶Chun, Jisu nih a sinah, "Keimah a nan sawnhtu hi amah chu ka si," a ti.
- ²⁷Chun, chu liau tak chun a thiruai tla chu an hawng kal le, nunau a sawnh mi chu chê an ti; sikhawmsele, âukhawm nih, "Zeime na hâwl?" "Zeirang nunau na sawnh?" khawm an ti lo.
- ²⁸Chun nunau nih chun a tibêl a kaltâk le, khua ah a kal, mi zapi sinah,
- ²⁹"Ka thilti zawzawng hawng ka simh vimatu mi pakhat a um, hawng kal ule, zauhnik u, Mesia asi kho lai ma?" a ti.
- ³⁰Chun, annih chu khua ah mi chu an hawng suak le, amah lei an fûk rawh.
- ³¹Chu karah a thiruai tla nih chun a sinah, "Sîntirtu, ei rawh," an ti chiam.
- ³²Sikhawmsele, anih nih chun an sinah, "Buh nan theihlo mi ei ding ka nei," a ti.
- ³³Chun, thiruai tla chu anna sâwn le, "A ei ding mi nih an hawng put piak masi le?" an ti.
- ³⁴Chun, Jisu nih an sinah a sim le, "Hawng ka fialtu duhzia ti leh a rianṭuan dih ding hi ka buh asi.
- ³⁵Nannih nih, 'Fâng ât ding thla li a um rih,' nan tilo mazei? Ngâi u, ka nan simh na; chuanh ule, lo tla zauh u, tu thawk hen ât ding hen a vâng asi.
- ³⁶A âttu nih lawh a tawng tâwn le, zungzâl a nung tiang um ding hen rah a khawmh tâwn, a tuhtu leh a âttu anna lâwm vevê khonâk ding hen.
- ³⁷Pakhat nih a tuh le, midang nih a ât, ti thu hi, chu lak chun a dik asi.
- ³⁸Nan ṭuan tha fâk lo ât ding hen ka nan fial na kha; midang nih an ṭuan le; nannih nih an ṭuan chia chu nan zulhpeh asi," a ti.

- ³⁹Chun, nunau nih chun, "Ka thilti zawzawng a hawng ka simh vima," ti hen, a theihtir mi thu ruang khan, chu khua mi Samari mi tamtak nih Jisu an zumh rawh.
- ⁴⁰Chuvachun, Samari mi tla chu Jisu sinah an hawng le, an sinah châm ding hen an ngiar chiam; chun, chunah ni nih a châm.
- ⁴¹Chun, midang tamtak nih amah thu ruangah an lung rawh.
- ⁴²Chun annih nih chun, nunau sinah chun, "Tu lam chun na thusim ruangah lung kan si lo rawh; kanmah ngelchel nih a thu kan theih le, hi minung hi laikulh Ruangsuahtu asi ngelchel ti kan theih rawh," an ti.
- ⁴³Chun, ni nih nûnah chun chu thawk hen a suak le, Galili ram ah a kal rawh.
- ⁴⁴Jisu tak nih, khuavâng chu amah khua leiah chun chawnglawmh hen a um dah lo ti a theihtir tâwn.
- ⁴⁵Chuvachun, Galili ram a va tlung chun Galili ram ah mi tla nih an lawmh le, Jerusalem ah Kût liauah a thilti zawzawng an muh ruang khan; annih khawm chu Kûtnâk ah an kal bâk dangâiah.
- ⁴⁶Chun, Galili ram ah Kana ah tî uain a changtirnâk kha a hawng tling nawlh. Chun, Sorkar rianţuantu âumawh a um le, a fapa Kapernaum ah a damlo.
- ⁴⁷Chun, Jisu Judai ram mi Galili ram ah a hawng ti a theih kê hen a va kal, a fapa damh ding hen a ngiar chiam le, a thi awt ngangâi asi.
- ⁴⁸Chun, Jisu nih a sinah, "Singsiahnâk tla leh thilchê tla nan muh lo chun nan lung rîlmâl lai loh," a ti.
- ⁴⁹Chun, Sorkar rianţuantu nih chun a sinah, "Pu, ka fa thih lânah hawng ko me a," a ti.
- ⁵⁰Chun, Jisu nih a sinah, "Tlung ko rawh, na fapa chu a dam rawh," a ti. Chun, chu minung nih chun Jisu nih a sinah thu a sim mi chu a lung le, a kal rawh.

⁵¹Chun a kal liauah a to-aw tla nih an hawng dawng le, "Na fapa chu a dam rawh," an hawng ti.

⁵²Chun, anih nih chun an sinah a dam liau tik chu a deih na. Chun, annih nih chun a sinah, "Mazân nî her sat ah a râifanh nih a thlah rawh asi," an ti.

⁵³Chun, a pa nih, Jisu nih a sinah, "Na fapa chu a dam rawh," a ti liau tak chu asi ti a theih rawh; chun, amah leh a dâwngsung tla nih an ektê hen Jisu an zumh rawh.

⁵⁴Chu chu Jisu nih a thilchê ti Judai ram thawk hen Galili ram ah a hawng kal liauah a ti veinihnâk chu asi.

Johan 5

¹Chubang nûnah chun Juda tla Kût pakhat a um le, Jisu Jerusalem ah a va kal.

²Chun, Jerusalem ah chun Dawrâ Kawtkâ kiangah zur a um le, chu chu Hebrai hawlh hen Betzatha an ti le, sârbûk panga a nei.

³Chunah chun damlo, mitchâw, kekhêng leh zeng tla tamtak an zâu. (Tî a tlingtlawk ding mi chu an ngâk.

⁴Vei zeimaw zat chu rilî ah vânmifial chu a hawng ÷um le, tî a hawng tlawktir. Chun, titlawk lakah ÷um masachemtú chu zeî nganfâk zawng damtir hen a um.)

⁵Chun, dam lo kum sâwmthum leh kum riat a ngawr mi chunah chun âumawh a um.

⁶Chun, Jisu nih a zâu ko mi chu a muh le, chu hâwi hen sâwt tak a um rawh ti a theih le, a sinah, "Damh na duh ma?" a ti.

⁷Chun, damlo mi nih chun, "Pu, tî a tlingtlawk chun zur ah hawng ka siahtu ka nei lo le, ka kal karah mi nih an hawng ka sawhkhanh tâwn," a ti le, a sâng.

⁸Chun, Jisu nih a sinah, "Thawk le, na tangphah lâk le, kal rawh," a ti.



- ⁹Chun, lâkkhatko ah chu minung chu a dam le, a tangphah chu a lâk le, a kal rawh. Chu ni chu Dinhni asi.
- ¹⁰Chuvachun, Juda le nih a damh mi sinah chun, "Dinhni asi, na tangphah lâk a zarh," an ti.
- ¹¹Chun, anih nih chun an sinah, "Hawng ka damhtu nih ka sinah, 'Na tangphah lâk le, kal rawh, hawng ka ti asi,' a ti le, a sâng.
- ¹²Chun, annih nih chun a sinah, " 'Na tangphah lâk le, kal rawh,' na sinah titu chu âu me si?" an ti le, an deih.
- ¹³Sikhawmsele, a damh mi nih chun âu me asi a theih lo le, chunah chun mi zapi an um ruangah Jisu tâ nih a kal rawh.
- ¹⁴A nehnûn ah chun Jisu nih anih chu Pathian Biakin ah a muh le, a sinah, "Ngâi rawh, na dam rawh hi, thil sual nawlh lah rawh, chu lo chun thil thalo khun na tlûnah a hawng um sual lai," a ti.
- ¹⁵Chun, chu minung chu a va kal le, Juda le sinah chun a damhtu chu Jisu asi ti a simh na.
- ¹⁶Chun, Dinhni ah chubang thil tla chu a ti ruangah Juda tla nih Jisu an nehsawh rawh.
- ¹⁷Sikhawmsele, Jisu nih annih chu a sawnh na le, an sinah, "Ka Pa nih tutiang khawm hen rian a ÷uan tâwn, kei khawm nih ka ÷uan tâwn," a ti.
- ¹⁸Chuvachun, Juda tla nih thah ding an tum khun le, Dinhni a buar ruang cho khawm asi lo le, Pathian amah Pa ah a ruat le, Pathian tluk hen â siam ruang khawmah asi.
- ¹⁹Chun, Jisu nih an sinah, "Thungâi tak hen ka nan simh na, Fapa nih amah ko hen zeikhawm a ti kho lo, Pa thilti a muh mi cho lo chu; thil a ti mi hâwi zawng chu, Fapa khawm nih a ti bâk tâwn.
- ²⁰Pa nih Fapa a dâwt le, a thilti zawzawng a sinah a zauhtir tâwn; hi ngâk a thilti rokual dauh hi a sinah a zauhtir teh lai, chê nan ti dingah.

- ²¹Pa nih mithi tla a thawh le, a nungtir tâwn hâwi hen, Fapa khawm nih a duh mi zawng a nungtir tâwn.
- ²²Pa nih âu lâi khawm a rêl piak lo, lâirêl zawzawng Fapa a rêltir dauh;
- ²³mi zawzawng nih Pa an zah hâwi hen, Fapa khawm an zahnâk ding hen. Âuzawng Fapa zahlo chu, Pa a fialtu khawm zahlo asi.
- ²⁴"Thungâi tak hen ka nan simh na, âuzawng ka thu theih hen, hawng ka fialtu lung nih chun zungzâl nungnâk a nei rawh, mawh hen a um lo le, thihnâk thawk hen a suak le, nungnâk ah a lût dauh asi.
- ²⁵Thungâi tak hen ka nan simh na, a tik a tlung awt rawh, tu khawmah a tlung liau chir, chu tik ah chun mithi tla nih Pathian Fapa aw-hâu an theih lai le, a theih tu vial an nung lai.
- ²⁶Pa nih amah lakah nungnâk a nei hâwi hen, Fapa khawm amah lakah nungnâk a neitir;
- ²⁷chun, Minung Fapa asi ruangah a sinah lâirêl ding thuneihnâk a pêk.
- ²⁸"Hi hi chê ti lah u, a tik a tlung awt rawh, chu tik ah chun thlân ah a um mi zawzawng nih a aw-hâu an theih lai le, an suak ver lai;
- ²⁹thil tha titu tla chu nungnâk ting hen an thawknawlh lai le, thilsual titu tla chu mawhnâk ting hen an thawknawlh lai.
- ³⁰"Keimah thu hen zeikhawm ka ti kho lo; Pa nih hawng ka simh hâwi vima hen lâi ka rêl tâwn, ka lâirêl chu dik tak asi, keimah thu thu hen um ka tum lo le, hawng ka fialtu duhzia hen um ka tum tâwn ruangah.
- ³¹"Mah thâwngthâng theihtir sele, ka theihtirnâk a dik lai loh.
- ³²Ka thâwngthâng theihtirtu chu midang asi; anih nih chun ka thâwngthâng a theihtir mi chu a dik ti ka theih.
- ³³Nannah nih Johan sinah mi nan fial le, chun, anih nih thudik a nan theihtir na kha.
- ³⁴Theihtirnâk ka pawm mi chu, minung thu asi lo; sikhawmsele ruang nan suak khonâk ding hen hi thu hi ka sim asi.

³⁵Chu Johan chu khâwnvâr alh tak leh chêu tak chu asi; a chêu ah chun a lâwm rih ding nan duh kha.

³⁶Sikhawmsele, theihtirnâk ka nei mi hi Johan theihtirnâk ngâk khan a rokual dauh asi: Pa nih thilti dih ding hawng ka pêk mi, ka thilti tak nih hin Pa nih hawng ka fial ti ka thâwngthâng a theihtir asi.

³⁷Pa hawng ka fialtu khawm nih chun ka thâwngthâng a theihtir rawh. Nannih nih zeiliau khawmah a aw-hâu nan theih dah lo, a mêl khawm nan muh dah lo.

³⁸A thu khawm nan thinlung ah nan kil kumza lo, a fial mi hi nan lung lo ruangah.

³⁹Pathian lasui thu nan rêl tâwn, a sung ah zungzâl nungnâk um hen nan ruat ruangah; chubang chu ka thâwngthâng theihtirtu asi.

⁴⁰Sikhawmsele, nungnâk nei ding hen ka sinah nan hawng duh lo.

⁴¹Minung chawnglawmhnâk ka lawmh lo;

⁴²nannih kan theih na, Pathian dâwnnâk nan thinlung ah nan nei lo.

⁴³Ka Pa min hen ka hawng mi asi, nannih nih nan ka pawm lo; midang amah min hen hawng sele, anih chu nan pawm lai.

⁴⁴Nannih chawnglawmh tawng lawmh tu tla, zeitin me nan lung kho lai? Pathian cho thawk hen a suak mi chawnglawmhnâk chu nan hâwl lo mi.

⁴⁵Kei nih Pa sinah kan phiar na ding hen ruat lah u: an phiar natu chu pakhat a um, nan rinhsan Mosi hi.

⁴⁶Mosi nan lung chun kei khawm nan hawng ka lung rawh ding asi; anih nih chun keimah thâwngthâng a rîn ruangah.

⁴⁷Sikhawmsele, a thurîn chu nan lung lo chun, zeitin ka thu nan lung lai?" a ti.

Johan 6



- ¹Chubang thil tla nûnah chun, Jisu chu Galili rilî, Tiberia rilî an ti mi, varâl leiah chun a kal rawh.
- ²Chun, damlo tla tlûnah singsiahnâk a ti mi tla chu an muh ruangah mi zapi tamtak nih amah an zûl.
- ³Chun, Jisu chu tlâng ah a kêi le, chunah chun a thiruai tla sinah a to.
- ⁴Chun, Juda tla Kalkanh Kût chu a nâi rawh.
- ⁵Chun, Jisu nih a chuanh le, mi zapi tamtak nih amah lei fûk hen a muh le, Philip sinah, "Hi bang tla ei ding sang a zeime kan châwk lai?" a ti.
- ⁶Chubang thu chu Philip rangah nikhâk ding hen a sim asi, a ti ding mi chu amah nih a theih ko dangâi ah.
- ⁷Philip nih a sinah, "Mi kip nih tâwm seng anna ting ding khawm hen denari zanih man sang nih a tinh lai lo," a ti le, a sâng.
- ⁸Chun, a thiruai tla lakah pakhat, Simon Peter unau Andri nih chun a sinah,
- ⁹"Barley sang tlang panga leh ngâ panih neitu mipa ngâksia pakhat hinah a um; sikhawmsele, minung chu tluk rak lakah, chu chu zeime a tlâk lai?" a ti.
- ¹⁰Chun, Jisu nih, "Mi zapi tla chu totir na u," a ti. Chun, chu mun ah chun ramhthep tamtak a um. Chun, mipa tla chu an to le, an tam lei chu sângnga ding an si.
- ¹¹Chun, Jisu nih sang tlang tla chu a lâk le, lâwmthu a sim thluh chun a to mi tla sinah a then le, chu hâwi ber hen ngâ tla khawm chu an duh rî hen a then.
- ¹²Chun, an khawp nûnah, a thiruai tla sinah chun, "Zeikhawm tlâu lo ding hen a lei mi neknâwi tla rût u," a ti.
- ¹³Chuvachun an rût le, barley sang tlang panga eitu tla ei bang neknâwi hen khobung leinîh an khah.
- ¹⁴Chun, mi zapi nih chun singsiahnâk chu an muh ka hen, "Hi minung hi, Khuavâng laikulh ah a hawng kal ding chu asi tatak mahi!" an ti.

- ¹⁵Chun amah chu lal ah siam ding hen tleih râm tum hen an hawng kal awt ti Jisu nih a theih le, tâng ah amah dei hen a dang hen a kal rawh.
- ¹⁶Chun zânleibâi ah chun, a ðhruai tla chu rilê ah chun an va kal le;
- ¹⁷lawng ah anna chuan le, rilê ah chun Kapernaum an fûk. Chun, khua a thim rawh le, Jisu tâ nih an sinah a hawng tleng lo rih.
- ¹⁸thli chawp tak a râng ruangah tî tlingtlawk a sâng dadauh asi.
- ¹⁹Chun, stade kul leh panga mawh sâwmthum mawh an vei rawh chun, Jisu chu rilê tûnah kê hen a kal mi, lawng a hawng naih hen an muh le, an ðih.
- ²⁰Sikhawmsele, anih nih chun an sinah, "Keimah ka si, ðih lah u," a ti.
- ²¹Chun, lawng ah chun chuantir an duh rawh, chun, zeikarlo ah lawng nih chun an fûk mi tâng chu a tleng chawlh rawh.
- ²²A thâituan ah chun rilê khat lei râl ah mi zapi dîr tla nih chun lawng pakhat lo chu lawng dang an muh lo le, Jisu chu a ðhruai tla sinah lawng ah chun â chuan bâk lo le, a ðhruai tla anmah dei hen an kal ti an theih.
- ²³Sikhawmsele, Lalpa nih lâwmthu a sim nûnah sang an einâk mun kiang ah khan, Tiberia thawk hen lawnglêng tla a hawng tung.
- ²⁴Chun, mi zapi nih chun Jisu leh a ðhruai tla chu an um lo rawh ti an theih rawh chun, annih khawm lawnglêng lakah chun anna chuan le, Jisu hâwl hen Kapernaum ah an hawng tung.
- ²⁵Chun, rilê râl ah an tawng le, a sinah, "Sîntirtu, zeitik me hi leiah na hawng tleng?" an ti.
- ²⁶Chun, Jisu nih an sinah, "Thungâi tak hen ka nan simh na, thilchê tla nan muh ruangah nan ka hâwl mi asi lo le, sang tlang nan ei le, nan khawp ruang dauh khan asi.
- ²⁷Buh ral kho mi ruangah ðuan lah u, zungzâl tiang hen nungnâk um kumza ding mi buh, Minung Fapa nih a nan pêk na ding mi ruang chun ðuan u; Pa Pathian nih chun anih chu a birhtir rawh dangâiah," a ti le, a sâng.

²⁸Chun, annih nih chun a sinah, "Pathian rian kan ÷uan khonâk ding hen zeime kan ti ding?" an ti.

²⁹Chun, Jisu nih an sinah, "Pathian rian÷uan chu hi hi asi, a fial mi hi zumh ule," a ti le, a sâng.

³⁰Chun, annih nih chun a sinah, "Singsiahnâk zeime na ti lai, kan muh hen kan nan lung khonâk ding hen? Zei thil me na ti lai?"

³¹Kan pu tla nih ramkaro ah manna kha an ei le, 'Vân thawk hen an sinah sang ei ding a pêk, ti rîn hâwi hen," an ti.

³²Chun, Jisu nih an sinah, "Thungâi tak hen ka nan simh na, vân thawk hen mi sang kha Mosi nih an pêk na mi asi lo, ka Pa lam nih chun vân thawk hen sang tak an pêk na asi hi.

³³Pathian sang chu vân thawk hawng ÷um hen, laikulh sinah a nungnâk pêktu hi asi," a ti.

³⁴Chun, annih nih chun a sinah, "Lalpa, chu sang chu zungzâl hen hawng kan pêk rawh," an ti.

³⁵Chun, Jisu nih an sinah, "Kei hi nungnâk sang chu ka si, âuzawng ka sinah a hawng kal mi chu a sungvâng lai loh, âuzawng hawng ka zumhtu chu zeitik khawmah a tîhâl lai loh.

³⁶Sikhawmsele, nannih nih nan ka muh khawmah nan ka lung lo ti ka nan simh na.

³⁷Pa nih a ka pêk mi zawzawng ka sinah an hawng ver lai; âuzawng ka sinah hawng kal mi chu ka nar rîlmâl lai loh.

³⁸Mah duhzia ti ding hen vân thawk hen hawng ÷um ka si lo le, hawng ka fialtu duhzia ti ding hen hawng ÷um ka si dauh.

³⁹Hi hi hawng ka fialtu duhzia chu asi, anih nih a ka pêk mi zawzawng zeikhawm thlâu lo sele, ni dawng ni ah chun thawh dauh na sele.

⁴⁰Chun, hi hi ka Pa duhzia asi, âuzawng Fapa muh hen, zumhtu zawng nih zungzâl nungnâk nei sele; chun, kei nih ni dawngnâk ah chun annih chu ka thawh na lai," a ti.

⁴¹Chun, "Vân thawk hen sang hawng ÷um mi chu ka si," a ti ruangah Juda tla chu a tlûnah an chipchiar.

⁴²"Hi minung hi Josef fa Jisu asi lo ma? a nu leh a pa khawm kan theih. 'Vân thawk hen hawng ÷um ka si,' zeitin a ti zia?" an ti.

⁴³Chun, Jisu nih an sinah, "Chipchiar lemanh lah u.

⁴⁴Pa hawng ka fialtu nih a hîp lo chun âukhawm ka sinah a hawng kal kho lai loh, chun, kei nih ni dawngnâk ah chun ka thawh lai.

⁴⁵Khuavâng tla lasuibu ah, "Pathian sîntir hen an um ver lai," ti rîn asi. Mi kip Pa thu theih hen sîn mi vial chu ka sinah an hawng kal tâwn.

⁴⁶Âukhawm nih Pa an muh lo, Pathian sinah hawng suak cho lo nih chun; anih nih chun Pa chu a muh.

⁴⁷Thungâi tak hen ka nan simh na, âuzawng a lungtu nih chun zungzâl hen nungnâk a nei rawh asi.

⁴⁸Kei hi nungnâk sang chu ka si.

⁴⁹Nan pu tla nih ramkaro ah manna kha an ei narêng hen an thi.

⁵⁰Hi hi vân thawk hen sang hawng ÷um mi chu asi, mi nih a ei hen, a thi lonâk ding hen.

⁵¹Kei hi vân thawk hen sang nung hawng ÷um chu ka si, âuzawng nih hi sang hi a ei chun zungzâl hen a nung kumza lai; asi, laikulh nungnâk dingah ka pêk ding mi sang chu ka taksa hi asi, " a ti.

⁵²Chuvachun, Juda tla anna êl le, 'Hi minung nih hin zeitin me a taksa ei ding hen hawng kan pêk kho lai?" an ti.

⁵³Chun, Jisu nih an sinah, "Thungâi tak hen ka nan simh na, Minung Fapa taksa nan ei hen, a thisen nan din lo chun, nanmah lakah nungnâk nan nei lo.

54Âuzawng ka taksa ei hen, ka thisen dintu nih chun zungzâl nungnâk a nei rawh. Chun, ni dawngnâk ah annih chu ka thawh na lai.

55Ka taksa hi buh tak asi, ka thisen hi din ding tak asi.

56Âuzawng ka taksa ei hen ka thisen dintu chu, keimah lakah a um kumza tâwn, kei khawm amah lakah ka um kumza tâwn.

57Pa nung mi nih chun hawng ka fial le, Pa ruangah nung ka si hâwi hen, âuzawng hawng ka eitu chu keimah ruangah anih khawm a nung lai.

58Hi hi vâw thawk hen sang hawng tûm chu asi: pu tla nih sang chu an ei le, an thi hâwi kha asi lo, âuzawng hi sang eitu zawng chu zungzâl hen a nung kumza lai," a ti.

59Chubang thu chu, Kapernaum ah a sîntir na liau khan, pumhnâk in ah a sim.

60Chuvachun, a tîruai tla zeimaw mi tamtak nih chu chu an theih le, "Hi hi thu har tak asi: âu nih a ngaihtawnh dân a thiam kho lai?" an ti.

61Chuvachun, chu thu lakah chun a tîruai tla an chipchiar ti Jisu nih a thinlung hen a theih le, an sinah, "Hi thu nih hin zei an khamtir na?"

62Minung Fapa hi a lânah a umnâk mun ah a kâi mi nan muh chun, zeitin si lai ne?

63Nungtirtu chu thlarau asi, taksa chu zeirang khawmah a tlâk lo; nan sinah thu ka sim mi tla hi thlarau asi, nungnâk khawm asi.

64Sikhawmsele, nan lakah zeimaw mi lunglo an um," a ti. Jisu nih a lunglotu tla leh a tlehtirtu ding chu a tîr thawk hen a theih ruangah.

65Chun, amah nih, "Chu ruangah asi, nan sinah, 'Pa nih a pêk mi cho lo chu, âukhawm ka sinah an hawng kal kho lai loh,' ka ti mi kha," a ti.

66Chu nûnah chun amah zûltu tla lakah tamtak nih an kaltâk le; amah an kawmh nawlh lo rawh.

67Chuvachun, Jisu nih leinih tla sinah chun, "Nannih khawm kal ding nan duh bâk ma?" a ti.



⁶⁸Chun, Simon Peter nih a sinah, "Lalpa, âu sinah me kan kal lai? Nangnih zungzâl nungnâk thu na nei asi.

⁶⁹Nang Pathian Mi Thenhlimh chu na si ti kan lung hen kan theih rawh," a ti le, a sâng.

⁷⁰Chun, Jisu nih an sinah, "Nannah lein的角度 tla hi keimah thîm nan si lo ma? Nan lakah minung pakhat lam chu diabol asi," a ti.

⁷¹Iskariot Simon fapa Juda, lein的角度 tla lakah â tel bâk mi thu kha a sim asi, anih chu a tleihtirtu ding asi ruangah.

Johan 7

¹Chu nûn chun, Jisu nih Galili ram a ɽawl le; Juda tla nih amah thah an tum ruangah Judai ram chu a ɽawl duh lo.

²Chun, Juda tla Basâ Kût chu a nâi rawh.

³Chun, a unau tla nih a sinah, "Hi thawk hen Judai ram ah va kal rawh, an zûltu tla khawm nih na thilti hi an muh khonâk ding hen.

⁴Âukhawm nih a thup hen thil an ti lo, mah min thang duh ko hen. Hi bang thil tla hi na ti asi chun, laikulh sinah a theihtir rawh," an ti.

⁵A unau tla khawm nih an zumh lo.

⁶Chun, Jisu nih an sinah, "Ka tik a tlung lo rih; nannah tik lam chu a tlung kumza asi.

⁷Laikulh nih an hua kho na lo, kei lam chu a ka hua tâwn, a thilti tla a sual ti ka simhfiang ruangah.

⁸Nannah kûtnâk ah va kal u, kei lam chu kûtnâk ah hin ka kal awt lo rih, ka tik a tlung lo rih ruangah," a ti.

⁹Chun, chu thu chu an sinah a sim le, Galili ram ah a um ko rih.

¹⁰Sikhawmsele, a unau tla chu kûtnâk ah an kal tâ nûnah chun anih khawm zatlâng theihlo hen, a thup hâwi hen a va kal bâk.

- ¹¹Chun, Juda tla nih kûtnâk ah chun anih chu an hâwl le, "A zeime a um?" an ti.
- ¹²Chun, a thu mi zapi lakah mi nih anna chaih chur; a zeimaw mi nih, "Mi tha asi," an ti; midang nih, "Silo, mi zapi a perpet dauh asi," an ti.
- ¹³Sikhawmsele, Juda tla an ãih ruangah âukhawm nih a thu an phuang ngam lo.
- ¹⁴Chun, kût lâikhing ah, Jisu Pathian Biakin ah a va kal le, a sîntir na.
- ¹⁵Chun, Juda tla nih, "Hi minung nih hin a sîn lo hen zeitin lasui a thiam?" an ti le, thungâi chê an ti.
- ¹⁶Chun, Jisu nih annih chu a sâng le, "Ka thu sîntir hi ka tâ asi lo le, hawng ka fialtu tâ asi dauh;
- ¹⁷âuzawng amah duhzia ti duh nih chun, thu sîntir hi Pathian lakah mi ma si, keimah phuak sawm hen ka sim mi ma, a theih lai.
- ¹⁸Âuzawng mah phuak sawm hen thusimtu chu, mah rokualnâk hâwltu asi; a fialtu rokualnâk hâwltu lam chu, chu chu mi dik tak asi, amah lakah chun diklonâk rerêng a um lo.
- ¹⁹Mosi nih Dân chu an pêk na lo mazei? Sikhawmsele, nan lakah âukhawm nih Dân chu nan zâwt fâwn lo. Nannih nih zeirangah thah nan hawng ka tum?" a ti.
- ²⁰Chun, mi zapi nih chun, "Khuri na nei asi; âu nih me thah ding a nan tum?" an ti le, an sâng.
- ²¹Chun, Jisu nih a sâng le, an sinah, "Thil pakhat ka ti le, nan ektê hen chê nan ti.
- ²²Hi ruangah asi, Mosi nih fêmtan thu an pêk na le; (Mosi thawk hen mi asi lo, thlâktu tla thawk hen asi dauh) Dinhni khawmah mi fêm nan tan tâwn.
- ²³Mosi Dân buar lo ding hen Dinhni khawmah mipa nih a fêm a tan tir chun, kei nih Dinhni ah mi ka damh ver ruangah ka tlûnah nan thinrun mu?
- ²⁴Mitmâi zauh hen thu thlûk lah ule, rep tak hen thlûk dauh u," a ti.

²⁵Chun, Jerusalem ah mi zeimaw mi nih, "Hi minung hi thah an tum mi kha asi lo ma?"

²⁶Zauhnik u, langngân hen thu a sim le, a sinah zeikhawm an sim lo. Amah hi Mesia asi ti lâirêltu tla nih an theih tatak menmaw?

²⁷Hi minung hi, zeï thawk hen a hawng mi me si ti kan theih asi, Mesia lam chu a hawng kal tikah âukhawm nih a zeï thawk hen a hawng mi me si ti an theih lai loh," an ti.

²⁸Churung chun Jisu nih Pathian Biakin ah a sîntir na pah hen a âu le, "Nannah nih nan ka theih, zeï thawk hen ka hawng kal ti nan theih. Sikhawmsele mah thu hen hawng ka si lo, hawng ka fialtu chu mi dik tak asi, anih chu nan theih lo.

²⁹Kei lam nih chun anih chu ka theih; a sin thawk hen hawng ka si, amah nih hawng ka fial asi," a ti.

³⁰Chuvachun, anih chu tleih an tum le, sikhawmsele a tik a tlung lo rih ruangah âukhawm nih a tlûnah kut an thlâk lo.

³¹Mi zapi lakah tamtak lam nih chun anih chu an zumh le, "Mesia chu a hawng tikah hi minung ngâk hen tam dauh singsiahnâk a hawng ti lai mazei?" an ti.

³²Chun, Farisai tla nih a tlûnah mi zapi tla nih a thup hen anna chaihnhâk thu tla chu an theih le; chun, bâwlpu lal tla leh Farisai tla nih tleih ding hen tleih tu tla an fial rawh.

³³Chun, Jisu nih, "Sâwtlotê nan sinah ka um lai rih le, hawng ka fialtu sinah ka kal lai.

³⁴Nannah nih nan hawng ka hâwl lai le, nan hawng ka tawng lai loh; ka umnâk ah nan hawng kho lai loh," a ti.

³⁵Chun, Juda tla anna sâwn le, "Kan muh lo ding hen hi minung hi a zeime a kal awt? Greek tla sinah Juda tiau rekrâwi tla sinah kal hen Greek tla chu a sîntir na awt masi?"

- 36'Nannih nih nan ka hâwl lai le, nan ka tawng lai loh; ka umnâk khawmah nan hawng kal kho lai loh, a ti mi hi, zeï a tinâk me asi?" an ti.
- 37'Chun, Kût òiak awt ni, ni rokual takah chun, Jisu a dîr le, a âu le, "Âuzawng a tîhâl mi chu ka sinah hawng kal sele din seh.
- 38'Âuzawng hawng ka zumhtu chu Pathian lasui thu sim hâwi hen tî nung va tla amah thawk hen a hawng luang lai," a ti.
- 39'Chu thu chu a zumhtu tla nih Thlarau an nei ding thu a sim asi; Thlarau chu pêk asi lo rih, Jisu chu chawnglawmh hen a um lo rih ruangah.
- 40'Chun, mi zapi tla lakah a zeimaw mi nih chubang thu chu an theih le, "Hi minung hi khuavâng chu asi tatak ko!" an ti.
- 41'Midang tla nih, "Anih chu Mesia chu asi hi!" an ti. Zeimaw mi lam nih chun, "Zeitin Mesia chu Galili ram thawk hen a hawng suak lai?
- 42'Mesia chu David thlâk lakah, David umnâk khua Bethlehem ah a suak ding asi ti Pathian lasui thu nih a sim lo mazei?" an ti.
- 43'Chuvachun, amah ruangah mi zapi lakah òhennâk a hawng um rawh.
- 44'Zeimaw mi nih chun tleih an duh le, sikhawmsele âukhawm nih kut an thlâk lo.
- 45'Chun, vêngtu tla chu bawlpu tla leh Farisai tla sinah an hawng chun, annih nih chun an sinah "Zeirangah nan hawngpi lo?" an ti.
- 46'Vêngtu tla nih chun, "Khi bang hâwi hen mi nih thu an sim dah lo," an ti le, an sâng.
- 47'Chun, Farisai tla nih chun an sinah, "Nannih khawm hum hen nan um bâk rawh mu?
- 48'Lâirêltu tla leh Farisai tla lakah mi rerêng amah zumhtu an um mazei?
- 49'Hi bang Dân theihlo mi zapi tla hi siat phurhtu an si," an ti le, an sâng.
- 50'Nikodem, a lânah Jisu sinah a hawng mi kha, an lakah tel bâk asi le, an sinah,

⁵¹"Amah thawk ngelchel hen a thu theih leh a thilti theih lânah kan dân nih mi mawh a phurhtir tâwn mazei?" a ti.

⁵²Annih nih chun a sinah, "Nang khawm Galili mi na maw na si bâk? Hâwl le, Galili ram ah chun khuavâng âukhawm suak ding an um lo ti theih ko me," an ti le, an sâng.

Johan 8

¹Chun, mikip mah in chiauh ah an kal rawh. Jisu lam chu Oliv tâng ah a kal rawh.

²Chun, zîng ah Pathian Biakin ah a lût nawlh le, mi zawzawng a sinah an hawng kal le, chun, anih chu a to le, anmah tla a sîntir na.

³Chun, Dân sîntirtu tla leh Farisai tla nih nunau pakhat tângdang a pawmtâk liau chir ah an tleih mi an hawngpi le, chun a lâi ah an dîrtir le

⁴a sinah, "Sîntirtu, hi nunau hi tângdang a pawm liau takah an tleih asi.

⁵Dân ah Mosi nih hi hâwi hi lung hen thi thlo seh ding thu hawng kan pêk le, nangnih zeitin hi thu hi na ngaih?" an ti.

⁶Chu thu chu amah nîknâk ding hen an ti le, a phiarnâk ding an tawng khonâk ding hen. Chuvachun, Jisu a kûn le, a kutdawng hen tual ah a rîn.

⁷Chun, an deih seset ruangah anih chu a thawk le, an sinah, "Nan lakah soal neilo mi zawng nih amah chu lung hen seh masa seh," a ti.

⁸Chun, a kûn nawlh le, a kutdawng hen tual ah a rîn nawlh.

⁹Chun, annih nih chun a thusim chu an theih hen, upachem nih a dawmh le, a dawngh tiang hen, pakhat khat hen anna relh hep le; chun Jisu cho a um rawh, nunau a lâi ah a umnâk mun ah a um mi hen khan.

¹⁰Chun, Jisu a thawk le, a sinah, "Nunau, zeiah me an um rawh? Âukhawm nih an mawhtir lo mu?" a ti.

¹¹Chun, anih nih chun, "Lalpa, âukhawm nih an hawng ka mawhtir lo," a ti. Chun, Jisu nih a sinah, "Kei khawm nih ka nan mawhtir lo; kal le, tu thawk hen soal lah rawh," a ti.]



- ¹²Chun, Jisu nih an sinah thu a sim nawlh le, "Kei laikulh chêu ka si; âuzawng hawng ka zûltu chu mûi ah a kal lai lo, nungnâk chêu a nei dauh lai," a ti.
- ¹³Chuvachun, Farisai tla nih a sinah, "Mah nâ theihtir mi na si; na theihtirnâk a dik lo," an ti.
- ¹⁴Jisu nih an sinah, "Mah thu theihtir khawmsele, ka thu theihtir a dik asi; kei nih ka hawng suaknâk leh ka kalnâk lei ding khawm ka theih; nannih lam nih chun ka hawng suaknâk leh ka kalnâk ding lei khawm nan theih lo.
- ¹⁵Nannih nih minung ngaihdân hâwi hen lâi nan rêl tâwn; kei lam nih chun âukhawm an lâi ka rêl lo.
- ¹⁶Lâirêl khawmsele ka lâirênâk a dik; keimah lâwng ka si lo le, kei leh Pa hawng ka fialtu kan si dauh ruangah.
- ¹⁷Asi, nan Dân ah, 'Mi panih theihpinâk a dik,' ti rîn asi ko khateh.
- ¹⁸Kei hi mah thu theihtirtu ka si, Pa hawng ka fialtu nih chun ka thu a theihtir asi," a ti le, a sâng.
- ¹⁹Chun, annih nih chun a sinah, "Na pa zeiah a um?" an ti. Jisu nih, "Nannih nih kei nan hawng ka theih lo, ka Pa khawm nan theih lo; kei nan hawng ka theih chun, ka Pa khawm nan theih lai," ti hen a sâng.
- ²⁰Chubang thu chu Pathian Biakin ah a sîntir na liauah, thawhlâwm siahnâk mun ah a sim le; âukhawm nih amah an tleih lo, a tik a tlung lo rih ruangah;
- ²¹Chun, anih nih chun an sinah, "Ka kal ving awt, nannih nih nan ka hâwl lai le, nan sual mawhnâk lakah nan thi lai; ka kalnâk dingah nan hawng kal kho lai loh," a ti nawlh.
- ²²Chun, Juda tla nih, "Ka kalnâk dingah nan hawng kal kho lai loh, a ti mi hi, â thah awt masi?" an ti.
- ²³Chun, anih nih chun an sinah, "Nannih tanglei thawk hen suak nan si; kei lam chu tlûnlei thawk hen suak ka si; nannih laikulh a suak nan si; kei lam chu hi laikulh a suak ka si lo.

- ²⁴Churuangah, nan sinah, 'Nan soal mawhnâk lakah nan thi lai,' ka ti mi kha; anih chu ka si ti nan lung lo chun, nan soal mawhnâk lakah nan thi lai," a ti.
- ²⁵Chun, annih nih chun a sinah, "Âu me na si?" an ti. Jisu nih an sinah, "A tîr thawk hen nan sinah ka sim tâwn kha.
- ²⁶Nannih thu lakah hin thil tamtak sim le ruat ding ka nei; zeikhawm si sele, hawng ka fialtu chu mi dik tak asi; a sinah thu ka theih mi vial laikulh sinah ka simh," a ti.
- ²⁷Pa thu an sinah a sim ti an theih lo.
- ²⁸Chuvachun, Jisu nih, "Nannih nih Minung Fapa hi nan thlâi tikah, anih chu ka si ti leh kei nih mah thu hen ze thil khawm ka ti lo, Pa nih hawng ka simh hâwi vima hen hi bang thu hi ka sim dauh asi ti nan theih teh lai.
- ²⁹Hawng ka fialtu chu ka sinah a um le, hawng ka thlahthlamh lo; a lawmh kâng thil ka ti kumza ruangah," a ti.
- ³⁰Chubang thu chu a sim liauah mi tamtak nih amah chu an zumh rawh.
- ³¹Chun, Jisu nih a lungtu Juda tla sinah chun, "Ka thu nan zâwt kumza chun ka thiruai tla nan si tatak lai;
- ³²chun thutak nan theih lai le, thutak nih chun sal an suah na lai," a ti.
- ³³Chun, annih nih chun a sinah, "Abraham thlâk tla kan si, âu sal khawmah kan um dahlo rih; Sal an suah na lai,' zeitin zia na ti mi mesi?" an ti le an sâng.
- ³⁴Jisu nih an sinah, "Thungâi tak hen ka nan simh na, âuzawng thilsual titu vial soal sal asi.
- ³⁵Sal chu zungzâl hen in ah a um kumza lo; fapa lam chu zungzâl hen a um kumza tâwn.
- ³⁶Chuvachun, Fapa nih sal a nan suah na chun, nan suak tatak lai.
- ³⁷Abraham thlâk tla nan si ti ka theih; si khawm ule, thah nan ka tum, ka thu nih nan thinlung ah mun a nei lo ruangah.

³⁸Kei nih ka Pa sinah thil ka muh mi chu ka sim tâwn; nannih khawm nih nan pa sinah thil nan theih mi chu nan ti tâwn," a ti.

³⁹Chun, annih nih chun a sinah "Kan pa Abraham asi," an ti le, an sâng. Chun, Jisu nih an sinah, "Abraham fa le nan si chun, Abraham thilti kha nan ti ding asi.

⁴⁰Sikhawmsele, tuah thah nan ka tum. Pathian sinah thutak ka theih mi, an simh natu ka si; Abraham nih chun hi hâwi hen a ti lo.

⁴¹Nannih nih nan pa thilti chu nan ti tâwn, a ti. Chun, annih nih chun a sinah "Lakfâ tla kan silo, Pa pakhat chi kan nei, Pathian chu," an ti.

⁴²Jisu nih an sinah, "Pathian nan pa asi chun, nan hawng ka dâwt lai; Pathian sinah suak le, amah sin thawk hen hawng kal ka si; keimah thu hen hawng kal ka si lo, amah fial mi ka si dauh.

⁴³Zeirangah ka hawlh umzia nan theihthiam lo? Ka thusim nan ngâi set lo ruangah asi.

⁴⁴Nannih chu nan pa diabol sin thawk hen suak nan si le, nan pa duhzia ti nan duh. Anih chu a tîr thawk hen mi thahtu asi, thutak ah a um lo, a sung ah thutak a um lo ruangah. Âwkrâwl thu a sim chun amah lakah mi a sim tâwn; mi âwkrâwl asi, âwkrâwlpâ khawm asi.

⁴⁵Thutak ka sim ruangah nannih nih nan hawng ka lung lo asi.

⁴⁶Nan lakah soal leikângah mawh nan hawng ka phurhtir khotu âu a um? Thutak ka sim khawmah nannih nih zeirang nan hawng ka lung lo?

⁴⁷Pathian sinah thawk hen suak nih chun Pathian thu a ngâi tâwn; hi ruang hin nan ngâi lo asi, Pathian sin thawk hen suak nan silo ruangah," a ti.

⁴⁸Chun, Juda tla nih chun a sinah, "Samari mi khuri nei na si kan ti mi kha, kan dik ngen lo ma?" an ti le, an sâng.

⁴⁹Jisu nih, "Khuri nei ka si lo; ka Pa ka chawnglawmh asi dauh, nannih nih chun nan hawng ka chawnglawmh lo.

⁵⁰Sikhawmsele, mah rokualnâk hâwl ka si lo; a hâwltu leh a lâirêltu mi pakhat a um.

⁵¹Thungâi tak hen ka nan simh na, mi nih ka thu a zâwt chun, a thi rerêng lai loh," a ti.

⁵²Juda tla nih a sinah, "Khuri nei na si ti tuah kan nan theih rawh. Abraham a thi rawh, khuavâng tla hen, nangnih, 'Mi nih ka thu a zâwt chun a thi rerêng lai loh,' na ti.

⁵³Kan thlâktu Abraham ngâk hen na rokual dauh mazei? Anih khawm a thi rawh, khuavâng tla khawm an thi rawh; âu ah me na rêl?" an ti.

⁵⁴Jisu nih, 'Mah a chawnglawmh sele ka rokualnâk zeikhawm asi lai lo; 'Kan Pathian' nan ti mi ka Pa chu, hawng ka chawnglawmhtu asi;

⁵⁵nan nih nih amah nan theih lo; kei lam nih chun amah ka theih; Amah ka theih lo, ti sele, nanmah hâwi hen mi âwkrâwl ka si lai; sikhawmsele, amah ka theih le, a thu khawm ka zâwt tâwn.

⁵⁶Nan thlâktu Abraham kha, ka ni muh ding asi ruangah thungâi â lâwm tâwn; chun a muh le, â lâwm," a ti le, a sâng.

⁵⁷Chun, Juda tla nih chun a sinah, "Nang kum sâwmnga khawm tling lo rih hen, Abraham na muh mazei?" an ti.

⁵⁸Jisu nih an sinah, "Thungâi tak hen ka nan simh na, Abraham suak lânah mi ka si rawh," a ti.

⁵⁹Chuvachun, a sehnâk lung an sar le, sikhawmsele Jisu â thup le, Pathian Biakin ah mi chu a suak rawh.

Johan 9

¹Chun, Jisu nih a kal pah hen a suak tîr thawk hen mi mitchâw pakhat a muh.

²Chun, a thiruai tla nih a sinah, "Sîntirtu, mitchâw chia hen a suak mi hi âu nih me thil soal a ti, hi nih hin ma, a nu leh a pa nih?" an ti le, an deih.

- ³Jisu nih, "Hi minung khawm nih a soal lo, a nu leh a pa khawm nih an soal lo; Pathian rianṭuan a tlûnah a langhnâk ding hen asi dauh.
- ⁴Sûn asi liauah hawng ka fialtu rian ka ṭuan ding asi; zân asi awt rawh hi, chu tikah chun âukhawm nih rian an ṭuan kho lai loh.
- ⁵Laikulh ka um karah laikulh chêu ka si," a ti le, a sâng.
- ⁶Chu hâwi hen a sim thluh rawh chun, tual ah chil a sâk le, chil hen chun nêng a tuah le, chun, nêng chu a mit ah a buah le,
- ⁷chun a sinah, "Siloam zur ah va ṭâwl rawh," a ti. (Siloam chu Fial tinâk asi.) Chun, a va kal le; a ṭâwl le, mit dei hen a hawng nawlh rawh.
- ⁸Chuvachun, a zâwlbâwm tla leh a lânah a kut dawnh muh tâwntu tla nih, 'Hi minung hi to bû hen kut dawnh tâwn kha asi lo ma?" an ti.
- ⁹Midang nih, "Amah kha asi," an ti. Midang nih, "Asi lo, amah banghtu dauh asi," an ti. Anih nih chun, "Kha kha ka si," a ti.
- ¹⁰Chun, annih nih chun a sinah, "Na mit zeitin a hawng dei le?" an ti.
- ¹¹Anih nih chun, "Jisu an ti mi nih khan nêng a siam le, ka mit ah a buah le, Siloam zur ah va kal le, ṭâwl rawh,' hawng ka ti rawh asi," a ti.
- ¹²Chun, annih nih chun a sinah, "Anih chu zeiah a um?" an ti. "Ka theih lo," a ti.
- ¹³Chu lânah mitchâw chu Farisai tla sinah an kalpi.
- ¹⁴Chun, Jisu nih nêng a siam le, a mit a deitir ni kha Dinhni asi.
- ¹⁵Chun, Farisai tla nih a mit a hawng deinâk a muh zia dân an deih nawlh. Anih nih chun an sinah, "Ka mit ah nêng a siah le, ka ṭâwl le, ka muh kho asi," a ti.
- ¹⁶Chun, Farisai tla zeimaw mi nih, "Chu minung chu Dinhni a khunhriah lo ruangah, Pathian sinah thawk hen suak asi lai loh," an ti. Zeimaw mi lam nih chun, "Misual nih hi hâwi thilchê zeitin a ti kho lai?" an ti. Chun, anmah lakah ṭhennâk a hawng um rawh.

- ¹⁷Chun, mitchâw sinah chun, "Na mit a deitir mi kha amah chu zeitin na ngaih?" an ti nawlh. Chun, anih nih chun, "Khuavâng asi, a ti.
- ¹⁸Sikhawmsele, Juda tla nih mit deinâk tawngtu nu leh pa chu an kawh na lânlo chu, mitchâw asi, mit deinâk a tawng ti, a thu chu an lung lo.
- ¹⁹Chun, a nu leh a pa sinah, "Hi minung hi, nan fapa mitchâw chia hen a suak nan ti mi kha masi?Zeitin tuah a muh kho zia?" ti hen, an deih.
- ²⁰A nu leh a pa nih chun, "Hi hi kan fapa asi ti kan theih, mitchâw chia hen a suak ti khawm kan theih;
- ²¹sikhawmsele, zeitin tuhin a hawng muh kho rawh zia hi kan theih loh, a mit deitirtu khawm kan theih loh, amah deih u; a upa bâk rawh asi, amah thu chu amah nih a sim lai!" an ti le, an sâng.
- ²²Juda le an ãih ruangah a nu leh a pa nih chun, chubang thu chu an sim asi. Juda tla nih chun âuzawng nih, "Anih chu Mesia asi," ti hen ãanhtu chu pumhnâk in ah mi nar asi lai ti hen rem an ti chia khap asi.
- ²³Churuarangah asi, a nu leh a pa nih chun, "A upa bâk rawh mi chu amah deih u," an tinâk chu.
- ²⁴Chun, mitchâw chu an kawh nawlh le, a sinah, "Pathian sawr rawh, kha minung lam kha chu misual asi ti kan theih," an ti.
- ²⁵Chun, anih nih chun, "Misual asi le silo ka theih lo, thil pakhat ka theih, a lân khan ka mit a châw le, tuah ka muh kho hi," a ti le, a sâng.
- ²⁶Chun, annih nih chun a sinah, "Na tlûnah zeitin a ti? Na mit zeitin a deitir?" an ti.
- ²⁷Chun, anih nih chun an sinah, "Masa khan kan simh na le, nan ngâi lo; zeirangah theih nan duh nawlh zia? Nannih khawm a ãhiruai tla si bâk nan duh mu?" ti hen a sâng.
- ²⁸Chun, annih nih chun an fâi le, "Nang hi amah ãhiruai na si le, kannih lam chu Mosi ãhiruai tla kan si.

²⁹Pathian nih Mosi a sawnh ti kan theih, hi minung lam hi chu zeithawk hen hawng suak me asi ti kan theih loh," an ti.

³⁰Chun, chu nih chun an sinah, "Chu tak chu asi a chênâk chu, a zeithawk hen me suak asi ti nan theih lo, sikhawmsele ka mit a deitir asi.

³¹Pathian nih misual thu a ngâi tâwn lo ti kan theih; sikhawmsele, âuzawng nih Pathian sawnhtu asi hen, a duhzia thil a ti chun, anih chu Pathian nih a ngâi piak tâwn.

³²Laikulh um tîr thawk hen âukhawm nih mitchâw chia hen a suak mi mit an deitir nawlh ti theih asi dah lo.

³³Hi minung hi Pathian thawk hen suak asi lo chun zeikhawm a ti kho lai loh," a ti le, a sâng.

³⁴Chun, annih nih chun a sinah, "Nang sual lumpi hen suak na si, nangnih na hawng kan simh bâk mu?" an ti le, an sâng. Chun, anih chu an nar rawh.

³⁵Chun, an nar ti Jisu nih a theih le; chun, anna tawng rawh chun, "Minung Fapa na zumh ma?" a ti.

³⁶Chun, anih nih chun, "Pu, anih chu âu me asi, ka zumh khonâk ding hen?" a ti le, a sâng.

³⁷Jisu nih a sinah, "Anih chu na muh rawh asi, an sawnh liau chirtu hi asi, a ti.

³⁸Chun, anih nih chun, "Lalpa, ka lung," a ti le, a mâimûk.

³⁹Chun, Jisu nih, "Lâirêl ding hen hi laikulh ah hin hawng kal ka si, mitchâw tla an mit a deinâk ding leh mitdei tla chu an mit a châw khonâk ding hen," a ti.

⁴⁰Chun, a sinah Farisai um mi tla nih chun chubang thu chu an theih le, a sinah, "Kannah khawm hi mitchâw kan si bak bei ne?" an ti.

⁴¹Chun, Jisu nih an sinah, "Mitchâw si u le chu sual nan neilo ding mi; sikhawmsele kan muh kho,' tuah na ti dangâiah, churung chun nan sual a um kumza asi," a ti.



Johan 10

¹Thungâi tak hen ka nan simh na, "Âuzawng dawrâ kulh kawtkâ ah lût lo hen, a dang lei hen kâi mi chu, chu minung chu fîrmang leh rawkmang asi.

²Âuzawng kawtkâ ah lût lam chu, dawrâ vêngtu asi.

³Kawtkâ vêngtu nih anih chu a awng piak tâwn; dawrâ tla nih a aw an theih tâwn le; amah dawrâ tla chu an min hen a kawh chiau na le, a suakpi na tâwn.

⁴A tâ zawzawng a suaktir na chun, an mâi leiah a kal le, dawrâ tla nih chun amah an zûl tâwn le, a aw an theih ruangah.

⁵Midang an zûl lai lo le, an tek khalh dauh lai; midang tla aw chu an theih lo ruangah," a ti.

⁶Chu tahthimh thu chu Jisu nih an sinah a sim le; sikhawmsele, zeï thu me an sinah a sim ti an theihtiam lo.

⁷Chun, Jisu nih an sinah a sim nawlh le, "Thungâi tak hen ka nan simh na, kei hi dawrâ kawtkâ chu ka si.

⁸Ka lânah hawng kal zawzawng tla kha fîrmang leh rawkmang tla an si; sikhawmsele dawrâ tla nih chun an thu an ngâi lo.

⁹Kei kawtkâ chu ka si; âuzawng keimah lakah a lût mi chu ruangsuaah hen a um lai le, a lût hen a suak lai, ei ding a tawng lai.

¹⁰Fîrmang chu fîr ding leh thah ding leh rawk ding lo chun a hawng kal lo; kei lam chu nungnâk an nei khonâk ding hen, tamtak an nei khonâk ding hen, hawng kal ka si.

¹¹"Kei dawrâ vêngtu tha ka si: dawrâ vêngtu tha nih dawrâ tla rangah a nungnâk a pêk tâwn.

¹²Lawh kal mi, dawrâ vêngtu tak silo hen dawrâ tla a tâ silo mi nih chun chingngia a hawng kal mi a muh chun dawrâ tla a tektâk tâwn; chun chingngia nih chun a seh na le, a rektir phin na tâwn;

¹³lawh a kal mi asi le, dawrâ tla a thlû-nâ lo ruangah a tektâk tâwn asi.



¹⁴Kei lam chu dawrâ vêngtu ðha ka si; Pa nih a ka theih mi leh kei nih Pa ka theih hâwi hen ka tâ ka theih le; ka tâ khawn nih an ka theih asi;

¹⁵chun, dawrâ tla rangah chun ka nungnâk ka pêk.

¹⁶Chun, hi dawrâ kulh ah mi lo hi dawrâ dang ka nei; annih khawm ka hawngpi na ding asi, ka aw an ngâ lai; chuvachun rual khat hen an um lai le, vêngtu pakhat hen.

¹⁷"Hi hi ruangah hin Pa nih hawng ka dâwt asi; lâk nawlh ding hen ka nungnâk ka pêk awt ruangah hin.

¹⁸Âukhawm nih ka sinah mi an lâk kho lai loh, keimah thu thu hen ka pêk awt asi. Pêk kho ka si, lâk nawlh kho khawm ka si. Hi thupêk hi ka Pa thawk hen ka tawng asi," a ti.

¹⁹Chubang thu ruang chun Juda tla lakah ðhennâk a hawng um nawlh.

²⁰An lakah cherkhet nih, "Khuri a nei le, a â asi hi; zeirangah a thu nan ngâi?" an ti.

²¹A zeimaw mi nih, "Hi bang thu hi khuri nei thusim asi lo; khuri nih mitchâw mit a deitir kho mazei?" an ti.

²²Chun, Jerusalem ah Biakin Apnâk Kût liau asi; chu chu busik liau asi.

²³Chun, Jisu chu Pathian Biakin ah, Solomon sârbuk ah â vel.

²⁴Chun, Juda tla a kiangah an hawng kal le, a sinah, "Zei tiang me laklawh hen na hawng kan tuah awt? Mesia na si chun, fiang tak hen hawng kan simh rawh," an ti.

²⁵Jisu nih an sinah, "Ka nan simh na rawh kha, nan lung lo; ka Pa min hen thil ka ti mi hi, hi nih hin ka thâwngthâng a theihtir asi.

²⁶Sikhawmsele, nan lung lo, ka dawrâ lakah mi nan silo ruangah.

²⁷Ka dawrâ tla nih ka aw an theih tâwn, kei khawm nih annih chu ka theih na le, annih nih chun an hawng ka zûl tâwn;

²⁸an sinah zungzâl nungnâk ka pêk tâwn; an vei rîlmâl lai lo le; âukhawm nih ka thiltikhonâk ah mi an hawng ka suh lai loh.

²⁹Annih hawng ka pêktu ka Pa chu, mi zawzawng ngâk hen a rokual chem asi: âukhawm nih Pa thiltikhonâk ah mi chu an suh kho lai loh.

³⁰Kei leh Pa chu pumkhat kan si," ti hen a sâng.

³¹Chun, Juda tla nih chun a sehnâk ding hen lung an sar nawlh.

³²Jisu nih annih tla chu a sawnh na le, "Pa sinah suak rianṭuan ṭha cherkhet ka nan zauhtir na le, kha bang rianṭuan tla lak khan a zeiruang khan me lung hen nan hawng ka seh awt?" a ti.

³³Juda tla nih chun a sinah, "Rian ṭha ruangah lung hen kan seh awt lo; Pathian na sâwi ruangah leh nang minung si ko hen Pathian ah na siam ruang hin asi dauh!" ti hen, an sâng.

³⁴Jisu nih an sinah, "Nan Dân ah Pathian nih, 'Pathian tla nan si,' ti rîn asi lo ma?

³⁵Pathian lasui thu nih a sim mi chu zungzâl rangah a dik asi ti kan theih; chun Pathian thupêk hen an um mi tla chu Pathian nih pathian tla a ti na.

³⁶Kei rangah chun, Pa nih a hawng ka thîm le, chun laikulh ah a hawng ka fial. Churuarangah zeitin zia hen, 'Pathian Fapa ka si,' ka ti ruangah, Pathian na simsiat, nan ti kho zia?

³⁷Ka Pa rianṭuan ka silo chun, hawng ka lung lah u.

³⁸Sikhawmsele, ṭuan ka si chun, kei hawng ka lunglo khawm ule, rianṭuan tla hi lung u; Pa keimah lakah a um ti leh kei Pa lakah ka um ti nan theih hen leh nan theihthiam khonâk ding hen," a ti le, a sâng.

³⁹Chun, anih chu tleih an tum nawlh le, sikhawmsele, an kut lakah mi a suak rawh.

⁴⁰Jordan varâl ah, Johan nih a tîr ah a baptisnâk mun ah khan a kal ving nawlh le, chunah chun a um ko.

⁴¹Chun, mi cherkhet a sinah an hawng kal le, "Johan nih thilchê zeikhawm chu a ti lo le; sikhawmsele Johan nih hi minung thu a sim mi zawzawng kha a dik ma hi," an ti.

⁴²Chunah chun mi cherkhet nih amah an zumh rawh.

Johan 11

¹Chun, mi pakhat, a min Lazar; Mari leh a unau nu Marthi umnâk khua Bethani ah mi damlo a um.

²Mari sariak rimthâw, Lalpa chulh hen, a sam hen a kê nâwttu, kha ÷apa Lazar kha asi, a damlo mi chu.

³Chun, a farnu le nih Jisu sinah, "Lalpa, ngâinik, na dâwt mi kha a damlo," ti hen, mi an fial.

⁴Chun, Jisu nih chu chu a theih le, "Hi damlonâk hi thihnâk ding asi lo, Pathian rokualnâk ding asi dauh, Pathian Fapa chu hi ruang hin chawnglawmh asi khonâk ding hen," a ti.

⁵Chun, Jisu nih Marthi leh a unau nu leh Lazar a dâwt.

⁶Churuangah a damlo ti a theih chun, a umnâk mun ah ni nih a um rih.

⁷Chun, chu nûnah chun a ÷hiruai tla sinah, "Judai ram ah kan kal nawlh lai," a ti.

⁸Chun, ÷hiruai tla nih chun a sinah, "Sîntirtu, mazannâi ko khan Juda tla nih lung hen seh an tum mi kha; chunah chun na kal nawlh awt mazei?" an ti.

⁹Chun, Jisu nih, "Sûn ah dâr leinîh a um lo mazei? Mi sûn ah a kal chun, â suih dah lo, hi laikulh chêu hi a muh ruangah.

¹⁰Sikhawmsele, mi zân ah a kal chun â suih tâwn, amah lakah chêu a umlo ruangah," a ti le, a sâng.

¹¹Chubang thu chu a sim le; chun, chu nûnah chun an sinah, "Kan hâwi Lazar chu a it rawh; a it mi va ÷thangh ding hen ka kal awt asi," a ti.



- ¹²Chun, ðhiruai tla nih chun a sinah, "Lalpa, a it rawh chun a dam nawlh lai bei a," an ti.
- ¹³Jisu nih a thih thu a sim asi, sikhawmsele annih nih chun a taksa it mi thu a sim mi mawh an ti.
- ¹⁴Chuvachun, Jisu nih fiang tak hen an sinah a sim le, "Lazar a thi asi.
- ¹⁵Chun ah ka umlo mi chu nanmah rangah kan lawmh piak na asi, nan lung khonâk ding hen; sikhawmsele, a sinah kan kal lai," a ti.
- ¹⁶Chun, Thom, (Phîr an ti mi) nih chun, a ðhiruai hâwi tla sinah, "A thihnâk ah thi bâk ding hen kan kal lai," a ti.
- ¹⁷Chun, Jisu a va tleng liauah, ni li thlân ah a um rawh ti a theih.
- ¹⁸Bethani chu Jerusalem kiang asi, stade nih tluk ding a lâst asi;
- ¹⁹chun, an ðapa thih ruangah lungngamh ding hen Juda tla cherkhet Marthi leh Mari sinah an hawng kal.
- ²⁰Chun, Marthi nih chun Jisu a hawng kal awt ti a theih kê hen a va dawng; Mari lam chu in ah a to ko.
- ²¹Chun, Marthi nih chun Jisu sinah, "Lalpa, hinah um le chu ka ðapa a thi lo ding mi.
- ²²Tu khawmah Pathian sinah na deih mi zawng chu Pathian nih a nan pêk lai ti ka theih," a ti.
- ²³Jisu nih a sinah, "Na ðapa a thawknawlh lai," a ti.
- ²⁴Marthi nih chun a sinah, "Ni dawng ni ah, thawknawlhniâk ah chun a thawknawlh lai ti ka theih," a ti.
- ²⁵Jisu nih a sinah, "Kei hi thawknawlhniâk leh nungniâk chu ka si, âuzawng hawng ka zumhtu chu thi khawmsele a nung kumza lai;
- ²⁶a nung mi zawng nih hawng ka zumhtu chu an thi rîlmâl lai loh; chu thu chu na lung ma?" a ti.

- ²⁷Anih nih chun a sinah, "Lung ta a, Lalpa; Mesia, Pathian Fapa, laikulh ah a hawng kal ding mi chu na si ti ka lung," a ti.
- ²⁸Chun, chu thu chu a sim thluh kê hen a kal le, a unau nu Mari chu a thup hen a kawh le, "Sîntirtu hinah a um le, a nan kawh," a ti.
- ²⁹Chun, anih nih chun, chu chu a theih kê hen mawhsareh hen a thawk le, a sinah a va kal.
- ³⁰(Jisu chu khua ah a lût lo rih, Marthi nih a dawng liauah a umnâk mun ah a um ko rih.)
- ³¹Chun, in sungah a thlangamhtu Juda tla nih chun Mari mawhsareh hen a thawk le, a suak mi an muh kê hen, thlân ah ÷ap ding hen a kal awt bei an ti le, an zûl.
- ³²Chun, Mari chu Jisu umnâk chu a va tleng le, a muh kê hen a kê bul ah a bawkbukhup le, a sinah, "Lalpa, hinah um le chu, ka ÷apa a thi lo ding mi, a ti.
- ³³Chun, Jisu nih Mari ÷ap leh a hawng zûltu Juda tla ÷ap chu a muh le, a thinlung hen a rûm le, a lawksawng le,
- ³⁴"Anih chu zeiah nan vûi?" a ti. Annih nih chun a sinah, "Lalpa, hawng kal le, zauhnik," an ti.
- ³⁵Jisu a ÷ap rawh.
- ³⁶Chun, Juda tla nih chun, "Zauhnik u, Lazar hi a dâwt chiam me!" an ti.
- ³⁷Sikhawmsele, zeimaw mi nih chun, "Hi minung, mitchâw mit deitirtu nih hin, hi minung khawm hi a thi lo tir kho lo ma?" an ti.
- ³⁸Chun, Jisu chu a thinlung hen a rûm nawlh le; thlân chu a va tleng rawh. Chu thlân chu pûk asi le, a kawtkâ ah chun lung pakhat hen an sinh.
- ³⁹Jisu nih, "Lung hi ÷hial u," a ti, A thi mi farnu Marthi nih a sinah, "Lalpa tu chun â râwk lai rawh, a thihnâk ni li asi rawh ruangah," a ti.
- ⁴⁰Jisu nih a sinah, "Na lung chun Pathian rokual zia na muh lai, ka nan ti lo mazei?" a ti.

⁴¹Chun, lung chu an thial rawh, Chun, Jisu chu a vân a tâu le, "Pa, ka thu na hawng ka ngâi piak ruangah na tlûnah ka lâwm.

⁴²Ka thu na ka ngâi piak kumza ti ka theih asi; sikhawmsele, mi zapi hêl buk dîr mi tla ruangah chun chu chu ka sim asi, nangnih na ka fial ti an lung khonâk ding hen," a ti.

⁴³Chun, chu hâwi hen a sim thluh kê hen aw-hâu fâk tak hen, "Lazar, hawng suak rawh," a ti le, a âu.

⁴⁴Mithi chu a kût a kê thlân puan tuam bû hen a hawng suak rawh, a mêl chu thlân puan hen tuam asi. Jisu nih an sinah, "Samh ule, kal tir u," a ti.

⁴⁵Churung chun Mari sinah an hawng mi Jisu thilti muhtu Juda tla lakah cherkhet nih amah an zumh rawh.

⁴⁶Sikhawmsele a zeimaw mi chu Farisai tla sinah an va kal le, an sinah Jisu thilti tla chu an simh na.

⁴⁷Chuvachun, bâwlpû lal tla leh Farisai tla nih chun lâirêltu tla an pumh na le, "Zeitun se kan ti lai? Hi minung nih hin thilchê a ti asi.

⁴⁸Hi hâwi hen kan thlahthlamh chun mi zawzawng nih amah an zumh lai le; chun, Rom minung tla an hawng lai le, kan mun thenhlimh leh kan phun tla hi hawng kan suh lai," an ti.

⁴⁹Chun, an lakah minung pakhat Kaiapha, chu kum chun Bâwlpû Lalchem asi le, an sinah, "Nannah nih zeikhawm nan theih lo thlo;

⁵⁰phun pumpi vei lonâk ding hen mipi rûlah mi pakhat thih, nan rangah a tha ti khawm nan ruat lo," a ti.

⁵¹Chu thu chu amah phuak sawm hen a sim lo, chu kum chun Bâwlpû Lalchem asi le, an phun tla ruangrûl ah Jisu thih ding a simkan mi asi dauh asi.

⁵²Chu phun tla ruangrûl cho chu asi lo, Pathian fa laikulh ah anna rek mi tla zawzawng murui khat ah a pumh na ding khawm hen asi.

⁵³Chuvachun, chu ni thawk chun amah thah ding hen anna thluk.

⁵⁴Churuang chun Jisu chu Juda tla lakah â langh lo rawh le, chu thawk hen ramkaro leiah a kal dauh le, Efraim khua ah chun an kal le, chunah chun a thiruai tla hen an um.

⁵⁵Chun, Juda tla Kalkanh Kût chu a nâi rawh le, mi cherkhet a thianh ding hen, ram thawk hen, Kalkanh Kût lânah Jerusalem ah an kal.

⁵⁶Chuvachun, Jisu an hâwl le, Pathian Biakin ah đir bû hen anna sâwn le, "Zeitin nan ruat? Kûtnâk ah a hawng kal lai lo ma?" anna ti.

⁵⁷Bâwlpu lal tla leh Farisai tla nih amah chu an tleih khonâk ding hen âuzawng nih a umnâk an theih chun phuang ding asi ti hen thu an pêk rawh.

Johan 12

¹Chun, Kalkanh Kûtnâk ding ni ruk a um rih, Jisu nih mithi lakah a thawh mi Lazar umnâk Bethani khua kha a hawng tleng.

²Chunah chun amah rangah zân puai an tuah le; Marthi nih eibâr a tuah le, Lazar lam chu a buh dûmpitu pakhat asi.

³Chun Mari nih Litra khat spiknard sariak rimthâw man har tak a hawng put le, Jisu kê tla a chulh le, a sam hen a kê tla chu a nâwt; chun, chu sariak rim hen chun in chu a khat phak.

⁴Sikhawmsele, Juda Iskariot, a thiruai lakah pakhat, a tleihirtu ding mi nih chun,

⁵"Hi sariak rimthâw hi zeirangah denari zathum a zuar hen, mipâm le sinah an pêk lo?" a ti.

⁶Mipâm a sunhsak ruangah chu thu chu a sim asi lo; mifîr asi le, tangka tawbala a kil le, a sungah siah mi chu a lâk tâwn ruangah asi.

⁷Chun, Jisu nih, "Zeitin khawm ti lah u! Phûm hen ka um ding mi ni rangah kil seh.

⁸Mipâm tla chu nan sinah an um kumza mi; kei lam chu nan sinah um kumza ding ka si lo," a ti.



⁹Chun, Jisu chunah chun a um ti Juda mi zapi tamtak tla nih an theih rawh le; chun, an kal le, Jisu ruang cho hawng kal an si lo le, mithi lakah mi thawh mi Lazar khawm kha an muh khonâk ding hen asi.

¹⁰Chun, bâwlpu lal tla chu Lazar khawm thah ding hen anna thluk;

¹¹amah ruangah Juda tla cherkhet nih an kaltâk na le, Jisu an zumh ruangah.

¹²A thâituan ah chun, Kûtnâk ah hawng kal mi, mi zapi tamtak nih, Jisu Jerusalem ah a hawng awt ti an theih.

¹³Tûmkâu tla an put le, amah dawng ding hen an va suak le, "Hosana, Lalpa min hen Israel Lalchem a hawng kal mi chu a thâw a suak," ti hen, an âu.

¹⁴Chun, Jisu nih sanatung fa a muh le, a tlûnah â chuan le,

¹⁵"Tîh lah, Zion fanu! Zauhnik, na Lalchem chu, sanatung fa tlûnah chuan hen, a hawng kal," ti rîn hawi khan.

¹⁶Chubang chu a tîr chun a thîruai tla nih an theih lo le; sikhawmsele, Jisu chawnglawmh hen a um nûnah chun a thâwngthâng lakah chubang thu chu rîn asi ti leh a tlûnah chubang thil chu an hawng ti asi ti an hawng theih rawh.

¹⁷Chun, Lazar thlân ah mi a kawh le, mithi lak mi a thawh liauah a sinah mi zapi an um mi tla nih khan, a thu chu an theihtir vima.

¹⁸Churung chun asi, mi zapi tla khawm nih chun an va dawng mi chu, chu thilchê chu a ti asi ti an theih ruangah.

¹⁹Chuvachun, Farisai tla nih, "Zauhnik u, zeikhawm nan ti kho lo hi; zauhnik u, laikulh nih amah an zûl rawh hi," anna ti.

²⁰Chun, Kûtnâk ah Pathian sawnh ding hen va kal mi tla lakah Greek âu tla mawh an um le;

²¹chun, chubang tla chu Galili ram ah Betsaida khua mi Philip sinah chun an hawng kal le, a sinah, "Pu, Jisu muh kan duh," an ti le, an ngiar.

²²Philip nih chun Andri a simh le; chun, Andri leh Philip nih chun Jisu an simh.

²³Chun, Jisu nih a sâng le, an sinah, "Minung Fapa chawnglawmh hen a um ding tik chu a tlung rawh.

²⁴Thungâi tak hen ka nan simh na, fâng mal tual ah a tlâ hen, a thi lo chun, amah lâwng hen a um kumza tâwn; a thi lam chun tamtak hen a rah tâwn.

²⁵Âuzawng a nungnâk unhtu nih chun a thlâu tâwn; âuzawng hi laikulh ah hin a nungnâk siarlotu nih chun zungzâl nungnâk a kil kumza lai.

²⁶Âuzawng nih ka rian a ÷uan chun hawng ka zûl seh; ka umnâk ah ka to-aw khawm a um lai. Âuzawng nih ka rian a ÷uan chun anih chu Pa nih a chawnglawmh lai.

²⁷"Tuah ka thinlung a lawksawng; zeï ka sim lai? 'Pa, hi tik lakah hin ruang hawng ka suah rawh,' ka ti lai ma? Zeïkhawm si sele, hi tuar ding mi tik tak hi ka hawng san asi.

²⁸Pa, na min chawnglawmh rawh," a ti. Chuvachun, vân thawk hen aw-hâu a hawng suak le, "Ka chawnglawmh rawh, ka chawnglawmh nawlh lai," a ti.

²⁹Chun, mi zapi a kiangah dîr tla nih chun chu chu an theih le, "Khua a ri asi," an ti le, midang tla nih, "Vân mifial nih amah a sawnh asi," an ti.

³⁰Jisu nih a sâng le, "Chu aw-hâu chu ka rangah suak asi lo, nanmah rangah asi dauh.

³¹Tuah hi laikulh hi lâirêl asi; tuah hi laikulh lal hi lawnh asi lai.

³²Chun, kei tual ah mi thlâi hen ka um chun mi zawzawng keimah sinah ka hîp lai," a ti.

³³Chu thu chu a thih zia ding theihtirnâk ding hen a sim asi.

³⁴Chun, mi zapi nih a sinah, "Mesia chu zungzâl hen a um kumza awt ti Dân ah kan theih; nangnih, 'Minung Fapa thlâi hen a um ding asi,' zeitin zia hen ti me na si? Chu Minung Fapa chu âu me asi?" an ti le, an sâng.

³⁵Chun, Jisu nih an sinah, "Chêu hi sâwtlotê nan lakah a um rih. Chêu nan nei kar hin kal u, mûi nih an tanh na lonâk ding hen; âuzawng mûi ah a kal mi nih chun, a kalnâk suankhân a theih lo.

³⁶Chêu nan nei sung hin chêu hi zumh u, chêu fa tla nan si khonâk ding hen," a ti. Chubang thu chu Jisu nih a sim le; chun, a kal le, an muh lo ding hen â thup rawh.

³⁷An mâika ah chu hâwi thilchê cherkhet ti khawmsele amah an zumh lo:

³⁸"Lalpa, kan thusim âu nih me lung? Lalpa thiltikhonâk khawm âu sinah me a lang?" ti, khuavâng Isai thusim kha a tung khonâk ding hen.

³⁹Hi ruangah hin asi an lung kholo, Isai nih,

⁴⁰"Amah nih an mit a chawtir le, an thinlung a changtir le; chu lo chun an mit hen an muh lai le, an thinlung hen an theih lai le, chun, anna her nawlh lai le, kei nih annih chu ka damh na lebang lai," ti a sim nawlh ruang hin.

⁴¹Isai nih a rokualnâk a muh le, a thâwngthâng a sim ruangah chubang thu chu a sim asi.

⁴²Sikhawmsele, lâirêltu tla lakah cherkhet khawm nih Jisu an zumh rawh le; sikhawmsele Farisai tla ruangah anna phuang lo, chu lo chun pumhnâk in ah mi nar hen an um lai:

⁴³Pathian lakah mi sawrnâk ngâk hen chun, minung lakah mi sawrnâk, an duh dauh dangâiah.

⁴⁴Chun, Jisu a âu le, "Âuzawng hawng ka zumhtu chu kei hawng ka zumh asi lo, hawng ka fialtu zumh asi dauh.

⁴⁵Âuzawng hawng ka muhtu chu hawng ka fialtu muh asi.

⁴⁶Chêutirtu ah laikulh ah hawng kal ka si hi, âuzawng hawng ka zumhtu vial chu mûi ah an um kumza lonâk ding hen.

⁴⁷Âuzawng ka thusim theih hen, ngâilo sele; kei nih a lâi ka rêl lo; laikulh lâirêl ding hen hawng kal ka si lo le, laikulh rangsuah ding hen hawng kal ka si dauh.

⁴⁸Âuzawng hawng ka duh lo hen, ka thusim tla lawmhlo nih chun, lâirêltu pakhat a nei asi. Ka thusim kha, kha nih khan, ni dawng ni ah chun amah chu lâi a rêl lai.

⁴⁹Keimah phuak sawm hen ka sim lo; Pa hawng ka fialtu nih ka sim ding leh ka ruat ding hi, thu hawng ka pêk dauh asi.

⁵⁰A thupêk chu zungzâl nungnâk asi ti ka theih. Churuangah chun thu ka sim mi hi Pa nih hawng ka simh hâwi vima hen ka sim asi," a ti.

Johan 13

¹Tuhin Kalkanh Kût lânah mi ni asi. Jisu nih hi laikulh a kaltâk ding mi leh Pa sinah a kal ding tik a rangah a tlung rawh ti a theih. Laikulh ah amah tâ tla chu a dâwt kumza na le, chun a dawnghtiang hen a dâwt na.

²Jisu leh a thiruai tla chu zânriah an dôm. Diabol nih Juda Iskariot Simon fapa chu Jisu tlehtir ding hen a ruat ving rawh.

³Jisu nih chun Pa nih thiltikhonâk rangtling a pêk ti a theih; Pathian sinah thawk hen a hawng kal mi leh Pathian sinah a kal awt ti a theih.

⁴Chun, Jisu chu dawhkân ah mi a thawk le, a nipuan a tlûn mi thuang a lît le, chun thlan nâwtnâk puan a tâi ah a menh.

⁵Chun, mâihûm ah tî a tleng le, a thiruai tla kê a tâwl le, thlan nâwtnâk puan â menh mi hen chun a nâwt vima na.

⁶Chuvachun, Simon Peter sinah a hawng kal, anih nih chun, "Lalpa, nangnih ka kê na tâwl awt ma?" a ti.

⁷Jisu nih a sinah, "Ka thilti hi tuah na theih lo; nûnah na theih lai," a ti le, a sâng.

⁸Peter nih a sinah, "Ka kê na tâwl rîlmâl lai loh," a ti. Jisu nih a sinah, "Ka tâwl lo chun ka sinah zeikhawm tingvo na nei lai loh," a ti.

⁹Simon Peter nih a sinah, "Lalpa, ka kê cho silo hen, ka kut leh lû khawm," a ti.

¹⁰Jisu nih a sinah, "Tak khawlh rawh nih chun a kê lo chu tâwl a ngâi lo, a thiang ver; nannih nan thiang--nan ektê lam chu asi lo," a ti.

¹¹A tlehtirtu ding chu a theih ruangah; churuang chun, "Nan ektê chun nan thiango," a ti asi.



- ¹²Chuvachun, an kê a t̄awl le, a nipuan tla â ruk nawlh le, a to nawlh, chun an sinah, "Nan tlûnah ka thilti hi zeî tinâk me si, nan theih ma?"
- ¹³Nannih nih 'Sîntirtu leh Lalpa' nan ka ti tâwn; nan dik, ka si ngâk.
- ¹⁴Kei Lalpa leh Sîntirtu men nih nan kê ka t̄awl chun, nannih khawm nih nan kê nanna t̄awl piak ding asi.
- ¹⁵Nan tlûnah ka ti hâwi hen nannih khawm nih nan ti bâk ding hen zûnzauh ding ka nan pêk na asi.
- ¹⁶Thungâi tak hen ka nan simh na, to-aw a pu ngâk hen a rokual lo; mifial khawm a fialtu ngâk hen a rokual lo.
- ¹⁷Chubang thil chu nan theih chun, ti u le nan thaw a suak lai!
- ¹⁸"Nan ektê thu ka sim lo; ka thîm mi tla chu ka theih, sikhawmsele chu chu, 'Ka sang eitu nih a hawng ka leido rawh,' ti Pathian lasui thu kha a hawng tlung khonâk ding asi.
- ¹⁹Tu thawk hen a hawng tlung lânah ka nan simh na hi, a hawng tlung tikah kei hi amah kha ka si ti nan lung khonâk ding hen.
- ²⁰Thungâi tak hen ka nan simh na, âuzawng ka fial mi vial lawmhtu chu, keimah a ka lawmh asi; âuzawng kei lawmhtu chu, hawng ka fialtu lawmh asi," a ti.
- ²¹Jisu nih chu hâwi hen a sim thluh rawh chun, a thinlung hen a lawksawng le, "Thungâi tak hen ka nan simh na, nan lakah mi pakhat nih a ka tleihtir lai," ti hen, a theihtir rawh.
- ²²Chun, t̄hiruai tla nih chun a ti mi bîk an theih lo le, anna zauh.
- ²³Chun, a t̄hiruai tla lakah pakhat, Jisu nih a dâwt mi chu, dawhkân sîrah Jisu sang hen a to.
- ²⁴Chun, Simon Peter nih chu sinah chun, "Âu tak me a sim, hawng ka simh," ti hen, a kut a vei.
- ²⁵Chun, anih chu, Jisu t̄ang ngenh hen a va âwn le, a sinah, "Lalpa, âu tak me asi?" a ti.

²⁶Chun, Jisu nih "Sang sêu ka nîm lai le, ka pêk mi chu asi lai," a ti le, a sâng. Chuvachun, sang sêu chu a nîm nûnah a lâk le, Iskariot Simon fapa Juda sinah chun a pêk.

²⁷Chun, sang sêu chu a pêk nûnah chun Setan a sung ah a lût. Chuvachun, Jisu nih a sinah, "Na ti ding chu ti rereh rawh," a ti;

²⁸chun, dawhkân sîrah to mi dang tla âukhawm nih zeï thu me a sinah a sim ti an theih lo.

²⁹Zeimaw mi nih, Juda chu tangka tawbala a kil ruangah, "Jisu nih, 'Kût rangah thil kan herh phung tla va châwk rawh,' a ti mi mawh 'Mipâm tla sinah zeïlo pêk ding, a ti mi mawh,' an ti asi.

³⁰Chun, anih nih chun sang sêu chu a lâk le, a suak sawm le; chu liau chu zân asi.

³¹Chuvachun, a kal nûnah Jisu nih a sim le, "Tuah chun Minung Fapa chawnglawmh hen a um rawh, amah ruangah Pathian khawm chawnglawmh hen a um asi.

³²Pathian nih amah lakah chun anih chu a chawnglawmh lai, a chawnglawmh sawm lai.

³³Nau le tla, sâwtlotê nan sinah ka um rih. Nannah nih nan hawng ka hâwl lai; chun, Juda tla sinah, 'Ka kalnâk dingah nan hawng kal kho lai lo,' ti hen ka sim hâwi khan tuah chu hâwitê hen nan sinah, ka sim hi.

³⁴Thupêk thar ka nan pêk na hi, a dâwt ule; kei nih ka nan dâwt na hâwi hen, nannah khawm a dâwt u.

³⁵Nanna dâwt chun, mi zawzawng nih ka thiruai tla nan si ti chu lak chun an theih na lai," a ti.

³⁶Simon Peter nih a sinah, "Lalpa, a zeïah na kal awt?" a ti. Jisu nih, "Ka kalnâk dingah, tuah na hawng ka zûl kho lai loh; hi nûn lam chun na hawng ka zûl lai," a ti le, a sâng.

³⁷Peter nih a sinah, "Lalpa, zeirangah tu khawmah ka nan zûl kho awt lo zia? Nangmah ruangah ka nungnâk ka pêk lai," a ti.

³⁸Jisu nih, "Keimah ruangah na nungnâk na pêk awt mu? Thungâi tak hen ka nan simh, nangnih veithum na ka pheh lân lo chu âr a khuang lai loh," a ti le, a sâng.

Johan 14

¹"Nan thinlung lawksawng lah seh; Pathian zumh u, kei khawm hawng ka zumh u.

²Ka Pa in ah umnâk tamtak a um le; nan rangah mun siam hen ka kal awt hi. Chu hâwi hen um lah sele, ka nan simh na lai lo mazei?

³Chun, nan rangah mun ka va siam chun, ka hawng nawlh lai le, ka sinah ka nan lâk na lai; ka umnâk ah nannih khawm nan um kho bâk nâk ding hen.

⁴Ka kalnâk ding a lampi nan theih," a ti.

⁵Thom nih a sinah, "Lalpa, na kalnâk ding kan theih lo, a lampi zeitin kan theih lai?" a ti.

⁶Jisu nih a sinah, "Keimah hi lampi leh thutak leh nungnâk ka si; keimah lakah kal lo mi chu âukhawm Pa sinah an tlung lai loh.

⁷Kei hawng ka theih mi si ule, ka Pa khawm nan theih rawh ding mi; tu thawk hen amah nan theih le, amah nan muh rawh," a ti.

⁸Philip nih a sinah, "Lalpa, Pa chu hawng kan zauhtir, chuvachun kan rangah â tâwk lai," a ti.

⁹Jisu nih a sinah, "Philip, hi tiang nan sinah ka um le, chu khawmah na hawng ka theih lo mu? Âuzawng hawng ka muhtu chu Pa muh asi, 'Pa chu hawng ka zauhtir rawh,' zeitin zia hen ti me na si?

¹⁰Kei Pa lakah ka um leh Pa keimah lakah a um ti na lung lo ma? Nan sinah thu ka sim mi hi, keimah phuak sawm hen ka sim lo; Pa keimah lakah a um kumza le, a thil a ti dauh tâwn asi.

11Kei Pa lakah ka um leh Pa keimah lakah a um ti hawng ka lung u; asi lo leh, thilti ruang tal hen hawng ka lung u.

12Thungâi tak hen ka nan simh na, âuzawng hawng ka zumhtu nih chun thil ka ti mi tla hi anih khawm nih a ti bâk lai; hi ngâk a thil rokual khawm a ti lai, Pa sinah ka kal awt ruangah.

13Chun, ka min hen zeizawng nan deih mi vial chu ka ti vima lai, Pa Fapa ruangah chawnglawmh hen a um khonâk ding hen.

14Nannih nih ka min hen zei thil tal nan ka deih chun, chu chu ka ti vima lai.

15"Nannih nih nan ka dâwt chun, ka thupêk tla nan zâwt lai.

16Chun, Pa ka deih lai le, anih nih chun ɽangpitu dang a nan pêk na lai, zungzâl hen nan sinah um ding hen;

17chu chu Thlarau, Pathian thutak phuangtu asi; laikulh nih anih chu an nei kho lo, amah an muh lo hen an theih lo ruangah; nannih nih anih chu nan theih, nan sinah a um kumza ruangah; chun nanmah lakah a um awt asi.

18"Ngâkɽah hen ka nan kaltâk na awt lo le, nan sinah ka hawng kal nawlh lai.

19Sâwtlotê ah laikulh nih a ka muh lai lo rawh; sikhawmsele nannih nih chun nan ka muh lai; keimah ka nung ruangah nannih khawm nan nung bâk lai.

20Chu ni ah chun kei ka Pa lakah ka um mi leh, nannih keimah lakah nan um mi leh, kei nanmah lakah ka um mi nan theih lai.

21"Âuzawng ka thupêk tla theih hen zâwt mi chu hawng ka dâwttu asi; âuzawng hawng ka dâwttu chu ka Pa nih a dâwt lai, kei khawm nih anih chu ka dâwt lai le, a sinah kê langh lai," a ti.

22Chun, Juda (Iskariot lo nih) a sinah, "Lalpa, kannih sinah na langh lai le, laikulh sinah na langh lo ding chu zei zia me?" a ti.

23Jisu nih a sâng le, a sinah, "Mi nih a ka dâwt chun ka thu a zâwt lai le; ka Pa nih anih chu a dâwt lai le; a sinah kan hawng kal lai le, a sinah kan um kumza lai.

²⁴Âuzawng a ka dâwt lo mi nih chun ka thu a zâwt lo; thu nan theih mi hi ka tâ asi lo, Pa hawng ka fialtu tâ asi dauh.

²⁵"Nan sinah ka um sung hin, hi bang thu hi ka nan simh na hi.

²⁶Chun, ãangpitu, Thlarau Thenhlimh Pa nih ka min hen a hawng fial ding mi nih khan chu nih chun zeizawng a nan sîntir na lai le, nan sinah ka sim rawh mi zawzawng an theihtir nawlh na lai.

²⁷"Lungngamnâk ka nan mâk na; keimah lungngamnâk ka nan pêk na; laikulh nih a pêk hâwi hen ka nan pêk na lo hi. Nan thinlung lawksawng lah seh, ãih khawm ãih lah seh.

²⁸'Ka kal awt le, nan sinah ka hawng nawlh lai,' ka nan ti na mi kha nan theih rawh. Nannah nih hawng ka dâwt mi si u le chu, Pa sinah ka kal awt ruangah nanna lâwm ding asi; Pa chu keimah ngâk hen a rokual dauh ruangah.

²⁹Tuah a hawng tlung lânah hin, ka nan simh na rawh hi, a hawng tlung tikah nan lung khonâk ding hen.

³⁰Nan sinah thu tam ka sim awt lo rawh, laikulh lal a hawng kal awt ruangah. Anih chu keimah lakah zeikhawm thu a nei lo.

³¹Sikhawmsele, kei nih Pa ka dâwt leh Pa nih thu hawng ka pêk hâwi vima hen thil ka ti; laikulh nih an theih khonâk ding hen asi hi. "Thawk u, hin a mi hi kan kal lai."

Johan 15

¹"Kei grep zûn tatak ka si, ka Pa chu dûm zauhkhentu asi.

²Keimah lakah mi ãeng rahlo mi vial a lawnh tâwn; a rah mi vial a thenhlimhtir tâwn, a rah tam khunnâk ding hen.

³Nan sinah ka thusim ruang khan tu khawmah nanna thenhlimh chia rawh asi.

⁴Keimah lakah um kumza u, kei khawm nanmah lakah ka um kumza lai. ãeng chu grep zûn ah a um kumza lo chun amah lung hen a rah kho lo hâwi

hen, nannih khawm keimah lakah nan um kumza lo chun, nan rah kho lai loh.

⁵"Kei grep zûn chu ka si, nannih a ãeng tla chu nan si. Âuzawng keimah lakah a um kumza hen, kei khawm amah lakah ka um kumzanâk chu, chu chu tamtak hen a rah tâwn; keimah lo hen zeikhawm nan ti kho lo ruangah.

⁶Mi keimah lakah a um kumza lo chun, ãeng hâwi hen lawnh hen a um le, a uai tâwn; chun, an khawmh le, mei ah an paih le, a kâng tâwn.

⁷Nannih keimah lakah nan um kumza hen, ka thu nanmah lakah a um kumza chun, nan duh mi zawng deih u, nan rangah ti hen a um vima lai.

⁸Hi ruang hin ka Pa chu chawnglawmh hen a um tâwn, tamtak nan rahnâk takah hin; chuvachun ka ãhiruai tla nan si lai.

⁹Pa nih a ka dâwt hâwi ber hen kei khawm nih ka nan dâwt na hi; ka dâwt nâk ah um kumza u.

¹⁰Nannih nih ka thupêk tla nan zâwt chun ka dâwt nâk ah nan um kumza lai; kei nih ka Pa thupêk tla ka zâwt le, a dâwt nâk ah ka um kumza hâwi hen;

¹¹"Ka lâwmnâk nanmah lakah a um kumzanâk ding hen leh nan lâwmnâk a rangtling khonâk ding hen, hi bang thu hi nan sinah ka sim rawh hi.

¹²Hi hi ka thupêk asi: Kei nih ka nan dâwt na hâwi ber hen, nannih khawm a dâwt u.

¹³Minung nih a hâwi ruangrûl ah a nungnâk a pêk nûn lêm ah dâwt nâk fâk dauh âukhawm nih an nei lo.

¹⁴Thu ka nan pêk na mi zawng nan ti chun, ka hâwi tla nan si lai.

¹⁵To-aw ka nan ti na lai lo rawh; a pu thilti to-aw nih a theih lo. Hâwi tla ka nan ti dauh na rawh; Pa sinah thil ka theih mi zawzawng nan sinah ka phuang rawh ruangah.

¹⁶Nannih nih nan hawng ka thîm lo, keimah nih ka nan thîm dauh na, va rah ding leh nan rah um kumza ding hen ka nan ruat na asi; ka min hen Pa sinah nan deih mi zawng a nan pêk na ding hen.

- ¹⁷Nanna dâwt khonâk ding hen hi bang thu hi ka nan pêk na.
- ¹⁸"Laikulh nih a nan hua na chun, an hua na lân khawmah keimah an ka hua ti nan theih.
- ¹⁹Nannih laikulh mi si ule, laikulh nih amah minung a dâwt ding asi; laikulh mi nan si lo le, laikulh ah mi ka nan thîm na ruangah, laikulh nih an hua na asi.
- ²⁰To-aw a pu ngâk hen a rokual lo, ti thu kan simh na rawh kha, theihkumza u. Anmah nih kei an ka nehsawh chun, nannih khawm an nehsawwh na lai; ka thu an zâwt chun, nannih thu khawm an zâwt lai.
- ²¹Sikhawmsele, hi bang thil zawzawng hi ka min ruangah nan tlûnah an ti lai, hawng ka fialtu an theih lo ruangah.
- ²²Kei hawng kal hen an sinah thu sim lo sele, sual an nei lo ding mi; tu lam chu an sual phelhsawlnhâk an nei lo rawh asi.
- ²³Âuzawng kei hawng ka huatu nih chun, ka Pa khawm a hua asi.
- ²⁴Thil âukhawm ti dah lo mi tla an sinah ti lah sele, sual an nei lo ding mi; tu lam chu annih nih kei leh ka Pa hawng kan muh vevê rawh le, hua khawm hawng kan hua rawh asi.
- ²⁵Zeikhawm si sele, an Dân bu ah, Annih nih a san umlo hen an ka hua rawh,' ti thurîn kha a hawng tlung khonâk ding hen an ti asi.
- ²⁶"Chun, Pa sinah mi ẵngpitu nan sinah ka fial ding mi, Pa lakah suak Thlarau Pathian thutak phuangtu chu, a hawng tlung tikah, anih nih chun ka thu a theihtir lai.
- ²⁷Nannih khawm nih nan theihtir bâk lai, a tîr thawk hen ka sinah nan um ruangah.

Johan 16

- ¹"Nan lungnâk nan thlâu lonâk ding hen nan sinah hi bang thu hi ka sim hi.
- ²Pumhnâk in ah mi an nar na lai le; asi, âuzawng an thah natu vial nih Pathian tlûnah thil ẵa ti hen anna ruat lai, chu tik chu a hawng tlung awt.

- ³Chubang thil chu an ti lai, Pa leh kei an hawng kan theih lo ruangah.
- ⁴Hi bang thu hi nan sinah ka sim rawh hi, a tik chu a hawng tlung tikah, kan simh na rawh ti nan theih khonâk ding hen. "Chubang thil chu a tîr thawk hen kan simh na lo, nan sinah ka um rih ruangah.
- ⁵Tu lam chu hawng ka fialtu sinah ka kal awt asi; nan lakah âukhawm nih, 'A zei ah na kal awt?' ti hen nan ka deih lo.
- ⁶Hi bang thu hi ka sim ruangah nan thinlung chu ngaihsiat hen a khat.
- ⁷Sikhawmsele, thudik ka nan simh na; ka kal nan rangah a tha; ka kal lo chun, tangpitu chu nan sinah a hawng kal awt lo; ka kal lam chun nan sinah ka hawng fial lai.
- ⁸Anih chu a hawng tlung chun soal thu ah leh rep thu ah leh lâirêl thu ah laikulh an mawh ti a theihtir lai:
- ⁹soal thu ah an mawh ti a theihtir lai, kei an hawng ka zumhlo ruangah;
- ¹⁰rep thu ah an mawh ti a theihtir lai; Pa sinah ka kal awt le, nannih nih nan ka muh awt lo rawh ruangah;
- ¹¹lâirêl thu ah an mawh ti a theihtir lai, hi laikulh lal hi mawh hen a tlû rawh ruangah.
- ¹²"Nan sinah thu sim ding tamtak ka nei rih, sikhawmsele tu lam chun nan tlinh lai lo rih.
- ¹³Sikhawmsele, Thlarau diktak chu, a hawng tlung tikah, thutak zawzawng ah an rui na lai; amah phuak sawm hen thu a sim awt lo; thu a theih mi vial chu a sim dauh lai; thil hawng tlung ding tla khawm nan sinah a phuang lai.
- ¹⁴Anih nih chun kei hawng ka chawnglawmh lai; ka tâ lakah mi a lâk lai le, nan sinah a phuang awt asi.
- ¹⁵Pa nih thil a nei mi zawzawng ka tâ asi; churuarah, 'Ka tâ lakah mi a lâk lai le, nan sinah a phuang lai, ka ti hi.
- ¹⁶"Sâwtlotê ah nannih nih kei nan hawng ka muh lai lo le, sâwtlotê ah nannih nih kei nan hawng ka muh nawlh lai," a ti.

¹⁷Chun, a thiruai tla zeimaw mi nih, "Kan sinah a thusim hi ze me si, 'sâwtlotê ah nannih nih kei nan hawng ka muh lai lo le, sâwtlotê ah nannih nih kei nan hawng ka muh nawlh lai,' a ti mi leh 'Pa sinah ka kal awt ruangah,' a ti mi hi?" anna ti.

¹⁸Chun, annih nih chun, "Hi hi ze me si, 'Sâwtlotê,' a ti mi hi? A thusim kan theihthiam lo," an ti.

¹⁹Chun, amah deih an duh ti Jisu nih a theih le, an sinah, " 'Sâwtlotê ah nannih nih kei nan hawng ka muh lai lo, sâwtlotê ah nannih nih kei nan hawng ka muh nawlh lai,' ti hen, ka thusim hi nanna deih mu?"

²⁰Thungâi tak hen ka nan simh na, nannih nan mitthli a tlâ lai le, nan tap chiam lai le, laikulh lam chu anna lâwm lai; nannih nan ngaihsia lai le, sikhawmsele nan ngaihsiatnâk chu lâwmnâk ah â chang lai.

²¹Nunau a nganfâk liauah a ngaihsia tâwn, amah tik a tlung rawh ruangah; sikhawmsele, nau a nei rawh chun a lawksawngnâk chu a theih nawlh lo rawh; laikulh ah minung a hawng suak mi chu a lawmh ruangah.

²²Chun, tuah nan lawksawng le, sikhawmsele ka nan muh nawlh na lai, nan thinlung â lâwm lai le, nanna lâwmnâk chu âukhawm nih an lâk piak na lai loh.

²³"Chu ni ah chun nannih nih zeikhawm nan hawng ka deih lai loh. Thungâi tak hen ka nan simh na: Pa sinah zeizawng ka min hen nan deih mi chu a nan pêk na lai.

²⁴Keimah min hen zeikhawm nan deih lo; deih u, chun nan tawng lai; nan lâwmnak a rangtling khonâk ding hen.

²⁵"Chubang thu chu tahthimh thu hen nan sinah ka sim; a tik a tlung awt, chu tik chun nan sinah tahthimh thu hen thu ka sim lai lo rawh le, fiang tak hen Pa thâwngthâng chu ka nan simh dauh na lai.

²⁶Chu ni ah chun keimah min hen nan deih lai; chun: 'Pa sinah kei nih ka nan ngiar piak na lai,' ka nan ti na lo.



²⁷Pa ngelchel nih a nan dâwt na; nannih nih kei nan hawng ka dâwt le, Pa thawk hen suak ka si ti nan hawng ka lung ruangah.

²⁸Kei Pa sin thawk a hawng suak hen, laikulh ah hawng kal ka si; laikulh kaltâk hen, Pa sinah kal nawlh ding ka si," a ti.

²⁹Chun, a thiruai tla nih, "Ngâinik, tu lam chun fiang tak hen thu na sim, a thluamthlâm rerêng hen thu na sim lo rawh hi.

³⁰Nangnih zeizawng na theih le, âukhawm nih an deih a herh lo ti tuah kan theih rawh; hi ruang hin Pathian sinah mi hawng suak na si ti kan lung," an ti.

³¹Chun, Jisu nih a sâng le, an sinah, "Tuah chun nan lung rawh mu?

³²Ngâi u, a tik a tlung awt; asi, a hawng tlung liau asi, chu tik chun mah in chiauah nanna rek ver lai le, keimah lâwng hen nan ka kaltâk lai; sikhawmsele Pa ka sinah a um ruangah mah lâwng hen ka um lo.

³³Hi bang thu hi nan sinah ka sim rawh hi; keimah lak hin nan lungngamnâk ding hen. Laikulh ah hin hamh hen nan um tâwn; sikhawmsele, lungngam tak hen um u, laikulh ka neh rawh," a ti.

Johan 17

¹Chubang thu chu Jisu nih a sim le; vâñ lei zauh hen, "Pa, a tik a tlung rawh. Na Fapa chawnglawmh rawh, Fapa nih a nan chawnglawmhnâk ding hen;

²kha hâwi hen mi zawzawng tlûnah thu nei hen na siam mi nih khan, a sinah na pêk mi vial tla sinah zungzâl nungnâk a pêk khonâk ding hen.

³Hi hi zungzâl nungnâk asi, nang Pathian tak cho leh na fial mi Jisu Krist theih hi.

⁴Nangnih thil ti ding na hawng ka pêk mi kha ka ti dih le, tual ah ka nan chawnglawmh rawh.

⁵Pa, laikulh um lânah na sinah rokualnâk ka nei mi hen khan, tuah nangmah sin ngelchel ah hawng ka chawnglawmh rawh.



⁶Nangnih laikulh lakah suak mi tla keimah na ka pêk mi sinah khan na min ka langhtir rawh; annih chu na tâ an si kha, nangnih annih chu na hawng ka pêk asi; annih nih chun na thu an zâwt rawh.

⁷Nangnih thil na ka pêk mi zawzawng, na sinah thawk hen suak asi ti an theih rawh.

⁸Nangnih thu na ka pêk mi tla kha an sinah ka pêk rawh ruangah; chubang chu an tawng le, na sinah thawk hen suak ka si ti dik tak hen an theih rawh, nangnih na ka fial ti khawm an lung rawh.

⁹An rangah ka ngiar piak mi hi laikulh rangah ngiar piak ka si lo, nangnih na ka pêk mi tla rangah asi dauh, na tâ an si ruangah.

¹⁰Thil zawzawng ka tâ vial chu na tâ asi; na tâ chu ka tâ asi; anmah lakah chawnglawmh hen ka um tâwn.

¹¹Chun, kei lam chu laikulh ah ka um lai lo rawh, hi bang tla lam chu laikulh ah an um, kei na sinah ka hawng awt rawh. Pa Thenhlimh, nangnih kei na ka pêk mi tla hi na min hen hum rawh, pumkhat an si khonâk ding hen, kanmah pumkhat kan si hâwi hen.

¹²An sinah ka um liau khan, nangnih kei na ka pêk mi tla hi na min hen ka hum tâwn; annih chu ka vêng le, an lakah pakhat khawm an vei lo, a tlâu ding mi pa lo kha chu; Pathian lasui thu a hawng tlung khonâk ding hen.

¹³Sikhawmsele, tuah na sinah ka hawng awt rawh; laikulh ah hi bang thu hi ka sim asi, ka lâwmnâk anmah lakah an nei rangtlingnâk ding hen.

¹⁴Na thu an sinah ka pêk rawh le; chun, laikulh nih annih chu an hua le, laikulh ah mi an si lo ruangah, kei laikulh ah mi ka si lo hâwi hen.

¹⁵Nangnih annih chu laikulh ah mi lâk ding hen ngiar ka si lo le, Misual pa lakah na hum ding ka ti dauh asi.

¹⁶Annih chu laikulh ah mi an si lo, kei laikulh ah mi ka si lo hâwi hen.

¹⁷Annih chu thutak hen thenhlimhtir rawh, na thu chu thutak asi.

¹⁸Nangnih laikulh ah na ka fial hâwi khan, kei khawm nih annih chu laikulh ah ka fial na hi.

¹⁹Anmah ruangah na sinah ka pêk, annih khawm nangmah sinah anna pêk bâk khonâk ding hen.

²⁰"Hi bang tla rang cho hin ngiar piak ka si lo, an thu ruangah kei hawng ka zumh ding mi tla rang khawmah ngiar piak ka si.

²¹An ektê hen pumkhat an si khonâk ding hen thla ka cham. Pa, nang keimah lakah na um mi leh kei nangmah lakah ka um hâwi hen, annih khawm kanmah lakah an umnâk ding hen; nangnih kei na ka fial ti laikulh nih an lung khonâk ding hen.

²²Chun, nangmah nih rokualnâk na ka pêk mi kha kei nih an sinah ka pêk rawh; annih, chu pumkhat an sinâk ding hen, kannih pumkhat kan si hâwi hen;

²³kei anmah lakah, nang keimah lakah, annih chu rangtling tak hen pumkhat an si khonâk ding hen; nangnih kei na ka fial ti leh na ka dâwt hâwi hen annih hi na dâwt ti laikulh nih an theih khonâk ding hen.

²⁴"Pa, nangnih na ka pêk mi tla hi ka umnâk ah ka sinah um ding hen ka duh; nangnih na ka pêk mi ka rokualnâk kha an muh khonâk ding hen; laikulh um lânah nangnih na ka dâwt rawh ruangah.

²⁵Pa rep tak, laikulh nih chun an theih lo le, kei lam nih chun ka nan theih; hi bang tla khawm nih hin nangnih kei na ka fial ti an theih rawh.

²⁶Chun, an sinah na min ka theihtir le, ka theihtir vima lai; nangnih kei na ka dâwt nâk kha anmah lakah a um, kei khawm anmah lakah ka um khonâk ding hen," a ti.

Johan 18

¹Jisu nih chubang thu chu a sim thluh rawh chun, a ðhiruai tla hen an suak le, Kidron tiva an kanh. Chunah chun dûm a um, chunah chun an lût le, amah leh a ðhiruai tla hen.



- ²Chun, a tlehtirtu Juda khawm nih chu mun chu a theih; Jisu chu a ̣hiruai tla sinah chunah chun a kal tâwn ruangah.
- ³Chun, Juda nih chun kawrsen rual hen, bâwlpu lal tla leh Farisai tla sinah um mi vêngtu tla hen a kalpi na le;
- ⁴Jisu nih a tlûnah thil tung ding zawzawng chu theih hen, a va suak le; an sinah, "Âu me nan hâwl?" a ti.
- ⁵Annih nih chun a sinah, "Nazaret mi Jisu," an ti le, an sâng. Jisu nih an sinah; "Keimah hi ka si," a ti. Chun, a tlehtirtu Juda khawm chu an lakah a dîr.
- ⁶Chun, "Keimah hi ka si," a ti kê hen, an dung leiah anna nâwp le, tual ah an tlû.
- ⁷Chun, anih nih chun an sinah, "Âu me nan hâwl?" a ti le, a deih nawlh. Chun, annih nih chun, "Nazaret mi Jisu," an ti.
- ⁸Jisu nih, "Keimah hi ka si ti ka nan simh na khateh; nannih nih kei nan ka hâwl asi chun hi bang tla hi kaltir u," a ti le, a sâng.
- ⁹(A thusim, "Pa, nangnih kei na ka pêk mi tla lakah pakhat khawm ka thlâu lo," a ti mi kha a tlungnâk ding hen.)
- ¹⁰Chun, Simon Peter nih nâmsâu a pâi mi a phâwi le, Bâwlpu Lalchem sal a tuk le, a vawrhlei nakhaw a themh phak. Sal min chu Malka asi.
- ¹¹Chun, Jisu nih Peter sinah, "Nâmsâu kha a kâwng ah khumh nawlh rawh; Pa nih hâi hawng ka pêk mi hi ka din lo lai ma?" a ti.
- ¹²Chuvachun, kawrsen murui leh an hotu lalchem hen, Juda tla vêngtu tla nih chun Jisu an tleih le, an phuar le,
- ¹³Ana sinah an kalpi masa le, Kaiapha nupi pa asi ruangah. Kaiapha chu, chu kum chun Bâwlpu Lalchem asi.
- ¹⁴Kaiapha chu, "Phun pumpi ruangrûl ah minung pakhat thih a ̣ha," ti hen, Juda tla thlûkpitu kha asi.

¹⁵Chun, Simon Peter nih Jisu a zûl le, a ðhiruai dang pakhat hen. Chu ðhiruai chu Bâwlpu Lalchem mêltheih asi le, Jisu sinah Bâwlpu Lalchem in kulhsung tualmâi ah a lût bâk le;

¹⁶sikhawmsele Peter chu lêng leiah kawtkari ah a dîr. Chun, ðhiruai dang, Bâwlpu Lalchem mêl theih chu a va suak le, inkhâr vêngtu nungâk a sawnh le, Peter a lûtpi.

¹⁷Chun, inkhâr vêngtu nungâk nih chun Peter sinah, "Nang khawm hi minung ðhiruai tla lakah tel bâk na si mu?" a ti. Anih nih chun, "Ka si lo," a ti.

¹⁸Chun, sal tla leh vêngtu tla chu chunah chun an dîr le, a dâi ruangah meihawl hen mei an tih le, anna aih. Peter khawm an sinah â tel le, dîr bû hen mei â aih bâk.

¹⁹Chun, Bâwlpu Lalchem nih chun Jisu chu a ðhiruai tla thâwngthâng leh a sîntir zia thu a deih.

²⁰Jisu nih a sâng le, a sinah, "Laikulh sinah mi zatlâng theih hen, thu ka sim tâwn kha; pumhnâk in leh Pathian Biakin, Juda zawzawng pumhnâk tla ah chun ka sîntir kumza na tâwn kha. A thup hen zeikhawm ka sim lo.

²¹Zeirangah kei na ka deih? An sinah ka thusim zia ka thu theih tu tla deih; ngâi rawh, chubang nih chun ka thusim chu an theih khateh," a ti.

²²Chu chu a sim kê hen a kiangah a dîr mi vêngtu pakhat nih Jisu a bengh le, "Bâwlpu Lalchem hi hâwi hen na sâng mu?" a ti.

²³Jisu nih a sinah, "Thu sual sim ka si chun, ka sualnâk hawng ka theihtir; sikhawmsele, thu ðha ka sim khawmah zeirangah na hawng ka bengh?" a ti le, a sâng.

²⁴Chun, Ana nih chun phuar bû hen Bâwlpu Lalchem Kaiapha sinah a fial.

²⁵Chun, Simon Peter nih dîr bû hen mei â aih. Chun, "Nang khawm a ðhiruai lakah tel bâk na si mu?" an ti. Peter lam nih chun, "Ka si lo," ti hen â pheh.

²⁶Bâwlpu Lalchem sal tla lakah pakhat Peter nih a nakhaw a themh piak mi rualsia nih chun, "A sinah dûm ah khan ka nan muh lo mazei?" a ti.

- ²⁷Chun, Peter chu â pheh nawlh le; chun âr a khuang sawm rawh.
- ²⁸Chun, Jisu chu Kaiapha in thawk hen Governor in ah an kalpi nawlh le; zînglei asi le; chun, annih lam chu Governor in ah an lût lo, nawmh lo hen, Kalkanh Kût an ei khonâk ding hen.
- ²⁹Chun, Pilat an sinah a va suak le, an sinah, "Hi minung tlûnah hin thupawi zeï me nan nei?" a ti.
- ³⁰Annih nih chun a sinah, "Hi minung hi misual si lah sele na sinah kan hawngpi lai loh," an ti le, an sâng.
- ³¹Chun, Pilat nih an sinah, "Nanmah nih kalpi ule, nan dân hâwi hen a lâi rêl u," a ti. Juda tla nih a sinah, "Kanmah thu hen âukhawm thah khonâk kan nei lo," an ti.
- ³²A thih zia ding thu Jisu nih a sim hâwi hen a tlung khonâk ding hen.
- ³³Chuvachun, Pilat chu a in ah a lût nawlh le, Jisu a kawh le, a sinah, "Juda tla Lalchem na si ma?" a ti.
- ³⁴Jisu nih, "Hi hi nangmah phuak sawm hen ma na sim, midang nih an simh mi ma, ka thâwngthâng hi?" a ti le, a sâng.
- ³⁵Pilat nih, Kei Juda ka si mazei? Nangmah phun tla leh bâwlpu lal tla nih ka sinah a nan hawngpi asi hi; zeï thil me na ti?" a ti le, a sâng.
- ³⁶Jisu nih "Lalchem ka sinâk chu hi laikulh thawk hen mi asi lo. Lalchem ka sinâk chu hi laikulh thawk mi si sele, ka to-aw tla nih an do lai; Juda tla sinah pêk hen ka um lonâk ding hen; sikhawmsele, lalchem ka sinâk chu hinah thawk hen mi hi asi lo," a ti le, a sâng.
- ³⁷Chun, Pilat nih a sinah, "Lalchem na si na maw?" a ti. Jisu nih, "Si ta a, Lalchem ka si. Thutak theihtir hi ka suak san leh laikulh ah ka hawng san asi. Âuzawng thutak lakah mi vial nih ka thu a zâwt tâwn," a ti.
- ³⁸Pilat nih a sinah, "Thutak zeï me si?" a ti. Chun, chu thu chu a sim kê hen, a suak nawlh le, Juda tla sinah a va suak nawlh le, an sinah, "Zeïkhawm a sualnâk ka muh lo.

³⁹Sikhawmsele, Kalkanh Kût ah minung pakhat kan suah piak na ding hen Dân nan nei; chuvachun, Juda tla Lalchem hi an suah piak na sele nan duh ma?" a ti.

⁴⁰Chun, annih chu an âu nawlh le, "Hi minung hi chu si lah seh; Baraba si dauh seh," an ti. (Baraba chu rawkmang asi.)

Johan 19

¹Chun, chu liau chun Pilat nih Jisu a kalpi le, a vuak.

²Chun, kawrsen tla nih chun ling lukhuh an phiar le, an khuhtir le, puan senduk an aihtir le;

³chun, a kiangah an hawng kal le, "Chibai! Juda tla Lalchem!" an ti le, an bengh.

⁴Chun, Pilat chu a suak nawlh le, an sinah, "Zauhnik, zeikhawm a sual ka muh lo ti nan theihnâk ding hen, nan sinah ka hawngpi hi," a ti.

⁵Chun, Jisu chu ling lukhuh leh puan senduk chu aih bû hen a hawng suak. Chun, Pilat nih an sinah, "Zauhnik, Minung hi!" a ti.

⁶Chun, bawlpu lal tla leh vêngtu tla nih chun amah an muh kê hen an âu le, "Kraws ah khenhbêk rawh! Kraws ah khenhbêk rawh!" an ti. Pilat nih an sinah, "Nanmah nih kalpi ule, kraws ah khenhbêk u; kei lam nih chun zeikhawm a sualnâk ka muh lo," a ti.

⁷Juda tla nih chun a sinah, "Kan Dân pakhat a um, chu Dân hâwi vima hen Pathian Fapa ah â siam ruangah a thi ding asi," an ti le, an sâng.

⁸Chun, Pilat nih chu thu chu a theih chun a lâu khun;

⁹a in ah a lût nawlh le, Jisu sinah, "Zei lei mi me na si?" a ti. Sikhawmsele, Jisu nih a sâng lo.

¹⁰Chun, Pilat nih a sinah, "Nangnih kei na ka sâng lo mu? A nan suah kho ka si, kraws ah a nan khenhbêk kho ka si ti na theih lo ma?" a ti.



¹¹Jisu nih, "Tlûnlei thawk hen pêk na si lo chun, ka tlûnah hin tikhonâk rerêng na nei lai lo; churuangah na sinah hawng ka pêktu nih khan soal a phurh khun asi," a ti.

¹²Chu thawk chun Pilat nih suah a tum le; sikhawmsele Juda tla an âu le, "Hi minung hi na suah chun Rom Lalchem hâwipa na si lai loh; âuzawng lalchem ah â siam mi vial chu Rom Lalchem do an si," an ti.

¹³Chun, Pilat nih chubang thu chu a theih kê hen Jisu a suakpi le, a min lungphah, Hebrai hawlh hen Gabatha an ti mi--chu munah chun lâirêlnâk tophah ah a to.

¹⁴Chun, chu ni chu Kalkanh Kût Timhtuah ni asi le, nî sunh liau ding asi. Chun, anih nih chun Juda tla sinah, "Zauhnik u, nan Lalchem hi!" a ti.

¹⁵Chun, annih chu an âu le, "Thah rawh, thah rawh, kraws ah khenhbêk rawh!" an ti. Pilat nih an sinah, "Nan Lalchem hi kraws ah ka khenhbêk lai ma?" a ti. Bâwlpu lal tla nih, "Rom Lalchem lo chu lalchem kan nei lo," an ti le, an sâng.

¹⁶Chuvachun, Pilat nih kraws ah khenhbêk ding hen anih chu an sinah a pêk rawh. Chuvachun, Jisu an kalpi rawh.

¹⁷Chun, anih chu mah rangah kraws put hen, "Luruh mun," an ti mi, Hebrai hawlh hen Golgotha an ti mi chu, chu mun tiang chun a va suak.

¹⁸Chunah chun kraws ah an khenhbêk le, midang panih hen, a sîr leiah pakhat vevê hen, a lâi ah Jisu.

¹⁹Chun, Pilat nih lasui a rîn le, kraws ah a bêt. 'NAZARET MI JISU JUDA TLA LALCHEM,' ti hen rîn asi.

²⁰Chun, chu lasui chu Juda tamtak nih an rêt le; Jisu kraws ah an khenhbêknâk mun chu khuapi kiang asi. Hebrai hawlh, Rom hawlh leh Greek hawlh tla hen rîn asi.

²¹Chuvachun, Juda bâwlpu lal tla nih chun, Pilat sinah, Juda tla Lalchem,' ti hen, rîn lah; Juda tla Lalchem ka si a ti,' ti hen rîn dauh rawh," an ti.

²²Pilat nih, "Ka rîn rawh asi," a ti le, a sâng.

²³Chun, kawrsen tla nih Jisu chu kraws ah an khenhbêk thluh rawh chun a puan tla an lâk le, phel li ah an suah le, kawrsen tla nih phel khat seng anna ting. A kawrdawh khawm an lâk, kawrdawh chu ðitlo mi asi le, a ngâwng thawk hen a pum hen tah ver asi.

²⁴Churuangah annih nih chun, "Kan thlêk lai loh, âu tâ ding si lai kan chamchawh lai," an ti. Pathian lasui thu, "Ka nipuan tla anna ðhen le, ka kawrdawh chu an chamchawh," ti, a tlungnâk ding hen. Chubang thil chu kawrsen tla nih an ti.

²⁵Chun, Jisu kraws kiangah a nu leh a nu naunu, Mari Klopa nupi leh Mari Magdala mi an dîr.

²⁶Chun, Jisu nih a nu leh a ðhiruai a dâwt mi kha a kiangah dîr mi a muh le, a nu sinah, "Nu, zauhnik, na fapa kha," a ti.

²⁷Chun, ðhiruai sinah chun, "Zauhnik na nu kha!" a ti. Chun, chu thawk chun chu ðhiruai nih chun amah in ah anih chu a kalpi rawh.

²⁸Chu nûnah chun, Jisu nih thil zeizawng tuah a rangtling rawh ti a theih le, Pathian lasui thu kha a tlungnâk ding hen, "Ka tâ a hâl," a ti.

²⁹Chunah chun bêl pakhat uain thur hen khat dil an tuah le; chun, sponge (hâng dâwp kho mi) pakhat chu uain thur hen khat zit chiah mi, husop thing fungpâr ah an târ le, a mûr ah an tawng.

³⁰Chun, Jisu nih uain thur chu a tem thluh rawh chun, "Â lîm rawh," a ti. Chun, a lû a kûn le, a nukrî a chat rawh.

³¹Timhtuah ni asi rawh. Churuang chun Juda tla nih Pilat sinah khenh hen um mi kê tla khiak ding hen leh an ruak tla kalpi ding hen an deih. Chu chu Dinhni ah kraws ah an um ko lonâk ding hen asi, Dinhni chu ni rokual tak asi ruangah.

³²Chun, kawrsen tla chu an hawng le, a sinah kraws ah an khenhbêk mi tawngtîr mi leh minung pakhat chu an kê tla an khiak le;

³³sikhawmsele, Jisu kiangah an hawng kal le, a thi ving rawh ti an theih le, a kê tla an khiak lo.

³⁴Sikhawmsele, kawrsen tla lakah minung pakhat nih a nâk ah fei hen a sunh le; chun thisen leh tî a suak sawm rawh.

³⁵(A muhtu nih chun a theihtir rawh, a theihtirnâk a dik asi; a sim dik ti a theih, nannih khawm nih nan lung khonâk ding hen.)

³⁶Pathian lasui thu, "A ruh khiak asi lai loh," ti, tlungnâk ding hen chubang thil chu a hawng um rawh.

³⁷Chun, Pathian lasui thudang nih, "An sunhnâk chu an zauh lai," a ti nawlh.

³⁸Chun, chu nûnah chun, Josef, Arimathai khua mi, (Jisu ðhiruai asi le, sikhawmsele Juda tla a ðih ruangah a thup hen um asi.) anih nih chun Jisu ruak chu kalpi kho ding hen Pilat sinah a deih le, chun Pilat nih a siang. Chuvanchun, a hawng kal le, a ruak chu a kalpi rawh.

³⁹Chun, Nikodem, a tîrah zân ah Jisu sinah hawng kal mi nih khan murrâh leh aloe chawmh chia litra zâ ding put hen a hawng.

⁴⁰Chun, Jisu ruak chu an lâk le, Juda tla phûm dân hâwi hen rimthâw tla hen chun puan mangðhia hen an tuam.

⁴¹Chun, kraws an kenhbêknâk mun ah chun dûm pakhat a um le, dûm ah chun âukhawm vûi dah lonâk thlân thar pakhat a um.

⁴²Chun, Juda tla Timhtuah ni asi ruangah, thlân chu an kiang ko asi le, chunah chun Jisu an vûi rawh.

Johan 20

¹Chun, ni sarîh ni lakah ni masachem ah, zîngtê, a mûi rih liauah, Mari Magdala mi chu thlân ah a va kal le, lung chu thlân ah mi ðhinh hen a muh.

²Chuvachun, a tek le, Simon Peter leh ðhiruai dang Jisu nih a dâwt mi sinah chun a hawng kal le, an sinah, "Thlân ah mi kha Lalpa chu an kalpi rawh, an siahnâk mun kan theih lo," a ti.

³Chuvachun, Peter chu a suak le, ðhiruai dang hen chun thlân lei an fûk.

- ⁴Chun, munkhat hen an tek le; ðhiruai dang nih chun Peter a lanh le, thlân chu a tlung masa.
- ⁵Chun, a kûn le, puan mangthia tla a um mi chu a muh le; sikhawmsele, a sungah a lût lo.
- ⁶Chun, Simon Peter khawm nih a dung leiah a ðhâwl le, a va tlung le, thlân sungah a lût le;
- ⁷puan mangthia tla a um mi leh a lû ah thlan nâwtônâk puan a um mi chu, puan mangthia lakah umlo hen, zual chia hen mun dang ah a um mi a muh.
- ⁸Chuvachun, ðhiruai dang, thlân tlung masa mi khawm chu a lût bâk le, a muh le, a lung.
- ⁹Mithi lakah mi a thawknawlh ding asi ti Pathian lasui thu kha an theih lo rih ruangah.
- ¹⁰Chun, ðhiruai tla chu in ah an kal nawlh rawh.
- ¹¹Sikhawmsele, Mari chu lêng ah thlân kiangah ðap bû hen a dîr le; chun ðap bû hen a kûn le, thlân sung chu a bih le;
- ¹²chun, vânmifial panih puan vâi aih hen, Jisu ruak zâunâk mun ah chun, pakhat a lû leiah, pakhat a kê leiah an to mi a muh.
- ¹³Chun, annih nih chun a sinah, "Nunau, zeirangah na ðap?" an ti. Anih nih chun an sinah, "Ka Lalpa an kalpi le, an siahnâk ram ka theih lo ruangah!" a ti.
- ¹⁴Chun chu hâwi hen a sim kê hen a dung lei â her le, Jisu a dîr mi a muh le, Jisu asi ti a theih lo.
- ¹⁵Jisu nih a sinah, "Nunau, zeirangah na ðap?" Âu me na hâwl?" a ti. Anih nih chun, dûm zauhtu bei a ti le; a sinah, "Pu, amah hinah mi hi na kalpi asi chun, na siahnâk mun hawng ka simh le, chuvachun ka lâk lai," a ti.
- ¹⁶Jisu nih a sinah, "Mari," a ti. Anih chu â her le, a sinah Hebrai hawlh hen, "Rabboni," a ti; chu chu "Sîntirtu" tinâk asi.

- ¹⁷Chun, Jisu nih a sinah, "Hawng ka banh lah; tu tiang khawm hen Pa sinah ka kâi lo rih asi. Sikhawmsele ka unau tla sinah va kal le, an sinah, 'Ka Pa, nan Pa, ka Pathian, nan Pathian sinah ka kal awt,' a ti, va ti rawh," a ti.
- ¹⁸Mari Magdala mi chu a va kal le, ðhiruai tla sinah, "Lalpa chu ka muh rawh," a ti, a sinah thu a sim zia tla khawm chu a simh na.
- ¹⁹Chun, chu ni, ni sarìh ni masachem ah, zânleibâi ah, Juda tla ðih ruangah ðhiruai tla umnâk inkhâr tla chu an khâr nûn chun, Jisu an lakah a hawng ðîr le, an sinah, "Nan tlûnah lungngamnâk um seh," a ti.
- ²⁰Chun, chu chu a sim thluh rawh chun a kut leh a nâk an sinah a zauhtir. Chun, Lalpa chu an muh rawh chun ðhiruai tla chu anna lâwm rawh.
- ²¹Chun, Jisu nih an sinah, "Nan tlûnah lungngamnâk um seh; Pa nih kei hawng ka fial hâwi hen ka nan fial na hi," a ti nawlh.
- ²²Chun, chubang thu chu a sim thluh ah chun an tlûnah a thâw a suah le, an sinah, "Thlarau Thenhlimh nei u.
- ²³Âu sual zawng nan ngaihdam mi vial chu ngaihdam asi lai; âu sual zawng nan ngaihdam lo mi vial chu ngaihdam lo asi lai," a ti.
- ²⁴Chun, Jisu a hawng kal liau khan leinih tla lakah tel bâk, Thom, (phîr an ti mi chu), an sinah a um bâk lo.
- ²⁵Chuvachun, ðhiruai dang tla nih chun, a sinah, "Lalpa chu kan muh rawh," an ti. Sikhawmsele, Thom nih chun an sinah, "A kut ah thîr khenhnâk masî tla ka muh hen leh thîr khenhnâk masî tla ka kutdawng ka purh hen, a nâk ah ka kut hen ka tham lo chun ka lung rîlmâl lai loh," a ti.
- ²⁶Chun, ni riat nûnah, a ðhiruai tla chu in sungah an um nawlh le, Thom khawm an sinah a um bâk. Jisu a hawng kal le, inkhâr tla chu khâr asi le, an lakah a hawng ðîr rawh le, an sinah, "Nan tlûnah lungngamnâk um seh," a ti.
- ²⁷Chun, Thom sinah chun, "Na kutdawng hen hawng tham le, ka kut tla hi zauh rawh; na kut hawng banh le, ka nâk tham rawh; lunglo hen um lah le, lung rawh!" a ti.

- ²⁸Thom nih a sinah, "Ka Lalpa leh ka Pathian na si," a ti le, a sâng.
- ²⁹Jisu nih a sinah, "Nangnih chun na hawng ka muh ruangah na lung asi mu? Muhlo hen hawng ka lungtu zawng chu an thaw a suak," a ti.
- ³⁰Chun, Jisu nih ðhruai tla mâika ah chun singsiahnâk dang cherkhet a ti; chubang chu hi lasuibu ah hin rîn asi lo.
- ³¹Sikhawmsele, hi bang hi, Jisu chu, Mesia, Pathian Fapa asi ti nan lung khonâk ding hen leh nan lung ruangah a min hen nungnâk nan nei khonâk ding hen rîn asi.

Johan 21

- ¹Chu nûnah chun, Tiberia Rilî ah Jisu chu a ðhruai tla sinah â langh nawlh le; hi hâwi hen â langh.
- ²Simon Peter, Thom, (phîr an ti mi), Galili ram ah Kana mi Nathanael, Zebedai fa tla leh a ðhruai panih tla hen anna pûm.
- ³Simon Peter nih chun an sinah, "Ngâ tleih hen ka kal awt," a ti. Annih nih chun a sinah, "Kannah khawm na sinah kan hawng bâk lai," an ti. Chun, an suak le, lawng ah anna chuan le; chu zân chun zeikhawm an tleih lo.
- ⁴Chun khuafîm chat ah Jisu chu seppho ah a dîr le; sikhawmsele ðhruai tla nih chun Jisu asi ti an theih lo.
- ⁵Chun, Jisu nih an sinah, "Nau le tla, ngâ nan tawng ma?" a ti. Annih nih chun a sinah, "Kan tawng lo," an ti le, an sâng.
- ⁶Chun, anih nih chun an sinah, "Lawng sîr vawrhlei kâng khan lên vawrh ule, nan tawng lai," a ti. Chun, an vawrh le ngâ a tam ruangah an nûk kho lo.
- ⁷Chuvachun, ðhruai, Jisu nih a dâwt mi nih khan, Peter sinah, "Lalpa asi," a ti. Chuvachun, Lalpa asi ti Simon Peter nih a theih kê hen, a kawrdawh â menh le, takkaro hen um asi ruangah, rilî ah â khâwk rawh.
- ⁸Sikhawmsele, ðhruai dang tla nih chun lawng fatê hen, lên lakah ngâ khat phak nûk bû hen an hawng fûk le, tâng thawk hen a lâh loh, dâwng zanih ding mawh cho asi.

⁹Chun, tlâng an tleng hen, chunah chun meihawl hen mei tih mi an muh le, a tlûnah ngâ em mi leh sang tlang an muh.

¹⁰Jisu nih an sinah, "Tuah nan ngâ tleih kha a zeimaw mi hawng put u," a ti.

¹¹Chun, Simon Peter chu a va a chuan le, lèn chu ngâ lian pipi khat hen vakap leiah a nûk le, zâ leh sâwmnga leh pathum asi; chu tluk rak sikhawmsele lèn chu a tlêk lêm lo.

¹²Jisu nih an sinah, "Zîngbuh ei u," a ti. Chun, ðhruai tla lakah âukhawm nih a sinah, "Âu me na si?" ti hen an deih ngam lo, Lalpa asi ti an theih.

¹³Chun, Jisu a hawng kal le, sang tlang chu a lâk le, an sinah a pêk na le, ngâ khawm chu hâwi a pêk na.

¹⁴Chu chu Jisu mithi lakah mi a thawknawlh nûnah, a ðhruai tla sinah â langh veithumnâk asi.

¹⁵Chun, zîngbuh an ei thluh ah, Jisu nih Simon Peter sinah chun, "Simon, Johan fapa, hi bang tla ngâk hen nangnih kei na ka dâwt dauh ma?" a ti. Anih nih chun a sinah, "I, Lalpa, ka nan dâwt ti na theih," a ti. Jisu nih chun a sinah, "Ka dawrâ fa tla zauhkhenh rawh," a ti.

¹⁶A veinihnâk ah, a sinah, "Simon, Johan fapa, nangnih kei na ka dâwt ma?" a ti nawlh. Anih nih chun a sinah, "I, Lalpa, ka nan dâwt ti na theih," a ti nawlh. Jisu nih chun a sinah, "Ka dawrâ tla zauhkhenh rawh," a ti.

¹⁷Chun, a veithumnâk ah chun a sinah, "Simon, Johan fapa, nangnih kei na ka dâwt ma?" a ti. A veithumnâk ah, "Nangnih na ka dâwt ma?" a sinah a ti ruangah chun Peter a lawksawng le, a sinah, "Lalpa, zeizawng na theih le, ka nan dâwt ti na theih," a ti. Jisu nih a sinah, "Ka dawrâ tla zauhkhenh rawh.

¹⁸Thungâi tak hen ka nan simh, na ngâksia liau khan na tâi na sâwm le, na duhnâk zawngah na kal tâwn; sikhawmsele, na upa tikah na kut na phar lai le, midang nih an sâwm piak lai le, na duhlonâk leiah an kalpi lai," a ti.

¹⁹(Chubang thu chu zeî hâwi a thihnâk hen me Peter nih Pathian a chawnglawmh lai ti theihtirnâk ding hen a sim asi.) Chun, chu chu a sim thluh rawh chun, Jisu nih a sinah, "Hawng ka zûl," a ti.

²⁰Chun, Peter chu â hawi le, Jisu nih thiruai a dâwt mi, zânriah ei liauah a tâng ngenh hen a um le, "An tlehtirtu ding chu âu me si?" titu nih khan, a hawng zûl mi a muh.

²¹Chun, Peter nih anih chu a muh le, Jisu sinah, "Lalpa, hi minung nih hin zeî me a ti lai?" a ti.

²²Jisu nih a sinah, "Ka hawng kal nawlh tiang um kumza ding hen duh châng sele, na rang zeî me si? Nangmah nih hawng ka zûl ko," a ti.

²³Chuvachun, chu thiruai chu thi lo ding hen a thu chu unau tla lakah a thang rawh; sikhawmsele, Jisu nih a thi lai loh ti a sinah a sim lo. "Ka hawng kal nawlh tiang hen um kumza ding hen duh châng sele, na rangah zeî me si?" a ti mi cho asi.

²⁴Chu thiruai chu hi bang thu theihtirtu leh rîntu hi asi; a theihtirnâk hi dik tak asi ti kan theih.

²⁵Chun, Jisu thilti a dang cherkhet khawm a um, chubang chu pakhat khat hen rîn awt ver sele, lasuibu rîn ding zawzawng chu laikulh khawmah tlum ding hen ka ruat lo.

Thilti

Thilti 1

- ¹Theophil duhtak: Ka lasuibu masachem lakah khan Jisu thilti leh sîntirnâk a dawmhtirnâk zawzawng thu kha ka rîn asi.
- ²Thlarau Thenhlimh hen a mifial tla sinah thu a pêk thluh nûnah vân ah kêi hen a um ni tiang thu kha.
- ³Chu mifial tla sinah chun hamhnâk chu a tuar nûnah theihtirnâk tamtak leh nung hen â zauhtir le, ni sâwmli tiang an sinah â langh le, Pathian Ram thu a sim tâwn.
- ⁴Chun, anna pûm mi tla a kawmh na, "Jerusalem kaltâk lah u, Pa thutiam ka sim mi nan theih mi kha hawng ngâk u," a ti thlir.
- ⁵"Johan nih khan tî hen a baptis tâwn le, sikhawmsele ni sâwtlotê ah Thlarau Thenhlimh hen baptis nan si lai," a ti.
- ⁶Chun, mifial tla chu Jisu hen anna pûm rawh chun a sinah, "Lalpa, tuah masi Israel tla sinah ram na pêk nawlh awt?" an ti le, an deih.
- ⁷Chun, Jisu nih chun an sinah, "Pa nih a tik leh a ni amah thu thu a um hen a ruat mi chu nannih theih ding asi lo.
- ⁸Sikhawmsele, Thlarau Thenhlimh chu nan tlûnah a hawng tung tikah thiltikhonâk nan nei lai. Chun, Jerusalem ah, Juda leh Samari ram kua kipah leh kâwlkil tiang khawm hen ka thu theihpitu tla nan si lai," a ti.
- ⁹Chun, chubang thu chu a sim thluh nûnah an muh ko bû hen vân ah kêi hen a um; chun sîm nih an muh phâk lo ah a phenh rawh.
- ¹⁰Chun, a kêi liauah vân lei an zauh ko liauah, mi panih puan ngo aih hen an kiangah an hawng dîr.
- ¹¹Annih nih chun, "Galili ram mi tla, zeirangah vân lei zauh hen nan dîr ko? Hi Jisu nan sin thawk hen vân ah kêi hen a um mi hi vân ah a kêi mi nan muh hâwi ber hen amah ngelchel hi a hawng kal nawlh lai," an ti.

- ¹²Chun, Oliv Tlâng an ti mi thawk hen chun Jerusalem ah an kîr nawlh le; chu tlâng chu Jerusalem kiang asi, Dinhni ah kal tâwk cho asi.
- ¹³Chun, an lût hen an umnâk kardang tlûn dauh ah chun an kâi le: Peter, Johan, Jem leh Andri hen, Philip leh Thom hen, Bartholomai leh Mathai hen, Alphaï fapa Jem leh Simon Zelot murui a mi leh Jem fapa Juda hen an si.
- ¹⁴Chubang tla zawzawng chu nunau âu tla mawh leh Jisu nu Mari hen, Jisu unau tla hen, thinlung munkhat hen thla an cham.
- ¹⁵Chun, chubang ni tla ah chun unau tla lakah Peter chu a dîr le, an ektê hen zâ leh kul ding an si.
- ¹⁶"Unau le tla, Thlarau Thenhlimh nih, David kê ah, Jisu tleih tu tla ruitu Juda thu a simhkan mi kha, kha Pathian lasui thu kha a hawng tung ding rêng asi.
- ¹⁷Juda chu kan lakah rêlsih asi le, hi bang rianṭuan lakah hin tingvo khawm a nei bâk.
- ¹⁸(Chun, chu minung nih chun a sual man hen mun pakhat a châwk le, a bingbilet hen a tlâ le, a lâi ah a kek phut le, a ril zawzawng a suak ver.
- ¹⁹Chun, chubang thu chu Jerusalem ah um mi tla zawzawng nih an hawng theih le; chun chu mun chu anmah hawlh hen, "Akeldama," an ti, chu chu "Thisen Mun," tinâk asi.)
- ²⁰"Sawrnâk labu ah hi thu hi rîn asi: 'A umnâk a karo hen um seh, chun a sungah âukhawm um lah seh,' ti leh, 'A hotu sinâk midang nih ting seh,' ti hi.
- ²¹"Chun, Lal Jisu kan lakah lût leh suak tâwn hen a um kar zawng, Johan baptisma thawk hen kan sinah mi vâh ah kâi hen a um ni tiang khan hi bang hawng kan kawmh tâwntu tla lakah hin minung pakhat a thawknawlnhâk hawng kan theihpitu rangah a um ding asi," a ti.
- ²³Chun, mi panih an thîm le, Josef Barsaba an ti mi, (a min tak chu Justa an ti), chun pakhat chu Mathia asi.
- ²⁴Chun, thla an cham le, "Nang Lalpa, minung zawzawng thinlung theih tu,

²⁵Juda nih chun amah umnâk ah kal ding hen hi bang rianṭuan leh mifial rian a bângtâk mi hi a ruangrûl ding hen hi minung panih hi âu dauh me na thîm hawng kan theihtir," an ti.

²⁶Chun, an chamchawh mi chu Mathia tlûnah a tlû. Chun, anih chu mifial leikhat tla lakah chun rêlsih asi rawh.

Thilti 2

¹Chun, Pentekost ni a hawng tlung. An ektê hen mun khat ah anna pûm ver.

²Chun, lâkkhatko ah vâh thawk hen rihâu thlipi râng hâwi hen a hawng tleng khup; chu nih chun an tonâk in chu a hawng khattir ver.

³Chun, lei tla, amah leh amah a ṭhen hen mei hâwi hen an sinah a hawng a langh rawh.

⁴Chun, an ektê hen Thlarau Thenhlimh hen an hawng khat ver le, Thlarau nih a hawlhtir hâwi vima hen hawlh dang hen an hawng hawlh rawh.

⁵Chun, laikulh ah phun kip lakah thawk hen Pathian sunhsak mi Juda tla Jerusalem ah an um.

⁶Chun, chu rihâu chu an theih kê hen mi zapi an hawng a pûm le, mikip nih mifial tla hawlh chu anmah hawlh hâwi hen an hawng theih ruangah an thinlung a nawk.

⁷Chun, an ektê hen an lawksawng le, thungâi chê an ti, "Hi bang an hawlh mi tla zawzawng hi Galili ram ah mi an si lo mazei?"

⁸Zeitin zia, kan ektê hen kan suakpi mi hawlh hâwi hen kan theih chiau?

⁹A zeimaw mi chu Parthian phun tla, Media phun tla, Elamitai phun tla kan si le; zeimaw mi chu Mesopotamia ram ah um mi le, Juda ram ah um mi tla, Kapadokia ram ah um mi tla, Ponto leh Asia ram ah um mi tla,

¹⁰Phrugia leh Pamphulia ram ah um mi tla, Aigupta leh Kurini khua kiangkam Libia ram ah um mi tla, zeimaw mi Rom khua Khual Judai leh phun lût tla hen kan si le;

- ¹¹zeimaw mi Kret tikulh mi leh Arabia ram mi le kan si; Pathian thil rokual tla an sim mi kha mah hawlh hâwi chiau kan theih hi!" an ti.'
- ¹²Chun, an ektê hen thungâi chê an ti le, a ngaihtawnh dân an theih lo, "Hi bang hi ze zia mesi?" anna ti.
- ¹³Zeimaw mi nih an nihsanh na le, "Uain thar an rî asi hi," an ti.
- ¹⁴Sikhawmsele, Peter chu leikhat tla hen an dîr dut le, anih nih chun hâu fâk tak hen an sinah a sim: "Nannah Judai ram ah mi tla, nannah Jerusalem ah um mi zawzawng tla, hi bang hi theih u, ka thu khawm ngâi u.
- ¹⁵Hi bang tla hi nan ruat hâwi hen an rî lo, zînglei dâr kua cho asi rih hi;
- ¹⁶hi bang hi khuavâng Joel nih a sim mi kha asi:
- ¹⁷Pathian nih ni madung tla ah chun, mi zawzawng tlûnah ka Thlarau ka tawih lai le, nan fapa tla leh nan fanu tla nih ka thu an sim lai, nan tlangvâl tla nih muhtirnâk an muh lai, chun tar tla nih mang tla an manh lai.
- ¹⁸Asi, chubang ni tla ah chun ka to-awpa tla, ka to-awnu tla tlûnah khawm ka Thlarau ka tawih lai, chun ka thu an sim lai.
- ¹⁹Chun, tlûnlei vân ah thilchê tla, leh tanglei tual ah singsiahnâk tla ka muhtir lai. Thisen, mei leh meikhû tla hen;
- ²⁰nî thim ah â chang lai le, chun thlâ thisen ah â chang lai. Lalpa Ni rokual tak leh minthang tak chu a hawng tleng lânah chun,
- ²¹âuzawng Lalpa min lam mi vial chu an him lai, a ti,' a ti mi kha.
- ²²"Nannah Israel mi le tla, hi bang thu hi theih u rawh: Nazaret Jisu, Pathian nih amah mang hen nan lakah thil rokual tla, thilchê tla, leh singsiahnâk tla a ti mi nih khan a nan theihfiangtir na kha; nannah nih chubang chu nan theih asi.
- ²³Kha minung kha Pathian ruat chia leh theihkan hâwi hen an tleihtir le, nannah nih misual kut ah kraws ah nan kenh le, nan thah rawh.
- ²⁴Kha minung kha Pathian nih thihnâk phuar tla chu a sût piak le, a thawh rawh; amah chu thihnâk nih tleih pawt kho asi lo ruangah.

²⁵Chun, David nih a thu a sim le: 'Ka mâika ah zungzâl hen Lalpa chu ka muh tâwn, ka lawksawng lonâk ding hen ka vawrhlei ah a um asi.

²⁶Churuangah ka thinlung a lâwptlo le, ka lei khawm â lâwm. Churuangah ka taksa khawm lungumnâk ah a um lai.

²⁷Ka thlarau mithi khua ah na mâk lo ruangah na mi thenhlimh thût na siang lai loh.

²⁸Nangnih nungnâk lampi tla hawng ka theihtir le, nangnih na mêl hen lâwmnâk hen hawng ka khattir lai,' ti hen.

²⁹"Unau le tla, thlâktu David thu hi òh lo hen nan sinah ka sim kho. Anih chu a thi le, vûi khawm an vûi rawh, a thlân khawm tutiang hen kan sinah a um kumza.

³⁰Anih chu khuavâng asi le, Pathian nih David thlâk tla âumawh a tophah tlûnah a totir awt ti siatsirh hen a sim ti a theih le;

³¹chun, chubang chu a theihkan ruangah Mesia thawknawlnhâk thu a sim asi, 'Mithi khua ah mâk hen a um lo le, a ruak khawm a thu loh; ti hen.

³²Jisu chu Pathian nih a thawh nawlh asi, chu chu a theih tu kan ektê hen kan si ver asi.

³³Pathian vawrhlei ah chawnglawmh hen a um le, Thlarau Thenhlimh tiamh mi chu Pa sinah thawk hen a tawng le, nan muh leh nan theih mi hi a hawng tawih asi hi.

³⁴David lam chu vân ah a kâi lo asi, amah ngelchel nih: 'Lalpa nih ka Lalpa sinah: Ka vawrhlei ah to rawh,

³⁵na mêlma tla na kê sirhsanh ah ka siam lânlo chu, a ti,' a ti dauh asi kha.

³⁶"Chun, Jisu nan khenhbêk mi ngelchel kha Pathian nih Lal leh Mesia si hen a siam rawh ti Israel phun kip nih theih chiauh seh," a ti.

³⁷Chun, chubang thu chu an theih hen an thinlung ah sunh hâwi hen an hawng si rawh le, Peter leh mifial dang tla sinah chun, "Unau tla zeitin me kan ti lai?" an ti.

³⁸Chun, Peter nih chun an sinah, "Rim ule, nan sual tla ngaihdamnâk ding hen Jisu Krist min hen baptis hen um chiau u, chun Thlarau Thenhlimh pêk mi hi nan tawng lai.

³⁹A tiamh mi kha nannih rangah khawm, nan fa tla rangah khawm, lâk tak ah mi zawzawng rangah khawm, Lalpa kan Pathian nih a sinah a kawh mi vial tla rangah khawm asi," a ti.

⁴⁰Chun, thu dang cherkhet hen a simhfiang le, "Hi bang misual tla sinah rêpnâk tlung ding mi lakah a vêng u," ti hen a fawrh na.

⁴¹Chun, a thu zâwttu vial baptis an si rawh le, chu ni ah chun mi sâng thum sap hen an um.

⁴²Chun, mifial tla sîntir hen, kawmhnâk hen, munkhat bukhêng dûm hen leh thlacham hen thanemngâi tak hen an um vima.

⁴³Chun, mikip nih an tîh rawh le, mifial tla nih chun thilchê leh singsiahnâk cherkhet an ti.

⁴⁴Chun, a lung mi zawng nih chun zeizawng anna bâwm chiau,

⁴⁵an ro tla, an neih tla an zuar le, an herh tâwk chiau hen an ektê sinah chun an then tâwn.

⁴⁶Chun, nisiai thinslung munkhat hen Pathian Biakin ah chun thanem ngâi tak hen an um tâwn le, an in lei tla khawmah sang an phel le, lâwptlo leh lungâwi tak hen buh an ei tâwn le,

⁴⁷Pathian an sawr le, mi zawzawng lawmhkâng hen an um tâwn. Chun, ruang a suah mi tla chu Lalpa nih nisiai an sinah a sap vima tâwn.

Thilti 3

¹Chun, Peter leh Johan chu sînnilei dâr thum ah thlacham hun liau chun Pathian Biakin ah lût ding hen an kal.

²Chun, patling âumawh a suak tîr thawk hen kekhêng an hawng zawnh le, chu minung chu Pathian Biakin ah an lût mi tla sinah kut dawnh ding hen "Kawtkhâr Dawh," an ti mi bul ah chun nisiai an ittir tâwn asi.

³Chu minung nih chun Peter leh Johan chu Pathian Biakin ah an lût mi a muh na le, kut a dawnh.

⁴Chun, anih chu an zauh le, chun Peter nih, "Hawng kan zauh rawh," a ti.

⁵Chun, anih nih chun an lakah zeimawh tawng dîng a lungum le, a zauh na.

⁶Sikhawmsele, Peter nih, "Tangka leh ngûn zeikhawm ka nei lo, ka neihlem ka nan pêk lai; Nazaret Jisu Krist min hen kê hen kal rawh," a ti.

⁷Chun, a kut vawrhlei a tleih le, a thawh le; chun lâkkhatko ah a kê tla leh a kemit ruh tla chu a hawng chak sawm rawh.

⁸Chun, anih chu a per le, a dîr le, kê hen kal a dawmh rawh. Chun, kê hen kal leh per leh Pathian sawr bû vima hen Pathian Biakin ah a lût bâk rawh.

⁹Chun, kê hen kal leh Pathian a sawr mi chu mi zawzawng nih an muh,

¹⁰chun Pathian Biakin Kawtkhâr Dawh bul ah kut dawnh hen to tâwn mi kha asi ti an theih le; a lakah thil a hawng tlung mi chu thungâi chê an ti le, anna nawk.

¹¹Chun, anih nih chun Peter leh Johan chu a tleih na ko liauah mi zawzawng, nih thungâi chê an ti, Solomon Sârbûk an ti mi lakah chun an sinah an hawng a pûm.

¹²Chun, Peter nih mi zapi tla a muh na rawh chun an sinah, "Nannah Israel mi le tla, hi bang hi zeirangah chê nan ti? Kanmah thiltikhonâk leh Pathian sunhsaknâk ruangah anih hi kan kaltir mi hâwi ngâi chun zeirangah nan hawng kan zauh?"

¹³Abraham, Isak, Jakob tla Pathian, hawng kan thlâktu tla Pathian nih chun a To-aw Jisu a chawnglawmh rawh asi. Anih chu nan tlehtir le, Pilat nih suah a tum khawmah a mâika ah nan duh lo kha.

¹⁴Mi Thenhlimh leh Rep tak kha nan duh lo le, mi thahtu kha nan sinah pêk nan ngiar dauh.

¹⁵Chun, Nungnâk Siamtu chu nan thah asi. Sikhawmsele, Pathian nih anih chu mithi lakah mi a thawh nawlh--chu chu a thehtu tla kan si.

¹⁶Chun, amah min lung ruangah a min hen chun hi minung nan muh leh nan theih mi hi a chaktir rawh asi; chun amah ruangah lungnâk a hawng um mi nih chun nan ektê mitmuh ah a damtir ver asi.

¹⁷"Sikhawmsele, unau le tla, nan hotu tla khawm nih an âtnâk ruangah an ti tâwn hâwi khan nan ât ruangah hi bang hi nan ti asi ti ka theih.

¹⁸Sikhawmsele, Pathian nih khuavâng zawzawng kê ah a Mesia nih hamhnâk a tuar ding mi thu a theihtirkan mi kha, kha hâwi khan a tungtir rawh asi.

¹⁹Churuarangah nan sual tla tlâtir asi khonâk ding hen rim ule, a her nawlh u.

²⁰Chun, Lalpa thawk hen thlarau chaknâk a hawng tung kho lai, chun Jisu, Mesia nan rangah ruat mi khawm kha a hawng fial kho lai.

²¹Sikhawmsele, zeizawng siamthar tik a tung lânlo chu vân nih anih chu a kil rih ding asi; chu siamthar ding thu chu Pathian nih laikulh a siam tîr thawk hen a khuavâng thenhlimh tla kê hen a sim rawh kha.

²²Mosi ngelchel nih, 'Lalpa nan Pathian nih keimah a hawng ka fial hâwi hen nan unau tla lakah khuavâng pakhat a nan fial piak na lai. Anih nih chun thu zawzâwng nan sinah a sim mi vial chu nan ngâi piak lai.

²³Chun, mi âuzawng chu khuavâng thu ngâi piak lotu vial Israel tla lakah mi tlâtir ving asi lai, a ti kha.

²⁴Samuel thawk hen khuavâng zawzawng, an dunglei mi tla hen thu an sim mi vial nih khan tûliau thâwngthâng hi an simkan tâwn;

²⁵Nannah hi khuavâng tla leh thutiam fa tla nan si asi; Pathian nih Abraham sinah, Nangmah ruangah laikulh phun kip an thaw a suak lai, ti hen, nan thlâktu tla sinah a tiamh kha.

²⁶Pathian nih a to-aw chu a ruat le, nan sual tla hertâk tir chiau ding hen mal a nan sâwm na ding hen nanmah sinah a hawng fial masachem asi hi," a ti.

Thilti 4

¹Chun, Peter leh Johan nih mi tla sinah thu an sim liauah bâwlpu lal tla, Pathian Biakin hotu tla leh Sadukai tla chu an sinah an hawng tleng khup le,



²an sîntir na mi leh Jisu ruangah mithi lakah thawk hen thawknawlnhâk thu an sim ruangah thungâi an lungsilo.

³Chun, an tleih na le, zânlei asi ruangah a thâizîng tiang hen rêngin ah an khumh na.

⁴Sikhawmsele, thu ngâitu tla lakah cherkhet nih an lung le; an tam lei chu patling vial khawm sângnga an tling.

⁵Chun, a thâituan ah chun an hotu tla, upa tla leh Dân sîntirtu tla chu Bâwlpu Lalchem Ana, Kaiapha, Johan, Alekzandar leh Bâwlpu Lalchem chi zawzawng tla Jerusalem ah anna pûm.

⁷Chun, Peter leh Johan chu a lâi ah an dîrtir na le, "Zei thiltikhonâk hen me, asi lo leh, âu min hen me hi bang hi nan ti?" an ti le, an deih na.

⁸Chun, Peter chu Thlarau Thenhlimh hen a khat le, an sinah, "Mi zawzawng hotu tla, upa tla:

⁹Mi khêng sinah rian ða kan ti mi thu ah, 'Hi minung hi zeirangah me a hawng dam?' ti hen, tusûn ah hin nan hawng kan salh chun,

¹⁰nannih zawzawng nih theih u rawh, chun, Israel mi zawzawng khawm nih theih na seh, Nazaret Jisu Krist, kraws ah nan kenhbêk mi Pathian nih mithi lakah thawk hen thawh nawlh mi kha, amah min ngelchel hen hi minung hi hinah nan mâika ah dam hen a hawng dîr rawh asi hi.

¹¹'Nannih in saktu le tla, Nan duhlo mi lung kha a ki ah lung ðangkâi chem a hawng si mi kha, amah hi asi.'

¹²Midang âu sin khawmah ruangsuaqnâk a um lo; laikulh ah minung min sak lakah ruang hawng kan suah khotu ding min dang rerêng an um lo," a ti.

¹³Chun, Peter leh Johan râlðhat zia an muh hen lasui thiamlo mi leh mi narân an si ti an theih hen thungâi chê an ti. Jisu sinah an um ti an theih rawh.

¹⁴Chun, an damtir mi chu an sinah dîr mi an muh le, zeikhawm an simsâwi kho lo.

¹⁵Chun, an lâirêlnâk thawk hen a dang hen an kaltir na nûnah anna thluk le,

¹⁶Hi minung tla hi zeî hâwi hen kan ti lai? Thilchê thang tak an ti, ti Jerusalem ah um mi zawzawng nih fiang tak hen an theih rawh hi, Kannih khawm nih kan pheh kho lêm lo.

¹⁷Sikhawmsele mi sinah an phuang dadauh lonâk ding hen tu thawk hen âu sin khawmah hi min hen thu an sim lonâk ding hen kan ðih na lai," an ti.

¹⁸Chun, annih chu an kawh na le, Jisu min hen thu simlo thlo ding hen leh sîntir lo thlo ding hen an ti thlir na.

¹⁹Sikhawmsele, Peter leh Johan nih an sinah, "Pathian mitmuh hen Pathian thu zûl ngâk hen nannah thu zûl a dik dauh lai menmaw, dawn set nik u.

²⁰Kannah lam chu thil kan muh mi leh kan theih mi tla hi simlo hen kan um kho lo," an ti.

²¹Chun, annih nih chun an ðih nawlh khun na le, an suah na rawh le, mi zapi ruangah rênâk remkâng an tawng lo; an thilti ruang khan mi zawzawng nih Pathian an chawnglawmh fâwn.

²²Thilchê hen an damtir mi pa chu kum sâwmli ngâk a tam dauh asi.

²³Chun, Peter leh Johan chu an suah na le, anmah murui tla sinah an va kal le, bawlpu lal tla leh upa tla nih an sinah an sim mi vial chu an simh ver na.

²⁴Chun, a ngâitu tla nih chun thu anna rual le, hâu fâk tak hen Pathian sinah, "Lalpa, nang vên leh tual leh tisumsumriat leh a sungah um tla zawzawng siamtu na si;

²⁵nangnih Thlarau Thenhlimh hen kan thlâktu na to-aw David kê hen hi bang thu hi na sim asi: 'Phundang tla zeirangah me an thinthawk, phun kip nih zeirangah thil salam an dawnruat?

²⁶Laikulh lalchem tla nih an do; chun hotu tla khawm anna pûm le, Lalpa leh a Mesia tûnah chun, ti hen.

²⁷Hi khua ah hin na to-aw thenhlimh, na sariak thuh Jisu tûnah khan Herod leh Pontia Pilat hen, Phundang leh Israel mi tla hen anna pûm chiam asi,

²⁸na kut hen leh na thinlung hen hawng tlung ding a ruatkan mi vial kha ti ding hen.

²⁹Chun, tuah, Lalpa, hawng kan ðih zia tla hi ngâinik, na to-aw tla hi râlþa tak hen na thu simtir le,

³⁰mi tla damtir ding hen nangnih na kut hawng phar, na to-aw thenhlimh Jisu min ruangah singsiahnâk leh thilchê tak tla titir na," an ti.

³¹Chun, thla an cham thluh nûnah anna pûmnâk mun chu a hawng a nîn le, an ektê hen Thlarau Thenhlimh hen an hawng khat le, râlþa tak hen Pathian thu an sim rawh.

³²Chun, a lungtu mi zapi tla chu thinlung munkhat leh dawnruatnâk munkhat hen an um; an lakah pakhat khawm nih an thil neih, "Ka tâ bîk asi," an ti lo; thil zawzawng anna bâwm ver tâwn.

³³Chun, mifial tla nih chun lungum tak hen Lalpa Jisu thawknawlnhâk thu an theihtir tâwn. An ektê tlûnah Pathian zângfahnâk rokual tak a um.

³⁴Chun, an lakah khawm sam leh phâng âukhawm an um lo; mun tla, in tla nei mi vial nih an zuar le, an thil zuar tla chu a man an hawng put le,

³⁵mifial tla kê bul ah an siah tâwn; an thil herh tâwk chiau hen an ðhen seng tâwn."

³⁶Chun, Josef, mifial tla nih Barnaba an ti mi (chu minung min umzia chu "Fawrhtu" tinâk asi), Levi chi, Kupra mi asi.

³⁷Chun, lo pakhat a nei le, a lo chu a zuar le, a man a hawng put le, mifial tla kê bul ah a siah rawh.

Thilti 5

¹Sikhawmsele, mi pakhat a min Anania, a nupi Saphir hen an um le, Anania nih chun an thil neih zeimaw zat tla a zuar le,

²a nupi theih hen a man zeimaw zat ding a pheh. Chun, zeimaw zat ding a hawng put le, mifial tla kê bul ah a siah.

³Sikhawmsele, Peter nih, "Anania, Thlarau Thenhlimh sinah âwkrâwl thu sim ding hen leh thil man zeimaw zat pheh ding hen zeirangah Setan nih na thinlung a khattir?"

⁴A um sung zawng kha na tâ asi lo masi? Na zuar nûn khawm khan na thu thu hen a um lo masi? Zeirangah me hi bang thu hi na thinlung hen na dawnruat? Minung sinah âwkrâwl thu na sim lo le, Pathian sinah âwkrâwl thu na sim dauh asi," a ti.

⁵Chun, Anania nih chubang thu chu a theih kê hen a tlû le, a thi rawh. Chun, a theih mi vial nih thungâi an ÷ih.

⁶Chun, tlangvâl tla chu an thawk le, an tuam le, an zawnh le, an vûi rawh.

⁷Chun, dârkar thum nûnah a nupi chu thil umzia theihlo hen a lût.

⁸Chun, Peter nih a sinah, "Hawng ka simh rawh, thil chu hi zat ko hen ma nan zuar?" a ti. Chun, anih nih chun, "I, hi vial ko hi asi," a ti.

⁹Chun, Peter nih a sinah, "Zeirangah me Lalpa Thlarau nikhâk ding hen thu nanna rual? Ngâinik, na pasal vûitu tla chu kawtkari ah an um rawh, nang khawm an zawnh lai," a ti.

¹⁰Chun, lâkkhatko ah a kê bul ah a tlû sawm le, a thi bâk rawh. Chun, tlangvâl tla chu an hawng lût le, anih chu thi hen an hawng muh, an zawnh le, a pasal kiangah chun an vûi rawh.

¹¹Chun, kawhmi tla zawzawng leh chubang thu theih mi vial tla nih chun thungâi an ÷ih.

¹²Chun, mi zapi lakah mifial tla nih singsiahnâk leh thilchê cherkhet an ti tâwn. Chun, annih chu an ektê hen thinlung munkhat hen Solomon Sârbûk ah chun anna pûm tâwn.

¹³Midang lam chu âukhawm an lakah anna tel ngam lo rawh. Sikhawmsele, mi nih annih tla chu an sawr na tâwn.

¹⁴Chun, Lalpa ah lungtu mipi leh nunau cherkhet tla chu an sinah sap hen an um vima tâwn.

¹⁵Chun, damlo tla khawm zâwllâi ah an hawng zawnh le, ihkhun leh tangphah tla ah an ittir na le, Peter kal mi a thlapelê nih mi zeimaw zat a dulh khonâk ding hen.

¹⁶Chun, Jerusalem kiangkam khua mi, mi zapi tla khâwm chu damlo tla, khuri nâwmtâm nehsawh tla an hawng kalpi; chubang tla khawm chu an hawng dam vima.

¹⁷Chun, Bâwlpu Lalchem leh a hâwi tla zawzawng an hawng a thawh le, (chubang a hâwi tla chu Sadukai murui an si le,) thungâi an nahsuah na;

¹⁸mifial tla chu an tleih le, zatlâng rêngin ah an khumh na rawh.

¹⁹Sikhawmsele, zân ah Lalpa vânmifial pakhat nih inkhâr tla chu a hawng awng le, a suakpi na le,

²⁰Pathian Biakin ah va dîr ule, mi le tla sinah hi bang Nungnâk thu zawzawng hi va sim u," a ti.

²¹Chun, chu thu chu an theih rawh chun khuadei awt bâiah Pathian Biakin ah an va lût le, an sîntir na rawh. Sikhawmsele, Bâwlpu Lalchem leh a hâwi tla chu an hawng kal le, lâirêltu tla leh Israel thlâk tla upa zawzawng an kawh na le, mifial tla chu hawngpi na ding hen rêngin ah chun mi an fial.

²²Sikhawmsele, vêngtu tla chu an va kal le, rêngin ah chun annih chu an muh na loh; chun an kîr nawlh le,

²³"Rêngin chu ða tak a khâr hen, a vêngtu tla khawm kawtkari ah dîr hen kan muh; sikhawmsele, kan awng le, a sungah âukhawm kan muh loh!" ti hen, an sim.

²⁴Chun, Pathian Biakin hotu leh bâwlpu lal tla nih chubang thu chu an theih le, "Hi bang hi zeï tluk hen a zan lai aw!" ti hen, an thu lakah chun thungâi an lawksawng.

²⁵Chun, minung pakhat a hawng kal le, "Rêngin ah mi nan khumh na mi tla nih khan Pathian Biakin ah dîr hen an sîntir na e!" ti hen, a hawng sim.

- ²⁶Chun, hotu chu a mi le tla hen chun an va kal le, zatlâng an ÷ih ruangah tluang tak hen an hawngpi na le, chu lo chun lung hen seh an ÷ih.
- ²⁷Chun, an hawng tlengpi na rawh chun lâirêltu tla mâika ah chun an dîrtir na. Bâwlpu Lalchem nih chun an sinah,
- ²⁸"Hi min hen sîntir lo ding hen kan nan ti thlir na rawh khateh, sikhawmsele nan thusim Jerusalem a khat rawh, hi minung thihnâk ruangah mawhtir ding nan hawng kan duh asi hi," ti hen, a salh na.
- ²⁹Sikhawmsele Peter leh mifial tla nih chun, "Minung thu ngâk hen Pathian thu kan zûl dauh ding asi.
- ³⁰Nannih nih Jisu thing ah thlâi hen nan thah mi kha, kan thlâktu tla Pathian nih a thawh nawlh rawh asi.
- ³¹Amah ngelchel kha Pathian nih Ruitu leh Ruangsuahtu rangah um ding hen a vawrhlei ah a chawnglawmh rawh, Israel tla soal rirtir ding leh ngaihdam ding hen.
- ³²Chubang thu chu a theihtu tla kan si. Thlarau Thenhlimh, Pathian nih a thu zûltu tla sinah a pêk mi kha a theihtu asi bâk," an ti.
- ³³Chun, annih nih chun chubang thu chu an theih hen thungâi an thin a purh le, thah an tum na rawh.
- ³⁴Sikhawmsele, lâirêltu tla lakah chun a min Gamaliel, Farisai, Dân sîntirtu, mi zawzawng lakah minthang tak minung pakhat chu a dîr le, chu minung tla chu suah na rih ding thu a pêk.
- ³⁵Chun, lâirêltu tla sinah chun, "Israel mi tla, hi minung tla tlûnah thil ti ding nanna tîm mi hi a thiamthih u.
- ³⁶A lân khawm khan, Theuda, 'Milian ka si,' ti hen a hawng um le; chu minung sinah chun mi cherkhet, mi zali ding an va a ÷âwm le; anih chu thah hen a um rawh; a thu zâwttu vial an ektê hen anna rek ver, zeikhawm an si lo rawh.

³⁷Chu nûnah chun min rîn liau khan, Galili ram ah mi Juda kha a hawng um nawlh le; a sinah zeimaw mi a kuih nawlh na le; sikhawmsele, anih khawm chu a thi rawh, a thu zâwttu vial tla chu an ektê hen anna rek ver rawh.

³⁸Churuangah tuah ka nan ti na, hi tla hi tawng lah na ule, um ko na seh; hi bang an thiltum leh an thilti hi minung suah mi ko asi chun a tlâu ko lai;

³⁹sikhawmsele, Pathian suah mi asi chun anmah tla nan tlâutir kho na lai loh; chu lo chun Pathian do nan si lebang lai," a ti. Chun, a sim mi chu rem an ti rawh.

⁴⁰Chun, mifial tla chu an kawh na le; an vuak na le; an vuak thluh nûnah Jisu min hen thu simlo rawh ding ti thlir hen an thlah na rawh.

⁴¹Chun, lâirêltu tla lakah thawk hen an suak le, chu min ruangah chun mualpho tuar tlâk ah ruat an si ruangah chun thungâi anna lâwm.

⁴²Chun, nisiar Pathian Biakin ah leh anmah in tla ah, "Jisu chu Mesia asi," ti hen, sîntir leh simh an bâng lêm lo.

Thilti 6

¹Chun, chu liau chun thiruai tla chu an pung dadauh liauah Greek Juda tla leh Juda tak tla lakah êlnâk a um. Greek Juda tla nih chun nisiar thawhlâwm then lakah an numei tla an thlawrhthlâu na an ti.

²Chun, leinih tla nih chun lungtu mi zapi tla chu an kawh le, "Pathian thusim bângtâk hen, ei leh bâr rian kan tjan chun a tja lai loh.

³Unau tla, Dân lakah Thlarau leh finghnâk hen a khat mi, min tja karo pasarih thîm u, annih chu hi bang thil ruattu rangah hin kan siam na lai;

⁴kannah lam chu thlacham leh thusim leiah kanna pêk lai," an ti.

⁵Chu thu nih chun mi zapi zawzawng a lawmhtir le; chun Stephen, lungnâk leh Thlarau Thenhlimh hen khat mi leh Philip, Prokora, Nikanor, Timon, Parmena, Nikola, Juda tla phun lût Antiokei khua mi hen an thîm le;

⁶chu minung tla chu mifial tla mâika ah an dîrtir na. Chun, annih nih chun thla an cham le, an tlûnah kut an thâng.

⁷Chun, Pathian thu chu a zan le, Jerusalem khua ah ðhiruai tla thungâi an pung, bâwlpu lakah khawm minung cherkhet nih lungnâk chu an zâwt rawh.

⁸Chun, Stephen chu vênneihnâk leh thiltikhonâk hen a khat le, minung lakah thilchê leh singsiahnâk rokual tak a ti tâwn.

⁹Sikhawmsele, sal suak mi tla pumhnâk an ti mi lakah mi zeimaw mi leh Kurini khua mi tla, Alekzandria khua mi tla lakah mi zeimaw mi tla leh Kilikia ram mi tla, Asia ram mi tla pumhnâk lakah mi zeimaw mi tla chu an hawng thawk le, Stephen chu an hawng êl.

¹⁰Sikhawmsele, a finghnâk leh a simpitu Thlarau chu an do kho lo rawh.

¹¹Chun, mi tla an nawh le, chu mi tla nih chun, "Mosi leh Pathian a simsâwi mi kan theih," an ti.

¹²Chun, mi tla, upa tla leh Dân sîntirtu tla an fawrh le, Stephen an tleih le, lâirêltu tla sinah an kalpi.

¹³Chun, theihtu telê an siam le, chu minung tla nih chun, "Hi minung nih hin hi Pathian Biakin thenhlimh leh Mosi Dân hi a simsiat nget tâwn;

¹⁴Nazaret Jisu nih hin hi Pathian Biakin hi a siat lai le, Mosi nih Dân hawng kan pêk mi tla a dangtir awt ti a sim mi kan theih," an ti.

¹⁵Chun, lâirêltu tla to mi zawzawng nih chun Stephen an zauh ko le, a mêl chu vânmifial mêl hâwi hen an muh.

Thilti 7

¹Chun, Bâwlpu Lalchem nih chun, "Hi bang thu hi a dik ma?" a ti.

²Chun, Stephen nih, "Unau tla, pa tla, ngâinik u! Kan thlâktu Abraham, Haran khua ah a um lânah Mesopotamia ram ah a um liau khan rokualnâk Pathian chu a sinah a hawng a langh le,

³a sinah, 'Na ram leh na dâwnsung tla thawk hen suak le, ram ka nan zauhtir ding mi leiah kal rawh,' a ti.

⁴Chun, anih chu Kaldai tla ram thawk hen a kal le, Haran khua ah a va um rawh. Chun, a pa thih nûnah chu thawk hen tuah nan umnâk khua leiah hin Pathian nih a ãautir.

⁵Chun, hinah chun zeikhawm mun luah ding, a kê siahnâk tlâk khawm a pêk lo; sikhawmsele, amah leh a nehnûnah a thlâk tla tiang a ro ting ding hen pêk a tiamh le, fa a neih lân khawmah.

⁶Chun, Pathian nih hi hâwi hen a sim: 'A thlâk tla mi ram leiah kum zali an châm lai le, mi nih sal ah an siam lai le, an nehsawh na lai,' ti hen.

⁷Chun, Pathian nih, 'Sal ah tângtirtu phun chu keimah nih lâi ka rêl piak na lai, chun chu mi nûnah chun an hawng suak lai le, hi mun ah hin ka rian an hawng ãuan lai,' a ti.

⁸Chun, Pathian nih a sinah fêmtan thu dân a tuk le; chun Abraham nih chun Isak a ring le, a ni riat ni ah a fêm a tan. Chun, Isak nih chun Jakob a ring le, chun Jakob nih chun chi thlâktu leinih tla kha a ring na.

⁹Chun, chi thlâktu tla nih khan Josef an nahsuah le, Aigupta ram leiah an zuar. Sikhawmsele, Pathian chu a sinah a um.

¹⁰A hamh tuarnâk zawzawng ah a sanh vima, Aigupta lalchem Pharoa khawm a zângfahtir le, mifing tak asi ti a theihtir. Chun, anih nih chun Aigupta ram leh a in ah minung zawzawng tlûnah hotu ah a siam rawh.

¹¹Chun, Aigupta leh Kanaan ram zawzawng ah chun pâm a tlung le, hamhnâk fâk tak a tlung rawh; kan thlâktu tla nih chun ei ding rerêng an tawng lo rawh.

¹²Sikhawmsele, Jakob nih chun Aigupta ram ah fâng a um ti a theih kê hen kan thlâktu tla chu a fial na; chu chu an kal dawmhnâk asi.

¹³Chun, an kal veinihnâk ah chun Josef nih a unau tla sinah â theihtir le; chun Josef unau tla chu Pharoa nih a theih rawh.

¹⁴Chun, Josef nih a pa Jakob leh a unau zawzawng a kawhtir; anmah tla chu sâwmsarih leh panga an si.

¹⁵Chun, Jakob chu Aigupta ram ah a va kal le; chun amah leh kan thlâktu tla chu an thi rawh.

¹⁶Sekem khua ah an zawnh le, Abraham nih Sekem khua ah Hamor fapa tla thawk hen thlân tangka hen a châwk mi lakah an vûi rawh.

¹⁷"Chun, Pathian nih Abraham sinah thu a tiamh mi tik kha a hawng tlung awt hen Aigupta ram ah kan minung tla chu an hawng pung le, an hawng tam dadauh.

¹⁸Churawhchun Josef theihlo mi lalchem dang Aigupta ah a hawng a lal rawh.

¹⁹Chu nih chun kan chi tla ngamlêm a pêk na le, kan thlâktu tla chu a nehsawh na le, an fasêm tla nung lo ding hen a lawnhtir na tâwn.

²⁰Chu liauah chun Mosi a hawng suak le, a mêl thungâi a ̣ha. A pa in ah thla thum an châwm;

²¹chun, an lawnh nûnah Pharoa fanu nih a lâk le, amah fa rangah a châwm rawh.

²²Chun, Mosi chu Aigupta ram mi tla finghnâk zawzawng a sîntir le, a thu lakah leh a thilti lakah thungâi a rokual.

²³"Chun, anih chu kum sâwmli a tling awt bâiah a unau Israel thlâk tla chu veh a tum.

²⁴Chun, an lakah minung pakhat nehsawh a tuar liau a muh le, a sanh le, nehsawh tuartu lawhbâ chu a sam le, Aigupta minung chu a thah rawh.

²⁵Mosi nih chun amah kut hen Pathian nih anmah tla a hum na ti a unau tla nih an theih lai mawh a ti le, sikhawmsele an theih loh.

²⁶Chun, a thâituan ah an lakah minung panih anna sual liauah an sinah a hawng tleng le, 'Pu le tla, unau nan silo mazei; zeirangah diklo tak hen nanna ti?' ti hen, remh a tum.

²⁷Sikhawmsele, a zâwlbâwm lakah ̣hatlo rawttu dauh nih chun Mosi chu a tul le, 'Kan tlûnah hotu ah leh lâirêltu ah âu nih a nan siam?'



²⁸Mazân ah Aigupta minung na thah mi hâwi khan thah na hawng ka tum asi mu?' a ti.

²⁹Chun, chu minung thu ruangah chun Mosi chu a tek le, Midian ram ah a um le, chunah chun fapa panih a nei.

³⁰"Chun, kum sâwmli a vei nûnah Sinai Tlâng ramkaro thingbûk lakah, meialh lakah vânmifial pakhat a sinah a hawng a langh.

³¹Chun, Mosi nih a muh rawh chun a thil muh chu thungâi chê a ti. Chun, zauh ding hen a va naih liauah Lalpa aw-hâu nih,

³²'Kei na thlâktu tla Pathian ka si, Abraham Pathian, Isak Pathian, Jakob Pathian, a hawng ti. Chun, Mosi chu a thir le, a zauh ngam lo rawh.

³³Chun, Lalpa nih chun a sinah, 'Na pheikawk kha lît rawh; na dîrnâk mun kha tual thenhlimh asi.

³⁴Aigupta ram ah ka mi um tla chu an hamh tuar zia ka muh ko asi, an rûm mi khawm ka theih ko, anmah tla sanh na ding hen ka hawng tum rawh asi. Aigupta ram ah ka nan fial lai,' a ti.

³⁵"Chun, Mosi, 'Hotu leh lâirêltu ah âu nih me a nan siam?' ti hen, an nar mi chu thingbûk lakah vânmifial a sinah â langh mi nih khan a bawmh le, Pathian nih amah ngelchel chu hotu leh sanhtu si ding hen a fial asi.

³⁶Anih nih chun Aigupta ram tla, Tipi Sen tla leh ramkaro tla ah chun kum sâwmli karah thilchê leh singsiahnâk tla a muhtir tâ le, anmah tla a rui na rawh.

³⁷Israel thlâk tla sinah, 'Pathian nih kei hawng ka siam hâwi hen khuavâng ah a nan fial lai, nan unau tla lakah mi asi lai, titu kha asi, Mosi chu.

³⁸Chu minung chu ramkaro ah mi zapi lakah Sinai Tlâng ah a sawnhtu vânmifial sinah leh kan thlâktu tla sinah a um mi kha asi; chu minung chu hawng kan pêk singsuan ding hen thu nung tla lâktu kha asi.

³⁹"Kan thlâktu tla nih chun a thu an zûl duh lo le, an nar le, an thinsung tla chu Aigupta ram leiah a kîr nawlh rawh.

⁴⁰Aron sinah, Kan mâi ruai ding hen pathian tla hawng kan siam piak rawh; Mosi Aigupta ram thawk hen hawng kan ruitu tâ nih a thâwngthâng kan theih lo rawh,' an ti.

⁴¹Chun, chubang ni ah chun chawpê fa ruk an siam le, a ruk chu ran thah hen an sawnh, anmah tla kut suak lakah chun anna lâwm rawh.

⁴²Chun, Pathian nih a hawitâk na le, vâh ah ârfi tla mâi an mûk khonâk ding hen annih tla chu a hawitâk na rawh, khuavâng lasuibu ah: 'Israel phun le tla, ramkaro ah khan kum sâwmlî karah sa thah hen leh ran thah hen kei nan hawng ka sawnh mazei?

⁴³Molok puanin leh pathian Rephan ârfi khawm chu mâimûk ding hen a ruk nan siam mi kha nan hâwl dauh kha. Churuangah Babulon lanh leiah ka nan kîrtir ving na lai, ti rîn hâwi khan.

⁴⁴"A lem a muh hâwi hen siam ding hen Mosi simhtu nih ruat hâwi khan kan thlâktu tla nih ramkaro ah khan theihtirnâk Puanin chu an nei.

⁴⁵Chu ber chu kan thlâktu tla thlâk nawlh khawm nih an nei vima ding hen, Pathian nih kan thlâktu tla mâiah Phundang a nar mi tla ram an luah liauah khan Josua hen an lût; David hawng um tiang khan chunah chun a um ko.

⁴⁶David chu Pathian mitmuh hen duh tlâk hen a um le, Jakob Pathian rangah umnâk siam piak ding a deih.

⁴⁷Sikhawmsele, Solomon nih in chu a sak piak dauh asi.

⁴⁸"Sikhawmsele, Chungnungchem chu kut hen sak mi in ah a um dah lo; khuavâng nih:

⁴⁹'Lalpa nih, Vâh ka laltophah asi le, tual chu ka kê sirhsanh asi. In zeî hâwi nan hawng ka sak piak lai? Ka rangah dinhnâk mun zeiah me?

⁵⁰Keimah kut hen hi bang thil zeizawng hi ka siam asi lo ma?' a ti," ti hen, a sim hâwi khan.

51"Mi lungkhung, lunglo mi thinlung puttu leh nasê tla, zeiliau zawngah Thlarau Thenhlimh nan do kumza; nan thlâktu tla ti hâwi vima khan nan ti tâwn.

52Nan thlâktu tla nih khuavâng tla lakah âu me an nehsawh lo mi um? Mi Rep tak hawng kal ding mi thu simhkantu kha an thah le, chu Minung tak chu tleihtirtu leh thahtu nanmah hi tuah nan si.

53Dân, vânmifial tla pêk singsuan mi kha muh ko hen zûllotu le tla!" a ti.

54Chun, chubang thu chu an theih hen thungâi an thin a run le, Stephen tlûnah chun an hachang an rial.

55Sikhawmsele, anih chu Thlarau Thenhlimh hen khat asi le, vâ lei a zauh thlir le, Pathian rokual zia leh Pathian vawrhlei ah Jisu a dîr mi a muh.

56"Zauhnik u! Vâ â awng mi ka muh le, Pathian vawrhlei ah Minung Fapa a dîr mi khawm ka muh, a ti.

57Chun, annih chu hâu fâk tak hen an âu le, an nâ an huh le, a rual hen an nam le,

58khua thawk hen an nar le, lung hen an seh. A theihtu tla nih chun tlangvâl pakhat a min Sawl kê bul ah chun an puan tla an siah.

59Chun, Stephen nih, "Lalpa Jisu, ka thlarau lâk rawh," ti hen, Lalpa a kawh liauah lung hen an seh chiam.

60Chun, a siksidîr le, hâu fâk tak hen a âu le, "Lalpa, an thilsual ti hi an tlûnah mawh phurhtir lah na," a ti. Chun, chu thu chu a sim thluh kê hen a thi rawh.

Thilti 8

1Sawl khawm nih a thi mi chu rem a ti. Chun, chu ni ah chun Jerusalem ah kawhmi um tla chu nehsawh tuar anna dawmh rawh. Mifial tla cho lo chu lungtu zawzawng tla chu Judai leh Samari ram khua kipah anna rekrâwi ver rawh.



- ²Chun, Pathian sunhsaktu âu tla nih mawh Stephen chu an vûi le, thungâi hen an t̄appi.
- ³Sawl lam nih chun kawhmi tla thungâi a nehsawh na le, in kipah a lût le, nunau mipa hen a nûk na le, rêngin ah a khumh na tâwn.
- ⁴Chun, anna rekrâwi mi tla chu khua kip ah an kal le, thu chu an sim vima.
- ⁵Chun, Philip chu Samari khuapi ah a va kal le, an sinah Mesia thu a phuang.
- ⁶Mi zapi tla nih chun Philip nih a sim mi chu an ngâi thlir. An ektê hen a thusim an ngâi le, thilchê a ti mi tla an muh.
- ⁷Mi tamtak thawk hen thlarau nâwmtâm tla chu hâu fâk tak a âu hen an hawng suak. Zeng leh kekhêng tamtak tla khawm damh an si.
- ⁸Chun, chu mi khuapi ah chun lâwmnâk fâk tak a hawng um rawh.
- ⁹Chun, chu mi khuapi ah chun a min, Simon, minung pakhat a um le; anih nih chun dâwi mang hen Samari mi tla chu chê ti tak hen a siam na tâwn. Amah nih chun milian ka si a ti,
- ¹⁰mi zawzawng nih chun, mi sia chem thawk hen lalchem tiang hen, "Hi minung hi Pathian thiltikhonâk, 'Thiltikhonâk Rokual,' an ti mi kha asi hi," ti hen, a thu an sunhsak tâwn.
- ¹¹A dâwi mang hen sâwt tak chê ti tak hen a siam na tâwn ruangah a thu an sunhsak tâwn asi.
- ¹²Sikhawmsele, Philip nih chun Pathian Ram Thâwngthâng T̄ha leh Jisu Krist min an sinah a sim, chun amah chu an lung rawh, nunau mipa hen baptis an si rawh.
- ¹³Chun, Simon men nih a lung bâk rawh; chun baptis asi rawh chun Philip sinah a um ko le, singsiahnâk leh thilchê tak tla a ti mi a muh le, thungâi chê a ti tâwn.
- ¹⁴Chun, Jerusalem ah mifial um mi tla nih khan Samari mi tla nih Pathian thu an lung ti an theih rawh chun an sinah Peter leh Johan chu an fial na.

- ¹⁵Annih chu an tung rawh chun Thlarau Thenhlimh an tawng khonâk ding hen thla an cham piak na.
- ¹⁶Chu lânah chun an lakah âu tlûn khawmah Thlarau Thenhlimh a hawng tung lo rih le, Lalpa Jisu min hen baptis an si cho asi.
- ¹⁷Chun, mifial tla nih chun an tlûnah an kut an thâng le, Thlarau Thenhlimh chu an tawng rawh.
- ¹⁸Chun, mifial tla kut thâng ruangah Thlarau Thenhlimh pêk asi ti Simon nih a muh hen,
- ¹⁹"Hi hâwi hen thuneihnâk hi hawng ka pêk bâk u, âu tlûn tal ah kut ka thângnâk zawngah Thlarau Thenhlimh an tawng khonâk ding hen," ti hen, an sinah tangka pêk a tum rawh.
- ²⁰Sikhawmsele, Peter nih a sinah, "Na tangka hi na tlâu rual hen tlâu bâk seh, Pathian thilpêk tangka sum hen châwk na tum ruangah.
- ²¹Hi bang thu lakah hin na tel bâk lo, tingvo khawm na nei lo; na thinlung Pathian ngaih hen â rep lo.
- ²²Churuangah na soal hi rim le, Lalpa sinah thlacham rawh, chun na thinlung hen na dawnruat mi hi an ngaihdam lai mawh.
- ²³Ngarhnâk khâ leh soal rêng tlâknâk ah na um ti ka muh asi," a ti.
- ²⁴Chun, Simon nih, "Nan sim mi hi zeikhawm ka tlûnah a tung lonâk ding hen Lalpa sinah thla hawng ka cham piak u," a ti le, a sâng.
- ²⁵Chun, annih nih chun Lalpa thu chu an theihtir le, an sim thluh rawh chun Peter leh Johan chu Jerusalem ah an tung nawlh rawh. Thâwngthâng Tha chu Samari ram mi khua tamtak ah an sim vima.
- ²⁶Chun, Lalpa vânmifial pakhat nih Philip chu a sawnh le, "Thawk le, simlei Jerusalem thawk hen Gaza khua a tlang mi lampi ah khan kal rawh," a ti. (Chu lampi chu ramkaro lampi asi.)

²⁷Chun, a thawk le, a kal rawh. Chun, Ethiopia ram ah minung pakhat Ethiopia lalnu Kandaki tangah mi tilkhei lal tak, a thil zawzawng kiltu, Jerusalem ah Pathian sawnh ding hen a va kal le,

²⁸a tlung leiah chun kari ah to bû hen khuavâng Isai lasuibu a rêl vima.

²⁹Chun, Thlarau Thenhlimh nih chun Philip sinah, "Khi kari khi va naih le, va kawmh rawh," a ti.

³⁰Chun, Philip chu mi tilkhei sinah chun a va tek le, khuavâng Isai lasuibu a rêl mi a theih le, "Na rêl mi kha a umzia na theih ma?" a ti.

³¹Chun, anih nih chun, "Âukhawm simhfiang lo hen zeitin ka theih kho lai?" a ti. Chun, a sinah to ding hen Philip chu a sâwm rawh.

³²Chun, Pathian lasui thu a rêl liau mi chu hi hi asi: "Thah ding mi dawrà hâwi hen anih chu an kalpi le, dawrà fa a mul mêtту mâika ah a dâisip hâwi hen anih khawm nih a kê a âng loh.

³³Â nâutir liauah a tlûnah diknak hen lâi an rêl lo; hi a thlâk tla thâwnghâng âu nih me sim lai? Laikulh thawk hen a nungnâk an lâk piak rawh dangâiah," ti hi.

³⁴Chun, tilkhei nih chun Philip a sawnh le, a sinah, "Khuavâng nih hi thu tla hi âu thu me a sim, amah thu ma, midang thu? Ka nan deih," a ti.

³⁵Chun, Philip nih chun a sim le, chu Pathian lasui thu chu a bul ah a dawmh le, a sinah Jisu thu a simh.

³⁶Chun, lampi ah an kal liauah tî umnâk ah an tleng le; chun tilkhei nih chun, "Zauhnik, hinah tî a um, baptis ding hen zei nih me hawng ka kham chem?" a ti.

³⁷Chun, Philip nih chun a sinah, "Na thinlung zawzawng hen na lung chun na baptis kho lai," a ti. Chun, anih nih chun tihin a sâng le, "Jisu Krist chu Pathian Fapa asi ti ka lung," a ti.

³⁸Chun, kari a dinhtir le, an panih hen, Philip leh tilkhei chu tî lakah chun an va kal le, chun, Philip nih chun anih chu a baptis rawh.

³⁹Chun, tî thawk hen a hawng suak kê hen Lalpa Thlarau nih Philip chu a lâk ving rawh. Chun, tilkhei nih chun anih chu a muh nawlh lo rawh; lâwm tak hen a kal vima ruangah.

⁴⁰Sikhawmsele Philip chu mi nih Azota khua ah an muh nawlh rawh. Chun, a kal zar le, Kaisari khua a tung tiang hen khua kip ah Thâwngthâng T̄ha chu a sim vima.

Thilti 9

¹Sawl lam nih chun Lalpa thiruai tla a thih mi leh thah a tum mi thu a sim nget rih le, Bâwlpu Lalchem sinah a kal.

²Damaska khuapi ah mi pumhnâk in zawzawng mi tla sinah pêk ding hen lasui a deih le, chu lampi leiah minung âutal lungtu a muh chun, nunau khawm, mipa khawm Jerusalem ah phuar bû hen a hawng kalpi kho na ding hen.

³Chun, a kal liauah, Damaska khuapi ah a tung awt bâiah, lâkkhat ko ah chêu vân thawk hen a kiangkam a hawng chêu pup le;

⁴chun tual ah a tlû le, a sinah, "Sawl, Sawl, nangnih zeirangah na hawng ka nehsawh?" ti hen, hâu a theih.

⁵Chun, anih nih chun "Lalpa âu me na si?" a ti. Chun, Lalpa nih chun, "Jisu na nehsawh mi ka si.

⁶Sikhawmsele, thawk le, khua ah lût rawh, chun na ti ding mi a nan simh lai," a ti.

⁷Chun, a sinah kal bâk mi chu hawlh lo hen an dîr thlo le, hâu lam chu an theih le, sikhawmsele, âukhawm an muh lêm lo.

⁸Chun, Sawl chu tual ah mi chu a thawk le, chun a hawng meng le, zeikhawm a muh kho lo rawh. Chun, a kut ah an ruai le, Damaska ah an lût.

⁹Chun, ni thum khua muhlo hen a um le, zeikhawm a ei hen a din lo.

¹⁰Chun, Damaska khuapi ah chun a min Anania, ðhiruai pakhat a um. Chun, muhtirnâk a nei le, Lalpa nih chun a sinah, "Anania," a ti. Chun, anih nih chun "Lalpa hinah ka um," a ti.

¹¹Chun, Lalpa nih chun a sinah, "Thawk le, Zâwllâi Ding an ti mi leiah kal le, Tarsa khua mi a min Sawl chu Juda in ah va hâwl rawh; thla a cham liau chir asi.

¹²Chun, muhtirnâk ah chun minung pakhat a min Anania chu lût hen a mit deitir ding hen a tlûnah kut thâng hen a muh rawh," a ti.

¹³Chun, Anania nih chun, "Lalpa, chu minung chu Jerusalem ah na mi thenhlimh tla lakah a sual tam zia thu mi cherkhet kê ah ka theih asi.

¹⁴Chun, hinah khawm na min lamtu vial phuar na ding hen bâwlpu lal tla thawk hen thu a tawng asi," a ti le, a sâng.

¹⁵Sikhawmsele, Lalpa nih chun a sinah, "Kal ko rawh, Phundang tla, lalchem tla leh Israel mi tla sinah ka min theihtirtu ding hen leh mang dingah ka thîm mi asi lo mazei?

¹⁶Chun, ka min ruangah hamhnâk zeî hâwi tluk a fâk mi a tuar ding amah ka theihtir awt asi," a ti.

¹⁷Chun, Anania chu a va kal le, in ah a lût. Chun, a tlûnah a kut a thâng le, "Ka nau Sawl, na mit deinâk ding leh Thlarau Thenhlimh khat hen na um khonâk ding hen, Lalpa, na hawng kalnâk lampi ah na sinah â langh mi Jisu nih khan hawng ka fial asi," a ti.

¹⁸Chun, veikhatko ah a mit thawk hen hir hâwi hen a tlâ sawm le, a mit a dei nawlh rawh. Chun, a thawk le, baptis asi rawh.

¹⁹Chun, buh a ei le, â panh nawlh rawh. Chun, Damaska ah ðhiruai um tla sinah chun ni zeimaw zat a um.

²⁰Pumhnâk in ah chun Jisu chu Pathian Fapa asi zia thu a phuang rawh.

²¹Chun, a thu thehtu zawzawng nih thungâi chê an ti, "Hi minung hi Jerusalem ah Jisu min lamtu tla nehsawh tâwntu kha asi lo mazei? Chubang



mi tla chu tleih hen bâwlpu lal tla sinah ruai na ding chu a hawng kal san asi lo mazei?" an ti.

²²Sawl lam chu thil a ti kho dadauh le, chu Jisu chu Mesia asi ti a simhfiang, Damaska ah Juda um tla nih chun an êl kho lo.

²³Chun, ni sâwt tak nûnah chun Sawl thah ding hen Juda tla chu anna thluk.

²⁴Sikhawmsele, anih nih chun an phiar mi chu a theih rawh. Chun, thah ding hen kulh kawtkâ kipah a sîn a zân hen an bawh tâwn.

²⁵Sikhawmsele, a thiruai tla nih chun anih chu an kalpi le, zân ah kulh lêng leiah bâwm hen an thlâk rawh.

²⁶Chun, Sawl chu Jerusalem ah a va tleng kê hen thiruai tla chu kawmh a tum, annih lam nih chun an ektê hen an ðih, thiruai asi bâk ti an lung lo.

²⁷Barnaba lam nih chun anih chu a kalpi le, mifial sinah chun a hawng kalpi le, lampi ah Lalpa a muh le, a sawnh zia tla, Damaska khuapi ah Jisu min hen râłtha tak hen thu a sim zia tla khawm chu an sinah a sim rawh.

²⁸Chun, Sawl chu Jerusalem ah chun lût leh suak hen a um rawh le, Lalpa min hen râłtha tak hen thu a sim tâwn.

²⁹Chun, Greek Juda tla sinah thu a sim le, a êl na le; annih lam nih chun anih chu thah an tum.

³⁰Chun, unau tla nih chu chu an theih rawh chun Kaisari khua ah an kalpi le, Tarsa khua ah an fial ving.

³¹Chun, kawhmi tla chu Juda ram kiangkam ah, Galili kiangkam tla, Samari kiangkam tla ah chun an bir dadauh le, lungngam tak hen an um rawh. Chun, Lalpa ðih îk hen, Thlarau Thenhlimh lungngamh hen an um le, an pung dadauh.

³²Chun, Peter chu mun kip a ðawl le, veikhat chu Lida khua ah mi, mi thenhlimh tla veh ding hen a va kal.

³³Chunah chun a min Ainias, a khêng mi ruangah kum riat ihkhun ah it kumza mi a muh.

³⁴Chun, Peter nih a sinah, "Ainias, Jisu Krist nih chun a nan damh asi; thawk le, na tangphah zual rawh.

³⁵Chun, Lida khua leh Saron phai ah um mi tla zawzawng nih chun Ainias chu an muh le, Lalpa leiah anna hawi rawh.

³⁶Chun, Jopa khua ah a min Tabitha lungtu pakhat a um. (Greek hen a min chu Dorka asi, chu chu 'Sakhi' tinâk asi.) Chu nunau chu thil tha ti hen a hun zawzawng a mang tâwn le, chun, mipâm tla a tangpi tâwn.

³⁷Chun, chubang liauah chun a damlo le, a thi rawh; chun, tak an khawlh le, a tlûn mi kardang ah an zâutir.

³⁸Chun, Lida khua chu Jopa khua thawk hen a lât chiam lo le, thiruai tla nih chun Peter chu chunah chun a um ti an theih le, "Mawhsareh hen kan sinah hawng kal nawlh," ti hen ngiar chiam ding hen a sinah minung panih an fial.

³⁹Chun, Peter chu a thawk le, an sinah a kal rawh. Chun, a tlung ka hen a tlûnah mi kardang ah an kalpi le; numei zawzawng chu a kiangah dîr hen, Dorka chu an sinah a um liauah a kawrdawh siam tla, a puan siam tla zauhtir bû hen an tap ver.

⁴⁰Sikhawmsele, Peter nih chun an ektê hen a suaktir ver na le, a siksîdîr le, thla a cham rawh. Chun, ruak leiah â hawi le, "Tabitha, thawk rawh," a ti. Chun, a mit a hawng meng le, Peter a muh kê hen a to.

⁴¹Chun, Peter nih chun a kut a pêk le, a thawh rawh; mi thenhlimh tla leh numei tla chu a kawh na le, dam hen a muhtir na.

⁴²Chun, chu chu Jopa khua zawzawng ah chun an theih ver rawh; mi cherkhet nih Lalpa an lung rawh.

⁴³Chun, Peter chu ni tamtak Jopa khua ah Simon, savun siamtu in ah chun a châm.

Thilti 10

¹Chun, Kaisari khua ah a min, Kornelia, minung pakhat a um, "Itali Kawrsen Murui," an ti mi lakah kawrsen zâ hotu asi.



²Pathian sunhsak mi asi le, a dâwnsung tla zawzawng hen Pathian an òh tâwn. Mi sinah thilthawt cherkhet a pêk tâwn le, Pathian sinah khawm thla a cham tâwn.

³Chu minung nih chun zânlei dâr thum liau dingah muhtirnâk a nei le, fiang tak hen Pathian vânmifial pakhat a sinah lût hen, "Kornelia," ti hen a muh.

⁴Chun, Kornelia nih chun anih chu a zauh ko le, a òh, "Pu, ze mesi?" a ti. Chun, anih nih chun a sinah, "Na thlachamnâk leh na thilthawt pêk tla kha ka theihkumza ding hen Pathian mâika ah a tlung rawh.

⁵Tuah Jopa khua ah mi fial le, minung pakhat Simon Peter an ti mi chu va dawngtir na rawh.

⁶Savun siamtu Simon in ah a tlung asi; a in chu tisumsumriat kapah a um," a ti.

⁷Chun, vânmifial chu a kal kê hen, Kornelia nih chun a to-aw tla lakah minung panih leh a rianṭuan tâwntu lakah Pathian sunhsak mi kawrsen pakhat a kawh na.

⁸Chun, thu zawzawng a simh thluh na rawh chun Jopa khua leiah a fial na rawh.

⁹Chun, a thâituan ah, an kal liauah Jopa khua kiang an tlung awt bâi ah, Peter chu thlacham ding hen nî sunh chirah, in tlûnah a kêi.

¹⁰Chun, a sung a vâng le, ei ding a duh rawh; chun, ei ding an siam liauah chun muhtirnâk a nei rawh.

¹¹Chun, vâ ã awng hen, zeilo bâwm, puan lian tak hâwi hen a muh.

¹²Chun, chu sungah chun kê pali nei ransa tla leh vâkrit leh chungzuan vâ zeizawng an um.

¹³Chun, a sinah aw-hâu hen, "Peter, thawk rawh, thah le, ei rawh," a hawng ti.

¹⁴Sikhawmsele, Peter nih chun, "Lalpa asi lo; a thiango mi leh a nâwmtâm mi zeikhawm ka ei dah lo," a ti.

- ¹⁵Chun, aw-hâu nih chun veinihnâk ah, "Pathian nih a thianh rawh mi chu nangnih a thianglo ti lah," a ti.
- ¹⁶Chu hâwi karo hen veithum a hawng um le; chun, bâwm chu vân ah lâk hen a hawng um nawlh rawh.
- ¹⁷Chun, Peter nih muhtirnâk a muh mi a thu umzia chu a ngaihnâk theihlo hen a lawksawng liauah, Kornelia mifial tla nih chun Simon in chu an hawng hâwl rawh le,
- ¹⁸kawtkari ah an dîr le, Simon Peter an ti mi chu chunah chun a um leh umlo an deih.
- ¹⁹Chun, muhtirnâk thu a dawnruat liauah Thlarau nih a sinah, "Mi pathum nih an hâwl.
- ²⁰Chun, thawk le, ÷um le, zeikhawm zumhmaid lo hen anmah chu zûl rawh; annih chu ka fial mi asi," a ti.
- ²¹Chun Peter chu minung tla sinah chun a ÷um le, an sinah "Nan hâwl mi hi keimah ka si; ze me nan hawng san?" a ti.
- ²²Chun, annih nih chun, "Vânmifial thenhlimh pakhat nih Kornelia kawrsen zâ hotu, mi rep tak, Pathian ÷ih mi, Juda phun zawzawng nih an zah mi sinah chun na thusim theih ding hen, a in ah nangmah kawh ding hen a simh asi," an ti.
- ²³Chun, annih tla chu a kawh na le, a riaktir na rawh. Chun a thâituan ah chun Peter chu a thawk le, an sinah a kal le, Jopa khua mi unau, mi zeimaw mi khawm a sinah an kal bâk.
- ²⁴Chun, a kip ah Kaisari khua ah chun a lût rawh. Chun, Kornelia nih chun a unau tla leh a kâwi duh chem tla pumh hen annih chu a ngâk ko na.
- ²⁵Chun, Peter chu a lût awt liau takah Kornelia nih chun a va dawng le, a kê bulah a bawkbukhup le, Pathian hâwi hen a mâimûk.
- ²⁶Sikhawmsele, Peter nih chun a nih chu a thawh le, "Dîr rawh, kei khawm minung ka si bâk," a ti.

- ²⁷Chun, a sinah thu sim bû hen a lût le, mi cherkhet an um mi chu a muh.
- ²⁸Chun, an sinah, "Juda mi nih phundang kawmh leh an sinah kal a thianglo zia nannih nih nan theih asi; sikhawmsele, âukhawm thianglo leh nâwmtâm ka ti ding asi lo ti Pathian nih hawng ka theihtir asi.
- ²⁹Churuangah nan hawng ka kawh kê hen khan êl lo hen ka hawng kal rawh asi. Chun, ka nan deih na asi, zei me nan hawng ka kawhnâk san?" a ti.
- ³⁰Chun, Kornelia nih chun, "Ni li asi rawh, tu tik ding chirah hin ka in ah zânlei dâr thum ah thla ka cham le, minung pakhat puan chêu tak aih hen ka mâika ah a dîr le,
- ³¹Kornelia, na thlachamnâk kha theih hen a um rawh, mi sinah na thilpêk tla khawm kha Pathian nih a theihkumza.
- ³²Churuangah Jopa khua ah mi fial le, Simon Peter an ti mi chu na sinah kawh rawh; anih chu tisumsumriat kapah savun siamtu Simon in ah a tlung asi,' a ti.
- ³³Churuangah na sinah mi ka hawng fial sawm asi; na hawng kal hi a ̣ha. Chun Lalpa nih thu a nan pêk mi vial chu theih ding hen kan ektê hen hinah kan um asi hi," a ti.
- ³⁴Chun, Peter nih a sim le: "Pathian nih mi duh bîk a nei lo ti diktak hen ka theih,
- ³⁵sikhawmsele, phunkip lakah âuzawng amah ̣ih hen rep tak a ti mi vial a lawmh kâng an si tâwn.
- ³⁶Anih nih chun lungngamnâk Thâwngthâng ̣ha Jisu Krist kê ah sim hen, Israel thlâk tla sinah thu a kuat le, (Jisu chu mi zawzawng Lalpa asi.)
- ³⁷Johan nih a sim tâwn mi baptis nûnah khan, Galili ram thawk hen thuzanh a dawmh le, Juda ram zawzawng a zân ver kha,
- ³⁸nannih nih nan theih bâk khateh; Nazaret Jisu kha, kha hâwi hen Pathian nih anih chu Thlarau Thenhlimh leh thiltikhonâk hen a vurh zia kha; anih nih

chun mi tlûnah thattir leh diabol nehsawh zawzawng damh hen a tawl tâwn le, Pathian a sinah a um.

³⁹Juda ram leh Jerusalem ah a thilti zawzawng theih tu tla kan si; anih chu kraws ah thlâi hen an thah rawh.

⁴⁰Pathian nih anih chu ni thum ni ah a thawh nawlh le, fiang tak hen a zauhtir.

⁴¹Sikhawmsele mi zawzawng sinah asi lo, Pathian nih theih tu ah a ruatkan mi tla sinah cho asi; kanmah tla mithi lakah thawk hen a thawhnawlh nûnah a sinah ei leh bâr mi tla sinah hin.

⁴²Anih chu mithi tla leh minung tla tlûnah Lâirêltu ah Pathian ruat chu asi ti mi sinah phuangpitu leh theihtir ding hen Pathian nih thu hawng kan pêk asi.

⁴³Âuzawng amah lungtu vial a min ruangah sual tla ngaihdam hen an um lai ti, hi bang a thâwngthâng hi khuavâng zawzawng nih an theihtir tâwn kha," a ti.

⁴⁴Chun, Peter nih chubang thu chu a sim liau takah chun Thlarau Thenhlimh a hawng tlung rawh.

⁴⁵Chun, fêmtan tla lakah lungtu tla, Peter zûltu vial nih chun Thlarau Thenhlimh pêk mi chu Phundang tla lakah khawm tawih asi ruangah thungâi chê an ti.

⁴⁶Hawlh theihlo hen thu sim hen, Pathian sawr hen an theih fâwn.

⁴⁷Chun, Peter nih a sawnh le, "Hi bang mi tla, kanmah hâwi hen Thlarau Thenhlimh tawng bâk mi tla hi baptis an si lonâk ding hen tî mang ding an khap kho mazei?" a ti.

⁴⁸Chun, Jisu Krist min hen baptis ding thu a pêk. Chubang nûnah chun ni zeimaw zat châm an ngiar.

Thilti 11

¹Chun, Judai ram ah mifial le unau um tla nih chun Phundang tla khawm nih Pathian thu an zûl ti an theih rawh.

- ²Chun, Peter chu Jerusalem ah a tlung kê hen fêmtan tla nih a sinah,
- ³"Fêmtan lo tla in ah na lût le, an sinah na ei tâwn," ti hen an salh.
- ⁴Sikhawmsele, Peter nih chun a bul thawk hen a sangtê hen an sinah a simhfiang na le:
- ⁵"Jopa khua ah thlacham hen ka um le; chun muhtirnâk ka nei le, zeilo bâwm, puan lian tak hâwi, a ki pali ah khih hen vân thawk hen thlâk mi ka muh; ka kiang ngelchel ah a hawng ka naih.
- ⁶Chun, chu chu ka zauh ko le, ka ruat le, kê li nei ran tla, ramsa tla, vâkrit leh chungzuang vâ tla ka muh.
- ⁷Chun, aw-hâu nih, 'Peter thawk rawh, thah le, ei rawh, a hawng ka ti hen ka theih.
- ⁸Sikhawmsele, kei nih, 'Lalpa, asi lo, thianglo leh nâwmtâm zeikhawm ka kê ah a lût dah lo,' ka ti.
- ⁹Sikhawmsele, vân thawk hen aw-hâu nih chun veinihnâk ah, 'Pathian nih a thenhlimhtir rawh mi chu nangnih a thianglo ti lah,' ti hen a hawng ka sâng.
- ¹⁰Chu hâwi karo hen veithum a hawng um rawh chun zeizawng vân ah lâk hen a um rawh.
- ¹¹Chun, chu liau tak chun minung pathum Kaisari khua thawk hen ka sinah an hawng fial le, ka umnâk inah an hawng dîr rawh.
- ¹²Chun, Thlarau nih âukhawm thliar bîk lo hen anmah tla zûl ding hen hawng ka fial. Hi bang unau paruk khawm nih an ka zûl bâk, Kornelia in ah kan lût le;
- ¹³chun, anih nih chun kan sinah, a inah vânmifial a dîr mi a muh zia leh vânmifial nih chun a sinah, 'Jopa khua ah mi fial le, Simon Peter an ti mi chu va kawhtir rawh;
- ¹⁴anih nih chun thu a nan simh na lai le, chu thu hen nang leh na dâwngsung tla chu ruangsuaah hen nan um lai,' a ti zia khawm hawng kan simh.

- ¹⁵Chun, thu ka sim tîrah Thlarau Thenhlimh kan tlûnah a hawng tungtir liau hâwi ber hen khan an tlûnah a hawng tung rawh.
- ¹⁶Chun, Lalpa thu, 'Johan nih tî hen mi a baptis tâwn kha; sikhawmsele, nannih lam chu Thlarau Thenhlimh hen baptis nan si lai,' a ti zia kha ka hawng theih nawlh rawh.
- ¹⁷Chun, Lalpa Jisu Krist an lung kê hen Pathian nih thilthawtpêk hawng kan pêk hâwi hen khan an sinah a pêk na tung chun, kei rîlmâl hi Pathian êl kho mi ma ka si?" a ti.
- ¹⁸Chun, chubang thu chu an theih hen an dâisip rawh, "Chu hâwi asi chun Pathian nih Phundang tla nung ding hen rim a siang rawh ma chu!" ti hen, Pathian an sawr rawh.
- ¹⁹Chun, Stephen thah liauah nehsawhnâk ruangah anna rekrâwi mi tla kha Phoiniki ram tla, Kupra tikulh tla, Antiokei khua tla tiang hen an kal. Juda tla sinah cho lo chun âu sin khawmah thu an sim lo.
- ²⁰Sikhawmsele, an lakah zeimaw mi chu Kupra tikulh leh Kurini khua mi tla an si le, chu minung tla nih chun Antiokei khua chu an tung hen Greek tla sin khawmah thu an sim le, Lalpa Jisu Thâwngthâng T̄ha chu an sim vima rawh.
- ²¹Chun, Lalpa Jisu thiltikhonâk nih anmah tla a bawmh na le, Lalpa leiah anna hawi rawh.
- ²²Chun, an thâwngthâng chu Jerusalem ah kawhmi um tla nâ ah chun a hawng lût rawh le; chun, Antiokei khua tiang hen Barnaba chu an fial rawh.
- ²³Chun, anih chu a va tleng le, Pathian zângfahnâk chu a muh le, thungâi â lâwm, thanemngâi tak hen Lalpa lakah zumhkâi ding hen an ektê hen a fawrh na rawh.
- ²⁴Barnaba chu mi t̄ha tak asi le, Thlarau Thenhlimh leh lungnâk hen khat mi asi. Chun, mi cherkhet chu Lalpa sinah anna sap rawh.
- ²⁵Chun, Barnaba chu Sawl hâwl ding hen Tarsa khua ah a kal.

²⁶Chun, a tawng rawh chun Antiokei khua ah chun a hawng kalpi. Chun, kum khat bo kawhmi tla pumhnâk ah chun anna tel tâwn, mi cherkhet an sîntir na tâwn. Thiruai tla, "Kristian," an ti masachemnâk chu Antiokei khua ah asi.

²⁷Chun, chu liau chun khuavâng tla âumawh Jerusalem thawk hen Antiokei khua ah chun an va kal.

²⁸Chun, an lakah minung pakhat a min, Agaba a dîr le, laikulh zawzawng ah pâm fâk tak a tlung awt ti Thlarau simh hen a theihtir le; chu pâm chu Klaudia lal liauah a hawng tlung rawh.

²⁹Chun, thiruai tla nih chun an ti kho ri chiau hen Judai ram unau tla sinah chun tangpinâk ding kuat an tum.

³⁰Chu chu an ti ngelchel rawh, Barnaba leh Sawl kut ah chun upa tla sinah an kuat rawh.

Thilti 12

¹Chun, chu liau chun Lalchem Herod nih kawhmi tla lakah âumawh nehsawh tum hen nâm a lek rawh.

²Chun, Jem, Johan unau chu nâmsâu hen a thah.

³Chun, chu nih chun Juda tla a lawmhtir ti a theih le, Peter khawm chu tleih a tum vima. (Chubang ni tla chu Sang Thilnu telhlo ni asi.)

⁴Chun, an tleih nûnah chun rêngin ah an khumh le, kawrsen murui li, pali vima hen an vêng sâwng vima le, Kalkanh Kût thluh ah mi zawzawng sinah suah a tum.

⁵Churuangah Peter chu rêngin ah chun a umtir rih; sikhawmsele, kawhmi tla nih amah rangah thanemngâi tak hen Pathian sinah thla an cham piak tâwn.

⁶Chun, Herod nih chun a suah awt liauah, chu zân takah chun Peter chu kawrsen panih karah chikchîn panih khih hen a it le; a vêngtu tla khawm kawtkarî ah an um le, rêngin chu an vêng.

⁷Chun, lâkkhat ko ah Lalpa vânmifial pakhat chu a kiangah a hawng dîr le, in sungah chun chêu zeimawh a hawng um le; chun, Peter nakah a bengh le, a



thangh le, "Thawk rawh," a ti. Chun, chikchîn tla chu a kut ah mi a tlâ sawm rawh.

⁸Chun, vânmifial nih chun a sinah, "Puan a aih le, na pheikawk a bunh rawh," a ti. Chun, anih nih chun chu hâwi hen a ti. Chun, vânmifial nih chun a sinah, "Na puan t̄ha tak hen a bah le, hawng ka z̄ul rawh," a ti.

⁹Chun Peter chu a suak le, a z̄ul rawh; vânmifial changh zia chu a tak asi ti a theih loh, muhtirnâk a muh mi mawh a ti dauh.

¹⁰Chun, a vêngtu tawngt̄ir mi leh a sangtu an lanh nûnah chun lêng suaknâk ding th̄ir inkhâr chu a va t̄leng le, chu chu an rangah â awng sawm rawh. Chun, an suak le, tualmâi pakhat an lanh le; chun vânmifial nih chun a kaltâk rawh.

¹¹Chun, Peter chu a f̄im kê hen, "Lalpa nih a vânmifial a fial le, Herod kut ah mi leh Juda mi tla lungumnâk zawzawng thawk hen ruang ka suak ti tuah dik tak hen kê theih rawh," a ti.

¹²Â dawnruat thluh nûnah, Johan Mark an ti mi nu Mari in ah chun thlacham hen mi cherkhet anna p̄um.

¹³Chun, inkulh khâr a kik kê hen, a min Rodi, nungâk pakhat, sâng ding hen a va kal.

¹⁴Chun, Peter hâu a theih kê hen â lâwm ruangah kulh chu awng lo hen a lût nawlh ving, chun Peter chu inkhâr bulah a d̄ir ti a va sim.

¹⁵Sikhawmsele, annih nih chun, "Na â rawh ma hi!" an ti. Anih nih chun, "Thungâi tak asi," ti hen, â t̄ang thlo. Chun, annih nih chun a vânmifial asi chu!" an ti.

¹⁶Sikhawmsele, Peter nih chun a kik lemanh le; chun an awng rawh chun amah chu an muh le, thungâi ch̄e an ti.

¹⁷Chun, anih nih chun an dâisipnâk ding hen a kut a vei. Lalpa nih rêngin thawk hen amah a suah zia tla chu a simh na rawh. Chun, "Hi bang thu hi Jem leh unau tla va simh na u," a ti. Chun, a suak le, a dang leiah a kal rawh.

¹⁸Chun, nî a suak le, kawrsen tla chu, "Peter kha zeiah a um rawh?" ti hen thungâi anna nawk.

¹⁹Chun, Herod nih chun a hâwl le, a tawng lo, a vêngtu tla chu a rêp na le, thah ding hen thu a pêk rawh. Chun, Herod chu Judai ram thawk hen Kaisari khua ah a va kal le, chunah chun a um ko.

²⁰Chun, Herod chu Tura leh Sidon khua mi tla tlûnah thungâi a lungsilô; chun annih nih chun Blasta, lal ihkhun vêngtu chu an hâwi ah an siam le, thu a rual hen a sinah an hawng. Lalchem ram leiah pâm buh thiar tâwn mi an si ruangah Herod sinah an va kal le, remnâk an ngiar.

²¹Chun, a ni tiam ni ah Herod nih chun lal puan â aih le, laltophah ah a to le, an sianh thu a sim.

²²Chun, mi zawzawng nih chun "pathian hâu asi hi, minung hâu asi lo," an ti le, an âu tâwn.

²³Chun, anih nih chun Pathian sinah chawnglawmhnâk a pêk lo ruangah Lalpa vânmifial nih lâkkhat ko ah a tleih le, khuprûl nih a ei le, a thi rawh.

²⁴Pathian thu lam chu a zân le, a pung vima.

²⁵Chun, Barnaba leh Sawl nih chun rian chu an ÷uan thluh nûnah Jerusalem thawk hen an kîr nawlh rawh le, Johan Mark an ti mi chu an sinah an kalpi.

Thilti 13

¹Chun, Antiokei khua mi kawhmi tla lakah chun khuavâng tla leh sîntirtu tla an um: Barnaba, Simeon, (Niger an ti mi), Kurini khua mi Lukia lal Herod unau ding, Manain leh Sawl tla an si.

²Chun, Lalpa rian an ÷uan le, buh an ngei liauah Thlarau Thenhlimh nih Barnaba leh Sawl hi anmah ka ruat na mi rian÷uan ding hen hawng ka thlei piak u," a ti.

³Chun, buh an ngei le, thla an cham thluh rawh chun an tlûnah kut an thâng le, an kaltir na rawh.

- ⁴Chun, Thlarau Thenhlimh fial hen an kal le, Selukia khua ah an tum le, chu thawk hen Kupra tikulh ah lawng hen an kal.
- ⁵Chun, Salami khua ah an um liauah Juda pumhnâk in tla ah Pathian thu an sim tâwn le; Johan Mark khawm kha an rianțuan ding hen an kalpi.
- ⁶Chun, tikulh chu Paphos khua tiang hen an țawl ver le, dâwithiam, khuavâng telê, Juda mi pakhat an muh, a min chu Bar-Jisu asi.
- ⁷Chu minung chu lal ruangrûl ah Sergia Pawlas, mi fing tak sinah um mi asi. Chu lal ruangrûl nih chun Barnaba leh Sawl chu a kawh na le, Pathian thu theih a tum.
- ⁸Sikhawmsele, Elima dâwithiam (chu chu a min umzia asi), chu nih chun lal ruangrûl chu lungtir lo ding tum hen annih chu a kham na.
- ⁹Chun, Sawl, Pawl an ti mi ber chu Thlarau Thenhlimh hen a khat le, anih chu a zauh ko le,
- ¹⁰Nang diabol fapa, nang repnâk zawzawng huatupa Lalpa lampi rep tak tla hi siattir na bâng lo mu?
- ¹¹Theih rawh tuah Lalpa kut na tûnah a tlâ asi hi, na mit a châw lai le, khua chêu na muh lai loh," a ti. Chun, sôm leh mûi nih amah a tlâk nawh le, kut hen ruaitu ding hâwl hen â dap lemang rawh.
- ¹²Chun, lal ruangrûl nih chun chu thil chu a muh le, Lalpa thâwngthâng sîntirnâk chu thungâi chê a ti le, a lung rawh.
- ¹³Chun, Pawl chu a murui tla hen Paphos khua thawk hen chun lawng hen an kal le, Pamphulia ram ah Perga khua an tleng le, chun Johan nih khan annih chu a kaltâk na le, Jerusalem ah a kîr nawlh rawh.
- ¹⁴Sikhawmsele, annih chu Perga khua thawk hen an kal vima le, Pisidia ram ah Antiokei khua ah an tleng le; chun Dinhni ah pumhnâk in ah an lût le, an to.

¹⁵Chun, Dân leh khuavâng tla lasuibu rêl dih ah pumhnâk in hotu nih an sinah mi an fial le, Unau le tla, mi tla fawrhâk thu zeimawh nan nei chun sim u," an ti.

¹⁶Chun, Pawl chu a dîr le, a kut a vei le, a sim: " Israel mi tla leh Pathian ðihtu tla, ngâinik u.

¹⁷Hi bang Israel mi tla Pathian nih hin kan thlâktu tla a thîm le, Aigupta ram ah an châm liau khan a chawnglawmh na le, Pathian nih a thiltikhonâk hen Aigupta thawk hen a suah na rawh .

¹⁸Chun, kum sâwmli bo ramkaro ah khan a zauhkhenh na.

¹⁹Chun, Kanaan ram ah mi phun sarîh a râwk nûnah khan an ram chu kum zali leh sâwmnga kar luah ding hen a pêk na.

²⁰Chubang nûnah chun lâirêltu tla a pêk na le, khuavâng Samuel tiang khan.

²¹Chun, chu nûnah chun lal an deih le, chun, Pathian nih Saul, Kis fapa, Benjamin phun lakah mi kha an sinah a pêk le, kum sâwmli rang dingah.

²²Chun, anih chu a ðhial nûnah khan an lal rangah David a siam rawh; Pathian nih chu minung chu thu theihtir hen, 'David, Jese fapa, ka thinlung hâwi put mi ka tawng rawh, anih nih chun ka duh mi vial a ti lai," a ti.

²³Chu minung thlâktu lakah chun Pathian nih thu a tiamh hâwi vima hen Israel tla sinah Ruangsuahtu Jisu a hawng tlunh.

²⁴A hawng kal lânah Johan nih rimnâk ruangah baptis thu Israel mi zawzawng sinah a sim.

²⁵Chun, Johan nih a ti ding mi a ti dih awt liau khan, "Nannah nih âu si ding hen nan ka ruat? Amah chu ka si lo, sikhawmsele ka dung leiah mi âumawh a hawng kal awt asi, kei lam chu a pheikawk ri sût tlâk khawm ka si lo,' a ti.

²⁶"Unau le tla, Abraham thlâk tla, nan lakah Pathian ðihtu tla, kanmah tla sinah hin hi bang ruangsuahtu thu hi hawng kan kuat rawh asi hi.

²⁷Jerusalem ah um tla nih an hotu tla hen anih chu an theihlo ruangah anih chu mawhtir hen, chu thu chu an rangtlingtir rawh.

²⁸A thihnâk khawp rê hen a tlûnah zeikhawm an muh lo khawmah Pilat sinah thah ding hen an ngiar.

²⁹Chun, a thâwngthâng Pathian lasui thu nih a sim hâwi hen zeizawng an lîm rawh chun kraws ah mi chu an lâk le, thlân ah an vûi rawh.

³⁰Sikhawmsele, Pathian nih mithi lakah mi a thawh nawlh le,

³¹chun, Galili ram thawk hen Jerusalem ah amah rual hen an kal bâk mi tla sinah chun ni sâwt tak kar chu â langh tâwn; chubang mi tla chu tuhin mi sinah a thu theihpitu tla an si.

³²Kannah khawm nih thlâktu tla sinah thu tiamh kha a thâwngthâng lawmhkâi kan hawng sim asi hi, kha hâwi hen Pathian nih Jisu a thawh mi lakah khan, kannah an fa tla sinah hin a rangtlingtir asi. Sam panihnâk ah: 'Ka fapa na si; tusûn hin ka nan ring,' ti rîn hâwi khan.

³⁴Thûtnâk munah kal lo rawh ding hen Pathian nih anih chu mithi lakah mi a thawh nawlh ding zia thu chu hi hâwi hen a sim: 'David sinah zângfahnâk ka tiamh thlir mi tla kha nangmah ka nan pêk lai,' ti hen.

³⁵Churuangah Sam dang ah: 'Na Mi Thenhlimh chu Thûttir na siang lai loh,' a ti.

³⁶David lam chu a thlâk tla lakah Pathian thiltum chu a tjan dih nûnah khan a thi le, thlâktu tla sinah an vûi le, a thû rawh asi.

³⁷Sikhawmsele, Pathian thawh mi lam kha chu a thû kho lo.

³⁸Chun, unau le tla, theih u; amah ruang chun sual ngaihdamnâk thu nan sinah sim asi.

³⁹Âuzawng a zumhtu vial chu zeî lak zawngah amah mawhlotir hen an um, chubang lakah chun Mosi Dân nih mawhlotir hen nan um kho lo.

⁴⁰Churuangah rârling u, chu lo chun khuavâng tla lasuibu ah an sim mi kha nan tlûnah a tlung lebang lai:

⁴¹Zauhnamhtu tla, zauhnik u! Chê ti ule, tlâu ko u, nan dam kar hin thil kâng khat ka ti mi hi, chu thil chu mi nih an simh na khawmsele, nan lung lo thlo lai, ti kha," a ti.

⁴²Chun, Pawl leh Barnaba chu pumhnâk in thawk hen an suak liauah Dinh ni nawlh ah chubang thu chu sim nawlh ding hen an ngiar na.

⁴³Chun, anna pûm mi tla chu an tiak kê hen, Juda leh phun lût tla cherkhet nih Pawl leh Barnaba chu an zûl vima na le; mifial tla nih an sinah thu an sim le; chun Pathian zângfahnâk ah um kumza ding hen an fawrh na.

⁴⁴Chun, Dinhni nawlh ah chun khuatê hen Pathian thu ngâi ding hen an hawng a pûm.

⁴⁵Sikhawmsele, Juda tla nih mi zapi an muh kê hen thungâi an nahsuah na; Pawl thusim chu an êl le, an râp.

⁴⁶Chun, Pawl leh Barnaba nih chun râlṭha tak hen an sim le, "Pathian thu hi nanmah tla sinah sim masa ding rêng asi; sikhawmsele, nan nar le, zungzâl nung tlâk lo hen nanna ruat rawh nûnah hin theih u, Phundang leiah kanna her lai rawh.

⁴⁷Chu hâwi hen chun Lalpa nih thu hawng kan pêk asi: 'Phundang tla chêtirtu ah ka nan ruat kâwlkil tiang hen Ruangsuahtu ah na um khonâk ding hen,' ti rîn hâwi khan,' an ti.

⁴⁸Chun, Phundang tla nih chun chubang thu chu an theih hen anna lâwm le, Pathian thu an chawnglawmh. Chun, zungzâl nung ding a ruat mi vial chu an lung rawh.

⁴⁹Chun, Lalpa thu chu chu ram ah chun a zan rawh.

⁵⁰Sikhawmsele Juda tla nih chun nunau zahkâi Pathian sunhsaktu tla leh khua upa tla chu an fawrh na le, Pawl leh Barnaba chu an nehsawhtir na le, an ram thawk hen an nar na rawh.

⁵¹Chun, annih nih chun an tlûnah an kêzaphah valeidip an khâwng le, Ikoniam khua an tleng.

⁵²Chun, thiruai tla Antiokei ah chun lâwmnâk leh Thlarau Thenhlimh hen an khat chiau.

Thilti 14

¹Chun, Ikoniam khua ah chun Juda tla pumhnâk in ah an lût le, thu an sim tâwn le, Juda leh Phundang tla tamtak nih an lung.

²Sikhawmsele, lunglotu Juda tla nih Phundang tla chu an fawrh na le, unau tla chu an huatir na.

³Churuangah Lalpa leiah râłtha tak a thu sim hen chunah chun sâwt ual an um le, Lalpa nih chun singsiahnâk leh thilchê tla an kut ah titir hen, a zângfahnâk thu a thehtir tâwn.

⁴Sikhawmsele, khua ah mi, mi zapi tla chu anna êl rawh le, a zeimaw mi nih Juda tla an sanh na le, a zeimaw mi nih mifial tla an sanh na.

⁵Chun Phundang tla leh Juda tla, an hotu tla hen chun mifial tla chu ningzakkâi tak hen siam ding leh lung hen seh ding hen anna tîm awt liauah annih nih chun an theih.

⁶Chun, Lukaonia ram ber ah chun Lustra leh Derbe khua tla leh a kiangkam ram tla ah an tek;

⁷chubang tla ah chun Thâwngthâng T̄ha an sim vima.

⁸Chun, Lustra khua ah chun kekhêng âumawh a to tâwn le, a suak tîr thawk hen kekhêng rerêng asi, kê hen a kal dah lo.

⁹Chu minung nih chun Pawl thusim a ngâi le, chun Pawl nih chun anih chu a zauh ko le, damnâk ding hen lungnâk a nei ti a theih le,

¹⁰hâu fâk tak hen, "Na kê hen ding ziar hen dîr rawh," a ti. Chun, anih chu a thawk le, kê hen a kal rawh.

¹¹Chun, mi zapi tla nih Pawl thilti chu an muh kê hen, Lukaonia hawlh hen fâk tak hen, "Pathian tla chu minung hâwi hen kan sinah an hawng t̄um rawh asi hi!" an ti.

¹²Chun, Barnaba chu Zeus an ti le, Pawl chu thusimtu dauh asi ruangah Hermes an ti.

¹³Chun, Zeus biakin dâilêng ah a um mi chu a bawlpu nih chun chawchal leh chawmpâr ðhi tla inkhâr kiangah an hawng put le, mi zapi tla hen chun sawnhnâk rangah thah an tum rawh.

¹⁴Sikhawmsele, mifial Barnaba leh Pawl nih chun chu chu an theih kê hen an puan an thlêk le, mi zapi lakah an lût le, an âu le,

¹⁵"Pu le tla, hi bang thil hi zeirangah nan ti? Kannih khawm nan thinlung hâwi put minung kan si; hi bang thil mang tlâk lo tla nan hertâk hen vân le, tual le, tisumsumriat le, an sungah um mi zawzawng siamtu Pathian nung sinah chun nan hawng a her khonâk ding hen Thâwngthâng Ṭha kan tlunh na asi.

¹⁶Chu Pathian nih chun tuan liauah phun kip mah lampi chiauh zawh a siang le,

¹⁷sikhawmsele, Pathian nih amah chu a dik asi ti theihtirnâk umlo hen a siam lo, chu hâwi hen thil ṭha a ti tâwn, vân thawk hen ruah tla leh ei ding a nan pêk na, nan thinlung lâwmnâk hen a nan khattir na tâwn kha," an ti.

¹⁸Chun, chubang thu chu mi zapi nih anmah sawnhnâk ding ran an thah ding mi chu zângrah hen an khap na.

¹⁹Sikhawmsele, Antiokei leh Ikoniam khua mi Juda âumawh chunah chun an hawng kal le, mi zapi tla chu an lêm na rawh. Chun, Pawl chu lung hen an seh le, thi hen an ruat ruangah khua lêng leiah an nûk rawh.

²⁰Sikhawmsele, ṭhiruai tla chu a kiangkam ah an đir liauah a hawng thawk le, khua ah chun a lût rawh. Chun, a thâituan ah chun Barnaba hen Derbe khua ah an kal rawh.

²¹Chun, khua ah chun Thâwngthâng Ṭha an sim le, ṭhiruai cherkhet an siam nûnah Lustra, Ikoniam leh Antiokei khua leiah an kê rawh.

²²"Hamhnâk tamtak tuar hen Pathian Ram ah kan lût ding rerêng asi," ti hen ðhiruai tla thinlung an birhtir le, lungnâk ah chun um kumza ding hen an fawrh vima na.

²³Chun, kawhmi murui kipah chun upa tla an ruat piak na le, buhngei bû hen thla an cham thluh chun an lung mi Lalpa sinah chun an kiltir na vima tâwn.

²⁴Chun, Pisidia ram an ðawl vima le, Pamphulia ram chu an tleng.

²⁵Chun, Perga khua ah thu an sim thluh rawh chun Atalia khua ah an kal.

²⁶Chu thawk chun lawng hen an kal le, Antiokei khua chu an hawng tlung nawlh rawh, chu chu an thilti dih chia chu ti ding hen unau tla Pathian zângfahnâk kiltir hen an mâk na nâk kha asi.

²⁷Chun, an tlung nûnah kawhmi tla chu an pumh na le, Pathian nih anmah tla mang hen thil a ti mi zawng tla leh phundang tla rangah lungnâk inkhâr a awng piak na zia tla chu an sim.

²⁸Chun, ðhiruai tla sinah chun sâwt tak an um rawh.

Thilti 15

¹Juda ram thawk hen an hawng kal le, unau tla sîntir anna dawmh rawh: "Mosi Dân hâwi hen fêm nan tantir lo chun ruangsuah nan si kho lai loh," ti hen, an sîntir na.

²Chun, Pawl leh Barnaba chu anmah tla hen êl hen anna do ruangah Pawl leh Barnaba chu an lakah âu tla hen mawh, chu thunawk ruang chun Jerusalem khua ah mifial tla leh upa tla sinah kal ding hen an ruat.

³Chun, kawhmi tla nih chun an thlah na le, annih nih chun Phundang tla her nawlhnâk thu chu sim vima ding hen Phoiniki ram leh Samari ram an ðawl dih rawh; chun, unau tla zawzawng thungâi an lâwmhtir na.

⁴Chun, Jerusalem chu an va tleng rawh chun kawhmi tla, mifial tla, upa tla nih chun an hawng lawmh na le, chun Pathian nih anmah tla mang hen thil a ti mi zawng tla chu an simh na.

- ⁵Sikhawmsele, Farisai murui lakah mi âu tla mawh lungtu an thawk le, "Phundang tla chu an fêm tan ding asi. Mosi Dân zûl ding hen an sinah thu pêk thlir ding asi," an ti.
- ⁶Chun, mifial tla leh upa tla chu chubang thu chu ruat ding hen anna pûm.
- ⁷Chun, anna êl chiam nûnah Peter a thawk le, an sinah: "Unau tla, Phundang tla nih keimah kê hen Thâwngthâng T̄ha theih hen zûl ding leh Pathian nih tuan thawk hen nan lakah mi hawng ka ruat zia nan theih.
- ⁸Chun, mi thinlung theihthu Pathian nih kanmah a hawng kan pêk hâwi ber khan Thlarau Thenhlimh an sinah pêk bâk hen an lakah â lâwm ti a theihtir.
- ⁹Chun, kannih leh annih thliar leh dang lo hen an lungnâk hen an sual a ngaihdam na.
- ¹⁰Chun, kan thlâktu tla leh kannih neh kho lo mi liangbat kha tuah thiruai tla lakah ngauh tum hen zeirangah Pathian finghnâk nan êl?
- ¹¹Anmah lungnâk hâwi ber hen kannih khawm nih Lalpa Jisu zângfahnâk ruangah ruangsuak ding hen kanna ruat a si," a ti.
- ¹²Chun, mi zawzawng chu an dâisip le, Barnaba leh Pawl nih Pathian nih anmah tla mang hen Phundang tla lakah singsiahnâk leh thilchê a ti mi thu kha an sim kar zawng an ngâi.
- ¹³Chun, an sim thluh nûnah Jem nih a sim bâk le: "Unau tla ka thu ngâi u.
- ¹⁴Pathian nih amah min zah ding hen an lakah mi tla lâk ding hen Phundang tla a veh mi thu chu Simon nih hin a sim rawh.
- ¹⁵Chun, chubang thu leh khuavâng tla thu hi â meh asi: Pathian lasui thu nih a sim hâwi hen,
- ¹⁶Chubang nûnah chun ka kêr nawlh lai le, David basâ a chim mi kha ka siam nawlh lai. A râwk mi tla khawm ka remh nawlh lai.
- ¹⁷Midang, Phundang tla zawzawng ka min hawng ka bâwmtu tla nih chun Lalpa an hâwnâk ding hen, chu basâ chu ka dirh nawlh lai ti hen.

¹⁸Laikulh siam tîr thawk hen hi bang thu theihtir tâwntu Lalpa nih chun a ti, ti rîn hi.

¹⁹"Churuangah hi hâwi hen ka ruat asi, Phundang tla lakah Pathian leiah anna her mi tla chu hamhtir na lo sele,

²⁰ruk sawnhnâk thil nâwmtâm ei tla, pungnâk tla, s a rawm dît hen thah leh thisen ei tla bângtâk ding hen an sinah lasui kuat sele ka ti asi.

²¹Mosi nih tuan liau thawk hen khua kipah a thu simpitu a nei tâwn le, pumhnâk in ah Dinhni kipah a thu chu rêl asi tâwn kha," a ti.

²²Chun, mifial tla leh upa tla chu kawhmi zawzawng tla hen chun an murui lakah mi an thîm le, Pawl leh Barnaba sinah Antiokei khua ah kaltir tha an ti. An thîm na mi min chu Juda, Barnaba an ti mi leh Sila an si le, chu mi tla chu unau tla lakah hotu dauh an si.

²³Chun, hi hâwi hen lasui an rîn le, an kut ah an kuat: "Mifial tla leh upa tla, nan unau tla nih Antiokei khua tla, Siria ram tla leh Kiliki ram ah Phundang unau um tla chibai kan bûk na.

²⁴Kan murui lakah mi âu tla nih mawh an nawktir na hen, nan thinlung ah an lawksawng tir na ti kan theih, an sinah thu zeikhawm kan pêk na lo.

²⁵Churuangah thu rual hen kanna pûm le, kan hâwi duhtak Barnaba leh Pawl,

²⁶Lalpa Jisu Krist min ruangah thih le nung ûi lo tla kal rual ah hin mi thîm tla nan sinah hawng kal tir bâk tha kan ti.

²⁷Chun, Juda leh Sila kan hawng fial na asi, annih khawm nih hi bang thu hi hawlh kê hen an simh na lai.

²⁸Thlarau Thenhlimh leh kannih nih hi bang thu herh lo hi ritphurh nan tûnah thâng lo sele tha kan ti.

²⁹Ruk sawnhnâk sa ei tla, thisen ei tla, pungnâk tla bângtâk ule kan ti; hi bang hi nan bâng chun nan rangah a tha lai. Dam hen um u," ti hen.

³⁰Chun, an fial na le, an kal le, Antiokei khua ah an tleng le; chun, mi zapi tla an pumh na le, lasui chu an pêk na.

³¹Chun, an rêl thluh rawh chun lungngamnâk thu ruangah chun thungâi anna lâwm.

³²Chun, Juda leh Sila chu khuavâng an ti le, thu cherkhet hen unau tla chu an lungngamh na le, an birhtir.

³³Chun, chunah chun sâwt dauh an um nûnah anmah fialtu tla sinah tlung nawlh ding hen unau tla nih chun lungngam tak hen an tlungtir nawlh na rawh.

³⁴Sikhawmsele, Sila chu chunah um ko ðha a ti.

³⁵Pawl leh Barnaba lam chu Antiokei khua ah chun Lalpa thu sîntir hen leh sim hen an um ko le, midang cherkhet hen.

³⁶Chun, ni zeimaw zat nûnah chun Pawl nih Barnaba sinah, "Tuah kal nawlh sele, khua kipah Lalpa thu kan simnâk zawngah unau tla kha veh vima sele, an umdân kan zauh na lai," a ti.

³⁷Chun, Barnaba nih chun Johan Mark an ti mi chu an sinah kalpi a tum.

³⁸Sikhawmsele, Pawl lam nih chun anih chu an sinah kalpi ðha a ti lo, Pamphulia ram ah anmah tla a kîrtâk na le, rianðuannâk ah an sinah a kal bâk lo ruangah khan.

³⁹Chun, cherkhet anna êl le, anna ðhen rawh. Barnaba nih Mark a kalpi le, Kupra tikulh leiah lawng hen an kal rawh.

⁴⁰Pawl lam nih chun Sila chu a thîm le, unau tla nih chun Lalpa zângfahnâk ah an ap na nûnah an kal rawh.

⁴¹Chun, kawhmi murui tla chu birhtir vima hen Siria leh Kiliki ram a ðawl rawh.

Thilti 16

¹Chun, Pawl chu Derbe leh Lustra khua ah a kal. Chun, chunah chun a min Timothe, ðhiruai pakhat a um. Lungtu Juda nunau fapa asi le, a pa lam chu Greek mi asi.

²Lustra leh Ikoniam khua ah unau um tla nih chun anih chu an sawr tâwn.



- ³Pawl nih anih chu a sinah kal bâk ding hen a duh. Chun chu leiah Juda um tla ruangah a fêm a tan piak le, a pa chu Greek mi asi ti an theih ver ruangah.
- ⁴Chun, khua kipah an kal pah hen Jerusalem ah mifial leh upa um mi tla thu thlûk kha zûl ding hen unau tla sinah an pêk vima na.
- ⁵Chun, kawhmi murui chu lungnâk ah chun chak dadauh hen an um le, nisiar hen an pung dadauh rawh.
- ⁶Chun, Thlarau Thenhlimh nih Asia ram ah thusim a khap ruangah Phrugia leh Galatia ram chu a ÷awl rawh.
- ⁷Chun, Musia ram kiangah an tlung rawh chun Bithinia ram ah lût an tum le, sikhawmsele Jisu Thlarau nih a siang lo.
- ⁸Chun, Musia ram chu an lanh le, Troas khua ah an kal.
- ⁹Chun, zân ah Pawl nih muhtirnâk a muh; Makedonia ram ah minung pakhat dîr hen, "Makedonia ram ah hawng kêi le, hawng kan bawmh rawh," ti hen, ngiar chiam hen a muh.
- ¹⁰Chun, muhtirnâk a muh kê hen Makedonia ram ah chun kal a tum sawm le, an sinah Thâwnghâng Tha sim ding hen Pathian nih hawng kan kawh ti kan theih.
- ¹¹Chun, Troas khua thawk hen lawng hen kan kal le, tuang tak hen Samothraki khua ah kan kal le, a thâituan ah chun Neapoli khua ah kan kal le,
- ¹²chun, chu thawk chun Philipi khua ah kan kal le, chu khua chu Makedonia ram ah mi khua pakhat asi, chu bial ah chun khua herh chem asi; Rom khua thawk hen ÷iau mi tla khua asi. Chu khua ah chun ni tamtak kan châm.
- ¹³Chun, Dinhni ah kulh kawtkhâr lêngleih ah tiva kap ah thlachamnâk mun si ding hen kan ruat mi lakah chun kan kal. Chun, kan to le, nunau an hawng mi tla sinah chun thu kan sim.

¹⁴Chun, a min Lidia puan senduk zuartu Thiatira khua mi, Pathian sawnhtu nunau pakhat nih kan thu a theih le, chun Pawl thusim zûl ding hen Lalpa nih chun a thinlung a fiangtir rawh.

¹⁵Chun, amah leh a dâwnsung tla hen baptis an si rawh chun, Lalpa lungtu tak hen nan hawng ka ruat chun ka in ah hawng tlung u," ti hen hawng kan ngiar chiam le, hawng kan thloh rawh.

¹⁶Chun, thlachamnâk mun ah chun kan kal liauah, nungâk âumawh khuri chamchawh thiam mi kan tawng le, anih nih chun a chamchawh thiamnâk ruangah a pu le chu sum tamtak a tawngtir tâwn.

¹⁷Chu minung nih chun Pawl leh kanmah a hawng kan zûl le, "Hi bang minung ruangsuaahnâk lampi simtu tla hi Chungnungchem Pathian to-aw an si," ti hen a âu.

¹⁸Chu hâwi hen chun ni sâwt tak a ti tâwn. Chun, Pawl chu a lung silo rawh le, â her le, khuri sinah chun, Jisu Krist min hen a sungah mi hawng suak ding hen thu ka nan pêk," a ti. Chu liau chir chun a suak sawm rawh.

¹⁹Chun, a pu le nih an sum tawngnâk a tlâu ti an theih hen Pawl leh Sila chu an tleih le, hotu tla mâika ah sumtuah mun ah an nûk na.

²⁰Chun, lâirêltu tla sinah an kalpi na le, "Hi minung tla hi Juda tla an si le, kan khua thungâi an nawktir,

²¹dân kan zûl thiangelo mi tla an sîntir na le, "Kannah chu Rom mi kan si," an ti.

²²Chun, mi zapi tla khawm chu mifial tla do na ding hen an hawng a thawh le, lâirêltu tla nih chun an puan tla an lît piak na le, thianthunh hen vuak ding thu an pêk.

²³Chun, vei cherkhet an vuak na nûnah rêngin ah an khumh na le, a vêngtu sinah tha tak hen vêng thlir ding hen an ti.

²⁴Chu hâwi tluk hen thu an pêk ruangah anih nih chun rêngin sungah a khumh na le, an kê tla chu tungkhâwng lakah a thlâk na.

- ²⁵Sikhawmsele, thanṭim ah Pawl leh Sila chu Pathian sinah thla an cham le, la an sak le, rêngtlâk tla nih an ngâi.
- ²⁶Chun, lâkkhat ko ah lî fâk tak a hawng a nîn le, chun rêngin lungphûm tla chu â nîn; chun, inkhâr zawzawng â awng sawm le, mikip rêngkhimh tla chu â sût rawh.
- ²⁷Chun, a vêngtu chu a it mi a hawng â ṭhang le, rêngin inkhâr tla chu awng hen a muh le, rêngtlâk tla chu an tek mawh a ti le, nâmsâu a phâwi le, â thah awt.
- ²⁸Sikhawmsele, Pawl chu hâu fâk tak hen a âu le, "Zeitín khawm a ti lah, kan ektê hen hinah kan um ver rih asi," a ti.
- ²⁹Chun, a vêngtu nih chun khâwnvâr a lam le, a lût le, lâu leh thir bû hen Pawl leh Sila mâika ah a bawkbukhup.
- ³⁰Chun, annih chu a kalpi na le, "Pu le tla, ruangsuaak a um ding hen zeí me ka ti lai?" a ti.
- ³¹Chun, annih nih chun a sinah, "Lalpa Jisu chu nang leh na dâwnsung tla hen lung ule, ruangsuaak hen nan um lai," an ti.
- ³²Chun, a sinah leh a in ah um mi zawzawng tla sinah chun Lalpa thu an sim.
- ³³Chun, chu zân lîla ah chun a kalpi na le, an vuaknâk a zual mi tla chu a ṭawl piak na le; chun amah leh a dâwnsung tla zawzawng hen baptis an si sawm rawh.
- ³⁴Chun, a in ah a kalpi na le, ei ding a pêk na le, chun Pathian an lung ruangah anih chu a dâwnsung tla zawzawng hen anna lâwm rawh.
- ³⁵Chun, a thâizing ah, lâirêltu tla nih chun, "Kha minung tla kha suah na rawh," ti hen, kawrsen tla an fial.
- ³⁶Chun, rêngin vêngtu nih chun Pawl sinah an thu a simh, "Lâirêltu tla nih chun an suah na ding hen mi an hawng fial asi; churungah tuah hawng suak ule, lungngam tak hen kal u," a ti.

³⁷Sikhawmsele, Pawl nih chun an sinah, "Rom mi kan si, kan mawh leh mawh lo theihlo hen mi zatlâng mitmuh hen hawng kan vuak le, rêngin ah hawng kan khumh; tuah a thup hen suah ding hawng kan tum asi mu? Asi kho lai loh, anmah ngelchel hawng na sele hawng kan suah seh," a ti.

³⁸Chun, kawrsen tla nih chun chubang thu chu lâirêltu tla sinah chun an sim. Chun, Rom mi an si ti an theih rawh chun an òih rawh.

³⁹Chun, an va kal le, ngaihdam an deih na le, an suah na le, khua thawk hen kal ving ding hen an ngiar na.

⁴⁰Chun, rêngin thawk hen an suak le, Lidia in ah chun an lût. Chun, unau tla chu an muh na le, lung an ngamh na le, an suak rawh.

Thilti 17

¹Chun, Amphipolia leh Apolonia khua an lanh le, Thesalonika khua ah an tleng le, chunah chun Juda tla pumhnâk in a um.

²Chun, Pawl nih a ti dân hâwi nget hen pumhnâk in ah a lût. Dinhni veithum kar Pathian lasui thu chu ruatpi na hen,

³leh Mesia chu hamhnâk tuar ding rerêng asi zia tla mithi lak mi thawk nawlh ding asi zia tla chu a simhfiang le, a langhtir tâwn. "Hi Mesia a thu ka nan simh na mi hi, amah hi Krist chu asi," a ti tâwn.

⁴Chun, an lakah zeimaw mi chu lêm hen an um le, Pawl leh Sila chu an kawmh rawh; Pathian sunhsak mi Greek mi zapi cherkhet leh nunau ruitu cherkhet hen.

⁵Sikhawmsele, Juda lunglo tla nih chun an nahsuah na le; sumtuah mun ah mi zângzê âu tla mawh misual an sinah an hawngpi le, mi zapi an pumh na le, khua zawzawng an nawktir. Zason in an hawng nam le, mi zatlâng sinah kalpi ding an tum.

⁶Chun, annih chu an tawng na lo le, Zason leh a unau dang âu tla mawh khua hotu sinah an nûk le, an âu le, "Laikulh nawktirtu tla kha hinah khawm an hawng kal le, Zason nih hin a in ah a tlungtir na.

- ⁷Hi tla zawzawng hi, 'A min Jisu, lal dang a um,' ti hen, Kaisar thu kalh hen an um tâwn asi," an ti.
- ⁸Chun, mi zapi leh khua hotu tla nih chun chubang thu chu an theih rawh chun an nawk rawh.
- ⁹Chun, Zason leh midang tla thawk hen tangka an lâk le, an suah na rawh.
- ¹⁰Chun, unau tla nih chun zân ah Pawl leh Sila chu Beria khua ah an kaltir sawm na le, chunah an va tlung rawh chun Juda tla pumhnâk in ah an lût.
- ¹¹Chunah mi tla chu Thesalonika khua tla ngâk chun an tha dauh le, chun thinlung lâwm tak hen thu chu an pawm le, an thu chu a dik leh diklo theih ding hen nisiar hen Pathian lasui thu ah an hâwl tâwn.
- ¹²Chun, an lakah mi cherkhet nih an lung rawh; Greek nunau zahkâi tla leh mipa tla khawm neptuai an lung lo.
- ¹³Sikhawmsele, Thesalonika khua mi Juda tla nih chun Pawl nih Beria khua ah Pathian thu a sim ti an theih kê hen chunah khawm chun an va kal le, mi zapi tla chu an fawrh le, an nawktir nawlh rawh.
- ¹⁴Chun, unau tla nih tisumsumriat tiang kal ding hen Pawl chu an fial sawm rawh. Sila leh Timothe lam chu chunah chun an um ko rih.
- ¹⁵Chun, Pawl kalpitu tla nih chun Athen khua tiang hen an kalpi le; chun Sila leh Timothe chu chelh rî hen a sinah kal tuannâk ding thuchah put hen an tlung rawh.
- ¹⁶Chun, Pawl nih Athen khua ah annih chu a ngâk na liauah chun khua chu pathian lem tla khat hen a muh le, a thinrun rawh.
- ¹⁷Chun, pumhnâk in ah Juda tla leh Pathian sunhsaktu tla a êlpi tâwn le, sumtuah mun ah khawm chunah a um mi vial tla chu nisiar a êlpi na tâwn.
- ¹⁸Chun, Epikuria mi leh Stoik mi lakah mi fing âumawh khawm nih anih chu an hawng êlpi. A zeimaw mi nih, "Hi mi katam nih hin zei me sim a tum?" an ti. A zeimaw mi nih Jisu thu leh thawknawlhnhâk thu a sim ruangah, "Ramdang pathian tla thusimtu asi bei a!" an ti.

- ¹⁹Chun, anih chu an tleih le, Arawpagi ah chun an hawng kalpi le, a sinah. "Hi sîntirnâk thar na sim tâwn mi hi hawng kan theihtir kho lai ma?"
- ²⁰Thilchê zeilo kan nâ ah na hawng tlunh asi; chun hi bang thil umzia hi theih kan duh," an ti.
- ²¹(Athen khua mi zawzawng chu an khua ah khual um mi tla khawm thu thar ngâi ding leh sim hen lawh an ruang nget tâwn.)
- ²²Chun, Pawl chu Arawpagi lâi takah chun a dîr le, a sim le: "Nannah Athen khua mi tla, zeizawng lakah phung-leh-lam sunhsak mi nan si ti ka theih.
- ²³Ka tawih pah hen nan sawnh mi tla ka zauh liauah, mâichâm pakhat tlûnah, "Theih loh Pathian sinah," ti hen, rîn ka muh asi. Chun, theihlo hen nan sawnh tâwn mi kha, chu thu chu ka nan simh na hi.
- ²⁴Pathian, laikulh leh a sungah thil zeizawng Siamtu chu tual leh vân Lalpa asi ruangah kut hen sak mi in tla ah a um lo;
- ²⁵thil a samphâng mi hâwi hen minung kut hen rianṭuan piak hen a um dah loh, amah ngelchel chu nungnâk tla, thawsuaknâk leh thil zeizawng pêktu asi.
- ²⁶Chun, tual tlûn zawzawng ah um ding hen phûr munkhat ver hen phun kip minung a siam le, an rangah tik a ruat le, an umnâk ding rî khawm a siam le,
- ²⁷Pathian an hâwl hen an theih khonâk ding hen; sikhawmsele, anih nih chun hawng kan lât lo chiau asi,
- ²⁸churuangah, 'Amah ruangah kan nung, kan châng hen kan um asi.' Nanmah lakah la phuak thiam âu nih mawh, 'Kannah khawm a thlâk tla kan si,' ti hen an sim hâwi khan.
- ²⁹Chun, Pathian thlâk tla kan si rawh chun Pathian chu ngûn, tangka, lung mawh minung zungthiam leh thilthiam siam mi hâwi hen kan ruat ding asi loh.

³⁰Pathian nih chun amah kan theihlo liauah a ngaihzia hawng kan thiam piak tâwn le; sikhawmsele, tuah ramkipah mi zawzawng rim ding thu a pêk rawh asi,

³¹ni a tiamh ruangah, chu ni ah chun a minung ruat mi tla chu tual ah mi tla rep tak hen lâi a rêl lai; chu chu Pathian nih amah chu mithi lakah mi thawh hen mi zawzawng sinah a theihtir rawh," ti hen.

³²Chun, mithi lakah thawknawlnhâk thu chu an theih kê hen, a zeimaw mi an nihsanh, a zeimaw mi nih, "Hi thu hi na sinah kan hawng ngâi nawlh lai," an ti.

³³Chun, Pawl chu an lakah thawk hen a kal rawh.

³⁴Sikhawmsele, mi âu tla mawh a sinah anna tel thlir le, an lung rawh. Chubang lakah zeimaw mi chu Arawpagi mi Dionisias leh nunau pakhat a min Damaris leh an sinah midang tla hen an si.

Thilti 18

¹Chu nûnah Pawl chu Athen khua ah mi chu a suak le, Korin khua ah a kal rawh.

²Chun, a min, Akuila Juda pakhat a muh le, chu minung chu Pontia ram ah a suak mi asi, Klaudia nih Juda zawzawng Rom khua thawk hen suak ding thu a pêk ruangah a nupi Priskili hen Itali ram thawk hen hawng tlang kê an si.

³Chun, Pawl chu chu tla sinah chun a tlung bâk rawh le, chun an rianṭuan hâwi ṭuan mi asi ruangah an sinah a um le, an sinah a ṭuan tâwn, an rianṭuan chu puanin siamtu an si.

⁴Chun, Dinhni kipah pumhnâk inah thuruatnâk nei hen thu a sim tâwn, Juda leh Greek chu tla chu lêm a tum tâwn.

⁵Chun, Sila leh Timothe chu Makedonia ram ah mi chu an hawng kal le, Pawl chu thusim cho hen a um rawh. Jisu kha Krist chu asi ti Juda tla sinah a simhfiang tâwn.

⁶Sikhawmsele, an do le, an fâi le, Pawl nih a puan a thing le, an sinah, "Nan thihnâk mawh chu nanmah nih phurh ko u, kei lam chu ka thiang asi; tu thawk hen Phundang tla sinah ka kal lai," a ti.

⁷Chun, chunah mi chu a kal le, a min Tita Justa, mi pakhat in ah a lût le, chu nih chun Pathian a sawnh tâwn le, a in khawm chu pumhnâk in hen â peh asi.

⁸Chun, Krispa pumhnâk in hotu nih chun a dâwnsung tla zawzawng hen Lalpa an lung le, Korin khua mi cherkhet khawm nih an theih le, an lung bâk, chun baptis an si rawh.

⁹Chun, zân ah Lalpa nih Pawl sinah chun muhtirnâk hen, "T̄ih lah le, dâisip um lo hen thu sim vima rawh;

¹⁰kei na sinah ka um asi, nganfâk pêk ding hen âukhawm na tlûnah kut an thlâk lai loh, hi khua ah hin minung cherkhet ka nei asi," a ti.

¹¹Chun, Pawl chu chunah chun an lakah Pathian thu s̄intir hen kum khat leh thla ruk a um rawh.

¹²Chun, Galio chu Akaia ram ah lal ruangrûl ah a um liauah Juda tla nih a rual hen Pawl rangah an do chiam le, lâirêlnâk ah an hawngpi le,

¹³"Hi minung hi dân lo hâwi hen Pathian sawnh ding hen mi a lêm tâwn asi," an ti.

¹⁴Chun, Pawl nih a sâng awt hen, Galio nih Juda tla sinah, Juda le tla, hi hi thil diklo thu mawh thilsual mawh tal si sele, ngelchel hen ka nan sunhsak na lai,

¹⁵sikhawmsele, thu tla, min tla nan dân thu ko asi chun nanmah nih ruat ko u, kei lam chu chu hâwi thu chu lâirêl ka duh lo," a ti.

¹⁶Chun, lâirêlnâk tophah thawk hen chun annih chu a nar na rawh.

¹⁷Chun, Greek mi zawzawng nih pumhnâk in hotu Sosthen an tleih le, lâirêlnâk tophah mâika ah chun an vuak le, Galio nih chun chubang an thilti chu zeikhawm ah a siar piak na lo.

¹⁸Chun, chu nûnah chun Pawl chu ni sâwt tak a châm ko le, Churawhchun unau tla chu hâwlh tha hen a then na le, chu thawk hen Priskili leh Akuila hen Siria ram leiah lawng hen a kal rawh. Pawl nih thutiamh a nei ruangah Kenkriai khua ah a lû a mêt ta.

¹⁹Chun, Ephesi khua chu an hawng tlung le, chunah chun annih chu a mâk na rawh. Anih lam chu pumhnâk in ah a lût le, Juda tla hen thu chiamcheriamtê hen a sim.

²⁰Chun, sâwt dauh châm ding hen an ngiar le, sikhawmsele, rem a ti lo le,

²¹"Pathian nih a siang chun nan sinah ka hawng kal nawlh lai," ti hen, hawlh tha hen an tian le, Ephesi khua thawk hen lawng hen a kal rawh.

²²Chun, lawng ah mi chu Kaisari khua ah a suak le, Jerusalem ah a va kal le, kawhmi tla chu chibai a bûk na; chu nûnah chun Antiokei khua ah a kal rawh.

²³Chun, chunah chun sâwt tak a um nûnah a kal nawlh le, thiruai tla zawzawng chu birhtir hen Galatia ram leh Phrugia ram chu a tawl thluh rawh.

²⁴Chun, Juda pakhat a min Apolo, Alekzandria khua ah a suak mi, thusim thiam tak, Ephesi khua ah chun a va kal le; anih nih chun Pathian lasui thu tla thungâi a theih.

²⁵Chu minung chu Lalpa Lampi thu leiah sîn mi asi le, thinlung ah thanem ngâi tak asi ruangah Jisu thâwnghâng chu thanuam tak hen a sim le, a sîntir na tâwn. Sikhawmsele, anih chu Johan baptis thu cho a theih.

²⁶Chun, pumhnâk in ah râltha tak hen thusim â dawmh rawh. Chun, Priskili leh Akuila nih chun a thusim an theih le, an in ah an kalpi le, a sinah Pathian Lampi thu rep khun hen an simhfiang rawh.

²⁷Chun, anih nih chun Akaia ram ah lan ding a tum kê hen unau tla nih an fawrh le, amah an lawmhnâk ding hen thiruai tla sinah lasui an rîn piak le, chun a tlung rawh chun Pathian zângfahnâk ruangah lungtu tla chu thungâi a tangpi na.

²⁸Mi zatlâng theih hen Juda tla chu a êl na le, a dawng thlo na; Pathian lasui thu mang hen Jisu kha Krist chu asi ti a theihtir na.

Thilti 19

¹Chun, Pawl nih chun saklei bial a ÷awl dih ver le, Apolo Korin khua ah a um kar khan Ephesi khua chu a tleng le, ÷hiruai tla âumawh a muh na.

²Chun, anih nih chun an sinah, nan lung tîr liau khan Thlarau Thenhlimh nan tawng ma?" a ti. Chun, annih nih chun a sinah, "Tawng lo, Thlarau Thenhlimh a um ti rerêng khawm theih khawm kan theih loh," an ti.

³Chun, anih nih chun, "Zeitin mi baptis me nan si?" a ti. Annih nih chun, "Johan baptis lakah," an ti.

⁴Chun, Pawl nih chun, Johan nih chun mi sinah 'Ka dunglei ah hawngtu ding mi, Jisu chu nan lung ding asi,' ti hen rimnâk ruangah baptisma hen a baptis tâwn asi kha," a ti.

⁵Chun, chu thu chu an theih kê hen Lalpa Jisu min hen baptis an si rawh.

⁶Chun, Pawl nih an tlûnah a kut a thâng le, Thlarau Thenhlimh chu an tlûnah a hawng tlung rawh. Chun, hawlh theih loh hen thu an sim le, Pathian thu khawm an sim rawh

⁷An ektê hen leinih an si.

⁸Chun, Pawl chu pumhnâk in ah a lût tâwn le, thla thum tiang râltha tak hen thu a sim le, Pathian Ram thu leikângah chun mi a êl le, a thlûk na tâwn.

⁹Sikhawmsele, a zeimaw mi an lungkhung le, an lung duh lo le, Lalpa Lampi chu mi zapi mâika ah an simsâwi. Churuangah Pawl nih chun a kaltâk na le, ÷hiruai tla chu a dang hen a kalpi na, nisiar hen Turana sîntirnâk in ah thuruatnâk a nei tâwn.

¹⁰Chu hâwi karo hen kum nih tiang a ti le, chun, Asia ram ah um mi zawzawng Juda tla leh Greek tla khawm nih Lalpa thu an theih rê asi.

¹¹Chun, Pathian nih Pawl kut hen thilchê nêptuai a titir lo;

¹²chun a taksa ah mi nâwtnâk puan tla mawh puanthuan tla mawh damlo tla sinah an hawng put le, an nganfâk tla a dam tâwn le, an sung thawk hen khuri tla khawm an suak tâwn.

¹³Chun, dâwi mang hen a zî lemanh mi Juda âumawh, "Pawl nih a thu a phuang tâwn mi Jisu min hen ka nan fâi asi," ti hen khuri nei tla tlûnah Lalpa Jisu min an lam nget tâwn.

¹⁴Chun, Juda mi, bawlpu lal pakhat Skeva nih chun chu hâwi ti mi fapa pasarih a nei.

¹⁵Sikhawmsele, khuri nih an sinah, "Jisu ka theih, Pawl khawm ka theih, nannih lam chu âu me nan si," a ti na.

¹⁶Chun, khuri nei nih chun a per nawh na le, an ektê hen a neh na le, chun chu in thawk hen chun takkaro leh liam hen an tek.

¹⁷Chun, Ephesi khua ah um mi zawzawng, Juda tla leh Greek tla sinah khawm chu thu chu a thang rawh le, chun an ektê hen an lâu le, Lalpa Jisu min a lian rawh.

¹⁸Chun lungtu tamtak an hawng kal le, an thilti tla chu thutluang an vâwr le, anna phuang rawh.

¹⁹Dâwithiam tamtak khawm nih an lasuibu tla an hawng put ver le, mi zawzawng mitmuh ah an duah rawh, chun a man an sût le, tangka sîng nga si hen an theih.

²⁰Chu hâwi tluk fâk hen Lalpa thu chu a zan le, a neh vima rawh.

²¹Chun, chu nûnah chun, Pawl nih Makedonia ram leh Akaia ram chu tawl rih hen, Jerusalem khua ah kal ding a thinlung a um, "Chunah ka kal thluh chun Rom khua ah ka tlâwng fâwn ding asi," a ti.

²²Chun, a rianțuantu panih, Timothe leh Erasta chu Makedonia ah a kaltir tâ na le, anih lam chu Asia ram ah a um rih.

²³Chun, chu liauah chun Lalpa Lampi ruangah Ephesi khua ah nawk rarâu hen anna nawk lo.

²⁴Minung pakhat a min Demetri tangkarua dêng hen, tangkarua hen Artemis ruk siam thiam mi tla sinah lawh kalnâk tamtak a pêk tâwn le,

²⁵chu minung nih chun annih chu a kawh na le, an riantûan hâwi tuntu tla hen chun an sinah, "Pu le tla, hi rian hi kan neihnâk asi ti nan theih,

²⁶hinah Ephesi khua cho silo hen, Asia ram pumpi ding dêng khawm, hi Pawl nih hin, 'Kut hen siam mi pathian tla hi chu pathian asi lo,' ti hen, mi cherkhet a lêm na le, anna pêk ver rawh asi ti nannih ngelchel khawm nih nan muh hen nan theih.

²⁷Chun, kan riantuan min a sia lai ti tihnung a kêi. Chu cho silo hen, pathiannu Artemis biakin khawm hi an siar lai lo. Asia ram mi zawzawng leh laikulh mi nih an sawnh tâwn mi hi a rokualnâk a nâu lai ti tihnung a kêi asi," a ti.

²⁸Chun, chubang thu chu an theih kê hen thungâi an thinrun le, "Ephesi khua ah mi Artemis hi rokual tak asi!" ti hen an âu.

²⁹Chun, a khua hen anna nawk ver rawh le, Gaia leh Aristarka, Makedonia ram ah mi, Pawl zûltu tla chu an tleih le, a rual hen zauhnuam mun ah an tekpi chiam na.

³⁰Chun, Pawl nih mi zapi lakah lût a tum le, thiruai tla nih an siang lo.

³¹Chun, Asia ram hotu chem tla lakah zeimaw mi âumawh Pawl hâwi tla an si le, a sinah minung an fial le, zauhnuam mun ah chun lût lo rarâm ding hen an lêm chiam na.

³²Chun, anna pûm mi tla chu anna nawk le, mi tam dauh nih anna pûmnâk san khawm an theih loh, churugah a zeimaw mi thu pakhat hen an âu le, a zeimaw mi thu dang hen an âu.

³³Chun, mi zapi lakah zeimaw mi nih Alekzandar mawhlonâk thu sim dân ding chu an sim le, Juda tla nih anih chu mâilei ah an tûl vima. Chun, Alekzandar nih chun a kut hen a zâp le, mi zawzawng sinah chun a mawhlonâk thu sim a tum.

³⁴Sikhawmsele, anih chu Juda mi asi ti an theih kê hen, dêrkar nih tiang thurual tak hen, "Ephesi khua ah mi Artemis hi rokual tak asi!" ti karo hen an âu.

³⁵Chun, khua ah lasui rîntu nih mi zapi a dêitir ruap na nûnah chun, "Ephesi khua mi le tla, "Artemis rokual tak biakin leh vên thawk hen ruk a tlâ mi kha, Ephesi khua mi tla hi a vêngtu nan si ti âu me theihlotu um?"

³⁶Chun, hi bang thu hi êl kho mi zât asi lo mi chu nan dêisip ding asi, thu dawn lo hen zeikhawm nan ti ding asi lo.

³⁷Hi minung tla nan hawng put na mi hi biakin râwkmang tla an si lêmlo.

³⁸Chun, Demetria leh a hâwi zungthiam tla khawm nih âu lak tal ah thupawi an nei chun, thupawi simnâk in tla chu awng chia asi khateh; lal ruangrûl khawm an um le, a salh na seh.

³⁹Thildang pawisherh nan nei asi chun pumh tâwnnâk ah an remh lai.

⁴⁰Tusûn nawktul mi ruangah hin salh ðihnungkâi hen kan um rawh hi, a phûr umlo hen; chu hâwi chu asi le, hi pumhnâk san hi zeikhawm kan sim kho awt lo hi," a ti.

⁴¹Chun, chu hâwi thu a sim thluh rawh chun anna pûm mi tla chu a ðiak tir na rawh.

Thilti 20

¹Chun nawknâk chu a reh kê hen Pawl nih ðhiruai tla a kawhtir le, a fawrh na le, hawlh ðha hen a ðthen na le, Makedonia ram ah kal ding hen a suak rawh.

²Chun, thu cherkhet ðhiruai tla fawrh vima hen chu ram chu a ðawl thluh le, Akaia ram a tleng rawh.

³Chun, chunah chun thla thum a râu nûnah Siria ram leiah lawng hen a kal awt le, Juda tla nih amah an phiar ruangah Makedonia ram pal pah hen tlung a tum rawh.



⁴Chun, Purha fapa Sopater Beria khua mi tla, Thesalonika khua mi Aristarka leh Sekunda, Derbe khua mi Gaia, Timothe leh Asia ram ah mi Tukika leh Trophima tla a sinah Asia ram tiang an kal bâk.

⁵Chubang tla nih chun hawng kan kalpi le, Troas khua ah chun hawng kan ngâk ko.

⁶Kannah lam chu sang thilnu telhlo ni zawzawng nûnah chun Philipi khua thawk hen chun lawng hen kan kal le, ni nga nûnah Troas khua ah an sinah kan tlung le, chunah chun ni sarh kan châm.

⁷Chun, ni sarh masachem ah chun sang phel ding hen kanna pûm liauah Pawl nih a thâituan ah kal a tum ruangah an sinah chiamcheriam hen thu a sim; thanṭim tiang hen thu a sim vima.

⁸Chun, kardang sâng dauh ah kanna pûmnâk ah chun khâwnvâr cherkhet a um.

⁹Chun, a min Eutuk tlangvâl pakhat langawtkawt ah a to le, a ngû leman, Pawl nih thu a sim mi a sâwt ruangah, anih chu ihmu suak a diarh kholo le, in chuanh thum thawk hen a tlâ le, a ruak hen an sar.

¹⁰Sikhawmsele, Pawl a va ṭum le, a pawm le a lawh. Anih nih chun, "Lawksawng lah u," "a nûkri a chat lo rih!" a ti.

¹¹Chun, Pawl chu a kâi nawlh le, sang chu a phel le, buh a ei. Sâwt tak khuadei tiang hen an sinah thu a ruat, chun chu nûnah chun a kal rawh.

¹²Chun, tlangvâl chu in leiah dam hen an kalpi le, thungâi an lungngam rawh.

¹³Chun, kannah lam chu lawng ah kan kal rawh le, Aso khua fûk ding hen lawng hen chun kan suak masa le, chu lakah chun Pawl chu chuantir rih ding kan tum; anih lam nih chun kê hen kal a tum ruangah chu hâwi hen amah nih a ruat rerêng asi.

¹⁴Chun, Aso khua ah hawng kan tawng rawh chun lawng ah kan chuantir le, Mitulini khua kan tleng.

¹⁵Chun, chu thawk hen chun lawng hen kan kal nawlh le, a thâituan ah chun Kio tikulh zâwn kan tleng; chun a thâituan ah Samo tikulh kan pal le, chun a thâituan ah chun Miletî khua kan tleng nawlh.

¹⁶Chun, Pawl nih Asia ram ah um sâwt a duh lo ruangah Ephesi khua chu lanh a tum chia rêng asi, tikho asi chun Jerusalem khua ah Pentekost ni tanh a tum le, kal â nam asi.

¹⁷Chun, Miletî khua thawk hen chun Ephesi khua ah mi a fial le, kawhmi upa tla a tawng ding hen a sinah a kawhtir.

¹⁸Chun, a sinah an hawng tung rawh chun an sinah, "Asia ka tlâwng tîr ni thawk hen khan nan sinah ka um sung zawzawng ka umzia nan theih;

¹⁹mi tangah dawnh bû hen leh Juda tla nih an hawng ka phiar ruangah mitthli tlâk leh thil hamhkâi ka tlûnah a hawng um mi tuar bû hen Lalpa rian ka t̄uan tâwn kha.

²⁰Kha hâwi hen khan a t̄atvahnâk thu nan sinah zeikhawm sim ka s̄um lo le, mi zatlâng lakah leh in kipah ka nan s̄intir na tâwn kha.

²¹Juda tla leh Greek tla sinah khawm Pathian leiah thinlung lêtirnâk thu leh kan Lalpa Jisu Krist leiah lungnâk thu ka theihtir tâwn kha.

²²Chun, theih u, tuhin thinlung ah kal lo kholo hen ka theih ruangah Jerusalem khua ah ka kal awt hi, chunah chun ka lakah thil hawng tung ding rî ka theih loh.

²³Thlarau Thenhlimh nih, 'Phuarnâk leh hamhnâk nih a nan dawng,' ti hen khuakip ah a hawng ka theihtir tâwn, chubang cho chu ka theih asi.

²⁴Sikhawmsele, ka tekzuamnâk lampi ka mabân lîm ding leh Pathian zângfahnâk Thâwngthâng T̄ha theihtir ding hen, Lalpa Jisu sinah kha bang rian̄tuannâk rian ka tawng mi kha t̄uan dih tâ sele ka nungnâk khawm unh tlâk ah ka ruat lo.

²⁵Chun, theih u, nannih zawzawng, Pathian Ram thu phuang vima hen ka sawk leman̄g tâwnnâk tla nih hin ka mêl nan muh lai lo rawh ti ka theih.

²⁶Churuangah mi zawzawng thisen ah ka buah lo asi ti tusûn ah ka nan theihtir na.

²⁷Pathian ruat zawzawng a ektê hen nan sinah simh kê sôm lo kha.

²⁸Pathian kawhmi tla amah thisen hen a châwk mi tla chu châwm ding hen nanmah tla leh nan ho na mi tla zawzawng tlûnah a thiamthih u, Thlarau Thenhlimh nih an tlûnah hotu ah a nan siam na asi.

²⁹Ka kal nûnah chingngia râng tla nan lakah a hawng lût lai le, murui tla an zuah lai loh ti ka theih.

³⁰Nan lakah mi ngelchel khawm thiruai le tla nih nan sinah kawptir ding hen thu dang sim hen nan hawng um lai.

³¹Churuangah ruat tet u; kum thum thlo mitthli tlâk bû hen, a sôn a zân hen mikip nunsimh ka bâng lo kha, theihkumza u.

³²"Tuhin Pathian leh a zângfahnâk thu ah ka nan kiltir na hi, chu nih chun a nan thangtir kho na lai, mi thinlung thenhlimh tla lakah malsawmnâk a nan neitir kho na lai.

³³Âu tangka khawm, ngûn tla, nipuan tla ka ngarh dahlo kha.

³⁴Hi kut tla nih hin kei leh ka hâwi tla pawisherh a suah tâwn kha nanmah tak nih nan theih.

³⁵Zeizawng ka ti mi vial zûn ka nan zauhtir na tâwn kha, chubang hâwi hen hamh tak a tjan bû hen Lalpa Jisu thu theihkumza bû hen mi chaklo tla nan tangpi ding asi; amah ngelchel nih, "Zeilo lâk lei ngâk hen pêk lei a tha dauh," a ti.

³⁶Chun, chu hâwi thu chu a sim thluh rawh chun a siksidîr le, an ektê hen thla a champi na.

³⁷Chun, an ektê hen an tap chiam le, an ir leh Pawl ir tawnh hen anna châwchawk chiam le,

³⁸a mêl an muh nawlh lo ding mi thu a sim mi chu an ngaihsiatnâk chem asi. Chun, lawng tiang hen amah an thlah rawh.

Thilti 21

¹Chun, annih tla hen kanna ðhen le, lawng hen kan kal le, chu nûnah chun ding zar hen Kos tikulh kan tleng le, chun a thâituan ah Rodi tikulh kan tleng nawlh le, chu thawk hen kan kal vima le, Patara khua kan tleng.

²Chun, Phoiniki ram ah lan ding lawng pakhat kan tawng le, kan kal vima.

³Chun, Kupra tikulh kan muh le, simlei kâng hen kan lanh le, Siria ram leiah kan kal vima. Tura khua ah chun tlâng ah kan suak tâ rih le, chunah chun lawng ah mi thil thiar ding asi.

⁴Chun, ðhiruai tla kan hâwl na le, chunah chun ni sarikh kan châm. Chun, annih nih chun Thlarau simh hen Pawl sinah Jerusalem khua pal lo ding an ti.

⁵Sikhawmsele, chubang nûnah chun kan suak le, kan kal rawh. Unau tla nih chun an ektê an nupi fatê tla hen dâilêng tiang hen hawng kan thlah. Chun, tisumsumriat kap ah chun kanna siksidi le, thla kan cham ta.

⁶Chun, "Dam tak hen," kanna ti le, lawng ah chun kan a chuan le, annih lam chu an in leiah an lâwi nawlh rawh.

⁷Chun, Tura khua mi lawng ah kan kal rawh chun Toilemai khua kan tleng le, unau tla chibai kan bûk na le, an sinah nikhat kan châm.

⁸Chun, a thâituan ah chun kan suak le, Kaisari khua kan tleng. Chun, Thâwngthâng T̄ha simtu Philip in ah kan lût le, anih chu pasarih tla lakah pakhat kha asi, a sinah kan châm.

⁹Chu nih chun fanu pali a nei le, nungâk thenhlimh an si le, Pathian thu an sim tâwn.

¹⁰Chun, chunah chun ni cherkhet kan châm le, chu liauah chun Judai ram ah mi a min Agaba khuavâng pakhat a hawng.

¹¹Chun, kan sinah a hawng kal le, a kê tla, a kut tla amah nih â phuar le, chun " 'Jerusalem khua ah Juda tla nih hi hâwi hen hi tâisâwm neitu hi an

phuar lai le, Phundang tla kut ah an pêk lai,' Thlarau Thenhlimh nih a ti," a ti.

¹²Chun, chubang thu chu kan theih kê hen kannih leh chu khua mi tla nih chun Pawl chu Jerusalem khua ah kal lo ding hen kan ngiar chiam.

¹³Chun, Pawl nih a sâng le, "Zeirangah nan ÷ap le, nan ka ngaihsia tir? Lalpa Jisu min ruangah chun Jerusalem khua ah phuar cho tâwk ka ti lo le, thih khawm ka iam asi," a ti.

¹⁴Chun, lêm kho asi lo nûnah chun, "Lalpa thu thu si seh," kan ti le, kan bâng rawh.

¹⁵Chu nûnah chun kan thilri kan timh le, Jerusalem khua ah kan kal.

¹⁶Kaisari khua mi ÷hiruai tla âumawh kan sinah an hawng bâk le, annih nih chun a min Nason, ÷hiruai masa murui Kupra tikulh ah mi pakhat kan tlungnâk in ding dâwngpupa chu an put bâk.

¹⁷Chun, Jerusalem khua ah kan tlung rawh chun unau tla nih lâwm tak hen hawng ka dawng.

¹⁸A thâituan ah chun Pawl le hen Jem va veh ding hen kan kal; chunah chun kawhmi upa tla zawzawng khawm an um.

¹⁹Chun, Pawl nih annih tla chu chibai a bûk thluh na nûnah chun a rianñuannâk mang hen Pathian nih Phundang tla sinah thil a titir mi vial chu a kipkâwi hen a sim.

²⁰Chun, unau tla nih chun chubang thu chu an theih hen Pathian an chawnglawmh; chun Pawl sinah, "Unaupa, Juda tla lakah lungtu tla tam zia na muh le, an ektê hen Dân leiah ÷hanem an ngâi asi.

²¹Chun, nannih Phundang tla lakah Juda um tla zawzawng sinah chun an fa tla fêmtan lo ding leh dân hâwi hen um lo ding ti hen, Mosi Dân mâktâknâk na sîntir na tâwn ti, mi kê ah na thu hi an theih.

²²Zeitin me silai rawh ne? Na hawng tleng ti an theih awt ko dangâiah.

²³Churuangah na sinah kan sim hâwi hen ti le: Thutiam nei mi, mi pali kan sinah an um;

²⁴chu tla chu kalpi na le, an sinah va a thianh bâk le, an lû an mêt khonâk ding hen an rangah thil hêu rawh. Chun, mi zawzawng nih mi kê ah na thu an theih mi vial kha thudik asi lo ti an theih lai le, nangmah ngelchel khawm Dân zûl hen rep tak hen na um bâk ti an theih awt asi.

²⁵Phundang tla lakah lungtu tla leikâng thu chu ruk sawnhnâk thil leikângah, sa rawm dît hen thah mi ei leikâng leh pung leikângah anna thliar ding asi ti hen kan rêl le, kan rîn rawh kha," an ti.

²⁶Chun, a thâituan ah chun Pawl nih mipa tla chu a kalpi na le, an sinah a va a thianh bâk, Pathian Biakin ah chun a lût le, an rangah sa thah chiau ding a pêk na lân lo chu thianhnâk ni an nei awt rih ti, bawlpu sinah an simhkan.

²⁷Chun, ni sarìh chu a tling awt bâiah Asia ram ah Juda tla nih chun Pawl chu Pathian Biakin ah chun an muh le, zapi zawzawng an fawrh na le, anih chu an tleih le, an âu.

²⁸"Israel mi le tla!" hawng kan bawmh u!"Hi minung hi ram kipah mi zawzawng sinah Juda tla, Mosi Dân leh hi Pathian Biakin simsiattu kha asi; chu lo khawm Pathian Biakin ah hin Greek mi tla khawm a lutpi le, hi mun thenhlimh hi a nawmh rawh asi," an ti.

²⁹(Chu lânah khua ah chun Ephesi khua mi Trophima chu a sinah an muh le, Pawl nih chu minung chu Pathian Biakin ah a lûtpi asi ti hen an ruat asi.)

³⁰Chun, khua tê hen an châng sup le, minung tla chu an tek le, Pathian Biakin ah mi an nûk zek le, in an khâr sawm.

³¹Chun, anih chu thah an awt liauah chun Jerusalem khua mi anna nawk ti thu chu kawrsen murui hotu lianchem sinah an va thanh.

³²Chun, anih nih chun kawrsen tla leh kawrsen hotu tla a kalpi sawm na le, an sinah tek hen an va tum le; chun annih nih chun hotu lianchem leh kawrsen tla chu an muh kê hen Pawl an vuak mi chu an bâng rawh.

³³Chun, hotu lianchem nih chun a hawng naih le, Pawl chu a tleih le, chikchîn panih hen khih ding thu a pêk le, âu me asi, zeï se a ti, ti a deih.

³⁴Chun, mi zapi lakah mi khing chu thu khat hen an âu le, mi khing chu thu dang hen an âu; chun an nawktul ruangah a ti zia a theih lo le, kulh sungah kalpi ding thu a pêk.

³⁵Chun, Pawl nih leilâk a tleng liauah mi zapi an rothawk zia a fâk ruangah kawrsen tla nih anih chu an châwi vima le;

³⁶mi zawzawng nih veih ko u," ti hen an âu le, an zûl dutmat.

³⁷Chun, Pawl chu kulh lakah an kalpi awt liauah anih nih chun kawrsen hotu lianchem sinah chun, "Na sinah ah thu kê khat ka sim kho lai ma?" a ti. Chun, anih nih chun, Greek hawlh na theih na maw?" ti hen a deih.

³⁸"Tuan ah, mi tla fawrh hen, mi thah mang tla sâng li ramkaro ah kalpitu tla Aigupta ram ah mi kha na si lo mazei?" a ti.

³⁹Pawl nih chun Juda mi, Kilikia ram ah Tarsa khua mi ka si, khua salam ah um mi ka si lo, hawng ka zângfah le, mi zawzawng sinah thu hawng ka simtir rawh," a ti.

⁴⁰Chun, rem a ti ka hen Pawl chu leilâk ah a dîr le, mi zawzawng dâisipnâk ding hen a kut a zâp; chun an dâiruap kê hen Hebrai hawlh hen an sianh:

Thilti 22

¹Unau le tla, pa le tla, tuah nan sinah ka mawhlonâk thu ka sim awt mi hi ngâinik u," a ti.

²Chun, Hebrai hawlh hen an sinah thu a sim ti an theih kê hen an dâiruap; chun, anih nih chun,

³Juda mi ka si, Kilikia ram ah Tarsa khua ah suak mi ka si, sikhawmsele hi khua ah hin Gamaliel sinah sîn hen t̄hanglian ka si. Kan thlâktu tla Dân umzia kerme tatak chu sîn tâwn hen um mi ka si, tusûn ah nanmah hâwitê hen, Pathian rangah semse ngâi bâk mi ka si.

⁴Chun, hi leikâng zûltu tla hi thah ding rê hen ka nehsawh na tâwn le, nunau mipa hen ka phuar tâwn le, rêngin ah ka khumhtir na tâwn.

⁵Bâwlpu lalchem leh upa tla zawzawng khawm nih chubang thu chu an hawng ka theihpi kho, an sinah mi unau tla rangah pêk ding hen lasui ka tawng le, chun Damaska khua ah um mi vial an rêp na ding hen, phuar bû hen Jerusalem khua ah kalpi na ding hen ka kal kha.

⁶"Chun, ka kal le, Damaska khua kiang ka tlung rawh chun sîn ah nî sunh liauah, lâkkhat ko ah vîn thawk hen chêu fâk tak ka kiangkam a hawng cherh pup.

⁷Chun, tual ah ka tlû le ka sinah, "Sawl, Sawl, nangnih zeirangah na ka nehsawh?" ti hen hâu ka theih.

⁸Chun, kei nih, 'Lalpa âu me na si?' ti hen ka sâng. Chun, anih nih chun, 'Nazareth Jisu, na nehsawh mi ka si,' a ti.

⁹Chun, ka hâwi tla nih chun chêu chu an muh narêng hen hawng ka sawnhtu hâu lam chu an theih loh.

¹⁰Chun, kei nih, 'Lalpa zei me ka ti lai?' ka ti. Chun, Lalpa nih chun ka sinah, 'Thawk le, Damaska khua ah lût rawh, thil zawzawng na ti ding hen ruat mi zawng a nan simh lai,' a ti.

¹¹Chun, chêu rokual ruangah chun khua ka muh kho lo le, ka hâwi tla nih kut hen an hawng ka ruai le, Damaska khua ah ka lût rawh.

¹²"Chun, mi pakhat Anania, Dân leikângah Pathian sunhsak mi leh Damaska khua ah um mi Juda tla zawzawng nih an zah thlo mi pakhat chu ka sinah a hawng kal le,

¹³ka kiangah a dîr le, ka sinah, 'Ka nau Sawl, mitdeinâk nei rawh,' a hawng ka ti. Chun, chu liau takah chun amah chu ka muh rawh.

¹⁴Chun, anih nih chun, 'Kan thlâktu tla Pathian nih a duhzia theih tu a leh mi rep to-aw tak chu muh hen, a hawlkhâ theih tu khawmah a nan ruat rawh.

- ¹⁵Na muh leh na theih mi thu lak khan mi zawzawng sinah amah thu theihpitu na si lai.
- ¹⁶Chun, zeirangah me na um ko? Thawk le, a bap̄tis le, na sual na t̄awl thiang ding hen a sinah thlacham rawh,' hawng ka ti.
- ¹⁷Chun, Jerusalem khua ah hin ka tung n̄nah Pathian Biakin ah thla ka cham liauah, muhn̄ak nei hen ka um le,
- ¹⁸chun, 'A nam le, Jerusalem khua mi suak rawh, ka th̄awngth̄ang na sim ding mi chu an lung awt lo hi,' a hawng ka ti liau ka muh.
- ¹⁹Chun, kei nih 'Lalpa, pumhn̄ak in kipah a nan lungtu tla zawng chu r̄engin ah ka khumh na le, ka vuak na t̄awn mi kha an theih ko asi.
- ²⁰Chun, na thu theih tu Stephen an suah liauah khan kei khawm a kiangah ka d̄ir le, rem ka ti le, a thahtu tla puan khawm ka kil piak na asi,' ka ti.
- ²¹Chun, anih nih chun, 'Kal rawh, hi thawk hen l̄at takah Phundang tla sinah ka nan fial dauh lai,' hawng ka ti rawh," a ti.
- ²²Chun, chu tiang chu a nḡai le, chun h̄au f̄ak tak hen, "Hi bang h̄awi mi hi laikulh thawk hen tl̄autir u; nung tl̄ak asi lo," an ti rawh.
- ²³Chun, an âu le, an puan tla an l̄it le, an lawnh le, valeidip an vawrh le;
- ²⁴chun, kawrsen hotu lianchem nih Pawl chu kulh sungah kalpi ding thu a p̄ek, a tl̄unah chu h̄awi tluk an âun̄ak san chu theih ding hen vuak ding a ti.
- ²⁵Chun, savun ri hen an phuar thluh n̄nah Pawl nih a kiangah d̄ir mi kawrsen z̄a hotu sinah, "Rom mi rer̄eng nan vuak kho ma si, mawhtir rawh mi khawm silo hen?" a ti.
- ²⁶Chun, kawrsen z̄a hotu nih chun chu chu a theih k̄a hen kawrsen hotu lianchem sinah a kal le, "Na thilti ding hi thiamthih r̄au rawh. Hi minung hi Rom mi asi," a ti.
- ²⁷Chun, kawrsen hotu lianchem chu a va kal le, a sinah, "Rom mi na si ma? hawng ka simh rawh," a ti. Chun, Pawl nih chun, "Ka si," a ti.

²⁸Chun, kawrsen hotu lianchem nih chun, "Chu khua mi si ding hen kei lam chu tangka cherkhet ka hêu asi," a ti le a sâng. Chun, Pawl nih chun, "Kei lam chu Rom mi rerêng ah suak ka si," a ti.

²⁹Chun, Pawl rangah salh tumtu tla nih chun anih chu an kaltâk rawh; kawrsen hotu lianchem khawm nih Rom mi asi ti a theih rawh chun a lâu, a phuar ruangah a lâu khun.

³⁰Chun, a thâituan ah chun, Juda tla nih zeiruangah me Pawl an phûm ti theihfiang ding hen kawrsen hotu lianchem nih chun anih chu a sût le, bâwlpu lal tla leh lâirêltu zawzawng tla pumh ding thu a pêk le, Pawl chu a kalpi le, an mâika ah a dîrtir rawh.

Thilti 23

¹Chun, Pawl nih lâirêltu tla chu a zauh ko na le, "Unau le tla, tusûn tiang hen Pathian mitmuh hen thatnâk lei ka theih mi ti hen ka um tâwn," a ti.

²Chun, Bâwlpu Lalchem Anania nih chun Pawl kiangah dîr mi tla sinah a kê ah bengah piak ding thu a pêk.

³Chun, Pawl nih a sinah, "Nang vâm buah ngo pa, Pathian nih a nan bengah dauh lai; nang Dân hâwi a lâi na ka rêl piak ding hen na to le, Dân lo hâwi hen bengah ding na hawng ka ti asi mu?" a ti.

⁴Chun, a kiang ah mi tla nih, "Pathian Bâwlpu Lalchem na fâi mu?" an ti.

⁵Chun, Pawl nih, "Unau le tla, Bâwlpu Lalchem asi ti ka theih loh asi; 'Na unau tla hotu tlûnah thu thalo sim lah, ti hen khawm rîn asi,'" a ti.

⁶Chun, Pawl nih a zeimaw mi chu Sadukai tla, a zeimaw mi chu Farisai tla an si ti a hawng theih hen lâirêltu tla lakah chun a âu le, "Unau le tla, Farisai fapa khawm ka si; mithi lungumnâk leh thawknawlnhâk thu ah salh hen ka um asi hi," a ti.

⁷Chun, chu thu a sim thluh rawh chun Farisai tla leh Sadukai tla anna êl le, anna then.

⁸Sadukai tla nih, "Mithi thawknawlnhâk rêng a um lo, vânmifial khawm a um lo; thlarau khawm a um lo," an ti tâwn. Farisai tla lam nih chun a kâng thum hen a um asi ti an lung.

⁹Chun, thungâi anna nawk rawh; Farisai leiah mi Dân sîntirtu tla zeimaw mi an dîr le, an êl, "Hi minung hi a sualnâk zeikhawm kan theih loh; thlarau khawm nih vânmifial khawm nih hawng kan sawnh menza khawmsele ze me pawî lai?" a ti.

¹⁰Chun, anna êl dadauh ruangah kawrsen hotu lianchem nih Pawl an dawh dip lai ti a ÷ih le, kawrsen tla sinah va kal hen an lakah mi kulh sungah zângrah ko hen kalpi ding a ti.

¹¹Chun, zân ah chun Lalpa chu Pawl kiangah a dîr le, "Lungngam tak hen um rawh, Jerusalem khua ah ka thu na theihtir hâwi ber hen Rom khua khawm na theihtir ding asi," a ti.

¹²Chun, nî a suak hen Juda tla chu thu anna rual le, Pawl an thah lân lo chu zeikhawm temlo ding hen siat anna sirh.

¹³Chu thu lakah phiartu tla chu sâwmli ngâk a tam an si.

¹⁴Chun, annih chu bâwlpu lal tla leh upa tla sinah an kal le, "Pawl kan thah lân lo chu zeikhawm temlo ding hen siat kanna sirh ver asi.

¹⁵Churugah nannih nih lâirêltu tla hen a thup hen a thu rep khun a ruat tum hâwi hen nan sinah hawngpi ding hen kawrsen hotu lianchem sinah pheh zâu hen va sim u; nan kiangah a hawng tlung lânah kannih amah thah ding hen kanna râring ko," an ti.

¹⁶Sikhawmsele, Pawl farnu fapa nih an bawh mi thu a theih le, kulh sungah chun a lût le, Pawl chu a va simh.

¹⁷Chun, Pawl nih chun kawrsen zâ hotu pakhat a kawh le, "Hi tlangvâl hi hotu lianchem sinah kalpi rawh; a sinah thu zeimawh sim ding a nei asi lai," a ti.

¹⁸Chun, kawrsen hotu lianchem sinah a va kalpi le, "Pawl rêngtlâ nih khan a hawng ka kawh le, hi tlangvâl hi na sinah hawngpi ding hen a hawng ka fial le, na sinah thu zeimawh sim ding a nei asi lai," a ti.

¹⁹Chun, kawrsen hotu lianchem nih chun a kut ah a tleih le, a dangah a kalpi, a thup hen, "Zei me hawng ka simh ding na nei?" ti hen a deih.

²⁰Chun, anih nih chun "Pawl thu chu rep dauh khun hen na ruat ding hâwi hen a thâituan ah lâirêltu tla sinah kalpi ding hen Juda tla nih deih ding hen rem an ti khap.

²¹Sikhawmsele, an thu lung lah le, an lakah minung sâwmli ngâk a tam nih an bawh ko le, chubang tla nih chun amah an thah lân lo chu zeikhawm tem lo ding hen siat anna sirh; tuhin na thu ngâk hen tîm chia zet hen an um ko asi," a ti.

²²Chun, kawrsen hotu lianchem nih chun tlangvâl chu a kîrtir le, "Hi bang thu na hawng ka theihtir mi hi âukhawm simh lah a ti thlir.

²³Chun, kawrsen zâ hotu panih a kawh le, "Zân dâr kua ah Kaisari khua tiang kal ding hen kawrsen zanih hen, rang tlûnah chuan murui sâwmsarih hen, fei put mi zanih hen a tîm u," a ti.

²⁴Chun, Lâirêltu Felik sinah chun him tak hen an tlungtir khonâk ding hen Pawl chuannâk ding hen rang tla timhtuah ding a ti na.

²⁵Chun, hi hâwi hen lasui a rîn le:

²⁶"Klaudia Lusia nih Felik Lâirêltu ÷ha chem chibai a bûk.

²⁷Hi minung hi Juda tla nih an tleih le, an thah awt liauah an sinah kawrsen tla ka kalpi na le, Rom mi asi ti ka theih le, ruang ka suah rawh.

²⁸Chun, an phiarnâk san theih ka duh le, lâirêltu tla sinah ka kalpi le,

²⁹chun an dân thu zeï lakah mawh an phiar asi ti ka theih le, sikhawmsele an phiarnâk thu lakah thihnâk leh phuarnâk phah rê ding hen zeikhawm ka theih loh.

³⁰Chun, Juda tla nih amah an bawh ti, mi nih an hawng ka simh kê hen na sinah amah hi ka hawng fial sawm rawh asi, a phiartu tla khawm a tlûnah thupawi an nei mi vial na mâika ah sim ding hen thu ka pêk na," ti hen.

³¹Chun, kawrsen tla nih chun a thupêk hâwi hen chun Pawl chu, chu zân ah an kalpi le, Amtipatris khua an tlengpi.

³²Chun, a thâituan ah chun rang tlûn chuan mi tla chu a sinah kal vima ding hen an kaltâk na, kulh sungah chun an kêr nawlh rawh.

³³Chun, annih chu Kaisari khua chu an tleng le, Lâirêltu sinah lasui chu an pêk le, Pawl khawm a mâika ah an dîrtir.

³⁴Chun, Lâirêltu nih lasui a rêl thluh rawh chun Pawl umnâk ram a deih. Chun, Kilikia ram ah mi asi ti a theih kê hen,

³⁵"An phiartu tla khawm chu an hawng tleng tikah na thunawk chu ka ruat lai," a ti. Chun, Herod in ah vêng ding thu a pêk.

Thilti 24

¹Chun, a ni nga nâk ah Bâwlpu Lalchem Anania a hawng tleng le, upa âumawh tla hen, a min Tertulla thusim thiam pakhat hen; chun, Pawl tlûnah thupawi chu Lâirêltu Felik sinah an sim.

²Chun, Pawl chu an kawh nûnah chun Tertulla nih chun amah phiar a dawmh:

³"Felik ðha chem, nangmah zârah thungâi kan lungngam ruangah leh na zauhkhenhnâk ruangah hi phun tla hi sual tla ðha tak hen khap hen a um tâwn ruangah, zeî mun zawngh lungâwi tak hen kanna lâwm tâwn.

⁴Sikhawmsele, na rangah nengtawr kêi tuk si ding ka duh lo le, na nunnêmnâk hen thu kê khat lam chu na hawng ka ngâi piak ding hen ka nan ngiar asi.

⁵Hi minung hi mi huatkâi tak, laikulh ah Juda murui zawzawng nawktirtu leh Nazaret murui tla lakah an lupû chem pakhat asi ti kan theih le;



⁶Pathian Biakin nawmh ding a tum le, churuangah kan tleih asi; kan dân hâwi hen a lâi kan rêl ding asi.

⁷Sikhawmsele, kawrsen hotu Lusia nih kan kut thawk hen zâng hen a lâk le, phiartu tla chu na mâika ah hawng ding hen thu a pêk.

⁸Nangmah ngelchel nih salh hen kan phiarnâk thil zawzawng hi amah lakah na theih kho lai," a ti.

⁹Chun, Juda tla khawm nih chun, "Chubang thu chu chu hâwi asi," ti hen an bawppi bâk.

¹⁰Chun, Lâirêltu nih chun thu sim ding hen Pawl chu a simh kê hen Pawl nih chun: "Nang kum tamtak hi phun tla lâirêl piaktu na si ti ka theih ruangah lâwm tak hen ka mawhlonâk thu ka sim awt," a ti.

¹¹Jerusalem khua ah Pathian sawnh ding hen ka kalnâk thawk hen ni leinih lêm asi lai lo rih ti na theih ko lai.

¹²Pathian Biakin khawmah, pumhnâk in khawmah, khua khawmah âukhawm ka êl na mi leh mi zapi ka fawrh mi annih nih an ka muh lo.

¹³Tu khawmah an ka phiarnâk thu hi nangmah theih ah a bul an zâwt kho lai loh.

¹⁴Sikhawmsele, hi thu hi na sinah ka phuang lai, 'murui dang,' an ti mi leikâng dân hâwi hen hawng kan thlâktu tla Pathian ka sawnh tâwn--Dân leh khuavâng tla lasuibu ah rîn mi zawzawng lung hen.

¹⁵Chun, mi rep tla leh replo tla thawknawlnhâk a um lai ti Pathian leiah ka lungum le, hi bang tla khawm nih hin chubang tla chu an lung bâk.

¹⁶Churuangah chun Pathian leikângah leh minung leikâng khawmah thinlung sual lo ding ko hi kil kumza ka tum tâwn asi.

¹⁷Chun, kum tamtak nûnah hin ka phun tla sinah thil pêk ding leh sa thah ding put hen ka kal.

¹⁸Chun, chubang thil ka pêk liauah chun mi zapi tello hen, a chaih tul hen Pathian Biakin ah thenhlimh hen an hawng ka muh.



¹⁹Sikhawmsele, chunah chun Asia ram ah mi âumawh an um kha, chubang tla nih chun ka tlûnah thu an nei chun hin ah hin na mâika ah um hen an hawng ka phiar ding asi.

²⁰Asi lo leh, hi bang mi ngelchel nih hin lâirêltu mâika ah ka dîr liauah ka sual mi zeï me an muh sim na seh,

²¹hi thu kâ khat ruangah hin asi lêm lo chun an lakah dîr hen, "Mithi thawknawlnâk thu lakah tusûn ah hin nan mâika ah salh hen ka um asi,' ka ti kha," a ti le a sâng.

²²Chun, Felik nih chun Thu umdân chu a theihfiang dauh ruangah "Kawrsen hotu lianchem Lusïa chu a hawng tleng tikah nan thu chu ka thlûk lai," ti hen a sïah rawh.

²³Chun, dâwt dauh hen a hâwi le nih rian an ÷uan piak mi khap lo hen vêngtir ding hen kawrsen zâ hotu sinah thu a pêk.

²⁴Chun, ni zeïmaw zat nûnah Felik chu a nupi Drusila, Juda nunau hen an hawng. Pawl chu a kawhtir le, Krist Jisu lungnâk thu chu a ngâi.

²⁵Chun, Pawl nih chun repnâk thu tla, sûmnâk thu tla, lâirêlnâk hawng um ding mi thu tla chiamcheriam hen a sim liauah Felik chu thungâi a lâu le, "Kal ko rih, a dêngkhâwng tik zawngah ka nan kawh lai," a ti.

²⁶Pawl nih tangka a pêk ding a lungum le, churuangah chun zinh dauh hen a kawh le, a sawnh tâwn asi.

²⁷Sikhawmsele, kum nih nûnah Porkia Festa nih Felik chu a thleng rawh, chun Felik nih chun Juda tla lakah min ÷at a duh le, Pawl chu phuar chia hen a mâk rawh.

Thilti 25

¹Chun, Festa nih chun ram chu a awp rawh le; chun, ni thum nûnah Kaisari khua thawk hen Jerusalem khua ah a va kal.

²Chun, bawlpu lal tla leh Juda upa tla nih chun a sinah Pawl thâwngthâng chu a sia leikâng an theihtir.

- ³Jerusalem khua ah Pawl hawng kalpi ding hen zângfahnâk Festa rangah an deih chiam le, lampi ah bawh hen thah an tum.
- ⁴Sikhawmsele, Festa nih chun, "Pawl chu Kaisari khua ah an vêng ko le, kei khawm sâwtlo tê ah ka tung awt.
- ⁵Churuangah chu minung nih sualnâk a ti chun nan lakah hotu tla hawng ka zûl na sele, phiar u seh," a ti le a sâng.
- ⁶Chun, Festa chu an lakah ni riat mawh ni râ lêm a châm lo le, Kaisari khua ah a tung nawlh rawh. Chun, a thâituan ah chun lâirêlnâk tophah ah a to le, Pawl chu hawngpi ding hen thu a pêk.
- ⁷Chun, Pawl chu a hawng tleung rawh chun Jerusalem khua thawk hen an hawng kal mi Juda tla chu a kiangah an dîr le, a tlûnah thupawi cherkhet rit tak an sim le, a thu phûr chu an sût kho lêm lo.
- ⁸Pawl nih chun a mawhlonâk thu a sim le, "Juda tla Dân tlûnah, Pathian Biakin thu lakah Kaisar tlûn khawmah thil rerêng ka soal loh," a ti.
- ⁹Sikhawmsele, Festa nih chun Juda tla lakah min that a duh le, Pawl sinah chun, "Jerusalem khua ah va kal le, khinah ka mâika ah hi bang thu hi ruat ding na duh ma?" a ti le a sâng.
- ¹⁰Pawl lam nih chun, "Kaisar lâirêlnâk tophah mâika ah lâi na ka rêl ding lakah ka dîr mi hi; Juda tla tlûnah thil zeikhawm ka soal lo, nang khawm nih chu chu thungâi na theihfiang.
- ¹¹Misual ka si hen thihnâk phah rê hen thil ka ti asi chun thih khawm ka êl loh. Sikhawmsele, hi bang an hawng ka phiarnâk thu hi a phûr zeikhawm a um lo chun âukhawm nih an sinah an hawng ka pêk kho lai loh. Kaisar sinah ka tlunh lai," a ti.
- ¹²Chun, Festa nih chun lâirêlpitu tla a sawnh thluh rawh chun, "Kaisar sinah tlunh na tum chun, Kaisar sinah na kal ko lai ma chu," ti hen a sâng.
- ¹³Chun, ni zeimaw zat nûnah chun lalchem Agripa leh Berniki chu Kaisar khua ah an hawng tung le, Festa chibai an bûk.

¹⁴Chun, ni cherkhet an châm ruangah Festa nih chun Pawl thunawk chu lalchem sinah chun a sim le:

¹⁵"Felik nih khan mitâng âumawh a mâk le, Jerusalem khua ah ka um liauah khan bâwlpu lal tla leh Juda upa tla nih a thâwnghâng an hawng ka simh le, mawhtir ding hen an ngiar.

¹⁶Chun, kei nih an sinah, 'An phiar mi leh a phiartu tla chu anna tawng le, an phiarnâk lakah a mawhlonâk thu simnâk a remkâng â tawng lân lo chu mi rerêng rêp ding leh salh hi Rom khua mi dân asi lo,' ti hen ka sâng.

¹⁷Chun, hinah an hawng tlung rawh chun sâwt chiam lo hen a thâituan ah chun lâirêlnâk tophah ah ka to le, chu minung chu hawngpi ding hen thu ka pêk.

¹⁸Chun, a phiartu tla an dîr liauah ka ruat tluk hen a tlûnah a sualnâk thupawi zeikhawm an sim kho lo.

¹⁹An phung-leh-lam dân tla leh Jisu, mi pakhat thi rawh mi, Pawl nih chun 'A nung nawlh asi,' ti hen a sim le, chu hâwi ruangah a tlûnah thunawk tla an nei asi dauh.

²⁰Chun, kei nih chubang thu tla chu ruat ding châng rêng ka theih lo le, Jerusalem khua ah kal hen, khinah chubang thu ruat ding a duh leh duhlo ka deih.

²¹Sikhawmsele, Pawl nih chun lalchem lâirêl piak a ngiar dauh le, churugah Kaisar sinah ka kaltir kho lân lo chu vêng ding hen thu ka pêk," a ti.

²²Chun, Agripa nih chun Festa sinah chun, "Kei khawm chu minung thusim chu ngâi ka duh tâwn asi," a ti. Chun, Festa nih chun, "Thâi ah a thusim na ngâi bâk lai," a ti.

²³Chun, a thâituan ah chun Agripa leh Berniki chu rokual tak hen an hawng kal le, thusimnâk in ah an lût le, kawrsen hotu lian tla hen leh khua ah mi tha dadauh tla hen; chun, Festa thu hen Pawl chu in sungah an hawngpi rawh.

²⁴Chun, Festa nih chun, "Lalchem Agripa leh hinah kan lakah um zawzawng tla: Hi minung nan muh mi hi asi a thâwnghâng Juda tla zawzawng leh Jerusalem mi tla nih ka sinah phiarnâk an hawng tlunh mi kha. Chun, an ektê hen nung tlâk asi lo ti hen an âu chiam.

²⁵Sikhawmsele, a thihnâk khawp rê hen zeikhawm a ti lo ti ka theih le, chun, amah nih lalchem sinah tlunh a tum ruangah fial ka tum asi.

²⁶Sikhawmsele, a thu a bul leh pâr zeikhawm ka lalchem sinah rîn ding ka theih loh. Churugah nan mâika ah ka hawng kalpi hi, Lalchem Agripa, nangmah mâika ah hawng kalpi dauh ka si, salh thluh nûnah zeimaw tal rîn ding ka nei khonâk ding hen.

²⁷Mitâng lalchem sinah fial hen a tlûnah an phiarnâk thu theihtir lo chu âtkâi tak asi," a ti.

Thilti 26

¹Chun, Agripa nih Pawl sinah chun, "Na mawhlonâk thu na sim kho," a ti. Chun, Pawl nih a kut a phar le, a mawhlonâk thu a sim:

²"Lalchem Agripa! Juda tla nih an hawng ka phiarnâk zawzawng kha ka mawhlonâk thu tusûn ah hin na mâika ah ka sim awt ruangah lâwm hen ka theih.

³Hi hi ka lâwmnâk chem asi; Juda tla lakah dân leh thunawk zawzawng lakah na fing thlo ruangah; churugah zângfahtê hen na hawng ka ngâi piak ding hen kan ngiar asi.

⁴A tîrah ka ngâksia liau thawk hen ka phun tla lakah leh Jerusalem khua ah ka umdân tla kha Juda tla zawzawng nih an theih.

⁵A tîr thawk hen ka thâwnghâng an theih, kha hâwi hen kan phung-leh-lam kermê chem dân hâwi vima hen Farisai ah ka um kha, an duh chun an hawng ka simpî kho asi.

⁶Chun, Pathian nih kan thlâktu tla sinah thu a tiamnâk lakah lungngamnâk thu lakah hin tuah lâirêl piak hen ka dîr hi,



⁷Chu thutiam chu ka phun leinih nih a sôn a zân hen Pathian rian ðhanemngâi tak a ðuan hen tawng ding an lungum tâwn. Aw Lalchem, chubang lungumnâk thu ruangah chun Juda tla nih an hawng ka phiar asi hi!

⁸Pathian nih mithi tla a thawh ti hi zeirangah me lung tlâklo hen nan ruat?

⁹"Kei khawm nih Nazaret Jisu min kalhkâng hen thil cherkhet ti sele ðha hen ka theih tâwn.

¹⁰Chu hâwi chu Jerusalem khua ah ka va ti tâwn le, chun, bawlpu lal tla sinah thawk hen thu ka tawng le, mi thenhlimh tla lakah mi cherkhet rêngin ah ka khumh tawn; chun an thah liauah thah rem ti leikângah ka ðang tâwn.

¹¹Chun, pumhnâk in kipah simsiat a an umnâk ding hen ka rêp vima na le, chun an tlûnah thungâi ka rât hen ramdang mi khua tiang khawm ka nehsawh na tâwn.

¹²"Chu hâwi ti ding hen bawlpu lal tla thawk hen thuneihnâk thupêknâk tla lasui put hen Damaska khua ah ka kal.

¹³Aw Lalchem, ka kal liauah nî sôn liau chirah vân thawk hen chêu zeimawh nî ngâk hen chêu dauh, keimah leh ka kalpi mi tla kiangah chêu ka muh.

¹⁴Chun, kan ektê hen tual ah kan tlû le, Hebrai hawlh hen, Sawl, Sawl! Nangnih zerangah na ka nehsawh? Sunhnâk fungkhenh na rangah a fâk, hawng ka ti mi hâu ka theih.

¹⁵Chun, kei nih, 'Lalpa âu me na si?' ka ti. Chun, Lalpa nih chun, 'Jisu na nehsawh mi chu ka si;

¹⁶sikhawmsele, thawk le dîr rawh; hi bang na thil muh tla leh na sinah ka langhnâk ding thil tla chu rianðuan lakah leh theih tu ah a nan siam ding hen na sinah ka hawng a langh asi.

¹⁷Mi zawzawng leh Phundang tla kut lakah ka nan hum lai;

¹⁸an mit deitir ding hen an sianha ka nan fial hi, chun mûi chu chêu leiah an hawng hertâk lai le, Setan thuneihnâk chu Pathian leiah an hertâk lai, sual

ngaihzia thiamnâk an tawngnâk ding leh an hawng ka lung ruangah thenhlimh rawh mi le tla lakah ro anna ting khonâk ding hen,' " a ti.

¹⁹Churuangah, Lalchem Agripa, vân ah thawk hen muhnâk ka nei mi chu ka êl lo le,

²⁰a tîrah Damaska khua mi tla sinah, chu nûnah chun Jerusalem khua mi tla sinah, Juda ram kip mi tla sinah, Phundang tla sinah khawm rim min put tlâk hen thilti, rim hen, Pathian leiah anna hernâk ding hen ka sim dauh tâwn asi.

²¹Churung chun asi, Juda tla nih chun Pathian Biakin ah an hawng ka tleih le, thah an hawng ka tum asi.

²²Sikhawmsele, Pathian sinah thawk hen ẵngpinâk ka tawng ruangah tusûn tiang hen nâuta leh mi lian tla sinah thu theihtir hen ka um ko rih le, khuavâng tla leh Mosi nih thil hawng tung ding mi an sim mi thu cho lo chu thudang ka sim lo.

²³Kha hâwi hen Mesia nih hamhnâk a tuar ding leh mithi lakah mi a thawknawlh masachem ding asi ti mi zawzawng sinah leh Phundang tla sinah khawm chêu muhtirtu asi lai, an ti mi thu kha," a ti.

²⁴Chun, chu hâwi hen a mawhlonâk thu Pawl nih a sim liauah Festa nih chun hâu fak tak hen, "Pawl! Na â asi, na sîn tamnâk nih a nan âttir asi hi!" a ti.

²⁵Sikhawmsele, Pawl nih chun, Festa ẵa chem ka â lo; thudik tak leh thufing tak ka sim dauh asi hi.

²⁶Hi bang thu hi lalchem nih a theih asi, a sin khawmah ẵhlo hen ka sim asi; hi bang thil hi a sinah zeikhawm thuh pheh lo hen dik tak hen ka theih; hi bang hi in kî ah sim asi lo.

²⁷Lalchem Agripa, khuavâng tla thu na lung ma? Na lung ti ka theih," a ti.

²⁸Chun, Agripa nih chun Pawl sinah, "Sâwtlotê ah lêm hen Kristian ah siam na hawng ka tum asi hi!" a ti.



²⁹Chun, Pawl nih chun, "Sâwt seh sâwt lah seh, nangmah cho ka ti lo, tusûn ka thu theihthu zawzawng khawm hi keimah hâwi a um ding hen Pathian sinah ka deih asi, rêng lam chu khimh lo hen," a ti.

³⁰Chun, lalchem, governor, Berniki leh an sinah to mi tla hen chun an thawk le;

³¹chun, a dang hen an kal le, anna sâwn le, "Hi minung nih hin thihnâk leh rêng khimhnâk ding rê hen thil zeikhawm a ti lo ma hi a," a ti.

³²Chun, Agripa nih Festa sinah, "Hi minung nih hin Kaisar sinah tlunh ding tiamh lah sele chu a suak ko ding mi," a ti.

Thilti 27

¹Chun, Itali leiah lawng ah kal ding hen thu an thlûk kê hen, Pawl leh rêngtlâ dang âumawh chu Rom kawrsen zâ hotu, Lalchem an ti mi lak mi Julius sinah an ap.

²Chun, Andramitiam khua lawng, Asia tisumsumriat kap khua tla pal ding hen chun kan a chuan le, tisumsumriat ah kan kal rawh. Makedonia ram ah mi Aristarka, Thesalonika khua thawk hen mi kan sinah a um.

³Chun, a thâituan ah Sidon khua kan pal. Julius nih chun Pawl thungâi a sunhsak le, a panhtir ding hen a hâwi tla sinah a tâwitir.

⁴Chun, chu thawk hen tisumsumriat kan kal nawlh le, a mahlo leiah hawng kan ranh ruangah Kupra tikulh, thli theihlonâk leiah kan tek.

⁵Chun, Kilikia ram leh Pamphulia ram naih tisumsumriat kan lanh nûnah Lukia ram ah Mura khua kan tleng.

⁶Chunah chun kawrsen zâ hotu nih chun Alekzandria lawng Itali ram pal ding mi chu a tawng le, chu lakah chun hawng kan chuantir.

⁷Ni sâwt tak dusah hen kan kal le, Nidos khua zâwn harsa tak hen kan tlung rarâm le, thli nih hawng kan khirh ruangah Salmoni rîlah Kret tikulh phenh ah thli theihlonâk leiah kan tek le;

- ⁸chun, har tak hen vakap rîl vima ah kan kal le, likâwlneng dawh an ti mi mun chu kan tleng rawh; chu kiangah chun Lase khua a um.
- ⁹Chun, ni cherkhet a vei rawh ruangah leh lawng ah kal ÷ihnung a kâi ruangah, Buh Ngei Ni chu a lanh rawh asi. Pawl nih chun a simhfâi na le:
- ¹⁰an sinah "Pu le tla, lawng ah tuah kal hi râwknâk leh veihnâk fâk tak a tlung awt ti ka theih, thil leh lawng cho ka ti lo le, kanmah tla khawm ka ti asi," a ti.
- ¹¹Sikhawmsele, kawrsen zâ hotu nih chun Pawl thusim ngâk hen lawngpu leh lawng neitu thu a lung dauh.
- ¹²Chun, busik tuarnâk ding hen likâwlneng chu â rem lo ruangah mi tam dauh nih chu thawk hen tisumsumriat ah kal hen, Phoiniki khua tlung rarâm hen, chunah busik tuar ding thu an thlûk. Phoiniki khua chu Kret tikulh likâwlneng pakhat asi, mar sak leh sim sak hawi kâng asi.
- ¹³Chun, sim thli chu duhsah hen a lêng rawh chun an duhzia an tawng mawh an ti le, thîr cha-âi chu an nûk le, Kret tikulh kap lei hen an rial vima.
- ¹⁴Sikhawmsele, sâwtlotê nûnah tikulh lei thawk hen chun thli fâk tak a hawng râng rawh le, chu thli chu 'Eurokuilo' an ti.
- ¹⁵Chun, lawng chu a hawng nam le, thli leiah a hawi kholo kâ hen kan thlah rawh le, hawng kan ranh chiam ko rawh.
- ¹⁶Chun, a min Kauda tikulh metê phên ah thli theihlonâk ah kan tek le, har tak hen lawnglêng kan hum kho râm.
- ¹⁷Chun, lawng chu an nûk zawk nûnah rirual tla hen lawng chu an khih le, Surti leiah ranh an ÷ih le, puan zârnâk zeizawng an thlûk le, thli nih hawng kan ranh ko rawh.
- ¹⁸Chun, a thâituan ah titlingtlawk nih hawng kan lawh chiam rawh ruangah chun lawng ah mi thil chu tî lakah lawnh an dawmh rawh.
- ¹⁹Chun, a thâituan ah anmah kut ngelchel hen lawng mi thil-le-rî an lawnh nawlh rawh.

²⁰Chun, ni sâwt tak, nî khawm ârfi khawm a lang lo le, thlipi fâk tak nih hawng kan vuak le, dam ding rerêng kanna ruat lo rawh.

²¹Chun, buh ei lo hen sâwt tak an um nûnah Pawl chu an lakah a dîr le, "Pu le tla, Kret tikulh ah khan sût lo hen ka thu kha lung ule, hi bang râwknâk leh siatnâk hi a tlung lo ding mi.

²²Sikhawmsele, tu khawm hin lungngam tak hen um ding hen ka nan fawrh na; nan lakah âukhawm nih nan lû nan lauh lai loh, lawng lam chu a tlâu awt asi.

²³A tâ ka si le, ka sawnh tâwn mi Pathian vânmifial pakhat tuzân ah hin ka kiang ah a hawng dîr le, ka sinah,

²⁴'Pawl ÷ih lah, Kaisar mâika ah na dîr ding asi; chun, ngâinik, lawng lakah na sinah kal mi zawzawng tla khawm Pathian nih a nan pêk,' hawng ka ti asi.

²⁵Churuangah, Pu le tla, lungngam tak hen um u; Pathian ka lung, hawng ka simh hâwi vima hen a um awt asi.

²⁶Sikhawmsele, tikulh a zei ah mawh hawng kan ranh ding asi," a ti.

²⁷Chun, Andria tisumsumriat thli nih khatlei khatlei ah hawng kan ranh le, zân leili a tling zân ah chun thanñim ah mawh tlung awt hen anna theih.

²⁸Chun, tî thûk zia an tah le, lam kul hen an theih; chun, sâwtlotê ah an tah nawlh le, lam leinga hen an theih.

²⁹Chun, lawng taw leiah thîr cha-âi pali an thlâk le, chu lo chun lungruk nâwngah hawng kan ranh lebang lai ti an ÷ih; chun thungâi khuadei an mawhlah.

³⁰Chun, lawng ah mi tla nih chun lawng lû leiah thîr cha-âi thlâk ding hâwi hen a perpet na le, lawnglêng chu tisumsumriat ah an thlâk le, lawng chu tektâk an tum.

³¹Chu liauah Pawl nih chun kawrsen zâ hotu leh kawrsen tla sinah chun, "Hi bang tla hi lawng ah an um ko lo chun an him lai loh," a ti.

³²Chun, kawrsen tla nih chun lawnglêng ri tla an sah le, an thlah rawh.



³³Chun, khuadei awt bâiah chun Pawl nih mi zawzawng chu buh ei ding hen a fial na le, "Tusûn hi ni leili asi rawh, zeikhawm ei lo hen nan ngâk le, nan ngei lemang asi.

³⁴Churuangah buh ei ding hen ka nan fial na asi; nan damnâk ding asi, nan lû lakah mi sam zâi pakhat khawm a tlâu lai loh," a ti.

³⁵Chun, chu thu chu a sim thluh rawh chun sang a lâk le, mi zawzawng mâika ah chun Pathian sinah lâwmthu a sim le, a ei rawh.

³⁶Chun, annih khawm lungngam tak hen an um le, buh an ei bâk rawh.

³⁷Chun, lawng ah mi chu kan ektê hen ²⁷⁶kan si.

³⁸Chun, an khawp rawh chun fâng chu tisumsumriat ah an lawnh le, lawng chu an zângtir rawh.

³⁹Chun, nî a hawng suak rawh chun tlâng chu ze ram me asi ti an theih loh; sikhawmsele ze likâwlneng mawh seppho an muh le, chu tlûnah chun lawng kaltir ding an tum.

⁴⁰Chun, thîr cha-âi rêngnâk chu an sah le, tisumsumriat ah an mâk le; churawhchun, a hernâk phuarnâk tla chu an sût le, mâilei puanzâr chu thli sêm kâng tlûnlei ah an sangh le, seppho chu an fûk rawh.

⁴¹Sikhawmsele, tizangrual panih â tawngnâk ah kan lût sut le, lawng chu tual an suttir rawh; chun, lawng lû lei chu a tâng thlir le, changh kholo hen a um ko le, a taw lei lam chu tikîr a fâk ruangah kuai â dawmh rawh.

⁴²Chun, kawrsen tla nih rêngtlâ tla chu thah ding hen anna thluk le, chu lo chun anna liau lai le, an tek lai ti an tîh.

⁴³Sikhawmsele, kawrsen zâ hotu nih Pawl rangah hum ding a duh le, an thiltum chu a khap na; tiliau thiam vial tisumsumriat ah khâwk hen tlâng lei kâi masa ding leh midang chu a zeimaw mi thing phel tlûn tla ah,

⁴⁴a zeimaw mi lawng kuai mi thing phel tlûn leh thil-lê-rî tlûn tla ah kâi ding hen thu a pêk. Chu hâwi chun an ektê hen tlâng ah him tak hen an kâi ver.

Thilti 28



- ¹Chun, kan kâi nûnah chun tikulh min chu Malta asi ti kan theih rawh.
- ²Chun, phun dang tla nih thungâi hawng kan zângfah; ruah a sûr ruangah leh a dâi ruangah mei an tih le, kan ektê hen hawng kan lawmh.
- ³Chun, Pawl nih chun thing têt khat a khawmh le, mei a tih le, a lân ruangah rûl a hawng suak le, a kut ah a chuk le â thlâi ko.
- ⁴Chun, phun dang tla nih chun a kut ah rûl â thlâi ko mi chu an muh le, "Hi minung hi, mi thahtu asi ngelchel lai, tisumsumriat thawk hen tek khawmsele phû lamtu nih chun nung ding hen rem a ti lo si lai," an ti.
- ⁵Sikhawmsele, anih nih chun rûl chu mei lakah a thing bawk le, zeikhawm â ti lo.
- ⁶Annih nih chun phing ding hen mawh lakkhat ko ah thi hen tlû sawm ding hen an ruat le; chun sâwt ual an zauh ko le, zeikhawm â ti lo ti an theih rawh chun an thinlung an dang nawlh le, "pathian pakhat asi hi," an ti.
- ⁷Chun, chu mun kiang chu tikulh ah lalchem a min Publias mun a um; chu nih chun hawng kan lawmh le; ni thum lâwm tak hen hawng kan tungtir.
- ⁸Chun, Publias pa damlo leh nal kal hen a it ko; chun Pawl chu a sinah a kal le, a tlûnah a kut a thâng le, thla a cham piak le, a dam rawh.
- ⁹Chu thluh chun, chu tikulh ah mi a dang nganfâk nei mi vial an hawng kal le, a damh na.
- ¹⁰Chu ni tla ah chun thungâi hawng kan chawnglawmh le, kan kal awt rawh chun thilpêk cherkhet leh kan thil herh tla lawng ah hawng kan siah piak.
- ¹¹Chun, thla thum nûnah a min "Pathian Phîr tla," ti mi Alekzandria khua lawng, busik ah tikulh ah a um rawh.
- ¹²Chun, Surekus khua kan pal le, chunah chun ni thum kan châm.
- ¹³Chu thawk hen kanna hêl le, Reziam khua kan tleng le, chun ni khat nûnah simlei thli a râng le, a thâituan ah Puteoli ah kan tleng nawlh le,
- ¹⁴chunah chun lungtu tla kan muh le, an sinah ni sarîh châm ding hen hawng kan thloh le, chu hâwi chun Rom khua leiah kan kal vima rawh.

¹⁵Chun, unau tla nih kan thâwngthâng an theih kê hen chu thawk chun Apius sumtuah leh khual tlungnâk in pathumnâk ah hawng kan dawng ding hen an hawng kal le; Pawl nih chu minung tla chu a muh na rawh chun Pathian sinah lâwmthu a sim le, a lungngam rawh.

¹⁶Chun, Rom khua ah kan lût rawh chun Pawl chu a vêngtu kawrsen sinah amah cho um ding an siang.

¹⁷Chun, ni thum nûnah Pawl nih chun Juda tla hotu dauh vial a pumh na le; chun an hawng a pûm le, an sinah, "Ka unau Israel le tla, mi zawzawng leh kan thlâktu dân lakah ka ti lo khawmah Jerusalem khua thawk hen Rom mi tla kut ah an hawng ka tângtir asi.

¹⁸Chun, annih nih chun an hawng ka salh thluh rawh chun thihnâk khawp rê ka tlûnah zeikhawm a um lo ruangah thlah an hawng ka tum.

¹⁹Sikhawmsele, Juda tla nih chu chu an êl ruangah Kaisar sinah tlunh lo kho ka si lo rawh le, sikhawmsele ka phun tla phiarnâk nei hen ka ti mi asi lo.

²⁰Chubang leikângah chun nanmah muh ding hen ka nan kawh na asi; Israel tla lungumnâk ka bawppi ruangah hi chikchîn hi khih ka si," a ti.

²¹Chun, annih nih chun a sinah, "Na thâwngthâng Judai ram thawk hen lasuikwat kan muh lêm lo, unau tla âukhawm nih hinah hawng kal hen na lakah thupawi zeizawng an phuang lo, sim khawm an sim lo.

²²Khawmsele, hi murui hi ram kipah simsiat an si le, nangnih zeitin na ngaih, theih kan duh," an ti.

²³Chun, ni an tiamh le, chu ni chun a tlungnâk in ah mi tamtak an hawng kal le, zîngtê thawk hen zânlei tiang an sinah chu thu chu a simhfiang le, Pathian Ram thu a theihtir na le, Mosi Dân lasuibu thu leh khuavâng tla lasuibu thu hen Jisu leiah anmah tla a lêm tlawtawt na.

²⁴Chun, a zeimaw mi nih a thusim chu an lung le, a zeimaw mi nih an lung lo.

²⁵Chun, anna remlo rawh le, Pawl nih thu kê khat a sim thluh ah chun an suak rawh. A thusim chu hi hi asi: "Thlaraau Thenhlimh nih khuavâng Isai kê ah nan thlâktu tla sinah a sim mi kha a dik thlo asi.

²⁶Hi phun tla sinah hin va kal le, sim rawh: Nâ hen chun nan theih narêng hen a ngaihtawnh dân lam chu nan theih rîlmâl lai loh; muh lam chu nan muh narêng hen theih lam chu nan theih lai loh.

²⁷Hi phun thinlung hi a mawlâwt le, an nâ tla a ngawng dauh le, an mit khawm an sîm le, chu lo chun an mit hen an muh lai le, an nâ hen an theih lai le, an thinlung hen an theihthiam lai le, anna her nawlh lai le, chun kei nih ka damh na lebang lai,' a ti ruangah.

²⁸"Chun, Pathian ruangsuaahnâk thu hi Phundang tla sinah kuat asi ti theih u, annih lam nih chun ngâi khawm an ngâi lai," a ti.

²⁹Chun hi bang thu tla hi a sim thluh nûnah Juda tla chu an kal ving le, anmah leh anmah anna êl.

³⁰Chun, Pawl chu kum nih pumpial amah in lâng lakah a um le, a sinah lût mi zawng a lâwmlût na tâwn.

³¹Anih nih chun Pathian ram thu ah leh Lal Jisu Krist thu khawm râlþha tak hen a simh na tâwn le, âukhawm nih amah an khap lêm lo.

Rom

Rom 1

¹Pawl, Jisu Krist to-aw, mifial si ding hen kawh mi, a Thâwngthâng Țha sim ding hen Pathian nih a kawh mi nih chun:

²Chu Thâwngthâng Țha, a Fapa kan Lalpa Jisu Krist thu chu, Pathian nih tuan liauah Pathian lasui thu thenhlimh ah chun a khuavâng tla kê hen a tiamh rawh.

³Anih chu taksa lei thu ah chun David thlâk ah suak asi le,

⁴thenhlimhnâk thlarau lei thu ah chun mithi lakah thawk hen a thawknawlnhâk nih chun, Pathian Fapa asi zia fâk tak hen a theihtir.

⁵A min ruangah lungnâk chu phun kip lakah mi lungtir hen, amah ruangah chun, zângfahnâk leh mifial sinâk ka ting rawh.

⁶Chubang tla lakah chun nannih Rom khua ah um mi tla khawm Jisu Krist ah kawh mi tla nan si.

⁷Churugah nannih Rom khua ah um mi tla, Pathian nih a dâwt mi tla leh amah mi tla si ding hen kawh mi tla zawzawng sinah ka rîn asi: Pathian kan Pa leh, Lal Jisu Krist sinah thawk hen zângfahnâk leh remnâk nan sinah um seh.

⁸Laikulh zawzawng ah nan lungnâk thu a thang ruangah nan ektê tlûnah ka lâwmnâk thu Jisu Krist zârah Pathian sinah ka sim masa rih asi.

⁹Ka thlachamnâk lakah chun bâng lo hen nan min ka lam tâwn le, tatal hin nan sinah ka hawng kalnâk ding hen Pathian thu thu hen tlâwngnâk tik ka tawng rarâm khonâk ding hen ka deih tâwn ti a Fapa Thâwngthâng Țha ah ka thlarau ah a rian ka Țuan tâwn mi Pathian chu a theih tu asi.

¹¹Nan birhnâk dingah thlarau lei thilpêk zeimaw tal ka nan pêk kho na ding hen an muh na ding thungâi ka duh.

¹²Chu chu nan nungnâk leh ka nungnâk hen kanna Țangpi tawnh khonâk ding hen ka tinâk asi.



¹³Unau le tla, hi hi theih u: ka nan veh na ding hen vei tamtak ka tum rawh le, sikhawmsele, thil zeimawh nih a hawng ka kham kumza tâwn asi. Phundang tla lakah lungthar ka tawng hâwi hen nan lak khawmah lungthar tawng ka duh tâwn asi.

¹⁴Mi zawzawng sinah, mifing leh mifing lo tla sinah, mithiam leh mithiam lo tla sinah bat ka nei.

¹⁵Chuvachun, nannih Rom khua ah um mi tla sinah khawm Thâwngthâng Th̄a sim ding hen ka mawhlah kumza.

¹⁶Thâwngthâng Th̄a ah zumhnâk rangtling ka nei: âuzawng a lungtu zawng rangah ruangsuaah ding hen Pathian thiltikhonâk asi, a tîrah Juda tla rangah asi le, chun Phundang tla rangah khawm asi.

¹⁷Thâwngthâng Th̄a nih chun a dawmhtîr thawk hen a dawng tiang hen Pathian ah lungnâk ruang cho ah minung chu rep hen a um ti a langhtir asi. "Mi rep chu lungnâk hen a nung lai," ti Pathian lasui thu nih a sim hâwi khan.

¹⁸Thutak rep lo tak a khamtu tla Pathian sunhsaklonâk leh replonâk zawzawng tlûnah vânthawk hen Pathian thinthawknâk a hawng lang asi.

¹⁹Pathian nih a rêp na le, Pathian nih a theihtir rawh ruangah Pathian thâwngthâng theih ding mi chu an sinah theihtir hen a um dangâiah.

²⁰A thil muh kho lo tla, a zungzâl thiltikhonâk leh a Pathian zia chu laikulh siamtir thawk hen fiang tak hen muh hen a um le, thilsiam ah chun a lang asi. Churung chun phelhsawlhnâk ding reng an nei lo!

²¹Pathian theih ko hen Pathian hâwi hen an chawnglawmh lo, lâwmthu khawm an sim lêm lo; thu salam an dawn dauh le, an thilung ah chun mûinâk hen a hawng khat rawh asi.

²²Mifing ah anna ruat le, sikhawmsele, mi â ah an hawng a chang;

²³thi kho lo Pathian chu sawnh lo hen, thi kho mi minung ruk tla, vâ tla, ran tla, vâkrit tla ruk chu an sawnh asi.

²⁴Churuangah an taksa ningzakkâi tak a siam tawnh ding hen an thinlung duhkâng hâwi hen thu nâwmtâm ti ding siang hen Pathian nih a kaltâk asi.

²⁵Pathian thutak chu âwkrâwl ah changtir hen a siamtu sawnh ngâk hen a siam mi chu sawnh hen a rian an ÷uan dauh dangâiah. A siamtu chu zungzâl hen sawr tlâk asi. Amen.

²⁶Churuang chun Pathian nih ningzakkâi tak a hur siang hen a hawitâk na. Nunau tla tiang khawm nih an umdân an suakpi mi chu dân lo hâwi a um ding hen anna dangtir dangâiah.

²⁷Mipa khawm nih nunau mang dân kêl bângtâk hen, hur hen duhnâk anna neih le, mipa leh mipa ÷halo tak hen anna ti, an sual man tawng ding chu annah lakah an tawng.

²⁸Chun, Pathian theih an duh lo ruangah thil dawh lo tla ti ding hen a duh lo kâng thinlung neih siang hen Pathian nih a hawitâk na rawh.

²⁹Chun, replonâk zawzawng, sualnâk zawzawng tla, hamkahnâk zawzawng tla, ÷hatlonâk zawzawng hen an khat le, nahsuahnâk tla, mi thahnâk tla, tawnhâk tla, perpetnâk tla, nunchan ÷halonâk tla hen an khat.

³⁰Chaih mang tla, mi chawngawih mang tla, Pathian, huatkâng hen um mi tla, â liantir mi, mi zûm tla, â khâwng mi tla, thilsual thar suahtu tla, nu leh pa thu ngâilo tla,

³¹sia leh ÷ha theihnâk neilo tla, thupêk buartu tla, zângfahnâk thinlung suakpi lo tla, zângfahnâk neilo tla an si.

³²Chu hâwi thil titu tla chu thi ding rêng an si ti Pathian ruat chu theih ko hen, annah lâwng nih ti mi cho khawm silo hen, midang ti tâwntu tla tlûnah khawm anna lâwm tâwn.

Rom 2

¹Churuangah, ka hâwi tla, midang tla tlûnah lâi nan rêl mu? Mi âutal si khawm ule, ngaihdamnâk rerêng nan nei lo. Midang lâi nan rêl liauah chu

hâwi thil an ti mi tla hâwi nan ti bâk tâwn ruangah nanmah leh nanmah nanna mawhtir asi.

²Chu hâwi thil ti tâwntu tla tlûnah chun Pathian nih a lâirêlnâk chu dik tak asi vima asi ti kan theih.

³Churuarangah, ka hâwi tla, nannih chu hâwi thil ti tâwn tla sâwitu, nannih nih chu hâwi thil nan ti bâk dangâiah Pathian nih lâi a rêlnâk lakah âwl ding nanna ruat mazei?

⁴Asi lo leh, Pathian thatnâk nih rimnâk ding hen a nan ruai na tâwn ti theihlo hen, a thatnâk neih tam zia leh â zauh kho zia leh â dawnhkho zia chu nêp dîk hen ma nan ruat?

⁵Thinlung lianhnâk leh thinlung khauhnâk nan nei. Churuarangah Pathian thinrunhnâk leh lâirêlnâk dik tak a hawng lang tik Ni ah chun nanmah rêpnâk lian dauh nan siam asi.

⁶Pathian nih chun mikip an thilti hâwi vima hen lâwmmman a pêk lai.

⁷Thil tha ti rarâm hen, rokualnâk leh chawnglawmhnâk leh thi kho lo mi nungnâk hâwltu tla sinah chun zungzâl nungnâk a pêk lai.

⁸Midang tla chu mah kawngkâ lâwng ruat mi an si le, a dik mi chu an duh lo, a dik lo mi chu an zûl dauh tâwn; an tlûnah chun Pathian thinthawknâk leh thinrunhnâk tla a um lai.

⁹Minung thilsual titu tla tlûnah hamhnâk leh ngaihshiatnâk fâk tak a um lai le, Juda tla tlûnah a um masa lai le, chun Phundang tla tlûnah khawm a um lai.

¹⁰Sikhawmsele, thu tha titu vial sinah chun rokualnâk tla, chawnglawmhnâk tla, lungngamnâk tla Pathian nih a pêk na lai le, Juda tla sinah pêk asi masa lai le, chun Phundang tla sinah khawm pêk asi lai.

¹¹Pathian nih mi zawzawng bang ver hen a zauhkhenh ruangah.

¹²Âuzawng Dân neilo hen thil a سوال mi chu Dân lo hen a vei lai, chun Dân nei hen a سوال mi chu Dân ah lâirêl hen a um lai.

¹³Chun, mi nih Dân a theih mi ko asi chun Pathian lakah mi rep asi lo, Dân nih a herh a ti mi tla a ti chun Pathian lakah mi rep asi lai.

¹⁴Phundang tla nih chun Dân an nei lo; sikhawmsele mah thinlung suakpi mi hen Dân thilti tla chu an ti chun, chubang tla nih chun Dân neilo khawmsele anmah leh anmah Dân ah an um chawlh asi.

¹⁵An nunchan nih chun Dân thilti tla chu an thinlung ah rîn asi ti a zauhtir. Chun, an siat leh that theihnâk khawm nih hi hi a dik asi ti a theihtir le, an thinlung tla chu â êl le, anna mawhtir thulh, zeimaw zâwnah anna mawhlotir thulh.

¹⁶Pathian nih Thâwngthâng T̄ha ka sim hâwitê hen minung thinlung tla lakah mi thuthup tla chu Jisu Krist mang hen lâi a rêl ding Ni ah chun rêl hen an um lai.

¹⁷zei hâwi na si rawh ne? Juda ka si na ti le, Dân chu na rinhsan le, Pathian na putso;

¹⁸Pathian nih ti ding hen a nan duh mi na theih le, chun Dân thu ah sîntir hen na um le, thil dik tla chu ti ding hen:

¹⁹Dân ah chun finghnâk leh thutak umdân na nei ruangah nangmah tak mitchâw tla ruaitu, mui lakah umtu tla cherhtu

²⁰mifinglo tla finghtirtu, mimâwl tla sîntirtu si hen na ruat.

²¹Midang tla na sîntir na le: zeirangah nangmah na sîn lo? Nang, fîr lo ding hen sîntirtu, na fîr tâwn mu?

²²Nang tângdang pawm lo ding hen simhtu: nangnih tângdang na pawm tâwn mu? Nang, milem huatu, milem biakin ah mi thil tla na fîr tâwn mu?

²³Nang, Dân putsotu, nangnih Dân na buar ruangah Pathian min na siattir tâwn mu?

²⁴Pathian thu nih a sim hâwitê khan Pathian min chu nanmah Juda tla ruangah Phundang tla lakah siattir hen a um rawh asi.

²⁵Dân zâwttu na si chun na fêmtannâk chu a ðhavak asi; Dân buartu na si lam chun na fêmtan chu tan lo hâwi asi ko rawh.

²⁶Churuangah fêmtan lo mi nih chun Dân thuruat tla a kil chun a fêmtan lo mi chu tan hâwi hen ngaih asi awt lo mazei?

²⁷Chun, Phundang mah umzia hen fêmtan lo hen Dân chu a zâwt kim chun, nang Juda lasui thu leh fêmtan Dân nei ko hen Dân buartu, a nan sâwi awt lo mazei?

²⁸A lêngpuan ko ah Juda mi si chu Juda mi tak asi lo; a lêngpuan ko ah fêmtan chu fêmtan tak asi lêm lo.

²⁹Khawmsele a lêngpuan si lo hen Juda mi si chu Juda mi tak asi. Chun, fêmtan tak chu thinlung leikângah tan asi, lasui thu ah ko si lo hen thlarau ah asi; chu lakah chun minung sawr a lawh lo le, Pathian sawr an lawh dauh asi.

Rom 3

¹Asi chun, Juda mi nih chun Phundang tla tlûnah ðhatvknâk zeï me a neih khun? Fêmtan khawm zeï me a ðhatvknâk?

²Zeizawng ah a ðhavak thlo. Pathian thu chu Pathian nih Juda tla sinah a kiltir masachem.

³Mi zeimaw mi nih lungnâk neilo khawmsele zeï me â ti le? An lunglonâk nih chun Pathian zumhkâi zia zeikhawm lo ah a siam lêm mazei?

⁴Si lo e, Pathian chu mi dik tak asi le, mikip lam chu âwkrâwl si dauh seh. "Nangnih na thusim ah mawh lo hen na ruat lo, lâirêl hen na um khawmah na neh kho ding hen," lâirêl hen Pathian lasui thu nih a sim hâwi khan.

⁵Sikhawmsele, kan a replonâk nih hin Pathian repnâk chu dawh khun hen a langhtir chun zeise kan sim lai? Pathian nih mi a rêp hen mi replo asi mazei? Minung ti dân hâwi hen ka sim asi.

⁶Si lo e, chu hâwi asi chun Pathian nih zeitin me laikulh lâi a rêl lai?



⁷Sikhawmsele, ka âwkrâwl thusim ruangah Pathian thudik zia amah rokualtir khawp rê hen a lang khun ÷ung chun, zeirang me kei khawm misual hâwi hen mawhtir hen ka um nget ne?

⁸Takhan chun, zeirang me, "Thu ÷ha a hawng tlung khonâk ding hen thilsual kan ti lai," ti hen kan sim dauh lo? Mi zeimaw mi nih an ka phiar le, simlopi an ka simtir. Chu hâwi mi le tla chu an mawh hâwi hen Pathian nih a rêp lai.

⁹Asi chun, kannih Juda tla hi Phundang tla ngâk hen kan ÷ha khun mazei? Si lo e! Juda tla leh Phundang tla chu soal thiltikhonâk tangah an um ver asi ti a lân khawmah ka zauhtir rawh kha.

¹⁰Pathian lasui thu nih: "Âukhawm mi rep tak rerêng an um lo, pakhat khawm an um lo;

¹¹Âukhawm theihthiam rerêng an um lo, âukhawm Pathian sawnh rerêng an um lo.

¹²Amah lo leiah an pial ver le, zeikhawm chawhchân lo hen an um ver: âukhawm thil ÷ha ti rerêng an um lo, pakhattê men an um lo.

¹³An kê suak nâwmtâm nih chun thihnâk a tlunh tâwn, an lei nih perpetnâk thu a sim. An kê sung chu rûl tûr hen a khat.

¹⁴An kê tla chu hawlhsiat barhnâk thu khâ hen a khat.

¹⁵An kê chu thisen suah ding hen chak hen a kêr.

¹⁶An kalnâk zawngah veihnâk leh hamhnâk an mâk tâwn.

¹⁷Lungngamnâk lampi khawm an theih loh.

¹⁸An mitmuh ah Pathian ÷ihnâk rerêng an nei lo," ti hen, an sim hawi khan.

¹⁹Dân nih zeizawng a sim mi vial chu Dân thu thu hen um mi tla sinah a sim asi ti kan theih; kê kip a chîp khonâk ding hen leh laikulh ah mi zawzawng Pathian lâirêl hen an um khonâk ding hen.

²⁰Chun, Dân thilti ruangah âukhawm a mitmuh ah mawh lo hen an um lo, Dân ruangah soal theih rangtlingnâk a hawng um dangâiah.

²¹Sikhawmsele, tuah Dân leh khuavâng tla theihtir hâwi hen Dân lo hen Pathian repnâk chu langhir hen a um rawh;

²²chu chu Pathian repnâk, Jisu Krist lung ruangah a lungtu vial tla sinah langhtir hen a um mi chu asi; dangnâk rerêng a um lo:

²³mi zawzawng nih thilsual an ti ver le, Pathian rokualnâk anna ting kho lo rawh.

²⁴Chubang lungtu chu Krist Jisu tlanhnâk um mi ruangah chun a zângfahnâk nih a thawt hen mawhtir lo hen an um.

²⁵Pathian dawnhkhonâk ah tuan liauah soal tla ngaihdam hen a um ruang khan, Pathian nih amah rep zia zauhtirnâk ding hen Krist Jisu chu a thisen ah, lung ruangah soal thutluang vawrnâk ah a ruat.

²⁶Tu liauah a rep zia a zauhtirnâk dingah asi amah ngelchel chu mi rep asi khonâk ding hen leh Jisu lungtu vial mawhtirlotu asi khonâk ding hen.

²⁷Nan putsonâk chu zeiah me a um le? Zeikhawm silo! Zeiruangah ne? Mi nih Dân a zâwt ruangah ma? Si lo e; lungnâk ruangah asi dauh.

²⁸Chuvachun, Dân thilti silo hen lungnâk ruangah Pathian ah mi rep kan si hen kan ruat asi.

²⁹Asi lo leh, Pathian chu Juda tla Pathian cho ma si? Phundang tla Pathian khawm asi bâk lo ma? Si bâk ta a.

³⁰Juda tla chu an lung ruangah mawhtirlonâk ding leh Phundang tla chu an lungnâk ruangah mawhtirlotu ding thu Pathian pakhat cho asi chun Phundang tla Pathian khawm asi bâk lai ta a.

³¹Asi leh, lung ruangah Dân chu zeikhawm lo ah kan siam mazei? Si rîlmâl lo; Dân chu kan birhtir lehlam asi.

Rom 4

¹Asi chun, Abraham, taksa dân ah hawng kan thlâktu nih chun ze me a tawng mi chu, ze kan sim lai ne?

- ²Abraham chu thilti ruangah mawh lo asi chun putso ding a nei asi. Pathian leikâng lam chun a nei lo asi.
- ³Pathian lasui thu nih, Abraham nih chun Pathian a lung le, chun chu lungnâk chu repnâk ah ruat asi, ti hen a sim asi.
- ⁴Chun, rianṭuantu lawh chu zângfahnâk ah ruat asi lo le, bat ah ruat asi dauh.
- ⁵Sikhawmsele, rianṭuan lo hen Pathian sunhsak lo hen mawhtirlotu lung dauh mi lungnâk chu amah repnâk ah ruat asi.
- ⁶Mi a thilti ruat lo hen, Pathian nih rêp hen a ruat mi chu mal a sawm piak thu David khawm nih,
- ⁷"An buarnâk tla ngaihdam hen a um mi leh, an sual tla khuh hen a um mi chu an thaw a suak.
- ⁸Lalpa nih diklonâk nei hen a ruat lo mi chu a thaw a suak," ti hen a sim hâwi khan.
- ⁹Asi leh, chu thawsuaknâk chu fêmtan tla tlûnah cho ma a um, fêmtan lo tlûnah khawm? "Abraham lungnâk chu a repnâk ah ruat asi," kan ti ruangah.
- ¹⁰Chu chu ze hâwi hen ruat me si ne? A fêmtan nûnah ma? A fêmtan lânah? A fêmtan nûnah asi lo le, a fêmtan lânah asi dauh.
- ¹¹Chun, fêmtan lo hen a um liauah lungnâk ah repnâk a tawng ti theihnâk fêmtan singsiahnâk chu â ting le, chu repnâk chu an rangah ruat asi nâk ding hen fêmtan lo tla lakah lungtu zawzawng thlarau pa asi khonâk ding hen.
- ¹²Fêmtan tla pa khawm asi khonâk ding hen fêmtan tla pa ko asi lo le, kan pa Abraham fêmtan lo hen a um liauah lungnâk a nei hâwi a nei bâk mi pa asi dauh.
- ¹³Dân ruangah Abraham leh a thlâk tla sinah chun laikulh ro tingtu ding asi lai ti lam chu tiamh asi lo le, lungnâk ah repnâk ruangah asi dauh.
- ¹⁴Dân ah um mi tla chu ro tingtu tla an si chun lungnâk chu zeikhawm ah a thatvak lo le, thutiam khawm chu zeikhawm asi lo.

¹⁵Dân nih chun thinthawknâk a siam tâwn le, Dân umlonâk ah lam chun buarnâk khawm a um lo.

¹⁶Churuangah, zângfahnâk hen asi khonâk ding hen lungnâk ruangah asi hi, thlâk tla zawzawng nih chun thutiam chu anna tingnâk ding hen. Dân nei mi tla cho nih an tawng awt lo le, Abraham neih hâwi lungnâk nei tla khawm nih an tawng bâk lai. Mithi tla nungtirtu leh thu um lo tla um hâwi hen simtu a lung mi Pathian mitmuh ah chun Abraham chu kan ektê thlarau pa asi. "Chi tamtak tla pa ah ka nan siam," ti rîn hâwi khan.

¹⁸Lungum ding hen a umlonâk khawmah anih nih chun lungum tak hen a lung le, chi tamtak tla pa asi khonâk ding hen, "Khi zat khin na thlâk tla an hawng um lai,' ti hen simh asi hâwi hen khan.

¹⁹Chun, lungnâk bir lo lêm lo hen, a taksa thi rawh hâwi hen um ding a ruat le, amah chu kum zâ mi bo asi le,

²⁰Sari ching mi khawm a theih ko, sikhawmsele lungnâk sam hen Pathian thutiam chu a zumhmaid lo le,

²¹Pathian a chawnglawmh le, a thutiam chu a tingtir kho ti a lung thlo le, a lungnâk chu a bir khun rawh.

²²Churuangah, a lungnâk chu repnâk ah ruat asi rawh.

²³Chun, a lungnâk chu a repnâk ah ruat asi ti hi amah rang cho ah rîn asi lo le, kanmah rang khawm asi.

²⁴Jisu kan Lalpa mithi lakah mi thawhtu chu lungtu kan si le, kan lungnâk chu repnâk ah ruat asi awt.

²⁵Chu Jisu chu kan sual ruangah thi ding hen tleihtir hen a um le, kan mawhlonâk ding hen thawh hen a um.

Rom 5

¹Churuangah, lungnâk ruangah mawhlo a um hen, kan Lalpa Jisu Krist ruangah Pathian hen rem hen kan um.

²Amah ruang ber ah hi zângfahnâk ah hin bir tak hen kan dîrnâk ah hin lungnâk hen kan lût rawh. Churawhchun, Pathian rokualnâk lungum hen lâwm hen kan um.

³Chun, chu ko chu silo hen kanna hamhnâk khawmah lâwm hen kan um, hamhnâk nih chun felfênâk a siam le,

⁴felfênâk nih chun Pathian remtinâk a siam, Pathian remtinâk nih chun lungumnâk a siam ti kan theih asi.

⁵Chun, Thlarau Thenhlimh kan sinah hawng kan pêk mi nih khan Pathian dâwnâk chu kan thinlung ah a khattir rawh ruangah lungumnâk nih chun a mualphotir lo.

⁶Kan chak lo liau khan, a tik takah Krist chu misual ruangrûl ah a thi rawh ruangah.

⁷Mi rep ruangrûl ah a thih chu mi zeimaw mi rangah thu har tak asi le, mi tha ruangrûl lam chun mi zeimaw mi nih thih a va ngamh ko dahmawh.

⁸Sikhawmsele, Pathian nih chun a kan dâwnâk chu sawr tlâk hen a langhtir le, misual tla kan si liauah Krist kan ruangrûl ah a thi ruang khan.

⁹Chun, a thisen ah mawhlotir a kan um rawh nûnah hin amah ruangah Pathian thinthawknâk lakah mi chu rangsuah hen kan um ngelchel lai.

¹⁰Mêlma kan si liau men ah a Fapa thihnâk ruangah Pathian hen rem rawh mi kan si chun rem hen kan um rawh nûnah hin a nungnâk ruangah rangsuah hen kan um ngelchel lai.

¹¹Chu cho khawm asi lo le, tuah remnâk hawng kan tingtirtu kan Lalpa Jisu Krist ruang chun Pathian ah kanna lâwm asi.

¹²Chun, mi pakhat ruangah soal laikulh ah a lût le, soal ruangah thihnâk a lût fâwn, chu hâwi ber hen mi zawzawng nih thu an hawng soal ruangah thihnâk nih mi zawzawng a zunh hep rawh.

¹³Dân um lânah laikulh ah soal a um rawh asi: Dân a um lo chun soal chu soal ah ruat asi lo.



¹⁴Sikhawmsele, Adam thawk hen Mosi tiang hen Adam buarnâk hâwi a thilsual tilo tla lak khawmah thihnâk nih chun lâi a rêl tâwn. Adam chu a hawng kal ding mi Jisu hen tahthimhnâk asi.

¹⁵Sikhawmsele, thilthawt pêk chu sualnâk hen â bang lo fâwn. Mi pakhat soal ruangah men khan mi tamtak an thi chun Pathian zângfahnâk leh mi pakhat Jisu Krist zângfahnâk ruangah thilpêk chu mi tamtak lakah vurh hen a um ngelchel lai.

¹⁶Chun, thilpêk chu pakhat soal ruangah thu hawng um ding mi hen â bang lo; mawhtirnâk lâirêlnâk chu soal pakhat ruangah a hawng um le, mawhtirlonâk thilthawt pêk lam chu soal tamtak ruangah a hawng um dauh asi.

¹⁷Adam soal ruangah thihnâk nih, amah pakhat ruang men ah men ah lâi a rêl asi ti a dik asi; sikhawmsele, mi pakhat, Jisu Krist nih thil a ti mi chu a rokual dauk khun asi. Pathian zângfahnâk fâk leh a repnâk tawngtu tla nih chun Krist zârah nungnâk ah lâi an rêl lai.

¹⁸Chun, soal pakhat ruangah mawhtirnâk lâirêl chu mi zawzawng tlûnah a hawng um le; chu hâwi ber hen thil rep pakhat ti ruangah nungnâk tawngnâk ding ken mawhtirlonâk thilthawt pêk chu mi zawzawng tlûnah a hawng um.

¹⁹Mi pakhat ê-aw ngâilonâk ruangah khan mi tamtak chu misual an hawng si rawh: chu hâwi ber hen mi pakkat ê-aw ngâinâk ruangah khan mi tamtak chu mi rep an hawng si lai.

²⁰Chun, soal a lang khun ding hen Dân a hawng um nawlh sawm. Sikhawmsele, soal a pungnâk kipah Pathian zângfahnâk chu a pung khun tâwn.

²¹Sual nih chun thihnâk hen lâi a rêl hâwitê hen Pathian zângfahnâk nih chun repnâk hen zungzâl nungnâk ting kho rê hen kan Lalpa Jisu Krist ruangah lâi a rêl khonâk ding hen.

Rom 6



- ¹Zeise kan sim lai rawh ne? Zângfahnâk chu a pung khonâk ding hen soal hen nget ma kan um awt?
- ²Si lo e; kannih soal leikângah thi rawh mi, soal hen zeitin me kan nung kho nget lai rih?
- ³Kan lakah Jisu ah baptis hen um mi vial tla chu a thihnâk ah baptis hen kan um ti nan theih lo ma?
- ⁴Churuangah, a thihnâk ah baptis kan si chun a sinah phûm bâk hen kan um; Pa rokualnâk nih mithi lakah mi Krist a thawh hâwi hen khan, kannih khawm nungnâk thar a kan um khonâk ding hen.
- ⁵A thihnâk va bangh hen amah hen kanna tlâi rawh asi chun, a thawknawlnâk va banghpi khawm hen kanna tlâi ber asi.
- ⁶Hi bang hi theih sele; kan minung li chu a sinah khenhbêk hen a um bâk rawh, soal put taksa chu tlâutir a um khonâk ding hen, tu thawk hen soal sal ah kan um lonâk ding hen.
- ⁷Âuzawng thi rawh mi chu soal ah mi a suak rawh asi.
- ⁸Chun, Krist sinah kan thi bâk rawh chun a sinah kan nung bâk lai ti kan lung asi; Krist chu mithi lakah mi thawh hen a um le,
- ⁹a thi nawlh awt lo rawh ti kan theih; thihnâk nih chun amah tlûnah thu a nei lo rawh.
- ¹⁰A thihnâk chu soal leikângah zungzâl rangah veikhat cho a thi asi, a nungnâk lam chu Pathian leikângah a nung asi.
- ¹¹Chu hâwi ber hen nannah khawm soal leikângah thi rawh ah a ruat ule, Pathian leikângah lam chun Krist Jisu ah nung hen a ruat u.
- ¹²Churuangah, nan taksa duhzia nan zûlnâk ding hen nan taksa thi kho ah sualnâk nih lâirêl lah seh.
- ¹³Nan taksa ðeng tla khawm replonâk ruakhâu rang dingah sualnâk ah pêk siang lah u; khawmsele, mithi lakah mi nung nawlh hâwi hen Pathian sinah a

pêk ule, nan taksa ðeng tla khawm chu repnâk ruakhâu rang dingah Pathian sinah pêk siang dauh u.

¹⁴Sualnâk nih nan tlûnah thu a nei awt lo rawh, Dân lâirêl hen um nan si lo le, zângfahnâk lâirêl hen um nan si dauh.

¹⁵Zeitín asi lai ne? Dân lâirêl hen um kan si lo le, zângfahnâk lâirêl hen um kan si dauh ruangah kan soal ding ma si lai?

¹⁶Si lo e; âu sin zawnghah an thu zâwt ding hen to-aw ah nan lût chun, thihnâk rê hen soal to-aw mawh, repnâk rê hen thu zâwt to-aw mawh, a thu zâwt hen to-aw nan si ti nan theih lo mazei?

¹⁷Khawmsele, soal to-aw tla si khawm ule, sîntir dân a sinah nanna pêknâk chu thínlung tatak hen nan zâwt hen, chun soal lakah mi suak hen nan um le, repnâk to-aw tla nan hawng si rawh; churuang chun, Pathian sinah lâwmthu um seh; nan taksa chak lo ruangah minung dân hen thu ka sim asi.

¹⁹Nan taksa ðeng tla chu nâwmtâmnâk ah leh buarnâk ding hen buarnâk sal ah nanna pêk siang hâwi khan, tuah nan taksa ðeng tla chu thenhlimhnâk ding hen repnâk to-aw ah pêk siang u.

²⁰Sual to-aw tla nan si liau khan repnâk lakah nanna lît asi.

²¹Tuah nan thil zahpi mi lakah hin, kha liau khan rah zeí me nan tawng tâwn? Khabang thu dawnghnâk kha thihnâk asi tâwn asi.

²²Tuah lam chun soal lakah mi lît hen nan um le, Pathian to-aw tla nan hawng si hi, thenhlimhnâk tawng phah rê hen rah nan nei asi, chu dawnghnâk ah zungzâl nungnâk hen.

²³Sual man chu thihnâk asi; Pathian thilthawt pêk lam chu kan Lalpa Krist Jisu ruangah chun zungzâl nungnâk asi.

Rom 7

¹Asi chun, unau tla, Dân nih chun mi a dam kar zawzawng a tlûnah lâi a rêl tâwn ti nan theih lo masi? Dân theih mi tla sinah ka sim asi hi.

²Nunau pasal nei chu a pasal dam kar zawzawng Dân nih a pasal lakah phuar hen a um tâwn; sikhawmsele, a pasal chu a thih lam chun a pasal leikângah Dân a mi chu thlah hen a um tâwn.

³Chun, a pasal dam karah midang hen anna umh chun, "Tângdang pawmtâktu nu," an ti lai. A pasal a thih lam chun dân a mi chu thlah hen a um le, chun midang nei khawmsele tângdang a pawmtâk mi asi lo.

⁴Chun, ka unau le tla, midang, Pathian leikângah kan rah khonâk ding hen mithi lakah a thawh mi ngelchel kha nan nei khonâk ding hen, Krist taksa ruangah Dân leikângah thah hen nan hawng um rawh.

⁵Taksa ah kan um liau khan Dân ruangah duhnâk sual a hawng suak mi tla nih chun, kan taksa têng tla ah thihnâk rê a rah ding hen a t̄uan tâwn.

⁶Tuah lam chun hawng kan tleih tu lakah thi rawh hen, Dân lakah mi thlah hen kan um rawh, Dân r̄in mi lampi li ah silo hen, Thlarau lampi ah rian kan t̄uan asi.

⁷Zei me kan sim lai rawh ne? Dân chu sual masi? Si lo e! Sikhawmsele, Dân ruangah theih si lah sele chu sual kan theih lo ding mi; Dân nih chun, "Uh lah," ti lah sele chu uh hi kan theih lo ding mi.

⁸Sikhawmsele, sualnâk nih thupêk ruang chun a dêngkhâwng liau tawng hen, uhnâk zeizawng ka sungah a umtir. Dân lo chun sualnâk chu a thi asi.

⁹Chun, a lan khan kei dân lo hen ka nung le, sikhawmsele thupêk chu a hawng um kê hen sual a hawng thawk le,

¹⁰kei chu ka thi rawh. Chun, nungnâk ding hen thupêk chu thihnâk ding a hawng si ti ka theih rawh.

¹¹Sualnâk nih thupêk ruang chun dêngkhâwng tik tawng hen hawng ka bum le, thupêk chu mang hen hawng ka thah rawh asi.

¹²Chun, Dân chu a thenhlimh asi, thupêk khawm a thenhlimh le, â rep le, a t̄ha asi.

13Asi chun, thil ɿa chu ka rangah thihnâk a hawng si masi? Si lo e! Sualnâk chu ka rang thihnâk a hawng si dauh rawh asi. Chun, sualnâk chu sualnâk asi ti a lang khonâk ding hen, thil ɿa chu mang hen a ka thah asi. Sualnâk chu thupêk ruang khan soal fâk tak asi khonâk ding hen.

14Dân chu thlarau lei thil asi ti kan theih asi. Kei lam chu taksa leiah mi, soal sal ah zuar rawh mi ka si.

15Thil ka ti mi hi a ngaihnâk ka theih lo. Ka ti tâwn mi hi ka thilti duhzia asi lo, ka thil huatkâng tak chu ka ti dauh tâwn asi.

16Ka ti duhkâng chu ka ti asi chun, Dân chu a ɿa ti hen zâwt ka si lo lai mazei?

17Chun, ka thilti hi keimah ti asi lo rawh le, soal keimah lakah a um mi nih a ti mi asi dauh.

18Keimah lakah, chu chu ka taksa lakah tinâk asi, thu ɿa rerêng a um lo ti ka theih. Thil ɿa ti duhnâk chu keimah lakah a um narêng hen, thu ɿa tinâk lam chu a um lo.

19Thatnâk ti ka duh mi hi ka ti lo le, sualnâk ti ding ka duh lo mi hi ka ti dauh tâwn.

20Ka duh lo kâng chu ka ti asi chun, a titu chu kei ka si lo rawh le, soal keimah lakah a um mi chu asi dauh.

21Chun, hi dân hi ka hawng theih rawh; thil ɿa ti ka duh liauah sualnâk ka lakah a hawng um tâwn asi.

22Ka thinlung tak hen Pathian dân lakah ka lâwm tâwn.

23Sikhawmsele, ka taksa ɿeng tla lakah hin dân dang a um ti ka theih, chu nih chun ka thinlung dân a do le, ka taksa ɿeng tla lakah sualnâk dân a um mi sinah chun sal ah hawng ka ruai tâwn.

24Mi hamhkâi ka si chiammâm e! Hi thihnâk taksa lakah mi hi âu nih me hawng ka suah kho lai?

²⁵Jisu Krist kan Lalpa ruangah Pathian sinah lâwmthu kan sim asi. Chun keimah tak nih chun ka thinlung hen Pathian dân rian ka ÷uan tâwn, ka taksa lam nih chun sualnâk dân rian a ÷uan tâwn.

Rom 8

¹Chun, tu lam chun Krist Jisu ah um tla rangah chun mawhtirnâk rêng a um lo rawh.

²Krist Jisu ah nungnâk thlarau Dân nih chun sualnâk leh thihnâk Dân ah mi chu hawng kan suah rawh asi.

³Taksa chaklonâk ruangah Dân nih ti kho lo mi chu Pathian nih a ti kho. Amah Fapa ngelchel taksa soal hâwi put hen soal bâwlnâk dingah hawng fial hen, taksa lakah sualnâk um mi chu mawh a phurhtir rawh asi.

⁴Taksa Dân zâwt lo hen thlarau Dân zâwt dauhtu kanmah lakah hin Dân thuruat chu lîm hen a um khonâk ding hen.

⁵Taksa Dân ah um mi tla nih chun taksa lei thil tla an duh tâwn. Thlarau lei Dân ah um mi tla nih chun Thlarau lei thil tla an duh tâwn.

⁶Taksa lei thil tla duh chu thihnâk asi le, Thlarau lei thil duh lam chu nungnâk leh lungngamnâk asi.

⁷Taksa duhkâng chu Pathian donâk asi ruangah chu chu Pathian Dân hen a um lo le, um khawm a um kho lo asi.

⁸Chun, taksa ah um tla nih chun Pathian an lawmhtir kho lo.

⁹Sikhawmsele, Pathian Thlarau nanmah lakah a um tatak chun taksa ah um nan si lo le, Thlarau ah um nan si dauh. Khawmsele, âukhawm Krist thlarau neilo mi chu amah lakah mi asi lo,

¹⁰Krist chu nanmah lakah a um asi chun, sualnâk ruangah taksa chu a thi asi; thlarau lam chu Pathian repnâk hen mirep ah ruat nan si ruangah nungnâk asi.

¹¹Sikhawmsele, mithi lakah mi Jisu thawhnawlhtu thlarau chu nanmah lakah a um chun mithi lakah mi Krist Jisu thawhnawlhtu nih khan nanmah lakah um mi Thlarau ruangah chun, nan taksa thi kho tla chu a nungtir lai.

¹²Churungah unau le tla, bat kan nei; taksa duh dân ah um ding hen lam chun asi lo.

¹³Taksa duh dân hen nan um chun nan thi ngelchel ding asi. Sikhawmsele, taksa thilti tla chu Thlarau ah nan thah tâwn chun nan nung lai.

¹⁴Pathian Thlarau rui hen an um mi vial tla chu Pathian fa tla an si.

¹⁵Lâu ah um nawlh ding hen to-aw sinâk thlarau nan tawng asi lo le, fa sinâk thlarau nan tawng asi dauh, chu thlarau ruangah chun 'Abba, ka Pa ti hen kan âu tâwn hi.

¹⁶Thlarau ngelchel nih chun kanmah thlarau hen Pathian fa tla kan si ti hawng kan theihtir tâwn.

¹⁷Chun, fa tla kan si chun ro tingtu tla kan si le, Pathian ro tingtu, Krist tingpitu tla kan si. Jisu kan tuarpi tatak chun a sinah chawnglawmh hen kan um bâk lai.

¹⁸Tu liau tuarnâk tla hi, hi nûnah kan tlûnah rokualnâk langhtir ding mi hen chun tahthimh tlâk ah ka ruat lo.

¹⁹Thilsiam zawzawng tla nih chun thungâi lungum bû hen Pathian fa tla hawng langhnâk chu thungâi an mawhlah asi.

²⁰Thilsiam zawzawng tla chu thil salam thu thu a umtir ding hen an um rawh, mah duh hen um an si lo le, a umtirtu ruangah asi dauh. Chu lakah chun hi lungumnâk a um nget rih:

²¹thilsiam zawzawng tla ngelchel khawm chu siatnak to-aw ah mi suah hen an um lai le, Pathian fa tla thawsuaknâk rokual ah chun an lût awt asi.

²²Thilsiam zawzawng tla chu tutiang hen rûm leh nau neih nganfâk tuar hen an um chiauh asi ti kan theih asi.

²³Chu cho asi lo, kannih ngelchel khawm Thlarau Pathian thilpêk nei masatu nih hin, fa kan sinâk, kan taksa tlanhnâk chu ngâk hen, kannih ngelchel khawm kan thinlung hen kan rûm bâk.

²⁴Lungumnâk hen asi ruangsuaah hen kan um mi hi; sikhawmsele, muh kho ko lungumnâk hi lungumnâk asi lo. Mi nih a muh kho ko mi chu zeirangah a lungum nget tâwn?

²⁵Kan muh lo mi kan lungum asi chun kan ngâk rarâm tâwn asi.

²⁶Chu hâwi ber hen, Thlarau nih chun kan chaklonâk tla a bawmh tâwn le; zei hâwi a thlacham ding me si ti kan theih lo; sikhawmsele, thlarau nih chun rûm sim kho lo rê hen thla hawng kan cham piak tâwn.

²⁷Chun, Pathian duhzia hâwi vima hen mi thenhlimh tla chu thla a cham piak na tâwn ruangah, thinlung tla zauhtu nih chun Thlarau duhzia chu a theih tâwn asi.

²⁸Chun, Pathian dâwttu amah ruat hâwi hen a kawh mi tla rangah chun thatnâk ding hen zeizawng hen a ÷uan piak na tâwn ti kan theih.

²⁹A theihkan mi tla chu amah Fapa hâwi tak hen um ding hen a ruatkan asi, a Fapa chu unau tamtak tla lakah fa tîr a hawng si khonâk ding hen.

³⁰Chun, a ruatkan mi tla chu a kawh na le; chun, a kawh mi tla chu amah repnak ruangah mi rep a ruat hen an um chun, mi rep ah a ruat mi tla chu a chawnglawmh na.

³¹Chubang thu lakah chun zei me kan sim lai ne? Pathian kan leiah â ÷ang chun âu nih me hawng kan do kho lai?

³²A Fapa tak khawm zuah lo hen kan ektê ruangrûl ah pêktu nih chun thil zawzawng khawm a thawt hen hawng kan pêk sih awt lo masi? Pathian mi thîm tla chu âu nih phiar lai?

³³Mawhtirlotu kha Pathian asi.

³⁴Âu nih annih rangah mawhtir kho na lai? Jisu Krist chu thihnâk thawk hen a thawk le, Pathian vawrhlei ah to hen, Pathian sinah hawng kan sim piaktu asi lo mazei?

³⁵Krist dâwnâk lakah thawk hen âu nih me hawng kan ðhen kho lai? Hamhnâk nih mawh, ngaihsiatnâk nih mawh, nehsawhnâk nih mawh, pâmnâk nih mawh, takkaronâk nih mawh, ðhningkâinâk nih mawh, nâmsâu nih mawh hawng kan ðhen kho lai ma?

³⁶Pathian lasui thu nih, "Nangmah ruangah nî tlâk hen thah hen kan um tâwn, Dawrâ thah ding mi tla hâwi hen ruat kan si,' ti hen a sim hâwi khan.

³⁷Then lah e, chubang zawzawng lakah chun hawng kan dâwttu ruangah rokual tak hen nehtu kan si.

³⁸Thihnâk tla nungnâk tla, vânmifial tla, lalnâk tla, thil umchia tla, thil hawng um ding mi tla, thiltikhonâk tla,

³⁹sângnâk tla, thûknâk tla, thilsiam dang rerêng khawm nih, kan Lalpa Krist Jisu lakah um mi Pathian dâwnâk ah mi chu hawng kan ðhen kho lai lo ti dik tak hen ka theih.

Rom 9

¹Krist ah chun thudik ka sim asi, ka âwkrâwl lo. Thlarau Thenhlimh zârah chun ka siat le ðhat theihnâk khawm nih hawng ka theihpi le,

²ka thinlung ah hin hamhnâk fâk tak leh ngaihsiatnâk reh kho lo ka nei asi.

³Ka unau le tla, taksa leiah ka phun tla ruangah kei hi Krist sinah mi dangtir kho rê hen anmah ruangah siat phurh hen um rê sele ka ti asi.

⁴Pathian mi thîm tla an si le, fa sinâk, rokualnâk, thutiamnâk zawzawng tla an ta asi.

⁵Pu tla chu an tâ asi bâk, taksa leiah Krist chu anmah thawk hen suak asi fâwn; anih chu thil zawzawng tlûnah mi, zungzâl sawr tlâk Pathian asi! Amen.

- ⁶Sikhawmsele, Pathian thu chu zeikhawm lo hâwi a um asi lo le, Israel mi zawzawng tla khawm Pathian mi thîm an si ver lo.
- ⁷Abraham thlâk tla an si khawmsele an ektê hen a fa tla an si ver lo, "Isak lakah hin na thlâk tla an ti lai," ti asi dauh.
- ⁸Chu taksa dân mi fa tla chu Pathian fa an si lo, thutiam fa tla chu Abraham thlâk ah ruat an si dauh tinâk asi.
- ⁹Thutiam chu hi hi asi: "A hun liauah ka hawng kal lai le, Sari nih chun fapa a ring lai," ti hi.
- ¹⁰Chu cho asi lo le, Rebek nih mi pakhat kan pu Isak lakah phir a pâwi liau khan nau chu a hawng suak lânah,
- ¹¹sia leh ða an ti lânah, thilti ruang silo hen, a kawhtu duh ruang si dauh hen, thîm leikâng thu ah Pathian thuruat chu a bir khonâk ding hen a sinah chun,
- ¹²"A upa dauh mi nih a ngâksia dauh mi rian a ðuan lai," Pathian nih a ti kha. Pathian lasui thu nih,
- ¹³"Jakob chu ka dâwt le, Esau lam chu ka hua," ti hen a sim hâwi khan.
- ¹⁴Zei me kan sim lai rawh? Pathian lakah chun replonâk a um masi? A um rîlmâl loh.
- ¹⁵Anih nih chun, "Ka zângfah mi chu ka zângfah lai le, khua ka ruatnâk lakah chun khua ka ruat lai," ti hen, Mosi sinah a sim mi kha.
- ¹⁶Churuangah, a duhtu ruangah asi lo le, a titu ruangah asi lêm lo, a zângfahtu Pathian ruang asi dauh.
- ¹⁷Pathian lasui thu nih Pharoa sinah chun, "Hi ruang hin ka nan dirh le, nangmah lakah chun ka thiltikhonâk ka zauhtir khonâk ding hen leh laikulh zawzawng ah ka min a thang khonâk ding hen," a ti asi.
- ¹⁸Pathian nih a duh mi zawng a zângfah tâwn le, a duh mi zawng a lungkhungtir tâwn asi.

- ¹⁹Nangnih chun, ka sinah, "Zeirang me a nan sâwi nget? A duhzia âu nih me kham tâwn?" na ti awt dahmawh.
- ²⁰Asi, sikhawmsele, aw minung, Pathian êltu chu âu me na si le? Thilsiam nih chun a siamtu sinah, 'Zeirangah me hi hâwi hen na hawng ka siam?' a ti lai ma?
- ²¹Valei tlang khat bêl pakhat sung tak hen, bêl pakhat sung lo tak siam ding hen belhêmtu nih chun nêng tlang tlûnah thu a nei lo masi?
- ²²Zângfahnâk bêl, rokual ding hen a timhtuah kanh tla lak chun, a zângfahnâk tam zia a zauhtir khonâk ding hen, thinthawknâk bêl veih tlâk tla tlûnah chun, Pathian nih thinthawk leh a thiltikhonâk langhtir duh khawmsele, â dawnh rarâm chun ze me paw lai?
- ²⁴Chu zângfahnâk bêl tla chu Juda tla lak mi cho silo hen, Phundang tla lakah mi khawm kawh an si.
- ²⁵Hose lasuibu ah chun, "Ka mi tla si dah lo mi chu 'Ka mi tla' ka ti lai. Phun ka dâwt dah lo mi tla chu 'Ka dâwt mi tla' ka ti lai.
- ²⁶Chun, hi hâwi hi asi lai le, an sinah, 'Ka mi tla nan si lo' a tinâk mun takah chun, 'Pathian nung fa tla' ti hen an um lai," ti rîn hâwi khan.
- ²⁷Isai khawm nih Israel tla thu a phuang le, "Israel tla chu tisumsumriat ah sep zat hen tam khawmsele, a rêp bang cho chu ruangsuah hen an um lai.
- ²⁸Lalpa nih chun rang tak a dih ziar hen tual tlûnah a rêp ding thu a lîm awt asi," a ti kha.
- ²⁹Isai ber nih, "Thiltikho Lalpa nih chun chi thlâktu hawng kan zuah piak lah sele chu Sodom khua hâwi hen kan um lai rawh, Gomorah khua hâwi hen siam hen kan um lai rawh," ti hen a simkan hâwi khan.
- ³⁰Zei me kan sim lai rawh ne? Phundang repnâk thâwl lo tla nih chun repnâk an hawng phâk rawh asi--lungnâk ruangah repnâk chu.
- ³¹Israel repnâk zûltu lam nih chun repnâk dân chu a phâk lo rawh.

³²Zei ruang ah me? Lungnâk hen an zûl lo le, thilti a tawng kho hâwi hen an zûl ruangah asi. Tlûknâk lung ah chun an tlu le,

³³Pathian lasui thu nih: "Zauhnik, Zion ah chun tlûknâk lung leh khamnâk lungpi ka siah le, âuzawng amah lungtu vial chu an lungdawng lai loh," ti hen a sim hâwi khan.

Rom 10

¹Ka unau tla, ka thinlung duhzia leh ka mi tla rangah Pathian sinah ka thlachamnâk san chem chu ruangsuah hen an um khonâk ding chu asi.

²Pathian leiah ðhanemsemse an ngâi ti ka theihpi asi, theih rangtling hâwi lam chun an ruat lo.

³Pathian repnâk theihlo hen, mah repnâk birhtir tum hen, Pathian repnâk ah anna pek lo.

⁴Krist chu a lungtu tla vial rangah repnâk an nei khonâk ding hen Dân birhtirtu asi.

⁵Mosi nih chun "Dân ah repnâk zâwttu chu, chu repnâk ruangah chun an nung lai," ti hen a rîn.

⁶Lungnâk ah repnâk lam nih chun hi hâwi hen a sim: "Nan thinlung ah, 'âu me vân ah kê lai?' mawh (chu chu tlûnlei thawk hen Krist hawng ðumpi ding tinâk asi),

⁷'âu me mithi khua ah ðum lai?' mawh (chu chu mithi lakah thawk hen Krist kêipi ding tinâk asi), ti lah u,' ti hen.

⁸Asi chun zei me a sim? "Thu nih chun a nan naih, na kê leh na thinlung khawm ah a um," ti hen a sim asi; chu chu lungnâk thu kan sim tâwn mi hi asi.

⁹"Na kê hen Jisu chu Lalpa asi ti na ðanh hen, mithi lakah mi Pathian nih a thawh ti na thinlung ah na lung chun ruangsuah hen na um lai," ti hen.

¹⁰Mi leh nih thinlung hen an lung le, repnâk an tawng tâwn; kê hen an ðanh le, ruangsuahnâk an tawng tâwn asi.

¹¹Pathian lasui thu nih, "Âuzawng amah lungtu vial an mualpho lai loh," a ti asi.

¹²Juda leh Phundang tla chu zeikhawm ah anna dang lêm lo, Lalpa pakhat an ektê tlûnah Lalpa asi le, a lamtu vial tla tlûnah ÷hatnâk tamtak a nei.

¹³"Âuzawng Lalpa min lamtu vial tla chu ruangsuaah hen an um lai," ti asi.

¹⁴Asi chun, an lung lo mi chu zeitin an lam lai? A thu an theih lo mi chu zeitin an lung lai? Thusimtu um lo hen zeitin an theih lai?

¹⁵Fial an si lo chun zeitin thu an sim lai? "Thâwngthâng Ṭha simtu tla hawng kal chu a chê a!" ti hen Pathian lasui thu nih a sim hâwi khan.

¹⁶Sikhawmsele, Thâwngthâng Ṭha chu an ektê hen an lung ver lo. Isai nih, "Lalpa kan thusim âu nih me lung?" a ti ruangah.

¹⁷Chun, lungnâk chu theihnâk ruangah a hawng um le, chun theihnâk chu Krist thu ruangah a hawng um.

¹⁸Sikhawmsele, ka deih le: Thu an theih lo mi hi a dik tak ma? Theih ta a, Pathian lasui thu nih a sim hâwi khan: "An hâu chu ram kipah a thang le, an thu kâwlkil tiang hen a thang rawh," ti hen.

¹⁹Chun, ka deih nawlh le: Israel mi tla nih an theih lo masi? Mosi chu sângru ding masachem asi: "Phun ah rêl tlâk lo mang hen, ka nan thîktir na awt; phun fing lo tla chu mang hen nan thin ka nan thawktir na awt," ti hen.

²⁰Chun, Isai nih râṭṭha tak hen, "An ka hâwl lo mi tla tawng hen ka um le, an ka lam lo mi tla sinah theihtir hen ka um," ti hen a sim.

²¹Sikhawmsele, Israel mi tla thu lakah chun, "Mi ê-aw ngâilo leh hel mang tla rangah nî tlâk hen anmah lawmh duh hen ka bân ka phar tâwn kha," a ti.

Rom 11

¹Asi chun, Pathian nih a mi tla chu a lawnh masi? Lawnh lo e! Kei khawm Israel mi, Abraham thlâk Benjamin phun ka si.



- ²Pathian nih a theihkan mi tla chu a lawnh lo. Pathian lasui thu nih Elija thu a sim mi hi nan theih lo ma? Anih nih chun Israel mi tla thu Pathian sinah a tlunh le,
- ³Lalpa, na khuavâng tla an thah le, na mâichâm tla an chimtir. Keimah lâwnng ka um rih le, kei khawm thah an ka tum asi," a ti mi hi.
- ⁴Sikhawmsele, Pathian nih zeitin me a sâng? "Baal mâika ah siksidîr dah lo mi sâng sarih keimah rangah ka zuah ko asi," ti hen a sâng.
- ⁵Chu hâwi ber hen, tuliau khawmah, zângfahnâk ruangah Pathian nih a thîm na mi tâwm an um.
- ⁶Zângfahnâk ruangah asi chun thilti ruangah asi lai lo rawh. Chu hâwi asi lo chun, zângfahnâk hi zângfahnâk asi lai loh.
- ⁷Zeitin asi lai rawh ne? Israel mi tla nih chun an hâwl mi chu an tawng lo le, thîm mi tla lam nih chun an tawng le, a dang zawzawng tla chu an mawlâwt ver rawh asi.
- ⁸"Pathian nih tusûn tiang hen ihmu suaknâk thlarau a pêk le, muh kholonâk mit tla, theih kholonâk nâ tla hen," ti rîn hâwi khan.
- ⁹Chun David nih chun, "Chun an puai tla chu an rangah thang leh tleihtu, tlûknâk leh rêpnâk hawng si seh.
- ¹⁰An muh kholonâk ding hen an mit tla hawng chaw seh, zeiliau zawngah anna hamhnâk ah an kêng kûntir kumza na," a ti.
- ¹¹Asi leh, Juda tla an tlû liauah an siatnâk ah an tlû pawt mi ma si lai? Chu hâwi si loh! An tlû ruangah Phundang tla sinah chun ruangsuahnâk a hawng tlung dauh lehlam asi, Israel mi tla thîktir na ding hen.
- ¹²Churawhchun, Juda tla sualnâk chu laikulh neihsiahnâk asi, chun an thlarau ngâktahnâk chu Phundang tla rangah neihsiahnâk asi. An rangtlingnâk châng chu neihsiah khunnâk si lai.
- ¹³Churawhchun, nannih Phundang tla sinah ka sim asi, kei Phundang tla sinah fial ka si ruangah, ka phun tla ka thîktir kho râmnâk ding hen leh an

lakah zeimaw mi tla ruang ka suah kho na nâk ding hen ka rianțuannâk hi ka putso asi.

¹⁵Lawmh lo an si liau men ah laikulh chu Pathian hen hâwi tla ah siam hen an um chun anmah tla lawmhnawlnhâk ding chu thihnâk ah mi nung nawlnhâk lo chu ze me si lai?

¹⁶Chun, sang sêu masa mi chu a thenlimh chun a tlang khawm chu hâwi a thenlimh asi, chun a ram chu a thenlimh chun țeng tla khawm chu hâwi ber asi.

¹⁷Chun a țeng zeimaw mi chu khiak hen a um chun nang, Phundang, oliv suak si hen, Juda lakah peh hen na um le, oliv thing ah țatnâk ram va a bâwm bâk mi na si chun țeng dang lakah chun a zûm lah.

¹⁸A zûm khawm le, nang a ram châwmtu na si lo le, a ram chu a nan châwmtu asi dauh.

¹⁹Chun, nangnih, "Peh hen ka um khonâk ding hen țeng tla khiak hen an um rawh," na ti lai.

²⁰Hi hi a dik asi: An lunglonâk ruangah khiak hen an um le; nang na lungnâk ruangah na dîr asi.

²¹A zûm lah le, țih lehlam rawh: Pathian nih țeng tatak tla chu a zuah lo chun, nang khawm a nan zuah lai loh.

²²Chun, Pathian țat zia leh țihnung a kâi zia chu ruat nik; a tlû mi tla rangah chun țihnung a kâi le, nang rangah lam chun a țha asi, a țatnâk ah na um ko chun; chu lo chun nang khawm sah hen na um lai.

²³Chun, Juda tla khawm chu lunglo hen an um kumza lo chun, peh hen an um lai; Pathian nih anmah tla a peh nawlh kho na asi.

²⁴Nang oliv suak rerêng lakah mi tan phak mi men, suak dân lo hâwi hen oliv thing țha ah peh hen na um chun chubang a țeng tatak tla chu anmah oliv thing lîlâ ah chun peh an si tuktarâi lai.

²⁵Unau le tla, thuthup hi nan theih loh ka duh lo, chu lo chun nanna fingtir lai le; Phundang tla rangtlingnâk a hawng tlung lân lo chu Israel mi zeimaw mi tla tlûnah thinlung changnâk a hawng tlung rih asi, ti hi.

²⁶Chun, Israel mi zawzawng ruangsuaah hen an um ding zia chu hi hi asi: Pathian lasui thu nih, "Zion thawk hen ruangsuahtu a hawng suak lai le, Jakob thlâk tla thawk hen Pathian sunhsaklonâk a tlâutir lai.

²⁷Chu chu an sinah ka thutiam ding chu asi, an sual tla ka lâk tik chun," ti hen a sim hâwi khan.

²⁸Thâwngthâng Ṭha lei dawn chun nanmah tla rangah mêlma an si le, thîm leikâng thu ruat lam chun thlâktu tla ruang khan duhtak tla an si.

²⁹Pathian nih a thilthawt pêk ah leh a kawhnâk ah chun a thinlung a lêt dah lo.

³⁰Nannih Phundang tla rangah lam chun, tuan chun Pathian thu nan ngâi lo le, sikhawmsele tuah lam chun, Juda tla nih an ngâilo ruangah Pathian khuaruatnâk nan tawng asi.

³¹Chu hâwi ber hen tuah chun Pathian nih khua a nan ruat na ruangah hin, khuaruatnâk nan tawng khonâk ding hen, Juda tla khawm nih Pathian thu an ngâi rawh asi hi khuaruatnâk an tawng bâk nâk ding hen.

³²Pathian nih khua a ruat ver na kho ding hen mi zawzawng chu lunglonâk ah a khumh ver rawh.

³³Pathian finghnâk leh theihnâk tam zia chu a thûk a! A lâirêlnâk tla chu theih kho lo leh a lampi tla chu zâwt kho mi zât asi lo chiam e!

³⁴Lalpa thinlung chu âu nih me theih? Remruat piaktu ah an a ðang rawh?

³⁵Rulhnawlh ding khawm hen a sinah âu nih thu pêk masa?

³⁶Amah thawk hen leh amah ruangah leh amah sinah thil zawzawng a hawng um asi; amah sinah chun zungzâl hen rokualnâk um seh! Amen.

Rom 12



- ¹Chun, unau le tla, Pathian khuaruatnâk ruangah hin bâwlnâk nung leh thenhlimh leh Pathian lawmh tlâk si ding hen nan taksa chu pêk ding hen ka nan ngiar na asi, chu chu nan rianṭuan ding rêng asi.
- ²Hi laikulh dân hâwi hen um lah ule, Pathian duhzia a ṭha leh lawmh tlâk leh ṭhat rangtling chu nan theihfiang khonâk ding hen nan thinlung a thar a um hen hawng a dang dauh u.
- ³Pathian nih a ka pêk mi zângfahnâk ruangah hin nan lakah âukhawm mah umdân tâwk nûnlêm ah sung-û tir lo hen, Pathian nih mikip sinah lungnâk tâwk a pêk hâwi vima hen rep tak a ruat dauh ding hen ka nan ti chiam na.
- ⁴Taksa pumkhat ah ṭeng tamtak nan nei, ṭeng zawzawng thilti lam chu â bang lo le,
- ⁵chu hâwi ber hen, kannih tamtak sikhawmsele, Krist lakah chun taksa pumkhat kan si le, pakhat khat hen a ṭeng tawnh chiau kan si.
- ⁶Zângfahnâk hawng kan pêk hâwi vima hen thilthawt pêk dang dang kan nei chiau le, thusim ding asi chun, kan lung tâwk hâwi vima hen kan sim lai;
- ⁷rianṭuan ding asi chun rian kan ṭuan thlir lai; sîntirtu khawm nih sîntir thlir seh.
- ⁸Fawrhtu nih chun fawrh thlir seh, thilpêktu nih chun ûi lo hen pêk seh; lâirêltu nih taimâk suah tak hen rêl seh; mi vêlneitu nih lâwm tak hen vêlnei seh.
- ⁹Dâwtnâk chu perpetnâk tel lo hen si seh. Sual lei chu hua ule, ṭhat lei chu tleih thlir u.
- ¹⁰Unau tla siherh leikângah chun siherh tak hen a siherh tawnh chiau u.
- ¹¹Chawnglawmh leikângah chun a duh piak tawnh ule; taimâk suah leikângah chun zângzê lah ule, thlarau leikângah chun ṭhanemsemsê ngâi ule, Lalpa rianṭuan u.
- ¹²Lungumnâk leikângah chun a lâwm ule, hamhtuar leikângah chun felfê ule, thlachamnâk leikângah chun thlacham kumza ule;

¹³mi thenhlimh tla samhphângnâk ah chun, ẵngpi ule, khual tla rangah lawmh kumza na u.

¹⁴An nehsawh natu chu malsâwm na ule; hawlhsiat chu barh lah u.

¹⁵Â lâwm mi tla chu lâwmpi ule, a ẵp mi tla chu ẵppi u.

¹⁶Dawnruat munkhat hen a um tawnh u. A Sung-ủ tir tuk lah u, nauta tla kawmh dauh na u. A fingtir lah u.

¹⁷Âu squal khawm squal hen rulh lah u. Mi zawzawng ngaih hen thil dawh ruatkan u.

¹⁸Ti kho asi chun, nangmah lei tal mi zawzawng hen rem hen um u.

¹⁹Duhtak le tla, nan phủ lam lah u, "Keimah nihlehrủl ka sam lai, Lalpa nih a ti," ti rủn asi.

²⁰Churuangah, na mủlma a sung a vủng chun, ei dủng pủk rawh, a tủ a hủl chun, din dủng pủk rawh; chu hủwi na ti chun a thilti diklonủk tla lakah na mualphoh kho lai.

²¹Sual neh hen um lah ule, ẵatnủk hen squal chu neh dauh rawh.

Rom 13

¹Mi kip an tlủnah lủirủltu thu thu hen um na seh. Pathian thu lo hen ủukhawm lủirủltu an um lo; lủirủltu an um mi tla hi Pathian ruat an si.

²Churuangah, ủuzawng lủirủltu ủltu chu Pathian ruat dotu an si; a dotu tla nih chun anmah tlủnah lủirủlnủk an tawng lai.

³Lủirủltu tla chu thil ẵa titu rangah chun ẵhủng a kủi lo le, thil ẵa lo titu rangah lam chun ẵhủngkủi an si. Asi chun lủirủltu ẵhủ lo hen um na duh ma?

⁴Thil ẵa ti le, a sawr na tawng lai; anih chu na ẵatnủk dủng hen Pathian rianẵuantu asi. Khawmsele, thilsual na ti chun, ẵhủ rawh, rủp dủng hen a thiltikhonủk chu a tak asi ruangah. Anih chu Pathian rianẵuantu, thilsual titu tlủnah thinhawk hen phu lamtu asi.



⁵Churuagah, thinthawk ÷ih ruang ko silo hen na siat leh ÷at theihnâk ruang khawmah lâirêltu thu thu hen na um ding rerêng asi.

⁶Hi ruangah hin siah khawm na châwi tâwn khateh; chu hâwi thil tak ti rarâm ding hen Pathian rianñuantu an asi.

⁷Mi zawzawng sinah pêk ding mi vial pêk u; tual man pêknâk ding mi sinah chun tual man pêk ule, siah châwinâk ding mi sinah chun siah châwi ule; zah ding mi chu zah u, chawnglawmh ding mi chawnglawmh u.

⁸A dâwt tawnhnâk cho lo chu âu sin khawmah zeikhawm a bat lah u; mah minung hâwi dâwttu nih chun Dân chu a zâwt kim rawh asi.

⁹Hi bang, "Tângdang pawmtâk lah, mi thah lah, fîr lah," ti leh, thupêk dang um mi rerêng tla hi. "Nangmah na dâwt hâwi hen na zâwlbâwm tla na dâwt ding asi," ti nih hin a put ver asi.

¹⁰Dâwtnâk nih zâwlbâwm tla a râwk dah lo; churuangah dâwtnâk hi Dân zawh rangtlingnâk asi.

¹¹Tuliau thil umzia nan theih ruangah leh it mi tla ÷hangh tik asi tatak rawh ti nan theih ruangah chu chu ka sim asi; tuah chun kan lung tîr ngâk hen khan kan ruangsuaahnâk chu a nâi dadauh rawh.

¹²Zân hi a ral dêngmâng rawh le, khua a dei awt rawh; churuangah, mûi thilti chu lawnh sele, chêu thuam hen kanna thuam lai.

¹³Sûn ah um hâwi hen dawh tak hen kan um lai, zû din nawk leh zû rî a um lo hen, hur leh a duh a um lo hen, sual leh a nahsuaah a um lo hen.

¹⁴Lal Jisu Krist râlthuam hen chun a thuam dauh ule, nan taksa duhnâk zawh ding hen zeikhawm a siam lah u.

Rom 14

¹Chun, lungnâk ah chak lo mi chu a zumhmai hnâk tla simsâwi lo hen lawmh u.

²Mi pakhat nih thil zeizawng hi ei kho hen a ruat le, mi chak lo lam nih chun thlâi ko a ei tâwn.



- ³Zeizawng a ei mi nih chun a ei lo mi zauhnawmh lah seh; a ei lo mi khawm nih a ei mi chu simsâwi lah seh: Pathian nih anih chu a lawmh rawh asi.
- ⁴Midang to-aw simsâwitu chu âu me na si? A dîr leh a tlûk chu amah hotu rang asi. Sikhawmsele, anih khawm dîrtir hen a um lai, Lalpa nih chun a dîrtir kho asi.
- ⁵Mi pakhat nih ni khat hi ni dang ngâk hen a sung-û tir tâwn le, midang nih ni zawzawng hi bang ver hen a ngaih tâwn asi.
- ⁶Mi kip mah thinlung lakah a theihthiam seh. Ni ulhtu nih chun Lalpa chawnglawmhnâk ding hen a ulh tâwn asi. Chun, zeizawng eitu nih chun, Pathian sinah lâwmthu a sim ruangah Lalpa chawnglawmhnâk ding hen a ei tâwn; a ei lotu khawm nih chun Pathian sinah lâwmthu a sim le, Lalpa chawnglawmhnâk ding hen a ei lo tâwn asi.
- ⁷Âukhawm mah rangah nung kan si lo le, âukhawm mah rangah thi kan si ber lo.
- ⁸Kan nung chun Lalpa rangah kan nung le, kan thih khawm Lalpa rangah kan thi asi; churuarah, kan nung khawmah, kan thi khawmah, Lalpa tâ kan si.
- ⁹Krist thihnâk leh a hawng nung nawlnhâk san chu, minung leh mithi Lalpa asi khonâk hi asi.
- ¹⁰Sikhawmsele, nangnih zeitin na unau na sâwi zia? Asi leh, nangnih zeitin zia na unau na zauhnawmh? Pathian lâirêlnâk tophah mâika ah kan ektê hen kan dîr awt asi.
- ¹¹Pathiau lasui thu nih, "Lalpa nih chun, Pathian nung ka si ruangah mipka mâika ah an kûn lai le, lei kip khawm nih Pathian ka si zia a phuang lai," ti hen, a sim hâwi khan.
- ¹²Chun, kan ektê hen Pathian sinah mah thâwngthâng kan sim chiau ding asi.
- ¹³Churuarah, kanna sâwi lai lo rawh. Chu ngâk chun, âukhawm nih mah unau khamnâk mawh tlûknâk mawh siam lo a tum dauh u.

¹⁴Amh lak cho chun thiango zeikhawm a um lo ti Lalpa Jisu ah chun thungâi ka theihfiang, zeimawh thiang lo hen ruattu rang chun amah rang chun a thiang lo asi.

¹⁵Na zeï lo ei ruangah na unau thinlung a fâk chun dâwtnâk dân na zâwt lo rawh asi. Amah ruangrûl ah Krist a thih piak mi chu na zeï lo ei nih veih lah seh.

¹⁶Chun, na rangah ðatnâk chu sual leiah sim hen um lah seh;

¹⁷Pathian Ram chu din leh ei thu asi lo le, repnâk tla, remnâk tla, Thlarau Thenhlimh lâwmnâk tla asi dauh.

¹⁸Âuzawng chubang thu lakah chun Krist rianñuan chu Pathian lawmhkâng leh minung sawr hen a um tâwn asi.

¹⁹Chun, remnâk ding leh a ðattir tawnhnâk thu tla chu kan ðhâwl lai.

²⁰Na zeï lo ei ruangah Pathian rianñuan râwk lah. Thu zawzawng a thenhlimh ngâk, sikhawmsele, a zeï lo ei nih mi a thlûk chun a eitu rangah sual asi.

²¹Na unau tlûknâk ding asi chun, sa ei lo tla, uain din lo tla, thil zeizawng khawm tilo a ðha asi.

²²Lungnâk na nei mi chu Pathian mâika ah nangmah cho theih hen nei ko rawh. Mah nih ðha ti leikângah mawh hen â ruat lo mi chu a thaw a suak.

²³Khawmsele, zumhmaihtu nih a ei chun, lungnâk hen a ei lo ruangah mawh hen a um asi; zeizawng lungnâk lo hen ti chu sual asi.

Rom 15

¹Chun, kannih lungnâk ah mi chak tla nih hin mah lawmhnâk hâwl lo hen, mi chak lo tla ðangpi leh ritphurh sâwng na ding asi.

²An ðatnâk ding hen mah zâwlbâwm tla lawmhtir cho si lo hen Thlarau ah ðhanglian tir na kan tum chiau lai.

³Krist khawm nih mah lawmhnâk a hâwl lo. "Nangmah fâitu tla fâinâk chu keimah tlûnah a tlâ," ti rîn hâwi khan asi dauh.



⁴Pathian lasui thu ah felfênâk leh lungngamnâk tawng hen lungumnâk kan nei khonâk ding hen, tuan liauah rîn mi tla chu kanmah hawng kan sîntirnâk ding asi ruangah.

⁵Chun, kan Lalpa Jisu Krist Pa leh Pathian chu thinlung munkhat leh thurual a kan chawnglawmh khonâk ding hen, felfênâk leh lungngamnâk Pathian nih chun Krist Jisu sim hâwi hen, thinlung munkhat put hen a nan umtir na seh.

⁷Churuangah, Krist nih chun Pathian rokualnâk ding hen a nan lawmh na mi hâwi khan a lawmh tawnh u.

⁸Hi hi ka sim asi: Thlâktu tla sinah thutiam tla kha birhtir ding leh a zângfahnâk ruangah Phundang tla nih Pathian an chawnglawmh khonâk ding hen, Pathian thu a dik ti theihtirnâk ding hen Krist chu fêmtan tla rianțuan ah a hawng um le; Pathian lasui thu nih: "Churuangah, Phundang tla lakah ka nan sawr lai le, na min chawnglawmhnâk ding hen la ka sak lai," ti hen, a sim hâwi khan.

¹⁰Chun, a sim nawlh le: "Nannah Phundang zawzawng le tla, a mi tla hen a lâwm u," ti hen.

¹¹Chun, "Nannah Phundang zawzawng le tla, Lalpa chu sawr u; mi zawzawng khawm nih amah sawr seh," a ti nawlh.

¹²Chun, Isai nih, "Jese zung leh ram chu a um lai le, Phundang tla Lal ah um ding hen a hawng suak ding chu a um fâwn lai; anih chu Phundang tla nih chun an lungum san lai," a ti nawlh ber.

¹³Thlarau Thenhlimh thiltikhonâk zârah lungumnâk nan nei tam khonâk ding hen, lungumnâk Pathian nih chun nan lung ruangah lâwmnâk leh remnâk chi kip hen a nan khattir na seh.

¹⁴Chun ka unau le tla, nanmah tla thu chu nanmah ngelchel thatnâk hen nan khat hen, finghnâk chi kip nan nei hen, nun nanna simh tawnh kho ti keimah ngelchel nih dik tak hen ka theih.

¹⁵Sikhawmsele, Phundang tla lakah Krist Jisu rianțuantu ah ka um khonâk ding hen Pathian nih hawng ka pêk mi zângfahnâk ruangah hin a nan theihpi



na ding hen zeimaw kar lakah râłtha dauh hen ka rîn asi. Ka ap mi Phundang tla chu Thlarau Thenhlimh nih thenhlimhtir mi an si le, lawmh tlâk an si khonâk ding hen Pathian Thâwngthâng Țha leukângah bâwlpu rian ka Țuan asi.

¹⁷Chun, Pathian leukângah Krist Jisu ah putso ding ka nei asi.

¹⁸Krist nih Phundang tla lungtir ding hen, thusim leh thilti hen, singsiahnâk tla leh thilchê tla, Thlarau Thenhlimh thiltikhonâk ah chun, keimah mang hen a thilti tla cho lo chu zeikhawm sim ka ngamh loh. Jerusalem khua leh a kiangkam ram thawk hen, Ilurikon ram tiang hen, Krist Thâwngthâng Țha chu ram kipah kim hen ka sim rawh; keimah mang hen a thilti chu chu tluk asi.

²⁰Asi, midang lungphûm tlûnah dirh ka si lonâk ding hen, Thâwngthâng Țha chu Krist min lam rawh nâk mun ah sim lo hen,

²¹Pathian lasui thu nih: "A thâwngthâng sim dahlonâk mi tla nih chun, an muh lai le, theih dahlo mi tla nih chun an theih lai," ti hen a sim hâwi khan, sim ka tum dauh tâwn asi.

²²Churuang tak chun asi, nan sinah hawng kal ding ka tlawlh kumza tâwn mi chu.

²³Tuah lam chun, hi ram kiangkam ah hin Țuannâk mun rerêng ka nei lo rawh le, kum tamtak chu nan sinah hawng kal ding duh hen ka um rawh le,

²⁴Spain ram ah ka kal tik zawngah kal pah hen a nan muh na ding ka lungum le, nanmah tla chim rang hen a nan kawmh tâ na rih sele, chu leiah ka kalnâk ah chun nannih tla nih nan ka thlah ding hen ka lungum.

²⁵Tuah lam chun, mi thenhlimh tla rianȚuan ding hen Jerusalem khua ah ka kal awt rih asi.

²⁶Makedonia leh Gris ram ah mi tla nih chun lungâwi tak hen Jerusalem khua ah mi thenhlimh tla a pâm mi tla rangah sum an thawh rawh asi.

²⁷Asi, lungâwi tak hen an ti asi, an lakah anna bat rêng asi, Phundang tla nih an thlarau lei thilti tla an bâwmpi na asi chun, laikulh lei thil hen anmah tla tangpi bâk rûl a herh rêng asi.

²⁸Churuangah, chu chu ka ti hen, rah khawm chu anmah tla fiang tlo hen ka muhtir na thluh chun, nanmah tla pal hen, Spain ram ah ka kal vima lai.

²⁹Chun nan sinah ka hawng kal tikah Krist malsâwmnâk rangtling put hen ka hawng kal lai ti ka theih.

³⁰Unau le tla, thla nan ka cham piaknâk ah chun, Judai ram ah lunglo tla lakah ka him khonâk ding hen leh Jerusalem khua rang dingah tangpinâk ka put mi hi mi thenhlimh tla lawmhkâng tak asi khonâk ding hen thla hawng ka champi rarâm ding hen Lalpa Jisu Krist leh Thlarau Thenhlimh dâwnnâk hen ka nan ngiar chiam na;

³²Pathian rem tih hâwi hen lâwptlo tak a nan sinah ka hawng kal hen kanna panhlâu rual khonâk ding hen.

³³Remnâk Pathian chu nan ektê sinah um seh. Amen.

Rom 16

¹Kan farnu Phoibi Kenkria khua ah kawhmi rianțuantu hi, Lalpa min hen mi thenhlimh tla hâwi ber hen nan hawng lawmh ding

²leh nan bawmh a herhnâk kipah bawmh ding hen an meltheihtir na ka duh asi. Amah ngelchel khawm hi mi tamtak bawmhtu a hawng si tâwn le, keimah ngelchel khawm a ka bawmh asi.

³Priskili leh Akuila, Krist Jisu ah ka rianțuanpi, ka nungnâk,

⁴humnâk dingah ngâwng dawnh tla kha chibai hawng ka bûk piak; kei cho silo hen, Phundang kawhmi murui zawzawng khawm nih an sinah lâwmthu an sim asi.

⁵An in ah kawhmi tla anna pûm mi tla chu chibai hawng ka bûk piak na ber u. Ka duhtak Epainita, Asia ram ah Krist lung masachemtu kha chibai hawng ka bûk piak u.

- ⁶Mari, nan rangah hamh tak a ÷uantu kha, chibai hawng ka bûk piak u.
- ⁷Ka hâwi Juda mi, Andronika, leh Junia, ka rêngtlâpi tla kha chibai hawng ka bûk piak u; annih chu mifial tla lakah minthang tak an si le, ka ruangrûl ah Krist lakah um masa dauh an si.
- ⁸Ampliata, Lalpa ah ka duhtak kha, chibai hawng ka bûk piak u.
- ⁹Krist ah ka rian÷uanpi Urbana leh ka duhtak Stakua chibai hawng ka bûk piak u.
- ¹⁰Krist lakah mi tak, Apelis kha chibai hawng ka bûk piak u. Aristobulus dâwngsung tla lakah mi kha chibai hawng ka bûk piak u.
- ¹¹Ka phun Herodion kha, chibai hawng ka bûk piak u. Narkisa dâwngsung lakah mi, Lalpa lakah um mi tla kha chibai hawng ka bûk piak u.
- ¹²Trufaina leh Truphosa Lalpa a rian hamh tak a ÷uan tâwn tla kha chibai hawng ka bûk piak u. Duhtak Parsi, Lalpa lakah hamh tak hen rian÷uan rawh mi kha, chibai hawng ka bûk piak u.
- ¹³Lalpa lakah thîm mi Rufa leh a nu, ka nu bâk kha, chibai hawng ka bûk piak u.
- ¹⁴Asunkrita tla, Phlegon, Hermi tla, Patroba tla, Herma tla, an sinah, unau um tla hen khan, chibai hawng ka bûk piak u.
- ¹⁵Philologa leh Juli hen, Neria leh a farnu hen, Olimpa hen, an sinah mi thenhlimh um mi zawzawng hen khan, chibai hawng ka bûk piak u.
- ¹⁶Chawchawk thenhlimh hen chibai a bûk u. Krist kawhmi murui zawzawng nih chibai an bûk na asi.
- ¹⁷Chun, unau le tla, sîntirnâk thu nanmah sîn lo leikângah ÷hennâk leh tlûknâk siamtu tla chu ÷ha dek a vêng ding leh hawitâk ding hen ka nan ngiar na.
- ¹⁸Chu hâwi mi tla nih chun kan Lalpa Krist rian an ÷uan lo le, anmah paw rian an ÷uan dauh tâwn; an kê ÷hatnâk leh an hawlh thiamnâk hen mi fing lo tla thinlung an perpet tâwn.

¹⁹Nan lung zia chu mi zawzawng lakah a thang rawh ruangah. Churuangah, nanmah leukâng thu ah ka lâwm asi; khawmsele chu, ðha leukângah chun nan fing hen sual leukângah nan fing lo ka duh asi.

²⁰Chun, remnâk Pathian nih chun nan kêzaphah tangah Setan chu a nan lamhbêktir sawm na lai. Kan Lalpa Jisu Krist zângfahnâk chu nan sinah um seh.

²¹Ka rianþuanpi Timothe leh ka phun hâwi Lukia tla, Jason leh Sosipater tla nih chibai an bûk na.

²²Kei, Tertia, hi lasui rîntu nih hin, Lalpa min hen chibai ka nan bûk na.

²³Kei leh kawhmi tla tlungnâk in dâwngpupa Gaia nih chun chibai ka nan bûk na. Khuasung sum zauhkhenhtu Erasta leh kan unaupa Kuarta nih chun chibai an bûk na.

²⁴Kan Lalpa Jisu Krist zângfahnâk chu nan ektê sinah um seh. Amen.

²⁵Ka Thâwngthâng ðha leh Jisu Krist thusim hâwi hen, thuthup phuangnâk hâwi hen, chu thuthup chu zungzâl thawk hen â thup tâwn.

²⁶Tuah lam chun langhtir asi le, lungnâk chu a zûl khonâk ding hen, zungzâl Pathian thupêk hâwi vima hen khuavâng tla lasui thu hen phun kip sinah theihtir asi rawh.

²⁷Nannah an birhtir kho natu Pathian fing sinah cho Jisu Krist ruangah zungzâl hen rokualnâk um seh! Amen.

1 Korin

1 Korin 1

¹Pawl, Pathian duhzia hen Jisu Krist mifial si ding hen kawhmi leh kan unaupa Sosthen nih chun:

²Korin khua ah Pathian kawhmi um tla, Krist ah thenhlimhtir hen Pathian mi tla si ding hen kawhmi tla sinah, ram kipah anmah leh kanmah Lalpa Krist min lamtu zawzawng tla hen:

³Pathian kan Pa leh Lalpa Jisu Krist sinah mi zângfahnâk leh remnâk nan sinah um seh.

⁴Krist Jisu zârah a zângfahnâk nan sinah pêk mi ruang khan nanmah leikâng thu ah Pathian sinah lâwmthu ka sim kumza tâwn.

⁵Zeizawng ah thusim kipah leh theihnâk kipah amah lakah chun neihtir hen nan um mi thu ah khan;

⁶chu hâwi hen Krist thu ka theihtir mi chu nanmah lakah birhtir hen a um kha.

⁷Chuvachun, kan Lalpa Jisu Krist langhnâk ngâk hen, thilpêk rerêng ah nan samphâng lo.

⁸Anih nih chun kan Lalpa Jisu Krist Ni ah chun simsâwi kawp lo hen nan umnâk ding hen a dawng tiang hen a nan birhtir na lai.

⁹Pathian, a Fapa Jisu Krist kan Lalpa kawmhnâk ah a nan kawh natu kha zumh a kâi asi.

¹⁰Chun, unau le tla, nan ektê hen thu bang cho nan sim hen, nan lakah thennâk rêng a um lonâk ding hen, thinlung munkhat leh dawnruatnâk munkhat hen nanna tlâi thlir khonâk ding hen kan Lalpa Jisu Krist min hen ka nan ngiar na.

¹¹Ka unau le tla, nan thu chu nan lakah êlnâk tla a um ti hen Kloi dâwngsung tla nih an ka simh asi.

¹²Hi hi asi ka ti mi chu: mikip nih, "Kei Pawl murui ka si," "Kei lam chu Apolo murui ka si, "Kei lam chu Peter murui ka si" Kei lam chu Krist murui ka si," nan ti chiau hi.

¹³Krist chu ÷hen hen a um mazei? Pawl nan ruangrûl ah khenhbêk hen a um mazei? Asi lo leh, Pawl min hen baptis hen nan um mazei?

¹⁴Krispa leh Gaia lo chu nan lakah mi âukhawm ka nan baptis na lo ruangah Pathian sinah lâwmthu ka sim asi.

¹⁵Chu hâwi asi lo chun mi nih keimah min hen baptis nan si ti an sim lebang lai.

¹⁶Stephan dâwngsung tla lam chu ka baptis na bâk, chu lo chu midang ka baptis na mawh ka theih loh.

¹⁷Krist nih chun baptis ding hen a hawng ka fial lo, Thâwngthâng T̄ha sim ding hen a hawng ka fial dauh asi; thufing sim lo hen, chu hâwi asi lo chun Krist kraws chu zeikhawm lo hen ka umtir lebang lai.

¹⁸Kraws thu chu a tlâu liau chir mi tla rangah chun âtnâk asi; kannih ruangsuaah liau mi tla rangah lam chun Pathian thiltikhonâk asi.

¹⁹Pathian lasui thu nih, "Mi fîng fîngnâk chu ka veih lai le, mi fâifîm theihthiamnâk chu ka lâwt lai," ti hen, a sim hâwi khan.

²⁰Mi fîng chu kha zeiah me? Mi thiam chu kha zeiah me? Hi laikulh ah êltu chu kha zeiah me? Pathian nih laikulh fîngnâk hi âtkâi asi ti a theihtir lo masi?

²¹Pathian fîngnâk ah chun laikulh nih a fîngnâk mang hen Pathian an theih kho lo nûnah thusim âtkâi mang hen a lungtu tla ruangsuaah chu Pathian nih thungâi ÷ha a ti.

²²Juda tla nih chun singsiahnâk tla an hâwl tâwn, Greek tla nih chun fîngnâk an hâwl tâwn.

²³Kannah lam nih chun Krist khenhbêknâk thu kan sim tâwn asi; chu chu Juda tla rangah chun tlûknâk, Phundang tla rangah chun âtnâk asi.

²⁴Sikhawmsele, Juda tla khawm si seh Greek tla khawm si seh, kawhmi tla rangah chun Krist chu Pathian thiltikhonâk leh Pathian finghnâk chu asi.

²⁵Pathian âtnâk chu minung finghnâk ngâk hen a fing dauh, Pathian chaklonâk khawm chu minung chaknâk ngâk hen a chak dauh.

²⁶Unau le tla, Pathian nih a nan kawh na nâk hi ruat nik u, taksa leiah mi fing tamtak tla, mi thiltikho tamtak tla, mi ðha tamtak tla, kawh an si lo zia hi!

²⁷Sikhawmsele, Pathian nih laikulh thil â tla chu a thîm dauh le, mi fing tla chu a mualphoh khonâk ding hen.

²⁸Chun, Pathian nih laikulh thil chak lo tla chu a thîm le, thil chak tla chu a mualphoh khonâk ding hen; chun, laikulh thu sia leh zauhnaumhkâi tla, thil um lo mi tla tiang hen Pathian nih a thîm le, thil um tla chu zeikhawm lo ah a siam khonâk ding hen.

²⁹Pathian mâika ah âukhawm anna putso kho lai loh.

³⁰Nannah lam chu amah ruangah Krist Jisu lakah chun nan um asi; anih chu Pathian sinah mi kan rangah finghnâk ah siam asi, repnâk ah, thenhlimhnâk ah, tlanhnâk tla hen.

³¹Churuarangah, Pathian lasui thu nih, "Â putso mi vial nih Lalpa putso seh," ti hen, a sim hâwi khan.

1 Korin 2

¹Chun, unau le tla, kei lam chu Pathian thu thup ka nan simh na ding hen nan sinah ka hawng liau khan thusim rokual leh finghnâk rokual ka mang lo.

²Jisu Krist, amah ngelchel kenhbêk hen a um mi thu cho lo chu nan lakah zeikhawm theih ka tum lo kha.

³Chun, chak lo leh ðih hen, thungâi thir bû hen nan lakah ka um.

⁴Chun, nan lungnâk chu minung finghnâk ah ngauh lo hen, Pathian thiltikhonâk ah ngauh hen a um dauhnâk ding hen,

⁵ka hawlhkâ suak leh ka thusim tla chu thufing hen lêmnik thu asi lo le, Pathian thlarau leh thiltikhonâk theihtir hen asi dauh kha.

⁶Sikhawmsele, upa tla lakah chun thufing khawm kan sim tâwn, sikhawmsele, hi laikulh thufing hi asi lo le, hi laikulh lâirêltu tâu ding mi thiltikhonâk khawm asi lo.

⁷Pathian finghnâk thuthup chu ka sim dauh tâwn asi, finghnâk â thup mi, kan rokualnâk dingah Pathian nih laikulh um lânah a ruatkan rawh mi chu.

⁸Chu finghnâk chu hi laikulh lâirêltu tla rerêng nih an theih lo; theih sele chu rokualnâk Lalpa chu an khenhbêk lai loh.

⁹Pathian lasui thu nih, "Mit nih muh dah lo, nâ nih theih dah loh, minung thinlung a lût dah loh, Pathian nih a dâwt mi rangah a timhtuah mi vial tla chu," ti hen, a sim hâwi khan.

¹⁰Kannah lam chu chubang chu Pathian nih a Thlarau hen hawng kan theihtir rawh asi. Thlarau nih chun zeizawng a zâwt ver tâwn, Pathian thu thûk khawm.

¹¹Minung thu tla chu minung thinlung a sungah um mi ber lo nih chun minung lakah âu nih me theih lai? Chu hâwi ber hen, Pathian thu tla thu Pathian Thlarau ber lo nih chun âu nih khawm an theih loh.

¹²Chun, a thawt hen Pathian nih thu hawng kan pêk mi tla chu kan theih khonâk ding hen, kannah lam nih chun laikulh thlarau si lo hen, Thlarau, Pathian sinah mi chu kan tawng dauh asi.

¹³Minung finghnâk thu leikângah sîtnirnik sim lo hen, Thlarau sîtnirnik thu a sim dauh hen, Thlarau lei thu tla chu thlarau lei mi tla sinah simhfiang hen, chubang thu hawng kan pêk mi tla khawm chu kan sim tâwn.

¹⁴Laikulh mi nih chun Thlarau lei thu tla chu a lawmh tâwn lo, anih ngaih chun âtkâi an si; Thlarau ah theih mi asi ruangah a theih kho lo rerêng asi.

¹⁵Thlarau lam nih chun thu zeizawng a theihfiang tâwn, amah chu âukhawm nih an theihfiang lo.

¹⁶Pathian lasui thu nih, "Âu nih me Lalpa thinlung theih rawh hen, amah thu sîntir kho lai?" ti hen, a sim hâwi khan. Kannih lam nih chun Krist thinlung kan put asi.

1 Korin 3

¹Chun, unau le tla, thlarau mi tla sinah sim hâwi hen nan sinah thu ka sim kho lo, taksa mi tla sinah sim hâwi khan ka sim kha, Krist ah fasêm tla sinah sim hâwi cho hen.

²Buh silo hen nûk hen ka nan châwm na kha, buh nan ei kho lo ruangah khan: tu khawmah nan ei kho lo nget rih asi,

³taksa mi nan si kumza rih ruangah. Nan lakah nahsuahnâk leh êlnâk a um tâwn ruangah hin taksa mi si hen minung hâwi hen nan um asi lo mazei?

⁴Mi pakhat nih, 'Pawl murui ka si, midang nih, "Kei lam chu Apolo murui ka si" nan ti sung zawng chu minung nan silo mazei?

⁵Apolo chu ze me asi? Pawl khawm chu ze me asi? Rianțuantu nanmah tla a nan lungtir natu cho an si, chu khawm chu Lalpa nih a pêk na vevê mi hâwi vima asi.

⁶Kei nih ka phun le, Apolo nih tî hen a châwm, sikhawmsele, Pathian nih a țhangtir asi.

⁷Chun, a țhangtirtu Pathian cho lo chu a phuntu chu zeikhawm asi lo, tî hen châwmtu khawm chu zeikhawm asi bâk lo.

⁸Chun, a phuntu leh tî hen châwmtu chu pumkhat an si, sikhawmsele anmah rianțuan hamh zia hâwi vima hen lâwmman an tawng vevê lai.

⁹Kannih lam chu Pathian rianțuantu kan si; nannih Pathian lo munma chu nan si. Pathian in sak chu nan si ber.

¹⁰Pathian nih zângfahnâk hawng ka pêk mi mang hen in sak thiam mi rian ka țuan le, lungphûm ka phûm, midang nih a tlûnah in an sak. Sikhawmsele, mikip a tlûnah an sak zia ding mi lakah a thiamthih chiauh na seh.

- ¹¹Lungphûm chia lo chu lungphûm dang âukhawm nih an phûm kho lai loh, chu lungphûm chu Jisu Krist chu asi.
- ¹²Chun, lungphûm tlûnah chun âuzawng nih ngûn hen mawh, tangka hen mawh, lung sung hen mawh, thing hen mawh, belh hen mawh, fapawn hen mawh in sak sele--mikip rianṭuan chu a lang rawh lai.
- ¹³Krist a hawng langh Ni ah chun a langtir awt ruangah; chu Ni ah chun mei ngelchel nih mikip rianṭuan chu zeî hâwi me asi a nik lai rawh.
- ¹⁴Âu rianṭuan zawng a tlûnah a sak mi chu a um kumza chun, chu nih chun lâwmman a tawng lai.
- ¹⁵Âu rianṭuan zawng a kâng chun, chu nih chun a dawh lai: amah lam chu ruangsuah hen a um lai, sikhawmsele mei ah a lan mi hâwi hen.
- ¹⁶Pathian in nan si ti leh Pathian Thlarau nanmah lakah a um kumza ti nan theih lo mazei?
- ¹⁷Âuzawng nih Pathian in chu a râwk chun chu minung chu Pathian nih a râwk lai Pathian in chu a thenhlimh ruangah; chu in chu nanmah nan si.
- ¹⁸Âukhawm mah a â tir lah seh. Nan lakah âuzawng hi laikulh ah hin fing hen â ruat chun a fing khonâk ding hen mi â ah a chang seh.
- ¹⁹Hi laikulh finghnâk hi Pathian ngaih hen âtnâk asi, "Pathian nih mi fing tla chu an fing perpetnâk lakah a awhtir na tâwn," ti hen Pathian lasui thu nih a sim hâwi khan.
- ²⁰Chun, Pathian lasui thu dang nih, "Lalpa nih chun mi fing tla dawnruatnâk tla chu a thawt asi ti a theih," ti hen, a sim.
- ²¹Churuarah, âukhawm nih minung tla putso lah seh. Zeizawng hi nan tâ asi ver asi.
- ²²Pawl mawh, Apolo mawh, Kipha mawh, laikulh mawh, nungnâk mawh, thihnâk mawh, thil um chia mawh, thil hawng um ding mi mawh, a ektê hen nan tâ ver asi; nannih khawm Krist tâ nan si;
- ²³Krist khawm chu Pathian tâ asi.

1 Korin 4

¹Kannah tla hi Krist rianṭuantu leh Pathian thu thup zauhkhenhtu ah mi nih hawng kan ngaih seh.

²Hi lakah hin zauhkhenhtu chu zumhkâi a herh asi.

³Sikhawmsele, nannah nih nan ka nikhâk chu minung dawnruatnâk hen nan ka nikhâk chu ka rangah thu metê asi; mah khawm ka nik dah lo.

⁴Zeikhawm simsâwinâk ka theih lo; sikhawmsele, chu nih chun hawng ka mawhtir lêm lo; hawng ka niktū chu Lalpa asi dauh.

⁵Chun, a hun lânah hin zeikhawm nik lah u, Lalpa a hawng kal lân lo chu. Anih nih chun mûi thil thup tla chu chêu ah a hawng suah lai le, thinlung ah tum mi khawm chu a hawng langh lai; chu tikah chun mikip nih Pathian lakah chun mah ting tâwk ah sawr an lawh chiau lai rawh.

⁶Chun, unau le tla, thurîn tla chu nan lanh lonâk ding hen kanmah lakah hin nan châwng khonâk ding hen chubang tla chu nan ṭhatnâk ding hen kei leh Apolo kanna ngaih asi, nan lakah âukhawm pakhat putso hen pakhat nan zauhnawmh lonâk ding hen.

⁷Nang âu nih me a nan ti bîk? Na ting lo mi chu ze me na nei? Na ting asi chun zeirangah ting lo hâwi hen na sawr phah?

⁸Tu thawk hen nan khawp rawh, tu thawk hen nan nei rawh, kanmah tel lo hen nanmah lâwng hen nanna lal rawh asi hi: lal tatak ule ka duh asi, kannah khawm nih nanmah tla hen kanna lal khonâk ding hen!

⁹Pathian nih kannah mifial tla hi thi ding a ruat chia hâwi hen a dawngchem ah hawng kan langhtir hen ka ngaih asi. Laikulh leh vânmifial tla leh minung tla mitmuh ah zauhnuam ah siam hen kan um hi.

¹⁰Kannah lam chu Krist ruangah mi â kan si, nannah lam chu Krist ah mi fing nan si dauh. Kannah lam chu kan chak lo le, nannah lam chu nan chak, nannah lam chu mi chawnglawmh hen nan um le, kannah lam chu mi zauhnawmh hen kan um asi.



¹¹Tutiang khawm hen kan sung a vâng hen kan tî a hâl le, nipuan kanna tinh lo, mi kut nurnâk kan si, umnâk bir kan nei lo; mah kut hen ʔuan hen thungâi kanna hamh.

¹²Mi nih hawng kan fâi chun, mal kan sâwm na tâwn; mi nih hawng kan nehsawh chun kan tuar rarâm tâwn, mi nih hawng kan phûm chun kan lêm na tâwn.

¹³Tutiang khawm hen laikulh nâwmtâm thu zawzawng, nâwm hâwi hen mi nih hawng kan ngaih asi.

¹⁴Ka nan ningzaktir na ding hen hi thu hi ka rîn lo le, ka fa duhtak tla hâwi hen nun a nan simh na ding hen ka rîn dauh asi.

¹⁵Krist lakah chun sîntirtu sîng khat nei khawm ule, pa lam chu tamtak nan nei lo asi; kei nih Krist Jisu ah chun Thâwnghâng ʔha hen ka nan ring na kha.

¹⁶Chun, nan ka chawng ding hen ka nan ngiar na.

¹⁷Churuang chun Timothe, Lalpa lakah ka fa duhtak leh zumhkâi chu nan sinah ka hawng fial asi. Anih nih chun Krist ah ka umdân, ram kipah kawhmi tla murui kip ka sîntir na tâwn mi hâwi hi a nan theihtir na lai.

¹⁸Chun, kei nan sinah hawng kal lo rawh ding hâwi hen nan ruat ruangah zeimaw mi nanna zûm asi.

¹⁹Sikhawmsele, Lalpa nih rem a ti chun sâwtlotê ah ka hawng kal lai; chun mi a zûm mi tla thu chu silo hen an thiltikhonâk chu ka theih rawh lai.

²⁰Pathian Ram chu thu hen a um lo le, thiltikhonâk ah a um dauh asi.

²¹Zei me nan duh dauh? Vuakfung hen ma nan sinah ka hawng kal lai, dâwnnâk leh dawnhkhonâk thinlung put hen ma?

1 Korin 5

¹Nan lakah pung le lêngnâk a um ti thu a thang chiam asi. Chu hâwi pung le lêngnâk chu Phundang tla lak khawmah a um lo mi, nan lakah mi pakhat nih a nu-ei a umpi kha.



- ²Chun, chu thil titu chu nan lakah mi suah ding mi lawksawngpi ngâk hen zumhnâk ah lam nan mang.
- ³Keimah ngelchel hi taksa hen ka tel lo narêng hen thlarau ah lam chun ka tel, thil chu hâwi tluk titu chu tuah khawm Lalpa Jisu min hen chu mi tlûnah lâi ka rêl piak le, nan lakah tel hâwi tluk hen ka ruat rawh.
- ⁴Nannih leh ka thlarau chu kan Lalpa Jisu thiltikhonâk ah a pûm hen,
- ⁵mi chu hâwi chu a thlarau Lalpa Ni ah chun ruangsuah hen a um khonâk ding hen a taksa tlâutir hen Setan sinah pêk sele ka ti asi.
- ⁶Nanna zûmnâk hi a tha lo. Thilnu tâwmtê nih sang tlang chu a pum hen a zunh hep tâwn ti nan theih lo masi?
- ⁷Thilnu telh lo mi nan si hâwi ber hen sang tlang thar nan si khonâk ding hen thilnu li chu thianh u. Kan Kalkanh Kût khawm an thah rawh asi, Krist ngelchel chu.
- ⁸Churuangah, kanna kût lai, thilnu li a kût lo hen, nunsiat leh sualnâk ah kût lo hen, thilnu tel lo hen taknâk leh diknâk sang hen kanna kût lai.
- ⁹Ka lasuikuat lakah khan pung-le-lêng mang kawmh lo ding hen nan sinah ka rîn kha.
- ¹⁰Kha laikulh ah pung-le-lêng mang tla mawh duhleih leh lêp mang mawh, ruk sawnhtu tla mawh lam chu kawmh lo thlo ding ka ti mi asi lo; chu hâwi si sele chu laikulh thawk hen suak ding nan si awt asi.
- ¹¹Tu lam chun âuzawng unau min put tûng hen pung-le-lêng mang mi mawh, mi duhleih mawh, ruk sawnh mi mawh, mi fâi mang mawh, zûrît mang mawh, lêp mang mawh hawng sele kawmh lo ding hen nan sinah ka rîn asi; chu hâwi mi sinah chun ei khawm ei lo ding hen.
- ¹²Lênglei ah mi tla chu kei nih ka ruat ding zeih me a um? Nannih nih a sungah mi tla nan ruat hen lênglei ah mi tla lam chu Pathian nih a ruat tâwn asi lo ma? Chu misual chu nan lakah mi nar u.

1 Korin 6



- ¹Nan lakah âuzawng nih midang thupawi thenhlimh mâika ah tlunh lo hen mi rep lo mâika ah nan tlunh ngam awt masi?
- ²Asi chun, mi thenhlimh tla nih chun laikulh lâi an rêl awt ti nan theih lo masi? Chun, laikulh men hi a lâi nan rêl awt asi chun thil mêchem tla khawm chu lâirêl tlâk lo ma nan si ne?
- ³Tuliau thil chu sim lo hen, vânmifial tla men lâi kan rêl awt ti nan theih lo masi?
- ⁴Chun, thu rêl ding nan nei chun kawhmi tla lakah mawhphurhtu silo mi tla chu nan rêltir na tâwn mazei?
- ⁵Nan ningzaknâk ding hen ka sim asi. A unau tla kar lakah thu thlûk kho mi mi fing pakhat tal nan lakah nan tawng kho lo menmaw!
- ⁶Unau pakhat nih a unau chu lâirêlnâk ah a tlunh tâwn? Lunglo tla sinah a va si ngê rih.
- ⁷Asi, hi hi nanna replonâk tak pakhat chu asi: thupawi nanna neitawnh mi hi. Zeirangah me diklo tak hen nanna tinâk chu nan t̄uan kho lo? Zeirangah naunehnâk chu nan tuar dauh lo?
- ⁸Asi nanmah ngelchel nih unau tlûnah khawm nan ti dik lo le, nan nâuneh na tâwn.
- ⁹Asi chun, mi rep lo tla nih chun Pathian Ram an luah lai loh ti nan theih lo masi? Perpet hen um lah u; pung-le-lêng mang tla mawh, ruk sawnh tla mawh, t̄angdang pawmtâktu tla mawh, mi hur tla mawh, tawkua hur tla mawh,
- ¹⁰fîr mang tla mawh, mi duhlel tla mawh, zûrît mang tla mawh, fâi mang tla mawh, lêp mang tla mawh khawm nih Pathian ram an luah lai loh.
- ¹¹Chun, nannih zeimaw mi chu hâwi mi nan si tâwn kha. Sikhawmsele, Lalpa Jisu Krist min leh kan Pathian Thlarau ah t̄awl thiang nan si rawh, thenhlimh mi nan si rawh le, mawhtir lo mi nan si rawh.

¹²Thil zeizawng ti ka rang a thiang le, thil zeizawng ti a tha lêm lo. Sikhawmsele, ze sal ah khawm ka siang lo.

¹³Ei ding tla chu paw rangah asi, paw chu ei ding tla rangah asi. Sikhawmsele, Pathian nih a tlâutir vevê lai. Chun, taksa hi pung le lêngnâk asi lo le, Lalpa rangah asi dauh; Lalpa khawm taksa rangah asi.

¹⁴Chun, Pathian nih Lalpa chu a thawh le, kannih khawm a thiltikhonâk hen hawng kan thawh bâk lai.

¹⁵Nan taksa chu Krist ðeng tla asi ti nan theih lo masi? Krist ðeng tla chu lâk piak hen nunau â zuar mi ðeng tla ah ka siam awt ma? Si lo!

¹⁶"Asi chun, nunau â zuar mi hen â tlâi mi chu amah hen pumkhat asi ti nan theih lo masi? Pathian lasui thu nih, An panih hen taksa pumkhat an hawng si lai rawh," ti hen fiang tak hen a sim hâwi khan.

¹⁷Lalpa lakah a pêk mi lam chu amah hen Thlarau pumkhat an si.

¹⁸Pung le lêngnâk hi tektâk u. Minung thil tisual zeizawng hi taksa lênglei ah asi; pung-le-lêng mang chu amah taksa tlûnah thilsual a ti asi.

¹⁹Asi chun, nan taksa chu nan sungah um Pathian sinah mi nan tawng mi Thlarau Thenhlimh in asi ti nan theih lo masi? Mah tâ khawm nan si lo le, man hen châwk nan si rawh asi.

²⁰Churuangah, nan taksa hen Pathian chawnglawmh u.

1 Korin 7

¹Chun, nan rîn mi thu tla kha--Mipa rangah nunau tawng lo a tha asi.

²Sikhawmsele, pung le lêngnâk a um tâwn ruangah mipa nih nupi bîk nei chiau sele, nunau khawm nih pasal bîk nei chiau seh.

³Passal nih chun a nupi sinah a ting ding tâwk pêk seh; chu hâwi ber hen nupi khawm nih a pasal sinah a ting ding tâwk chu pêk bâk seh.

⁴Nupi nih chun amah taksa tlûnah thu a nei lo le, a pasal nih chun thu a nei dauh asi; chu hâwi ber hen pasal khawm nih chun amah taksa tlûnah thu a nei lo, a nupi nih chun thu a nei dauh asi.

⁵Thlacham ding hen nanna pêk khonâk ding hen leh nanna kawmh nawlh khonâk ding hen sâwtlotê rangah rem nan ti vevê cho lo chun âu lei khawm a thlahthlamh lah u, chu lo chun nanna sôm kho lo ruangah Setan nih a nan lêm na lebang lai.

⁶Sikhawmsele, hi thu hi thupêk leikâng hen ka sim lo le, siang leikâng thu hen ka sim dauh asi.

⁷Sikhawmsele, mi zawzawng keimah hâwi hen um sele, ka duh asi. Khawmsele, mikip nih Pathian sin thawk hen thilpêk mah tawng zia an nei chiauh asi, pakhat nih kâng dang hen, pakhat khawm nih kâng dang nawlh hen.

⁸Sikhawmsele lêngtûl tla leh numei tla sinah chun hi hâwi hen ka ti asi. Keimah hâwi tak hen um na sele an rangah a tha lai.

⁹Sôm khonâk an nei lo lam chun a umh na seh; hur ngâk hen a umh chu a tha dauh asi.

¹⁰Chun, anna umh rawh mi tla sinah chun thu ka pêk; keimah pêk lam chu silo hen Lalpa pêk asi dauh: Nupi nih chun a pasal then lah seh;

¹¹a then dâidua chun pasal nei lo hen um dâidua seh, asi lo chun a pasal hen ber a umh nawlh na seh, pasal nih chun a nupi mâk lah seh.

¹²Midang sinah lam chun (Lalpa silo hen, keimah nih) ka sim: Unau âuzawng Kristian a hawng si hen, a nupi chu lunglo mi umpi sele, anih nih chun a sinah um kumza ding a duh chun mâk lah seh.

¹³Chun, nunau âuzawng Kristian a hawng si hen, pasal lunglo mi a umpi chun, a pasal nih a sinah um kumza ding a duh chun mâk lah seh.

¹⁴Pasal lunglo mi chu a nupi ruangah Pathian sinah pawmtlâk hen a um le; nupi lunglo mi khawm chu a pasal ruangah Pathian sinah pawmtlâk hen a um bâk; chu hâwi si lah sele, an fa tla chu lunglo mi fa tla hâwi an si lai, sikhawmsele chu hâwi asi ruangah annih tla chu Pathian sinah pawmtlâk hen an um asi.

¹⁵Sikhawmsele, a lunglo mi nih chun mâk ding a duh chun mâk ko seh, chu hâwi lakah chun unaupa mawh farnu mawh khap asi lai loh; Pathian lam nih chun rem ding hen a kan kawh asi.

¹⁶Aw! nupi, na pasal ruang na suah awt leh awt lo zeitin na theih kho? Aw! pasal, na nupi ruang na suah awt leh awt lo zeitin na theih kho?

¹⁷Zeikhawm si sele, Lalpa nih chun mikip sinah a thilpêk dân hâwi chiau leh Pathian nih mikip a kawhnâk dân hâwi chiau hen um seh. Hi hi kawhmi tla zawzawng sinah ka sîntir na mi dân chu asi.

¹⁸Fêmtan mi kawh asi chun, a fêmtannâk kha veih lêm lah seh. Fêmtan lo mi asi chun, fêm tantir lah seh.

¹⁹Pathian thupêk tla tleih cho lo chu fêmtan hi zeikhawm asi lêm lo, fêmtan lo khawm hi zeikhawm asi lêm lo.

²⁰Mi kip kawh hen an um liauah anna ting zia zia hen um chiau seh.

²¹Sal ah na um mi kawh na si ma? Chu chu ruat duh lah, na suak kho ÷ung asi lam chun mang dauh rawh.

²²Sal ah um mi Lalpa nih a kawh mi chu Lalpa sal suaktir asi; chu hâwi ber hen sal silo hen kawh mi chu Krist sal asi.

²³Man hen châwk nan si rawh, minung tla sal si lah u.

²⁴Unau le tla, mikip kawh hen nan um liauah nanna ting zia zia hen Pathian sinah um kumza u.

²⁵Chun, mi âuzawng nupi pasal neilo rih mi leikâng thu ah chun Lalpa thupêk rerêng ka nei lo. Sikhawmsele, zumhtlâk a um ding hen Lalpa sinah mi zângfahnâk tawng ka si ruangah ka ngaihdân ka sim lai.

²⁶Chun, tuliau hamhnâk ruangah hin hi hi ÷ha hen ka ruat, mi a umdân a um kumza hi.

²⁷Nupi lakah phuar na si ma? Phelhnâk hâwl lah. Nupi lakah phuar lo na si ma? Nupi hâwl lah.

²⁸Sikhawmsele nupi na nei chun thil na ti sual lo, nungâk thenhlimh khawm nih pasal a nei chun thil a ti sual lo. Sikhawmsele, chu hâwi mi tla nih chun taksa lakah chun hamhnâk an tuar lai; sikhawmsele, kei lam nih chun an tuartir na lo ka duh asi.

²⁹Sikhawmsele, unau le tla, hi hi ka ti asi: tu thawk chun nupi nei tla chu nei lo hâwi hen an umnâk ding hen leh

³⁰ṭap le tla chu ṭap lo hâwi hen an um khonâk ding leh â lâwm mi tla chu lâwm lo hâwi a an um khonâk ding leh châwktu tla chu neilo hâwi a an um khonâk ding leh

³¹laikulh mangtu tla chu mang tuk lo hen an um khonâk ding hen tik hi tâwitir hen a um asi; hi laikulh umdân hi a dawnggh lei rawh asi.

³²Sikhawmsele, lungkham nei lo hen nan um ka nan duh piak na asi. Nupi nei lo mi nih chun Lalpa lawmhtir kho zia ding dawnnâk hen Lalpa lei thil chu a lungkham tâwn.

³³Nupi nei mi lam nih chun a nupi a lawmhtir kho zia ding dawn hen laikulh lei thil a lungkham bâk tâwn, a thinlung ah dawnnâk dang dang a nei tâwn.

³⁴Pasal neilo mi nih chun a taksa leh a thlarau ah chun thenhlimh tak hen a um khonâk ding hen Lalpa lei thil chu a lungkham tâwn; pasal nei mi lam nih chun a pasal lawmh kho zia ding hen laikulh lei thil chu a lungkham dauh tâwn.

³⁵Chubang chu nanmah ṭhatnâk ding hen ka sim asi; ri hen ka nan khih kho na nâk ding hen ka sim asi lo le, umdân dawh tak hen nan um khonâk ding leh Lalpa rian chu nawk lo hen nan ṭuan khonâk ding hen ka sim dauh asi.

³⁶Nupi hual a um lo rih ding hen anna tiam mi thu ah: Mipa nih dik tak hen a umpi ding mi sinah thinlung tleih khonâk a nei lo hen, â sôm kho lo thlo hen, anna umh dâidua a duh chun, a duh hâwi hen a umh dâidua na seh. Hi lakah hin sualnâk a um lo.

³⁷Sikhawmsele, a mipa nih umpi ngelchel ding duhnâk a nei lêm lo hen, umpi lo ding hen a thinlung ah a tum thlir hen, a thinlung ah sômkhonâk a nei



thlir hen thinlung ah ti ding hen a tum tak chun chu nunau chu a umpi lo a tha asi.

³⁸Chun, umpitu nih a ti tha bâk, a umpi lotu nih chun a ti zia a tha khun asi.

³⁹Nupi chu a pasal dam sung chun phuar asi; sikhawmsele, a pasal a thi rawh chun a duh mi zawng anna um kho lai, sikhawmsele Lalpa lakah a um mi asi ding asi.

⁴⁰Sikhawmsele, kei ngaihdân hen chun a umdân kêl hen a um chun a thaw a suak lai; kei khawm nih Pathian thlarau nei bâk hen ka ruat asi.

1 Korin 8

¹Chun, ruk tla lakah bâwlnâk thil tla thu kha chu, "kan ektê hen theihnâk kan nei chiau," ti kanna theih. Theihnâk nih chun mi a putsotir tâwn lo, dâwnâk lam nih chun mi a siam that tâwn.

²Âuzawng nih thu zeimawh theih hen anna ruat chun, an theih ding hâwi hen an theih lo rih.

³Sikhawmsele, âuzawng nih Pathian a dâwt chun, chu tak chu amah theih asi.

⁴Chun, ruk tla lakah bâwlnâk thil ei leikâng thu ah chun, ruk chu zeikhawm asi lo zia Pathian pakhat cho lo chu Pathian dang rerêng a um lo ti kan theih.

⁵Vân ah mawh, tual ah mawh pathian min put tla um khawmsele, chu hâwi pathian tamtak leh lalpa tamtak an um ruangah kannih rangah lam chun Pathian pakhat cho, Pa chu a um.

⁶Amah sin thawk hen zeizawng a suak le, kannih khawm amah rangah um kan si; Lalpa pakhat cho Jisu Krist chu a um, amah ruangah zeizawng a um, kannih khawm amah ruang ber ah um mi kan si.

⁷Sikhawmsele, chu theihnâk chu mi zawzawng sinah a um lo, chun zeimaw mi nih tutiang hen ruk sawnh zawng an si ruangah ruk lakah bâwlnâk thil hâwi tak a ngaih hen an ei tâwn; chun an sia leh tha theihnâk chu a chak lo ruangah a nâwm tâwn.

⁸Sikhawmsele, ei ding nih hin Pathian mit hawng kan tlungtir lêm lo, ei lah khawmsele kanna râwk lêm lo, ei khawmsele kan ƣa lêm lo.

⁹Sikhawmsele, thiamthih u, chu lo chun mah thawsuak a um khonâk hi zeitin mawh mi chak lo tla rangah tlûknâk a hawng si lebang lai.

¹⁰Nang, theihnâk nei mi, âuzawng nih ruk sawnhnâk in ah bukhêng dôm hen a nan muh chun, annih lam chu mi chak lo hawng si na sele, an sia leh ƣa theihnâk nih chun bâwlnâk thil ei a hawng ngamh awt lo mazei?

¹¹Chun, na theihnâk ruang chun mi chak lo, unau a thih ruangrûl ah Krist nih a thih piak mi chu a vei awt asi.

¹²Unau le tla lakah chu hâwi thil nan tisual hen, an sia leh ƣa theihnâk chu a chaklonâk thum ah nan liamh sual chun Krist lakah thil nan tisual asi.

¹³Churuarang chun ei ding nih hin ka unau a tlûktir chun ka unau a tlûktir lonâk ding hen kumleza hen sa rerêng ka ei lai loh.

1 Korin 9

¹Mi thawsuak ka si lo mazei? Mifial ka si lo mazei? Kan Lalpa Jisu ka muh rawh lo mazei? Nannih tla chu Lalpa ah ka rianƣuan nan si lo mazei?

²Midang rangah mifial si lah khawmsele nannih rang lam chun ka si; Lalpa ah mifial ka sinâk singsiahnâk chu nanmah hi nan si.

³Hawng ka salhtu tla ka sâng na nâk chu hi hi asi:

⁴Din leh ei ding hen thu ka nei lo masi?

⁵Mifial dang tla leh Lalpa unau tla leh Peter hâwi hen khan Kristian nunau nupi rui ding hen thu kan nei lo mazei?

⁶Asi lo chun rianƣuan lo ding hen kei chu Barnaba nih thu kan nei lo bîk mazei?

⁷Kawrsen âu me mah leh mah a châwm hen râltuk dah tâwn? Âu nih me a rah ei ƣung lo hen grep dôm tuah dah tâwn? Asi lo chun, âu nih me ranrual nûk ei ƣung lo hen ranrual zauhkhenh dah tâwn?



⁸Chubang thu chu minung hâwi cho hen ka sim masi? Dân thu khawm nih chu tak chu a sim bâk lo mazei?

⁹Mosi Dân lasuibu ah chun, "Chawchal nih fâng a chîl liauah a mûr phuar lah," ti rîn asi. Pathian nih chawchal rang ko masi a ruat piak?

¹⁰Kanmah rang takah a sim asi lo ma? Asi ta a! Kanmah rang asi an rîn. Tual nâwntu nih chun lungumnâk nei hen nâwn ding asi; fâng âttu nih chun tingvo nei bâk ding hen a ât ding asi.

¹¹Kannah thlarau lei chî tla chu nan rangah kan tuh rawh chun, nan taksa lei tla thu chu ât khawmsele thil dingchang tak ma asi lai?

¹²Midang men nih nan tlûnah thuneihnâk anna ting chun kannah châng chu ting khun ding kan silo ma? Sikhawmsele, chu thuneihnâk chu kan mang lo; Krist Thâwngthâng Țha kan kham lonâk ding hen zeizawng kan tuar rarâm dauh tâwn asi.

¹³Zarh thil timhtuahtu tla nih chun Pathian Biakin ah mi thil an ei mi leh mâichâm Țuantu tla nih chun mâichâm ah tingvo an nei ti nan theih lo mazei?

¹⁴Chu hâwi ber hen Lalpa nih chun Thâwngthâng Țha simtu tla chu Thâwngthâng Țha chu an ei muhnâk dingah a ruat asi.

¹⁵Sikhawmsele kei lam nih chun chubang chu pakhat khawm ka mang lo asi. Ka tlûnah chu hâwi nan tinâk ding hen hi thu hi ka rîn asi lo, âuzawng nih ka putso mi hi zeikhawm lo ah an siam ngâk chun thi thlo sele ka rangah a Ța dauh asi.

¹⁶Thâwngthâng Țha sim khawmsele putso ding rerêng ka nei lo, ti ngelchel ding hen ka tlûnah â thâng asi. Thâwngthâng Țha sim lah sele ka tlûn a pit awt asi.

¹⁷Chu chu mah thu hen ka ti chun lâwmmman ka nei asi; sikhawmsele mah thu thu hen asi lo chun Thâwngthâng Țha zauhkhenhnâk rian hawng ka kiltir mi ko asi lai.

¹⁸Ka lâwmman chu zeï me asi ne? Thâwngthâng Ṭha lakah ka thuneihnâk chu ka mang diknâk ding hen Thâwngthâng Ṭha ka sim hen lawh lo hen Thâwngthâng Ṭha rian ka ʈuan kho mi hi asi.

¹⁹Âu sal khawm si lah khawmsele, mi tam dauh ka luh kho ding hen mi zawzawng sal ah kê siam tâwn.

²⁰Chun, Juda tla ka luh kho na ding hen Juda tla sinah Juda mi hâwi hen ka um tâwn; Dân tangah um mi tla ka luh kho na ding hen Dân tangah um tla sinah Dân tangah um hâwi hen ka um tâwn, Dân tangah um ʈung lo hen.

²¹Dân nei lo tla ka luh kho na ding hen Dân nei lo tla sinah Dân nei lo hâwi hen ka um tâwn, Pathian Dân lunglo si lêm lo hen, Krist Dân zâwt ʈung hen.

²²Chak lo tla ka luh kho na ding hen chak lo tla sinah chak lo hâwi hen ka um tâwn; zeitin mawh zeimaw mi tal ruang ka suah kho na ding hen mi zawzawng sinah zeizawng ka si rawh.

²³Thâwngthâng Ṭha ruangah zeizawng ka ti tâwn, tingvo ka nei kho bâk ding hen.

²⁴Tekzuam tla chu an ektê hen an tek le, sikhawmsele pakhat cho nih lâwmman a tawng ti nan theih lo mazei? Nan tawng khonâk ding hen chu hâwitê hen tek u.

²⁵Chun, tekzuamnâk tla lakah chun â ʈang rarâm mi chu zeizawng ah anna sôm tâwn asi. Annih lam nih chun lallukhuh râwk kho tawng ding hen anna ʈang, kannih lam nih chun lallukhuh râwk kho lo tawng ding hen.

²⁶Chun, chu hâwitê hen tek san bulbal theih lo hen ka tek tâwn.

²⁷Chu hâwi ber hen boruak eng lo hen ka sualpi tâwn, ka taksa ka êng chiam le, sal ah ka siam tâwn. Chu lo chun midang tla sinah ka phuang nûnah khawm zeï zeimawh ti hen keimah ngelchel hi lawnh hen ka um lebang lai.

1 Korin 10

¹Unau tla, hi bang hi nan theih loh ka duh lo, kha hâwi a kan thlâktu tla zawzawng sôm tangah an um ver le, an ektê hen tisumsumriat khawm an tan ber le,

²an ektê hen sôm lakah tisumsumriat ah khawm Mosi sinah baptis hen an um ver.

³An ektê hen thlarau lei buh munkhat hen an ei chiau,

⁴an ektê hen thlarau lei din ding munkhat hen an din chiau kha; anmah tla zûltu thlarau lei lungpi ah mi kha an din chiau; chu lungpi chu Krist chu asi.

⁵Sikhawmsele, an lakah mi tam dauh tlûnah chun Pathian a lungsi lo le, ramkaro ah an ruak chu a vawrh phut na.

⁶Chun, chubang chu kan rangah zauhtirnâk asi, thilsual an duh hâwi khan kan duh bâk lonâk ding hen.

⁷An lakah mi zeimaw mi ruk sawnhtu an si hâwi khan ruk sawnhtu si lah u. Pathian lasui thu nih, "Zapi chu ei leh din hen an to dut le, pang ding hen an thawk nawlh," ti hen, a sim hâwi khan.

⁸An lakah zeimaw mi anna pung le, ni khat ah sâng nih leh sâng thum an tlû phah hâwi khan kanna pung ding asi lo.

⁹An lakah zeimaw mi nih Lalpa an nik le, rûl nih veih hen an um phah hâwi khan Lalpa chu kan nik ding asi lo.

¹⁰An lakah zeimaw mi an chipchiar le, veihirtu veihir hen an um phah hâwi khan chipchiar lah u.

¹¹Chun, chubang chu zauhtirnâk ding hen an tlûnah a hawng thlung asi kha; kannih, tik dawngh hawng tlungnâk tla hi, nun hawng kan simhnâk ding hen an rîn asi ber.

¹²Churuangah, dîr hen a râlring mi chu a thiamthih seh, chu lo chun a tlû lebang lai.

¹³Minung tuar kho ri nûnlêm chun lêmnâk rerêng nan lakah a tlung lai loh. Pathian lam chu zumh a kâi asi, anih nih chun nan tuar kho tâwk nûnlêm

chun lêmnhâk nan tawng a siang lai loh; nan tuar khonâk ding hen lêmnhâk rual hen teknâk lampi a siam sawm lai.

¹⁴Churuangah, ka duhtak le tla, ruk sawnhnâk hi tektâk u.

¹⁵Mi fing tla sinah sim hâwi hen ka sim asi: Ka thusim hi dawn set nik u.

¹⁶Malsâwmnâk hâi Pathian sinah lâwmthu ka sim tâwn mi hi Krist thisen bawmpinâk asi lo mazei?

¹⁷Kannah mi tamtak hi sang tlang khat taksa pumkhat kan si hi; kan ektê hen sang tlang khat ah mi kanna ting chiau asi.

¹⁸Taksa leiah Israel tla chu zauhnik u; bawlnâk sa eitu tla nih chun mâicham chu an bawmpi lo mazei?

¹⁹Zei me ka sim ne? Ruk sinah ap mi chu thil asi ti leh ruk khawm chu thil asi ti ka sim mazei?

²⁰Phundang tla bawlnâk chu Pathian lakah mi asi lo le, khuri tla lakah anna bawl tâwn asi ti ka sim mi asi. Nannah lam nih chun khuri tla nan bawmpi ka nan duh piak na lo asi.

²¹Lalpa hâi leh khuri hâi munkhat hen nan din kawp kho lai loh; Lalpa dawhkân ah mi leh khuri dawhkân ah mi munkhat hen nan ei kawp kho lai loh.

²²Asi lo chun Lalpa chu thîk ding hen a lung kan fâktir awt bei ne? Amah ngâk hen kan chak dauh hen ma kanna ruat?

²³Thil zeizawng ti a thiang le, sikhawmsele thil zeizawng ti a tha lêm loh. Thil zeizawng hi a thiang le, sikhawmsele thil zeizawng ti nih mi a thattir loh.

²⁴Âuzawng nih mah thatnâk ding hâwl lo hen midang thatnâk ding hâwl dauh seh.

²⁵Sumtuah ah an zuar mi sa chu a sia leh a tha theihnâk ruangah zeikhawm deih lêm lo hen ei ko;

²⁶Tual leh a sungah thu um zawzawng hi Lalpa tâ asi," ti hen Pathian lasui thu nih a sim ruangah.

²⁷Lunglo mi tla lakah âumawh a nan sâwm na hen, kal nan duh chun sia leh tha theihnâk ruangah zeikhawm deih lêm lo hen an hunh na mi zawng chu ei ko u.

²⁸Khawmsele, âu nih mawh, "Hi hi bâwlnâk asi," ti hen a nan simh na chun a nan theihtir natu ruangah leh sia leh tha theihnâk ruangah ei lah u.

²⁹Nanmah sia leh tha theihnâk ka ti lo le, midang sia leh tha theihnâk chu asi ka ti dauh.

³⁰Zeirangah midang sia leh tha theihnâk hen ka thawsuaknâk a simsâwi ne? Lâwm tak hen ka ting chun a tlûnah lâwmthu ka simnâk lakah hin zeirangah simsiat ka si?

³¹Chun, nan ei khawmah, nan din khawmah, nan ti mi kipah khawm Pathian rokualnâk ding ver hen ti u.

³²Kei nih mah thatnâk hâwl hen ruangsuah an si khonâk ding hen mi tamtak thatvaknâk hâwl dauh hen, mi zawzawng zeizawng ah ka lawmhtir hâwitê hen, Juda tla rang khawm, Phundang tla rang khawm, Pathian kawhmi tla rang khawm an tlûk phahnâk ding rerêng zeikhawm ti lah u.

1 Korin 11

¹Hawng ka châwngtu si u, kei khawm Krist châwngtu ka si hâwi ber hen.

²Chun, zeizawng ah nan hawng ka theihkumza ruangah leh thurovuih ka nan simh na hâwitê hen nan kil thlir ruangah ka nan sawr na.

³Sikhawmsele, mipa vial lû chu Krist asi, nunau lû chu mipa asi, Krist lû chu Pathian asi ti hi nan theih ka duh asi.

⁴Churuarangah, mipa âuzawng a lû khuh bû hen thlacham mawh thusimtu nih chun, Krist chu a mualphoh asi.

⁵Nunau âuzawng a lû khuh lo hen thlacham mawh thusimtu nih chun a pasal a mualphoh asi; chu nunau chu a lû mêt peng mi nunau hen zeikhawm â dangnâk a um loh.

⁶Nunau lukhuh lo hen a um chun mêt dâidua seh; sikhawmsele, nunau rangah lû mêt mawh mêt peng mawh ningzak a kâi chun lukhuh a khuh seh.

⁷Mipa lam chu Pathian bangh mi leh rokualnâk asi ruangah lukhuh khuh ding asi lo rerêng asi. Nunau lam chu mipa rokualnâk asi.

⁸Mipa hi nunau thawk hen suak asi lo le, nunau lam chu mipa thawk hen suak asi dauh.

⁹Mipa hi nunau rangah siam asi lo le, nunau lam chu mipa rangah siam asi dauh.

¹⁰Chururang chun, vânmifial tla ruangah nunau nih mipa thuneihnâk tangah a um ti singsiahnâk ding hen â khuh ding asi.

¹¹Sikhawmsele, Lalpa ah chun nunau hi mipa lo hen a um kho lo, mipa khawm hi nunau lo hen a um kho bâk lo.

¹²Nunau hi mipa thawk hen suak asi hâwi ber hen mipa khawm hi nunau thawk hen suak asi; sikhawmsele, zeizawng hi Pathian thawk hen suak asi.

¹³Nanmah kha dawn nik u, nunau nih lukhuh khuh lo hen Pathian sinah thlacham hi â dawh mazei?

¹⁴Mipa nih sam sâu a nei chun a rangah ningzakkâi asi ti nan suakpi mi thinsung khawm nih a nan theihtir na lo mazei?

¹⁵Nunau lam nih chun samsâu a nei chun a rangah rokualnâk asi dauh; a sam chu khuhnâk dingah pêk asi.

¹⁶Zeikhawm si sele, âuzawng êl ding hen um sele, chu hâwi dân rerêng kan nei lo, Pathian kawhmi tla khawm nih an nei lêm lo.

¹⁷Sikhawmsele, ka nan sîntir na mi lakah hin ka nan sawr na kho lo, nan that khunnâk ding silo hen, nan siat khunnâk ding lei dauh hen nanna pûm tâwn ruangah hin.

- ¹⁸A masachem hen kawhmi le tla nanna pûm chun nan lakah ðhennâk a um tâwn ti ka theih asi; lung khawm ka lung dauh ber asi.
- ¹⁹Nan lakah a tak tak tla chu an lang khonâk ding hen nan lakah lungnâk dang a um ding rerêng asi.
- ²⁰Chun, nanna pûm hen Lalpa zânriah ei kho asi lo, mikip nih nan ei hen mah zânriah nan ei masa tâwn.
- ²¹Chun, mi pakhat a sung a vâng le, mi pakhat a rî fâwn. Zei ti zia me?
- ²²Din leh einâk ding in nan nei lo masi? Asi lo chun, Pathian kawhmi tla nan zauhnawmh hen zeikhawm neilo tla chu nan mualphoh mazei? Nan sinah ze me ka sim lai rawh ne? Ka nan sawr na awt ma? Hi leikâng hin ka nan sawr na kho lo.
- ²³Thu ka nan simh na singsuan mi kha Pathian sinah thawk hen ka tawng mi asi: Kha hâwi hen Lalpa Jisu nih tleihtir hen a um zân ah sang a lâk le,
- ²⁴lâwmthu a sim thluh nûnah, a phel le, "Hi hi ka taksa, nan ruangrûl ah pêk ding mi chu asi, nan ka theihkumzanâk ding hen ti tâwn u," a ti kha.
- ²⁵Chu hâwi ber hen, zânriah ei thluh ah hâi khawm chu a lâk le, "Hi hâi hi ka thisen, a thutiam thar chu asi, nan din kipah nan hawng ka theihkumzanâk ding hen hi hi ti tâwn u a ti kha.
- ²⁶Chu sang chu nan ei hen, hâi chu nan din kip hen a hawng kal nawlh lân lo chu Lalpa thihnâk chu nan zauhtir asi.
- ²⁷Churuangah, âuzawng ei tlâk lo hen sang chu a ei hen mawh Lalpa hâi dintu zawng chu Lalpa taksa leh thisen tlûnah mawh a ting lai.
- ²⁸Chun, mi a nik sawm seh, chu hâwi hen sang chu ei hen hâi chu din seh.
- ²⁹A ei leh a dintu nih chun Lalpa taksa chu a dawn seset lo hen chun mah tlûnah lâirêlnâk ding hen a ei hen a din tâwn asi.
- ³⁰Churuangah, nan lakah mi tamtak chak lo hen nan ngawr asi, nêptuai nan thi lo.

³¹Sikhawmsele, mah leh mah a nik masa sele, Pathian lâirêl hen kan um lo ding mi,

³²lâirêl piak hen kan um khawmah laikulh hen mawhphurh a kan um lonâk ding hen Lalpa nunsimh hen kan um tâwn asi.

³³Churuangah ka unau le tla, ei ding hen nanna pûm khawmah a ngâk dut tâwn u.

³⁴Nanna pumhnâk chu lâirêlnâk nan tuar phah lonâk ding hen, âuzawng nih a sungvâng chun a in leiah ei seh. Chun thu chu ka hawng tik zawngah ka hawng remh lai.

1 Korin 12

¹Chun, unau le tla, thlarau lei thilpêk tla chu nan theih lo ka duh loh.

²Lunglo tla nan si liau khan ze ti kâng tal hen an ruai na nâk zawngah khabang ruk hawlh kho lo tla leiah khan tlâupi hen nan um ti nan theih.

³Churuangah, âukhawm nih Pathian Thlarau ah thusim hen, "Jisu chu siat phurh asi," an ti dah lo; chun âukhawm nih Thlarau Thenhlimh ah cho lo chun "Jisu chu Lalpa asi," an ti kho dah lo ti ka nan theihtir na.

⁴Chun, thilpêk dang dang a um le, Thlarau lam chu munkhat asi.

⁵Rianṭuan dang dang khawm a um, Lalpa lam chu munkhat asi.

⁶Ṭuan dân dang dang khawm a um le, Pathian lam chu munkhat asi- mi zawzawng lakah zeizawng ṭuantu chu.

⁷Sikhawmsele, ṭhatvahnâk ding hen Thlarau theihtirnâk chu mikip sinah pêk chiau asi.

⁸Mi pakhat sinah Thlarau ah chun finghnâk thu pêk asi; midang sinah chu Thlarau ber nih chun theihnâk thu pêk asi.

⁹Chun, midang sinah chun chu Thlarau ber ah chun lungnâk pêk asi; midang sinah Thlarau ah chun damh khonâk thilpêk pêk asi.



¹⁰Midang sinah thilchê tikhonâk tla pêk asi; midang sinah thusim khonâk pêk asi; midang sinah Thlarau tla theih dik khonâk pêk asi; chun midang sinah hawlh chi dang dang hen thusim khonâk ha pêk asi; midang sinah hawlh simhfiang khonâk tla pêk asi.

¹¹Sikhawmsele, chubang zawzawng chu Thlarau munkhat ver hen chun mikip sinah a duh hâwi zia vima hen a ðhen hen a ðuan tâwn.

¹²Taksa hi pumkhat asi, ðeng tamtak a nei le, taksa ðeng tla zawzawng chu tam khawmsele taksa pumkhat an si le, Krist chu chu hâwi ber chu asi.

¹³Kan ektê hen, Juda mawh, Phundang mawh, sal mawh, sal lo mawh taksa pumkhat a um ding hen Thlarau pumkhat cho ah baptis hen kan um chiau le, Thlarau pakhat cho hawng kan dintir chiau fâwn.

¹⁴Taksa hi ðeng pakhat cho asi lo le, ðeng tamtak asi dauh.

¹⁵Kezaphah nih hin, "Kut ka si lo ruangah hin taksa ah tel ka si lo," ti sele, chu mi ruang chun taksa lakah tel lo asi lêm lo.

¹⁶Chun, nâ nih hin, "Mit ka si lo ruangah taksa ah tel ka si lo," ti sele, chu mi ruangah taksa lakah tel lo asi lêm lo.

¹⁷Taksa pum hi mit si ver sele hâu theihnâk chu zeiah me a um lai? A pum hen hâu theihnâk si ver sele rim theihnâk chu zeiah me a um lai?

¹⁸Sikhawmsele, Pathian nih ðeng kip tla hi taksa ah hin a duhnâk kipah a umtir chiau rawh asi.

¹⁹Chun, chubang zawzawng chu ðeng khat cho si sele taksa hi zeiah me a um lai?

²⁰Chu hâwi hen, ðeng tamtak an si le, khawmsele taksa pumkhat cho asi.

²¹Chun, mit nih hin kut sinah, "Zeirang khawmah ka nan duh lo," a ti kho lo; lû khawm nih hin kezaphah sinah, "Zei tirua khawmah ka nan duh lo," a ti kho lo fâwn.

²²Asi, chu hâwi ngangâk hen, taksa ðeng chak lo dauh hâwi a lang mi tla hi thungâi an herh asi.

²³Chun, taksa ðeng chawnglawmh tlâk lo dauh a kan ruat mi tla hi, chubang tak chu thungâi kan chawnglawmh tâwn. Churawhchun kan ðeng â dawh lo mi tla lam nih chun chu hâwi hen ti an ngâi lo.

²⁴Taksa lakah hin ðhennâk ding rêng a um lo, a ðeng tla nih hin bang ver hen anna nawkpi tawnh chiaunâk ding hen Pathian nih dawhnâk nei lo ðeng chu chawnglawmh dauh hen taksa hi a kâwp asi dauh.

²⁶Chun, ðeng khat nih a tum chun ðeng zawzawng nih an tuarpi tâwn, ðeng khat chawnglawmh hen a um chun ðeng zawzawng nih an lawmhpi tâwn.

²⁷Chun, nannih tla hi Krist taksa chu nan si le, a ðeng tla nan si chiau ber.

²⁸Chun, Pathian nih zeimaw mi tla chu kawhmi le tla lakah a siah le, a pakhatnâk ah chun mifial tla, a panihnâk ah chun khuavâng tla, a pathumnâk ah chun sîntirtu tla a siah le; chu mi nûnah chun thilchê ti tla a um le, chu mi nûnah chun damtir khonâk thilpêk tla, ðangpi khonâk thilpêk tla, lâirêl thiamnâk thilpêk tla, hawlh chi dang dang hen thusim khonâk thilpêk tla chu a um nawlh.

²⁹An ektê hen mifial an si ver mazei? An ektê hen khuavâng tla an si ver mazei? An ektê hen sîntirtu an si ver mazei? An ektê hen thilchê titu an si ver mazei?

³⁰An ektê hen damtir khonâk thilpêk an nei ver mazei? An ektê hen hawlh theih lo hen thu an sim ver mazei? An ektê hen thu an simhfiang ver mazei?

³¹Thilpêk rokual chem chu thungâi duh u. Chun, tuah lampi ða dauh ka nan zauhtir na awt asi.

1 Korin 13

¹Minung hawlh leh vânmifial hawlh hen thu sim khawmsele dâwtnâk ka nei ðung lo chun dâr ri hâu salam mawh, chêngchêng ri hâu salam mawh ka hawng si lai.

²Chun, thusim khonâk nei hen, thu thup zawzawng leh theih khonâk zawzawng theih ver khawmsele, tâng ÷hnh khawp rê hen lungnâk nei khawmsele dâwnâk ka nei ÷ung lo chun zeikhawm ka si lai loh.

³Chun, mipâm tla châwmnâk dingah ka neih zawzawng pêk ver khawmsele, ka taksa khawm kâng ding hen pêk khawmsele dâwnâk ka nei ÷ung lo chun a ÷havak lai loh.

⁴Dâwnâk nih â dawnh kho, vêl a nei tâwn; dâwnâk nih a nahsuah lo;

⁵dâwnâk chu â sawr lo, â zûm lo, dawh lo hen a châng lo, mah rang cho a ruat lo, a thinthawk duh lo,

⁶sual leikâng a dawn lo, replonâk ah â lâwm lo, thutak lam chu a lawmphi tâwn.

⁷Zeizawng a tuar rarâm le, zeizawng a lung le, zeizawng a lungum le, zeizawng ah tlawlnâk a nei lo.

⁸Dâwnâk hi zeitik khawmah a reh lai loh; sikhawmsele, thusimnâk tla hi a bâng teh lai; hawlh theih lo tla hi um khawmsele a bâng teh lai; theihnâk hi um khawmsele a bâng teh lai.

⁹A kim lo hen kan theih le, a kim lo hen thu kan sim tâwn asi.

¹⁰A rangtlingnâk a hawng tlung tikah chun a kim lo mi hi bângtir asi lai rawh.

¹¹Ka ngâksia liauah ngâksia hawlh hen ka hawlh le, ngâksia theih hen ka theih le, ngâksia ruatdân hen ka ruat tâwn. Tuah ka upat nûnah hin ngâksia ti dân chu ka thlah rawh.

¹²Tu lam chun thlalang ah ka muh rianruan asi, chu tikah lam chun mâitawnh hen asi lai rawh; tuah lam chun a kim lo hen ka theih, chu tikah lam chun Pathian nih a hawng ka theih kim hâwi hen ka theih kim lai rawh.

¹³Chun, hi pathum, lungnâk, lungumnâk leh dâwnâk tla hi a um kumza lai; chun hi bang tla lakah hin a rokual chem mi chu dâwnâk hi asi.

1 Korin 14



- ¹Dâwnâk hi zûl vima ule, thlarau lei thilpêk tla chu duh kumza u. Sikhawmsele, thu nan sim khonâk ding châng chu duh khun u.
- ²Hawlh theih lo hen thusim nih chun minung sinah sim lo hen Pathian sinah sim asi dauh, âukhawm nih a thusim chu an theih lo; sikhawmsele thlarau lakah chun thu thup a sim asi.
- ³Thusimtu lam nih chun minung sinah siamtharnâk thu tla, fawrhâk thu tla, lungngamnâk thu tla a sim tâwn.
- ⁴Hawlh theih lo hen thusim nih chun mah cho a siam ðha tâwn, thusimtu lam nih chun kawhmi tla a siamðha dauh tâwn.
- ⁵Chun, nan ektê hen hawlh theih lo hen thu nan sim ka nan duh piak na lo! Sikhawmsele, nan ektê hen Pathian thusimnâk thilpêk nan nei chiau ka nan duh piak dauh na asi. Kawhmi le tla nih siamðhatnâk an tawng khonâk ding hen, a simhfiang lo chun thusimtu chu hawlh theih lo hen thusimtu ngâk chun a rokual dauh rerêng asi.
- ⁶Tuah unau le tla, hawlh theih lo a thusim hen nan sinah hawng kal tâ sele, theihtirnâk leikâng mawh, theihnâk leikâng mawh, thusim leikâng mawh, sînnâk leikâng mawh nan sinah ka sim ðung lo chun zeï me ka nan ðhattir na nâk um lai?
- ⁷Thil nung lo tumphung âwn kho mi tla khawm, theikhang mawh, ðingðang tla hi suangkhang nei hen a âwn lo chun zeï la me an tum le an sak, zeitin â theih kho lai?
- ⁸Dârlâwi hi suangkhang neilo hen a âwn chun âu nih me râl kah ding hen â timhtuah lai?
- ⁹Chu hâwi ber hen nannih khawm nih, lei nih hin theih kho mi hawlh hen nan sim lo chun zeï thu me nan sim zeitin a theih kho lai?
- ¹⁰Boruak ah hawlh mi ko nan si awt asi. Laikulh ah hin hawlh chi dang tamtak a um asi, sikhawmsele umzia nei lo rerêng a um lo.

- ¹¹A hawlh umzia lam chu kan theih lêm lo chun kei hi a simtu rangah phundang ka si lai le, a simtu khawm chu ka rangah phundang asi lai.
- ¹²Chun, nannih khawm nih thlarau lei thilpêk lakah ðhanem nan ngâi ruangah hin kawhmi le tla siamðhatnâk ding nan nei khonâk ding hen hâwl u.
- ¹³Churungah hawlh theih lo a thusim nih chun a simhfiang khonâk ding hen thlacham seh.
- ¹⁴Hawlh theih lo hen thla ka cham chun ka thlarau khawm nih thla a cham ngelchel le, ka theihnâk lam chu a ðhavak lêm lo.
- ¹⁵Zeitin asi lai rawh ne? Thlarau hen thla ka cham lai le, theih khonâk khawm hen thla ka cham ber lai. Thlarau hen la ka sak lai le, theihnâk hen khawm ka sak ber lai.
- ¹⁶Chu lo chun thlarau hen malsâwm piak na khawmsele theih dah lo tla umnâk ah um mi nih, nan lâwmthusim ah chun zeitin me "Amen" a ti kho lai, na thusim chu a theih lêm lo mi?
- ¹⁷Nang lam nih chun lâwmthu chu ðha tak hen na sim le, midang lam chu a siamðha lêm lo.
- ¹⁸Nanmah ngâk hen hawlh theih lo hen thu ka sim tam ruangah Pathian sinah lâwmthu ka sim le,
- ¹⁹sikhawmsele kawhmi tla pumhnâk ah chun hawlh theih lo hen thu sâng khat sim ngâk hen midang tla ka sîntir kho na nâk ding hen ka theih khonâk ding thu panga cho sim ka duh dauh asi.
- ²⁰Unau le tla, thinlung leikângah ngâksia lah u. Sikhawmsele, sual leikâng lam chun fasêm si ule, thinlung leikâng lam chun upa si u.
- ²¹Pathian Lasui thu nih, "Ramdang mi tla hawlh hen, ramdang mi tla mûr hen, hi bang mi le tla sinah thu ka sim lai le, ka mi le tla nih an ka ngâi piak lêm lai loh, Lalpa nih a ti," ti rîn asi.

²²Churuangah, hawlh theih lo tla hi lungtu tla rangah singsiahnâk asi lo le, lunglo mi rangah asi dauh; thusim lam hi chu lunglo tla rangah singsiahnâk asi lo le, lungtu rangah asi dauh.

²³Churuangah, kawhmi zawzawng nanna pûm hen nan ektê hen hawlh theihlo hen thu nan sim chun, theih dah lo mi mawh, lunglo tla mawh hawng na sele, a â an ti awt lo ma?

²⁴Nan ektê hen thu nan sim lam chun lunglo mawh, theih lo mi mawh hawng lût sele, a mawh zia a ngâi mi nih a langhtir lai le, a ngâi mi tla zawzawng nih a salh lai rawh, a thinlung thuthup tla chu langhtir hen a um lai rawh.

²⁵Chun, bawkbukhup hen mâi an mûk lai le, Pathian nan lakah a um ti a phuang lai.

²⁶Unau le tla, zeitin asi lai rawh ne? Nan hawng a pûm hen, sawrnâk la mawh, thu sîntirnâk mawh, theihtirnâk thu mawh, hawlh theihlo mawh, simhfiangnâk mawh nan nei chiau tâwn. Zeizawng siamthatsnâk ding hen ti si seh.

²⁷Âuzawng nih hawlh theihlo hen thu an sim chun panih nih, a tam chem ah pathum mawh si sele, a sâwng vima na seh; chun pakhat nih simhfiang seh.

²⁸Simhfiangtu an um lo lam chun kawhmi tla pumhnâk ah dâisip hen um sele, mah leh Pathian sinah sim seh.

²⁹Thusimtu tla khawm nih panih mawh pathum mawh sim sele, midang tla nih chun dawn seset seh.

³⁰Sikhawmsele, a kiangah to mi midang sinah theihtirnâk thu pêk hen a um chun a masa mi chu dâisip seh.

³¹Mi zawzawng anna sîn khonâk ding leh mi zawzawng lungngam tak an um khonâk ding hen nan ektê hen pakhat vima hen thu nan sim kho asi.

³²Thusimtu tla thlarau chu thusimtu thu thu hen an um asi.

³³Pathian chu nawknâk Pathian asi lo le, remnâk Pathian asi dauh. Mi thenhlimh kawhmi murui zawzawng sinah a um hâwi hen.



³⁴Kawhmi tla pumhnâk ah chun nunau tla chu dâisip hen um seh; annih lam chu an thusim siang asi loh; Juda dân nih a sim hâwi hen thu zâwt hen um dauh seh.

³⁵Chun, zeizawng sîn an duh chun mah in leiah mah pasal deih na seh; kawhmi tla pumhnâk ah chun nunau thusim hi ningzak a kâi.

³⁶Pathian thu hi nanmah lakah suak asi mu? Asi lo leh, nanmah tla sin cho mazei a hawng tlung?

³⁷Âuzawng thusimtu ah mawh, thlarau mi ah mawh â ruat chun nan sinah ka thurîn hi Lalpa thupêk asi ti hawng theih seh.

³⁸Sikhawmsele, âuzawng nih a theih lo chun theih lo hen um ko seh.

³⁹Chun, unau le tla, thusim hi duh thlo ule, hawlh theihlo thusim khawm khap lah u.

⁴⁰Sikhawmsele, zeizawng dawh tak hen leh rep tak hen ti si seh.

1 Korin 15

¹Chun, unau le tla, Thâwngthâng T̄ha ka nan simh na mi kha ka nan theihtir nawlh na lai.

²Chu Thâwngthâng T̄ha chu nan lawmh hen, chu lak ber chun nan dîr hen, thu ka nan simh na mi kha nan lung salam lo hen, nan tleih thlir chun chu lak tak chun ruangsuah hen nan um lai.

³A masachem hen, ka tawng bâk mi chu ka nan simh singsuan na kha, kha hâwi hen Krist chu Pathian lasui thu hâwi vima hen kan sual ruangah a thi le,

⁴an vûi le, Pathian lasui thu hâwi vima hen ni thum ni ah thawh hen a um, Peter sinah a hawng a langh kha.

⁵Chu nûnah chun thiruai leinîh tla sinah a hawng a langh nawlh le,

⁶chu nûnah chun veikhat ah amah zûltu mi zanga ngâk a tam dauh sinah a hawng a langh nawlh.



⁷Chu lakah mi tam dauh chu tutiang hen an dam rih, a zeimaw mi chu an thi rawh le, chu nûnah chun Jem sinah â langh nawlh, chun chu nûnah mifial zawzawng tla sinah.

⁸Chun, a dawngchem ah chun, a tik lo a suak hâwi, keimah sin khawmah â langh.

⁹Kei lam chu mifial lakah mêchem, kawhmi tla ka nehsawh na ruangah mifial ah ruat tlâk lo ka si.

¹⁰Sikhawmsele, Pathian zângfahnâk ruangah ka si ding mi chu ka si rawh; chun a zângfahnâk hawng ka pêk mi thu a thawt hen a um lo; chu hâwi ngâk hen anmah tla zawzawng ngâk hen a ÷uan ka hamh dauh kha. Sikhawmsele, keimah nih ka ÷uan lo le, Pathian zângfahnâk ka sinah um mi nih khan a ÷uan dauh asi.

¹¹Zeikhawm si sele, kei khawm nih, annih khawm nih, kha hâwi khan kan sim tâwn le, kha hâwi khan nannih nih nan lung bâk.

¹²Chun, Krist thu, mithi lakah mi thawh hen a um ti an sim ÷ung chun zeitin zia me nan lakah zeimaw mi nih, "Mithi thawknawlnâk rerêng a um lo nan ti ne?"

¹³Mithi thawknawlnâk rerêng a um lo chun Krist khawm kha thawh nawlh hen a um lai loh.

¹⁴Chun, Krist kha thawh hen a um lo chun kan thusim hi zeikhawm lo asi ber lai.

¹⁵Asi, Krist a thawh ti Pathian kan theihpi ruang khan Pathian thu leikângah theihpitu âwkrâwl kan hawng si ber lai--mithi tla thawh hen an um lo chun amah khawm a thawk lai loh.

¹⁶Mithi tla thawh hen an um ÷ung lo chun Krist khawm kha thawh hen a um lai lo.

¹⁷Chun Krist kha thawh hen a um lo chun nan lung mi chu zeikhawm asi lai lo le, nan sualnâk ah chun nan um nget asi lai.

- ¹⁸Chu hâwi asi chun Krist ah thi mi tla kha an vei ver rawh asi lai.
- ¹⁹Tu dam liau cho ah Krist lakah lungumnâk kan nei chun mi zawzawng lakah zângfah kâi chem kan si lai.
- ²⁰Sikhawmsele, Krist chu mithi lakah mi thawh hen a um tatak asi, hi hi asi a birhnâk chu mithi zâu rawh mi tla khawm an thawknawlh awt asi.
- ²¹Adam ruangah thihnâk a hawng um le, Krist ruang ber hen thawknawlhâk a hawng um.
- ²²Adam lakah mi zawzawng an thi tâwn hâwi hen, Krist ah mi zawzawng nunh hen an um hi.
- ²³Sikhawmsele, mah tik chiau vima ah, Krist chu thawhnâk mâitâwntu asi le, chu nûnah a hawng kal nawlhâk ah Krist tâ tla chu.
- ²⁴Chu tikah chun dawngnâk a hawng tlung teh lai, chu nûnah chun lâirêlnâk zawzawng tla leh thuneihnâk leh thiltikhonâk zawzawng tla a veih ver nûnah Pathian sinah Pa sin takah chun Ram chu a pêk lai.
- ²⁵A mêlma tla zawzawng a kê tangah a siah lan lo chu anih chu lal ah a um ding rêng asi.
- ²⁶Mêlma madungchem veih hen a um ding chu thihnâk hi asi.
- ²⁷Pathian lasui thu nih, "Pathian nih thil zeizawng a kê tangah a siah asi, ti hen a sim ruangah. "thil zeizawng" ti mi nih hin Pathian tel lo hen Krist tangah thil zeizawng siah ver ti nâk asi.
- ²⁸Chun, Krist lâirêlnâk tangah zeizawng siah hen a um tikah chun Fapa ngelchel khawm chu a tangah zeizawng siahtu tangah chun siah hen a um bâk lai, Pathian chu zeizawng ah zeizawng asi khonâk ding hen.
- ²⁹Chu hâwi asi lo chun, mithi ruangrûl ah baptis si mi tla chu zeitin me an ti na lai? Mithi tla chu thawh hen an um lo chun zeirangah me thih ruangrûl ah baptis an si tâwn ne?
- ³⁰Zeiruangah me kannih khawm hi dârkar kipah ÷ihnungkâi hen kan um tâwn ne?

- ³¹Unau le tla, Krist Jisu kan Lalpa ah chun ka nan putso na nâk chu sâl hen, "Nisiar hen ka thi tâwn," ka ti asi.
- ³²Minung nih ti kho salam hâwi hen Ephesi khua ah sa râng tla ka sualpi asi chun ka rangah zeï me a ðhavak lai? Mithi thawh hen an um awt lo chun kan din hen kan ei ko lai ma? Thai ko ah kan thi awt hi teh.
- ³³Perpet hen um lah u; hâwi sual tla nih chun nunchan ðha an râwk tâwn.
- ³⁴Rep tak hen lungfîm ule, thilsual ti lah u. Zeimaw mi nih chun Pathian theihnâk rêng nan nei lo hi; hi hi nan ningzaknâk ding hen ka sim asi.
- ³⁵Sikhawmsele, âu nih mawh, 'Mithi tla chu zeitin me thawh hen an um awt? Taksa zeï hâwi put hen me an hawng kal awt?' a ti asi lai.
- ³⁶Nang mi â, nangmah ngelchel nih na tuh mi khawm hi a thi tâ lo chun nungtir hen a um mazei?
- ³⁷Chun, na tuh mi hi a taksa um ding mi chu na tuh lo le, a fâng ko na tuh dauh tâwn; fâng mal mawh, chî dang mal mawh asi kho;
- ³⁸sikhawmsele, Pathian nih amah duhzia hâwi vima hen taksa a pêk tâwn, a mal kip sinah mah taksa chiau chu.
- ³⁹Taksa zawzawng hi taksa zât khat asi lo le, minung taksa â dang le, rannung taksa â dang le, vâ taksa â dang le, ngâ taksa â dang.
- ⁴⁰Vân taksa tla a um, tual taksa khawm; sikhawmsele, vân taksa rokualnâk chu â dang le, tual taksa rokualnâk chu â dang asi.
- ⁴¹Nî rokualnâk chu â dang le, thlâ rokualnâk chu â dang bâk, chun ârfi tla rokualnâk chu â dang; ârfi tla lak khawmah an rokualnâk ah chun anna bang lo.
- ⁴²Mithi thawh nawlhnâk khawm chu hâwi ber asi. Thû kho hen tuh hen a um le, thû kho lo a thawh hen a um; nâu tak a tuh hen a um le, rokual tak a thawh hen a um.
- ⁴³Chak lo a tuh hen a um le, thiltikhonâk nei a thawh hen a um.

⁴⁴Minung lei taksa a tuh hen a um le, thlarau lei taksa a thawh hen a um. Minung lei taksa a um chun thlarau lei taksa khawm a um lai.

⁴⁵Chu hâwi ber hen, Minung masachem Adam chu minung a hawng si," ti rîn asi. Adam madung dauh chu nungnâk pêktu thlarau a hawng si.

⁴⁶Sikhawmsele, thlarau lei chu a um masa lo le, minung lei chu a um masa dauh; chu nûnah chun thlarau lei chu a um.

⁴⁷Minung masachem chu tual a mi valei hen siam asi; minung panihnâk chu vâh ah mi asi.

⁴⁸Valei hen siam mi Adam hâwi kha tual a siam mi tla khawm hi an si; vâh ah siam mi Krist hâwi kha vâh a mi tla khawm chu an si.

⁴⁹Chun, tual ah siam mi Adam banghnâk an nei hâwi hen vâh ah mi Krist banghnâk chu kan nei awt asi.

⁵⁰Unau le tla, taksa leh thisen nih hin Pathian Ram chu a luah kho lai loh; thû kho nih hin thû kho lo chu a luah kho lai loh ti ka sim asi.

⁵¹Ngâinik u, thuthup dik tak ka nan simh na awt hi: Kan ektê hen kan thi lêm lai lo le, sikhawmsele kan ektê hen dârlâwi madungchem a âwn tikah chun sâwtlotê ah,

⁵²mitthlep kar lo ah dangtir hen kan um ver lai; dârlâwi chu a âwn awt asi, chun mithi tla chu thû kho lo a thawh hen an um lai le, kannih khawm dangtir hen kan um lai.

⁵³Hi thû kho nih hin thû kholonâk â ting ding asi, hi thû kho khawm nih hin thû kholonâk â ting bâk ding asi.

⁵⁴Chun, hi thû kho nih hin thû kholonâk â ting hen, hi thû kho nih hin thû kholonâk a ting tikah chun, "Nehnâk nih thihnâk a dawlh thluh rawh!" ti thu a hawng tlung lai.

⁵⁵"Aw thihnâk, na nehnâk chu zeiah me a um? Aw thihnâk, na tûr kha zeiah me a um?"

⁵⁶Thihnâk tûr chu sual asi le, sual thiltikhonâk chu Dân thu chu asi.

⁵⁷Sikhawmsele, kan Lalpa Jisu Krist zârah nehnâk hawng kan pêktu Pathian sinah chun lâwmthu um seh.

⁵⁸Churuangah, ka unau duhtak le tla, bir tak hen, changh kho lo rê hen, Lalpa rian ðhanemngâi tak a ðuan kumza hen um u, nan ðuan hamhnâk chu Lalpa ah chun a thawt dah lo ti nan theih asi.

1 Korin 16

¹Chun, mi thenhlimh tla rangah thawhlâwm thu lam kha chu, Galatia ram ah kawhmi tla murui sinah thu ka pêk hâwi hen nannih khawm nih hawng ti bâk u.

²Ni sarikh ni masachem ah chun mikip nih malsâwmnâk nan tawng hâwi vima hen khawng chiau ule, ka hawng kal tikah thawhlâwm khawlh rerêng a um lonâk ding hen.

³Chun, nan zângfah thilpêk chu Jerusalem khua ah kalpi ding hen ka hawng tleng tikah âu tal ðha nan ti mi zawng lasui put hen ka fial hi.

⁴Chun, ka kal bâk ding mi asi chun ka sinah an hawng lai.

⁵Chun, Makedonia ram ka ðawl dih nûnah chun nan sinah ka hawng kal lai. Makedonia ram chu ka ðawl rerêng awt asi.

⁶Nannih sin lam chun ka châm ko asi kho, busik kar zawzawng khawm asi lai dahmawh, zeiah tal ka kalnâk ding kipah nannih nih nan hawng ka thlah khonâk ding hen.

⁷Tuah kal pah ko hen an muh na ding ka duh lo le, Lalpa nih rem a ti chun nan sinah sâwt dauh châm ding ka ruat asi.

⁸Sikhawmsele, Pentekost tiang hen Ephesi khua ah ka châm ko lai.

⁹Kawtkâ kâu tak leh ðhatnâk tak ka rangah â awng asi, dotu tla tamtak an um ber.

¹⁰Chun, Timothe kha a hawng tleng chun ngamh tak hen nan sinah a um khonâk ding hen hawng lawmh u; kei nih ka ðuan hâwi ber hen Lalpa rian chu a ðuan asi.



¹¹Churuangah âukhawm nih zauhnawmh lah seh; ka sinah a hawng khonâk ding hen lungngam tak hen hawng thlah u; unau tla rual ah amah muh ding ka ruat asi.

¹²Kan unau Apolo thu kha chu, unau tla rual ah nan sinah hawng ding hen ka ngiar chiam le, sikhawmsele tuah lam chun hawng kal a duh lo thlo, â dêngkhâwng tikah chun a hawng kal lai.

¹³A vêng ule, lungnâk ah chun dîr thlir ule, nan râl a thattir ule, chak tak hen um u.

¹⁴Nan ti mi vial chu dâwtnâk ruangah ti mi si ver seh.

¹⁵Unau le tla, Stephan leh a dâwngsung le tla chu Akai ram ah lungtu masa an si le, Pathian mi tla rianṭuan ding hen anna pêk ti nan theih;

¹⁶chu hâwi mi tla sinah leh rianṭuan hen ṭangpi leh ṭuan hamh mi vial sinah chun a pêk ding hen ka nan ngiar na.

¹⁷Chun, Stephan, Fortunata leh Akaika tla an hawng kal mi hi ka lawmh asi, nan um lo mi theih phân lo hen an hawng ka siam ruangah.

¹⁸Annih nih hin ka thinlung leh nan thinlung an panhtir le, chun hi bang hâwi mi tla hi lawmh u.

¹⁹Asia ram kawhmi murui tla nih hin chibai a nan bûk na. Akuila leh Priskili, an in ah kawhmi tla hen Lalpa ah chun chibai tamtak a nan bûk na, unau zawzawng nih hin chibai a nan bûk na.

²⁰Châwchawk thenhlimh hen chibai a bûk chia u.

²¹Kei, Pawl nih keimah kut ngelchel hen chibai ka nan bûk na.

²²Âuzawng nih Lalpa a dâwt lo chun siatphurh hen um seh. Kan Lalpa chu a hawng kal hi!

²³Lalpa Jisu Krist dâwtnâk chu nan sinah um seh.

²⁴Krist Jisu ah ka nan dâwt na nâk hi nan ektê sinah um seh. Amen.

2 Korin

2 Korin 1

¹Pawl Pathian duhzia a Krist Jisu mifial leh kan unaupa Timothe nih chun: Korin khua ah Pathian kawhmi um tla sinah leh Gris ram zawzawng ah mi thenhlimh um zawzawng tla sinah chun:

²Pathian kan Pa leh Lalpa Jisu Krist sinah mi zângfahnâk leh remnâk nan sinah um seh.

³Kan Lalpa Jisu Krist Pathian leh Pa, khuaruattu Pa leh lungngamnâk zawzawng Pathian chu sawr hen um seh.

⁴Pathian nih lung hawng kan ngamhnâk ngelchel nih hamhnâk zeî hâwi mi ah um mi tla khawm chu kan lungngamh kho ding hen anih nih chun kanna hamhnâk zawzawng ah lung hawng kan ngamh tâwn.

⁵Krist tuarnâk tla chu kan tlûnah a leiluat hâwi hen kan lungngamnâk hi Krist zârah a leiluat asi.

⁶Sikhawmsele, hamh hen kan um chun nanmah tla ãangpinâk ding leh ruangsuaahnâk ding asi; ãangpi hen kan um chun nannih khawm ãangpi hen nan um bâk asi, chu nih chun hamh kan tuarnâk ber hi felfê tak hen nan tuarnâk ah chun chaknâk a nan pêk na asi.

⁷Chun, hamhnâk ting bâk mi tla nan si hâwi hen lungngamnâk ting bâk mi nan si ti kan theih hen kan lungum piak na nâk hi a bir asi.

⁸Unau tla, Asia ram ah kan tlûnah hamhnâk a hawng tlung mi thu kha nan theih lo kan duh lo, kha hâwi a fâk tak a tuar kho lo rê hen, nung ding rêng ruat kho lo rê hen, denh pang hen kan um mi kha.

⁹Asi, mah a zûm lo hen, kanmah lakah a zûm lo hen, Pathian, mithi thawhtu kan zumh dauhnâk ding hen kanmah lakah thihnâk rêpnâk kan nei rawh.

¹⁰Chu Pathian nih chun chu hâwi tluk a thihnâk fâk tak lakah chun ruang hawng kan suah rawh le, ruang hawng kan suah lai; ruang hawng kan suah vima awt ti amah lakah chun lungumnâk kan ngauh.

¹¹Mi tamtak zârah thilpêk kan tawng ruangah mi tamtak nih kan tlûnah lâwmthu an sim khonâk ding hen, nannih khawm nih thla nan hawng kan cham piaknâk ah hawng kan bawmh dut u.

¹²Kan putso mi chu hi hi asi: Kan sia leh ̣ha theihnâk thu theihtir chu thenhlimhnâk leh Pathian diknâk nei hen, taksa finghnâk ah silo hen, Pathian zângfahnâk dauh hen laikulh ah hin kan changhdân kha nanmah leikângah kan changh dân a ̣ha khun.

¹³Nan sinah nan rêl kho hen leh nan theih kho ding mi cho kan hawng rîn ruangah.

¹⁴Chun, Lalpa Ni ah nannih kan putso na mi nan si awt hâwi ber hen kannih khawm nan kan putso mi kan si awt ti tuah a chimpâl cho hen nan theih mi kha nan theihfiang ver lai rawh ti ka ruat asi.

¹⁵Chun, chu lungnâk nei hen, malsâwmnâk letnih nan tawng khonâk ding hen nan sinah hawng masa sele, nanmah tla pal pah hen,

¹⁶Makedonia ram ah kal vima sele, Makedonia ram thawk hen nan sinah hawng a let nawlh sele ka ti; chun Judai ram ah ka kalnâk dingah chun nanmah tla thlah hen um sele ka ti.

¹⁷Chun, chu hâwi thinlung ka put liau khan ka thinlung birh lo zia langhtir ma ka si? Asi lo leh, ka sinah, "Asi, asi," ti leh, "Asi lo, asi lo," ti chu um vevê hen thilti ka tum tâwn mi chu taksa hâwi hen ma ka tum?

¹⁸Zeital si sele, Pathian chu zumh a kâi hâwi hen, nanmah leikângah kan thu hi, "Asi," ti leh, 'Asi lo," ti asi ̣tung lo.

¹⁹Pathian Fapa Jisu Krist a thu, kei leh Silas leh Timothe nih nan lakah kan sim mi kha "Asi," leh 'Asi lo," asi ̣tung lêm lo, amah Pathian lakah chun, "Asi," ti a um dauh asi.

²⁰Pathian thutiam tla chu zeizat tal si khawmsele amah lakah chun, "Asi" ti chu a um le; chun amah ruang khawmah, "Amen" ti chu a um asi, kanmah tla ruangah Pathian rokualnak ding hen.



²¹Chun, Krist ah nanmah tla hen hawng kan birhtirtu lakah kannih a dangtê hen hawng kan ruitu chu Pathian asi.

²²Anih chu hawng kan singsiahtu leh kan thinlung ah Thlarau Thenhlimh hawng kan pêktu asi ber.

²³Sikhawmsele, ka thlarau lakah theihtu rangah Pathian ka kawh asi, nanmah tla a nan zuah na ding hen asi Korin khua ah ka hawng kal lo mi kha.

²⁴Nan lungnâk lakah lalnâk ka nei ka ti lo le, nanna lâwmnâk ɽangpitu kan si ka ti dauh asi; lungnâk ah dîr nan si dangâiah.

2 Korin 2

¹Sikhawmsele, keimah leikâng thu ah lam chun hi hi ka tum thlir asi: An ngaihsiattir na ding hen chun nan sinah hawng lo rawh ding hen. Kei nih ka nan ngaihsiattir na chun ka ngaihsiattir mi ber lo nih chun âu me hawng ka lawmhtirtu asi lai?

²Chun, kha ngelchel kha ka rîn asi, chu lo chun ka hawng tikah ka lâwmnâk ding lakah chun ngaihsiatnâk ka tawng lebang lai.

³Churuangah asi, kha lasuikuat kha nan sinah ka rîn mi kha, hawng ka lawmhtirtu mi zapi tla ber kan ngaihsiattir na ding hen nan sinah ka hawng kal ding hen ka duh lo; ka lâwmnâk chu nan ektê lâwmnâk asi ti ka theih ruangah.

⁴Mitthli tamtak tla bû hen leh thinlung hamhnâk leh thungâi thlakâm hen ka rîn asi kha; chu chu ngaihsiattir hen nan umnâk ding asi lo le, nan tlûnah dâwnâk fâk tak ka nei mi hi nan theih khonâk ding hen asi.

⁵Sikhawmsele, âuzawng nih mi a ngaihsiattir chun keimah nan hawng ka ngaihsiattir lo le, ka ti tuk lonâk ding hen, nan ektê hen, asi lo leh, nan lakah mi zeimaw mi an ngaihsiattir na chiam asi.

⁶Chu hâwi mi rangah chun mi tamtak nih an rêp mi chu â tâwk rawh asi.

⁷Chun, rêp nawlh ding ngangâk hen nan ngaihdam hen nan lungngamh dauh ding asi. Chu lo chun zeitin mawh ti hen chu hâwi mi chu a ngaihsiat tuknâk nih a khuh dep lebang lai.

⁸Chu mi ruangah chun amah leiah nan dâwtmâk chu birhtir ding hen ka nan ngiar na.

⁹Hi ruang khawm hin ka rîn asi, zeizawng lakah thu nan ngâi leh ngâilo ka nan nik na kho ding hen.

¹⁰Zei leikâng khawm hen mi nan ngaihdam mi zawng kei khawm nih ka ngaihdam bâk le;

¹¹kei khawm nih ka ngaihdam chia chu zeizawng ka ngaihdam rawh chun nanmah tla ruangah Krist mâika ah chun ka ngaihdam asi; chu lo chun Setan nih hawng kan sawhkhah lebang lai; a ngamlêmnâk chu kan palh lêm lo dangâiah.

¹²Chun, Krist Thâwngthâng T̄ha sim ding hen Troas khua ka tlung liau khan Lalpa nih chun lampi hawng ka awng piak narêng hen ka unau tla chu ka muh lo ruangah ka thlarau leiah chun lungngamnâk rerêng ka nei lêm lo.

¹³Chun, annih chu hawlh t̄ha hen ka mâk na le, ka suak le, Makedonia ram ah ka kal rawh.

¹⁴Sikhawmsele, Krist nehnâk ah hawng kan rui kumzatu leh kanmah tla mang hen mun kipah amah theihnâk rim theihtirtu Pathian sinah chun lâwmthu um seh.

¹⁵Ruangsuah liau chir mi tla leh a vei liau chir mi tla rangah chun Pathian rangah Krist rimthâw kan si.

¹⁶Murui khat tla rangah chun thihnâk lakah thihnâk ding rim kan si le, murui khat tla rangah chun nungnâk lakah nungnâk rim kan si. Chubang tla rangah chun âu me tling kho lai?

¹⁷Mi tamtak nih Pathian thu hi mi tla perpet hen sawlehnâk ah an mang hâwi hen kannih nih chun kan mang lêm lo; thungâi tak hen, Pathian fial hen, Pathian mitmuh hen Krist ah chun thu kan sim tâwn.

2 Korin 3

¹Mah a simṭhat kan dawmh awt nawlh fâwn mu? Asi lo leh, nan sinah pêk ding mawh nan sinah thawk hen mawh siamṭhatnâk lasui mi zeimaw mi rangah a herh hâwi hen kan rangah a herh awt bâk ma?

²Nannah hi kan lasui kan thinlung a rîn, mi zawzawng theih leh rêl mi chu nan si.

³Krist lasui, kanmah tla hawng kan rîntir mi, mângsi hâng hen rîn si lo mi, Pathian nung Thlarau a rîn dauh, lungtlêp ah rîn silo, taksa thinlung tlêp ah rîn mi chu nan si ti fiang tak a langhtir asi.

⁴Chun, Pathian leiah chun chu hâwi lungnâk chu Krist zârah kan nei asi;

⁵zeizawng kanmah thawk hen suak a ruat ding hen kanmah cho hen kan tlinh kan ti lo; kan tlinh khonâk chu Pathian sin thawk hen asi dauh.

⁶Amah ber nih chun thutiam rianṭuantu ah hawng kan tlinhtir le, a lasui thu ko ah rianṭuantu si lo hen, a thlarau rianṭuantu ah asi dauh. A lasui thu ko nih chun a thah tâwn lo, thlarau lam nih chun a nungtir tâwn asi.

⁷Mosi mêl a rokual ruangah Israel fa tla nih chun a mêl an zauh kho lo le, chu rokualnâk chu a vei duaimâi, thihnâk rianṭuannâk lung ah hawrawp a ṭialh mi men chu hâwi tluk a rokual hen a tlung chun,

⁸Thlarau rianṭuannâk chu zei hâwi tluk a rokual hen dek a hawng tlung lai!

⁹Mawhtirnâk rianṭuan men a rokual chun repnâk rianṭuannâk chu rokualnâk leikângah chun thungâi a fâk dauh ding asi.

¹⁰Rokualtir hen um rawh nih chun hi leikângah lam chun rokualnâk rerêng a nei lo rawh, rokualnâk fâk dauh nih a khûp ruangah.

¹¹A vei duaimâi mi men rokual hen a um chun um kumza ding mi chu rokual a tuam hen a um dauh khun ding asi.



¹²Chun, chu hâwi lungumnâk kan nei ruangah zeizawng kan sim tâwn asi, Mosi ti hâwi khan kan ti lo;

¹³anìh nih chun a vei duaimâi mi dawngnâk chu Israel fa tla nih chun an zauh ko lonâk ding hen a mêl chu khuhnâk hen a khuh; an thinlung lam chu khauhtir hen a um dauh.

¹⁴Tusûn tiang khawmah thutiam li chu an rêl chun khuhnâk lîlâ chu lîm lo hen an um ko ruangah chu khuhnâk chu Krist ah chun tlâulir hen a um rawh.

¹⁵Sikhawmsele, tusûn tiang hen Mosi lasuibu an rêl kipah an thinlung ah khuhnâk a um tâwn.

¹⁶Sikhawmsele, an thinlung chu Lalpa leiah a hawi tik zawngah khuhnâk lâk ving asi lai rawh.

¹⁷Chun Lalpa chu Thlarau asi le, Lalpa Thlarau umnâk kipah thawsuaknâk a um tâwn.

¹⁸Chun, kannih chu kan ektê hen mêl khuh lo hen thlalang hâwi hen Lalpa rokualnâk cherh hen, rokualnâk thawk hen rokual vima hen, Thu bangphi hâwi a um ding hen dangtir hen kan um tâwn, Lalpa Thlarau lakah mi kanna ting hâwi vima hen.

2 Korin 4

¹Churangah chun zângfahnâk kan tawng hâwi vima hen rianṭuannâk hi kan nei ruangah kan duai lo;

²thil ningzakkâi â thup mi tla chu kan nawng dauh, ngamlêmnâk thu kan mang lo le, Pathian thu mi perpetnâk ding hen khawm kan mang lo; thutak theihtir hen Pathian mitmuh hen mikip sia leh ṭha theihnâk hen mi thinlung tawng hen um kan tum tâwn.

³Sikhawmsele kan Thâwngthâng Ṭha hi khuh hen a um chun a vei liau mi tla ah hin asi khuh hen a um mi chu;

⁴Krist Pathian banghpi hen a rokual zia Thâwngthâng Ẹha chêu nih chun anmah a cherh kho lonâk ding hen, chubang lakah chun hi laikulh pathian nih hin lunglo tla thinlung a châwtir rawh

⁵Mah thu kan sim lo le, Krist Jisu chu Lalpa asi ti kan sim dauh tâwn, kannih khawm Jisu ruangah nan to-aw kan si ti kan sim tâwn.

⁶Jisu Krist mêl ah chun Pathian rokual zia chêu chu hawng kan pêk ding hen, "Mûi lakah mi chêu a hawng chêu lai," titu Pathian nih chun kan thinlung tla hi a hawng cherh rawh ruangah.

⁷Sikhawmsele, thiltikhonâk fâk zia chu kanmah sinah mi silo hen Pathian tâ asi dauh khonâk ding hen chu ro chu tualbêl tla ah kan kil asi.

⁸Khatlei khatlei ah nawktir hen kan um, sikhawmsele kan thaw a pit loh; lawksawng hen kan um le, sikhawmsele kan lung a dawng loh;

⁹nehsawh hen kan um le, sikhawmsele kaltâk hen kan um lêm loh; tlu thlo hen hawng kan vuak le, sikhawmsele veih thlo hen kan um loh.

¹⁰Kan taksa ah hin kumleza hen Jisu thihnâk chu kan put vima tâwn le, Jisu nungnâk khawm kan taksa ah hin a lang khonâk ding hen.

¹¹Kannih dam hen um mi tla hi Jisu ruangah thi dingah tleihtir hen kan um kumza, Jisu nungnâk khawm kan taksa thi kho ah hin a langh khonâk ding hen.

¹²Chun, kanmah lakah hin thihnâk nih a Ẹuan tâwn le, nannih lakah lam chun nungnâk nih a Ẹuan dauh tâwn asi.

¹³Sikhawmsele, "Ka lung le, churugah thu ka sim asi," ti rîn hâwi khan, chu lungnâk thinlung tak chu put hen kannih khawm nih kan lung bâk le, churugah thu kan sim le,

¹⁴Lalpa Jisu thawhtu nih chun kannih khawm Jisu sinah hawng kan thawh bâk awt le, nanmah hen hawng kan dîrtir awt ti kan theih.

¹⁵Zeizawng nanmah thatnâk ding asi, zângfahnâk chu mi tam dauh rangah pungtir hen a um, Pathian rokualnâk ding hen lâwmthu cherkhet a simtir khonâk ding hen.

¹⁶Churuang chun kan duai lo le, kan lênglei minung hi hawng rawp dadauh khawmsele kan sunglei minung chu nisiar siamthar vima hen a um dauh asi.

¹⁷Kanna hamhnâk nêptê, tu mitthlep sung cho ah um ding mi nih hin rokualnâk cherkhet zungzâl rang ding hawng kan siam piak dadauh asi.

¹⁸Thil muh kho tla hi zauh lo hen, thil muh kho lo tla chu kan zauh dauh ruangah; thil muh kho tla hi sâwtlotê rang ding asi le, thil muh kho lo tla lam chu zungzâl rang ding asi.

2 Korin 5

¹Kan umnâk in--hi tual ah mi kan taksa hi siat khawmsele, vâh ah, in kut hen sak lo mi, zungzâl um ding mi, Pathian sinah mi in bir chu kan nei ti kan theih.

²Vâh ah kan umnâk ding mi aih thu ah duh ruangmâng hen hi in ah hin kan rûm huahmah tâwn.

³Chu hâwi hen aih hen um sele takkaro hen kan um lai loh.

⁴Kannah hi tual taksa ah um mi tla hi thilrit phurh hen kan rûm tatak asi, aih lo hen um kan duh ruangah asi lo le, aih hen um kan duh ruangah asi dauh, thi kho hi nungnâk nih dawlh dak hen a um khonâk ding hen.

⁵Chun, chu mi rangah tak chun hawng kan timhtuahtu chu Pathian asi, Thlarau Thenhlimh hawng kan pêktu kha.

⁶Chun, taksa ah kan um sung hin Lalpa sinah kan um lo ti theih hen kumleza hen thlangam tak hen kan um tâwn;

⁷muh kho a kal lo hen, lungnâk ah kal dauh hen.

⁸Thlangam tak hen kan um kan ti taksa ah um lo hen Lalpa sinah um kan duh dauh.

⁹Churuangah, um sele, um lah sele, amah lawmhkâng si kan tum thlir tâwn asi.

¹⁰Mi kip nih taksa thu tla chu a siat a that hen kan ti hâwi vima hen kan tawng chiau khonâk ding hen Krist lâirêlnâk tophah mâika ah chun langhtir hen kan um ver ding asi.

¹¹Chun Lalpa tihnâk dân theih hen minung tla chu kan lêm tâwn le, Pathian sinah lam chun langhtir hen kan um tâwn; nanmah sia leh tha theihnâk ah khawm langhtir hen kan um ka lungum.

¹²Nan sinah kanna simthat nawlh mi asi lo le, thinlung lei silo hen, langngân ko hen putsotu tla chu zeitin mawh sângnâk ding nan theih khonâk ding hen, kanmah leiah putso san an siam na hen kan sim dauh asi.

¹³Kan ât leh Pathian rang asi, kan fingh leh nanmah rang asi dangâiah.

¹⁴Krist dâwnnâk nih chun kan lakah lâi a rêl asi, hi hâwi hen kan ruat: Mi zawzawng thih ruangrûl ah mi pakhat a thi le, churuang chun mi zawzawng chu an thi asi.

¹⁵Chun, a nung mi tla chu anmah rangah nung an si lo rawh le, an thih ruangrûl ah thi hen thawknawlh mi rangah chun an nung dauhnâk ding hen asi, mi zawzawng ruangrûl ah asi a thi mi chu.

¹⁶Churuang chun tu thawk hen kannih lam nih chun taksa leiah chun âukhawm kan theih lai lo rawh; taksa leiah Krist chu theih rawh khawmsele tu lam chun kan theih nawlh lo rawh.

¹⁷Churuang chun âuzawng Krist ah a um chun thilsiam thar a hawng si; thil li chu a vei rawh; ngâinik u! a hawng thar rawh.

¹⁸Sikhawmsele, zeizawng Pathian sin thawk hen suak asi, anih nih chun Krist ruangah amah hen rem hen a kan siam le, remnâk rianțuan hawng kan pêk;

¹⁹kha hâwi hen Pathian nih Krist lakah laikulh hi amah hen a rem hen a siam le, an buarnâk tla chu buarnâk ah ruat piak lo hen a remnâk thu hawng kan kiltir kha.

²⁰Chun, Krist ruangrûl ah rêl kan si le, Pathian nih kanmah mang hen a nan ngiar chiam na ti kho asi. "Pathian hen hawng a rem u," ti hen Krist ruangrûl ah ka nan ngiar na asi.

²¹Amah lakah chun Pathian repnâk kan hawng si khonâk ding hen sual rerêng neilo Jisu chu Pathian nih kanmah ruangah sual ah a siam.

2 Korin 6

¹Chun, Pathian zângfahnâk nan tawng mi chu thatvakpi lo hen nan um lonâk ding hen Pathian hen kanna ÷uan bâwmnâk ah kan ngiar chiam na asi.

²"Tik lawmhkâi ah ka nan ngâi le, Ruangsuaahnâk ni ah ka nan ÷angpi," ti hen Pathian nih a sim mi chu ngâi u. Ngâinik u! Tu hi tik lawmhkâi chu asi, tu hi ruangsuaahnâk ni chu asi!

³Kan rian÷uan hi an sâwi lonâk ding hen zeikêng khawmah tlûk phahnâk ding rerêng kan siam lo le,

⁴Pathian rian÷uantu tla hâwi hen zeikêng lak zawnghah mi lungnâ tla hen kan um dauh tâwn.

⁵Thungâi thlâk hen felfê tak a nawknâk ah, harsatnâk ah, hamhnâk ah, vuaknâk ah, rêngtlâknâk ah, nawktirnâk ah, ÷uanhamhnâk ah, it chiam lonâk ah, buhngeinâk ah,

⁶thenhlimhnâk ah, theihnâk ah, dawnhkhonâk ah, vênneihnâk ah, Thlarau Thenhlimh ah, dâwnnâk ah,

⁷thutak thu ah, Pathian thiltikhonâk ah, keh leh vawrh hen repnâk riamnâm tla hen,

⁸rokualnâk leh chawnglawh lonâk hen, min simsiat leh min simthat hen, perpettu hâwl hen, mi dik tak si ÷ung hen,

⁹mi theih tlâk lo hâwi hen, minthang tak si ÷ung hen; thi viviar hâwi hen, ngâinik u, kan nung ÷ung; rêp mi hâwi hen, thah ÷ung lo hen;

¹⁰ngaihsia hâwi hen, sikhawmsele lâwm kumza ÷ung hen, mipâm hâwi hen, sikawmsele mi tamtak neitir ÷ung hen; zeikhawm nei lo hâwi hen, sikhawmsele zeizawng nei ÷ung hen.

¹¹Korin mi le tla, nan sinah kan kê kan âng hen kan thinlung a kâu rawh.

¹²Kanmah lakah hin tawrkhân hen nan um lo le, nanmah thinlung ah asi tawrkhân hen nan um dauh mi chu.

¹³Chun, ka nan pêk na mi hâwitê hen hawng ka pêk rûl bâk ding hen, fa tla sinah sim hâwi hen ka sim asi, nanmah khawm nan thinlung kâutir hen um u.

¹⁴Lunglo mi tla hen rêlkhâwng lo hen liangbat munkhat bat hen um lah u; sualnâk leh repnâk nih ze me anna munkhatnâk um? Asi lo leh, mûi leh chêu nih ze me kawmhnâk an nei?

¹⁵Krist leh Beliar khawm nih ze me remnâk an nei? Asi lo leh, lunglo leh lungtu nih ze me tingvo anna bâwmnâk um?

¹⁶Pathian Biakin leh ruk khawm nih ze me remnâk an nei? Kannih lam chu Pathian nung Biakin kan si; Pathian nih, "Anmah lakah ka um lai le, anmah lakah ka tâwi ber lai; chun, an Pathian ka si lai le, annih khawm ka mi tla an si lai," a ti hâwi khan.

¹⁷Churuangah, Pathian nih chun, "An lakah mi hawng suak ule, a dang hen um u. Thil nâwmtâm rerêng khawm tawng lah u; churawhchun ka nan lawmh na lai.

¹⁸Nan rangah Pa ka si lai le, nannih khawm ka rangah fanu fapa nan si lai, Lalpa zeizawng tikho nih chun a ti," ti hen, a sim hâwi khan.

2 Korin 7

¹Chun, duhtak le tla, chubang thutiam chu kan nei ruangah taksa leh thlarau nâwmnâk zawzawng lakah kanna thiingtir lai, Pathian ÷ih bû hen thenhlimhnâk rangtlingtir hen.

²Nan thinlung ah mun hawng ka kianh u; âu tlûn khawmah kan soal lo, âukhawm kan râwk lo, âukhawm kan sawhkhalh lo.



³Chu chu an nan mawhtir na ding hen ka ti asi lo le, thih leh thih khat, dam leh dam khat ding hen kan thinlung ah ka nan kil na ti veikhat liau khan ka sim kha.

⁴Nannih leikângah chun ka sim ngam tuktarâi, ka nan putso na zia hi a fâk asi; lungngamnâk hen ka khat le, kanna hamhnâk zawzawng ah chun lâwmnâk hen ka khat.

⁵Makedonia ram ka tlung khawm khan kan taksa nih lungngamnâk rerêng a nei lêm lo, khatlei khatlei ah chun hamhtir hen kan um dauh lehlam; leng leiah a sualnâk tla a um le, sung leiah ÷ihnâk tla a um.

⁶Sikhawmsele, â nâutir mi tla lungngamhtu Pathian nih chun Tita hawng fial hen hawng kan thlangamh rawh.

⁷A hawng kalnâk cho nih chun asi lo le, nan lunglêng zia tla, nan ÷ap zia tla, ka tlûnah ÷hanemsemsê nan ngâi zia tla hawng kan simh hen nanmah an lungngamh na nâk khawm nih chun hawng kan lungngamh rawh asi; chun ka lâwm khun asi.

⁸Ka lasuikuat nih khan an ngaihsiattir na khawmsele ka sîr lo rawh a tîr lam chun ka sîr asi, kha lasuikuat nih khan a nan ngaihsiattir na ti ka theih ruangah; sikhawmsele, sâwtlotê cho asi kha.

⁹Tu chun kê lâwm asi, ngaihsiattir hen nan um ruangah asi lo le, rimnâk ding hen nan ngaihsia ruangah asi dauh. Kanmah ruangah zeikhawm nan dawkh lonâk ding hen Pathian duhzia hâwi hen ngaihsiattir hen nan um asi.

¹⁰Pathian duhzia hâwi hen ngaihsiatnâk nih chun ruangsuhânâk ding hen sîrnâk cho silo hen rimnâk a siam tâwn; laikulh ngaihsiatnâk nih chun thihnâk a siam dauh tâwn.

¹¹Chun, ngâinik u, Pathian duhzia hâwi a ngaihsiattir hen nan umnâk takah chun thiamthihnâk tla, mah a sim thiamnâk tla, thinthawknâk tla, ÷ihnâk tla, lunglêngnâk tla, ÷hanemsemse ngâinâk tla, lehrûl samnâk tla nanmah lakah a siam zia a fâk a! Zeizawng ah chubang thu ah chun nan thiàng ti nanna langh rawh.

¹²Chun nan sinah rîn khawmsele a sualtu ruangah khan ka rîn lo le, a sualtu ruangah ka rîn lêm lo, kan tlûnah ðhanemsemsê nan ngâi zia Pathian mitmuh ah nan sinah theihtir hen a um khonâk ding hen ka rîn mi asi dauh.

¹³Churuangah, lungngam hen kan um rawh. Kanmah lungngamnâk cho lo khawmah, Tita lâwmnâk ruangah kanna lâwm khun le, nannih zawzawng nih a thinlung nan thartir piak ruangah.

¹⁴A sinah zeikâng khawmah nanmah tla an putso na khawmsele ka mualpho lo; mualpho ngangâk hen zeizawng nan sinah thu tatak kan sim tâwn hâwi khan Tita mâika ah kan putso mi chu thu tatak a hawng si taktê.

¹⁵Chun, nan ektê hen a thu nan ngâi zia lâu leh thir bû hen amah nan lawmh zia tla chu theih ko hen a thinlung chu nanmah leikângah a um khun asi.

¹⁶Zeikâng zawngah nan tlûnah ka lungngam ruangah kê lâwm asi.

2 Korin 8

¹Chun unau le tla, Makedonia ram ah kawhmi murui lakah Pathian zângfahnâk pêk chu ka nan theihtir na awt.

²Kha hâwi hen hamh hen nikhâk fâk tak lakah thungâi anna lâwm, an pâm thlo khawmsele hawknâk fâk tak ah â chang zia kha.

³Zângfahnâk, mi thenhlimh Judai ram ah um mi tla rianṭuan ah tel mi chu thungâi thlâk a hawng kan deih chiam hen, an ti kho tâwk hen, asi, an ti kho tâwk nûnah a lei khawm anmah thu thu hen an pêk ti ka theihpi na asi.

⁵Chu khawm chu kan ruat lo hâwi tak hen an ti le, Pathian duhzia hen anmah tak Lalpa sinah leh kanmah sinah anna pêk masa ta rih asi.

⁶Chun, a lânah a hawng dawmh rawh ruang khan hi dâwtnâk khawm hi nanmah lakah ti thluh sawm ding hen Tita chu kan ngiar rê.

⁷Chun, zeizawng--lungnâk tla, thusim thiamnâk tla, theihnâk tla, ðhanemsemsê ngâinâk zawzawng tla, hawng kan zângfahnâk tla nan nei hâwi hen chu zângfahnâk khawm chu nan nei tam khonâk ding hen taimâk suah u.

⁸Thupêk kâng hen ka sim lo le, midang ÷hanemsemsê ngâinâk hen nanna zângfahnâk dik zia khawm chu nik ding hen ka sim mi asi.

⁹Kan Lalpa Jisu Krist zângfahnâk chu a pâmâk ruangah nan hawng nei khonâk ding hen, nei khawmsele nanmah ruang takah a hawng pâm mi kha nan theih asi.

¹⁰Chun, chu lak chun, ka ngaihdân hâwi hen ka sim asi, chu chu nan rangah a ÷ha dangâiah; kum khat asi rawh a dawmh masatu nan si le, nanna dawmh mi lâwng khawm silo hen ÷uan duhnâk khawm nanna dawmh ber rawh.

¹¹Chun duh ding hen timhtuahnâk a um hâwi khan nan neih hâwi vima hen zawh zet nâk khawm a um khonâk ding hen tu lam chun ti pawt u.

¹²Pêk duhnâk nan nei chun, mi a nei lo nâ silo hen, a neih zia hâwi vima hen a pêk mi chu Pathian lawmh tlâk asi.

¹³Midang zângkhâtir hen nanmah hamh ding hen ka ti mi asi lo le, a rual rang ding hen nan neih a lei mi chu tuliau hin an samphâng mi thlawp leh belhnâk asi le,

¹⁴an neih a lei mi khawm nih sam leh phâng thlawp belhnâk a hawng si rûl khonâk ding hen ka ti dauh asi; chun rual rangnâk a hawng um kho lai.

¹⁵"Manna a sar tam mi nih chun lei hen a nei lo le, a sar tâwm mi nih a sam lêm lo," ti rîn hâwi khan.

¹⁶Chun, nan rangah kan ÷hanemsemsê ngaihnâk hâwi hen Tita thinlung ah pêk tâwntu Pathian sinah chun lâwmthu um seh.

¹⁷Anih nih chun kan ngiarnâk chu a pawm ngelchel le, sikhawmsele kan ngiar ruangah cho silo hen amah ngelchel chu ÷hanemsemsê ngâi tak asi le, amah thu thu hen nan sinah a hawng kal awt asi.

¹⁸Chun, a sinah unaupa kan fial bâk awt le, anih chu Thâwngthâng ÷ha leikângah an sawr mi thu kawhmi murui zawzawng lakah a thang le,

¹⁹chu ko khawm chu asi lo le, Lalpa rokualnâk ding leh kanna timhtuah zia zauhtirnâk ding hen a rian kan ÷uan mi, hi zângfahnâk thu ah hin kan sinah khua ÷awl bâk ding hen kawhmi murui tla ruat asi rerêng bâk.

²⁰A rian kan ÷uan mi hi thilpêk leikângah hin âukhawm nih hawng kan sâwi lonâk ding hen kanna thiamthih le.

²¹Lalpa ngaihnâk cho ah silo hen minung ngaihnâk khawmah thu dawh kan ruatkan tâwn asi.

²²Chun, an sinah kan unaupa kan kaltir awt bâk le, anih chu kâng tamtak ah ÷hanemsemsê ngâi tak asi ti vei tamtak kan nik rawh le, tu lam châng chun thungâi an zumh na ruangah ÷hanemsemsê a ngâi dauh khun rawh asi.

²³Tita hi chu ka hâwi leh nanmah leikângah ka rian÷uan pi mi asi le, chun kan unau tla hi chu kawhmi murui tla mifial, Krist rokualnâk chu an si.

²⁴Churuang chun, nan zângfah ti theihnâk leh kan putso na mi theihnâk chu kawhmi murui mâika ah chun an sinah langhtir u.

2 Korin 9

¹Mi thenhlimh tla rian÷uan thu lam chu nan sinah ka rîn a herh lo; nanna râlring zia chu ka theih, chu mi leikâng thu ah chun,

²"Kum khat asi rawh, Gris ram mi tla chu timhtuah hen an um rawh," ti hen Makedonia ram mi le tla sinah ka nan putso na tâwn le; chun nan ÷hanemsemsê ngâinâk nih chun an lakah mi tamtak thinlung a panhtir rawh.

³Sikhawmsele, chu leikâng thu ah chun ka nan putso na nâk chu zeikhawm lo asi lonâk ding hen unau tla hi ka kaltir awt le, ka sim hâwitê hen a timhtuah hen nan hawng um khonâk ding hen;

⁴chu hâwi asi lo chun Makedonia ram ah mi âu tla nih mawh an hawng ka zûl lebang chun timhtuah lo hen an muh na chun kannih, nannih kan tilo, hi kan zumh na nâk leikângah hin kan mualpho lebang lai.

⁵Churuangah, unau tla hi nan sinah hawng kal masa hen siang tak hen thilpêk nan tiamhkan mi kha siamkan ding hen ngiar herh hen ka ruat asi,

chu tak chu zânggrân hen lâk hâwi silo hen siang tak a pêk hâwi dauh hen timhtuah zet hen a um khonâk ding hen.

⁶Sikhawmsele, chu leikângah vawrh tâwm mi nih chun a ât tâwm lai, a vawrh tam mi nih chun a ât tam lai.

⁷Mi kip nih siang lo bû hen pêk lo hen, pêk lo kho lo hâwi a ngaih hen pêk ber lo hen, an thinlung ah an tum hâwi vima hen pêk chiau seh. Pathian nih chun lâwm tak a pêktu asi a zângfah tâwn.

⁸Chun, Pathian nih dâwnâk kip nan tlûnah a vurh kho asi; chun nannih zeizawng ah a tâwk ri nei kumza hen rianțuan ța kip rangah nan nei kho lai.

⁹Pathian lasui thu nih, "A ținzâr le, mipâm tla sinah a pêk le, a repnâk chu zungzâl hen a um kumza," ti hen a sim hâwi khan.

¹⁰Chun, thu siangnâk zeizawng, kanmah ruangah Pathian sinah lâwmthu simnâk siamtu chu nei ding hen, zeizawng ah neihtir a um hen,

¹¹a vawrhtu sinah chî pêktu leh ei ding rangah buh pêktu nih chun nan vawrh ding mi chî chu an pêk na hen a nan pungtir piak na lai le, nanna repnâk rah tla chu a nan pungtir piak na lai.

¹²Hi ținpinâk rianțuannâk nih hin mi thenhlimh le samphangnâk tla a siremtir mi cho khawm asi lo le, Pathian sinah lâwmthu simnâk tamtak ting hen a luang liam asi.

¹³Hi rianțuannâk nih hin a nan nik na ruangah Krist Thâwngthâng ța leikângah nan thinlung nan zâwt zia ruangah leh anmah tla rangah leh mi zawzawng rangah thawhlâwmnâk ah nan thil siang tla ruangah hin Pathian an rokualtir tâwn asi.

¹⁴Anmah tla tak khawm nih nan tlûnah Pathian zângfahnâk fâk tak ruangah nan rangah thla an cham piak na lai.

¹⁵A thilpek sim kho lo rê ruangah hin Pathian sinah lâwmthu um seh.

2 Korin 10

- ¹Chun, kei Pawl, nan lakah nan mitmuh ah dawnhkho tak a um hen nan sinah ka um lo kê hen nanmah leikângah iam tâwn mi nih hin Krist thatnâk leh nunnêmnâk hen kan ngiar na.
- ²Nan sinah ka hawng tikah ka thinruntir lah ram u--taksa hâwi a um hen hawng kan ruattu tla tlûnah ka lung asi lo kho ruangah.
- ³Taksa ah um khawmsele taksa do hâwi hen kanna do lo le,
- ⁴kannah râlthuamnâk tla chu taksa mi asi lo le, kulhpi bir tak tla siatnâk ding hen Pathian zârah thiltikho tak asi dauh,
- ⁵êlnâk tla leh thil sâng kip Pathian theihnâk kham ding hen sâng tak a siam mi tla chu siat hen, ruatnâk kip Krist thu ngâinâk sal ah kan rui le;
- ⁶nan thu ngâi zia a rangtling tikah chun thu ngâi lonâk zawzawng lehrûl sam ding hen kanna tim ber.
- ⁷Nan mitmuh ah thil um tla chu asi nan zauh tâwn, âuzawng nih Krist tâ si hen â ruat chun hi hi mah lakah a ruat nawlh seh, amah chu Krist tâ asi hâwi ber hen kannah khawm kan si bâk mi hi.
- ⁸Kan thuneihnâk nanmah siatnâk ding silo hen nanmah siamthatnâk ding dauh hen Lalpa nih hawng kan pêk mi hi--a putso khun khawmsele ka mualpho awt lo le,
- ⁹ka lasuikuat tla nih chun an lauh na ding hen ka duh lo asi.
- ¹⁰A lasuikuat tla chu a nei hen a khauh le, a taksa lei lam chu a nêmmo le, a hawlh khawm sik a kêi asi," an ti dangâiah.
- ¹¹Chu hâwi mi nih chun hi hi ruat seh, nan sinah ka um lo liauah lasuikuat thu ah kan um hâwi hen nan sinah kan um tik khawmah thilti ah kan um ber lai.
- ¹²Zeimaw mi nih mah a simthat mi lakah chun kanna telh sih ngam lo, anmah tla hen khawm kanna tahthimh ngam lo; sikhawmsele, annih lam chu mah leh mah tah hen, mah leh mah a tahthimh hen thinlung nei lo hen an um.

¹³Kannah lam chu kan tahnâk ri lêm chun kanna zûm lai lo le, Pathian nih bial hawng kan tingtir le, chu tahnâk hâwi vima hen kanna zûm lai, nanmah khawm huap ding rê a tahnâk chu.

¹⁴Huap phanh lo pi an huap na hâwi hen kan uap kâu tuk lêm lo; Krist Thâwngthâng Ṭha sim hen nan khua tiang khawm kan hawng kha.

¹⁵Kan tahnâk ri lêm chun midang ṭuan hamh tla chu kan putso lo le, nan lungnâk a ṭhang zia hâwi vima hen kan huapnâk ri vima ah nan lakah cherkhet liantir hen kan um lai ti lungumnâk kan nei dauh le,

¹⁶timhtuah chia leukâng thu ah chun midang bial putso lo hen nanmah lanh lei ram tiang khawmah Thâwngthâng Ṭha kan sim khonâk ding hen.

¹⁷Sikhawmsele, "A putso mi zawng nih Lalpa chu putso seh," ti hen, Pathian lasui thu nih a sim hâwi khan.

¹⁸Mah simṭhat nih chun sawr a lawh lo le, Lalpa nih a simṭhat mi chu sawr a lawh dauh asi.

2 Korin 11

¹Ka ât dauhnâk ah hin nannah nih nanna dawnhkho ding hen ka duh chiam e! Asi, dawnh khawm nanna dawnhkho ngâk e!

²Pathian thîknâk hen asi ka nan thîk na; Krist sinah chun nungâk thenhlimh hâwi hen ka nan pêk kho na bâk ding hen, mi pakhat, Krist chu kan hual piak na ko asi.

³Sikhawmsele, rûl nih chun ngamlêmnâk hen Evi chu a bum hâwi khan, Krist leiah taknâk leh thenhlimhnâk lakah mi chu zeitin hen mawh nan thinlung chu an râwk na lebang lai ti ka lâu asi.

⁴Kannah nih a thu kan sim le, nan pawm mi, thlarau leh thâwngthâng ṭha silo hen kan sin thawk hen nanna ting mi thlarau leh thâwngthâng ṭha hen a dang ving mi Jisu dang thu simtu âuzawng thungâi nan sâithiam ruangah.

⁵Chubang mifial lian chem tla chu ze leukâng khawmah tluk lo ka ruat lo asi.

⁶Thusim leikângah lam chun hawlh mangdân thiam lah khawmsele theihnâk ah chun chu hâwi ka si lo; zeizawng ah mi zawzawng lakah nanmah leiah kan langhtir kha.

⁷Asi lo leh, Pathian Thâwngthân T̄ha a thawttham a ka sim hen putso a nan um khonâk ding hen ka nâutirnâk nih khan thil ka tisual mazei?

⁸Nanmah rian ka t̄uan khonâk ding hen kawhmi dang thawk hen lawh ka lâk le, ka suh na.

⁹Chun, nan sinah ka um le, ka samphâng liau khan âukhawm ka hamhtir na lo, unau tla chu Makedonia ram a mi an hawng hen ka samphângnâk chu ka si an remtir; zeizawng ah nanmah hamhtir lo hen ka um kha, kha hâwi khan ka um vima lai.

¹⁰Krist thutak keimah lakah um hâwi hen Akaia ram hi ka putsonâk hi âukhawm nih an ka rehtir lai loh.

¹¹Zeiruangah me hi hi ka sim? Ka nan zângfah na lo ruangah masi? Pathian nih a theih!

¹²Sikhawmsele, a rêlkhâwngnâk tawng duh tla lakah mi rêlkhâwngnâk chu ka sah khonâk ding hen ka ti rawh, ka ti vima lai; an putsonâk ah chun kanmah um hâwi hen an hawng um khonâk ding hen.

¹³Mi chubang tla chu Krist mifial ah â siam sawm hen, mifial telê rianṭuantu mi perpet mang tla an si.

¹⁴Chu chu a chē lo, Setan men chēu mifial ah â siam sawm tâwn.

¹⁵Churuangah a rianṭuantu tla kha chu repnâk rianṭuantu ah a siam sawm khawmsele thilchē asi lo; chubang tla dawngnâk chu an thilti hâwi vima asi lai.

¹⁶Ka sim nawlh lai, âukhawm nih mi â ah hawng ka ruat lah seh; sikhawmsele, nan hawng ka ruat dâidua chun kei khawm nih tâwmtal kan putso kho na nâk ding hen mi â hâwi hen a ngaihzia hawng ka thiam piak u.

- 17Ka sim mi hi Lalpa hâwi hen ka sim lo le, ka putso mi lungnâk nih hin â hâwi hen ka sim asi.
- 18Mi tamtak nih taksa hâwi hen an putso ruangah kei khawm nih ka putso nik lai.
- 19Nannih lam chu mi fing nan si ruangah mi â tla lakah lungâwi tak hen nanna dawnh tâwn.
- 20Mi nih sal ah a nan siam na hen an ei hep na sele, sal ah an tleih na sele, mah a sawr sele, nan mêl ah an bengh na sele, nanna dawnh tâwn.
- 21Kan chak lo rawh hâwi hen sik bû hen ka sim asi. Sikhawmsele, âuzawng nih zei leikâng khawm an ngamh mi vial--â tak hen sim ko sele--kei khawm nih ka ngamh.
- 22Hebrai mi an si mu? Kei khawm ka si. Israel mi tla an si mu? Kei khawm ka si. Abrahm thlâk tla an si mu? Kei khawm ka si.
- 23Krist rianțuantu tla an si mu? Mi â hâwi hen sim ko tâ sele--ka si dauh ngengê. Ṭuan hamhnâk lakah fâk khun hen, rêngin ah tângnâk ah fâk khun hen, vuaknâk ah lei zut hen, thihnâk ah vei tamtak,
- 24Juda tla vuaknâk tankhat ah vei sâwmli tlinglo vei nga ka tawng.
- 25Vei thum fung vuak hen ka um, veikhat lung seh hen ka um le, veithum lawng râwknâk ka tawng le, zân khat leh ni khat tisumsumriat ah ka um le;
- 26khua ṭawlnâk ah vei tamtak, tivatê ṭihnungkâi lakah, rawkmang ṭihnungkâi tak lakah, ka phun hâwi ṭihnungkâi lakah, Phundang tla ṭihnungkâi lakah, khuapi ṭihnungkâi lakah, ramkaro ṭihnungkâi lakah, tisumsumriat ṭihnungkâi lakah, unau telê ṭihnungkâi lakah; rianțuan dîtnâk leh rianțuan hamhnâk lakah, ihmu riauraknâk tla ah vei tamtak,
- 27sungvâng leh tîhâlnâk ah, buhngeinâk ah vei tamtak, damlo leh takkaro hen umnâk ah.
- 28Chun, ka sim lo mi tla khawm chu kawhmi murui zawzawng ka ruat dawnnâk nih nisiar hen hawng ka denh kumza mi hi a um fâwn.

²⁹Mi âumawh an chak lo chun kei khawm ka tuarpi bâk; mi âumawh sual ah an tlû chun lungfâk hen ka khat tâwn.

³⁰Putso ding ka si t̄ung chun ka chaklonâk lei thil tla asi ka putso awt.

³¹Jisu Pathian leh Pa, zungzâl a thawsuak hen um mi nih chun âwkrâwl ka sim lo zia a theih.

³²Damaska khua khan lal Areta tangah lâirêltu nih chun hawng ka tleih ding hen Damaska khua kulh kawtkâ chu a vêngtir na.

³³Chun, langawtkawt ah kulh zulh ah bâwm hen an ka thlâk le, chun a kut lakah mi ka relh pawt rawh.

2 Korin 12

¹Ka putso ding rerêng asi. T̄ha lam chu a t̄ha lo, sikhawmsele Pathian sinah mi langhnâk leh theihtirnâk thu ka sim sih vima lai.

²Kristian mi pakhat âumawh ka theih le, kum leili asi rawh, vân sâng chem ah khin lâk hen a um (hi hi a hawng um tak ma, asi lo leh, muhtirnâk ma a nei ka theih lo, Pathian cho nih a theih.)

³Ka sim nawlh fawn lai, hi minung hi Paradis ah lâk hen a um (a lîlâ hen hi hi a hawng um tak ma, asi lo leh, muhtirnâk ma a nei ka theih lo, Pathian cho nih a theih.)

⁴Thu sim kho lo, minung sim thiang lo tla chu a theih ti ka theih.

⁵Hi hâwi mi minung chu ka putso lai; sikhawmsele ka chaklonâk lo chu ka putso lai lo.

⁶A zûm duh khawmsele mi mâwl ka si lai loh, thudik ka sim awt asi; sikhawmsele, ka sûm lai, chu lo chun âuzawng nih an hawng ka muh hâwi leh ka lakah thu an theih hâwi ngâk hen rokual khun hen an hawng ka ruat lebang lai.

⁷Chun, theihtirnâk tla chu thungâi a fâk ruangah ka sung-û tir tuk lonâk ding hen taksa ah ling hawng ka pêk asi. Setan mifial, kut nurnâk ah hawng ka mangtu ding mi chu; chu lo chun ka sung-û tir tuk lebang lai.



⁸Chu leikâng thu ah chun a hawng ka kiangtâk khonâk ding hen Lalpa chu veithum ka deih.

⁹Chun, anih nih chun ka sinah, "Ka zângfahnâk na rangah â tâwk; ka thiltikhonâk hi chaklonâk ah asi rangtlingtir hen a um mi chu," a ti rawh. Chun, Krist thiltikhonâk chu ka tlûnah a um khonâk ding hen lâwm tak hen ka chaklonâk tla hi ka putso dauh lai.

¹⁰Churuangah, Krist ruangah chaklonâk tla ah, siatnâk tla ah zirhnâk tla, nehsawhnâk tla, vânduainâk tla ka lawmh tâwn; ka chak lo kipah asi ka chak tâwn.

¹¹Ka â rawh ma hi--nannih nih â lo kho lo hen nan hawng ka siam asi. Kei chu nanmah nih nan hawng ka chawnglawmh ding mi ka si, zeikhawm silah khawmsele ze leikâng khawmah mifial lian chem tla sinah ka niam dauh lêm lo.

¹²Mifial sinâk singsiahnâk tla chu felfênâk zeizawng nei hen, singsiahnâk tla, thilchê tla, thiltikhonâk tla hen nan lakah ti asi tatak kha.

¹³Zei leikângah me kawhmi murui dang tla ngâk hen niam dauh siam hen nan umnâk chu? Keimah tak nih hin ka nan hamhtir na lonâk leikângah asi tung lo chun. Chu chaklonâk ah chun hawng ka ngaihdam u.

¹⁴Hi hi tuah nan sinah hawng kal ding hen ka timhtuahnâk a veithumnâk ding asi; chun ka nan hamhtir na lai loh, nan tâ chu hâwl ka si lo le, nanmah asi kan hâwl dauh na mi chu: fa le nih nu leh pa rangah an khawng piak ding asi lo le, nu leh pa nih fa tla rangah an khawng piak dauh ding asi.

¹⁵Chun kei lam nih chun nan thlarau rangah lâwm tak hen ka mang dih lai le, mang dih hep hen ka um lai. A leiluat hen ka nan zângfah na ruang khan; kei nih zângfahnâk tâwm dauh ka tawng phah asi mu?

¹⁶Sikhawmsele, kei nih chun ka nan hamhtir na lo si tâ sele, sikhawmsele mi perpê rerêng hawng si hen ngamlêm hen ka nan tleih na asi.

¹⁷Nan sinah ka fial mi tla lakah khan âumawh tal mang hen thatvak phahnâk ah kan mang na mazei?

¹⁸Tita chu ka fawrh le, amah rual ah unau chu ka fial asi. Tita nih chun, that phahnâk rerêng a nan nei na mazei? Thinlung munkhat put hen um mi ka si lo mazei? Munkhat lam kal kan si lo mazei?

¹⁹Tu kar lakah hin nanmah tla sinah kan diknâk thu sim hen hawng kan ruat asi dahmawh. Krist ah chun Pathian mitmuh ah asi thu kan sim mi chu. Sikhawmsele, duhtak tla, zeizawng nanmah siamthatnâk ding asi.

²⁰Ka hawng kal tikah zeitin mawh ka duh hâwi hen ka nan muh na lo hen, kei khawm nan duh hâwi hen nan ka muh lo soal lai ti leh zeitin mawh fâinâk tla, nahsuahnâk tla, thinrunhnâk tla, tawhnâk tla, thu khuar mang tla, sung-û tir tuknâk tla, nawknâk tla a hawng um lebang lai ti leh

²¹ka hawng kal tikah ka Pathian nih nan lakah a hawng ka mualphoh nawlh hen, a lân thilsual titu tla lakah thil nâwmtâm ti tla, a duh mi tla, hur tla ching hen rim lo mi, mi tamtak tla chu ka tappi na lai ti ka ÷ih asi.

2 Korin 13

¹Hi hi nan sinah ka hawng kal veithumnâk ding asi. Theihtu tla panih mawh pathum mawh kê ah chun thu kip birhtir hen a um lai.

²Ka simkan rawh le, chun Krist keimah lakah thusim tâwntu chu niknâk nan hâwl ruangah veinihnâk ah nan sinah ka um liauah ka sim hâwi khan tuah nan sinah um lo hen, a lânah thilsual titu tla sinah leh midang zawzawng sinah ka simkan nawlh awt, "Ka hawng nawlh chun ka zuah lai loh," ti hi; anih chu nanmah leiah a chak lo le, nan lakah thiltikho tak asi dauh asi.

⁴Anih chu chaklonâk ruangah khenhbêk hen a um asi, sikhawmsele Pathian thiltikhonâk ruangah a nung rerêng rawh. Kannih khawm amah lakah chun kan chak lo asi, sikhawmsele nanmah leiah Pathian thiltikhonâk ruangah a sinah kan nung bâk lai.

⁵Lungnâk ah chun nan um mawh nanmah ngelchel a nik tâwn u; nanmah ngelchel a zauhfiang u. Asi lo leh, nanmah lakah Jisu Krist chu a um ti nanmah tak nih nan theihfiang lo mazei? Duh lo mi nan si lêm lo chun.

⁶Kannih chu duh lo hen kan um lo ti nan theih lai rih ti ka ruat.



⁷Chun, thu rerêng nan soal lonâk ding hen Pathian sinah ka deih tâwn le--chu chu kannih hi lawmhkâi hen kan lang khonâk ding asi lo le, nannih nih â dawh mi zawng nan ti khonâk ding hen asi dauh, kannih chu duh lo hâwi hen um khawmsele.

⁸Thudik ÷anh ding lo chun thudik lo ding hen zeikhawm kan ti kho lo asi.

⁹Kannih kan chak lo liau khawmah nannih nan chak chun kanna lâwm tâwn asi; hi hi kan deih tâwn; nanmah ÷at rangtlingnâk hi.

¹⁰Churuang chun râwk ding silo hen siam÷at ding dauh hen Lalpa nih thuneihnâk a hawng ka pêk hâwi vima hen nan sinah ka um tikah fâk tak hen nun kan simh na lo ding hen nan sinah ka um lo liau hin hi bang thu hi ka rîn asi.

¹¹A dawngchem ah chun unau le tla, lâwm tak hen um u. ÷at rangtling hen um ule; lungngam tak hen um ule, thinlung munkhat put ule, lungrual tak hen um u; chun zângfahnâk 1eh remnâk Pathian chu nan sinah a hawng um lai.

¹²Châwchawk thenhlimh hen chibai a bûk u. Mi thenhlimh tla zawzawng nih hin chibai a nan bûk na.

¹³Lalpa Jisu Krist zângfahnâk leh Pathian zângfahnâk leh Thlarau Thenhlimh kawmhnâk chu nan ektê sinah um seh.

Galatia

Galatia 1

¹Pawl, mifial minung tla fial si lo hen, minung zârah khawm silo hen, Jisu Krist leh mithi lakah mi thawhtu Pa Pathian zârah asi dauh ti mawh

²ka sinah unau um zawzawng tla nih chun: Galatia ram ah kawhmi tla sinah:

³Pa Pathian leh kan Lalpa Jisu Krist sinah mi zângfahnâk leh remnâk nan sinah um seh.

⁴Anih nih chun kan Pathian leh Pa rem ti kâng hen tuliau laikulh sual tak lakah hin hawng kan suah khonâk ding hen kan sual tla ruangrûl ah amah a pêk rawh.

⁵Pathian sinah rokualnâk zungzâl hen um seh! Amen.

⁶Krist zângfahnâk zârah a nan kawh natu kha chu hâwi hen lâkkhat ko ah Thâwngthâng Țha dang leiah nan kawp tâk hi chê ka ti asi.

⁷Chu chu Thâwngthâng Țha dangtir duh mi âumawh an um mi ruangah asi.

⁸Sikhawmsele kanmah nih mawh vân thawk hen a hawng mi vânmifial khawm nih mawh, Thâwngthâng Țha ka nan simh na lo mi kha chu thâwngthâng Țha dang rerêng a nan simh na chun siatbarh hen um seh.

⁹A lanah kan sim rawh hâwi hen khan tuah kan sim nawlh asi, "Thâwngthâng Țha nan pawm mi silo mi kha chu thâwngthâng Țha dang âutal nih an simh na chun siatbarh hen um seh."

¹⁰Asi chun, tuhin minung ma kan lêm Pathian? Asi lo leh, minung ma lawmhtir kan tum ne? Minung lawmhtir hen um sele Krist to-aw ka si lai loh.

¹¹Chun, unau tla, Thâwngthâng Țha ka sim mi kha minung tla thu asi lo ti ka nan theihtir na.

¹²Minung thawk hen ka tawng mi asi lo, mi nih sîntir mi khawm ka si lo, Jisu Krist langhnâk ruangah tawng mi ka si dauh.



¹³Juda tla phung-leh-lam sawnh dân ah chun a lânah ka umdân chu nan theih rawh kha, kha hâwi hen Pathian kawhmi tla fâk tak a nehsawh hen ka nawktir na tâwn kha.

¹⁴Chun, hawng kan thlâktu tla thurovuih lakah ÷hanemsemsê ka ngâi fâk khun ruangah Juda phung-leh-lam sawnh dân leikângah chun ka phun leh tla lakah keimah rual tla tamtak ka khûp rawh.

¹⁵Chun, ka nu paw sung thawk hen hawng ka thîmtu leh a zângfahnâk ruangah hawng ka kawhtu Pathian nih chun

¹⁶Phundang tla lakah a Thâwngthâng T̄ha ka sim khonâk ding hen a Fapa chu thinlung si tak hen keimah lakah a langhtir liau khan midang sinah krai khâi lo hen,

¹⁷mifial ka si lânah mifial si rawh mi tla sinah Jerusalem kua khawm kal lêm lo hen Arabia ram ah ka kal dauh ving; chun Damaska kua ah ka kîr nawlh.

¹⁸Chun kum thum nûnah Peter veh ding hen Jerusalem kua ah ka va kal le, a sinah ni leinga ka châm.

¹⁹Mifial dang tla lam chu Lalpa unau Jem cho lo chu âukhawm ka muh lo.

²⁰Nan sinah thu ka sim mi tla hi Pathian mitmuh ah ka âwkrâwl lo.

²¹Chu nûnah chun Siria leh Kilikia ram ah ka kal.

²²Sikhawmsele, Judai ram ah Krist kawhmi tla mêltheih ka si lo nget rih.

²³"A lânah hawng kan nehsawhtu nih khan a lânah lungnâk thu a râwk tâwntu kha tu chun thu a sim lehlam rawh asi," ti mi simnâk cho an theih.

²⁴Chun, keimah ruangah Pathian an chawnglawmh rawh.

Galatia 2

¹Chun, kum leili a vei nûnah Tita khawm chu kalpi hen Barnaba rual hen Jerusalem ah ka va kal nawlh.

- ²Chun, theihtirnâk ruangah ka va kal le, Phundang tla lakah Thâwngthâng Th̄a ka phuang tâwn mi hi anmah tla ka simh na; sikhawmsele, mi lian dauh tla chu a dang hen ka simh na, chu hâwi asi lo chun a lânah mi ka rianṭuan mawh tu mi hi a thawttham hen a um lebang lai.
- ³Sikhawmsele, Tita ka sinah um mi khawm chu Greek mi sikhawmsele fêmtan piak râm hen a um lo;
- ⁴chu chu unau telê a thup hen an hawng lûtpi na mi ruangah asi; chubang tla chu to-aw ah hawng kan siam khonâk ding hen Krist Jisu ah chun thawsuaknâk kan nei mi hi thlingthlâk ding hen a thup hen an lût.
- ⁵Sikhawmsele, Thâwngthâng Th̄a thudik chu nan sinah a um kumza khonâk ding hen sâwtlotê khawm a pumpêk hen an thu kan zâwt lo.
- ⁶Chun, mi lian dauh ah an ruat mi tla lakah chun zeitin mi tal khawm si sele, ka rangah â dang lêm lo, Pathian nih âukhawm a thliar lo--mi lian dauh ah an ruat mi tla nih chun ngaihdân thar zeikhawm an ka sap lo.
- ⁷Chu ngâk hen fêmtan tla Thâwngthâng Th̄a Peter sinah kiltir asi hâwi hen fêmtan lo tla Thâwngthâng Th̄a ka sinah kiltir hen a um ti an theih.
- ⁸Fêmtan tla sinah mifial si ding hen Peter rangah ṭuanpiaktu tak nih chun Phundang rangah mifial si ding hen ka rang khawmah hawng ka ṭuan piak ruangah;
- ⁹zângfahnâk hawng ka pêk mi chu an theih khawmah Jem, Peter leh Johan tla hotu ah an ruat mi tla nih chun kannih Phundang tla sinah kal ding leh annih fêmtan tla sinah kal ding hen kei leh Barnaba chu a kawmhnâk kut vawrhlei hawng kan pêk.
- ¹⁰Mipâm tla kan theihkumza cho an duh, chu tak chu ti ding hen ka tum tâwn mi rêng asi.
- ¹¹Chun, Peter chu Antiokei ah a hawng liauah sâwi ding hen a um ruangah mâitawnh hen ka êl.

¹²Mi âu tla mawh Jem thawk hen an hawng kal lânah chun anih nih chun Phundang tla sinah a ei tâwn, sikhawmsele, an hawng tlung kê hen Phundang tla fêmtan ding hen duhpitu fêmtan mi tla chu a tih ruangah tel nawlh lo hen â thlei rawh.

¹³Juda lungtu unau dang tla khawm an zer bâk rawh, chun Barnaba men an zerhnâk hen an kuihsih rê asi.

¹⁴Sikhawmsele, Thâwnghâng T̄ha thudik hâwi hen anna rep lo tih ka theih hen Peter sinah an ektê mâika ah, "Nang, Juda mi si hen, Juda tla hâwi a um lo hen Phundang tla um hâwi hen na um dauh chun zeitin zia hen Phundang tla Juda tla hâwi hen na umtir râm na zia?" ka ti.

¹⁵Kannah lam chu, "Phundang misual," ti tla hâwi si lo hen, Juda mi si hen suak kan si.

¹⁶Sikhawmsele, Dân thilti tla ruangah mi mawhtir lo hen a um lo le, Jisu Krist lung ruangah cho mawhtir lo hen a um dauh ti kan theih, kannah khawm nih Dân thilti ruangah silo hen, Krist lungnâk ruangah mawhtir lo a kan um khonak ding hen Krist Jisu chu kan lung asi: Dân thilti ruangah âukhawm mawhtir lo hen an um lai loh.

¹⁷Krist ah mawhtir lo a um kan tum bû hen kanmah tak khawm Phundang tla hâwi hen misual kan si chun Krist chu sual rianțuantu asi mazei? Asi rîlmâl lo.

¹⁸Ka thil siat tla kha ka sak nawlh chun buartu ka si ti ka langhtir mi asi lai.

¹⁹Pathian leikângah ka nung khonâk ding hen kei lam chu dân ruangah dân leikângah ka thi rawh asi.

²⁰Krist sinah khenhbêk hen ka um rawh sikhawmsele ka nung; kei lam chu ka si lo rawh, Krist chu keimah lakah a nung dauh asi; chun tuah taksa ah ka nung mi hi lungnâk ah nung ka si--Pathian Fapa, hawng ka zângfah le, ka ruangrûl ah â pêk mi lungnâk ah chun.

²¹Pathian zângfahnâk chu ka veih lo, Dân ruangah repnâk a um asi chun Krist chu a thawt hen a thi mi asi lai.

Galatia 3

¹Aw, Galatia ram a mi â tla; âu nih an dâwi na? Nan mitmuh ngelchel ah Jisu Krist chu khenhbêk hen fiang tak a langhtir asi mi.

²Hi cho hi nanmah thawk hen theih ka duh, Dân thilti ruangah ma Thlarau nan tawng, nan ngâi hen nan lung ruangah ma?

³Hi hâwi tluk na maw nan â e! Pathian Thlarau ah dawmh ko rawh hen, taksa hen ma nan lîm awt lak?

⁴Thil chu hâwi tluk chu thatvakpi lo hen ma nan tuar? Thatvakpi lo hawng si tatak sele ne!

⁵Chun, nan sinah Thlarau a nan pêk natu leh nan lakah thilchê titu nih chun Dân thilti ruangah ma a ti, nan ngâi hen leh nan lung ruangah ma?

⁶Abraham nih Pathian a lung le, chun chu lungnâk chu repnâk ah ruat asi hâwi khan.

⁷Chun, theih u, lungnâk ah um mi tla, chu tak chu Abraham fa tla an si.

⁸Chun, Pathian lasui thu nih chun Pathian nih lungnâk ruangah Phundang tla a mawhtir na awt lo ti theihkan hen, "Na lakah phun kip malsâwm piak hen an um lai," ti hen Abraham sinah Thâwngthâng Tha chu a simhkan kha.

⁹Chun, lungnâk ah um tla chu Abraham zumhkâi mi hen malsâwm piak vevê hen an um tâwn asi.

¹⁰Dân thilti a um mi vial tla chu siatbarh hen an um ruangah, "Dân lasuibu ah thurîn zawzawng hâwi hen ti ding a um lotu zawzawng chu siatbarh hen um seh," ti hen Pathian lasui thu nih a sim ruangah.

¹¹Chun, Pathian mitmuh ah âukhawm Dân ruangah mawhtir lo hen an um lo ti a lang asi. "Mi rep tla chu lungnâk hen an nung lai," ti hen Pathian lasui thu nih a sim ruangah.

¹²Chun, Dân chu lungnâk ah mi asi lo, "Chu hâwi a titu chu, chu lakah chun a nung lai," ti asi dauh.



¹³Krist chu kan ruangrûl ah siat ting hen Dân siat lakah mi hawng kan suah rawh; "Thing ah thlâi mi vial chu siat ting an si," ti hen Pathian lasui thu nih a sim ruangah.

¹⁴Chun, Abraham rangah malsâwmnâk chu Krist Jisu ah Phundang tla tlûnah a hawng um kho lai le, chun lungnâk ruangah Thlarau tiamh chu kan tawng kho lai.

¹⁵Unau le tla, minung hâwi hen ka sim hi, minung thutiam si khawmsele birhtir rawh nûnah an phelh dah lo, sap khawm an sap dah ber lo,

¹⁶Chun, Abraham sinah asi, thu chu tiamh hen a um mi chu, a chi thlâk tla sinah khawm. Mi tamtak thu sim mi hâwi hen, "Chi thlâk tla sinah khawm," a ti lo le, mi pakhat thu sim mi hâwi hen, "Na chi thlâk sinah khawm" ti asi dauh, chu chu Krist chu asi.

¹⁷Chun, hi hâwi hen ka ti asi: Thutiam Pathian birhtir rawh mi chu Dân kum zali leh kum sâwmthum nûnah um rawh mi nih khan thutiam chu zeikhawm lo hen a veih loh.

¹⁸Ro ting ding chu Dân ruangah asi chun thutiam ruangah asi lai loh; sikhawmsele Pathian thutiam ruangah asi Abraham sinah a pêk mi chu.

¹⁹Asi lo leh, Dân chu ze ti zia hen um mi me asi ne? Abraham chi thlâk thutiamnâk chu a hawng kal lân lo chu buarnâk tla ruangah sap hen a um le, vânmifial tla mang hen rêl kut ah birhtir asi.

²⁰Chun, rêl rerêng mi pakhat sinah asi dah loh, Pathian lam chu pakhat asi.

²¹Asi lo leh, Dân nih chun Pathian thutiam tla chu a kham mazei? Si lo e; Dân, mi nungtir khotu pêk hen a um rawh chun, repnâk chu Dân ruangah um ngelchel ding asi.

²²Sikhawmsele, Jisu Krist lungnâk ruangah thil tiam chu a lungtu tla sinah pêk asi khonâk ding hen Pathian lasui thu nih chun sual tangah zeizawng a khâr ver.

²³Sikhawmsele, lungnâk a hawng tlung lân khan lungnâk hawng lang ding mi rangah khâr hen, Dân tangah vêng kan si kha.

²⁴Chun, lungnâk ruangah mawhtir lo kan si khonâk ding hen Dân chu Krist leiah hawng kan ruitu asi.

²⁵Sikhawmsele, tuah lungnâk a hawng tlung nûnah hin dân hen ruinâk tangah kan um lo rawh.

²⁶Krist Jisu lung ruangah Pathian fa tla nan si ver.

²⁷Nan lakah Krist ah baptis si rawh mi vial tla kha Krist hen nanna thum rawh ruangah.

²⁸Chunah chun Juda mi a um kho lo le, Greek mi khawm a um kho ber lo, chunah chun to-aw a um kho lo le, to-aw lo khawm a um kho ber lo, chunah chun mipa leh nunau khawm a um kho ber lo; Krist Jisu lakah nan ektê hen pakhat nan si ruangah.

²⁹Chun, Krist tâ nan si chun Abraham thlah, thutiam hâwi a ro ting ding tla nan si.

Galatia 4

¹Sikhawmsele, hi hâwi hen ka ti asi: Rotingtu ding chu zeizawng tûnah hotu sikhawmsele ngâksia asi kar chun to-aw hen zeikhawm â dang lo;

²a pa ruat tik chu a tlung lân lo chu vêngtu leh zauhkenhtu tangah a um dauh asi.

³Chu hâwi hen ngâksia kan si liau khan laikulh thilbul tangah to-aw ah kan um;

⁴sikhawmsele, a tik a hawng tling rawh chun, fa sinâk kan tawng khonâk ding hen Dân tangah um tla chu tlanh ding hen Pathian nih a Fapa, nunau ring mi, Dân tangah hawng suak hen a fial rawh.

⁶Chun, fa nan si ruangah Pathian nih a Fapa Thlarau chu "Abba, ka Pa" ti a auh hen, kan thinlung ah a hawng fial.

- ⁷Chun, to-aw na si lo rawh le, fa na si dauh; chun fa na si chun Pathian zârah rotingtu na si.
- ⁸Sikhawmsele a lânah Pathian nan theihlo liau khan, nan umdân lak khawmah Pathian si lo mi sal nan si.
- ⁹Tuah Pathian nan theih nûnah lam chun asi lo, Pathian mi theih nan hawng si nûn hin ti ding asi dauh, thilbul chak lo leh dawrlâp sal ah um mi leh nan duhnâk leikângah chun zeitin zia kîr nawlh me nan si? Zeirangah chu tla sal ah um ding nan duh nawlh êu?
- ¹⁰Nan rangah ni lawh ka ruang salam lai ti ka nan òtîhñanh piak na.
- ¹²Unau le tla, ka nan ngiar na, keimah hâwi hen um u; kei khawm nanmah hâwi hen ka um dangâiah. Ka pawî zeikhawm nan khawih lo.
- ¹³Thâwngthâng Ṭha nan sinah ka hawng sim masa tan kha ka taksa a chak lo ruangah asi ti nan theih asi.
- ¹⁴Chun, ka taksa nan rangah lêmnâk um mi chu nan zauhnawmh lo le, nan òtîh ber lo; Pathian vânmifial hâwi hen Krist Jisu hâwitê hen nan ka kawmh dauh kha.
- ¹⁵Vânṭha nanna tinâk kha zeî hâwi a hawng si rawh? Tikho si sele nan mit chawih zek hen nan ka pêk lai rawh ti ka nan theih piak na.
- ¹⁶Chun, thudik tak ka nan simh na ruangah nan leido ma ka si rawh?
- ¹⁷Ṭha leikângah silo hen, semsêngâi tak hen an hâwl na tâwn le; asi, anmah tla nan hâwl khonâk ding hen lêngleî ah an khâr khumh na ding an duh asi.
- ¹⁸Thu ṭha leikângah lam chun nan sinah ka um liau lâwng silo hen zeî liau khawmah ṭhanemsemsê ngâi hi a ṭha asi.
- ¹⁹Ka fa duhtak le tla! Krist chu nanmah lakah siam rangtling hen a um lân lo chun fa ring nganfâk hâwi hen kan lungkham nawlh na.
- ²⁰Asi, tuliau hin nan sinah um hen, ka aw-hâu dangtir ka duh zia bâk chu nanmah ruangah ka lawksawng asi.

²¹Dân tangah um duh le tla, hawng ka simh u. Dân thu chu nan ngâi tâwn lo ma?

²²Hi hâwi hen rîn asi: "Abraham nih fapa panih a nei le, pakhat chu salnu lakah, pakhat chu salnu lo lakah.

²³Sikhawmsele, salnu lakah mi chu taksa dân hâwi hen a suak le, salnu lo lakah mi lam chu thutiam ruangah suak asi," ti hi.

²⁴Chubang thu chu tahthimhnâk asi; chubang nunau tla chu thutiam panih an si; pakhat chu Sinai tlâng ah mi sal si ding hen fa ringtu chu Hagar asi.

²⁵Chun, Hagar hi Arabia ram Sinai tlâng asi, Jerusalem tuliau a um mi hen â bang asi, a fa tla hen to-aw ah an um ruangah.

²⁶Sikhawmsele, vâ Jerusalem lam chu sal silo mi asi, chun, chu tak chu kanmah nu asi.

²⁷Pathian lasui thu nih, "Nang, ching, fa ring dah lo, a lâwm rawh! Nang, fa ring hen nganfâk tuar dah lo, âu rawh! Pasal nei mi ngâk chun um harnu nih chun fa le a nei tam dauh asi," ti hen a sim hâwi khan.

²⁸Chun, unau tla, kannih hi Isak hâwi khan thutiam fa tla kan si.

²⁹Sikhawmsele, chu liau chun taksa dân a suak mi nih Thlarau dân hen suak mi chu a nehsawh hâwi khan, tu khawmah chu hâwi ber asi.

³⁰Sikhawmsele, Pathian lasui thu nih zeitin a sim: "Salnu chu a fapa hen nar rawh; salnu fapa nih chun salnu lo fapa chu ro a tingpi awt lo," a ti.

³¹Chun, unau tla, salnu lakah mi fa tla kan si lo le, salnu lo lakah mi fa tla kan si dauh.

Galatia 5

¹Sal si lo ding hen Krist nih hawng kan suah kha, chun bir tak hen dîr ule, sal liangbat lakah chun tâng nawlh lah u.

²Ngâinik u, kei Pawl nih nan sinah ka sim hi, fêm nan tantir chun Krist chu nan rangah zeikhawm thatvahnâk asi lai loh.

- ³Asi, Dân thu zawzawng zâwt ding hen battirtu an si ti fêmtantirtu vial sinah ka theihtir nawlh asi.
- ⁴Nannih Dân lakah mawh lo tumtu tla, Krist hen nanna ðhen rawh: Zângfahnâk chu nan tlûktâk rawh.
- ⁵Kannih nih chun Thlarau zârah lungnâk hen repnâk lungumnâk kan ngâk ruangah.
- ⁶Krist Jisu ah chun fêmtan hi zeikhawm a ðhatnâk a um lo, fêmtan lo khawm zeikhawm a ðhatnâk a um lo; lungnâk, zângfahnâk ah ðuan tam chu a ðhavak asi.
- ⁷Tha tak hen nan tek tâwn khateh; thudik chu nan zâwt lonâk ding hen âu nih a nan kham na?
- ⁸Hi lêmnâk hi a nan kawh natu sin thawk hen mi asi lo.
- ⁹Thilnu tâwmtê nih sang tlang chu a pum hen a zunh tâwn.
- ¹⁰Thil dangpi ah nan ngaih lai lo ti Lalpa lakah chun kei nih chun ka nan ruat na; sikhawmsele a nan nawktir natu chu âutal si sele a tlûnah thu tlû ding mi chu a tuar lai.
- ¹¹Unau tla, kei nih hin fêmtan thu ka sim nget chun zeirangah nehsawh hen ka um nget rih? Chu hâwi asi chun kraws a suihnâk chu veih asi lai rawh.
- ¹²A nan nawktir natu tla chu lawnh tlak dâidua sele ka duh.
- ¹³Unau tla sal silo ding hen kawh nan si; sikhawmsele, sal nan si lonâk chu taksa rangah dêngkhâwngnâk ah mang lah ule, zângfahnâk hen rian a ðuan piak tawnh chia u.
- ¹⁴Nangmah na dâwt hâwi hen na zâwlbâwm tla na dâwt ding asi," ti thu kâ khat nih hin Dân thu zawzawng chu a rangtlingtir rawh asi.
- ¹⁵Sikhawmsele, nanna seh hen nanna ei tawnh chun nanna veih tawnh lonâk ding hen a thiamthih u.
- ¹⁶Chun, hi hi ka ti asi: Thlarau ah um u, chun taksa duhnâk chu nan zûl lai loh.

¹⁷Taksa nih hin Thlarau lei donâk a duh tâwn, Thlarau khawm nih taksa lei donâk a duh tâwn; thilti nan tum mi tla chu nan ti kho lonâk ding hen chubang tla chu â kalh asi.

¹⁸Sikhawmsele, Thlarau rui a nan um chun Dân tangah nan um lo.

¹⁹Chun, taksa thilti tla chu a lang fiang asi; chubang chu hi hi asi:

²⁰Duhnâk, nâwmtâmnâk, hurnâk, ruk sawnhnâk, dâwi thiamnâk, huatnâk, tawhnâk, thîknâk, thinthawknâk, mah kawngkâ ruatnâk, a dang hen umnâk, a dang hen lungnâk,

²¹nahsuahnâk, zû rîtnâk, zû mun ah lâwmnâk tla, hi bang tla hi: Chubang tla chu a lânah, chu hâwi thil ti mang tla nih chun Pathian Ram anna ting lai loh ti ka nan simhkan na hâwi khan ka nan simhkan na hi.

²²Thlarau rah lam chu zângfahnâk, lâwptlonâk, remnâk, dawnhkhonâk, vêlneihnâk, thatnâk,

²³zumhkainâk, mi tangah dawnhkhonâk, sûmkhonâk tla asi dauh; chu hawi kalh kâng hen Dân thupêk rerêng a um lo.

²⁴Chun, Krist Jisu mi le nih chun taksa chu a soal dawnnâk leh a duhnâk tla hen an khenhbêk rawh.

²⁵Thlarau ah nung kan si chun Thlarau ber ah kan um nawlh lai.

²⁶A do tawnh hen, a nahsuah tawnh hen, kanna sung-û tir ding asi loh.

Galatia 6

¹Unau tla, mi nih soal zeital a ti liauah tanh sut hen um sele, nannih Thlarau mi le tla, "Lêmnâk ka tawng soal bâk lai," ti a vêng bû hen chu hâwi mi chu dawnhkho tak hen dirh nawlh u.

²Nan thilrit phurh tla chu a sâwng tawnh u, chun Krist dân thu chu nan zâwt mi asi lai.

³Mi ze silo pet hen mi lian dauh ah â ruat chun mah â perpet mi asi.



⁴Mikip mah thilti a nik chiau seh, chu nûn chun midang tlûn silo hen mah lak cho ah putso ding a nei lai.

⁵Mi kip mah phurh chiau an phurh awt ruangah.

⁶Chun, sîntirnâk tawngtu nih chun thu ̣ha zawzawng sîntirtu sinah pêk bâk seh.

⁷Perpet hen um lah u; Pathian chu zuahnawmh kho mi asi lo; mi nih a tuh mi vial chu lîlâ chu a ât awt ruangah.

⁸Mah taksa leiah tuhtu nih chun taksa mi siatnâk a ât lai; Thlarau lei tuhtu lam nih chun Thlarau a mi zungzâl ah mi nungnâk a ât awt asi.

⁹Chun, thu ̣ha ti neng lo ding; kanna dâithlanh lo chun a tikah kan ât awt ruangah.

¹⁰Chun, tik a rem zia hâwi vima hen mi zawzawng tlûnah thu ̣ha kan ti lai, lungnâk dâwngsung tla lakah mi tlûnah kan ti dauh chem ding asi.

¹¹Keimah kut ngelchel hen nan sinah lasui puam rut hen ka rîn mi hi zauh u.

¹²Taksa a mêl dawhtir duhtu vial nih fêmtan si ding hen an fial râm na tâwn asi; zeî dang ruang khawm asi lo le, Krist kraws ruangah nehsawh an tuar lonâk ding cho asi.

¹³Fêmtan men nih Dân thu an zâwt lêm lo, nan taksa ah putso ding an nei khonâk ding hen fêm an tantir na ding an duh mi cho asi.

¹⁴Kei lam nih chun kan Lalpa Jisu Krist kraws lo chu ka putso lo ding zia chu, chu zârah chun laikulh hi ka rangah kenh hen a um rawh, kei khawm laikulh rangah kenh hen ka um asi.

¹⁵Siamthar nawlhnâk lo chu fêmtan hi zeikhawm asi lo. Fêmtan lo khawm zeikhawm asi lo.

¹⁶Chun, chu dân hâwi a um mi vial tla tlûnah remnâk leh zângfahnâk um seh, Pathian phun thîm Israel tla tlûnah khawm.

¹⁷Tu thawk hen âukhawm nih hawng ka nawktir lah seh; ka taksa ah hin Jisu singsiahnâk tla ka put ruangah.

¹⁸Unau tla, Lalpa Jisu Krist zângfahnâk nan thlarau sinah um seh. Amen.



Ephesi

Ephesi 1

¹Pawl, Pathian duhzia hen Krist Jisu mifial nih: Pathian mi tla Ephesi khua ah um mi tla, Krist Jisu ah mi zumhkâi le tla sinah chun—

²Pathian kan Pa leh Jisu Krist sinah thawk hen zângfahnâk leh remnâk nan sinah um seh.

³Kan Lalpa Jisu Krist Pathian leh Pa chu sawr hen um seh. Anih nih chun vân mun tla ah khin Krist ah chun thlarau lei malsâwm piaknâk kip hen mal hawng kan sâwm le,

⁴zângfahnâk ah thenhlimh leh simsâwi kawp lo hen a mâika ah kan um khonâk ding hen tual tuah lânah Krist ah a tâ si ding hen a hawng kan thîm hâwi khan.

⁵A zângfahnâk rokual zia sawr ding hen amah thinlung tluk leh lawmhkâng hâwl hen Jisu Krist zârah amah tâ rangah fa ah siam ding hen hawng kan ruat rawh ruangah. Chu zângfahnâk chu a Fapa duhtak lakah chun a thawt hen hawng kan pêk.

⁷A thisen hen amah lakah kan tlanhnâk kan nei asi, a zângfahnâk chawng zia hâwi vima hen kan buarnâk tla ngaihdamnâk chu.

⁸Chu zângfahnâk nih chun amah nih fing tak leh theihthiam tak hen hawng kan vurh asi, a duhzia thuthup kan sinah hawng kan theihtir mi hen.

⁹Tik rangtling khawsât tikah a lawmhkâng zeizawng vân ah thu um tla, tual tlûnah thu um tla khawm Krist ah a pumh ding mi chu amah nih ti a tum hâwi khan; amah lak takah asi.

¹¹Amah duhkâng a remruat hâwi vima hen thu zeizawng a tum mi a ruatkan si rawh hen amah lakah ber a mi si dingah siam kan si,

¹²kannah Krist lungum masa rawh tla hi a rokual sawrnâk langhtu kan sinâk ding hen.

¹³Amah lakah nannih khawm thudik chu nan ruangsuaahnâk Thâwngthâng Th̄a chu nan ngâi hen, lung khawm nan lung nûnah amah lakah Thlarau Thenhlimh tiamh hen chun singsiah hen nan um kha.

¹⁴Chu chu Pathian rokual zia sawrnâk dingah amah tâ ngelchel tlanhnâk ding hen kan ro tingnâk dingah tiamhnâk asi.

¹⁵Churuangah, kei khawm nih Lalpa Jisu lungnâk nan lakah um, Pathian mi le tla zawzawng tlûnah nan langhtir tâwn mi tla chu ka theih hen,

¹⁶kan Lalpa Jisu Krist Pathian rokualnâk Pa nih chun amah theihnâk leikângah fingsnâk leh theihfiangnâk Thlarau a nan pêk kho na nâk ding hen ka thlachamnâk tla ah chun nan min lam hen nan tlûnah lâwmthu sim ka bâng lo.

¹⁸Chun, nan thinlung mit tla deitir a um hen amah kawhnâk lungumnâk tla hen mi thenhlimh tla lakah chun a ro ting ding rokual chawng zia tla,

¹⁹mithi lakah mi a thawh nawlh liau leh lalnâk, thuneihnâk, thiltikhonâk, lâirêlnâk zawzawng tla, hi laikulh ah cho silo hen laikulh hawng tlung ding khawmah min sak zawzawng tla tlûn ving ah vân mun tla ah a vawrhlei ah a totir liauah Krist lakah a t̄uan mi, a thari chaknâk t̄uan zia hâwi vima hen khan kannih lungtu leikângah a thiltikhonâk a lianh zia tla zeî hâwi asi nan theih kho lai.

²²Chun, thil zeizawng a kê tangah a siah le, amah chu zeizawng tlûnah lû rang dingah kawhmi tla sinah a pêk;

²³kawhmi tla chu a taksa asi, zeizawng ah zeizawng khattirtu rangtlingnâk chu.

Ephesi 2

¹Nannih khawm nan buar mi leh nan sual tla ruangah thi nan si liau khan a nan nunh na asi.

²Chubang lakah chun a lân khan hi laikulh dân hâwi hen nan um kha, boruak ah thuneihnâk lal tuah lunglo fa tla rangah t̄uan chirtu thlarau dân hâwi hen.

³Chubang lunglo fa tla lakah chun kannih khawm a lân chun taksa leh thinlung duhkâng ti hen, kan taksa duhnâk tla hâwi hen kan um ver le, midang tla hâwi ber hen Pathian thinrunhnâk tuar ding hen suak mi rêng kan si kha.

⁴Sikhawmsele, Pathian nih chun zângfahnâk a chawng hen a zângfahnâk fâk tak ruangah khan,

⁵kan buarnâk tla ruangah thi kan si liau khawmah Krist rual hen hawng kan nunh bâk le, zângfahnâk hen ruangsuah nan si;

⁶Krist Jisu ah amah rual ber ah hawng kan thawh hen, vân mun tla ah amah sinah hawng kan totir rawh.

⁷Chun, tik hawng tlung ding mi lakah Krist Jisu ah kan tlûnah vêl nei hen a zângfahnâk neih fâk zia chu a zauhtir kho lai.

⁸Lungnâk ruangah Pathian zângfahnâk hen ruangsuah nan si; chu khawm chu nanmah lakah suak asi lo le, Pathian thilpêk asi; thilti ruangah si lo, chu lo chun mi anna khâwng lebang lai.

⁹Thil tha ti rang dingah Krist Jisu ah chun siam a um hen amah kut suak kan si le,

¹⁰chu thil tha ti chu kan umnâk dingah Pathian nih a timhtuah kan mi asi.

¹¹Churugah, a lânah nannah taksa ah Phundang, taksa kut hen siam, "fêmtan" an ti mi tla nih "fêmtan lo" an ti na mi tla, kha liau khan,

¹²Krist lo hen Israel tla lakah mi nanna dang hen, laikulh hin lungumnâk rerêng nei lo leh Pathian lo a um hen, thutiamnâk tla lakah khual um hen nan um mi kha theihkumza u.

¹³Tuah lam chun Krist Jisu ah nannah a lâiah lâk tak hen umtu tla kha Krist thisen ah naihtir hen nan um rawh.

¹⁴Krist amah ngelchel nih remnâk hawng kan siam piak ruangah; anih nih chun remlonâk thil ti ding tla lakah thupêk dân um chu a taksa ah tlâutir a um hen,

¹⁵Juda tla leh Phundang tla chu pumkhat ah a siam le, an karah kardangnâk vâm chu a chimtir le, chun amah lakah chun phun nih tla chu minung thar pakhat a siam hen remnâk a siam kho lai.

¹⁶Kraws ah Krist thihnâk zârah phun nih tla chu taksa pumkhat ah siam hen Pathian hen a remtir asi, chu kraws nih chun remlonâk chu a thah ruangah.

¹⁷Chun a hawng kal chun nannih Phundang lâk tak a um tâwn mi tla sinah remnâk Thâwngthâng Ṭha a nan simh na le, nâitê ah um tâwn mi Juda tla sin khawmah remnâk Thâwngthâng Ṭha a sim ber.

¹⁸Krist zârah Thlarau munkhat ah Pa sinah, Juda leh Phundang nih lût khonâk kan nei vevê asi.

¹⁹Chun, tuah khual leh ram dang mi salam nan si lo le, mi thenhlimh tla hen khualaikhat leh Pathian dâwngsung tla nan si dauh rawh asi.

²⁰Krist Jisu tak chu a ki ah lung herh chem si hen mifial tla leh khuavâng tla lungphum tlûnah sak nan si.

²¹Amah lakah chun in sak dang dang êp tak a tawnh hen, Lalpa lakah chun Biakin thenhlimh ah â chang vima;

²²nannih khawm, amah lakah chun Thlarau a Pathian umnâk ding remh tawnh hen sak mi nan si.

Ephesi 3

¹Churung chun, kei Pawl, nannih Phundang tla ruangah Krist Jisu ah rêngtla nih hin—

²nan rangah Pathian zângfah zauhkhenhnâk rian hawng ka pêk mi kha nan hawng theih lai rawh.

³Kha hâwi hen thuthup chu theihtirnâk ah theihtir hen ka um kha, a lânah tâwi tek hen ka rîn mi hâwi thu kha;

⁴kha ruang khan nan rêl hen Krist thuthup ka theih zia nan theih lai.

⁵Chu chu tuliau a mifial thenhlimh tla leh a khuavâng thenhlimh tla sinah Thlarau theihtir hen a um rawh hâwi khan, a lân khan minung fa tla sinah theihtir hen a um dah lo;

⁶chu chu hi hi asi: Thâwngthâng Ƨha ruangah hin Krist Jisu ah Phundang tla hi Juda tla rotingtu, taksa pumkhat lakah Ƨeng tla, thutiam tingpitu tla an si hi.

⁷A thiltikhonâk Ƨuan zia hâwi hen a thawt hen pêk mi Pathian zângfahnâk chu hawng ka pêk hâwi vima hen chu Thâwngthâng Ƨha rianƧuantu ah siam ka si.

⁸Phundang tla sinah Krist neihsiahnâk sût châwk lo rê thâwngthâng sim ding leh thuthup zungzâl thawk hen Pathian zeizawng siamtu lakah thuh hen a um mi zauhkhenhnâk chu zeise asi ti mi mêchem ngâk a mê dauh sinah chu zângfahnâk chu pêk asi.

¹⁰Chun, kan Lalpa Krist Jisu ah hi a tum mi a zungzâl remruat hâwi vima hen tu liauah vân mun tla ah khin lalnâk leh thuneihnâk tla sinah chun Pathian finghnâk kip kawhmi tla ruangah theihtir hen a um kho lai.

¹²Krist Jisu kan lung ruangah chun amah lak berah ngamhnâk leh râlƧhatnâk Ƨha tak a lâk khonâk kan nei.

¹³Chun, nanmah ruangah hamh ka tuarnâk tla ruangah hin lungdawng lo ding hen ka nan ngiar na chubang chu nan rokualnâk asi.

¹⁴Churuang chun, Krist chu lungnâk ruangah nan thinlung ah a chêl khonâk ding hen, a rokualnâk neih zia hâwi vima hen a Thlarau zârah minung sungril leiah chun thiltikhonâk ah chaktir hen a nan umtir na khonâk ding hen, Pa, tual leh vân ah dâwngsungkhur kip min putso mâika ah chun ka siksîdîr tâwn le, chun Pathian rangtlingnâk zawng tluk hen khattir a nan um khonâk ding hen, nannih zângfahnâk ah ram thlâk leh ngauhsan nei a um hen, mi thenhlimh zawzawng hen a kauh zia, a sâu zia, a sâng zia, a thûk zia tla theihfiang khonâk, Krist zângfahnâk theih phâk lo theih khonâk nan nei kho lai.

²⁰Chun, kanmah lakah ṭuan tâwntu thiltikhonâk hâwi vima hen kan deih le, kan dawnruat zawzawng ngâk a fâk dauh tikhotu sinah,

²¹zungzâl thlâk zawzawng tiang hen kawhmi tla lakah leh Krist Jisu ah rokualnâk um seh; Amen.

Ephesi 4

¹Chun, a nâutirnâk leh thu tang dawnhnâk zawzawng nei hen zângfahnâk ah a dawnh tawnh bû hen,

²dawnhkhonâk nei hen, remnâk phuarnâk ah chun Thlarau ah a pumkhatnâk chu kil ding a ti hen,

³a nan kawh na nâk tlâk a um ding hen, kei, Lalpa ah rêngtlâ nih hin ka nan ngiar na.

⁴A nan kawh na san lungumnâk munkhat hen kawh nan si hâwi ber hen khan taksa pumkhat leh Thlarau pakhat cho a um.

⁵Lalpa pakhat, lungnâk munkhat, baptisma munkhat,

⁶zeizawng Pathian feh Pa pakhat cho a um le, anih chu zeizawng tlûnah a um le, zeizawng ṭawl hen a um le, zeizawng sungah a um ber asi.

⁷Sikhawmsele, Krist thilpêk tahnâk hâwi vima hen zângfahnâk chu kan sinah pêk chiau asi.

⁸Pathian lasui thu nih, "Tlûnlei ah a kâi liau khan tleih tla tamtak a put na; minung tla sin khawmah thilpêk tla a pêk na," ti hen, a sim hâwi khan.

⁹Chun, "A kâi," ti hi tual tang niam dauh tla ah a ṭum masa tâ lo chun zeitin asi kho lai?

¹⁰A hawng ṭum mi chu zeizawng a khattir khonâk ding hen vâh zawzawng tlûnlei ah a kâi mi ber kha asi.

¹¹Chun, lungnâk leh Pathian Fapa theihnâk leikângah chun thuruat hen, upa si hen, Krist rangtlingnâk lenh zia tluk hen kan ektê hen kan um lan lo chu,

¹²rian ṭuannâk ṭuan ding hen mi thenhlimh tla rangtlingnâk ding hen, Krist taksa remh ding hen mi zeimaw mi chu Thâwngthâng Ṭha simtu rangah,

¹³zeimaw mi chu kawhmi châwmtu leh sîntirtu rangah a pêk na; chun diklonâk ah ngamlêmnâk hâwi hen,

¹⁴fing perpet a minung perpet bû hen, sîntirnâk thilti kip nih khatlei khatlei ah vawrh leh ranh mi ngâksia kan si lai lo rawh le,

¹⁵zângfahnâk thudik sim hen zeizawng ah amah lakah kan ṭhanglian kho dauh lai; amah chu lû asi, Krist chu.

¹⁶Amah zârah taksa pumpiluk chu a tlâinâk kip ṭuan ruangah êp tak a tawnh le peh dut hen, ṭeng kip ṭuan zia hâwi chiauh hen, zângfahnâk a siamṭha ding hen taksa chu a pungtir tâwn asi.

¹⁷Chun, hi hi ka sim hen Lalpa ah chun ka nan theihtir na asi: Phundang tla chu thinlung mangtlâklo put a an um hâwi hen um lah rawh ule,

¹⁸theihlonâk anmah lakah um mi chu theihlonâk ruangah chun Pathian nungnâk lakah ṭhen a um hen, an theihnâk lakah chun an hawng mûi asi, an thinlung a mawlâwt ruangah.

¹⁹Chubang tla nih chun a theihkhonâk an nei lo ruangah thil nâwmtâm kip hamkah tak a ti ding hen hurnâk ah anna pumpêk rawh.

²⁰Nannih lam nih chun Krist chu nan châwng le,

²¹a aw-hâu ngâi hen amah lakah sîntir hen um nan si rawh chun Jisu lakah thutak um mi hâwi hi;

²²"A lânah nan umdân leikângah minung li bumnâk duhnâk hâwi a râwk dadauh kha lit ule,

²³nan thinlung thlarau ah chun a thar hen hawng um ule,

²⁴minung thar, thudik repnâk leh thenhlimhnâk ah Pathian hâwi a siam hen khan a thum u," ti thu hi.

²⁵Chun, âwkrâwl sim mâk hen, mah zâwlbâwm sinah thudik sim chiauh u, a ṭeng tawnh chiauh kan si ruangah.

²⁶Thinrun khawm ule, sual lam chu sual lah u; nan thinthawknâk chu nî nih tlâkpi lah seh.

²⁷Diabol chu mun kenh lah u.

²⁸Fîr mang nih chun fîr lah rawh sele, a samphâng mi sinah chun a pêk ding a nei khonâk ding hen a kut ah thil tha hen a hamh dauh seh.

²⁹Thu tha lo rerêng nan kê ah suak lah seh, a herh zia hâwi vima a siamtha ding hen thu tha vial suak dauh seh, a ngâitu tla rangah zângfahnâk asi khonâk ding hen.

³⁰Chun, Pathian Thlarau Thenhlimh chu lungzûrtir lah u, tlanhnâk ni rang dingah chu hen chun singsiah hen nan um kha.

³¹Khânâk thinthawknâk, sirleihnâk rângnak, simsiatnâk zawzawng chu bângtâk hen um seh.

³²Chun, a zângfah tawnh hen siherhnâk nei hen um ule, Pathian nih Krist ah a nan ngaihdam na hâwi ber hen a ngaihdam tawnh u.

Ephesi 5

¹Chun, a fa duhtak tla hâwi hen anmah bangh ding hen um tum u.

²Krist nih a nan dâwt na le, rimthâw rang dingah Pathian sinah thil ap ah leh bâwlnâk ah kan ruangrûl ah â pêk mi hâwi khan zângfahnâk ah um u.

³Sikhawmsele, mi thenhlimh tla ti ding hen â dawh mi, duhnâk leh nâwmtâm zawzawng hamkahnâk hen nan lakah sim hen khawm um lah seh;

⁴kangal thu, thu-do-tla-lo, chapo thu khawm chubang chu â dawh lo asi; chubang ti ngâk chun lâwmthu sim dauh u.

⁵Pung mang leh mi nâwmtâm leh mi duhlei rerêng nih chun (mi duhlei chu ruk sawnhtu asi) Krist leh Pathian Ram ah chun tingvo rêng an nei lo ti nan theih asi.

⁶Âukhawm nih thu salam hen an perpet lah na seh; chubang thu ruang chun Pathian thinrunhnak lunglo mi tla tlûnah a tlung tâwn.



⁷Churuangah anmah bâwmpi lah na u.

⁸A lânah khan mûi ah nan um le, sikhawmsele Lalpa mi tla nan si nûnah chun chêu lakah nan um rawh. Churuangah, chêu lakah um mi tla hâwi hen nan um ding asi.

⁹Chêu nih chun thatnâk, repnâk leh thudik rah kip a suah tâwn ruangah.

¹⁰Lalpa lawmhkâng zeï me asi ti sîn ding hen a ɽang u.

¹¹Chun, mûi thilti rah dah lo lakah chun telnâk rerêng nei lah u, tel ngâk hen an mawh zia theihtir dauh na u;

¹²a thup hen thil ti tâwn tla chu a sim khawm ningzâk a kâi ruangah.

¹³Sikhawmsele, thu zeizawng an mawh zia theihtir hen um hi chêu langhtir mi asi tâwn; langhtir hen um mi vial chu chêu asi.

¹⁴Churuangah, "Nang, it meng le, mithi lakah mi thawk rawh; chun, Krist nih a nan cherh lai," a ti kha.

¹⁵Chun, mi fing lo tla hâwi a um lo hen, mi fing tla hâwi a um dauh hen, nan umdân ah a thiamthih u;

¹⁶ni tla hi a ɽa lo ruangah tik remkâng siam vima u.

¹⁷Churuangah â hen um lah ule, Lalpa duhzia zeï me asi ti theih dauh u.

¹⁸Chun, uain rî hen um lah u, chu lak chun sômkholonâk a um ruangah; Thlarau a khat hen um dauh u.

¹⁹Sawrnâk la tla, Pathian la tla, Thlarau lei la tla hen a sawnh tawnh hen, Lalpa chu nan thintlung ah la sak piak hen, ɽingɽang tum piak u.

²⁰Kan Lalpa Jisu Krist min hen, Pathian, Pa sinah zeizawng lakah lâwmthu sim kumza u.

²¹Krist ɽih bû hen a pumpêk tawnh chiau u.

²²Nupi tla, Lalpa sinah nanna pumpêk mi hâwi hen mah pasal tla sinah a pumpêk u.

²³Krist amah ngelchel taksa ruangsuahtu si hen kawhmi lû asi hâwi hen pasal chu nupi lû asi.

²⁴Chun, kawhmi tla Krist sinah anna pumpêk mi hâwi hen nupi tla chu an pasal tla sinah a pumpêk na seh.

²⁵Pasal tla, nan nupi tla zângfah na u, Krist nih kawhmi tla a zângfah le, an ruangrûl ah amah â pêk hâwi hen khan,

²⁶annih chu tî a tawl hen, thu nih chun a thiangtir hen a thenhlimhtir kho na nâk ding hen;

²⁷chun, kawhmi tla chu nâwm kawp lo leh thurh lo leh chu hâwi thu rerêng put lo hen, thenhlimh leh simsâwi kawp lo a um dauh hen amah sinah kawhmi tla rokual tak hen â pêk chawlh kho lai.

²⁸Chu hâwi ber hen pasal tla khawm nih mah taksa hâwi hen mah nupi tla chu an zângfah ding asi.

²⁹Mah nupi zângfahtu chu mah â zângfah mi asi. Âukhawm mah taksa an hua dah lo, an châwm hen an dâwt dauh tâwn asi. Krist nih kawhmi tla a dâwt na hâwi hen;

³⁰taksa têng tla kan si ruangah.

³¹Churung chun, mipa nih a nu leh pa a kaltâk hen a nupi a sihawh lai le, chun an panih hen taksa pumkhat an hawng si lai rawh.

³²Chu thuthup chu a rokual asi, sikhawmsele kei lam nih chun Krist leh Kawhmi tla thu ka sim asi.

³³Zeikhawm si sele, nan lakah mi khawm nih mah â zângfah hâwi ber hen mah nupi zângfah chiau seh: nupi khawm chu a pasal tih leh zah ding hen a thaimthih seh.

Ephesi 6

¹Ngâksia tla, Lalpa ah nan nu leh pa thu zâwt u; chu chu thil dik asi.

²"Na nu leh na pa chawnglawmh rawh" (chu chu thupêk masachem thutiam sap mi chu asi):

- ³"Chun na rangah a ʒa lai le, tual ah hin na dam sâwt lai."
- ⁴Chun, nannih nu leh pa tla; nan fa tla thinruntir lah ule, Lalpa nunsimhnâk leh simhfâinâk ah chun zauhkhenh u.
- ⁵To-aw tla, Krist thu nan zâwt hâwi hen ʒih leh thir bû hen, thinlung lungkhat hen,
- ⁶minung mitzauh vêng hâwi cho silo hen, Krist to-aw hâwi hen thinlung ah Pathian duhzia ti dauh hen,
- ⁷minung rianʒuan hâwi cho silo hen, Lalpa rianʒuan hâwi dauh hen duh tak bû a ʒuan hen,
- ⁸to-aw khawm si seh, to-aw lo khawm si seh, mikip nih thil ʒa an ti mi vial chu Lalpa sinah mi a lîlâ an tawng nawlh lai ti theih hen, taksa ah nan hotu tla thu zâwt u.
- ⁹Chun, nannih hotu tla, chu hâwi ber hen anmah leh nanmah hotu chu vân ah a um ti leh anih nih chun mi duh khun a nei lo ti theih hen, râp lo hen an tlûnah ti bâk u.
- ¹⁰A dawngchemnâk ah Lalpa ah leh a chaknâk ah thiltikhonâk nei hen hawng um u.
- ¹¹Diabol ngamlêmnâk tla chu nan do khonâk ding hen Pathian râlthuum rangtling hen a thuum u.
- ¹²Kan paihpi mi tla hi taksa leh thisen an si lo, lalnâk leh thuneihnâk tla leh hi thim tlûnah lâirêltu tla leh vân mun tla ah thlarau sual um mi tla an si dauh.
- ¹³Churuangah, ni ʒa lo ah chun nan do khonâk ding hen leh nan ti thluh ver nûn khawmah nan dîr khonâk ding hen Pathian râlthuum rangtling lâk u.
- ¹⁴Chun, nan tâi chu thudik a sâwm hen, repnâk chu phâw ah sawng hen,
- ¹⁵remnâk Thâwngthâng ʒa timhtuahnâk chu nan kê ah bunh hen dîr u.
- ¹⁶Chubang lo khawm chu lungnâk phâw lâk ule, din hen chun chanhtiang fungzum alh kho zawzawng chu nan mih kho lai.

- ¹⁷Chun, ruangsuaahnâk lukhuh leh Thlarau nâmsâu (Pathian thu) chu lâk ule,
- ¹⁸thlachamnâk leh deihnâk kip hen zeiliau zawngah Thlarau a thlacham hen chu leikângah chun mi thenhlimh zawng rangah ðhanemsemsê ngâi tak hen leh deih thlir hen a ringrâwn u.
- ¹⁹Thâwngthâng Ṭha thuthup râłṭha tak a phuang ding hen, ka kê ka âng hen thu simtir a ka um khonâk ding hen ka rangah khawm hawng ka deih piak u.
- ²⁰Chu leikângah chun ka sim ding hâwi chu râłṭha tak a ka sim khonâk ding hen. Chu Thâwngthâng Ṭha rêl rêngkhimh ka si.
- ²¹Sikhawmsele, nannih khawm nih zei hâwi hen ka um, ka thâwngthâng nan theih khonâk ding hen Tukika, Lalpa ah unau duhtak leh rianṭuantu zumhkâi tak nih hin zeizawng a nan theihtir na lai.
- ²²Hi ruang takah hin amah chu nan sinah ka hawng fial asi, kan thâwngthâng nan theih khonâk ding hen leh anih nih hin nan thinlung an lungngamh kho na ding hen.
- ²³Pa Pathian leh Lalpa Jisu Krist thawk hen remnâk leh lungnâk hen zângfahnâk unau tla zawzawng sinah um seh.
- ²⁴Kan Lalpa Jisu Krist chuai lo hen a zângfahtu zawzawng tla sinah dâwnâk um seh.

Philipi

Philipi 1

¹Pawl leh Timothe, Krist Jisu ah to-aw tla nih chun: Krist Jisu ah mi thenhlimh, Philipi khua ah um zawzawng tla sinah, kawhmi hotu tla leh rianṭuantu tla sinah khawm—

²Pathian kan Pa leh Lalpa Jisu sinah thawk hen zângfahnâk leh remnâk nan sinah um seh.

³Ni masachem thawk khan tutiang hen Thâwngthâng Ṭha zanhnâk ah nanna tel bâk ruangah ka nan theih pup na zâwn kipah ka Pathian sinah lâwmthu ka sim tâwn. Nanmah rangah thla ka nan cham piak na nâk kipah lâwm tak hen ka deih rawh.

⁶Nanmah lakah thil ṭha dawmhtu nih khan Jisu Krist ni tiang hen a rangtlingtir vima awt, chu tak chu ka lung thlir ruangah.

⁷Nanmah tla leikângah chu hâwi thinlung put chu kei rangah chun â dawh rerêng asi, ka thinlung ah ka nan siah na ruangah; ka rêngkhimhnâk tla ah Thâwngthâng Ṭha diknâk thu ka simnâk ah leh ka birhtirnâk tla ah khawm, nan ektê hen zângfahnâk chu hawng ka bâwmpitu tla nan si dangâiah.

⁸Krist Jisu siherhnâk ah chun nan ektê hen ka nan ngâi na zia chu Pathian hawng ka theihpitu asi.

⁹Chun, nan zângfahnâk nih theih rangtlingnâk leh fâifimnâk zeizawng ah a nei khunnâk ding hen thla ka cham tâwn hi; chun, Pathian rokualnâk leh sawrnâk dingah Jisu Krist zârah repnâk rah um mi hen hawng khat hen, Krist ni rangah a tak tak leh simsâwi kawp lo nan si khonâk ding hen thil ṭha khun tla chu ṭha nan ti kho lai.

¹²Chun, unau tla, ka tlûnah thil hawng tlung mi tla kha Thâwngthâng Ṭha zanhnâk ding a hawng si thlo lehlam asi ti nan theih ka duh asi.

¹³Chun, ka rêngkhimhnâk tla hi lal in vêngtu kawrsen murui zawzawng leh midang zawzawng sinah chun Krist ruang asi ti a lang rawh.

- ¹⁴Lalpa ah unau tam dauh khawm nih ka rêngkhimh tla ruangah lung thlir hen tih lo hen Pathian thusim leikângah an râl a ðat zia a fâk khun asi.
- ¹⁵Zeimaw mi nih chun nahsuah leh elnâk ruang khawmah Krist thu an phuang tâwn; zeimaw mi nih chun lâwm ruangah an phuang tâwn;
- ¹⁶murui khat nih chun Thâwngthâng Ṭha mawhlonâk thu sim ding hen ruat ka si ti theih hen zângfahnâk ruangah an sim tâwn.
- ¹⁷Murui khat lam nih chun ka rêngkhimh ruangah lawksawngnâk hawng ka sap piak tum hen, a tak silo hen, mah mâisialnâk ruangah Krist thu chu an sim tâwn.
- ¹⁸Zeitin rawh ne? Zeiruang khawm asi lo, thu zeizawng ah a telê hen mawh a tak hen mawh Krist thu sim hen a um rerêng asi; chubang lakah chun ka lâwm le, asi, ka lâwm vima lai.
- ¹⁹chu chu thla nan ka cham piaknâk ruangah leh Jisu Krist Thlarau hawng ka pêk mi ruangah ka ruangsuaahnâk a hawng si awt tih ka theih ruangah, ze lak khawmah mualphotir hen ka um awt lo le, râlṭha tak hen, keimah umdân hâwi nget hen,
- ²⁰tu khawmah nungnâk ruangah mawh thihnâk ruangah mawh ka taksa ah Jisu chawnglawmh hen a um dauh awt ti ka lungumnâk leh ka duhnâk hâwi vima hen.
- ²¹Kei rang chun nung hi Krist asi ruangah, thih khawm dingchangnâk asi.
- ²²Sikhawmsele, taksa nung hi ting mi si sele, chu chu ka rianṭuan rah hâwi si sele, chun a ze mi me ka thîm dauh awt ti lam chu ka theih loh.
- ²³A lâi laklawh ah hin a ngaih nâk theihlo hen ka um ko asi, suak hen Krist sinah um duhnâk ka nei ruangah, chu chu thungâi a ða dauh asi.
- ²⁴Sikhawmsele, nanmah ruangah nung hen um kumza hi a herh dauh asi,
- ²⁵chun chu chu ka lung thlir ruangah ka um kumza awt tih ka theih; asi, lungnâk ah chun nan hawng ṭhangnâk ding leh nanna lâwmnâk ding hen nan ektê sinah ka um kumza awt tih ka theih;

²⁶chun, nan sinah ka um awt ruangah nan ka putsonâk chu Krist Jisu ah a zual khonâk ding hen.

²⁷Zeikhawm si sele, nan umdân chu Krist Thâwngthâng T̄ha hen a êp ta seh, chun, nanmah tla an veh na khawmsele, nan sinah um lo khawmsele thlarau munkhat ah dîr thlir hen thinlung munkhat ah Thâwngthâng T̄ha lungnâk thu chu t̄anh leh t̄uan dut hen,

²⁸dotu tla zei leikâng khawmah lâu lo hen nan um ti nan thâwngthâng ka theih kho lai, chu chu an rangah veihnâk asi ti theihtirnâk fiang tak asi, nannih rang lam chun ruangsuah ding nan si ti theihtirnâk fiang tak asi dauh, chu khawm chu Pathian lakah mi asi.

²⁹Krist ruangah amah nan lung cho si lo hen amah ruangah nan tuar khawm siang asi;

³⁰donâk keimah lakah nan muh tâwn mi, tu khawmah keimah lakah a um ti nan theih mi, chu tak chu nan nei bâk rawh hi.

Philipi 2

¹Chun, Krist ah t̄angpinâk rerêng, zângfahnâk ah lungngamnâk rerêng, Thlarau kawhnâk rerêng, siherhnâk leh zângfahnâk rerêng tla a um chun,

²thinlung munkhat a um hen, zângfahnâk munkhat nei hen, thinlung ah thurual hen munkhat a um hen, ka lâwmnâk rangtlingtir u.

³Zuamchawh leh sung-û tirnâk ruangah zeikhawm ti lo hen, mikip nih nâu tak hen mah ngâk a midang t̄ha dauh ah ruat chiau seh;

⁴mah tâ cho zauh lo hen, midang tâ khawm zauh chiau dauh u.

⁵Hi thinlung, Krist Jisu khawm ah um mi kha nanmah lakah um seh:

⁶Anih nih chun Pathian hâwi a um hen, Pathian tluk ah um chu thil uh tlâk ah a ruat lo le,

⁷minung tla hâwi a hawng suak hen, to-aw hâwi hen â siam le, amah leh amah â nâutir dauh rawh.

- ⁸Chun, minung hâwi a um hen, â nâutir le, thih phah rê hen thu zâwt hen a hawng um rawh, kraws a thihnâk tak chu.
- ⁹Churuang chun, Jisu min hen mikip vân ah um mi tla, tual ah um mi tla, tual tangah um mi tla hen
- ¹⁰anna siksidiânâk ding leh Pa Pathian rokualnâk ding leh "Jisu Krist chu Lal asi," ti hen lei kip nih a phuagnâk ding hen,
- ¹¹Pathian nih anih chu fâk tak hen a chawnglawmh bâk rûl le, min zawzawng ah min chungnungchem chu a pêk rawh.
- ¹²Chun, ka duhtak tla, thu nan zâwt kumza hâwi khan, ka um liau cho ah tuan lo hen, tu ka um lo kar hin ÷uan dauh lehlam hen, lâu leh thir bû hen nanmah ruangsuaahnâk ÷uan u;
- ¹³amah lawmhkâng rangah ti tum ding leh ti ding hen nanmah lakah ÷uantu chu Pathian asi ruangah.
- ¹⁴Sual neilo leh nun tluang tla, thlâk rualo leh simhngâilo tla lakah Pathian fa simsâwi kawp lo tla nan si khonâk ding hen chipchiarnâk leh êlnâk tla um lo hen zeizawng ti u, chubang lakah chun nungnâk chu pêk hen laikulh ah hin chêtirtu hâwi hen nan lang tâwn;
- ¹⁶chun, nabeibâng hen ÷uan khawm ka si lo ruangah Krist ni ah chun putso ding ka nei kho lai.
- ¹⁷Asi, nan lungnâk hâwlnâk leh rian÷uannâk lakah chun tawih hen um menza khawmsele ka lâwm asi, nan ektê hen ka nan lawmhpi ber na.
- ¹⁸Chu hâwi ber hen nannih khawm a lâwm ule, hawng ka lawmhpi bâk u.
- ¹⁹Sikhawmsele, nan thâwngthâng ka theih hen, ka lungngam kho bâk ding hen sâwtlotê nûnah Timothe hi nan sinah fial ding hen Lalpa Jisu ah chun ka lungum asi.
- ²⁰Amah cho hi hawng ka tuarpitu leh an ruat piak tatak natu chu asi.
- ²¹An ektê hen Jisu Krist rangah hâwl lo hen, mah rangah an hâwl tâwn.

²²Sikhawmsele, anih hi chu nik hen a um rawh zia nan theih, fa nih a pa rian a ÷uan hâwi hen Thâwngthâng Ṭha zanhtir leikângah hawng ka ÷uanpi tâwn kha.

²³Chun, ka umdân ding ka theih kê hen anih hi hawng fial sawm sele ka ti asi.

²⁴Sikhawmsele, keimah tak khawm sâwtlotê ah hawng kal ding hen Lalpa ah chun ka ruat thlir asi.

²⁵Sikhawmsele, Epaprodita, ka unaupa, ka rian÷uanpitu, ka kawrsen hâwi leh nan mifial ka thil samphangnâk ah hawng ka tlawmh belhtu hi nan sinah hawng fial herh hen ka theih.

²⁶Anih nih chun nan ektê hen thungâi hen a nan ngâi na le, a dam lo ti nan theih ruangah thungâi a lawksawng.

²⁷Thi viviar a damlo chu asi narêng hen. Sikhawmsele, Pathian nih anih chu a zângfah le, chun amah lâwng silo hen, lawksawng tlûnah lawksawng singsuannâk ka nei lonâk ding hen keimah hawng ka zângfah khawm asi ber.

²⁸Chun, anih hi nan muh nawlh tikah nanna lâwm khonâk ding hen kei ka lawksawng a ÷atvahnâk ding hen khulrang dauh hen ka hawng fial sawm asi.

²⁹Chun, anih hi lâwm tak hen Lalpa ah chun hawng dawng ule, hi bang hâwi mi hi sung-û tir u;

³⁰nan tlawmh-belhnâk a tinh mi mabân chu pehpârnâk ding hen thih ûi lo a ti hen, Krist rian÷uannâk ruangah thi viviar hen a hawng um rawh dangâiah.

Philipi 3

¹A dawngchemnâk ah chum, unau le tla, Lalpa ah chun a lâwm u. Thu a mahmun lîlâ nan sinah rîn nawlh hi kei rangah chun nengtawr a kêi lo, nan rangah a ÷angkâi ruangah.

²Ui tla, fêmtan ding an duhpi natu lakah chun a thiamthih u, thil ÷ha lo titu tla lakah chun a thiamthih u.



- ³Kannih Pathian Thlarau zârah Pathian sawnh leh Krist Jisu putso leh taksa tlûnah rinhsannâk ngauh lotu tla hi fêmtan tla kan si dauh asi.
- ⁴Duh châng sele chu kei khawm taksa lakah rinhsannâk ngauh kho ka si. Midang rerêng nih taksa lakah rinhsannâk nei hen anna ruat chiau chun kei ka ruat khun asi;
- ⁵ni riat ni ah fêmtan, Israel thlâk lakah mi, Benjamin chi, Hebrai mi tak lakah suak ka si; Dân leikângah chun Farisai ka si;
- ⁶thanemsemsê leikângah chun kawhmi tla nehsawhtu ka si. Mi nih dân thupêk zûl hen, mirep an sinâk ah chun, kei khawm sâwi ding ka um lo.
- ⁷Sikhawmsele, kei rangah dingchang ding vial chu chubang chu Krist ruangah dawknâk ah ka ruat asi;
- ⁸asi chiammâm, ka Lalpa Krist Jisu theihnâk rokual khun ruangah thil zeizawng khawm dawknâk ah ka ruat asi; amah ruangah thil zeizawng ka dawknâk ah ka ruat le, chubang chu thanawmrawpâi tluk cho ah ka ruat le,
- ⁹Krist ka ting khonâk ding leh mah repnâk (Dân lakah repnâk chu) nei lo hen, Krist lung ruangah repnâk (Lung ruangah Pathian lakah repnâk chu) nei dauh hen, amah lakah um ka si khonâk ding hen;
- ¹⁰a thihnâk va bangh a thi hen, amah hen a thawknawlhnâk thiltikhonâk hen, a tuarnâk tla bâwmpinâk hen, ka theih khonâk ding hen;
- ¹¹mithi lakah mi thawknawlhnâk chu ka ting kho ram lai mawh ti hen.
- ¹²Ka ting rawh ka ti mi lam chu asi lo le, rangtling ka si khawm ka ti mi si lo, "Krist nih a ka tleih san chu ka tleih kho lai mawh," ti hen a thâwl hen ka thâwl dauh asi.
- ¹³Unau le tla, tleih hen ka ruat lo. Sikhawmsele, hi thu pakhat hi ka ti tâwn--dung leiah thu um tla chu philh hen, mâi leiah thu um tla chu ti hen,
- ¹⁴Krist Jisu ah Pathian tlûnlei kawhnâk san lâwmmann tawng ding hen, tiamhnâk lei chu ka fûk rarâm asi.

¹⁵Chun, Thlarau ah upa vial chu hâwi thinlung put hen kan um lai; chun zeikâng khawmah thinlung dang put nan si chun, chu khawm chu Pathian nih a nan theihtir na lai.

¹⁶Zeikhawm si sele, kan kal dân kêl hen kan kal lai rih.

¹⁷Unau le tla, ka umdân zûltu hawng si u, chun zauhtawnh ding kanmah nan kan nei le chu hâwi vima um tla chu ̣ha hen zauh u.

¹⁸Mi tamtak an kal le, chu tla chu Krist kraws mêlma an si hi an thâwngthâng kan simh nget na mi kha, Tuah khawm ̣ap bû hen kan simh na hi;

¹⁹chubang tla dawngnâk chu veihnâk asi, an pathian chu taksa duhnâk asi, anna khâwngnâk chu an mualphonâk asi, laikulh thu tla an duh tâwn asi.

²⁰Kannah lam chu kan khawsaknâk chu vân ah asi; chu thawk ber chun Ruangsuahtu Lal Jisu Krist chu kan ngâk kumza asi.

²¹Anih nih chun a ̣uan hen zeizawng khawm amah thu thu hen a umtir kho, chu ̣uan zia hâwi vima hen kan taksa chaklo tak hi, amah taksa rokual hâwi a um ding hen a siam nawlh lai.

Philipi 4

¹Churuangah, ka unau duhtak leh ngâi tak, ka lâwmnâk leh ka lallukhuh tla, chu hâwi chun Lalpa ah bir tak hen dîr u, ka duhtak tla.

²Lalpa lakah chun thinlung munkhat put ding hen Eudia ka ngiar le, Suntuki khawm ka ngiar ber asi.

³Asi, nang khawm ka liangbat bahpitu tatak, ka nan sâwm bâk, kha nunau tla kha ̣angpi rawh. Thâwngthâng ̣ha ah chun hawng ka ̣uanpi tâwn le, Klemen hen, ka ̣uanpi midang nungnâk bu ah min chuang tla hen khan.

⁴Lalpa ah chun a lâwm kumza u. Ka ti nawlh lai, a lâwm u.

⁵Nanna dawnhkho zia mi zawzawng theih si seh; Lalpa chu a nâi asi.

⁶Zei lak khawmah lawksawng lah u; zeizawng ah thlacham leh deih hen, lâwmthusim tel vima hen, nan duhnâk tla chu Pathian sinah theihtir hen um dauh seh.



⁷Chun, Pathian lungngamhnak thinlung rerêng theih châwk lo ni khan, nan thinlung leh nan dawnruatnâk tla chu Krist Jisu ah chun a nan vêng piak na lai.

⁸A dawngchem ah chun, unau le tla, a dik mi zawng, zah a kêi mi zawng, â rep mi zawng, a thenhlimh mi zawng, duh a kêi mi zawng, a thang dawh mi zawng, thatnâk rerêng a um hen sawr tlâk rêng a um chun chubang chu dawnruat u.

⁹Nan thil sîn tla, nan thil tawng tla, nan thil theih tla, keimah lakah nan thil muh tla khawm kha bang hâwi ti tâwn u; chun lungngamnâk Pathian ni chun a nan umpi na lai.

¹⁰Sikhawmsele, thilpêk nan hawng ka ruatpiaknâk tla chu tuah nan hawng tharh nawlh ruang hin Lalpa ah chun thungâi ka lâwm asi; chu leikâng chu ruat lam chu nan ruat chiammâm ngâk, tik dêngkhâwng nan tawng lo ruangah cho asi.

¹¹Ka samphâng mi thu sim lam chu ka si lo le, kei lam chu zeî hâwi tal hen um khawmsele lungâwi vima ka awt rawh.

¹²Nâu tak hen umdân ka thiam le, nei hen umdân khawm ka thiam ber, thil zeizawng lakah leh thil zawzawng ah khawp leh sungvâng a umdân, neih leh samphâng hen umdân thuthup chu ka theih rawh.

¹³Krist hawng ka chaktirtu ah chun zeizawng ka ti kho asi.

¹⁴Sikhawmsele, ka lawksawngnâk tla ah hin nan ka lawksawngpi hi a tha asi.

¹⁵Chun, nannih Philipi mi tla, Thâwngthâng Tha tlung tîr liauah, Makedonia ram thawk hen ka suak liau khan, nanmah cho lo chu Kawhmi murui pakhat khawm nih thilpêk leh tingvo leikângah chun an ka tângpi lo ti nanmah tak nih nan theih bâk.

¹⁶Thesalonika khua ah ka um liau khawm khan ka samphângnâk tângpi ding hen veikhat cho silo hen veinih tiang nan hawng kuat kha.

¹⁷Thilpêk lam chu hâwl ka si lo le, rah, nanmah leikângah pungtir ding chu hâwl ka si dauh.

¹⁸Sikhawmsele, zeizawng ka nei le, ka si â rem rawh. Epaprodita kut ah thil nan ka kuat mi tla chu ka tawng le zeï ka ngâi lo rawh. Chubang chu zeilo rimthâw rim, bâwlnâk sâng tlâk Pathian lawmhkâng asi.

¹⁹Chun, ka Pathian nih chun Krist Jisu ah a rokualnâk chawng zia hâwi vima hen nan samphangnâk zeizawng khawm an ɽangpi na lai.

²⁰Chun, Pathian kan Pa sinah chun zungzâl hen rokualnâk um seh. Amen.

²¹Krist Jisu ah mi thenhlimh kip chibai hawng ka bûk piak na u. Ka sinah unau um tla nih hin chibai a nan bûk na.

²²Mi thenhlimh zawzawng nih chibai a nan bûk na, Kaiser in ah um mi tla nih hin an bûk dauh chem na.

²³Lalpa Jisu Krist zângfahnâk chu nan thlarau sinah um seh.



Kolosa

Kolosa 1

¹Pawl, Pathian duhzia hen Krist Jisu mifial leh Timothe kan unau nih chun--

²Kolosa khua ah Krist ah mi thenhlimh tla leh unau zumhkâi tla sinah chun: Pathian kan Pa thawk hen zângfahnâk leh remnâk nan sinah um seh.

³Vân ah nan rangah lungumnâk an siah piak na ruangah, Krist Jisu nan lung zia leh mi thenhlimh tla tlûnah zângfahnâk nan nêi zia kan hawng theihnâk thawk hen chun nan rangah thlacham kumza hen Pathian kan Lal Jisu Krist Pa sinah chun lâwmthu kan sim tâwn, chu lungumnâk thâwngthâng chu a lânah, Thâwngthâng T̄ha thudik thu ah khan nan theih rawh.

⁶Chu Thâwngthâng T̄ha chu laikulh zawzawng ah rah hen a pung vima hâwi hen nan sinah a tleng kha. Chu hâwi ber hen, Epaphra kan to-aw hâwi duhtak lakah nan châwng hâwi hen, thungâi tak hen Pathian zângfahnâk chu nan ngâi hen nan theih ni thawk khan, nanmah lak khawmah rah hen a pung vima tâwn asi.

⁸Epaphra hi kan ruangrûl ah Krist rianṭuantu zumhkâi tak asi le, anih nih hin Thlarau ah nan zângfahnâk chu hawng kan simh.

⁹Churuang chun, Thlarau finghnâk leh theihkhonâk zawzawng leikângah amah duhzia theih rangtlingnâk ah chun nan hawng khat khonâk ding hen, kan theih ni thawk hen chun kannih khawm nih thlacham hen kan deih piak na mi kan bâng lo.

¹⁰Chun rianṭuan kipah rah hen Pathian theih rangtlingnâk ah mavua dadauh hen lâwm tak a felfênâk leh dawnhkhonâk kip nei kho ding hen a rokualnâk chak zia hâwi vima a chaknâk kipah chak hen, Pa, chêu ah mi thenhlimh tla ro chu bâwm bâk tlâk a hawng kan siamtu sinah chun lâwmthu simh hen zeizawng lakah amah lungâwitir ding hen Lalpa zûl tlâk hen nan um kho lai.

¹³Anih nih chun mûi thuneihnâk lakah mi hawng kan suah hen a Fapa zângfah tak ram ah hawng kan ṭhial rawh le;

¹⁴amah lakah kan tlanhnâk kan tawng asi--kan sual tla ngaihdamnâk chu.

¹⁵Anih chu muh kho lo Pathian banghpi thilsiam zawzawng ngâk a sâng hen suak masachem chu asi;

¹⁶amah lakah chun zeizawng siam asi le, vân ah um tla, tual ah um tla hen, muh kho tla, muh kho lo tla hen, Thlarau thiltikhonâk tla khawm lâirêtu tla khawm lalnâk tla khawm, thuneihnâk tla khawm, Pathian nih laikulh pumpi hi amah ruangah leh amah rangah a siam mi asi.

¹⁷Krist chu zeizawng um lânah um mi rawh asi, amah lakah chun zeizawng munkhat dut hen a dîr.

¹⁸Anih chu a taksa, kawhmi lû asi; zeizawng ah chungnungchem a hawng si khonâk ding hen, a bulpi, mithi lakah mi suak masachem chu asi.

¹⁹Pathian rangtlingnâk kip chu amah Fapa lakah a um kumza le, a kraws thisen nih chun remnâk siam hen, amah lakah chun zeizawng amah hen remtir hi, Pathian lungsi kâng tak asi; amah lakah chun tual ah thil um tla khawm, vân a thil um tla khawm amah hen remtir hi.

²¹Chun, nannih a lânah nan thilsual ti ruangah khan amah lakah mi ðhen hen nan um le, nan thinlung ah mêlma nan hawng si kha, sikhawmsele, tuah lam chun, a mâika ah thenhlimh tak leh simsâwi um lo leh simsâwi kawp lo hen a nan dîrtir na ding hen, a taksa thihnâk ruangah chun amah hen a nan remtir na rawh asi;

²³ngauhsan nei hen bir tak a um hen, Thâwngthâng T̄ha nan theih mi lungumnâk thawk hen a ðhial lo hen, lungnâk lakah hin nan um thlir chun chu Thâwngthâng T̄ha chu vânrâng tangah thilsiam zawzawng tla lakah phuang asi kha; kei Pawl hi chu rianṭuantu ah siam ka si.

²⁴Tuah ka nan tuar piak na mi lakah hin ka lâwm, Krist hamh tuar mabân chu ka taksa ruangah ka tîttak ah hin ka zulhpeh vima asi;

²⁵a taksa chu kawhmi hi asi. Pathian thu kim tak a sim ding hen zauhkhenhnâk nan Pathian nih nan rangah hawng ka pêk hâwi vima hen chubang tla rianṭuantu ah siam ka si.

²⁶Chu Pathian thu chu zungzâl leh thlâk um thawk hen thuthup â thup mi kha asi; tu lam chun a mi thenhlimh tla sinah langhtir hen a um rawh.

²⁷Chubang na sinah chun chu thuthup rokualnâk chawng zia chu Pathian nih theihtir a duh rerêng asi; chu thuthup chu Krist nanmah lakah um mi rokualnâk lungumnâk san chu asi;

²⁸mikip Krist ah chun ða rangtling a kan dîr khonâk ding hen, mikip simhfâi hen, mikip finghnâk kip a sîntir hen a thâwngthâng kan sim tâwn mi hi,

²⁹chubang hâwi a dîrtir kho ding hen fâk tak hen keimah lakah a ðuan mi, chu a ðuan zia hâwi vima hen ti rarâm hen hamh tak hen ka ðuan tâwn asi.

Kolosa 2

¹Nanmah tla leh Laodikei khua um tla leh taksa ah ka mêl muh lo mi vial tla rangah zeî ti tluk a fâk hen me kan ðuan piak na mi hi nan theih ka duh asi.

²Chun, Pathian thuthup finghnâk leh theihnâk ro zawzawng thuhnâk Krist chu an theih khonâk ding hen, theih a lung thlirnâk neihnâk zawzawng chu ting ding hen zângfahnâk ah a sih dut hen, an thinlung tla chu lungngam hen a um kho lai.

⁴Âukhawm nih thusim thiam hen an perpet na lonâk ding hen chubang chu ka ti asi.

⁵Taksa hen nan sinah um lo khawmsele, lâwm tak hen nanna rep zia leh Krist nan lung birh zia zauh hen, thlarau ah chun nan sinah ka um asi.

⁶Churuangah, Krist Jisu, Lalpa chu nan lawmh hâwi khan, amah lakah ram thlâk leh dirh hen sangh dadauh a um hen, an sîntir na hâwi khan nan lungnâk ah chun bir tak a um hen, lâwmthusim nei tam hen amah lakah chun um u.

⁸Thiamthih u, chu lo chun âuzawng nih Krist thu hâwi silo hen, minung thurovuih leh laikulh thlarau tla lâirêlnâk hâwi dauh hen an thufing leh perpetnâk salam hen râl lâk hen an lâk na lebang lai.

- ⁹Amah lakah chun Pathian rangtlingnâk zeizawng chu taksa nei hen a um kumza.
- ¹⁰Amah lakah chun nan rangtling rawh le; anih chu lalnâk leh thuneihnâk zawzawng lû asi.
- ¹¹Krist fêmtannâk ah chun taksa tîttak lît ver hen amah lak ber ah kut a fêmtan silo hen fêmtan nan si kha;
- ¹²baptisnâk ah khan a sinah phûm nan si bâk rawh le, chu lak ber ah chun mithi lakah mi amah thawhtu Pathian rianṭuan lung ruangah a sinah thawh nan si bâk kha.
- ¹³Chun, nannih buarnâk tla leh nan taksa fêmtan lonâk ruangah thi nan si le, nanmah ngelchel chu amah hen a nan nungtir na asi kha;
- ¹⁴kan buarnâk zawzawng hawng kan ngâihdam le, batnâk lasui thupêk a rîn mi kan tlûnah um mi hawng kan kham tâwn chu a veih rawh asi: chu tak chu Kraws a khenhbêk hen a dangah a siah rawh.
- ¹⁵Chun, lalnâk leh thuneihnâk tla chu lît hen, chu Kraws lakah chun chubang tla chu neh hen, langngân hen theihtirnâk ah a mang rawh.
- ¹⁶Chun, ei thu ah mawh, din thu ah mawh, kût ni thu ah mawh, thla thar thu ah mawh, Dinhni thu ah mawh âukhawm nih an simsâwi lah na seh;
- ¹⁷chubang tla chu thil hawng tlung ding mi thlâpelê asi, a tak lam chu Krist asi.
- ¹⁸Âukhawm mah duh thu ko a dawnhkhonâk leh vânmifial sawnahnâk mang hen nan lâwmman chu a nan suh lah na seh, an thil muh tla lakah chun um kumza hen, an taksa lei thinlung ruangah a zûm salam hen, Lû chu tleih thlir ṭung lo hen an um.
- ¹⁹Amah zârah chun taksa pumpi chu pehnâk leh phuarnâk tla ruangah châwm leh tlâi dut a um hen, Pathian nih ṭhang ding a duh mi hâwi hen a ṭhanglian tâwn.

²⁰Laikulh thlarau tla lâirêlnâk chu Krist sinah an thih tâk rawh chun, zeirangah me laikulh ah nung ko hâwi hen, minung thutiam leh sîntirnâk,

²¹"Tawnggh tawnggh lah le, tem khawm tem lah, tham khawm tham lah" ti hâwi a thupêk tla lakah hin nanna pumpêk ne?

²²Chubang hâwi thil zawzawng chu mang hen veih ding asi.

²³Chubang thil tla chu, mah duh hâwi hen sawnh leh ngâiniamnâk leh taksa repnâk lakah chun ti ding mi hâwi hen a lang ngâk, sikhawmsele, taksa duhkâng khap leikângah chun zeikhawm a ðhavak loh.

Kolosa 3

¹Chun, Krist sinah thawh hen nan um bâk rawh chun, tlûnlei mi, Pathian vawrhlei ah to Krist umnâk ah thil um tla chu hâwl u.

²Tlûnlei ah thil um lakah chun nan thinlung siah thlir u, tual ah thil um tla lakah chun siah lo hen.

³Nan thi rawh le, nan nungnâk chu Pathian lakah Krist sinah thuh hen a um rawh ruangah.

⁴Krist kan nungnâk chu a hawng a langh tikah chun nannih khawm amah sinah rokualnâk ah nanna langh bâk lai.

⁵Chun, nan taksa ðeng tual a um tla hi thah u, duhnâk, nâwmtâmânâk, hurnâk, duhnâk soal, duhlel hamkah tla hi, hamkahnâk hi ruksawnhnâk asi;

⁶chubang thil ruangah asi Pathian thinthawknâk chu lunglo fa tla tlûnah a tlung tâwn mi chu;

⁷nannih khawm a lânah chubang thil tla lakah nan nung liau khan, chubang lakah nan um tâwn kha.

⁸Tu lam chun nannih khawm nih hi bang zawzawng sîrleihnâk, thinthawknâk, huatnâk, simsiatnâk nan kê lakah suak kangal thu tla hi thlah u, âwkrâwl a simhtawnh lah u; minung li chu a thilti hen nan lît rawh le,

⁹minung thar hen nanna thum rawh dangâiah,

- ¹⁰chu minung thar chu theih rangtlingnâk nei ding hen a siamtu bangh a siamthar hen a um liau chir asi;
- ¹¹chu lak chun Greek mi leh Juda mi, fêmtan leh tan lo phundang tla, Skuthia mi tla, sal tla, sal lo tla khawm a um lo; Krist chu zeizawng si dauh hen zeizawng ah a um ber asi.
- ¹²Chun, Pathian mi thîm, mi thenhlimh leh duhtak tla hâwi hen siherhnâk thinlung tla, vêlneihnâk thinlung tla, ngâiniamnâk tla,
- ¹³dawnhkhonâk tla hen a thuam u, âuzawng nih âu lak zawngah thupawi nei ule, a dawnhtawnh hen a ngaihdam tawnh ule, Lalpa nih a nan ngaihdam na hâwi hen khan a ngâihdam u.
- ¹⁴Chun, chubang zawzawng lakah chun zângfahnâk nei u, chu chu phuar rangtlingnâk asi.
- ¹⁵Chun, Krist remnâk nih chun nan thinlung ah lâirêl seh, chubang hâwi si ding hen taksa pumkhat ah kawh nan si rerêng asi; lâwm ding dan theih u.
- ¹⁶Krist thu chu finghnâk kip hen nanmah lakah um chiauh seh; sawrnâk la tla, Pathian la tla, Thlarau lei la tla a sîntir hen nun a simhtawnh ule, thinlung zângfahnâk nei hen Pathian chu la sak piak u.
- ¹⁷Chun nan ti mi zawng chu thusim lakah mawh, thilti lakah mawh amah zârah Pa Pathian sinah lâwmthu sim bû hen Lalpa Jîsu min hen ti ver u.
- ¹⁸Nupi le tla, Lalpa lakah a dawh tâwk hâwi vima hen nan pasal le sinah a pumpêk u.
- ¹⁹Pasal le tla, nan nupi le tla zângfah ule, an lakah râng lah u.
- ²⁰Ngâksia le tla, zeizawng ah nan nu leh pa thu zâwt u, chu chu Lalpa lakah lawmh a kâi asi.
- ²¹Pa le tla, nan fa le tla thinrunhtir lah na u, chu lo chun an lung a dawng lebang lai.

²²Sal le tla, taksa a nan hotu le thu hi zeizawng ah zâwt u, minung lawmhtirtu tla hâwi cho hen mit rianṭuan lo hen thinlung pakhat put hen Lalpa ṭih bû hen zâwt dauh u.

²³A rulhnâk, ro ting ding chu Lalpa sinah thawk hen nan tawng awt ti theih hen, nan ti mi vial chu minung rang hâwi a ti lo hen, Lalpa rang hâwi a ti dauh hen, lung thawk tak hen ti u; Lalpa Krist rian nan ṭuan asi hi.

²⁵Thil diklo titu nih chun a thilti diklo man chu a tawng nawlh lai; Pathian nih mikip chu bang ver hen lâi a rêl ruangah.

Kolosa 4

¹Hotu le tla, nannih khawm nih vâh ah hotu nan nei ti theih hen, nan sal tla tlûnah a rep leh dawh tâwk chu ti u.

²Thlacham vima ule, chu lak chun lâwmthu sim bû hen ruat tet u.

³Hawng ka phuarnâk san Krist thuthup chu phuang ding hen Pathian thu sim ding hen lampi hawng kan awng piak ding hen kannih khawm thla hawng kan cham piak bâk u.

⁴Ka sim ding hâwi a ka sim khonâk ding hen.

⁵Tik dengkhâwng hâwi vima hen lênglei mi le tla lakah chun fing tak hen um u.

⁶Mikip zei hâwi sâng chiau ding me asi ti nan theih khonâk ding hen nan kê suak chu ngâi tlâk, zângfahnâk tel si kumza seh.

⁷Lalpa ah unau duhtak, rianṭuantu zumhkâi kan to-aw hâwi Tukika nih hin ka thâwngthâng zawzawng a nan theihtir na lai.

⁸Hi ruang tak hin anih chu nan sinah ka hawng fial asi, kan thâwngthâng nan theih khonâk ding leh nan thinlung an lungngamh kho na nâk ding hen.

⁹Onesimus unau zumhkâi leh duhtak nanmah lakah mi hen. Annih tla nih chun hi leiah thil umzia zawzawng hi an theihtir na lai.

¹⁰Aristarka ka rêngtlapi hâwi nih hin chibai a nan bûk na; Mark, Barnaba tupa khawm nih chibai a nan bûk na, (amah thu ah thupêk tla nan theih kha; nan sinah a hawng kal chun hawng lawmh u):

¹¹Jisu, Zusta an ti mi nih hin chibai a nan bûk na bâk. Chubang chu fêmtan mi an si le, chu cho chu Pathian ram thu leiah chun ka ÷uanpi mi, hawng ka lungngamhtu an si.

¹²Epaphra nanmah lakah mi, Krist Jisu to-aw nih hin chibai a nan bûk na. Anih nih chun Pathian duhzia zawng upat leh lung thlirnâk nei hen nan dîr khonâk ding hen a thlachamnâk tla ah chun nanmah tla rangah â ÷ang kumza tâwn asi.

¹³Nanmah tla rangah, Laodikei khua tla rangah leh Hirapoli khua ah um mi tla rangah thungâi semsê a ngâi ti ka theihpi asi.

¹⁴Luk doktor leh Dema nih hin chibai a nan bûk na.

¹⁵Laodikei khua unau um tla kha chibai hawng ka bûk piak u; Nimpha leh a in ah kawhmi anna pûm mi tla chu chibai hawng ka bûk piak bâk u.

¹⁶Chun, hi lasuikwat hi nan lakah nan rêl nûnah Laodikei kawhmi tla lakah khawm rêltir na bâk u; nannih khawm nih Laodikei khua ah mi kha hawng rêl bâk u.

¹⁷Chun, Arkipa sinah khan rian÷uannâk Lalpa lakah na tawng mi kha dih ding hen fîmkhur rawh ti u.

¹⁸Kei, Pawl nih, keimah kut ngelchel hen chibai ka nan bûk na nâk ka rîn mi asi hi. Ka rêngkhimh tla hi theihkumza u. Zângfahnâk nan sinah um rawh seh.

1 Thesalonika

1 Thesalonika 1

¹Pawl, Silas leh Timothe nih chun: Pa Pathian leh Lalpa Jisu Krist ah Thesalonika khua mi kawhmi tla sinah: Zângfahnâk leh remnâk nan sinah um seh.

²Kan Pathian leh Pa mâika chun, lung ruangah nan thilti zia tla, zângfahnâk ruangah nan ÷uan zia tla, kan Lalpa Jisu Krist lungumnâk ruangah nan felfê zia tla kha philh lo a theih kumzâ hen, kan thlachamnâk tla ah chun nan min lam hen nanmah tla zawzawng ruangah Pathian sinah lâwmthu kan sim tâwn asi.

⁴Pathian ah duhtak le tla, a nan thîm na zia kha kan theih le,

⁵kha hâwi hen kan Thâwngthâng Ṭha chu thu cho hen nan sinah a tung lo le, thiltikhonâk leh Thlarau Thenhlimh leh thungâi tak a theihfiangnâk hen a hawng tung dauh kha; nanmah kawngkâ ruat hen zeî hâwi mi me kan si ti nan theih asi.

⁶Chun, thu chu hamhnâk tuar bû hen, Thlarau Thenhlimh ah lâwm hen nan pawm le, kanmah leh Lalpa châwngtu nan si.

⁷Chun Makedonia leh Greek ram ah lungtu zawzawng tla rangah zauhtawnhnâk nan hawng si kha.

⁸Lalpa thu chu nanmah tla thawk hen a hawng zan rawh le, Makedonia leh Greek ram ah cho silo hen, mun kipah khawm Pathian leiah nan lung zia chu a thang rawh le; chun, kannih nih zeikhawm sim ding rerêng a ngâi lo rawh.

⁹Anmah tla ngelchel nih nan lakah zeî hâwi sunhsaknâk me kan tawng kan thâwngthâng chu an theihtir na tâwn; Pathian nung leh dik tak rianṭuan ding leh a Fapa Jisu thihnâk lakah mi a thawh mi leh Pathian thinrunhnâk hawng tung ding lakah hawng kan ruangsuahthu Jisu kha vâna mi ngâk ding hen, ruk tla chu, Pathian leiah nan hawitâk zia khawm kha an theihtir na ber tâwn asi.

1 Thesalonika 2



- ¹Unau le tla, nanmah kan veh na nâk kha a thawt lo, ti nanmah ngelchel nih nan theih asi;
- ²a thawt ngangâk hen, chu lân chun nan theih rawh hâwi hen Philipi khuah ah hamh tuar leh ningzakkâi tak hen siam kan si nûn khan nawk tak bû khawm hen Pathian Thâwngthâng Țha nan sinah sim ding hen kan Pathian lakah chun kan râl a Țha lehlam kha.
- ³Kan thusim hi âwkrâwl lakah suak asi lo le, nâwmtâm lakah suak khawm asi lo, ngamlêmnâk hen khawm asi lo;
- ⁴Thâwngthâng Țha kiltir ding hen Pathian nih Țha hawng kan ti hâwi hen, minung lawmhtir ding hâwi si lo hen, kan thinlung niktû Pathian lawmhtir dauh hen thu kan sim dauh tâwn asi.
- ⁵Zeiliau khawmah sawr telê nâk mawh, hamkah phenhnâk mawh kan mang mi an theih dah loh ti nan theih kha,
- ⁶Pathian hawng kan theihpitu asi; Krist mifial ka si ruangah mi rangah tuar har tak sikhawmsele, minung lakah, nannih lak khawmah midang lak khawmah chawnglawmhnâk kan hâwl mi an theih dah loh.
- ⁷Nu nih nau a pawm mi a dâwt hâwi hen nan lakah nunnêm tak hen kan um dauh kha.
- ⁸Chu hâwi ber hen, kan duhzia tak nan hawng si rawh ruangah khan kan duh Țualmâl na, Pathian Thâwngthâng Țha cho silo hen, kanmah nungnâk khawm an pêk na rê kan huam.
- ⁹Unau tla, kan rianȚuan hamhzia leh kan rianȚuan dît zia kha nan theih ko kha; nan lakah âukhawm kan rittir na lonâk ding hen a sûn a zân Țuan hen Pathian Thâwngthâng Țha kan simh na tâwn kha.
- ¹⁰Nannih lungtu tla tlûnah thenhlimh tak leh rep tak leh simsâwi kawp lo tak a kan um zia kha hawng kan theihpitu tla nan si, Pathian hen.

¹¹Amah ram leh rokualnâk ah an kawh natu Pathian mi si tlâk a nan um khonâk ding hen, pa nih a fa tla tlûnah a ti hâwi hen, fawrh leh lungngamh leh an theihtir na hen nanmah lak chiauah kan ti chiauh na zia nan theih kha.

¹³Hi ruang hin bâng lo hen Pathian sinah lâwmthu kan sim tâwn, Pathian thu kanmah thawk hen nan theih mi, nan zûl liau khan minung thu zûl hen nan zûl lo le, Pathian thu zûl hen nan zûl dauh ruang khan; chu chu Pathian thu asi rêng, nanmah a lungtu sungah ÷uan tâwntu ber chu asi.

¹⁴Unau le tla, Judai ram ah Pathian kawhmi murui Krist Jisu a um mi tla châwngtu nan hawng si kha, annih nih Juda tla lakah an tuar hâwi khan, nannih khawm nih nanmah ram mi tla lakah nan tuar bâk asi,

¹⁵chubang Juda tla nih chun Lalpa Jisu leh khuavâng tla khawm an thah le, kannih khawm hawng kan nar le, Pathian an lawmhtir lo, mi zawzawng an kalh tâwn;

¹⁶ruangsuaah an si khonâk ding hen Phundang tla sinah thusim an khap tâwn; an soal tahnâk khattir tâwn ding hen: Sikhawmsele, thinrunhnâk chu dawng rît hen an tlûnah a hawng tlung rawh.

¹⁷Sikhawmsele, unau le tla, sâwtlotê rangah nanmah tla hen thinlung leikângah a ÷hen lo hen, mêl cho a muh lo hen kan um rih ruangah duh ûk bû hen nan mêl muh ding hen thungâi kanna ÷ang asi!

¹⁸Nan sinah hawng kal kan tum thlir le, kei Pawl ngelchel khawm nih hin veinih tiang hawng kal ka tum ngengê rawh, sikhawmsele, Setan nih hawng kan kham tâwn asi.

¹⁹Kan lungumnâk mawh, kanna lâwmnâk mawh, kan lallukhuh putso mawh zei me asi ne? A hawng tikah kan Lalpa Jisu mâika ah chun nanmah ngelchel nan si awt mi asi lo ma?

²⁰Nanmah tla hi kan putso na mi leh kanna lâwmnâk nan si.

1 Thesalonika 3

- ¹Chun, kan tuar kho lo rawh nûnah chun Athen khua ah kanmah cho mâk hen um sele ̣ha kan ti le,
- ²Timothe, kan unaupa Krist Thâwngthâng ̣ha leiah Pathian riaṇuantu hi, an birhtir na ding leh lungnâk leiah lungngamh na ding hen, kan hawng fial asi.
- ³Hi bang hamhtuarnâk ruang hin âukhawm anna nîn lonâk ding hen, hi bang hi tuar ding hen ruat kan si ti nanmah ngelchel nih nan theih.
- ⁴Nan sinah kan um liau khan hamhtuar ding kan si ti kan simhkan na rawh kha; chu hâwite hen a hawng tlung rawh ti nan theih kha.
- ⁵Churung chun ka tuar kho lo nûnah, lêmtu nih chun an thlûk na lebang lai le, kan ̣uan hamhnâk chu a thawt lebang lai ti hen, nan lung zia ka theih khonâk ding hen mi ka hawng fial asi.
- ⁶Sikhawmsele, Timothe chu nan sin thawk hen tuah kan sinah a hawng tlung hen, an muh na ding kan duh hâwi hen thungâi hawng kan muh ding duh hen zângfah tak hen hawng kan theih tâwn tih thu leh, nan lungnâk leh zângfahnâk thâwngthâng lawmhkâi hawng kan put.
- ⁷Churung chun, unau tla, kan lawksawng leh hamhnâk zawzawng ah, nan lungnâk ruangah nan tlûnah lungngam tak hen kan um rawh.
- ⁸Tu chun kan nung rawh, Lalpa lakah bir tak hen nan dîr chun.
- ⁹Nan mêl kan muh khonâk ding leh nan lungnâk leiah nan samphângnâk kan chereh kho na nâk ding hen
- ¹⁰a sîn a zân hen thungâi tak a thlacham hen, kan Pathian mâika ah nan lakah kanna lâwmnâk zawzawng ruang hin nanmah leikâng thu ah Pathian sinah zeî lâwmthu me kan sim rûl kho bâk lai aw?
- ¹¹Chun, kan Pathian, kan Pa tak nih chun, kan Lalpa Jisu khawm nih, nanmah leikângah hawng kan rui seh!
- ¹²Chun, nanmah leikângah zângfahnâk kan nei hâwi hen, nanmah leikângah zângfah tawnhnâk leh mi zawzawng leikângah zângfahnâk chu Lalpa nih chun an pungtir piak na hen an chawngtir na seh.

¹³Chun, kan Lalpa Jisu a mi thenhlimh zawzawng tla hen a hawng kal tikah, kan Pathian leh kan Pa mâika ah nan thinlung tla thenhlimhnâk leikângah simsâwi kawp lo hen a nan birhtir kho na lai.

1 Thesalonika 4

¹Chun, unau le tla, a dawngchem ah chun, nan umdân ding leh Pathian nan lawmhtir ding dân tuah nan umdân hâwi hi kan sinah mi nanna ting hâwi khan nan châwng khunnâk ding hen Lalpa Jisu ah kan ngiar na hen kan fawrh na asi.

²Lalpa Jisu zârah zeî thu tla me kan pêk na nan theih kha.

³Pathian duhzia nan thenhlimhnâk ding chu hi hi asi, duhnâk hi bâng tâk ule;

⁴Pathian theihlo Phundang tla hâwi hen hur-khuang leikângah duh lo hen thenhlimh leh chawnglawmh hen mah nupi kil thiam chiau seh;

⁶chu leikângah chun âukhawm nih buar hen a unau lakah thil tha lo ti lah seh; Lalpa chu chu hâwi thil titu zawzawng Lehrûl samtú asi ruangah kannih khawm nih kan simkan hen ka nan theihtir na rawh hâwi khan.

⁷Pathian nih nâwmtâm ding hen a kan kawh lo le, thenhlimh ding hen hawng kan kawh dauh asi.

⁸Churungah, a siarlotu nih chun minung a siarlo asi lo le, Pathian, a Thlarau Thenhlimh a nan pêk tâwn natu siarlo mi asi dauh.

⁹Khawmsele, unau tla, dâwt leikâng thu chu rîn piak nan herh lo, a dâwt tawnh ding hen nanmah ngelchel Pathian sîntir hen nan um ruangah.

¹⁰Makedonia ram ah unau um tla zawzawng tlûnah chu chu nan ti bâk asi. Sikhawmsele, unau tla, nan châwng khunnâk ding leh dâi dauh hen um leh, mah thilti leh thu kan pêk na mi hâwi khan kut hen tûan nan tum thlirnâk ding hen kan fawrh na asi;

¹²chun lênglei mi tla tlûnah dawh tak hen nan um kho lai le, zeikhawm nan samphang kho lai loh.

¹³Sikhawmsele, unau tla, midang lungumnâk rerêng neilo tla hâwi a nan lawksawng lonâk ding hen, thi mi tla thâwngthâng nan theih loh ka duh lo.

¹⁴Jisu a thi le, a thawknawlh rawh ti kan lung t̄ung chun Jisu lakah thi mi tla chu Pathian nih amah rual hen a hawngpi na bâk lai.

¹⁵Hi hi Lalpa thu hen nan sinah ka sim asi, kannih Lalpa hawng kal tiang a nung hen um rih mi tla nih hin a thi mi tla chu kan lehkhanh rîlmâl lai lo ti hi.

¹⁶Lalpa tak chu âu hâu hen, vânmifial chungnungchem hâu hen, Pathian tâwtawrâwt hâu hen, vânthawk hen a hawng t̄um awt dangâiah; chun, Krist ah thi rawh tla chu an thawk masa lai le;

¹⁷chu nûn chun kannih nung a um rih mi tla hi boruak ah Lalpa dawng ding hen amah rual ah s̄um tla lakah khin lâk hen kan um lai; chun, zungzâl hen Lalpa sinah kan um lai rawh.

¹⁸Churuangah hi thu hen lungiam a sak tawnh u.

1 Thesalonika 5

¹Sikhawmsele, unau tla, a tik leh a ni thu rerêng rîn piak nan herh lo.

²Lalpa Ni chu zân ah mifîr hâwi hen a hawng t̄lung awt ti nanmah ngelchel nih fiang tak hen nan theih ruangah.

³Lungngamnâk leh himnâk ti hen an sim liau takah nunau nganfâk hâwi hen lâkkhat ko ah veihnâk an tlûnah a hawng t̄lung lai le, an âwl rîlmâl lai loh.

⁴Sikhawmsele, unau tla, nannih lam chu chu Ni nih chun mifîr hâwi hen a nan tanh na ding hen m̄ui ah nan um lo le;

⁵chêu fa tla leh ni fa tla nan si ver ruangah zân ah mi kan si lo le, m̄ui ah mi kan si ber lo.

⁶Churuangah midang tla hâwi hen kan it ding asi lo, kan meng hen kanna ringrâwn dauh lai.

⁷It mi tla chu zân ah asi an it tâwn; zûrît tla khawm chu zân ah asi an rî tâwn.

⁸Sikhawmsele, kannih lam chu ni a mi kan si ruangah lungnâk leh zângfahnâk phâw chu sawng hen, ruangsuaahnâk lungumnâk chu lukhuh ah mang hen kanna ringrâwn lai.

⁹Pathian nih thinrunhnâk tuar ding silo hen kan Lalpa Jisu Krist zârah ruangsuaahnâk tawng ding hen hawng kan ruat mi asi dauh ruangah;

¹⁰kan nung khawmah kan thih khawmah amah hen munkhat a kan nung khonâk ding hen anih chu kan thih rûlah a thi asi.

¹¹Churuarangah a fawrhtawnh hen, a thatvaktir tawnh chiauw, nan ti tâwn hâwi hen.

¹²Sikhawmsele, unau tla, nan lakah hamh leh, Lalpa a nan hotu a um leh a nan simhfâi natu ding leh an rianṭuan ruangah zângfah a thungâi sung-û tir ding hen ka nan ngiar na asi. A rem dut hen um u.

¹⁴Chun, unau tla, ka nan ngiar na, dân lo hâwi a um tla chu nunsimh ule, thinlung dî tla chu fawrh ule, chaklo tla chu ṭangpi ule, mi zawzawng lakah dawnhkho tak hen um u.

¹⁵Âukhawm nih âu sual khawm sual hen rulh lo ding hen a thiamthih u; thil nanna ti piak tawnhnâk leikângah leh mi zawzawng tlûnah nanna ti piaknâk leikâng khawmah a ṭha lei vial ti kumza u.

¹⁶Lâwm kumza u,

¹⁷bâng lo hen thlacham ule,

¹⁸zeizawng ah lâwmthu sim kumza u; chu chu nanmah lei thu ah Krist Jisu ah Pathian duhzia asi ruangah.

¹⁹Thlarau chu mih lah ule; thusim tla zauhnawmh lah u;

²¹zeizawng nik dauh ule, a ṭha mi vial zâwt ule,

²²sual hâwi hen a lang mi zawzawng lakah a thliar u.

²³Chun remnâk Pathian tak nih nan pum hen an thenhlimhtir na seh; chun, nan thlarau leh nan thinlung leh nan taksa chu kan Lalpa Jisu Krist a hawng kal tik chun simsâwi kawp lo hen a pum hen hum hen um seh.

²⁴A nan kawh natu chu zumh a kâi le, ti khawm a ti lai.

²⁵Unau tla thla hawng kan cham piak u. Unau zawzawng tla kha châwchawk thenhlimh hen chibai hawng ka bûk piak u.

²⁷Hi lasui hi unau zawzawng sinah rêl ding hen Lalpa min hen kan ngiar na.

²⁸Kan Lalpa Jisu Krist zângfahnâk chu nan sinah um seh.



2 Thesalonika

2 Thesalonika 1

¹Pawl leh Silas leh Timothe nih chun: Pathian kan Pa leh Lalpa Jisu Krist ah Thesalonika khua mi kawhmi tla sinah:

²Pa Pathian leh Lalpa Jisu Krist sinah thawk hen zângfahnâk leh remnâk nan sinah um seh.

³Unau tla, nanmah leikâng thu ah Pathian sinah lâwmthu sim kumza ding rêng kan si; chu chu â dawh rêng asi, nan lungnâk thu thungâi thanglian hen, nan ektê hen nanna zângfah tawnhnâk chu a pung khun ruangah;

⁴chun, mi nih an nehsawh na nâk zawzawng ah leh hamh nan tuarnâk tla lakah chun nan felfê zia leh nan lung zia ruangah Pathian kawhmi murui lakah chun kannih nih kan putso na tâwn asi, chubang chu Pathian ram ah mi si tlâk a ruat nan si kho awt ti,

⁵Pathian lâirêlnâk rep tak singsiahnâk fiang tak asi, chu ram ruangah tuar nan si hi.

⁶Lalpa Jisu, Pathian theihlo mi leh kan Lalpa Jisu Thâwngthâng T̄ha lunglo mi tlûnah Lehrûl sam hen a vânmifial chak tak tla hen, meialh lakah vânthawk hen â langh tikah a nan hamhtir natu tla chu hamh hen Lehrûl sam leh nannih hamhtuartu tla hi kanmah tla hen dinhnâk ah rulh bâk ding chu Pathian rangah thu rep tak asi.

⁹Chu ni ah chun, a mi thenhlimh tla lakah chawnglawmh a um ding leh lungtu zawzawng tla lakah chun chu thu kan theihtir na mi kha nan lung ruangah chê ti ding hen a hawng kal tik chun chubang Pathian theihlo mi leh kan Lalpa Jisu Thâwngthâng T̄ha lunglo mi tla nih chun rêp an tuar lai, Lalpa sin thawk leh a chaknâk rokualnâk thawk hen zungzâl veihnâk chu.

¹¹Chu hâwi hen chawnglawmh leh chê asi khonâk ding hen kan Pathian nih a nan kawh na nâk ah chun kawh tlâk si hen an ruat kho na ding leh that duhnâk kip leh lungnâk rianṭuan kip a thiltikhonâk ah a lawhtlingtir khonâk ding hen thla kan cham piak kumza na tâwn hi.

¹²Kan Pathian leh Lalpa Jisu Krist zângfahnâk hâwi vima hen kan Lalpa Jisu min chu nanmah lakah chawnglawmh hen a um kho lai le, nannih khawm amah lakah chawnglawmh hen nan um kho lai.

2 Thesalonika 2

¹Sikhawmsele, unau tla, kan Lalpa Jisu Krist a hawng kalnâk leh a sinah kanna pûmnâk thu ah chun, "Lalpa Ni chu a tlung chia rawh,"

²tinâk thlarau ruangah mawh, thu ruangah mawh, kan sin thawk hen lasuikuat hen mawh, nan thinlung â nîn sawm lonâk ding leh nanna nawk lonâk ding hen kan ngiar na.

³Âukhawm nih zeitin kâng khawmah an perpet lah na seh, tûknâk chu a hawng tlung masa ta hen, Dân Buartupa, tlâuveihtu fapa chu a hawng lang lo chun chu Ni chu a hawng tlung lai loh,

⁴anîh nih chun Pathian an ti mi leh an sawnh mi zawzawng do hen, an tlûnah um ding tum hen thang a ðhattir lai: chun Pathian Biakin ah to hen Pathian hâwi rê hen â phuang lai.

⁵Nan sinah ka um liau khan chubang thu chu ka nan simh na tâwn ti nan theihkumza lo ma?

⁶Amah tik cho ah a hawng lang khonâk ding hen zei nih a khap mi me asi ti tuah nan theih.

⁷Dân buarnâk thuthup nih chun tu khawmah a ðuan liau chir asi; sikhawmsele, lâk ving hen a um lân lo chu tuhin khaptu a um.

⁸Chu chu lâk ving tikah chun Dân Buartupa chu a hawng lang lai rawh, Lalpa Jisu nih anîh chu a kê ah thaw hen a thah lai le, a hawng kal mi langhnâk nih a veih dep lai.

⁹Chu Dân Buartu hawng kalnâk chu Setan ðuan zia hâwi vima hen, thiltikhonâk zawzawng, singsiahnâk zawzawng,

¹⁰âwkrâwl thilchê zawzawng tla hen, a vei liau mi tla rangah replonâk perpetnâk zawzawng hen asi lai: ruangsuah hen an um khonâk ding hen thudik zângfahnâk chu an zûl lo ruangah asi.

¹¹Churungah chun âwkrâwl thu chu an lung khonâk ding hen Pathian nih sual rianțuannâk an sinah a tlungtir lai,

¹²thudik lunglo hen replonâk ah lâwm mi tla nih chun mawhphurhnâk anna ting khonâk ding hen.

¹³Lalpa ah unau duhtak le tla, Thlarau ah Thenhlimhtir mi leh thudik lung hen, ruangsuah a um ding hen a tîr thawk hen Pathian nih a nan thîm na ruangah nan dân thu hin Pathian sinah lawmthu sim kumza ding rêng kan si.

¹⁴Chu hâwi rang ding chun anih nih chun kan Thâwngthâng Țha hen a nan kawh na kha, kan Lalpa Jisu Krist rokualnâk nei ding hen.

¹⁵Chun, unau tla, dîr thlir ule, thudik tla chu sim hen mawh, kan lasuikuat hen mawh, ka nan sîntir na mi kha tleih thlir u.

¹⁶Chun, kan Lalpa Jisu Krist ngelchel leh Pathian kan Pa, hawng kan zângfahtu leh a siherhnâk hawng kan pêk mi thinlung dik lungumnâk Ța pêktu nih chun nan thinlung tla chu an lungngamh na hen,

¹⁷thil Ța ti leh thusim Ța zawzawng ah fawrh hen birhtir seh.

2 Thesalonika 3

¹A dawngchemnâk ah chun, unau tla, Lalpa thu hi, nan lakah a um hâwi khan, pung leh chawnglawmh hen a um khonâk ding leh

²mi lungkhung leh misual tla lakah kan him khonâk ding hen thla hawng kan cham piak u; mi zawzawng nih chun lungnâk an nei ver lo.

³Sikhawmsele, Lalpa chu zumh a kâi anih nih chun an chaktir na hen misual lakah chun an hum na lai.

⁴Thu kan pêk na mi kha nan zâwt tâwn hen, nan zâwt vima ding hen Lalpa lakah kan zumh na asi.



- ⁵Chun, Lalpa nih chun nan thinlung tla chu Pathian zângfahnâk ah leh Krist felfênâk ah chun lûtpi seh.
- ⁶Chun, unau tla, kan sinah mi thudik an tawng hâwi a um lo hen, Dân lo hâwi a um mi unau zawzawng lakah chun nanna thliar ding hen kan Lalpa Jisu Krist min hen thu kan pêk na.
- ⁷Nanmah ngelchel nih nan kan châwng ding dân nan theih asi; nan lakah kan um liauah kan zângzê dah lo kha;
- ⁸âu kut lak mi khawm a thawt hen nan sang kan ei dah lo kha, nan lakah kan rittir na lo ding hen a sîn a zân hen dî leh hamh tak a ÷uan bû hen kan ei dauh asi;
- ⁹kan ti kho lo ruangah asi lo le, nanmah nih nan kan châwng ding hen mi zûnzauh ding hen kanna siam dauh asi.
- ¹⁰Nan sinah kan um liau khan hi thu hi kan pêk na kha. "Âuzawng nih rian÷uan a duh lo chun ei khawm ei lah seh," ti hi.
- ¹¹Nan lakah zeimaw mi zângzê hâwi hen an um tâwn mi tla thâwngthâng kan theih le, chubang nih chun rian rerêng an ÷uan lo le, midang nawktir ding hen anna sawk salam tâwn asi.
- ¹²Chun, chubang tla chu dâisip a ÷uan ding leh anmah tla sang ei ding hen Lalpa Jisu Krist ah thu pêk hen kan fawrh asi.
- ¹³Unau tla, nannih lam chu thil ÷a ti neng lah u.
- ¹⁴Chun, âuzawng nih hi lasuikwat ah kan thusim hi an zâwt lo chun, chu minung chu nan kawmh lonâk ding hen singsiah u, a ningzâk khonâk ding hen.
- ¹⁵Sikhawmsele mêlma hâwi hen ruat lah ule, unau hâwi hen nun simh dauh u.
- ¹⁶Chun, remnâk Lalpa ngelchel nih thil zeizawng ah remnâk an pêk kumza na seh. Lalpa chu nan ektê sinah um seh.

¹⁷Kei Pawl nih keimah kut ngelchel hen chibai ka nan bûk na hi; hi hi ka lasuikuat kipah singsiahnâk asi, hi hâwi hen ka rîn mi hi.

¹⁸Kan Lalpa Jisu Krist zângfahnâk nan ektê sinah um seh.



1 Timothe

1 Timothe 1

¹Pawl, Pathian ruang hawng kan suahtu leh Krist Jisu kan lungumnâk ruat mi hâwi hen, Krist Jisu mifial nih chun:

²Lungnâk ah ka fa duhtak Timothe sinah: Pathian, Pa leh Krist Jisu kan Lalpa sinah thawk hen zângfahnâk khuaruatnâk leh remnâk um seh.

³Makedonia leiah ka kal liauah Ephesi ah um ko ding hen kan ngiar hâwi hen um kan duh nget rih: mi zeimaw mi nih lung dân diklo tla an sîntir na mi chu bâng ding hen thu na pêk na ding asi.

⁴Thuanthu leh thlâktu tla thâwngthâng dawnglo nih chun lungnâk hen theih mi Pathian thiltum zûl ngâk hen elnâk salam a suah tâwn ruangah chubang tla chu bâng ding hen simh na.

⁵Nunsimhnâk san chu thinlung thenhlimh leh sia leh ̣ha theihnâk thiang leh lungnâk tak thawk hen a hawng suak mi dâwnâk chu an nei khonâk ding hen asi.

⁶Chu mi thawk hen mi zeimaw mi chu an pial le, thudo-tla-lo simnâk ah lampi an vâi.

⁷Anmah thusim umzia leh zumhkâi tak hen an thusim umzia theih ̣ung lêm lo hen Pathian dân sîntirtu siding an duh.

⁸Mi nih dân hi a mang dân ding hâwitê hen a mang chun a ̣ha asi ti kan theih.

⁹Hi tla hi theih sele, Dân hi mi ̣ha rangah siam asi lo le, dân siarlotu, buartu tla, Pathian sunhsaklotu tla, misual tla, mi thenhlimh lo tla, Pathian zahlotu tla, pa mawh nu mawh thahtu tla,

¹⁰pung mang tla, tawkua hur tla, minung ̣irtu tla, mi âwkrâwl tla,

¹¹âwkrâwl a siatsirhtu tla, sawrtlâk Pathian Thâwngthâng ̣ha rokual sîntirnâk dik ka sinah kiltir mi hâwi silo hen, thil dang a um mi tla zawzawng rangah siam asi.



¹²Kan rianṭuan ah hawng kan chaktirtu kan Lalpa Jisu Krist sinah lâwmthu ka sim asi: zumhkâi hen hawng ka ruat le, amah rianṭuantu ah hawng ka ruat ruangah a sinah lâwmthu ka simh.

¹³A lânah simsâwitu leh nehsawhtu leh zirhtu sikhawmsele lunglo hen theihlo mi ka si ruangah khuaruatnâk ka tawng asi.

¹⁴Chun, kan Lalpa zângfahnâk chu lungnâk leh Krist Jisu dâwtnâk hen cherkhet hen ka lakah a liam rawh.

¹⁵Krist Jisu misual tla ruangsuaah ding hen laikulh ah hin a hawng kal ti hi zumh a kâi hen thungâi pawm a tlâk asi, an lakah misual chem ka si hi.

¹⁶Sikhawmsele, hi ruangah hin asi khuaruatnâk ka tawng mi chu, Jisu Krist nih chun misual chem ka lakah hin â dawnhkho zia zawzawng a langhtir khonâk ding hen hi nûnah zungzâl nungnâk nei ding hen amah lungtu tla rangah zûnzauhnâk dingah.

¹⁷Lalchem zungzâl hen um mi râwk kho lo, muh kho lo, Pathian tak cho chu zungzâl chawnglawmh leh rokual hen um seh, Amen.

¹⁸Ka fa Timothe, a lânah na thâwngthâng an simkan mi hâwi hen, chu nunsimhnâk thu chu kan kiltir, chubang hen chun donâk ṭha chu na do khonâk ding hen,

¹⁹lungnâk leh sia leh ṭha theihnâk thiang tak tleih thlir hen, mi zeimaw mi nih chubang chu lawnh hen lungnâk leikângah lawng kuai hâwi hen anna râwk rawh.

²⁰Chubang tla lakah chun Humenai leh Alekzandar an si le, Pathian simsiat an bâng khonâk ding hen annih chu Setan thiltikhonâk lakah ka pêk na asi.

1 Timothe 2

¹Chun a masachem hen, deihnâk, thlachamnâk, ngiarnâk, lâwmthu simnâk tla mi zawzawng rangah siam piak na ding hen ka nan fawrh.

²Lal tla leh thuneitu tla zawzawng rangah khawm Pathian sunhsak leh zahkâi tak a rem leh lungngam hen kan um khonâk ding hen.

³Chu chu ruang hawng kan suahtu Pathian ngaihnâk ah a ̣ha hen lawmh tlâk asi;

⁴anìh nih chun mi zawzawng ruangsuaah ding leh thudik theih ding hen a duh asi.

⁵Pathian pakhat cho a um le Pathian leh minung karah thu lanhtu pakhat a um, chu chu Jisu Krist asi.

⁶Mi zawzawng tlanhnâk ding hen a pêk mi chu: chu chu a tik tak vima ah theihtir hen a um ding asi;

⁷chu chu ti ding hen phuangtu ah leh mifial ah ruat ka si, thudik ka sim, ka âwkrâwl lo, lungnâk leh thudik ah phundang tla sîntirtu ah ruat ka si.

⁸Chun, mipa tla nih munkip ah kut thenhlimh phar hen thinrun lo leh a êl lo hen thlacham sele ka duh asi;

⁹chu hâwi ber hen nunau tla a dâithlanh lo leh a thuam tuk lo hen thuam mah zuam tâwk hen a thuam sele, sam phiar hen mawh ngûn hen mawh âitikep lung hen mawh puan man tamtak tla hen mawh a thuam lo hen;

¹⁰sikhawmsele, nunau, Pathian ka sunhsak â ti mi tla chu amah zuam tâwk hen thil ̣ha ti hen, a thuam sele ka duh.

¹¹Nunau nih ê-aw ngâi tak hen dâisip hen um tum seh.

¹²Sikhawmsele, nunau nih sîntir ding hen chun ka siang lo, mipa tlûnah thuneih khawm ka siang lo, dâisip hen um dauh na seh.

¹³Adam chu siam masachem asi le, chu nûnah Evi chu siam asi.

¹⁴Chun, Adam chu perpet hen a um lo le, nunau lam chu perpet hen a um le, buarnâk ah a tlû rawh.

¹⁵Sikhawmsele lungnâk leh dâwtnâk leh thenhlimhnâk nei hen thinlung rep tak hen nunau chu a um kumza chun fa tla a ring ruangah ruangsuaah hen a um lai.

1 Timothe 3



- ¹Âuzawng kawhmi hotu si a duh chun rianṭuan ṭha a duh asi, ti hi a dik asi.
- ²Chun, kawhmi hotu chu simsâwinâk um lo mi, nupi pakhat nei mi, â sôm kho mi, mi thinlung dik tak, mirep, mi lawmh dân thiam, sîntir thiam mi,
- ³zûrît mang lo, vuak mang lo mi, a nunnêm mi, ṭhatlo rawt lo mi, tangka sum sunhsak lo mi,
- ⁴zahkâi tak hen fa tla kilkâwi hen mah dâwngsungkhur rep tak hen lâirêl thiam mi si ding asi.
- ⁵Mi nih amah dâwngsungkhur lâirêl men rep hen a rêl thiam lo chun Pathian kawhmi zeitin a zauhkhenh kho lai?
- ⁶Lung thar mi si ding asi loh, chu lo chun â putso lai le, diabol mawhphurhnâk â ting sual lai.
- ⁷Chubang lo khawmah, lênglei ah mi sawr hen a um ding asi, chu lo chun simsiat hen a um lai le, diabol thang ah awh hen a um sual lai.
- ⁸Chu hâwi ber hen kawhmi tla rianṭuantu tla chu mi zahkâi an si ding asi; mi ka tam, zû duh mi lêpnâk nâwmtâm ah hamkah mi an si ding asi loh.
- ⁹Sia leh ṭha theihnâk thiang hen lungnâk thudik tleihtu an si dauh ding asi.
- ¹⁰Chun, chubang khawm chu nik hen um masa seh, chu nûnah simsâwi um lo an si chun kawhmi murui rianṭuan leikâng rianṭuan na seh.
- ¹¹Chu hâwi ber hen an nupi tla mi zahkâi an si ding asi, ka tam lo hen sôm kho mi leh zeizawng ah zumhkâi mi an siding asi.
- ¹²Kawhmi rianṭuantu tla chu an fa tla leh anmah dâwngsungkhur kilkâwi kho mi, nupi pakhat nei mi si seh.
- ¹³Kawhmi rianṭuan leikâng ṭha tak hen ṭuan rawh mi tla nih chun Krist Jisu ah dîrnâk ṭha tak leh lungnâk leikângah râṭṭhatnâk lian tak anna ting.
- ¹⁴Sâwtlotê ah na sinah hawng kal ding lungum hen hi bang thu hi na sinah ka rîn asi.

¹⁵Sikhawmsele sawt ual ka um dah ah Pathian dâwnsung tla lakah mi zeï hâwi hen an um ding me si na theih khonâk ding hen rîn asi, Pathian dâwnsung tla chu Pathian nung kawhmi tla, thudik tung leh ngauhnâk an si.

¹⁶Chun, Pathian sunhsaknâk thuthup chu êi kho lo rê hen a rokual asi: "Taksa ah a hawng lang, Thlarau ah diknâk langhtir ding hen, vânmifial tla nih muh hen Phun tla nâwngah phuang ding hen, laikulh ah hin mi nih lung hen, vâ ah lâk hen a um.

1 Timothe 4

¹Sikhawmsele, hi nûnah chun mi zeimaw mi tla chu mi âwkrâwl tla perpetnâk ruangah veihnâk thlarau tla leh khuri tla sîntirnâk thu sunhsak hen lungnâk chu an bângtâk mi hi Thlarau nih chun fiang tak a sim.

²Chubang mi âwkrâwl tla chu anmah sia leh tha theihnâk ngelchel hen thîr lîn hen belh mi hâwi an si le,

³nupa umh an khap tâwn le, zeï lo ei ding tla, thudik theih hen lungtu tla nih lâwmthu sim hen ting ding hen Pathian nih a siam mi tla chu ei lo ding an ti tâwn.

⁴Pathian thilsiam kip hi a tha le, lâwmthu sim hen ting asi rawh chun zeikhawm duhlo ding asi loh;

⁵Pathian thu leh thlachamnâk hen thenhlimhtir asi rawh ruangah.

⁶Chubang sîntirnâk tla, na zûl mi sîntirnâk dik leh lungnâk thu tla ah thlarau ah na châwm hâwi hen unau tla na sîntir na chun Jisu Krist to-aw tha tak na si lai.

⁷Sikhawmsele, Pathian neilo mi thuanthu salam duh lah. Pathian sunhsak mi si ding hen a zawngh rawh;

⁸taksa zawnghnâk hi tha chu a tha bâk le, Pathian sunhsaknâk nih chun tuah mi nungnâk leh nungnâk hawng um ding mi pêk ding hen tiamnâk a nei ruangah zeizawng ah a tha asi.

⁹Hi thu hi zumh a kâi hen thungâi pawm a tlâk asi.

¹⁰Chun, kan lungumnâk chu Pathian nung ah chun kan ngauh ruangah hamh tak a ÷uan hen kan ti rarâm asi, anih chu mi zawzawng Ruangsuahtu asi, lungtu tla rangah asi dauh chem.

¹¹Chubang thu chu pêk le, sîntir rawh.

¹²Na ngâksia nâk âukhawm nih zauhnawmh lah seh, thusim leikâng tla, changh dân tla lakah, na dâwtnâk, zumhnâk leh thenhlimhnâk lakah lungtu tla zauhtawnh ding hawng si rawh.

¹³Ka hawng kal lân lo chu, Pathian thu rêl leikâng tla leh, thusim leh sîntirnâk leikâng tla ah teiririal tak hen a mang rawh.

¹⁴Khuavâng tla simhkannâk thu na sinah pêk asi hâwi hen leh na tlûnah Upa tla kut thângnâk leh nangmah lakah Thlarau lei thilpêk na ting mi kha thlahthlamh lah.

¹⁵Mi zawzawng lakah mâilei na fûk ti a lang khonâk ding hen, chubang thil tla lakah chun taimâk suah hen a mang rawh.

¹⁶Nangmah leh na sîntirnâk ah chun a thiamthih rawh, chubang tla thil chu ti hen nangmah leh na thusim ngâitu tla chu ruang na suah awt asi.

1 Timothe 5

¹Upa tla chu fâi lah le, pa hâwi hen lêm dauh na, tlangvâl tla chu unau hâwi hen,

²tarnu tla chu nu hâwi hen, nungâk tla chu thenhlimh tak a farnu hâwi hen.

³Numei tatak tla chu zah rawh.

⁴Sikhawmsele, numei âuzawng nih fa mawh tu tla mawh nei sele, chubang tla nih chun anmah insung lei Pathian sunhsak hen um leh anmah ringtu tla tlûnah ÷ha bâk na seh; chu chu Pathian lawmhkâng asi.

⁵Numei tatak amah lâwng hen a um mi nih chun Pathian tlûnah lungumnâk a nei thlir le, sîn leh zân hen deih leh thlacham hen a um kumza tâwn.

⁶Sikhawmsele, numei mah nuamhnâk leikângah â mang mi chu a dam liau khawmah a thi chia asi.



⁷Anmah lakah simsâwinâk an tawnglonâk ding hen, hi thupêk hi pêk na rawh.

⁸Sikhawmsele, âuzawng nih mah unau rualsia tla ruatkan lo hen, mah insungkhur mi men a ruatkan lo chun, lungnâk chu a pheh khalh le, lunglo mi tla ngâk hen a sual dauh asi.

⁹Numei kum sâwmruk ngâk a upa asi lo chun numei ah siar lah. Chu lo khawmah, veikhat pasal nei rawh hen;

¹⁰chun, thil tha ti lakah a minthang mi: nunau mah fa le zauhkhenh thiam, a in ah khual tla tlung hen, Pathian mi le kê tawl leh an nawknâk ah tangpi hen, thil tha tinâk kipah â pêk mi asi ding asi.

¹¹Sikhawmsele, numei a nungâk dauh mi chu telh lah; pasal nei an duh tikah Krist chu hawitâk hen,

¹²a sinah an thutiam masa chu lawnh hen an um ruangah mawh hen an um tâwn.

¹³Chun, chu lo khawm chu an tawihnâk in thawk hen in dangah anna kah vima le, zângzêt khawm an mang; zângzêt lâwng khawm silo hen thu sim lo ding mi sim hen kê tam leh mi thilti sim le rêl piak an mang asi.

¹⁴Chun, numei nungâk dauh mi tla nih chun pasal nei sele, fa tla nei sele, dâwngsung lâirêl sele, simsawinâk ding tik dêngkhâwng rerêng mêlma chu tawngtir lah sele ka duh asi.

¹⁵Tu khawmah mi zeimaw mi nih chun Setan lei fûk hen an pialtâk rawh ruangah.

¹⁶Lungtu nunau âuzawng nih a dâwngsung lakah numei a nei chun, amah nih zauhkhenh seh; kawhmi chu nawktir lah seh; numei tak tla chu an zauhkhenh kho ding hen.

¹⁷Kawhmi upa lâirêl tha mi chu a lehnih hen chawnglawmh tlâk ah ngaih si seh, thusim leh sîntirnâk ah anna hamh mi tla chu sawr tlâk hen ngaih khun si seh.

¹⁸Pathian lasui thu nih chun, "Chawchal nih fâng a chîl liauah a mûr phuar lah," a ti, "Rianṭuantu chu lawh tawng tlâk asi," a ti ber.

¹⁹Kawhmi upa an phiarnâk chu theihthu panih mawh pathum mawh kê thawk hen mi lo chu ngâi lah.

²⁰Thilsual titu chu mi zawzawng mâika ah nunsimh rawh, midang tla khawm an ṭih bâk khonâk ding hen.

²¹Hi bang thu hi duh bîk neilo hen thliar le dang neilo hen Pathian leh Krist Jisu leh vânmifial thîm mi tla mitmuh ah zâwt ding hen semsêngâi tak hen ka nan theihtir.

²²Âu tlûn khawmah kut thâng set sut lah, midang sualnâk tla lakah telnâk nei ber lah, a thenhlimhtir kumza rawh.

²³Tî lâwng din mi si lah le, na paw ruangah leh na damlo nget ruangah uain tâwmtê din tâwn rawh.

²⁴Mi zeimaw mi sual tla chu a lang ko le, lâirêlnâk ah a tleng masa tâwn; mi zeimaw mi lam chu an dunglei ah a zûl tâwn.

²⁵Chu hâwi ber hen thil ṭha hi a lang ko mi a um, chubang hâwi lo mi tla khawm chu thuh kho asi loh.

1 Timothe 6

¹Pathian min leh a sîntirnâk thu simsiat hen a um lonâk ding hen sal si mi tla nih chun anmah hotu tla thu zeizawng ah chawnglawmh tlâk ah ruat na seh.

²Chun, sal, lungtu, hotu nei mi tla nih chun unau an si ruangah siarlo lah na seh, sikhawmsele mavuanâk tawngtu tla chu lungtu leh duhtak tla an si ruangah an rianṭuan khun na seh. Chubang thu chu sîntir le, fawrh rawh.

³Mi âuzawng nih sîntirnâk dang a sîntir hen, kan Lalpa Jisu Krist thudik leh Pathian sunhsak lei sîntirnâk a lung lo chun,

⁴anîh chu â putso le, zeikhawm a theih lo le, theih ngâk hen êl leh thukalh leikângah chun a â lehlam asi, chubang thawk chun ngarhnâk, sualnâk simsiatnâk, ṭhalo leikângah lungnâk, êlratnâk tla a suak tâwn le;

⁵chu hâwi êlrât mi tla chu thinlung ̣ha lo nei leh thudik neilo mi Pathian sunhsak hi dingchangnâk mawh titu an si.

⁶Pathian sunhsaknâk hi lungâwinâk â tel chun dingchangnâk tak asi rêng asi.

⁷Laikulh ah hin zeikhawm kan lûtpi lo, zeikhawm kan suakpi kho ber lo.

⁸Sikhawmsele ei ding leh aih ding nei hen, chubang lakah chun kan lungâwi lai.

⁹Sikhawmsele, neih tum mi tla chu lêmnâk tla ah, thang lakah, âtkâi leh râwkkhonâk duhnâk tamtak ah an tlû tâwn. Chubang duhnâk tla nih chun siatnâk leh râwknâk ah chun mi tla a piltir tâwn.

¹⁰Tangka duhnâk hi soal kip bul asi le, chu chu mi zeimaw mi nih an ngarh le, lungnâk chu an kaltâk le, anmah leh anmah lawksawngnâk tamtak hen an thinlung an khuai.

¹¹Sikhawmsele, nang, Pathian mi chubang thu chu tektâk le, repnâk, Pathian sunhsaknâk, lungnâk, dâwnnâk, dawnhkhonâk leh nunnêmnâk tla chu zûl rawh.

¹²Lungnâk zuamnâk ̣ha chu ti le, zungzâl nungnâk chu tleih rawh; chu chu ting ding hen kawh na si; theih tu tamtak tla mitmuh ah ̣anhnâk ̣ha chu na ̣anh rawh kha.

¹³Pathian thu zeizawng nungtirtu leh Krist Jisu, Pontia Pilat mâika ah ̣anhnâk ̣ha ̣anhtu mitmuh ah thu nan pêk.

¹⁴Kan Lalpa Jisu Krist a hawng a langh lân lo chu thupêk kha thenhlimh tak leh simsâwinâk um lo hen tleih rawh.

¹⁵Chu langhnâk a tik takah sawrtlâk Pathian tak cho, lalchem tla Lalchem, lalpa tla Lalpa nih chun a zauhtir lai.

¹⁶Amah cho nih thih kholonâk a nei, chêu naih kholo rê ah a um le, amah chu âukhawm nih an muh dahlo, muh khawm an muh kho ber lo, amah sinah zungzâl chawnglawmhnâk leh thiltikhonâk um seh. Amen.

¹⁷Hi laikulh minei tla hi a zûm lo ding leh neihnâk zumhkâilo ah an lungumnâk ngauh lo hen, thil zawzawng lâwmnâk dingah hawng kan pêktu Pathian sinah ngauh ding hen nunsimh na rawh.

¹⁸Thil ɥa ti ding hen, thil ɥa ti tam ding hen, hawk hen, midang tla vauh bâk ding hen simh na.

¹⁹Nungnâk, nungnâk tatak chu an kil khonâk ding hen tik hawng tlung ding mi rangah chun lungphûm ɥa tak an rangah khawng ding hen fawrh na.

²⁰Timothe, na sinah kiltir hen um mi chu ɥa tak hen kil. Pathian zahlo leikâng thu sim salam leh diklo tak hen finghnâk an ti mi êlnâk hi mâk.

²¹Chu chu zeimaw mi nih nei hen anna ruat le, lungnâk lampi chu an pialtâk rawh. Pathian zângfahnâk nan ekte sinah um seh.



2 Timothe

2 Timothe 1

¹Pawl, Pathian duhzia hâwi hen, Jisu Krist mifial, Jisu Krist ah nungnâk thutiam kan nei mi chu phuang ding hen fial mi nih chun

²ka fa duhtak Timothe sinah Pathian kan Pa leh Jisu Krist kan Lalpa sin thawk hen zângfahnâk, khuaruatnâk leh remnâk tla um seh.

³Hawng ka thlâktu tla nih an ti hâwi hen, sia leh ̣ha theihnâk fiang tak hen a rian ka ̣uan mi Pathian sinah lâwmthu tla ka sim. A ṣun a zân hen ka thlachamnâk ah ka nan theihkumza tâwn asi.

⁴Na mitthli tlâk tla ka theihkumza le, lâwm a khat hen ka um khonâk ding hen muh ding thungâi ka nan duh asi.

⁵Na pi Loisi leh na nu Euniki khawm nih an nei mi lungnâk tak na nei ti ka theih.

⁶Churuarangah, ka kut thâng ruangah Pathian thilpêk nangmah lakah um mi kha tharhnawlh ding hen ka nan theihpi asi.

⁷Pathian nih lâunâk Thlarau hawng kan pêk lo le; thiltikhonâk leh dâwtnâk leh mah a ṣumkhonâk Thlarau hawng kan pêk dauh ruangah.

⁸Chun, kan Lalpa thu theihtirnâk chu zahpi lah le, kei, amah mi rêngtlâ khawm hi hawng ka zahpi ber lah. Thâwngthâng ̣ha ruangah hamh hi Pathian thiltikhonâk hâwi vima hen, hawng ka tuarpi lehlam rawh.

⁹Anih nih chun kan thilti tla hâwi silo hen, amah ruat leh zângfahnâk hâwi dauh hen ruang hawng kan suah le, kawhnâk thenhlimh hen hawng kan kawh le; chu zângfahnâk chu tual tuah lânah Jisu Krist lakah hawng kan pêk rawh.

¹⁰Sikhawmsele ruang hawng kan suahtu Jisu Krist a hawng kalnâk nih tuah a langhtir rawh. Krist nih chun thihnâk thiltikhonâk chu veih hen, Thâwngthâng ̣ha hen nungnâk thi kholo mi chu a langhtir rawh.



¹¹Chu Thâwnghâng Ƨha thu chu theihtir ding hen, phuangtu ah leh mifial ah leh sîntirtu ah ruat ka si.

¹²Churuang chem asi, hi bang thu khawm hi ka tuar mi chu: sikhawmsele ka ningzak lo; ka lung mi Pathian chu ka theih, a sinah ka kiltir mi chu, chu Ni rang dingah chun Ƨha dek hen a kil kho ti dik tak hen ka theih ber.

¹³Jisu Krist lakah um mi lungnâk leh dâwnnâk nei hen, thudik dân ka kê thawk hen na theih mi tla kha nei thlir rawh.

¹⁴Thil Ƨha na sinah kiltir hen um mi kha kan sungah Thlarau Thenhlimh um mi hen Ƨha dek hen kil.

¹⁵Asia ram ah um zawzawng tla nih an ka hawitâk ti kha na theih le; an lakah Phugela leh Hermozen anna tel asi.

¹⁶Lalpa nih chun Onesiphora dâwnsung tla sinah khuaruat seh, anih nih chun a hawng ka lawmhtir kumza le; ka rêngkhimh khawm a ka zahpi loh.

¹⁷Rom khua ah a hawng tlung kê hen hawng ka tawng lân lo chu a hawng ka hâwl,

¹⁸chu Ni ah chun Lalpa sinah mi khuaruatnâk tawng ding hen anih chu ruat seh! Ephesi khua ah ka rangah rian a Ƨuan fâk zia na theih ual asi.

2 Timothe 2

¹Chuvachun, nang, ka fa, Jisu Krist zângfahnâk ah hin thiltikhonâk nei hen um rawh.

²Chun, theih tu tamtak tla lakah ka kê ah thu na theih mi tla kha, chubang chu mi zumhkâi midang tla sîntir singsuan khotu ding tla sinah chun kiltir rawh.

³Jisu Krist kawrsen Ƨha tak hâwi hen hamh hawng ka tuarpi rawh.

⁴Kawrsen ah um ding hen thîmtu chu a lawmhtir khonâk ding hen, kawrsen âukhawm râltuk liauah tuliau damsung khuasaknâk tla ah a nawktir dah loh.

⁵Chun, zuamnâk tla lak khawmah mi nih ti khawmsele, dân hâwi hen a ti lo chun nehtu asi dah loh.

- ⁶Lo neitu rianṭuan hamh chu a rah ting masatu asi ding asi.
- ⁷Ka thusim hi ruat rawh; Lalpa nih chun zeizawng ah theihkhonâk a nan pêk awt ruangah.
- ⁸Jisu Krist, David thlâk a mi ka Thâwngthâng Ṭha sim hâwi hen mithi lakah mi thawknawlh kha theih kumza rawh.
- ⁹Chu Thâwngthâng Ṭha ruangah chun thilsual titu hâwi hen phuar rê hen hamh tla ka tuar tâwn asi. Sikhawmsele Pathian thu chu phuar hen a um lêm loh.
- ¹⁰Churuangah, Jisu Krist lakah um mi ruangsuaahnâk chu, zungzâl a rokualnâk hen an tawng kho bâk nâk ding hen, thîm tla ruang chun zeizawng ka tuar tâwn.
- ¹¹Hi thu hi zumh a kâi asi: "A thihnâk ah kan thi rawh chun, a nungnâk ah khawm kan nung ber lai.
- ¹²Kan tuar chun a lâirêlnâk ah lâi kan rêl lai. Amah kan phehtâk chun anih khawm nih hawng kan phehtâk lai.
- ¹³Kannah zumhtlâklo hen um kumza khawmsele, anih chu zumhtlâk hen a um kumza asi, amah leh amah a phehtâk kho lêm lo," ti hi.
- ¹⁴Chubang thu chu theihpi le, thu salam lakah anna êl lonâk ding hen, Lalpa mitmuh ah semsêngâi tak hen theihtir rawh. Chu chu zeikhawm a ṭhavam lo le, a ngâitu tla rangah veihnâk lam asi tâwn.
- ¹⁵Rianṭuantu thu dik thu rep tak hen mangtu chu ningzak ding asi lo hâwi hen, Pathian ngaih hen ṭha hâwi a langhtir ding hen semsêngâi rawh.
- ¹⁶Sikhawmsele, chu Pathian zahlo leikâng thu sim salam chu bângtâk tâwn le, chu hâwi mi tla chu Pathian sunhsak lonâk leikângah an zualkâi lai le;
- ¹⁷an thu khawm nih masia hâwi hen a ei vima lai; an lakah chun Humenai leh Philepta anna tel asi.
- ¹⁸Chubang tla nih chun "Thawknawlh nâk chu tu khawmah asi ving rawh," ti hen, thudik leikâng chu an pialtâk le, mi zeimaw mi lungnâk an veih tâwn.

¹⁹Sikhawmsele, Pathian lungphûm bir chu a dîr kumza le, hi singsiahnâk hi a nei le, "Lalpa nih chun amah tâ tla a theih," ti leh, "Lalpa min lamtu vial nih chun sual kaltâk seh," ti hi.

²⁰Sikhawmsele, in rokual tla lakah khêng leh bêl ngûn leh tangka hen siam mi cho a um lo le, thing leh valei hen siam tla khawm a um tâwn, zeimaw mi sung-û tir hen a um le, zeimaw mi sung-û tir lo hen a um.

²¹Churuangah mi nih chubang thu lakah â thliar chun, khêng leh bêl thenhlimh, Lalpa mang tlâk, rianṭuan ṭha kipah tîm chia hen, sung-û tir ding mi chu asi lai.

²²Sikhawmsele, seino duhnâk tla chu tektâk le, thinlung thenhlimh hen Lalpa lamtu vial tla lakah repnâk tla, lungnâk tla, dâwtnâk tla, remnâk tla fûk rawh.

²³Sikhawmsele, donâk tla a ring tâwn ti theih hen, elnâk âtkâi leh fing lo lakah chun tel ding duh lah.

²⁴Lalpa to-aw nih chun do ding asi lo le, mi zawzawng lakah vêlnei hen, sîntir thiam hen, sual lakah dawnhkho hen,

²⁵do ding a tuah mi tla chu dawnhkho tak bû hen sîntir lehlam ding asi; chuvachun Pathian nih thudik chu an theih rangtlingnâk ding hen a rimtir ving hen,

²⁶Pathian duhzia ti ding hen Lalpa to-aw nih a tleih hen, diabol thang lakah mi an suak kho dah ah.

2 Timothe 3

¹Chun, hi hi theih u, ni madung tla ah chun tik har tak tla a hawng um lai.

²Mi, mah â zângfah mi tla, tangka sunhsaktu tla, â khâwng mi tla, â zûm mi tla, Pathian simsiattu tla, nu leh pa thu ngâilo tla, lâwm dân theih lotu tla, thenhlimh lo tla,

³zângfahnâk suakpi lo tla, ṭhat lo rawt tla, phiartu tla, sûm kholo tla, mirâng tla, ṭha duh lo thlo tla,



- ⁴mi perpê tla, dung le mâi dawn lo tla, â sung-û tir mi tla, Pathian zângfah ngâk hen mah lawmhnâk cho zângfah dauhtu tla an si awt;
- ⁵Pathian sunhsak mi banghnâk an nei lai le, sikhawmsele a thiltikhonâk chu an lung lai loh; chubang hâwi chu hawitâk rawh.
- ⁶Chubang tla lakah mi chu, in ah tla lût hen sual ritphurh nunau â dauh tla sal ah tleih tâwntu tla kha an si, chu hâwi nunau tla chu duhnâk kip nih tlâutir hen,
- ⁷sîn kumza narêng hen thudik phanh lo mi an si,
- ⁸chun, Jani leh Jambre nih Mosi an do hâwi khan chubang tla nih chun thudik hi an do tâwn; thinsung râwk rawh mi, lungnâk leikângah chun Pathian duh lo leikâng mi an si.
- ⁹Sikhawmsele, chubang nûnlêm chun an ti lai loh, an ât zia, mi zawzawng sinah a lang awt ruangah, Jani leh Jambre ât zia a lang hâwi khan.
- ¹⁰Nang lam nih chun ka sîntirnâk tla, ka umdân tla, ka thiltum tla, ka lungnâk tla, ka dawnhkhonâk tla, ka zângfahnâk tla, ka felfênâk tla,
- ¹¹mi nih an ka nehsawhnâk tla, ka tuarnâk tla, thungâi na theih; Antiokei khua ah, Ikoniam khua ah, Lustra khua ah ka lakah thil tung mi leh nehsawhnâk ka tuarnâk tla kha, chubang zawzawng ah chun Lalpa nih ruang a hawng ka suah rawh.
- ¹²Asi, âuzawng Jisu Krist lakah Pathian sunhsak hen umtu zawng nih chun nehsawhnâk tla an tuar ber lai.
- ¹³Misial leh perpettu tla lam chu mi perpet leh mah khawm mi perpet a um hen an sual dadauh lai.
- ¹⁴Sikhawmsele nang lam chu na lung mi leh sîntir a na um mi thudik tla lakah um kumza rawh. Nangmah sîntirtu tla chu âu me an si ti na theih ruangah.

¹⁵Chun, Jisu Krist ah lungnâk hen ruangsuaahnâk ah an ruai kho ding hen finghnâk an pêk khotu Pathian lasui thu thenhlimh chu na ngâksia liau thawk hen na theih.

¹⁶Pathian lasui thu kip, Pathian thaw khumh hen pêk rawh mi chu sîntir leikâng tla ah, mawhtir leikâng tla ah, nunsimh leikâng tla ah, repnâk sîntir leikâng tla ah a thavak ber asi.

¹⁷Pathian mi chu rian tha kip t̄uan ding hen kim tak hen thuamh hen a rangtling khonâk ding hen.

2 Timothe 4

¹Pathian mitmuh leh minung leh mithi lâirêltu ding Jisu Krist mitmuh ah chun a langhnâk leh a ram sâl hen, semsêngâi tak hen ka nan theihtir:

²Thu sim rawh, a tik tla ah, a tik lo tla ah khawm ti vima; dawnhkho tak hen, sîntir bû hen an mawhnâk theihtir le, nunsimh leh fawrh rawh.

³Sîntirnâk dik an ngâi huam lo tik a hawng tlung awt ruangah; an nâ tla a zâ ruangah anmah duhkâng mi sîntirtu tla an sinah an pumh na lai le,

⁴an nâ tla thudik leiah an sêttir lai le, thuanthu lei fûk hen an pial rawh lai.

⁵Nang lam chu zeizawng ah a thiamthih le, hamh tuar le, Thâwngthâng Tha simtu lei rian̄tuan le, na rian̄tuannâk kha zawh rawh.

⁶Kei lam chu tu khawmah ap hen ka um liau asi le, ka suak tik a tlung rawh.

⁷Zuamnâk tha chu ka ti thluh rawh; ka tekzuanmâk chu ka zawh rawh le, lungnâk chu ka kil ving rawh asi;

⁸tuah lam chun repnâk lallukhuh chu ka rangah siah hen a um rawh; chu chu Lalpa lâirêltu rep tak nih chun chu ni ah a hawng ka pêk lai. Ka sinah cho silo hen, a langhnâk awrhtu kip tla sinah khawm.

⁹Rang tak hen ka sinah hawng ram rawh.

¹⁰Dem nih chun tuliau laikulh hi a sunhsak ruangah hawng ka kaltâk le, Thesalonika khua ah a kal rawh. Kresken chu Galatia ram ah a kal rawh le, Tita chu Dalmatia ah a kal bâk.



- ¹¹Luk cho ka sinah a um rawh, Mark kha sâwm le, hawngpi rawh. Anih chu rianṭuanpi leikângah ka rangah a ṭhavak ruangah.
- ¹²Tukika lam chu Ephesi khua ah ka fial rawh.
- ¹³Na hawng tikah Troas khua mi Karpa sinah kawrdawhfual ka mâk mi kha, lasuibu tla hen hawng put le, savun lasui tak kha hawng put.
- ¹⁴Alekzandar, dâr êr thiam mi kha, ka lakah thungâi a sual tâwn asi, Lalpa nih chun a thilti zia vima hen lehrûl a sam lai.
- ¹⁵A lakah khan nang khawm a thiamthih rawh, kan thu thungâi a do fâk ruangah,
- ¹⁶ka mawh lo zia thu ka sim masa tan ah âukhawm nih an ka ṭangpi lo le, an ka thlawrhthlau ver lehlam asi. Mawh phurhtir hen um lah na seh.
- ¹⁷Thâwngthâng Ṭha keimah ruangah simh chiau hen a um khonâk ding hen, Phundang tla zawng nih an theih khonâk ding hen, Lalpa nih chun a ka ṭanh le, a ka chaktir lehlam asi; chun chakeibaknei kê ah mi kha suah hen ka um rawh asi.
- ¹⁸Lalpa nih chun sualnâk zawzawng lakah mi a ka suah lai le, a vâṇ ram ah him tak hen hawng ka tlunh lai, amah chu zungzâl hen rokual hen um seh. Amen.
- ¹⁹Priskili leh Akuila, Onesiphora dâwngsung zawzawng tla kha chibai hawng ka bûk piak.
- ²⁰Erasta chu Korin khua ah chun a um ko. Trophima lam chu Miletî khua ah damlo hen ka kaltâk rawh.
- ²¹Busik lânah hawng kal rarâm rawh. Eubulas, Pudens, Linas leh Klaudia leh unau dang tla khawm nih chibai an bûk na.
- ²²Lalpa chu na thlarau sinah um seh. Pathian Zângfahnâk nan sinah um seh.

Tita

Tita 1

¹Pawl, Pathian to-aw, zungzâl nungnâk lungum hen, Pathian thîm mi tla lungnâk leikângah leh Pathian sunhsak leikâng thudik theihnâk leikângah, Jisu Krist mifial ber nih chun,

²chu zungzâl nungnâk chu Pathian âwkrâwl sim kho lo nih chun laikulh um lânah a tiamh le,

³sikhawmsele, amah tik takah chun a thu chu thuchah lakah a langhtir rawh, chu thuchah chu Pathian kan Ruangsuah tu thupêk hâwi vima hen kiltir ka si.

⁴Tita, zatlâng lungnâk lakah ka fa tatak sinah: Pa Pathian leh Jisu Krist kan Ruangsuah tu sinah mi zângfahnâk leh remnâk na sinah um seh.

⁵Hi ruangah hin Kret tikulh ah khan ka nan mâk asi, thu ruat mi mabân chu na ruat vima ding hen leh thu kan pêk mi hâwi hen khan khua kipah upa tla na ruat ding hen,

⁶âuzawng simsâwi kâi lo mi, nupi pakhat nei, fa tla Pathian thulung mi, nuamsabut leikângah simsâwi kâi lo mi, dân lo hâwi hen um lo mi an si ding asi.

⁷Kawhmi hotu chu Pathian sum zauhkenhtu asi ruangah simsâwi kawp lo mi asi ding asi: mi simhhar, thintâwi, zûrît mang, mi vuak mang, lêpnâk nâwmtâm lakah hamkah mi asi ding asi loh.

⁸Mi lawmh dân thiam, tha leikâng duh mi, thinlung diktak, mirep, mi thenhlimh, sôm-nâwl kho mi asi ding asi.

⁹Sîntirnâk diktak leikângah mi a fawrh khonâk ding hen leh êltu tla chu a mawhtir kho na nâk ding hen sîntirnâk hâwi vima hen thu zumhkai tleih thlir mi asi ber ding asi.

¹⁰Dân lo hâwi a um mi, thu sim salam mi leh perpettu tla tamtak an um ruangah, Juda tla lakah mi an si dauh chem.

¹¹Chubang tla kê chu huh piak na ding asi, lêpnâk nâwmtam duh ruangah thu sîntir lo ding mi sîntir hen, mi tla a dâwngsungkhur khur hen an râwk na tâwn.

¹²Kret tikulh lakah mi, anmah lakah mi khuavâng pakhat ngelchel nih, "Kret tikulh ah mi tla chu mi âwkrâwl tla, ran rualo tla, mi zângzê awrṭawh an si kumza," ti hen a sim kha.

¹³Chu thu theihtir chu a dik asi. Churuang chun Juda tla thuanthu tla leh thudik hawitâk tâwntu tla thupêk chu sunhsak lo hen, lungnâk ah chun an dik khonâk ding hen fâk tak hen nun simh na rawh.

¹⁵Mi thenhlimh tla rang chun zeizawng a thenhlimh tâwn; sikhawmsele mi nâwmtâm leh lunglo tla rang chun zeikhawm thenhlimh mi a um tâwn loh, an thinlung leh an sia leh ṭha theihnâk rêng khawm a nâwm rawh.

¹⁶"Pathian kan theih" ti hen, anna ṭang tâwn le, sikhawmsele fihnungkâi tla, ê-aw ngâilo tla, thil ṭha kip ti leikângah Pathian duhlo mi zât an si, an thilti hen an phehtâk tâwn.

Tita 2

¹Nang lam nih chun sîntirnâk dik tak hen â êp mi thu sim rawh.

²Tarpa tla chu a sîm kho mi, zahkâi, thinlung rep tak, lungnâk leh zângfahnâk leh felfênâk ah dik tak um ding hen fawrh rawh.

³Tarnu tla khawm nih Pathian thu chu an simsiat lonâk ding hen, nunau kum no dauh tla chu an pasal zângfah ding leh fa zângfah ding leh thinlung rep tak hen um ding leh thenhlimh tak a um ding leh, mah in ah rianṭuantu ah um ding leh, vêlnei hen um ding leh, mah pasal tla thu thu a um ding hen nun an simh na kho ding hen an umdân lak khawmah Pathian zah mi tla, phiartu tla leh zû duh mi tla silo hen, ṭhat leikângah sîntirtu si ding hen fawrh rawh.

⁶Chu hâwi ber hen, tlangvâl tla chu sîm kho mi si ding hen fawrh rawh.



⁷Khatlei kângah tângtawm mi tla nih kan tûnah thu tha lo rerêng sim ding a nei lo ruangah an ningzak khonâk ding hen, zeizawng ah thu tha ti ding leikângah muhtirtu ah a siam le, na sîntirnâk ah chun na dik zia tla, zah na kâi zia tla, na thusim dik zia tla, sâwi kho lo mi chu langhtir rawh.

⁹To-aw tla nih chun Pathian kan Ruangsuahtu sîntirnâk thu an bawp khonâk ding hen, êl lo hen, fîr mang lo hen, zumhkâinâk thu zawzawng langhtir hen, an pu tla thu thu hen um ding hen leh zeizawng an lawmhkâng hen um ding hen fawrh rawh.

¹¹Mi zawzawng rangah Ruangsuahtu ding hen Pathian nih a zângfahnâk a hawng langh rawh ruangah.

¹²Lungumnâk lawmhkâi kan Pathian rokual tak Ruangsuahtu Jisu Krist rokualnâk langhnâk chu ngâk hen, Pathian sunhsak lonâk leh laikulh duhnâk tla bângtâk hen, tuliau laikulh ah a sûm hen leh rep tak hen leh Pathian sunhsak hen kan um ding asi ti hawng kan sîntir.

¹⁴Anih nih chun buarnâk zawzawng ah hawng kan tlanh khonâk ding hen leh phun thîm bîk, thil tha ti hen semsêngâi, amah rangah a thenhlimhtir khonâk ding hen, kan ruangrûl ah â pêk kha.

¹⁵Thu nei tak hen chubang thu chu sim hen fawrh le, nunsimh rawh. Âukhawm nih a nan zauhnawmh lah seh.

Tita 3

¹Lal tla leh thuneitu tla lakah a pêk ding tla, ê-aw ngâi ding tla, thu tha kip ti ding hen a tim ding leh âukhawm simsiat lo ding leh

²thatlo rawt lo ding leh mi zawzawng lakah dawnhkhonâk kip langhtir hen nun tha ding hen anmah tla theihtir nawlh rawh.

³Kannah khawm a lânah a tak leh ê-aw ngâilo leh perpet mi leh, duhnâk leh lawmhnâk kip leikângah pial mi leh soal leh nahsua mang hen um mi leh fihnungkâi leh a huat tawnh mi tla kan si ruangah.

- ⁴Sikhawmsele, Pathian kan Ruangsuahtu vêlneih zia leh minung tlûnah a zângfah zia a hawng langh liauah khan;
- ⁵thil rep tak hen ti mi, kanmah ngelchel nih ti mi tla chu, chu ruang silo hen, siamtharnâk tawlnâk leh Thlarau Thenhlimh siamthar nawlnhâk nih chun a zângfahnâk hâwi vima hen ruang hawng kan suah rawh.
- ⁶Chu Thlarau Thenhlimh kan Ruangsuahtu Jisu Krist zârah chun fâk tak hen kan tlûnah a tawih kha.
- ⁷Chuvachun, a zângfahnâk ah mawhtir lo si hen, zungzâl hen nungnâk lungumnâk hâwi vima hen rotingtu dingah siam hen kan um kho lai.
- ⁸"Pathian lung rawh mi nih chun thil t̄ha ti vima ding hen tum seh," ti thu hi zumh a kâi asi, chu thu chu râl̄t̄ha tak hen na sim thlir ding hen ka nan duh asi. Chubang thu chu minung tla rangah a t̄ha hen mang a tlâk asi.
- ⁹Sikhawmsele deihnâk âtkâi tla, thlâktu tla thu zâwt tla, êlnâk tla, dân thu ruangah a sualnâk tla chu hertâk vima rawh; chubang tla chu zeikhawm t̄havak lo leh zeikhawm silo ruangah.
- ¹⁰A dangtê hen lungnâk nei mi chu veikhat veinih nunsimh nûnlêm chun duh lah;
- ¹¹chubang hâwi mi chu a pial hen a sual asi ti na theih, amah leh amah â mawhtir asi.
- ¹²Artema mawh, Tukika mawh, na sinah ka hawng fial tik chun Nikopoli khua ah ka sinah hawng kal râm rawh, chunah chun busik ah um ka tum ruangah.
- ¹³Zena, dân theih tu leh Apolo nih chun zeikhawm an samphâng lonâk ding hen an khualtlawngnâk ah chun semsêngâi tak hen bawmh na rawh.
- ¹⁴Kan mi tla khawm nih chun rah lo hen an um lonâk ding hen samphângnâk herh rang dingah chun thil t̄ha ti vima a sîn na seh.

¹⁵Ka sinah um zawzawng tla nih hin chibai a nan bûk; lungnâk ah hawng kan zângfahtu tla kha chibai hawng ka bûk piak. Nan ektê sinah Pathian zângfahnâk um seh.



Philemon

Philemon 1

¹Pawl, Jisu Krist ah rêngtlâ leh kan unaupa Timothe nih chun: Kan duhtak leh kan rianțuanpi hâwi Philemon sinah leh kan farnu Aphia sinah leh kan kawrsen hâwipa Arkipa sinah leh,

²na in ah kawhmi anna pûm mi tla sinah khawm:

³Pathian kan Pa leh Lalpa Jisu Krist sinah mi zângfahnâk leh remnâk nan sinah um seh.

⁴Lalpa Jisu leikângah leh mi thenhlimh zawzawng leikângah dâwtnâk leh lungnâk na nei mi chu ka theih tâwn le, ka thlachamnâk tla ah chun na min ka lam kumza, ka Pathian sinah lâwmthu ka sim tâwn.

⁶Ka thlachamnâk chu, lungtu kan sinâk ah hin Krist hen kanna tlâinâk nunchan, malsâwmnâk kip theihnâk thûk dauh kan nei mi hawng suah ding hen asi.

⁷Unaupa, nangmah zârah mi thenhlimh tla thinlung a hawng thawk ruangah na dâwtnâk ah chun ka lâwm hen thungâi ka lungngam asi.

⁸Churangah a dawh tâwk ding chu ti ding hen thu a nan pêk ding Krist lakah chun ngamh ngâi khawmsele,

⁹dâwtnâk ruangah, Pawl tarpa ka si le, tuah Jisu Krist ruangah rêngtlâ khawm ka hawng si; a ngiar hen ka nan ngiar lehlam.

¹⁰Ka fa Onesimus rêngkhimh bû hen ka ring mi rangah hin na sinah ka ngiar piak asi.

¹¹Anih chu a lânah khan na rangah a țhavak lo le, tuah lam chun kei leh nang rangah a țhavak rawh.

¹²Amah ngelchel ka thinlung tak hi, na sinah ka hawng kîrtir nawlh rawh asi.

¹³Anih chu Thâwngthâng Țha ruangah rêng ka khimhnâk ah hin nangmah ruangrûl ah a ka bulsân khonâk ding hen ka sinah umtir kumza ka duh thlo asi.

- ¹⁴Sikhawmsele, hawng ka zângfah êu ka nan ti mi hâwi silo hen, nangmah thu thu hâwi asi kho dauhnâk ding hen, na thu lo hen zeikhawm ti ka duh lo.
- ¹⁵Sâwtlotê nanna then mi hi kumleza hen amah na ting pawtnâk khawm asi lai dahmawh.
- ¹⁶Sikhawmsele, to-aw hâwi silo rawh hen, to-aw ngâk a ʒha, Krist ah unau duhtak hâwi hen ngaih le; Lalpa lakah chun sal leh unau kan sinâk chu kei sin ngâk chun nang sinah asi dauh.
- ¹⁷Chuvachun, hâwi ah na ka ruat chun keimah hâwi hen amah hi hawng lawmh rawh.
- ¹⁸Chun, na lakah thil zeital a sual hen mawh na thil zeimawh â bat chun keimah bat ah ruat rawh.
- ¹⁹Kei, Pawl nih, keimah kut ngelchel hen ka rîn hi, keimah nih ka rulh piak lai; ka lakah nangmah ngelchel khawm na bat ber zia an simh mi lam chu ka si loh.
- ²⁰Asi, unaupa nangmah ruangah Lalpa lakah chun lâwmnâk na ka neitir le, Krist lakah chun ka thinlung thawktir rawh.
- ²¹Ka sim mi ngâk a fâk dauh hen na ti lai ti ka theih ruangah rem na ti lai ti ruat hen na sinah ka hawng rîn asi hi.
- ²²Zeikhawm si sele chu lâwng silo hen tlungnâk ding hawng ka timhtuah piak rawh. Nan thlachamnâk tla ruangah nan sinah pêk ka si awt ti ka lung.
- ²³Epaphra Jisu Krist ah ka rêngtlâpi mi nih hin chibai a nan bûk.
- ²⁴Ka rianʒuanpi Mark leh Aristarka leh Dema leh Luk khawm nih chu hâwi ber hen chibai an bûk.
- ²⁵Kan Lalpa Jisu Krist zângfahnâk nan ektê sinah um seh.

Hebrai

Hebrai 1

- ¹A lânah Pathian nih kan thlâktu tla sinah vei tamtak leh kâng tamtak hen khuavâng tla mang hen thu a sim le,
- ²sikhawmsele ni dawng lei tla ah chun a Fapa mang hen kan sinah thu a sim. Chu a Fapa chu zeizawng ah rotingtu ah a siam; chu nih chun laikulh khawm hi a siam.
- ³Amah chu Pathian rokualnâk hen a chêu le, amah chu Pathian tak banghnâk neitu asi, a thiltikhonâk hen laikulh chu dirh asi. Minung tla soal a thenhlimhhir nûnah Chungnungchem Thiltikhonâk Pathian vawrhlei ah vên ah a to rawh.
- ⁴Pathian nih a min khawm anmah tla ngâk hen rokual dauhnâk a pêk hâwi hen Fapa chu vênmifial tla ngâk hen rokual dauh hen a siam.
- ⁵Vênmifial tla lakah âu sinah me hi bang thu hi a sim dah tâwn: "Nang lam chu ka Fapa na si, tusûn hin kei na Pa ka si,' ti mi leh, "Kei a Pa ka si lai le, anih chu ka Fapa asi lai," ti hi.
- ⁶Chun, Pathian nih a Fa tîr chu laikulh ah a hawng fial liauah, a sin khawmah, "Pathian vênmifial tla zawzawng nih amah chu sawnh seh, " a ti.
- ⁷Chun, vênmifial tla leikâng thu ah chun hi hi a sim asi: "Pathian nih a vênmifial tla chu thil ah a changtir na, a rianṭuantu tla khawm meialh ah a changtir na tâwn."
- ⁸Fapa leikâng thu ah lam chun Pathian nih, "Aw Pathian, na laltophah chu zungzâl hen a um ding hen asi, diknâk hen na ram tlûnah lâi na rêl.
- ⁹Diknâk chu na duh le, diklonâk chu na hua. Churuangah Pathian, na Pathian nih chun, Na hâwi tla ngâk hen chawnglawmhnâk rokual dauh a nan pêk," ti hen a sim.
- ¹⁰"Nang, Lalpa, a tîrah tual na siam le, vên tla khawm nangmah kut hen na siam.

¹¹Chubang tla chu an vei teh lai le, nang lam chu um kumza ding na si, chun, chubang tla chu nipuan hâwi hen a li teh lai.

¹²Kawrdawh hâwi hen na thlep lai le, nipuan hâwi hen na dangtir lai. Nang lam chu na mun kumza, na san khawm a dawng lai loh," a ti.

¹³Sikhawmsele, vânmifial tla lakah âu leikâng thu me hi hi a sim dah tâwn: "Na mêlma tla na kezaphah tangah ka siah lân lo chu ka vawrhlei ah to rawh," ti hen.

¹⁴Vânmifial tla chu zei an si ne? Annih tla chu Thlarau ver Pathian rianțuantu, ruangsuaahnâk tawngtu ding mi tla sinah țangpi ding hen fial an si.

Hebrai 2

¹Churuangah, nâ hen kan theih mi tla kha semsêngâi tak hen kan sunhsak khun ding asi, chu lo chun kan vei sual lebang lai.

²Vânmifial tla mang hen thu sim kha a dik asi ti a zauhtir asi, chun âuzawng chu chu zûllotu mawh zâwtlotu chu rêpnâk a tawng ding hâwi hen a tawng vima tâwn.

³Chu tluk rak ruangsuaahnâk rokual chu siarlo sele zeitin kan âwl kho zia lai? Chu ruangsuaahnâk thu chu a tîrah amah Lalpa nih a phuang rawh le, a theih tu tla nih chun a dik asi ti hawng kan langhtir piak asi.

⁴Pathian khawm nih singsiahnâk tla leh thilchê tla leh thiltikhonâk zeizawng theihpi na hen, amah duhzia hen Thlarau Thenhlimh thilpêk tla chu a țhen tâwn.

⁵Laikulh a hawng um ding mi a thâwngthâng kan sim mi chu: Pathian nih vânmifial tla tangah chun a siah lo.

⁶Pathian lasui thu zeimaw nâk ah hi bang thu hi sim asi lehlam: "Aw Pathian, minung hi zei me asi, na theihkumza tâwn le? Minung salam hi zei me asi na veh nget tâwn le?"



⁷Anih chu vânmifial tla ngâk hen nâu dauh hen na siam rih le, rokualnâk leh chawnglawmhnâk na pêk.

⁸Na thilsiam zawzawng tlûnah hotu ah na siam," ti hen. Chu chu Pathian nih "thil zeizawng tlûnah hotu ah a siam," tinâk asi, hi nih hin zeizawng a uap sih ver asi. Sikhawmsele, tuah thil zeizawng tlûnah minung nih lâi a rêl mi lam chu kan muh lo rih.

⁹Sikhawmsele, Jisu, vânmifial tla ngâk hen niam dauh rih hen siam mi chu, thihnâk tuar ruangah rokualnâk leh chawnglawmhnâk khuhtir hen kan muh rawh asi. Pathian zângfahnâk zârah mi zawzawng rangah thih piak na ding hen.

¹⁰Pathian thil zeizawng siamtu leh kiltu nih chun fa tamtak a rokualnâk ting ding hen a hawng put kim na ding hen a tuarnâk ruangah Jisu siam rangtling chu a dik asi. Jisu chu ruangsuhânâk ding hen anmah tla rui natu pakhat asi ruangah.

¹¹Thenhlimhtirtu leh thenhlimhtir mi tla chu an ektê hen Pa Pakhat ah suak an si ruangah Jisu nih chun annih tla chu unau tla ti a ningzak loh.

¹²"Ka unau tla sinah thu ka sim lai le, anna pûm mi tla nâwng ah chun la hen ka nan sawr lai," ti hen a sim hâwi hen.

¹³Chun, "Pathian lakah ka lungnâk ka ngauh lai," a ti nawlh. Chun, "Hinah kei leh Pathian nih a ka pêk mi ngâksia tla hi," a ti nawlh fâwn.

¹⁴Chun, ngâksia tla hi taksa leh thisen nei mi tla an si ruangah Jisu ngelchel khawm anmah hâwi minung taksa put asi bâk. A thihnâk ruangah

¹⁵thihnâk tlûnah thuneitu Diabol chu a veih khonâk ding leh thih ÷ih ruangah dam sungah sal si mi tla chu a suah kho na nâk ding hen.

¹⁶A ÷angpi na mi chu vânmifial an silo le, "Abraham thlâk tla an si, a ÷angpi na tâwn mi chu," ti hen Pathian lasui thu nih a sim mi hâwi hen khan.

¹⁷Chun, mi tla rangah thutluangvawrnâk siam ding hen Pathian lei thu tla lakah bâwlpu lalchem siherhnâk nei kho mi leh zumhkâi tak asi khonâk ding

hen zeizawng ah a unau tla hâwi hen a hawng um mi chu a rangah a herh rerêng asi.

¹⁸Amah tak nih lêmnâk tawng hen a tuar rawh ruangah lêmnâk an tawng mi tla chu a ẵngpi na kho asi.

Hebrai 3

¹Pathian kawh bîk mi, Kristian ka unau tla Bâwlpw Lalchem si ding hen Pathian nih a fial mi, kan zumh mi Jisu chu zauhnik u!

²Pathian in ah Mosi chu a rianẵuan ah zumh a kâi hâwi hen, Jisu chu a ruattu Pathian rianẵuan ah zumh a kâi asi.

³In saktu chu in ngâk hen zah a kâi dauh hâwi hen Jisu chu Mosi ngâk hen a rokual dauh asi.

⁴In kip hi dirhtu an nei chiau le, zeizawng dirhtu lam chu Pathian asi.

⁵Pathian in ah Mosi chu to-aw hâwi hen zumh a kâi le, Pathian nih mâilei ah a sim ding mi thil tla thusimtu asi.

⁶Krist chu Pathian in ah thuneitu fapa asi hâwi hen zumh a kâi asi, kan lungum mi lakah kan râlẵhatnâk leh kan lungnâk bir tak hen kan tleih thlir chun Pathian in kan si.

⁷Chun, Thlarau Thenhlimh nih, "Tusûn hin a aw-hâu nan theih chun,

⁸ramkaro ah Pathian lakah nan hel le, nan nik chiam hâwi hen khan nan thinlung changtir lah u.

⁹Chunah chun Thlâktu tla nih, kum sâwmli sung ka thilti muh ko hen, an ka lêm le, an ka nik," Pathian nih a ti.

¹⁰Churuangah, chu minung tla tlûnah ka rothawk rawh, zumh an kâi lo kumza le, ka thupêk tla khawm an êl.

¹¹Churawhchun ka rothawk le, thu ka tiamh na; 'Dinhnâk ka pêk na mi ram ah an lût rîlmâl lai loh,' " ti hen.

¹²Unau tla, a thiamthih u, chu lo chun Pathian nung chu bângtâk ding hen nan lakah âu sungah mawh lunglonâk thinlung sual a hawng um lebang lai.

¹³Pathian lasui thu nih, "Tusûn an ti sung hin, nisiai hen a fawrh tawnh u. Chu lo chun, nan lakah mi âumawh sual perpetnâk ah lungkhungtir hen nan um sual lebang lai, ti hen kan sinah a mang asi.

¹⁴A bul ah lungnâk kan nei mi kha a dawng tiang hen tleih thlirtu kan si chun Krist tingpitu tla kan hawng si.

¹⁵Pathian lasui thu nih, "Tusûn ah a aw-hâu nan theih chun Pathian lakah an hel liau mi hâwi khan, nan thinlung khauhtir lah u, ti hen a sim.

¹⁶Asi chun, âu tla nih me Pathian aw-hâu theih ko na hen a lakah heltu tla kha? Aigupta ram thawk hen Mosi nih a suakpi na mi zawzawng kha an silo mazei?

¹⁷Chun, âu tlûnah me kum sâwmli sung a lungsilo mi kha? Mi zapi thilsual titu an ruak ramkaro ah a ril phut mi tla tlûnah khan asi lo mazei?

¹⁸Chun, ê-aw ngâilo tla sinah cho lo chun âu sinah me a dinhnâk ah lût lo ding hen siatsirh hen Pathian nih a tiamh?

¹⁹Chum, lunglonâk ruangah an lût kho lo rawh asi ti kan theih.

Hebrai 4

¹Churuarah, kan ãih ding asi, chu lo chun Pathian dinhnâk ah lûtnâk ding thutiam um ko hen, nan lakah âumawh a dinhnâk ah lût kho lo hen nan um lebang lai.

²Thâwngthâng Tha an sinah sim asi hâwi hen kan sin khawmah sim asi. Sikhawmsele, an thu theih nih chun anmah tla a ãatvaktir lêm lo, an thu theih chu an lung tak lo ruangah.

³Kannah lung rawh mi tla hi chu lût hen Pathian sinah kanna dîn asi. "Ka thinthawk le, ka siatsirh hâwi khan ka sinah lût hen anna dîn lai lo," a ti hâwi khan. Laikulh siam tîr thawk hen a rian tla chu ãuan thluh rawh khawmsele ti thu hi a sim asi.

⁴Ni sarih ni thu hi Pathian lasui thu nih zei mun ah mawh a sim asi: "A ni sarih ni ah chun Pathian nih a rianṭuan zawzawng a dinhtâk rawh," ti hen.

⁵Chun, hi thu ber hi, "Ka dinhnâk ah chun an lût lai loh," a ti nawlh.

⁶Chun, zeimaw mi chu Pathian sinah dinhnâk ah lût ding mi an um. Thâwngthâng Ṭha thusim theih masatu tla chu an lung lo ruangah Pathian sinah lût hen anna dîn lo.

⁷Kum tamtak nûnah David lakah a sim mi "Tusûn," ti hen ni dang a ruat nawlh asi. Pathian lasui thu nih, "Tusûn hin a-aw nan theih chun, nan thinlung changtir lah u," ti hen.

⁸Josua nih chun annih tla chu Pathian dinhnâk ah a kalpi na rawh asi, chun Pathian nih chu nûnah chun ni dang thu a sim lai lo rawh.

⁹Chun, Pathian mi tla rangah chun ni sarih ni Pathian dinhnâk hâwi kha dinhnâk a um nget rih.

¹⁰Âuzawng lût hen Pathian sinah â dîn mi chu Pathian nih a rianṭuan a dinhtâk hâwi hen a rianṭuan a dinhtâk.

¹¹Kan lakah âukhawm ê-aw ngâilo ruangah an lût kho lo phah mi hâwi kan si lonâk ding hen Pathian sinah lût leh a dîn ding hen kan chelh ri kan suah lai.

¹²Pathian thu hi a nung le, thil a ti kho le, nâmsâu hâr nih nei um mi ngâk hen a hâr dauh le, nungnâk leh thlarau liahchân leh thlik phel dip rê hen a tuk kho le, thinlung ah dawn mi leh tum mi tla lakah thu a nei chawlh kho asi.

¹³Thilsiam Pathian mitmuh ah a lang lo mi rerêng a um loh. A thilsiam zawzawng chu a mitmuh ah langh leh pho hen a um. Kanmah ngelchel nih kan thilti zia kan phuang ngelchel ding mi chu amah sinah asi.

¹⁴Chun, vâh ah kal rawh hen, bâwlpu lalchem rokual Jisu Pathian Fapa chu kan nei ruangah kan thu lung hi kan pawm thlir lai.

¹⁵Bâwlpû lalchem kan chak lo zia hawng kan theihpi phanh lo mi neitu kan si lo, kanmah hâwi hen thu zeizawng ah lêmnâk tawng rawh mi, sual lam chu sual lo mi, neitu kan si dauh.

¹⁶Chun, khuaruatnâk kan tawng khonâk ding leh bawmh kan herh tikah țangpinâk leh zângfahnâk kan tawng khonâk ding hen zângfahnâk laltophah chu râlțha tak hen kan naih lai.

Hebrai 5

¹Bâwlpû lalchem vial chu mi zapi tla lakah mi thîm an si, chun an ruangrûl ah Pathian sawnh ding hen ruat asi. Anih nih chun sual tla rangah thilpêk tla leh bâwlnâk tla a ap tâwn.

²Amah khawm zeizawng ah mi chak lo asi ruangah zeikhawm theihlo tla leh mi diklo tla sinah â dawnhkho tâwn asi.

³Chun, chubang ruangah chun mi rangah a ap piak na hâwi hen mah rang khawmah sual tla ruangah ap bâk lo kho asi loh.

⁴Chun, âukhawm nih chu chawnglawmhnâk chu mah lakah anna ngaih loh, Aron hâwi hen Pathian kawh mi an si lêm lo chun.

⁵Chu hâwi ber hen, Krist khawm chu bâwlpû Lalchem ah siam ding hen mah â rokualtir loh. Chu ngâk chun Pathian nih, "Nang lam chu ka Fapa na si, tusûn hin na Pa ka si," a ti.

⁶"Nang lam chu Melkizedek umdân hâwi hen, Zungzâl bâwlpû na si lai," ti hen, mun dangah a sim hâwi ber khan.

⁷Jisu chu tual ah a um liau tla ah khan thihnâk lakah amah sansuah khotu Pathian sinah fâk tak hen âu leh mitthli tlâ rê bû hen thlachamnâk leh ngiarnâk tla a ap le, nâu tak hen â pêknâk ruangah Pathian nih a ngâi piak.

⁸Pathian Fapa si menza khawmsele a thil tuar tla lakah ê-aw ngâi â sîn.

⁹Chun, rangtling tak hen siam a hawng si rawh chun ê-aw ngâitu zawzawng rangah zungzâl ruangsuaahnâk phûrpi a hawng si rawh.

¹⁰Chun, Melkizedek hâwitê hen bâwlpu lalchem si ding hen Pathian nih a phuang.

¹¹Chu thâwnghâng lakah chun thu tamtak sim ding kan nei, nan theih lo tuktarâi ruangah nan sinah simhfiang a har asi.

¹²A tik thu ruat hen sîntirtu si rawh ding hen nan a dawh le, Pathian thu phûr dawmhtîrnâk sîntir nan herh nget rih. Buh rum silo hen nûk din herh nget mi hâwi nan si rih.

¹³Nûk hâng rinh mi vial chu a dik leh diklo mi an theih lo, fasêm an si ruangah.

¹⁴Buh rum lam chu upa sia leh ƣa theih ding hen ei â zawngh mi rangah asi.

Hebrai 6

¹Krist thu dawmhtîrnâk sim lo rawh hen, upat lei kan fûk lai rawh, rianƣuannâk mangtlâklo tla leh Pathian leikângah lungnâk tla,

²baptisma tla leh kut ngauh leh mithi thawknawlnhâk leh zungzâl lâirêlnâk leikâng sîntirnâk tla lungphûm chu phûm nawlh lo rawh hen.

³Pathian nih rem a ti chun chu chu ka ti ngelchel lai. Mâilei kan fûk lai!

⁴Chun, âuzawng a tlû rawh mi tla chu rim nawlh ding hen zeitin kîrtir nawlh kho an si lai? Veikhat chu thinlung fiangtir hen an um rawh. Chun, van thilpêk tem rawh hen Thlarau Thenhlimh vauh mi anna ting.

⁵Pathian thu chu a ƣa ti theihfiang hen thiltikhonâk tik a um ding mi tla an theih,

⁶chun chu nûnah chun an tlû rawh! Chubang hâwi mi tla chu rim nawlh ding hen kîrtir nawlh kho an si loh, Pathian Fapa chu Kraws ah khenhbêk nawlh leh zatlâng lakah an mualphoh ruangah.

⁷Tual nih a tlûnah ruahtî a tlâ tâwn mi chu a dâwp tikah ƣuantu tla rangah thlâi herh tak a suah piak tâwn, chu chu Pathian nih mal a sâwm mi asi.

⁸Sikhawmsele, ling tla leh bua tla a suah chun zeirang khawmah a tlâktlâi loh, Pathian siatbarh ƣihnungkâi nâk ah a um le, chun mei hen duah asi lai.

⁹Sikhawmsele, unau tla, hi hâwi hen sim menza khawmsele, nannih lam chu kan theihfiang na. Na ruangsua hnâk lakah mi malsâwmnâk tha dauh tla nanna ting ti kan theih asi.

¹⁰Tuah nan ti liau hâwi hen, Kristian unau tla sinah Pathian min hen dâwnnâk ruangah nan ti mi leh nan tângpi na nâk tla chu philh ding hen Pathian chu mi replo asi loh.

¹¹Sikhawmsele, a dawngh tiang hen lungumnâk rangtling tawng ding hen nan taimâk chuh dân hâwi khan taimâk suah chiau ule, thungâi ka nan duh na.

¹²Nanna dâithlanh ding ka nan duh na loh, a lung mi tla leh felfê mi tla leh Pathian thutiam anna ting rawh mi tla hâwi hen nan um ding hen ka nan duh dauh na.

¹³Pathian nih Abraham sinah thu a tiamh liau khan ti ngelchel ding hen siatsirh hen thu a tiamh. Amah ngâk hen rokual dauh a um lo ruangah thu a tiamh liauah amah min sâl hen siat a sirh.

¹⁴"Mal ka nan sâwm ngelchel lai le, na thlâk tla ka pungtir lai," ti hen a tiamh rawh.

¹⁵Chun, felfê tak hen a tuar ver nûnah thutiam chu Abraham nih a tawng taktê.

¹⁶Minung nih siat anna sirh chun anmah ngâk hen rokual dauh mi sâl hen siat anna sirh tâwn asi; anna êlnâk kip khawmah birhtirnâk ding hen siatsirh hi thu dawnghnâk asi tâwn.

¹⁷Chun, Pathian nih a thutiam rotingtu ding tla sinah chun a thiltum a dangtir kho lo zia theihtir khun duh hen siatsirh hen a birhtir.

¹⁸Thil panih a um: Pathian a âwkrâwl kho lo mi leh thlakthleng kho lo mi chu, Kannih a sinah himnâk tawngtu tla hi kan mâilei ah lungumnâk chu bir tak tleih thlir ding hen fâk tak hen fawrh kan si.

¹⁹Kan, thinlung tla rangah thir cha-âi hâwi hen hi lungumnâk hi kan nei, chu chu himnâk leh diknâk asi, chun vâ Pathian Biakin puanzar pîn leiah mun thenhlimh sung khet ah a lût.

²⁰Chunah chun Jisu chu Melkizedek hâwi hen, zungzâl bâwlpu lalchem si rawh hen, kan ruangrûl ah mâitâwntu ah a lût rawh.

Hebrai 7

¹Hi Melkizedek hi Salem lalchem asi le, Chungnungchem Pathian bâwlpu asi. Abraham chu râltuknâk ah lalchem tla thah hen a hawng kîr nawlh liauah Melkizedek nih a dawng le, mal a sâwm.

²Abraham nih thil zeizawng parâ lû ah pakhat a pêk. (Melkizedek min umzia pakhatnâk chu "Repnâk Lalchem," tinâk asi. Chun, a min umzia panihnâk ah chun, Salem lalchem asi ruangah, "Remnâk Lalchem" tinâk khawm asi.)

³Melkizedek chu a pa khawm, a nu khawm, a thlâktu tla âukhawm, a suaknâk khawm, a thihnâk thu rerêng khawm rîn asi loh. Anih chu Pathian Fapa hâwi asi. Zungzâl hen bâwlpu asi kumza.

⁴Churuarangah, a rokual zia chu ruat nik u! Chun, chi thlâktu Abraham nih râltuknâk ah a lâk mi thil zawzawng parâ lû ah pakhat Melkizedek rangah a pêk.

⁵Levi thlâk tla lakah bâwlpu rian tingtu zawng nih Dân hâwi hen Israel mi zapi lakah parâ lû ah pakhat lâk ding thu an tawng, chu chu anmah unau tla lakah asi, chu tla chu Abraham thlâk tla sin khawmah asi.

⁶Melkizedek chu Levi chi thlâk silah khawmsele Abraham lakah parâ lû ah pakhat a lâk le, Pathian thutiam tla tingtu chu mal a sâwm rawh.

⁷Thungâi tak chun malsâwmtu chu mal a sâwm mi ngâk hen a rokual dauh asi.

⁸Bâwlpu tla leikâng thu lam chu a thi kho mi minung tla nih an lâk le, sikhawmsele Melkizedek lam chu Pathian lasui thu nih a sim hâwi hen a nung kumza mi nih parâ lû ah pakhat a lâk asi.

- ⁹Chun, Abraham nih parâ lû ah pakhat a pêk liauah Levi parâ lû ah pakhat lâk tâwntu khawm nih a pêk bâk ti kho asi.
- ¹⁰Levi chu a suak pal lo rih ruangah Melkizedek nih a dawng liauah anih chu a thlâktu Abraham nih thlâk ding hen a um ving rawh ti kho asi.
- ¹¹Levi thlâk lakah bawlpu sinâk dân hawi hen, Dân chu Israel mi zapi sinah pêk asi. Chun, tuah Levi thlâk bawlpu tla rianṭuan chu rangtling mi si sele, Aron bawlpu sinâk dân hawi silo hen, Melkizedek bawlpu sinâk dân hawi hen bawlpu dang hawng um ding zeikhawm a herh lai loh.
- ¹²Bawlpu sinâk chu a hawng a dang rawh ruangah dân thu chu dangtir bâk a herh rerêng asi.
- ¹³Chun, kan Lalpa, a thu an sim tâwn mi kha, phun dang mi asi; chun chu phun lakah mi âukhawm mâichâm ah an ṭuan dah loh.
- ¹⁴Kan Lalpa chu Juda phun lakah a hawng suak ti fiang tak hen a lang; hi phun hen anna tlainâk, bawlpu leikâng thu ah, Mosi nih zei thu khawm a sim lo.
- ¹⁵Chun Melkizedek hawi hen bawlpu dang, thupêk dân hawi hen siam si lo mi,
- ¹⁶nungnâk thiltikhonâk dawng neilo hawi hen siam si dauh mi a hawng um awt chun kan thusim kha thungâi hen a fiang khun lai.
- ¹⁷"Nang lam chu Melkizedek hawi hen zungzâl bawlpu na si lai," ti Pathian lasui thu nih a sim ruangah.
- ¹⁸A chak lo leh a ṭatvak lonâk ruangah thupêk li chu lawnh asi.
- ¹⁹Dân thu nih chun zeikhawm a rangtlingtir lo dangâiah. Lungumnâk ṭha dauh, Pathian kan naih tâwnnâk hi lûtpi hen a hawng um sek lehlam.
- ²⁰Chun, Pathian siatsirhnâk khawm a um. Midang tla bawlpu an si liauah siatsirhnâk zeikhawm a um lo.

²¹Sikhawmsele, siatsirhnâk leikâng thu ah a sinah, "Lalpa nih siat a sirh le, a thinlung a lêt lai loh: Zungzâl bâwlpu na si lai," a ti liau khan Jisu chu bâwlpu asi rawh.

²²Chu hâwi ber a dang dauh hen Jisu chu thudântuk tha dauh birhirtu a hawng si rawh.

²³Chun chu lakah chun anna dangnâk a um: bâwlpu tamtak an um le, an rianțuan an zultpeh kho lo; a san chu thihnâk ruangah asi.

²⁴Jisu lam chu zungzâl um kumza mi asi le, a bâwlpu sinâk chu midang sinah pêk kho asi lo.

²⁵Chun, amah lakah Pathian sinah hawng kal mi tla chu a dawng tiang hen ruang a suah kho asi, amah tla rangah thlacham piak hen zungzâl hen a nung kumza ruangah.

²⁶Churuarangah, Jisu kan pawisherh tla pêktu Bâwlpu Lalchem asi. Anih chu a thenhlimh asi amah lakah sualnâk leh mawhnâk a nei lo, misual tla lakah thawk hen â thlei le, vân tlunlei ah lâk hen a um.

²⁷Anih chu bâwlpu lalchem dang tla hâwi hen mah sual leh zapi tla sualnâk ruangah bâwlnâk nisiar ap a herh lo. Amah â pêk liau khan mi zawzawng rangah bâwlnâk veikhat ah a lîm rawh ruangah.

²⁸Mosi dân nih chun bâwlpu lalchem si ding hen mi rangtlinglo tla a ruat le, Pathian lam nih chun dân nûnah a hawng kal mi, zungzâl rangtling hen siam mi Fapa chu a ruat asi.

Hebrai 8

¹Chun, kan thusim tla lakah hin a pawisherh chem mi chu hi hi asi:

²Chu hawi bâwlpu lalchem, vân ah khin rokual chem mi laltophah vawrhlei ah to mi, mun thenhlimh chem leh sawnhnâk puanin tatak, minung siam silo mi, Lalpa sak mi lakah rianțuantu kan nei ti hi.

³Bâwlpu lalchem vial chu thilpêk leh bâwlnâk tla Pathian sinah ap ding hen ruat an si le, chun kan bâwlpu lalchem khawm nih hin zeimawh tal ap ding nei a herh asi.

⁴Juda dân hâwi vima hen thilpêk aptu tla bâwlpu an hawng um masa ruangah tual ah hin hawng um sele chu bâwlpu asi lai loh.

⁵Chubang tla nih chun vân thil tla a telê leh a thlapelê rian an ÷uan tâwn le, Mosi nih sawnhnâk puanin a sak awt liauah Pathian simh asi hâwi khan: "Tlâng ah zûnzauh ding mi a nan zauhtir hâwi khan zeizawng siam ding hen a thiamthih rawh," a ti kha.

⁶Tuah lam chun thudântuk ÷ha dauh thulanhtu asi hâwi vima hen rian÷uannâk ÷ha dauh a hawng a ting rawh; chu thudântuk chu thutiam ÷ha dauh lakah a birhtir asi.

⁷Chu thudântuk masa chu sâwinâk um lo si sele panihnâk hi Pathian nih a ruat lo ding mi.

⁸Anmah tla sâwi hen hi bang hi a sim ruangah, "Ni tla a hawng tlung awt rawh Lalpa nih a ti, chubang ni tla lakah chun Israel dâwnsung tla leh Juda dâwnsung tla sinah chun thudântuk thar ka siam lai.

⁹Kut hen Aigupta ram thawk hen ka suakpi na liauah an thlâktu tla sinah thudântuk ka siam mi hâwi khan asi lai lo rawh; an sinah thudân ka tuk mi lakah zumh an kâi lo ruangah. anmah tla chu ngaihlo lêm ka thlâk na, Lalpa nih a ti.

¹⁰Chubang tla nûnah chun Israel dâwnsung tla sinah thudântuk ka siam ding mi chu hi bang hi asi, Lalpa nih a ti. Hi nûn chun an thinlung ah ka thupêk tla ka siah lai le, an thinlung ah ka rîn ber lai le, chun, kei an Pathian ka si lai le, annih chu ka mi tla an si lai.

¹¹A mêchem thawk hen a lianchem tiang hen an hawng ka theih ver awt rawh ruangah; mah ram ah mi leh mah khua ah mi nih Lalpa chu theih u, ti hen simh an herh lai lo rawh.

¹²An buarnâk tla lakah khua ka ruat lai le, an sual tla khawm ka theih kumza lai lo rawh," a ti.

¹³Thudântuk thar ti hen a sim ruang khan, a masa mi chu a li rawh asi. Chun, a hawng li rawh mi vial chu a vei awt vima asi.

Hebrai 9

¹Chun, thudântuk masa khawm nih khan Pathian sawnh dân tla leh laikulh ah sawnhnâk mun thenhlimh chu a nei.

²Sawnhnâk puanin an siam le, tawngtîr chem chu meichêu siahnâk, dawhkân tla, sang siahnâk tla asi, chu chu mun thenhlimh an ti.

³Chun puanzâr panihnâk pîn leiah chun sawnhnâk puanin Mun Thenhlimh Chem an ti mi chu a um.

⁴Chu lakah chun ngûn mâichâm rimthâw duahnâk leh thudântuk bâwm, ngûn hen luanh mi chu a um, chu thudântuk bâwm sungah chun manna ngûn bêl, Aron thianthunh chawrh mi, thudântuk lungtlêp tla panih dân thu rînnâk a um.

⁵A tlûnlei ah tlûnlei Pathian umnâk zauhtirnâk khuaruatnâk tophah sual ngaihdamnâk mun chu cherub nih a tlûnlei ah an thlâ an zarh. Sikhawmsele, tu lam chun zeizawng kim hen kan sim kho lai lo rih.

⁶Chun, chubang thu tla chu siam a hawng si nûnah chun bawlpû tla chu Pathian rianțuan hen sawnhnâk puanin tawngtîr ah an lût kumza tâwn;

⁷puanzâr panihnâk ah lam chun bawlpû lalchem cho kum siar hen veikhat, thisen put hen a lût tâwn, chu chu mah rangah leh misual dang tla rangah a ap tâwn.

⁸Thlarau Thenhlimh nih hi hi a theihtir le, sawnhnâk puanin tawngtîr mi a um kar vial chu Mun Thenhlimh Chem ah lûtnâk lampi chu a lang lo rih, ti hi.

⁹Chu chu tuliau hun zauhtirnâk asi. Chu hâwi vima hen, thilpêk leh bâwlnâk tla khawm an ap tâwn, chubang tla nih chun sia leh tha theihnâk leikângah chun a sawnhtu chu a rangtingtir kho loh.

¹⁰Chubang chu ei ding tla, din ding tla, tawl ding dang dang hen Pathian nih thil zeizawng a siam nawlh lân karah lênglei dân rang cho ah mang an si.

¹¹Sikhawmsele, Krist chu thil tha a um rawh mi tla lakah Bâwlpu Lalchem hâwi hen a hawng kal asi. A tuarnâk puanin chu a rokual hen a rangtingtling asi (kut hen sak mi asi loh, chu chu hi laikulh siam mi lakah mi asi loh tinâk asi),

¹²rokual leh rangtingtling dauh pal hen Mun Thenhlimh Chem ah mi zawzawng rangah veikhat a lût rawh, kêl tla leh chawpê tla thisen silo hen, amah thisen ruangah kan rangah zungzâl ruangsuahnâk â ting rawh.

¹³Kêl leh chawchal tla thisen leh chawlâ dap, mi nâwmtâm tlûnah theh mi men nih taksa duhnâk soal a thenhlimhtir chun

¹⁴zungzâl thlarau zârah Krist, simsâwinâk um lo mi bâwlnâk Pathian sinah a ap mi thisen nih chun Pathian nung rianṭuan ding hen kan sia leh tha theihnâk chu thilti a thi mi tla lakah chun a thenhlimh awt tuktarâi.

¹⁵Chun, hi ruangah hin Krist chu thudântuk thar thulanhtu asi, Pathian nih a kawhmi tla chu Pathian nih a tiamh mi zungzâl thudântuk masa tangah buarnâk lakah mi tlanhnâk ding hen Jisu a hawng thi rawh ruangah.

¹⁶Ro vuihnâk umnâk kipah ro vuihtu chu a thi rawh ti a lang fiang ding asi.

¹⁷Mi a thih nûnah ro vuihnâk nih thu a nei tâwn, ro vuihtu a dam sung lam chun zeikhawm asi lo.

¹⁸Chun, thudântuk masa khawm kha thisen lo hen a birhtir lo.

¹⁹Dân thu hâwi vima hen thupêk vial chu Mosi nih mi zawzawng a simh na nûnah, "Hi hi Pathian nih nan sinah a pêk thlir mi thudântuk thisen asi hi," a ti. Chawfa leh kêl tla thisen chu tî hen, mul lasen hen, husawp hen a chawmh le, Dân lasuibu leh mi zawzawng khawm chu a theh na.

²¹Chu hâwitê hen sawnhnâk puanin leh rianțuannâk thuamthil zawzawng chu, chu hâwi ber hen thisen hen Mosi nih chun a theh fâwn.

²²Chun, Dân thu hâwi hen zeizawng thisen hen thenhlimhtir an si; thisen suah lo hen sual ngaihdamnâk rerêng a um loh.

²³Chun, vân ah thil um mi tla hâwi chu chubang tla hen thenhlimhtir hen an um ding rêng asi. Vân lei thil tatak lam chu chu ngâk hen bâwlnâk ța dauh hen thenhlimhtir ding asi.

²⁴Krist chu kut hen sak mi mun thenhlimh, a tak banghtu ah chun a lût lo le; tuah Pathian mâika ah kan ruangrûl ah dîr ding hen vân ngelchel ah a lût dauh rawh.

²⁵Juda Bâwlpu Lalchem chu kum siar hen Mun Thenhlimh ah ran thisen put hen a lût le, sikhawmsele Krist lam chu mah va a pêk hen vei tamtak a lût lemang lo.

²⁶Chu hâwi si lah sele tual tuah tîr thawk hen vei tamtak a tuar rawh ding asi; sikhawmsele, tuliau hun dawnghei ah hin bâwlnâk ah va a mang chawlh hen sual veihnâk ding hen veikhat ah a hawng lang asi.

²⁷Chun mikip rangah veikhat thih ruat asi, chu nûnah Pathian lâirêlnâk a um lai.

²⁸Chu hâwi ber hen Krist khawm mi tamtak sual tla kalpi ding hen veikhat bâwlnâk ah â pêk rawh. Amah ngâktu tla chu ruangsuah na ding hen, sual bâwlnâk ding silo hen, a veinihnâk ah a hawng lang nawlh lai.

Hebrai 10

¹Juda Dân chu thil ța a hawng um ding mi tak silo hen a thlapelê cho a nei ruangah kum siar hen bâwlnâk lîlâ ap kumza mi nih chun a hawng naihtu tla chu ze tik khawmah a rangtlingtir kho awt lo.

²Chu hâwi si lah sele, a sawnhtu tla chu veikhat ah thenhlimhtir chawlh hen, sual mah lakah a theihnâk tla an nei awt lo ruangah bawl an bâng ving lai lo rawh ma?



- ³Sikhawmsele, chubang bâwlnâk ah chun kum siar hen sual tla theih nawlnhâk a hawng um nget tâwn lehlam asi.
- ⁴Chawchal tla leh kêl tla thisen hen chun sual tla vehtir kho asi loh.
- ⁵Churuang chun, Krist chu laikulh ah a hawng kal liauah, "Bâwlnâk leh thil ap na duh lo le, ka rangah taksa na ka timhtuah piak dauh.
- ⁶Pum duah thil ap leh sual rangah bâwlnâk tla lakah lâwmnâk rerêng na nei lo.
- ⁷Churawhchun, kei nih, 'Aw Pathian, ngâinik, Dân lasuibu lakah ka thu rîn asi hâwi hen, na duhzia ti ding hen ka hawng kal,' ka ti," a ti.
- ⁸A tlûnah hin: "Bâwlnâk tla, thil ap tla, pum duah tla, sual rangah bawlnâk tla na duh lo le, chubang lakah chun lâwmnâk na nei lo," a ti le, chubang tla chu dân hâwi hen ap asi.
- ⁹Churawhchun, "Aw Pathian, na duhzia ti ding hen hinah ka um a ti. Krist bâwlnâk kha a dirh khonâk ding hen bâwlnâk li chu a lâk ving rawh.
- ¹⁰Pathian nih ti ding hen a duh mi hâwite hen Jisu Krist nih a ti ruangah amah taksa lakah mi zawzawng rangah veikhat â pêknâk nih chun sual lakah mi hawng kan thenhlimhtir asi.
- ¹¹Chun, Juda bawlpu kip nih nisiar rianṭuan hen, sual zeik khawmah veih kho lo mi bâwlnâk tla ap kumza hen an dîr tâwn.
- ¹²Krist lam chu sual rangah zungzâl bâwlnâk pakhat cho a ap nûnah Pathian vawrhlei ah a to rawh.
- ¹³Chunah chun Pathian nih a leido tla a kê tangah a siah na lân lo chu a ngâk kumza.
- ¹⁴Thil ap pakhat nih chun sual lakah mi a thenhlimhtir na rawh mi chu zungzâl rangah a ranglingtir na rawh.
- ¹⁵Chun, Thlarau Thenhlimh khawm nih hawng kan thehtir fâwn.

¹⁶A masachem hen: "Chubang ni tla nûnah chun an sinah thudân ka tuk ding mi chu hi hi asi, Lalpa nih a ti: An thinlung ah ka thupêk tla ka siah lai le, an dawnruatnâk tla ah ka rîn lai," ti hen a sim.

¹⁷"An sual tla leh an buarnâk tla ka theihkumza lai lo rawh," a ti rawh.

¹⁸Churuang chun, sual ngaihdam si rawh mi tla rang chun sual veihnâk ding hen bâwlnâk dang a herh lo rawh.

¹⁹Unau tla, Jisu thihnâk ruangah mun thenhlimh chem ah kal khonâk kan nei.

²⁰Jisu nih chun puanzâr chu pal hen--chu chu a taksa tinâk asi, lam thar leh nungnâk lampi hawng kan awng piak rawh.

²¹Pathian dâwnsung lakah bâwlpu rokual tak kan nei rawh.

²²Kan thinlung ah sia leh ðha theihnâk sual thiang rawh hen, kan taksa tla tî fîm lakah ðawl hen lungnâk rangtling nei hen, thinlung tak put hen Pathian kan naih lai.

²³A thutiam zawt ding hen Pathian kan lung ruangah kan lungum mi thu chu bir tak hen kan tleih lai.

²⁴Chun, dâwt leh thil ðha leh a ðangpi tawnh ding hen kanna ruat tawnh lai.

²⁵Mi zeimaw mi nih pumhnâk an bângtâk hâwi hen kan um ding si loh. Chu ngâk chun, Lalpa Ni chu a nâi ti kan theih hen kanna fawrhtawnh khun lai.

²⁶Thudik theihnâk rangtling chu kanna ting nûnah thilsual kan ti êu chun sual tla rangah bâwlnâk a um rîlmâl lai lo rawh.

²⁷Lâirêlnâk ðihnungkâi tak leh dotu tla khangh hepnâk thinthawknâk mei a um dauh lehlam lai.

²⁸Mosi Dân siarlo mi chu theih tu panih pathum mawh thu hen, siherhnâk tel lo hen thah an si.

²⁹Pathian Fapa zei siarlo hen, thudântuk thisen amah thenhlimhtirnâk chu thil salam a ruat hen zângfahnâk thlarau vûirâmtirtu tla chu zei hâwi tluk rêpnâk fâk dauh tuar tlâk si ding hen me nan ruat?

³⁰"Phulam rerêng chu keimah nih ka lam lai le, keimah nih ka rulh lai," a ti mi leh, "Lalpa nih a mi tla chu lâi a rêl piak na lai," a ti mi khawm kan theih.

³¹Pathian nung kut ah tlûk chu thil ÷ihnungkâi tak asi!

³²Sikhawmsele, a lânah Pathian chêunâk hen chêtir a nan um nûnah tuarnâk fâk tak nan tuar liauah donâk nih a nan neh na lo mi kha theihkumza u.

³³A zeimazâwn chun zauhnawmh leh hamhnâk khawm tuar hen zauhnuam ah siam hen nan um le, a zeimazâwn chun an nehsawh mi tla lakah nehsawh hen nan um bâk.

³⁴Rêng a tlâ mi tla tuarnâk chu nanna ting bâk rawh; thil ÷ha dauh um kumza ding mi chu nan nei ti theih hen nan thil an lâk piak na mi tla khawm lâwm tak hen nan tuar kho asi.

³⁵Chun, lâwmman cherkhet tawng ding mi lakah nan lungnâk thlâu lah u.

³⁶Pathian duhzia ti ding leh a thutiam chu nanna ting khonâk ding hen felfênâk nan herh asi.

³⁷Pathian lasui thu nih a sim hâwi khan: Sâwtlotê ah a hawng kal ding mi chu a hawng kal awt, a tlâi lai lo rawh.

³⁸Sikhawmsele, ka mi rep chu lungnâk hen a nung lai, dunglei ah a kîr lam chun amah lakah lâwmnâk rêng ka nei lai loh," a ti.

³⁹Sikhawmsele, kannih lam chu vei ding hen dunglei kîr mi kan silo le, lungnâk nei hen rangsuak mi kan si dauh.

Hebrai 11

¹Chun, lungnâk hi thil muh lo rih mi lakah a um ngelchel asi ti lungumnâk leh theihnâk chu asi.

²Chu lakah chun tuan ah mi tla nih khan an lungnâk ruangah Pathian sawr an lawh.

³Lungnâk hen laikulh hi Pathian thu hen siam asi rawh ti kan theih, chun thil muh kho mi tla chu muh kho lo thawk hen siam asi.



⁴Lungnâk hen Abel nih chun Kain ngâk chun bâwnâk tha dauh Pathian sinah a pêk; lungnâk ruangah Pathian nih a thilpêk tla a pawm piak le, mi rep asi phah. Chun, chu lungnâk ruang chun Abel nih thih nûnah thu a sim nget rih asi.

⁵Lungnâk hen Enok kha thihnâk theihlo ding hen lâk ving hen a um le; chun, Pathian nih a lâk ving ruangah muh kho asi lo rawh; lâk ving hen a um lânah Pathian lawmhkâng mi asi ti Pathian thu nih chun a thehtir rêng asi.

⁶Sikhawmsele, lungnâk lo hen âukhawm nih Pathian lawmhtir kho asi loh. Pathian sinah a hawng kal mi nih chun Pathian chu a um ti leh amah hâwltu tla sinah lâwmman pêk mang asi ti lung ding asi.

⁷Lungnâk hen Noa chu thil a lang lo rih mi leikâng thu ah Pathian simhkannâk thu a ngâi le, Pathian thu zâwt hen a dâwnsung tla rangsuaknâk ding hen lawng a sâi; chu nih chun laikulh chu a mawhtir rawh. Churuang chun, lungnâk ruangah repnâk chu Pathian thawk hen â ting rawh.

⁸Abraham chu Pathian nih a kawh liau khan lungnâk hen Pathian nih pêk ding hen a tiamh mi ram leiah a suak le, a kalnâk lei ding khawm theihlo hen a suak le, a ram chu a mâk rawh.

⁹Lungnâk hen ram tiamh ah khan mi ram ah châm mi hâwi cho hen a châm ko le, thutiam munkhat hen ro a tingpi ding mi Isak leh Jakob hen puanin ah an um.

¹⁰Khuapi lungphûm nei mi, Pathian timhtuah leh siam mi chu Abraham nih a ngâk kumza dangâiah.

¹¹Lungnâk hen Sari khawm nih a tiamhtu chu zumhkâi hen a ruat ruangah a tar nûnah fa pâwi khonâk â ting.

¹²Chun, Abraham chu thi khawmsele vâh ah ârfi hâwi a tam hen, tisumsumriat kapah sep rêl chawklo hâwi hen an hawng suak rawh.

¹³Chubang zawzawng tla chu lungnâk nei hen an thi rawh le, Pathian thil tiam tla chu ting lo hen; sikhawmsele chubang chu lâk tak thawk hen an muh

le, an lawmh na rawh, tual ah hin ram dang mi leh khualtlâwnng salam mi an si ti anna theih.

¹⁴Chubang tla nih chun anmah rang ding ram an hâwl ti a langhtir.

¹⁵Chun, an suaktâk mi ram chu lungkham sele chu an kîr nawlnhâk ding a remkâng an tawng rawh ding asi.

¹⁶Ram tha dauh, vân ram duh mi an hawng si le; Pathian nih an Pathian ti hen an kawh ding chu a ningzak loh, an rangah khuapi a timhtuah piak na rawh ruangah.

¹⁷Lungnâk hen Abraham chu thutiam tla ting hen, "Isak lakah hin na thlâk tla an hawng suak lai," ti hen simh si menza khawmsele,

¹⁸Pathian nik hen a um liauah a fapa neihlem chu bâwlnâk ah pêk ding hen â tîm rawh.

¹⁹Abraham nih Isak chu thihnâk lakah mi Pathian nih a thawh kho lai ti a ruat ruangah Abraham nih thihnâk lakah mi Isak chu a tawng nawlh taktê rawh.

²⁰Lungnâk hen Isak nih chun thil a hawng tlung ding mi tla thu ah Jakob leh Esau mal a sâwm na.

²¹Lungnâk hen Jakob nih chun a thi awt bâiah Josef fa tla chu mal a sâwm vevê na, a thianthunh pâr rinhsan hen Pathian a sawnh.

²²Lungnâk hen Josef nih chun a thi awt bâiah khan Israel tla Aigupta ram thawk hen an suak ding mi thu a sim le, a taksa tla leikângah thu a pêk

²³Lungnâk hen Mosi a suak liau khan fasêm mêltha tak asi an ti ruangah thla thum kar a nu leh a pa nih an thuh le, lalchem thupêk khawm an thih loh.

²⁴Lungnâk hen Mosi nih chun a hawng upat nûnah khan Pharoa fanu lakah a fapa si a duh lo le,

²⁵sâwtlotê rangah sual nuamchên ngâk hen chun Pathian mi tla hen nehsawh tuar a thîm dauh.

- ²⁶Mesia ruangah tuarnâk chu Aigupta ram rothil tla ngâk hen sum rokual dauh ah a ruat le, mâilei ah lâwmman pêk ding mi chu a chuanh ruangah.
- ²⁷Lungnâk hen lalchem thinthawknâk chu ÷ih lo hen Aigupta ram a kaltâk le, muh kho lo mi Pathian chu a muh ruangah a tuar rarâm asi.
- ²⁸Lungnâk hen Kalkanh Kût leh kawtkâ kâwm ah thisen theh kha mang asi le, veihtu vânmifial nih Israel tla fapa tîr chu a thah lonâk ding hen.
- ²⁹Lungnâk hen tual hul lakah kal hâwi hen Tipi Sen kha Israel tla an tan le, Aigupta mi tla nih tan bâk an tum le, tî nih a nîm hep na.
- ³⁰Lungnâk hen Jeriko khua kulh kha ni sarîh Israel tla nih an hêl nûnah a chim rawh.
- ³¹Lungnâk hen Rahab â zuar mi nu kha lunglo tla lakah thah bâk asi lo le, thlingthlâktu tla a lawmh na ruangah.
- ³²Chun, zeî me kan sim vîma lai rih? Gideon thu, Barak thu, Samson thu, Jephtha thu, David thu, Samuel thu leh khuavâng tla thu chu sim awt sele tik nih hawng ka tinh awt loh.
- ³³Chubang tla nih chun lungnâk hen ram tla an lâk le, thu dik an ti le, thutiam tla anna ting, chakeibaknei kâ tla an chîp piak.
- ³⁴Mei ÷ihnungkâi mih khonâk an nei le, nâmsâu thah ding mi lakah an âwl, chaklonâk lakah mi chaktir hen an um, tuknâk lakah chun rât tak hen an um, ramdang mi kawrsen tla an neh na.
- ³⁵Lungnâk hen nunau tla nih an unau rualsia thi hen thawknawlh mi an tawng nawlh. Midang tla sawkphak hen an um, thawknawlh nâk ÷ha dauh anna ting khonâk ding hen, ruangsuh na ding an duh lo;
- ³⁶midang tla khawm nih nehsawh leh vuak tla an tuar, chu lo khawm chu rêngkhimh leh rêngin ah khumh hen an um,
- ³⁷lung hen an seh na, thing lahnâk hen an tan na, nâmsâu hen an thah na, dawrâ leh kêl vun aih hen, pâm tak hen, hamh tak hen, nehsawh hen an um,



³⁸chubang tla rangah chun laikulh hi umnâk tlâk asi loh! Ramkaro leh tlâng tla ah tek le zâm mi hâwi hen anna sawk le, pûk tla, khur tla ah an um.

³⁹Chu tla nih chun an lungnâk ruangah sawr tawng rawh hen, Pathian thutiam chu anna ting lo rih.

⁴⁰Kanmah tel lo hen annih chu rangtlingtir hen an um lonâk ding hen Pathian nih kanmah leikang thu ah thil zeimawh tha dauh khun a timhtuah rawh ruangah.

Hebrai 12

¹Hawng kan theihpitu mi zapi tamtak kan kiangkam ah um mi ruangah hawng kan nawktirtu zawng leh soal kanmah lakah um mi chu kan lawnh lai. Chun, Jisu kan lungnâk ngauhnâk ah rangtlingtirtu lei chu zauh hen, kan mâilei ah tekzuamnâk ding a um mi lakah felfê tak hen kan tek vima lai.

²Anih nih chun a mâilei ah lâwptlonâk um mi ruangah kraws ah thihnâk chu zei siarlo hen, tuah Pathian laltophah vawrhlei ah a va to rawh.

³Nanna dâithlanh hen nan lungdawng lonâk ding hen Jisu chu misual amah huatu tla lakah â dawnhkho zia chu ruat u.

⁴Sual do hen thih phah rê hen nanna tang lo rih.

⁵Fawrhâk thu fa tla nunsimh hâwi hen Pathian nih a nan simh na mi kha nan philh rawh na maw? "Ka fa, Lalpa nunsimhnâk chu siarlo lah, amah simhfâi hen na um chun a dâithlanh lah.

⁶Lalpa nih chun a dâwt mi chu a rêp tâwn le, fa hâwi hen a lawmh mi vial chu a vuak tâwn asi." ti hi.

⁷Nan tuar mi hi nanmah nunsimhnâk asi; fa tla lakah ti mi hâwi hen Pathian nih nan tlûnah a ti asi hi. Pa nunsimh dah lo fa âu me um tâwn?

⁸Fa zawzawng nih an tawng tâwn mi nunsimhnâk nan tawng lo chun fa tak silo hen, lakfa nan si lai.



⁹Taksa leiah pa tla nih nun hawng kan simh le, chubang tla chu kan zah na; chu ngâk fâk dauh hen, kan nungnâk ding hen thlarau lei Pa thu thu hen kan um awt lo ma?

¹⁰Taksa leiah kan pa tla nih sâwtlotê ðha an ti hâwi vima hen nun hawng kan simh le, Pathian lam nih chun a thenhlimhnâk chu kannâ ting kho bâk ding hen kan ðhatnâk ding hen nun hawng kan simh dauh asi.

¹¹Chun, nunsimhnâk tla hi tuar liauah chun lawmhkâi hen a lang lo le, lungsiatkâi tak hen a lang dauh tâwn; tuar nûnah lam chun chu lakah nunsimh hen um rawh mi tla rangah chun nungnâk rep lungumnâk lâwmman a tawng tâwn.

¹²Chun, kut uai tla chu zangh u, nan khûp chak lo mi chu chaktir u.

¹³Kê a khêng mi chu kal kho lo asi ngâk hen damh asi lehlam ding hen lampi ding ah kal u.

¹⁴Mi zawzawng hen remnâk leh thenhlimhnâk nei ding hen a ðang u, chubang thenhlimhnâk lo hen âukhawm nih Lalpa an muh lai loh.

¹⁵Âukhawm Pathian zângfahnâk lakah mi nan tlû lonâk ding hen leh thil khâ chu a hawng ðhang le, mi tamtak a nawktir na mi hâwi hen nan si lonâk ding hen a thiamthih u.

¹⁶Âukhawm hur hen Esau hâwi hen taksa mi si hen, fapa upa dauh sinâk buh busuan khat ah zuartu nan si lonâk ding hen a thiamthih u.

¹⁷Chu nûnah chun, a pa malsâwmnâk chu ting ding duh hen mitthli tla bû hen ngiar khawmsele thinlung lêtnâk a nei lo ruangah a tawng lo rawh ti nan theih asi.

¹⁸Nannih lam chu Sinai Tlâng tawng kho mi meialh hen, sûmdum hen, mûi hen, thlipi hen, tâwtawrâwt rihâu hen thusim hâu umnâk tla kha tleng mi nan si lo le,

¹⁹chubang hâu theih tu tla nih chun thu dang rerêng an sinah sim lo rawh ding hen an ngiar.

²⁰"Ran tiang khawm nih tlâng chu an tawngh chun lung hen thi thlo seh ding asi," ti thupêk kha an tuar kho lo rawh.

²¹An thil muh khawm chu thungâi ÷ihnung a kâi; chun, Mosi nih, "Ka lâu le, thungâi ka thir," a ti.

²²Zion Tlâng leh Pathian nung khua, vôn Jerusalem, a vôn mifial sâng tamtak tla umnâk chu nan hawng tleng rawh.

²³Vôn ah an min rîn hen an um mi Pathian fa tîr tla pumhnâk lawmhkâi takah nan hawng tleng rawh. Mi zawzawng lâirêltu leh mi rep thlarau tla rangtling hen siamtu Pathian sinah nan hawng tleng rawh.

²⁴Jisu, thudântuk thar siamtu, Abel thisen ngâk hen thisen ÷ha dauh thetu sinah nan hawng tleng rawh.

²⁵Jisu nih nan sinah thu a sim mi êl lo ding hen a thiamthih u. Pathian nih Mosi mang hen tual ah thu a sim mi ngâi duhlotu tla men ruang an suak lo chun, kannih vôn thawk hen thu hawng kan simh mi ngâi duhlotu châng chu zeitin ruang kan suak kho lai?

²⁶Chu liau chun a aw-hâu nih tual hi a ninh, sikhawm sele tuah hin, "Veikhat chu tual lâwng silo hen vôn khawm ka ninh teh lai," ti hen a tiamh.

²⁷"Veikhat chu ka ninh nawlh lai," ti mi nih hin, thil â nîn lo mi tla chu a um kumza khonâk ding hen thilsiam tla chu ninh leh ÷hial hen a um awt ti fiang tak hen a langhtir asi.

²⁸Chun, ram ninh kho lo mi kanna ting ruangah kanna lâwm lai. Amah lawmhkâng a um hen, ÷ih leh zah tâk bû hen, lâwm tak hen Pathian kan sawnh lai;

²⁹kan Pathian hi mi khanghtu mei asi ruangah.

Hebrai 13

¹Krist ah unau nan si ruangah a dâwt tawnh u.

²Khual tla tlûnah dâwtnâk suah philh lah u; zeimaw mi nih theih lo thlo hen vôn mifial tla lawmh hen thil an ti.



³Rêngin ah um mi tla chu mah khawm tâng bâk mi hâwi hen a ruat ule, chun hamh tuartu tla chu mah khawm tuar bâk mi hâwi hen a ruat ule, theihkumza na u.

⁴Mi zawzawng lakah umhnâk hi chawnglawmh hen um seh, nupi pasal khawm zumhkâi tawnh hen um seh. Hur leh tângdang pawmtu tla chu Pathian nih lâi a rêl lai.

⁵Nan thinlung put zia chu tangka sunhsaknâk tel lo si seh, nan thil neihlem tla tlûnah chun lungâwi u. Pathian nih, "Zeitik khawmah ka nan thlahthlamh rîlmâl lai lo le, ka nan kaltâk rîlmâl lai loh," a ti ruangah.

⁶Chun, râlt̃ha tak hen, "Lalpa chu hawng ka t̃angpitu asi, ka lâu lai loh; minung nih zeitin a ka ti kho lai," kan ti tâwn asi.

⁷Nan hotu, Pathian thu an simh natu chu theihkumza ule, an umdân chu châwng ule, an lung dân chu ruat u.

⁸Jisu Krist chu mazân khawm, tusûn khawm ah leh kumleza hen a mahmun hen a um kumza.

⁹Sîntirnâk kip leh sîntirnâk chê tak nih lam dik lakah mi kalpi hen um lah u; thinlung hi Pathian zângfahnâk hen birhtir chu a t̃ha, ei ding tla lakah a pêk tuk lo hen; chu leikâng lungkhamtu tla chu chubang lakah chun t̃hatvknak an tawng lêm lo.

¹⁰Bâwlp̃u tla Juda biakin ah riañuantu tla nih chun kan mâichâm ah bâwlnâk thil an ei kho lo.

¹¹Juda bâwlp̃u lalchem nih chun soal tla rangah bâwlnâk ap ding hen Mun Thenhlimh Chem ah ran tla thisen chu a lûtpi tâwn; sikhawmsele, ran ruak tla chu kulh dâilêng ah an duah.

¹²Chun, Jisu khawm nih amah thisen tak hen soal lakah mi zapi thenhimhtir na ding hen kulh lênglei ah a tuar rawh.

¹³Chun, amah an zauhnawnhnâk chu phurh hen kulh dâilêng ah amah sinah kan kal lai.

- 14**Hi tual ah hin khua mun bir kan nei loh, khuapi a hawng um ding mi chu kan chuanh dauh asi.
- 15**Chun, Jisu zârah bâwlnâk hâwi hen sawrnâk chu Pathian sinah kan ap kumza lai; chu chu kan aw-hâu tla hen a min hen lâwmthu tla kan sim kumza lai tinâk asi.
- 16**Sikhawmsele, thil tha ti leh a ẵngpi tawnhnâk hi philh lah u, chubang hâwi bâwlnâk nih chun Pathian a lawmhtir.
- 17**Nan hotu tla thu ngâi ule, an thu thu hen um u. An rianẵuan thâwngthâng Pathian sinah an sim ruangah nan thlarau tla chu dîn lo thlo hen an vêng piak na. An thu nan ngâi chun an rianẵuan chu lâwm tak hen an ti lai, chu lo chun lungsilo bû hen an ti lai le, nan rangah zeikhawm a ẵhavak lai loh.
- 18**Kan rangah thlacham u, zeizawng ah rep tak a um ding tum hen, sia leh tha theihnâk thiag tak kan nei ti dik tak hen kanna theih.
- 19**Chun, khulrang dauh hen nan sinah fial nawlh ka si khonâk ding hen Pathian sinah nan deih ding hen ka nan ngiar khun na asi.
- 20**Zungzâl thudântuk singsiah si mi nih a thihnâk ruangah Dawrâpu rokual tak Lalpa Jisu chu Pathian nih thihnâk lakah mi a thawh nawlh rawh.
- 21**Jisu Krist zârah amah duhzia ti ding leh amah lawmhtirtu ah um ding hen thlangamhtu Pathian nih chun thil tha nan duh mi zawzawng an pêk na seh. Jisu Krist sinah rokualnak zungzâl hen um seh! Amen.
- 22**Unau tla, fawrhânâk thu tâwmtê ka hawng rîn mi hi ngâi rarâm ding hen ka nan ngiar na.
- 23**Kan unaupa Timothe kha rêngin ah mi an suah rawh ti hawng theih u. A hawng tuan chun amah hen kan hawng lai le, ka nan muh na lai.
- 24**Nan hotu tla leh Pathian mi zawzawng tla kha chibai hawng ka bûk piak u. Itali ram unau tla nih chibai a nan bûk na.
- 25**Nan ektê sinah Pathian zângfahnâk um seh.

Jem

Jem 1

- ¹Jem Pathian leh Lalpa Jisu Krist to-aw nih Pathian mi phun leinih laikuh pumpi ah anna rekrâwi mi tla chu chibai a bûk na.
- ²Ka unau le tla, nan lakah nikhâk zeital hawng um khawmsele, vâñhatnâk ah ruat u.
- ³Nan lungnâk nih chun nikhâk tla ah tuarkhonâk a siam ti nan theih.
- ⁴Chun, samphâng lo leh rangtling tak hen leh tlawh lo hen nan um ding hen felfênâk nih chun thil zeizawng ah a nan siam na ti theih u.
- ⁵Sikhawmsele, nan lakah âuzawng nih finghnâk a samphâng chun mi zawzawng sinah siang tak leh zângfah tak hen pêk tâwntu Pathian chu deih seh, churawhchun a sinah pêk asi lai.
- ⁶Sikhawmsele, zumhmaih lo hen, lungnâk nei hen deih seh; zumhmaih tu chu tisumsumriat titlingtlawk, thli nih a sêm le, a vawrh mi hâwi chu asi.
- ⁷Âuzawng chu hâwi mi chu Lalpa thawk hen zeikhawm tawng ding a ruat lah seh,
- ⁸thinlung reprâi neilo hen thil a tinâk zawngah bir lo mi asi ruangah.
- ⁹Unau mipâm chu Pathian nih a sângtir tikah a lâwm seh,
- ¹⁰chun, unau minei chu Lalpa nih a niamh tikah a lâwm seh. Minei chu belhpâr hâwi hen a vei awt ruangah.
- ¹¹Nî chu a suak le, a linhnâk nih chun chawmpâr chu a uaitir le, a pâr chu a tlawng le, a dawhnâk chu a vei rawh; chu hâwi ber hen minei chu a rianñuan ah a vei lai.
- ¹²Nikhâk lakah zumhkâi tak hen um kumzatu chu a thaw a suak! Niknak chu a tuar kho tikah chun, nungnâk lallukhuh pêk asi lai; chu chu Pathian nih amah dâwttu tla rangah pêk ding hen a tiamh na mi lâwmman chu asi.

- ¹³Âuzawng nih lêmnâk an tawng liauah, "Pathian lêm ka si," ti lah seh, Pathian chu sual nih lêm kho mi zât asi lo, amah khawm nih âukhawm a lêm dah lo.
- ¹⁴Mi kip mah duhnâk sual ah kuaih leh khih hen an um chun, lêmnâk an tawng mi asi dauh.
- ¹⁵Chun, duhnâk nih chun fa a pâwi le, sual a ring tâwn, chun, chu sual chu a hawng thang rawh chun thihnâk a ring tâwn.
- ¹⁶Ka unau duhtak tla, perpet hen um lah u.
- ¹⁷Thilpêk tha leh thilpêk rangtling chu vân lei chêu tla siamtu Pathian thawk hen suak mi ver an si, â dang lo le, mûi ah khawm â chang lo.
- ¹⁸Amah duhzia hâwi hen thudik ah hawng kan ring le, a thilsiam zawzawng ah mun masachem kan luah khonâk ding hen.
- ¹⁹Unau duhtak tla, hi hi theih u, mikip nih thu ngâi ding a chuh sele, thusim chu a chuh lah sele, thin sâu seh.
- ²⁰Minung thinrunhnâk nih Pathian repnâk thiltum chu a thativakpi lo.
- ²¹Chîng dân nâwmtâm leh sual kip thawk hen a thlei u. Pathian sinah a pêk ule, chun nan thinlung ah tuh hen a um mi Pathian thu, ruang an suah kho natu chu pawm u.
- ²²A thu ngâi salam hen â lah ule, chu ngâk chun ti ding hen a tum dauh u.
- ²³Âuzawng thu ngâitu si hen, zâwttu asi lo chun thlalang lakah amah mêl fiang tak hen â zauh mi hâwi asi,
- ²⁴fiang tak hen â zauh le, a kal rawh chun zei hâwi mi me asi ti a philh sawm tâwn.
- ²⁵Sikhawmsele, ruangsuaahnâk dân rangtling minung tla suahtu chu zauh hen, zâwttu si hen, ngâi salam leh philhtu silo hen, zûltu chu a thilti Pathian nih mal a sâwm lai.

²⁶Âuzawng phung thu sunhsaktu ah a ruat hen, a lei a veng kho ʔung lo chun amah â perpet mi asi, chu hâwi minung nih phung thu ah a sawnh dân chu zeikhawm asi lo.

²⁷Hi hi Pa Pathian nih phung thu ah sawnh dân thenhlimh leh sawnh dân dik dingah a ngaih mi chu asi; ngâkʔah leh numei tla nih hamh an tuar liauah zaukhenh leh laikulh nâwmtâm buaih lo hen um hi.

Jem 2

¹Ka unau tla, kan Lalpa Jisu Krist rokualnâk Lalpa chu lungtu nan si ruangah mi thliar bîk nei lah u.

²Nanna pumhnâk in ah, ngûn pizung bunh hen, puan dawh tak aih hen mi hawng lût sele, chun, mi ngâkʔah puan sia tak aih hen hawng bâk sele,

³puan dawh tak â aih mi chu sunhsak le, a sinah, "Nang hi mun ʔha ah hin to rawh," nan ti, chun mi ngâkʔah sinah chun, "Nang chu khin ah dîr le," asi lo chun, "Ka tonâk kiangah ʔuang ah to rawh," nan ti asi chun,

⁴nan thinlung ah thliarnâk nei hen, dawnruatnâk sual put hen, simsâwitu nan si awt lo ma?

⁵Unau tla, ngâinik u, Pathian nih chun hi laikulh ah mipâm tla chu lungnâk nei tam ding leh amah dâwttu tla sinah Ram a tiamh mi luahtu ding hen a thîm na asi.

⁶Nannih lam nih chun mi ngâkʔah chu nan mualphotir dauh le, mi nei tla chu an nehsawh natu leh lâirêlnâk ah an nûk natu an silo ma?

⁷Pathian nih a nan pêk na mi min ʔha sâwitu an si.

⁸Pathian lasui thu nih, "Nangmah na dâwt hâwi hen na zâwlbâwm tla na dâwt ding asi," ti mi Pathian Ram dân nan zawt chun nan ti dik asi.

⁹sikhawmsele, mi thliar bîk nan nei chun nan sual asi, dân râwktu hâwi hen dân nih an mawhtir na asi.

¹⁰Âuzawng nih dân pakhattê a buar chun dân zawzawng a buar asi.



- 11**"Tângdang pawmtâk lah," ti mi nih chun, "Mi thah lah," a ti ber asi. Chuvachun, tângdang pawmtâk lah khawm le, mi na thah tưng chun dân râwktu na si rerêng rawh asi.
- 12**Churuangah, thawsuaknâk dân hen lâirêl piak a um ding mi tla hâwi hen thu sim ule, thil khawm ti tâwn u.
- 13**Khua a ruat lo mi minung chu Pathian nih lâi a rêl tikah a tlûnah khua a ruat bâk awt lo, sikhawmsele, khuaruatnâk nih chun lâirêtnâk a neh.
- 14**Ka unau tla, mi nih, "Lungnâk ka nei," ti khawmsele, thilti a nei tưng lo chun zeî a t̄havak lai? Chu hâwi lungnâk nih chun amah chu ruang a suah kho lai ma?
- 15**Unaupa mawh, unaunu mawh, nipuan lo hen, an nisiai buh ei ding neilo sele,
- 16**chun, nan lakah âu nih mawh, an sinah, "Lungngam tak hen kal ule, lum tak hen leh khim tak hen um u," ti ule, nungnâk rangah thil herh nan pêk tưng lo chun zeî me a t̄havak lai?
- 17**Chu hâwi lungnâk thilti neilo mi chu a thi asi.
- 18**Sikhawinsele, mi âu nih mawh, "Nangnih lungnâk na nei le, kei nih thilti ka nei asi, na lungnâk chu na thilti tel lo hen, hawng ka zauhtir rawh, chun kei nih ka thilti hen ka lungnâk chu ka nan zauhtir lai.
- 19**Pathian chu pakhat asi ti na lung mu? A t̄ha, khuri tla khawm nih an lung le, lâu hen an thir tâwn," a ti lai.
- 20**Mi â, thilti tel lo hen lungnâk ko chu zeikhawm asi lo ti na theih duh ma?
- 21**Hawng kan thlâktu Abraham nih chun a fapa Isak chu mâichâm tlûnah a ap liau khan thilti ruangah Pathian lakah mi dik asi phah lo ma?
- 22**A lungnâk leh a thilti hen munkhat hen a t̄uan le, chun, thilti ruangah a lungnâk chu a rangtling rawh ti na theih.

²³Pathian lasui thu nih, "Abraham nih chun Pathian a lung le, chu a lungnâk ruangah Pathian nih mi rep ah a ruat," ti mi kha a dik asi. Abraham chu Pathian hawipa ah siam hen a um asi.

²⁴Mi nih Pathian sinah mawhlonâk â ting tâwn mi chu lungnâk ruang lâwng silo hen, thilti ruang khawmah asi ti nan theih asi.

²⁵Chu hâwi ber hen, Rahab â zuar mi nunau khawm nih khan, Israel mifial tla a lawmh na le, lampi dang lei hen a tlungtir na liau khan thilti ruangah mawh lo hen a um asi lo mazei?

²⁶Thlarau tel lo hen taksa chu thi asi, chu hâwi ber hen thilti tel lo hen lungnâk khawm chu thi asi.

Jem 3

¹Ka unau tla, nan lakah mi tamtak hi, sîntirtu ah um lah u, kannih sîntirtu tla nih lâirêlnâk fâk khun midang ngâk hen fâk kan tawng lai ti nan theih.

²Kan ektê hen kan soal tâwn. Mi, a thusim ah palh dahlo mi chu mi rangtling asi, a taksa pum khawm vêng kho mi asi.

³Kan thu ngâi ding hen rang kê ah thîr kan barh chun kan duhnâk lei zawngah kan kaltir kho na rawh.

⁴Asi lo leh, lawng khi ruat nik u, lawng hi a lian thlo le, thli fâk tak nih ranh hen a um tâwn narêng hen a hertu nih chun a kaltir duhnâk lei zawngah a hernâk mêtê hen a her tâwn.

⁵Chu hâwi ber hen lei khawm hi taksa ɽeng mêtê asi le, thungâi â khâwng tâwn. Mei chî tê nih thingmun a khangh fâk zia hi ruat nik u!

⁶Chun, lei hi mei chî tê hâwi asi. Hi hi laikulh mei asi, chu nih chun taksa pum hi a nawmh le, kan nunchan a râwk le, rêpmun mei nih a khangh mi asi.

⁷Minung tla, ramsa tla, vâ tla, vâkrit tla leh ngâ chi kip tla ngamtir kho an si.

⁸Sikhawmsele, lei hi âukhawm nih an vêng kho lo asi, thihnâk tûr hen khat, soal vêng kho lo mi chu asi,

⁹chu hen chun kan Lalpa leh Pa chu kan sawr tâwn, chu ber hen chun Pathian hâwi hen siam mi minung tla chu hawlhsiat kan barh tâwn,

¹⁰chu lîlâ thawk hen sawrnâk leh hawlhsiat barhnâk a suak tâwn. Ka unau tla, chu hâwi ding asi lo.

¹¹Tî nâ pakhat thawk hen tî thâw leh thâwlo a suak tâwn mazei?

¹²Ka unau tla, theipi kûng ah oliv a rah kho lo, grep zûn ah theipi a rah kho lo, tî al nih tî al lo a suah kho ber lo.

¹³Nan lakah âu me fing hen thu a theihthiam kho mi um? Dawnhkhonâk leh finghnâk hen, a thil ̣a ti hen a umdân ̣a hen zauhtir seh.

¹⁴Sikhawmsele, nan thinslung ah ̣atlonâk leh nahsuahnâk leh mah kawngkâ cho ruat mi nan si chun a zûm lah u, thudik do hen âwkrâwl sim lah u.

¹⁵Chu hâwi mi finghnâk chu vân lei thawk hen a suak mi asi lo le, laikulh leh taksa leh khurî thawk hen mi asi dauh.

¹⁶Nahsuahnâk leh mah kawngkâ cho ruatnâk a umnâk ah chun nawknâk leh sualnâk chi kip a um tâwn.

¹⁷Sikhawmsele, tîunlei thawk hen a hawng suak mi finghnâk lam chu, a masachem hen a thenhlimh le, chu nûnah chun remnâk a duh, a nunnêm le, a kawmh a nuam le, zângfahnâk leh thil ̣a ti hen a khat le, thlei bîk a nei lo le, a perpê lo asi.

¹⁸Remnâk siamtu nih remnâk chi a tuh mi chu a rangah repnâk asi.

Jem 4

¹Nan lakah donâk leh elnâk tla hi a zeî thawk hen a hawng suak mi me si? Nan taksa ̣eng lakah donâk siam tâwntu chu nan duhnâk thawk hen a hawng suak mi si lo mazei?

²Thil tla nan duh le, nan nei kho lo, churawhchun thah ding nan awt, thil tla nan ngarh le, sikhawmsele nan nei kim lo, churawhchun nanna el le, nanna do, Pathian rangah nan deih lo ruangah thu nan duh mi chu nan tawng lo.

- ³Chun, nan deih le, nan deih diklo ruangah nan tawng lo, mah nuamsabut ruangah mang ding hen nan awt.
- ⁴Nannah mi zumhkâilo tla, laikulh hâwikawmh sinâk hi Pathian mêlma asi ti nan theih lo ma? Âuzawng laikulh hâwikawmh si a duh mi vial chu Pathian mêlma ah â siam tâwn asi.
- ⁵Asi lo leh, Thlarau kanmah lakah a um chun thîk rê hen hawng kan duh asi ti hi, Pathian lasui thu nih sim salam hen ma nan ruat?
- ⁶Sikhawmsele, zângfahnâk tam khun Pathian nih a pêk tâwn, churuangah Pathian lasui thu nih, "Pathian nih mi â zûm mi tla a do le, â nâutir mi chu zângfahnâk a pêk," a ti asi.
- ⁷Churuangah, Pathian thu thu hen um u. Diabol do ule, chun an tektâk na lai.
- ⁸Pathian naih u, chun anih nih a nan naih na lai. Misual tla, nan kut tla tâwl u, mi perpê tla, nan thinlung thenhlimhtir u,
- ⁹ngaihsia u, râk u, ÷ap u, nan nihnâk chu ÷apnâk ah a chang seh, nan lâwptlonâk chu zûrnâk ah a chang seh.
- ¹⁰Lalpa mitmuh ah a nâutir u, chun a nan chawnglawmh na lai.
- ¹¹Ka unau tla, pakhat leh pakhat a sâwi tawnh lah u. Âuzawng a unau sâwitu mawh, simsiattu chu Dân a simsiat hen a sâwi asi. Dân na simsiat chun Dân zâwttu na si lo le, a sâwitu na si dauh asi.
- ¹²Dân pêktu leh lâirêltu chu Pathian pakhat cho asi. Amah cho nih ruang a suah kho hen, râwk khawm a râwk kho asi. Na unau tla lâirêl piaktu ding hen âu me na rêl?
- ¹³Tuah ngâinik u, "Tusûn ah mawh thâi ah mawh, zeï khuapi ah mawh kan va kal lai le, chunah chun kum khat kan va râu lai le, tangka cherkhet tawng ding hen saw kan va leh lai," titu tla,
- ¹⁴thâituan ah nan nungnâk thu zeï hâwi hen me a hawng um awt ti nan theih lo. Sûm sâwtlotê a hawng lang le, a tlâu nawlh mi hâwi nan si ruangah.

¹⁵Chun, "Lalpa nih rem a ti chun kan dam lai le, chu chu, kha kha kan ti lai," nan ti ding asi.

¹⁶Sikhawmsele, tuah nanna zûm hen nanna khâwng, chubang khâwngnâk zawzawng chu sual asi.

¹⁷Churuangah, âuzawng thil ða ti ding theih ko hen tilo chu sual asi.

Jem 5

¹Chun, tuah nannih mi nei tla, ngâi u! Nan tlûnah hamhnâk a hawng tlung ding mi ruangah chun ðap ule, râk chiam u!

²Nan neih tla â râwk le, nan nipuan tla rûlchawn nih a ei dih rawh.

³Nan ngûn leh tangka tla a êk ver rawh le, a êk mi chu nan mawh ti theihnâk asi lai le, nan taksa chu mei kâng hâwi hen a ei hep lai. Ni dawngnâk leiah chun neih nan khawng asi.

⁴Nan lo ah lawh nan lâk mi a man nan pêk lo mi tla vûirâmnhâk leh fang pumhtu tla âu hâu chu zeizawng tikho Lalpa Pathian nâ nih a theih.

⁵Tual ah hin nuamchên hen nan um le, lâwptlo tak hen nanna siam le, thah ni ding rangah bit tak hen nanna châwm rawh.

⁶Mi rep chu nan mawhtir le, nan thah, chun anih nih chun an do na lo.

⁷Chun, ka unau tla, Lalpa hawng kal lân lo felfê tak hen um u, lo dâwngpu nih chun ruah masa leh madungchem chu a tawng lân lo felfê tak hen thlâi rah sung tak chu a ngâk tâwn.

⁸Chun, nannih khawm felfê tak hen um u. Lungnâk bir tak nei ule, Lalpa hawng kalnâk ni chu a nâi rawh.

⁹Unau tla, Pathian nih lâi an rêl piak na lo ding hen pakhat leh pakhat a sâwi tawnh lah u. Lâirêltu chu a nâi le, hawng kal ding hen tîm chia hen a um.

¹⁰Unau tla, khuavâng, Lalpa min hen thusimtu tla theihkumza u, tuarkhonâk leh felfênâk thu ah zûnzauhnâk ah mang na u.

¹¹Tuar khotu tla chu mi thawsuak kan ti na. Job felfê zia chu nan theih, Lalpa nih a dawngnâk ah a ti zia khawm kha nan theih, Lalpa chu siherhnâk leh khuaruatnâk hen a khat zia khawm kha.

¹²Sikhawmsele, ka unau tla, thil zeizawng ah thu nanna tiam liauah siat tham lah u. Tual leh vâh min sim hen mawh, thil dang min rerêng sim hen khawm siat tham lah u. Asi mi chu si ko seh, asi lo mi chu si lo ko seh, chu lo chun Pathian lâirêl hen nan um lai.

¹³Nan lakah a lawksawng mi an um ma? Thlacham seh. Anna lâwm mi an um ma? Sawrnâk la sak seh.

¹⁴Nan lakah damlo an um ma? Kawhmi Upa kawh sele, anih nih Lalpa min hen sariak thuh hen thlacham seh.

¹⁵Chun, lungnâk hen thlachamnâk nih chun damlo chu a damh lai le, Lalpa nih a chaktir nawlh lai le, a thilsual ti tla khawm ngaihdam asi lai.

¹⁶Chun, damh hen nan um khonâk ding hen, nan soal tla thutluang a vawr tawnh ule, thla a cham piak tawnh u, mi rep thlachamnâk nih chun thil fâk tak ati tâwn.

¹⁷Elija chu kanmah hâwi minung asi, anih nih chun ruah sâr lonâk ding hen semsêngai tak hen thla a cham le, kum thum leh thla ruk kar ruah a sâr lo.

¹⁸Chun, thla a cham nawlh le, vâh nih ruah a sârtir le, tual nih thlai rah tla a suah rawh.

¹⁹Ka unau tla, nan lakah âumawh, thudik thawk hen vâi sele, chun âu nih mawh hawng kîrtir nawlh sele,

²⁰âuzawng misual lampi a vâinâk thawk hen kîrtir nawlhtu chu thihnâk ah thawk hen a thlarau ruang a suah lai le, soal tamtak ngaihdamnâk a siam piak asi ti a theih seh.

1 Peter

1 Peter 1

¹Hi lasuikuat hi Jisu Krist mifial Peter thawk hen mi asi: Pontia ram, Galatia ram, Kapadokia ram, Asia ram leh Bithinia ram tla ah rekrâwi hen an um mi Pathian mi thîm tla rangah asi.

²Pathian thiltum hâwi hen Thlarau ah a nan thenhlimhtir na ding leh Jisu Krist ê-aw ngâi ding hen, a thisen hen a nan thiangtir na ding hen amah nih a nan thîm na asi. Nan tlûnah zângfahnâk leh remnâk pungtir hen um seh.

³Kan Lalpa Jisu Krist Pathian leh Pa chu sawr hen um seh: Anih nih chun a siherhnâk fâk tak hâwi hen, mithi lakah mi Jisu Krist thawknawlnhâk ruangah lungumnâk nung tawng ding hen nungnâk thar a hawng kan pêk.

⁴Churuangah, a mi tla rangah Pathian nih a siah mi malsâwmnâk rokual tak tla ting ding hen kan chuanh asi. Chu tla chu nâwmtâm kâi lo leh nawh kholonâk mun vâh ah nan rangah a nan kil piak na asi.

⁵Ruangsuaahnâk tik dawnghelei ah hawng lang ding mi timhtuah chia chu tawng ding hen lungnâk ruangah Pathian thiltikhonâk hen vêng mi chu nan si.

⁶Niknâk tamtak nan tuar mi ruangah sâwtlotê kar nan rangah ngaihsiatkâi khawmsele chu lak chun a lâwm u.

⁷An thiltum chu nan lungnâk a bir asi ti niknâk asi. Ngûn â râwk kho mi men mei hen an nik, chu hâwi hen ngûn ngâk hen a sung dauh mi nan lungnâk khawm chu um vima ding hen nik bâk ding asi. Jisu Krist a hawng lang tikah nan rangah chawnglawmhnâk leh rokualnâk leh zahkâinâk a hawng si kho hi.

⁸Amah chu muh lo khawm ule, nan dâwt le, chun amah chu tuah nan muh lo khawmsele nan zumh; chun sim kho lo rê mi lâwmnâk rokual hen a nan khattir na asi.

⁹Nan lungnâk thiltum, nan thlarau tla ruangsuaahnâk chu nan tawng ruangah.



¹⁰Khuavâng tla nih fîmkhur tak hen an hâwl mi leh an deih mi chu ruangsua hnâk thu, Pathian nih thilpêk a nan pêk awt mi chu asi.

¹¹Zeitik ah a hun asi awt, chun zei hâwi hen a hawng um awt ti muh ding anna tum; Krist Thlarau anmah lakah um mi nih chun Krist tuarnâk ding tla leh rokualnâk a hawng um ding mi tla chu tuliau hun hi a zauhtir.

¹²Tuah thudik leikâng thu an sim mi nan theih hâwi hen Pathian nih chun khuavâng tla sinah a rianṭuan chu an rangah ṭhatvahnâk rang ding silo hen, nanmah ṭhatvahnâk rang ding dauh hen Pathian chu khuavâng tla sinah â langh asi. Thâwnghâng ṭha simtu mifial tla, vânthawk hen Thlarau thiltikhonâk hen fial mi nih chun hi thudik hi a nan simh na asi. Hi thudik tla hi asi, vânmifial tla khawm nih theih an duh mi chu.

¹³Churawhchun rianṭuan ding hen nan thinsung ah a tîm u. A ringrâwn ule, Jisu Krist a hawng a langh tikah malsâwmnâk a nan pêk na ding mi lakah nan lungumnâk zawzawng chu ngauh u.

¹⁴Pathian lakah ê-aw ngâi u, nan ât liauah duhnâk nan nei mi hâwi a um ding hen nan nungnâk tla chu siang lah u.

¹⁵An kawh natu Pathian chu a thenhlimh hâwi hen, nan thilti zawzawng ah a thenhlimh u.

¹⁶Kei ka thenhlimh ruangah nanna thenhlimh ding asi," ti Pathian lasui thu nih a sim ruangah.

¹⁷Chun, thliar leh dang nei lo hen, mipik an rianṭuan hâwi chiau hen lâirêl piaktu chu Pa ti hen nan auh chun hi tual ah nan um kar vial amah zah tak hen um u.

¹⁸An thlâk natu pêk singsuan, nan umdân rawtrâilo lakah mi thil râwkkho mi, tangka leh ngûn hen tlanh nan si lo le,

¹⁹dawrâ fa simsâwinâk um lo leh nâwm kawp lo mi Krist thisen sung hen tlanh nan si ti nan theih ruangah.

²⁰Anih chu tual leh vân siam lânah Pathian thîm hen a um le, ni dawngnâk ah chun nanmah ruangah langh hen a um.

²¹Amah ruangah mithi lakah mi thawhtu leh a rokualnâk pêtktu Pathian lungtu tla nan si le, nan lungnâk leh nan lungumnâk chu Pathian lakah siah thlir u.

²²Unau tla hen a zângfah tawnh tatak ding hen, thudik zâwt hen nanna thenhlimhtir ruangah thinlung ah semsêngâi tak hen a dâwt tawnh u.

²³Thikho mi nu leh pa fa hâwi silo hen, thikholo mi fa tla, Pathian zungzâl thu nung ah suak nawlh mi nan si ruangah.

²⁴Pathian lasui thu nih, "Mi zawzawng chu belh hâwi an si; an rokualnâk zawzawng khawm chawmpâr hâwi an si. Belh chu a uai le, a pâr chu a tlawng,

²⁵sikhawmsele, Lalpa thu lam chu zungzâl hen a um kumza asi," ti hen a sim hâwi khan. Thâwngthâng Ṭha an simh na mi chu hi thu hi asi.

1 Peter 2

¹Chuvachun, sualnâk zawzawng tla, ngamlêmnâk tla, perpetnâk tla, nahsuahnâk tla, simsiatnâk tla bângtâk u:

²Fasêm suakthar tla hâwi hen thlarau lei nûk hâng thenhlimh chu duh u; chu nûk hâng chu din hen ṭhang leh ruangsuah nan si kho nâk ding hen.

³Churuarah, Pathian lasui thu nih, "Lalpa vêlneihnâk chu nan tem rawh,' ti hen, a sim hâwi khan.

⁴Lung nung, mi nih zeikhawm rawtrâilo ah an ruat mi, Pathian ngaih hen chun sung tak leh a thîm mi, Lalpa sinah chun hawng u.

⁵Lung nung tla hâwi hen amah sinah hawng u, chun thlarau lei in saknâk ah mang ding hen a pêk u. Jisu Krist zârah Pathian sinah thlarau lei bawlnâk pawmtlâk ap ding hen chunah chun, bawlpu thenhlimh nan si lai.

⁶Churuangah, Pathian lasui thu nih, "Lung sung tak chu ka thîm le, Zion ah a ki ah ka siah; chun, âuzawng amah zumhtu chu an lungdawng lai loh," ti hen a sim hâwi khan.

⁷Nannah a lungtu tla rangah chun hi lung hi sung tak asi; sikhawmsele, a lunglotu tla rangah lam chun: "In saktu tla nih mangtlâklo hâwi hen an duh lo mi lung kha, lung herh chem a hawng si rawh," ti hen a sim.

⁸Chun, Pathian lasui thu dang nih, "Hi lung hi minung tla tlûktirtu ding chu asi, anmah tlûktirtu lungpi chu," ti hen, a sim. An rangah Pathian duhzia thu an lung lo ruangah an tlû rawh.

⁹Sikhawmsele, mûi ah mi suak hen, a chêu chê tak ah lût ding hen a nan kawh natu Pathian thilchê ti tla nan langhtir khonâk ding hen, nannah chu phun thîm, Lalchem bâwlpu tla, phun thenhlimh, Pathian mi tak nan si.

¹⁰A lân chun Pathian mi tla nan si lo, tu lam chun amah mi tla nan si, a lân chun Pathian khuaruatnâk nan tawng lo, tuah lam chun khuaruatnak nan tawng rawh asi.

¹¹Duhtak le tla, khual leh khualtlâwng mi nan si ruangah thlarau do tâwntu taksa duhnâk tla bângtâk ding hen ka nan ngiar na asi.

¹²Lunglotu tla lakah nan changh zia chu tha tak si seh; chun thilsual titu tla hâwi hen, an simsiat na mi lakah chun nan thil tha tla an theihthiam tikah a hawng kalnâk Ni ah Pathian an chawnglawmh kho lai.

¹³Lalpa ruangah minung nih thuneitu ah a siah na mi sin kipah a pêk u: thuneihnâk sâng neitu Lalchem,

¹⁴thilsual titu tla rêp ding hen leh thu tha titu tla sawr ding hen amah fial mi governor sinah khawm.

¹⁵Nan thil tha ti hen mi a hawlh salam mi tla chu na bângtir ding hen Pathian nih a nan duh na asi.

¹⁶Thawsuak tak hen um u, nan thawsuaknâk chu zeï sual tal phenhtu ah mang lah u, Pathian to-aw hâwi hen um dauh u.

¹⁷Mi zawzawng chawnglawmh u, na unau lungtu tla dâwt na le, Pathian ãih u, chun Lalchem chu chawnglawmh u.

¹⁸To-aw tla, ãih tak bû hen nan hotu tla thu thu hen um u, mi ãha leh mi nunnêm tla lakah cho si lo hen, mi ãha lo tla lak khawmah nan zah na zia langhtir u.

¹⁹Pathian theihnâk ruangah tuar lo ding tuar hen, ngaihsiatnâk nan tuar rarâm chun Pathian nih chu lakah mal an sâwm na lai.

²⁰Thilsual nan ti hen, vuak nan tuar hen, felfê tak hen tuar khawm ule, sawrnâk zei me nan tawng lai? Sikhawmsele, thil ãha nan ti hen, felfê tak hen nan tuar chun Pathian nih chu lakah mal an sâwm na lai.

²¹Hi hi asi, ti ding hen Pathian nih a nan kawh na mi chu: Krist nih nan rangah a tuar rawh ruangah a nehnûn nan zûl ding hen zûnzauh dingah a nan mâk na asi.

²²Anih nih chun thilsual rerêng a ti lo, a kê thawk hen âwkrâwl thusim khawm âukhawm nih an theih dah loh.

²³Mi nih hawlhsiat an barh liau khawmah a barh na bâk lo, a tuar liau khawmah a ãhah na lo, lâirêltu rep, Pathian lakah a lungumnâk a ngauh dauh asi.

²⁴Sual leikângah thi rawh hen, repnâk leikângah kan nung khonâk ding hen Krist ngelchel nih kraws ah khan a taksa hen kan soal tla a phurh le, amah liamnâk tla hen damtir hen nan um rawh.

²⁵Dawrâ tla lampi an vâi mi hâwi nan si. Sikhawmsele, tuah lam chun nan thlarau tla Kiltu leh Dawrâpu chu zûl ding hen kîrtir nan si rawh.

1 Peter 3

¹Chu hâwi ber hen, nannih nupi tla, nan pasal tla thu thu hen um u. An lakah zeimaw mi Pathian thu lung lo na khawmsele, thu silo hen, nan nunchan thenhlimh leh zahkâinâk hen neh na ding a tum u.

²Nan nunchan chu a thenhlimh zia leh zah a kêi zia an muh awt ruangah.

- ³Nan thuam tla chu lênglei thuam sam phiar mawh, ngûn ðhi awih mawh, nipuan hen thuam mawh si lah seh.
- ⁴Chu ngâk hen chun nan sunglei diknâk tel sih hen, Pathian mitmuh ah sung tak, thlarau nunnêmnâk leh lungngamnâk dawhnâk hen thuam si dauh seh.
- ⁵Chu hâwi hen a lânah mi nunau thenhlimh Pathian lungtu tla khawm kha an pasal tla thu thu hen um chu thuam hâwi hen an mang.
- ⁶Sari khawm chu hâwi hen a um; Abraham thu thu hen a um le, a pasal chu, "Ka Lalpa," ti hen a auh. Thil zeizawng ah lâu lo hen thil ðha nan ti chun tuah Sari fanu tla nan si.
- ⁷Nannah pasal le tla khawm, nunau hi mi chaklo dauh mi an si ti theih hen chawnglawmh na u; Pathian nungnâk thilthawtpêk an tingpi natu an si ruangah. Hi hi ti ule; chun nan thlachamnâk tla kham hen a um lai loh.
- ⁸A dawngnâk ah chun nan ektê hen thinlung munkhat hen um u, a siherh tawnh u; unau tla hâwi hen a dâwt tawnh u, zângfahnâk nei tawnh ule, a nâutir tawnh u.
- ⁹Sual chu soal hen rulh lah u, siatbarhtu chu siatbarh bâk lah na u, chu ngâk chun mal lam sâwm lehlam na u. Churung chun malsâwmnâk ting ding hen Pathian nih a nan kawh na asi.
- ¹⁰Pathian lasui thu nih, "Âuzawng lâwm tak hen nung duhtu leh tik ðha muh duhtu nih chun, thu ðha lo leh âwkrâwl thusim bâng seh.
- ¹¹Sual kaltâk hen thil ðha ti seh, remnâk hâwl hen ðhâwl vima seh.
- ¹²Lalpa mit chu mi rep tla tlûnah a um le, an thlachamnâk tla khawm a ngâi kumza tâwn; sikhawmsele, thilsual titu tla chu do hen a hertâk dauh na," a ti.
- ¹³Thil ðha hi nan duh chun âu nih an râwk na lai?
- ¹⁴Thil dik ti ruangah tuartu ding nan si chun nan thaw a suak. Minung tla khawm ðih lah ule, lungdawng lah u.

¹⁵Nan thinlung tla ah Krist rangah zahnâk nei ule, Lal ah siam u. Nanmah lakah lungumnâk nan nei mi simhfiang ding hen an duh natu zawng chu sâng ding hen nunnêm leh zah tak hen a timhtuah kumza u.

¹⁶Sia leh ða theihnâk thiàng tak nei ule, an simsiat na nâk leikângah Krist ah nan umdân ða sâwitu tla chu mualpho hen an um kho lai.

¹⁷Thilsual ti ruangah tuar ngâk chun, Pathian rem tizia asi chun, thil ða ti ruangah tuar hi a ða dauh.

¹⁸Churuangah, Krist ngelchel chu nan rangah a thi le, sual tla ruangah mi zawzawng rangah veikhat a thi le, Pathian sinah hawng kan ruai ding hen mi ða lo ruangrûl ah mi ða a thi. Taksa ah chun thah hen a um le, thlarau ah chun nunh hen a um.

¹⁹Thlarau hen a kal le, rêngin ah mi thlarau tla sinah thu a sim.

²⁰Chu tla chu a lânah, Noa san ah lawng sâi liauah, Pathian nih dawnhkho tak hen a ngâk na liauah lung ding duhlotu tla thlarau an si. Lawng ah mi tâwmtê, pariat cho tî lakah mi rangsuak hen an um;

²¹chu chu baptisma zauhtirnâk asi. Baptisma chu taksa lakah mi nâwmtâm thianhnâk chu asi loh, sia leh ða theihnâk hen Pathian lakah thutiam asi dauh. Chu nih chun tuah Jisu Krist thawknawlnhâk zârah ruang a nan suah na asi.

²²Jisu chu vân ah kal hen Pathian vawrhlei ah a to rawh. Vânmifial zawzawng tla leh vân ah thuneitu tla leh thiltikhonâk tla tlûnah lâi a rêl.

1 Peter 4

¹Chun, Krist nih taksa hen a tuar rawh ruangah nannih khawm chu hâwi dawnruatnâk hen nanna chaktir ding asi. Âuzawng taksa ah buartu nih chun sual a bângtâk rawh ruangah.

²Churawhchun, tu thawk hen chun minung duh dân silo hen, taksa ah nan um kar zawng chu Pathian duhzia hen nan um ding asi.

³Chuvachun, lunglotu tla nih ti ding hen an duh mi chu a lânah nan ti tâwk ual rawh. Nan nungnâk tla chu, hurnâk tla, taksa duhnâk tla, uain duhnâk tla, zû mun ah lâwmnâk tla, zû din murui tla, ruk sawnhnâk nâwmtâm tla lakah nan um kha.

⁴Tuah anmah nuamchênnâk lakah nanna tel bâk lo ruangah lunglotu tla nih chê an ti le, an simsiat na tâwn asi,

⁵Minung leh mithi lâirêltu ding Pathian sinah chun an thâwngthâng an sim teh lai.

⁶Mithi tla chu midang zawzawng tla hâwi hen laikulh ah an um liauah lâirêl piak hen an um le, sikhawmsele, Pathian a nung hâwi hen thlarau ah an nung khonâk ding hen an sinah Thâwngthâng Thâ simh hen an um.

⁷Thil zawzawng dawngnâk chu a nâi rawh. Thla nan cham khonâk ding hen mah lakah sôm leh ringrâwn hen nan um ding asi.

⁸Zeizawng ngâk hen, semsengâi tak hen a dâwt tawnh ule, dâwnnâk nih sual tamtak a khuh tâwn ruangah.

⁹Chipchiar lo hen khual a tlungtir tawnh u.

¹⁰Mi kip nih thilpêk nan tawng mi chu Pathian zângfahnâk zauhkhenhtu tla hâwi hen, midang tla thâtnâk ding hen ti u.

¹¹Mi âuzawng nih thu a sim chun Pathian thu sim seh; mi âuzawng nih rian a tjan chun Pathian nih chaknâk a pêk hâwi vima hen tjan seh. Churawhchun Jisu Krist zârah Pathian chu thu zeizawng ah chawnglawmh hen a um kho lai. Rokualnâk leh thiltikhonâk chu zungzâl hen amah tâ asi. Amen.

¹²Ka duhtak le tla, nan lakah a dân lo hâwi hen thil zeimawh hawng tlung menza khawmsele nikhâk fâk tak nan tuar mi hi chê ti lah u.

¹³A rokualnâk langh hen a um tikah lâwmnâk rangtling hen nan um khonâk ding hen Krist tuarpitu nan si ti theih hen a lâwm dauh lehlam u.

¹⁴Krist lungtu nan si ruangah fâi nan si chun nan thaw a suak, rokualnâk Thlarau leh Pathian Thlarau chu nan lakah a um ruangah.

¹⁵Sikhawmsele, nan lakah âukhawm minung thahtu asi ruangah mawh, mifir asi ruangah mawh, thilsual titu asi ruangah mawh, midang tla thilti ah tel bâktu ruangah mawh tuar ding hen um lah seh.

¹⁶Sikhawmsele, Kristian na si ruangah na tuar chun ningzak lah, Krist min hen na tuar ruangah chun Pathian sinah lâwmthu sim lehlam rawh.

¹⁷Lâirêlnâk dawmh ding hen tik chu a hawng tlung rawh, chun Pathian mi tla chu lâirêl piak masa ding asi. Kanmah lakah â dawmh chun Pathian thawk hen Thâwngthâng Ṭha lunglotu tla dawngnâk chu zeî hâwi dek asi lai?

¹⁸Pathian lasui thu nih, "Mi ṭha tla rang men ah ruangsuah a har chun, Pathian neilo mi leh misual tla rang chun zeî hâwi dek asi lai?" ti hen, a sim hâwi khan.

¹⁹Churuarangah Pathian duhzia hâwi hen tuartu tla nih chun thil ṭha ti hen amah Siamtu zumhkâi tak sinah a kiltir na seh.

1 Peter 5

¹Chun, nan lakah kawhmi upa tla chu, kei kawhmi upa si bâk mi, Krist tuarnâk tla theihpitu, rokualnâk a hawng lang ding mi ting bâktu ding mi nih hin ka nan fawrh na.

²Nan lakah Pathian murui um mi tla chu, ti ding asi ruangah silo hen, Pathian thu hâwi a thinlung thawk bû hen, lawh duh ruang cho silo hen, thinlung ah duh tak bû hen zauhkhenh u.

³Nanmah zauhkhenh ding hen pêk an si mi tla tlûnah a laltir lah ule, murui tla zûnzauh ding hen a siam lehlam u.

⁴Chun, Dawrâpu Lian a hawng a langh tikah a rokualnâk lallukhuh nawh kholo mi chu nan tawng lai.

⁵Chu hâwi ber hen, nannih seino tla, upa tla thu ngâi u. Nan ektê hen rian a ṭuan piak tawnh ule, thinlung nâunâk hen a thum u. Pathian nih mizûm tla a do le, â nâutir mi tla lam chu, zângfahnâk a pêk tâwn ruangah.

⁶Churuangah, a tik takah chun a nan chawnglawmh kho na ding hen Pathian kut chak tak tangah chun a nâutir u.

⁷Anih nih a nan sunhsak na tâwn ruangah nan lawksawngnâk zawzawng amah lakah ap ver u.

⁸Ruat tet ule, a ringrâwn u: Nan leido Diabol chu chakeibaknei hâwi hen âumawh veih ding hâwl hen nan kiangkam ah a hûk asi.

⁹Nan unau laikulh ah um mi tla lakah chun chu hâwi tuarnâk chu a hawng tlung bâk ti theih hen bir tak a lung bû hen amah chu do u.

¹⁰Chun, Pathian zângfahnâk zawzawng a zungzâl rokualnâk ting ding hen Krist a nan kawh natu nih chun sâwtlotê nan tuar nûnah siam rangtling hen, birhtir hen, a nan chaktir na lai.

¹¹Amah sinah chun thiltikhonâk chu zungzâl hen um seh: Amen.

¹²Ka unaupa zumhkâi tak hâwi hen ka ruat mi Silas kut ah nanmah fawrhânk leh Pathian zângfahnâk tatak asi ti theihtir hen, tawi tek hen nan sinah ka rîn asi. Chu lakah chun bir tak hen dîr u.

¹³Babulon khua ah um mi, nanmah hâwi hen Pathian thîm bâk mi nan farnu nih hin chibai a nan bûk na. Ka fapa Mark khawm nih chibai a nan bûk na.

¹⁴Kristian dâwtnâk châwchawk hen chibai a bûk tawnh u. Krist ah um mi zawzawng nan ektê sinah remnâk um seh.

2 Peter

2 Peter 1

¹Simon Peter, Jisu Krist to-aw leh mifial thawk hen chun Jisu Krist kan Pathian leh ruangsuahtu repnâk ruangah zumhnâk sung tak kanna ting mi hâwi ting bâk mi tla sinah,

²Pathian leh kan Lalpa Jisu theihnâk lakah chun, nan tlûnah zângfahnâk leh remnâk pungtir hen um seh.

³Amah rokualnâk leh thatnâk zârah hawng kan kawhtu a thâwngthâng theih ruangah a Pathian thiltikhonâk nih nungnâk leh Pathian sunhsaknâk leikângah chun, thil zawzawng hawng kan pêk asi.

⁴Churuang chun, a thutiam sung tak leh rokual tak chu hawng kan pêk asi; chun, duhnâk ruangah laikulh ah râwknâk a hawng um mi hi tektâk rawh hen, chubang thutiam sung tak leh rokual tak tla ruang chun, Pathian umzia nan bâwmpi kho bâk lai.

⁵Hi ruang tak hin, taimâk rerêng suah hen, nan zumhnâk lakah chun thatnâk telh ule, nan thatnâk lakah chun theihnâk telh ule:

⁶nan theihnâk lakah chun sûmnâk telh ule, sûmnâk lakah chun tuarkhonâk telh ule, nan tuarkhonâk lakah chun Pathian sunhsaknâk telh ule,

⁷nan Pathian sunhsaknâk lakah chun unau tla dâwtnâk telh ule, unau tla nan dâwtnak lakah chun dâwtnâk singsuan nei u;

⁸hi thil tla hi nan herh mi chu asi, chubang chu tamtak nan nei chun nan tha an thawktir na lai le, kan Lalpa Jisu Krist theihnâk ah chun an chaktir na lai.

⁹Sikhawmsele, âuzawng chubang thil a nei lo mi chu, a muh khonâk a bî ruangah a muh kho lo asi; a lânah a sualnâk tâwl piaknâk chu a philh rawh asi.

¹⁰Churuangah, unau tla, a nan kawh na nâk leh an tlanh na nâk chu, birhtir ding hen taimâk suah khun u; chu hâwi hen nan ti chun nan tlû dah lai lo.

11Hi hâwi hen, Jisu Krist kan Lalpa leh ruangsuahtu zungzâl ram ah lût khonâk chu pêk nan si lai.

12Hi ruang hin chubang thil tla chu theih hen, thutak nan sinah um hen, nan bir narêng hen, chubang thil chu an theihpi na ding hen ka timhtuah kumza lai.

13Chun, ka dam kar zawzawng hin, nanmah theihpi hen nan thinlung an thawktir na ding hen ka tum asi.

14Kan Lalpa Jisu Krist nih hawng ka theihtir hâwi khan ka taksa a vei tik ding chu a tlung sawm lai ti ka theih asi.

15Ka thih nûnah khawm chu thil chu nan theihkumza khonâk ding hen ka tang lai.

16Kan Lalpa Jisu Krist thiltikho zia leh a hawng kalnâk thu kan theihtir na liau khan thiamthu fîng tla zâwttu kan si lo le, a rokualnâk muhtu tla kan si dauh.

17Anih nih chun Pa Pathian sin thawk hen rokualnâk leh chawnglawmhnâk pêk asi liau khan kan um ko asi, Chungnungchem aw-hâu chu a tlûnah hi hâwi hen a hawng suak, "Hi hi ka Fapa duhtak, ka lawmh ngâi mi chu asi," ti hen.

18Chun, tlâng thenhlimh ah a sinah kan um liau khan chu aw-hâu vân thawk hen a hawng suak mi chu kanmah ngelchel nih kan theih.

19Chun, khuavâng thusim, bir tak kan nei le, khoa a hawng dei le, deirêl ârfi chu nan thinlung ah a hawng chêu lân lo chu khâwnvâr chêu, mi nih mûi ah an sunhsak hâwi hen nan sunhsak chun a tha asi.

20Pathian lasuibu thu ah simkannâk rerêng hi mah nih simhfiang kho asi lo ti hi zeizawng ngâk hen theihkumza u.

21Simkannâk thu rerêng hi, minung duh thu hen suak asi tâwn lo le, Thlarau Thenhlimh nih mang hen mi nih thu an sim tâwn asi, chu chu Pathian sin thawk hen mi thu asi.

2 Peter 2

¹Lânah mi zapi tla lakah khuavâng telê an hawng suak mi hâwi hen, nan lak khawmah sîntirtu telê an hawng suak lai, annih nih chun anmah tla tlanhtu Lalpa chu phehtâk hen, mi râwk khonak ding hen sîntirnâk diklo an hawng lûtpi lai le, an tlûnah mawhsareh hen siatnâk an tlungtir lai.

²Chun, mi tamtak nih an hurnâk leikâng thilti an zûl lai le, chu an thilti ruang chun thudik chu simsiat asi lai.

³Chun, sîntirtu diklo tla nih chun âwkrâwl thu hen sawlehnak ah an mang na lai. Sikhawmsele, tuan thawk hen an rangah lâirêlnâk chu timh chia asi le, anmah tla tlâutirtu khawm a it lo asi.

⁴Vânmiñial tla nih thil an sual liau khan Pathian nih a zuah lo le, rêpmun ah a lawnh le, lâirêl piak ding ni ngâk hen khur mûi ah a khumh rawh.

⁵Pathian nih tuan liau laikulh kha a zuah lo le, amah sunhsak lotu umnâk laikulh ah khan buanso a tlungtir rawh; sikhawmsele, Noa repnâk thu simtu leh midang pasarih chu ruang a suah na asi.

⁶Pathian nih Sodom leh Gomorah khua tla chu Pathian sunhsaklotu tla tlûnah thu a hawng lang ding mi zauhtirnâk ah siam hen mei ah veih hen an um rawh.

⁷Lot mi rep tak, misual umdân hur tak mi ruangah ngaihsia thlo tâwn mi chu ruang a suah rawh.

⁸Chu mi rep chu an lakah um hen, a mit hen a muh na le, a nâ hen a theih na le, misual tla umdân thalo tak nih chun nisiar a thinlung an fâktir tâwn.

⁹Lalpa nih chun amah sunhsaktu tla chu lêmnâk thawk hen suah na ding leh misual tla chu lâirêl ni rang dingah siah rih ding dân a theih.

¹⁰Chubang tla chu, an taksa duhnâk nâwmtâm lei zûltu tla leh Pathian thuneiñnâk zauhnawmhtu tla an si. Hi sîntirtu telê tla hi an râłtha hen anna zûm le, tlûnlei mi rokualnâk khawm zahnâk an nei lo le, an do lehlam asi.



¹¹Sîntirtu telê tla ngâk hen chaknâk leh thiltikhonâk nei dauh mi vânmifial tla men nih Lalpa mâika ah chun, an do na hen an phiar ngam na lo mi kha an do na.

¹²Sikhawmsele, hi bang dawnruatnâk neilo tla hi, vâkrit hâwi cho hen suak an si le, thil an theihthiam lo mi tla chu an simsiat le, anmah khawm ramsa hâwi hen veih hen an um lai.

¹³Tuarnâk siamtu tla chu tuarnâk ber hen rulh an si lai, an rangah din leh ei nuamchên chu sîn nî tangah asi le, nan sinah an ei bâk khawmah, bumnâk ah um hen anna lâwm kar vial chu an rangah ningzaknâk leh mualphonâk cho asi.

¹⁴An thinlung ah chun nunau duhnâk an khattir le, sual leikang thilti an chim lo, mi chaklo tla an tlûktir le, an thinlung chu duhnâk ah an zawng nek le, Pathian siatbarh nâk tangah um mi tla an si.

¹⁵Beor fapa Balaam thilsual ti hen tangka tawng ding duhtupa lampi chu zawh hen, lampi dik chu an mâk le, lampi an vâi rawh.

¹⁶Chun Balaam chu a thilti sualnâk ruangah fâi hen a um rawh; rang hawlh kholo mi chu minung hawlh hen a hawlh le, khuavâng thilti diklo chu a khap asi.

¹⁷Chu minung tla chu tikang va ah vândâwm thlipi nih a ranh mi hâwi an si, chubang tla rang ding chun, mûi thûk tak an mun rang dingah Pathian nih a ruat asi.

¹⁸Diklonâk ah an um mi tla thawk hen an suak rawh mi tla chu tlûktir na ding hen taksa duhnâk sual leh hurnâk an mang tâwn.

¹⁹Anmah chu râwknâk sal si bû hen, midang rangah sal suaknâk thu an simh na tâwn, âuzawng hawng kan nehtu chu sal ah hawng kan siamtu an si.

²⁰Lalpa leh Jisu Krist an theih ruangah, laikulh nâwmtâm tla tektâk nun khawmah, chu lak ber ah an tâng nawlh hen, neh hen an um nawlh chun, an umdân madung chu a li mi ngâk hen â râwk dauh lai.

²¹Lampi rep chu theih nûnah, thupêk thenhlimh an sinah a kiltir na mi chu kaltâk ngak chun, lampi rep chu theihlo dâidua na sele an rang a ̣ha dauh lai.

²²"Ui amah luak leiah a kîr le, vawkpi â ̣awl thiang rawh mi khawm nêngthû ah a bual ding hen a kîr nawlh" ti thufing dik tak chu an tûnah a hawng lang rawh asi.

2 Peter 3

¹Duhtak tla, tuah nan sinah ka rîn mi hi ka lasuikuat veinihnâk asi. Chu lasuikuat tla nih chun nan thinlung dawnruatnâk thenhlimh chu thawhtir ding hen ka ti asi.

²Khuavâng thenhlimh tla thu simhkan leh nan mifial tla kê ah leh, Lalpa leh Ruangsuahtu thupêk chu nan theihkumza ding hen ka nan duh na asi.

³Hi hi a masa hen theih ule, ni dawnghei ah chun, anmah duhnâk hâwl vima a um hen, mi mah kawngkâ cho ruattu tla an hawng um lai.

⁴"Ka hawng kal lai, a ti mi chu a hawng lo ne? A zeih ah a um? Hawng kan thlâktu tla khawm an thi ver rawh, laikulh tuah tir thawk hen thil zeizawng a mahmun kumza ko ne?" ti hen an nihsanh na lai.

⁵Pathian thu hen tuan liau vên tla a hawng um le, tual khawm tî thawk hen siam asi.

⁶Chubang lakah chun, chu liau mi laikulh chu tî nih a nîm le, a tâu rawh ti anna theihtir lo asi.

⁷Sikhawmsele, tuah vên tla leh tual um mi tla hi, Pathian thu ber hen mei hen veih an si lai le, Pathian sunhsaklo tla lâirêlnâk leh veihnâk ding ni rangah siah an si.

⁸Sikhawmsele, duhtak le tla, hi thu kê khat hi philh lah u, "Lalpa ngaih hen, ni khat hi kum sâng khat asi le, kum sângkhat khawm hi ni khat hâwi asi," ti hi.

⁹Mi zeimaw mi nih Lalpa chu fûm hen an ruat hâwi hen a thutiam leikângah chun a fûm lo, âukhawm tlâu ding siang lo hen, mi zawzawng rim duh hen, nan lakah â dawnhkho mi asi dauh.

¹⁰Sikhawmsele, Lalpa Ni chu mifîr hâwi hen a hawng tlung lai. Chu ni tla chu vân tla chu rihâu fâk tak hen a tlâu lai le, veih asi lai; tual leh a sungah mi tla chu a kâng lai.

¹¹Chu zawng thil tla chu râwk a hawng si rawh chun zei hâwi hen um ding mi minung me nan si lai rawh ne?

¹²Pathian Ni a tlung ding na ngâk liauah, thenhlimh tak hen Pathian sunhsak hen um rawh, chu Ni ah chun vân meialh hen a zawrtir lai le, vân thil tla chu linhnâk hen a zawrtir lai.

¹³Sikhawmsele, Pathian thutiam hâwi hen vân thar leh tual thar, a sungah repnâk um ding mi chu kan ngâk asi.

¹⁴Churuangah, duhtak le tla, chu Ni nan ngâk ruangah Pathian mitmuh ah thenhlimh leh sual lo hen a sinah lungngam tak hen nan um khonâk ding hen a ɽang u.

¹⁵Kan unaupa Pawl nih, Pathian nih finghnâk a pêk mi chu mang hen nan sinah lasui a hawng rîn hâwi khan, Lalpa dawnhkhonâk chu ruangsuaahnâk tik ɽha a nan pêk na mi hâwi hen ruat u.

¹⁶Asi, chubang thu chu a lasuikuat zawzawng lakah, hi thu hi a sim asi; chu lak chun thu theih har tak tla khawm a um le, mi finglo leh mi birlo tla nih Pathian lasui thu dang an ngâi sual mi hâwi hen, an ngâi palh le, mah le mah anna tlautir phah tâwn.

¹⁷Chun, duhtak le tla, nannih nih chubang thu chu nan hawng theihkan ruangah a râring u, chu lo chun misual diklonâk ah kalpi sual a um hen, bir tak hen nan um mi nan tlû sual lai.

¹⁸Sikhawmsele, kan Lalpa leh Ruangsuahtu Jisu Krist zângfahnâk leh theihnâk ah chun hawng ɽhang u. Tuah leh zungzâl tiang hen amah sinah chun rokualnâk um seh! Amen.

1 Johan

1 Johan 1

¹Nungnâk Thu, a tîr thawk hen a um mi kha, kan nâ hen kan theih le, kan mit hen kan muh kha, kan zauh le, kan kut hen kan tawngk kha.

²Chu nungnâk chu muhkho hen a hawng um le, kan muh rawh; kan theihtir na le, chu zungzâl nungnâk, Pa sinah mi kan sinah theihtir hen a um mi chu kan simh na asi hi.

³Churuangah kan muh hen kan theih mi chu kan simh na bâk asi, nannih khawm nih Pa leh Fapa Jisu Krist kawmhnâk ah kanna khat khonâk ding hen.

⁴Chun, kanna lâwmnâk a rangtling khonâk ding hen hi bang thu hi kan rîn asi.

⁵Chun, thuchah a Fapa sin thawk hen kan theih le, nan sinah kan simh na mi chu hi hi asi: Pathian chu chêu asi, amah lakah chun mûi rerêng a um lo.

⁶Mûi lakah um ko hen "Amah hen kanna kawmh" kan ti chun âwkrâwl kan sim asi, thutak khawm chu kan zâwt lo,

⁷chun, amah chu chêu ah a um hâwi hen, kannih khawm chêu ah um kan si chun, kanna kawmh dut le, a Fapa Jisu thisen nih kan sual zawzawng a thiangtir asi.

⁸"Sual kan nei lo" kan ti chun mah le mah kanna perpet le, thutak chu kanmah lakah a um lo asi.

⁹Kan sual tla Pathian sinah thutluang kan vâwr chun, kan sual tla ngaihdam ding leh kanna replonâk zawzawng leh kan sual tla thiangtir ding hen, â rep hen zumh a kâi asi.

¹⁰"Thilsual kan ti lo" kan ti chun, Pathian chu âwkrâwl ah kan siam le, a thu khawm kanmah lakah a um lo asi.

1 Johan 2

- ¹Ka fa le, thilsual nan ti lonâk ding hen hi bang thu hi nan sinah ka hawng rîn asi. Chun, âuzawng nih thilsual a ti chun, Pa sinah simpitu Jisu Krist mi rep chu kan nei asi,
- ²anìh chu kan sual tla thutluangvâwrnâk asi, kanmah tla sual cho silo hen, laikulh zawzawng sual thutluangvâwrnâk khawm asi.
- ³Chun, a thupêk tla kan zâwt chun, chu lakah chun amah kan theih ti kanna theih asi.
- ⁴A thupêk tla zâwt ÷ung lo hen, "Amah ka theih" titu chu mi âwkrâwl asi, thutak khawm amah lakah a um lo.
- ⁵Âuzawng a thu zâwttu chu amah lakah chun Pathian zângfahnâk a rangtling tatak rawh asi.
- ⁶Pathian sinah kan um asi ti theihnâk chu hi hi asi, Pathian lakah ka um titu chu Jisu hâwitê hen a um ding asi.
- ⁷Duhtak le tla, thupêk thar lam chu nan sinah ka hawng rîn lo le, thupêk li, a tîr thawk hen nan nei mi kha ka hawng rîn dauh asi. Thupêk li chu nan theih rawh mi thu kha asi.
- ⁸Sikhawmsele thupêk thar rîn hâwi khawm ka si, chu chu Jisu Krist lakah leh nanmah lakah a lang asi, chêu tatak chu tuah a hawng chêu rawh ruangah mûi chu a vei liau chir asi.
- ⁹Mah unau hua ÷ung hen, "Chêu ah ka um" titu chu tu khawmah mûi ah a um ko asi.
- ¹⁰Mah unau zângfahtu chu chêu ah a um kumza le, amah lakah tlûknâk rerêng a um lo.
- ¹¹Mah unau huatu lam chu mûi ah a um le, mûi ah a kal asi, mûi nih a mit a châwtir rawh ruangah a kalnâk ding a theih lo asi.
- ¹²Fa le tla, Krist min hen nan sual tla ngaihdam asi rawh ruangah nan sinah ka hawng rîn asi.

¹³Pa le tla, amah chu a tîr thawk hen a um kumza ti nan theih ruangah nan sinah ka hawng rîn asi. Rualnâu tla, Misual chu nan neh rawh ruangah nan sinah ka hawng rîn asi.

¹⁴Fa tla, Pa chu nan theih ruangah nan sinah ka rîn asi. Pa tla, amah chu a tîr thawk hen a um kumza ti nan theih ruangah nan sinah ka hawng rîn asi. Tlangvâl tla, nan chak le, Pathian thu nanmah lakah a um kumza le, Misual chu nan neh rawh ruangah nan sinah ka hawng rîn asi.

¹⁵Laikulh hi zângfah lah ule, laikulh ah thil um tla khawm hi zângfah lah u. Âuzawng nih laikulh hi a zângfah chun, Pa a zângfahnâk amah lakah a um lo.

¹⁶Laikulh ah thil a um mi zawzawng, taksa duhnâk tla, mit duhnâk tla, dam kar rokualnâk tla hi Pa thawk hen suak asi lo, laikulh thawk hen suak asi dauh.

¹⁷Laikulh hi a duhnâk tla hen a tlâu liau chir asi. Pathian duhzia titu lam chu zungzâl hen a um kumza lai.

¹⁸Ka fa le tla, tik dawngnâk chu a nâi rawh, Krist Mêlma a hawng kal lai ti nan theih rawh hâwi khan, tu khawmah Krist Mêlma tamtak an hawng suak rawh, churuarah chun tik madungchem asi rawh ti kan theih.

¹⁹Annih chu kan lakah mi murui an si lo ruangah hawng kan kaltâk le, kanmah mi tak si na sele kan sinah an um vima ding asi, sikhawmsele, an ektê hen kanmah mi tak an si lo ti a lang fiang khonâk ding hen hawng kan suaktâk rawh asi.

²⁰Sikhawmsele, nannih lam chu Krist nih Thlarau Thenhlimh an tawih na ruangah, nan ektê hen thudik nan theih asi.

²¹Thutak chu nan theih lo mi asi lo ruangah ka rîn asi, nan theih ruangah leh thutak lakah âwkrâwl zeikhawm a suak dah lo ti nan theih ruangah ka rîn dauh asi.

²²Jisu chu Mesia asi ti lunglotu nûnlêm chun mi âwkrâwl âu me um? Krist Mêlma chu Pa leh Fapa lung lotu hi asi.



²³Âuzawng Fapa lung lotu nih chun Pa khawm a lung lo, Fapa lungtu lam nih chun Pa khawm a lung asi.

²⁴Thuchah a tîr thawk hen nan theih rawh mi kha nan thinlung ah kil thlir u. Chu hâwi hen nan thinlung ah nan kil thlir chun Pa leh Fapa hen nanna tâi kumza lai.

²⁵Amah Jisu Krist nih pêk ding hen hawng kan tiamh mi chu zungzâl nungnâk asi.

²⁶Nanmah tla an bum awt natu thâwngthâng chu nan sinah ka rîn asi.

²⁷Nannah lam chu Jisu Krist nih a Thlarau an pêk na le, chu Thlarau nan sinah a um kar zawng chu âu sîntir khawm nan herh lo. Thlarau nih chun zeizawng an sîntir na ruangah leh a sim mi vial chu thudik asi ruangah âwkrâwl asi lo. Thlarau sîntirnâk chu zûl ule, Krist lakah um u.

²⁸Fa le tla, amah ah um kumza u, amah a hawng a langh tikah ningzak lo hen râlṭha tak hen kan um kho lai.

²⁹Amah chu mi rep asi ti nan theih chun, mi âuzawng repnâk titu chu Pathian fa asi ti nan theih lai.

1 Johan 3

¹Ngâinik u, Pa nih hawng kan dâwt zia chu a fâk a! A dâwnâk fâk tak ruangah Pathian fa ah kawh hen kan um hi, chu hâwi chu kan si, hi ruangah laikulh nih hawng kan theih lo asi, amah chu an theih lo ruangah.

²Duhtak tla, tuhin Pathian fa tla kan si le, ze hâwi hen kan um awt ti lam chu a lang lo rih, amah a hawng a langh tikah amah hâwi hen kan um awt ti lam chu kan theih, amah chu a umdân hâwitê hen kan muh awt.

³Âuzawng Jisu Krist ah lungnâk nei mi vial nih amah â thenhlimh hâwi hen a thenhlimhtir tâwn.

⁴Âuzawng thilsual titu vial nih dân a buar tâwn, sual chu dân buarnâk asi.

⁵Amah chu sual tla veih ding hen a hawng lang rawh ti nan theih, amah lakah chun sual zeikhawm a um lo.



⁶Âuzawng amah lakah umtu nih chun thilsual a ti lo, âuzawng thilsual titu nih chun amah chu a muh lo le, theih khawm a theih lo.

⁷Fa le tla, âu perpet hen khawm um lah u, Jisu Krist â rep hâwi hen thil dik titu chu â rep asi.

⁸Thilsual titu chu Diabol lak mi asi, Diabol chu a tîr thawk hen thilsual titu asi. Pathian Fapa a hawng kalnâk san tak chu Diabol thilti veih ding hen asi.

⁹Âuzawng Pathian fa nih chun, Pathian nunchan amah lakah a um kumza ruangah thilsual a ti tâwn lo, Pathian a Pa asi ruangah thilsual a ti kho lo.

¹⁰Hi lak hin Pathian fa tla leh Diabol fa tla chu â theih asi. Âuzawng thu dik ti lotu mawh, a unau zângfah lotu chu Pathian fa asi lo.

¹¹Hi hi a tîr thawk hen thuchah nan theih mi kha asi: Kanna zângfah tawnh ding asi, ti hi.

¹²Kain misual lakah mi mah unau thahtu hâwi khan kan um ding asi lo le, zeiruang me Kain nih anih chu a thah? Amah thilti a dik lo le, a unau Abel thilti chu a dik ruangah.

¹³Unau le tla, laikulh nih a nan hua na chun chê ti lah u.

¹⁴Kan unau tla kan zângfah ruangah thihnâk ah mi kan suak le, nungnâk ah kan lût rawh ti kan theih. Âuzawng chu hâwi ti lotu chu thihnâk ah a um kumza asi.

¹⁵Âuzawng a unau huatu chu mi thahtu asi, mi thahtu âukhawm zungzâl nungnâk ting an um lo ti nan theih.

¹⁶Hi lak hin zângfahnâk chu zei me asi ti kan theih, Krist nih kan rangah a nungnâk hawng kan pêk mi lak hin, kannih khawm nih unau tla rangah kan nungnâk kan pêk bâk ding asi.

¹⁷Âuzawng laikulh sum leh pâi nei hen, a unau samphâng hen muh sele, anih chu ʘangpi lah sele, Pathian zângfahnâk chu amah lakah zeitin a um lai?

¹⁸Fa le tla, thu cho hen a zângfah lah ule, kê cho hen khawm a zângfah lah u, thilti leh thungâi tak hen si dauh seh.

¹⁹Hi lakah hin thutak ah um kan si ti kanna theih asi. Kan thinlung khawm nih Pathian lakah mi kan si ti a theih lai,

²⁰kan thinlung nih mawh hawng kan phurhtir khawmah, Pathian chu kan thinlung ngâk hen rokual dauh leh zeizawng theihkhotu asi.

²¹Duhtak le tla, kan thinlung nih mawh hawng kan phurhtir lo chun Pathian lakah kan râlṭha asi.

²²Chun, a thupêk tla kan zûl le, a mitmuh ah thil lawmhcâi kan ti tâwn ruangah, kan ngiar mi zawng kan tawng tâwn.

²³Chun, a thupêk chu hi hi asi, Jisu Krist nih thu hawng kan pêk hâwitê hen, Jisu Krist min lung hen a zângfah tawnh ding asi.

²⁴Pathian thupêk zûltu chu Pathian lakah a um kumza le, Pathian khawm amah lakah a um. Chun hi lak hin amah chu kanmah lakah a um kumza ti kan theih, Thlarau hawng kan pêk mi lak hin kan theih asi.

1 Johan 4

¹Duhtak tla, Thlarau nei ding ti thusimtu zawzawng chu lung ver lah u, thlarau chu Pathian lakah mi asi leh silo nik u. Khuavâng telê tamtak mun kipah an suak rawh ruangah.

²Hi lakah hin Pathian Thlarau chu nan theih lai: âuzawng Jisu Krist chu taksa ah a hawng a chang asi titu chu Pathian lakah mi Thlarau neitu asi.

³Sikhawmsele, âuzawng Jisu taksa ah a hawng a chang ti êltu chu Pathian lakah mi Thlarau neitu asi lo, chu chu Krist mëlma thlarau a hawng kal ding nan theih mi asi, tu khawmah laikulh ah a um chia rawh asi.

⁴Sikhawmsele, fa le tla, Pathian sinah mi nan si le, khuavâng telê chu nan neh rawh, laikulh lakah mi thlarau neitu ngâk hen nanmah lakah a um mi Thlarau chu a chak dauh ruangah.

⁵Annih chu laikulh ah mi an si ruangah, laikulh mi hâwi hen an hawlh le, laikulh ah mi tla thu an ngâi tâwn asi.



⁶Kannih lam chu Pathian lakah mi kan si. Âuzawng Pathian theih tu zawng nih kan thu an ngâi tâwn. Pathian lakah mi lo nih chun kan thu an ngâi lo, chubang lakah chun Thlarau dik leh thlarau diklo chu kan theih asi.

⁷Duhtak tla, zângfahnâk hi Pathian thawk hen suak asi ruangah kanna zângfah tawnh ding asi. Âuzawng zângfahnâk neitu chu Pathian fa asi, Pathian khawm a theih.

⁸Zângfahnâk neilotu nih chun Pathian a theih lo, Pathian chu zângfahnâk asi.

⁹Hi hi Pathian nih zângfahnâk kan rangah a langhtir mi chu asi, a Fapa neihlem laikulh ah a hawng fial mi zârah nungnâk kan nei khonâk ding hen.

¹⁰Zângfahnâk ka ti mi hi, kanmah nih Pathian kan zângfah ka ti mi silo le, amah nih hawng kan zângfah le, kan sual tla ngaihdamnâk ding hen a Fapa a hawng fial ka ti dauh asi.

¹¹Duhtak le tla, chu hâwi tluk hen Pathian nih hawng kan zângfah asi chun, kannih khawm kanna zângfah tawnh ding asi.

¹²Âukhawm nih Pathian an muh dah lo; kanna zângfah tawnh chun, Pathian kanmah lakah a um lai le, a zângfahnâk khawm kanmah lakah a rangtling lai.

¹³Amah chu kanmah lakah a um kumza mi leh kannih amah lakah kan um kumza ti, hi lak hin kan theih, a Thlarau hawng kan pêk mi lak hin.

¹⁴Chun, Pa nih a Fapa chu laikulh ruangsuahtu ding hen a hawng fial asi ti kan muh le, midang tla khawm kan theihtir na asi.

¹⁵Âuzawng Jisu chu Pathian Fapa asi titu chu amah lakah Pathian a um kumza le, anih khawm chu Pathian lakah a um kumza asi.

¹⁶Pathian nih kanmah lakah zângfahnâk a nei ti kan theih le, kan lung asi. Pathian chu zângfahnâk asi, zângfahnâk ah a um kumza mi chu Pathian lakah a um kumza asi. Pathian khawm amah lakah a um kumza asi.

¹⁷Zângfahnâk thiltum chu kan lakah siam rangtling hen a um rawh: lâirêl ding mi Ni lak khawmah râlt̃ha tak hen kan um khonâk chu hi laikulh ah hin Jisu Krist nunchan hâwi put hen kan um ruangah asi.



¹⁸Zângfahnâk lakah chun ÷ihnâk a um lo, zângfahnâk rangtling nih ÷ihnâk a nar tâwn, ÷ihnâk lak chun repnâk a um ruangah, a ÷ihtu chu zângfahnâk ah a rangtling lo asi.

¹⁹Pathian nih a hawng kan zângfah masa ruangah kan zângfah asi.

²⁰Mi nih, "Pathian ka zângfah" ti hen, a unau hua sele, amah chu mi âwkrâwl asi, a unau a muh ko mi men a zângfah lo chun Pathian a muh dah lo mi chu zeitin a zângfah kho lai?

²¹Hi hi Krist nih thu hawng kan pêk mi chu asi "Mi nih Pathian a zângfah chun a unau khawm a zângfah ding asi," ti hi.

1 Johan 5

¹Âuzawng Jisu chu Mesia asi ti lungtu chu Pathian fa asi, âuzawng a pa zângfahtu nih chun a fa khawm a zângfah asi.

²Hi hi Pathian fa tla kan zângfah ti kan theihnâk chu asi, Pathian kan zângfah le, a thupêk tla kan zâwt mi lak hin.

³Pathian kan zângfahnâk chu hi hi asi, a thupêk tla kan zûl mi hi. A thupêk tla chu kan rangah a har lo.

⁴Pathian fa vial nih chun laikulh a neh kho vima le, hi laikulh kan nehnâk chu kan lungnâk hen asi.

⁵Jisu chu Pathian Fapa asi titu cho lo nih chun âu nih me laikulh a neh kho?

⁶Jisu Krist chu â baptisnâk tî leh a thihnâk thisen hen a hawng kal asi, tî cho hen a hawng mi silo le, tî leh thisen hen asi dauh. Thlarau chu thutak asi ruangah chun, Thlarau nih chun thudik asi ti a theihtir asi.

⁷Theihpitu chu pathum an um,

⁸Thlarau, tî leh thisen chu, chu pathum tla chu thu anna rual asi.

⁹Minung nih theihpitu an pêk mi ngâk chun Pathian nih theihpitu a pêk mi chu a ÷ha dauh ti kan lung asi. Pathian nih theihpitu hawng kan pêk mi chu a Fapa thâwngthâng hi asi.



- 10**Âuzawng Pathian Fapa lungtu nih chun a thinlung ah theihpitu a nei asi, Pathian lunglotu lam nih chun amah chu âwkrâwl ah â siam le, Pathian nih a Fapa thâwngthâng a theihtir mi chu a lung lo ruangah.
- 11**Theihtirnâk chu hi hi asi, Pathian nih zungzâl nungnâk hawng kan pêk le, chu nungnâk chu a Fapa ah kan nei asi.
- 12**Âuzawng Fapa neitu nih chun chu nungnâk chu a nei, Pathian neilotu nih chun chu nungnâk chu a nei lo.
- 13**Zungzâl nungnâk nan nei ti nan theih khonâk ding hen, nannih Pathian Fapa min lungtu tla sinah hi bang thu hi ka rîn asi.
- 14**Hi hi Pathian lakah kan râłthatnâk chu asi, zeizawng amah duhzia hâwi hen kan deih chun anih nih a hawng kan ngâi piak lai ti kan theih.
- 15**Zeizawng kan deih mi chu a hawng kan ngâi piak ti kan theih chun, a sinah kan thil deih chu kan tawng rawh ti kan theih asi.
- 16**Âuzawng a unaupa nih thihnâk khawp rê hen a tling lo mi سوال ti hen muh sele, nungnâk pêk awttu Pathian chu a deih lai le, a deihnâk chu a siang piak lai. Sikhawmsele, thihnâk khawp rê سوال a um le, chu hâwi mi rang chun deih piak ding ka ti mi si lo.
- 17**Diklo nâk zawzawng hi سوال asi. Sikhawnsele, thihnâk khawp rê a tling lo mi سوال khawm a um.
- 18**Âuzawng Pathian fa nih chun thilsual a ti lo ti kan theih, Pathian Fapa nih chun a vêng kumza le, Misual nih a râwk kho lo asi.
- 19**Chun Pathian lakah mi kan si ti leh, laikulh pumpi hi Misual thu thu hen a um ti kan theih.
- 20**Chun, Pathian Fapa chu a hawng kal le, Pathian dik tak chu theih khonâk hawng kan pêk ti kan theih. A Fapa Jisu Krist hen tlâinâk kan nei mi lakah Pathian dik tak hen tlâinâk kan nei asi. Hi hi Pathian dik tak leh zungzâl nungnâk chu asi.
- 21**Ka fa le tla, pathian diklo tla lakah a dang hen a thlei u.

2 Johan

2 Johan 1

¹Upa nih chun Nunau Pathian thîm mi, ka dâwt ngâi mi leh a fa tla sinah, kei cho silo hen,

²thudik theih tu zawzawng, thudik ruangah kan sinah an um mi leh zungzâl tiang hen kan sinah an um ding mi tla khawm nih a nan dâwt na asi.

³Pa Pathian chu Fapa Jisu Krist sin thawk hen, zângfahnâk tla, khuaruatnâk tla, remnâk tla, thudik leh dâwt nâk tla nan sinah um seh.

⁴Pa thawk hen thupêk kanna ting hâwi hen, na fa tla thudik ah an um mi ka muh ruangah thungâi ka lâwm asi.

⁵Nunau: na sinah thupêk thar hâwi a rîn silo hen, a tîr thawk hen kan nei mi hâwi a rîn dauh hen, kanna zângfah tawnh ding hen ka rîn asi.

⁶Pathian thupêk hâwitê kan um ding mi chu asi, zângfahnâk ka ti mi chu. Thupêk a tîr thawk hen nan theih rawh mi chu hi hi asi, zângfahnâk ah nan um ding mi chu asi.

⁷Perpettu tamtak, Jisu Krist chu laikulh ah hin taksa hen a hawng kal ti lotu tla kha an hawng suak rawh dangâiah, chun, chu tla chu Krist Mêlma leh mi bumtu lian tak an si.

⁸Kan tjan san kha nan thlâu lonâk ding hen, a man kim tak hen nan tawng khonâk ding hen a vêng u.

⁹Âuzawng Krist sîntirnâk thu ah um lo hen a lei a kaih chun Pathian a nei lo. Âuzawng chu sîntirnâk ah a um asi chun Pa leh Fapa a nei vevê asi.

¹⁰Âuzawng chu hâwi sîntirnâk thu chu hawng put lo hen nan sinah hawng sele, nan in ah tlungtir lah u, hawlkhâ tha hen khawm thlah lah u,

¹¹hawlkhâ tha hen thlahtu chu a thilsual ti lakah chun â tel bâk asi.

¹²Nan sinah thu tamtak sim ding ka nei ruangah lasui leh lasui hâng hen rîn ka duh lo le, kanna lâwmnâk a rangtling khonâk ding hen nan sinah hawng kal hen mâitawnh hen an sawnh na ding ka lungum dauh.

¹³Nan Unaunu thîm mi fa tla nih chibai an bûk na.



3 Johan

3 Johan 1

- ¹Upa nih chun--Duhtak Gaia, ka zângfah tak mi sinah.
- ²Duhtak, thlarau leiah na rî thiang hâwi hen, taksa lei khawmah dam leh thil zeizawng ah tluang tak hen na um khonâk ding hen thla ka cham asi.
- ³Unau tla an hawng kal le, thudik ah na um kumza zia thu hawng kan simh liau khan thungâi hen ka lâwm asi.
- ⁴Ka fa tla thutak ah an um ti ka theih nûn lêm ah lawmhnâk fâk zeikhawm ka nei lo.
- ⁵Unau duhtak, unau tla chu khual an si liau khawmah zumhkâi tak hen an rangah na ÷uan piak na asi.
- ⁶Chubang tla nih kawhmi tla mâika ah na zângfahnâk thu an sim rawh. Pathian lawmh tlâk hen khual an tlâwngnâk a tluang vima khonâk ding hen ÷angpi na,
- ⁷lunglo tla thawk hen zeikhawm ÷angpinâk lâk lo hen Krist rian÷uan ding hen an suak rawh ruangah.
- ⁸Thudik rian an ÷uannâk ah kanna tel bâk ding hen annih tla chu kan bawmh bâk na ding asi.
- ⁹Kawhmi tla sinah khan thu tâwmtê chu ka rîn rawh; sikhawmsele, Diotrephe an lakah hotu si ding duhtupa nih chun ka thusim a ngâi lai lo.
- ¹⁰Churugah, ka hawng kal tik chun a thilti tla kha kan theihtir na lai le, kan lakah thil ÷ihnungkâi leh âwkrâwl thu a sim le, chu ko khawm chu tâwk ti lo hen, unau tla an hawng kal mi tla khawm chu a lawmh na lo le, anmah lawmhtu tla khawm a khap na le, pumhnâk in mi nar ding a tum na.
- ¹¹Duhtak, thil ÷halo chu châwng lah le, a ÷ha mi chu châwng dauh rawh. Thil ÷ha titu chu Pathian lakah mi asi, thilsual titu nih chun Pathian a muh dah lo.

¹²Demetria nih chun mi zawzawng sawr a tawng, thudik lak khawmah sawr a lawh asi. Kannih khawm nih kan sawr asi, kan sawrnâk hi a dik asi ti na theih.

¹³Na sinah thu rîn ding cherkhet ka nei le, sikhawmsele, lasui rînnâk leh lasui hâng hen na sinah rîn ka duh lo le,

¹⁴sâwtlotê ah an muh ding ka lungum dauh le, chun, mâitawnh hen kanna sâwn lai.

¹⁵Lungngamnâk na tlûnah um seh. Na hâwi le tla nih chibai an bûk. Kan hâwi le tla khawm a bîk hen chibai bûk na u.



Jud

Jud 1

¹Jud, Jisu Krist to-aw leh a unaupa Jem nih chun-- Pa Pathian zângfahnâk leh Jisu Krist kilkâwinâk ah um mi, kawhmi tla sinah chun:

²Khuaruatnâk tla, remnâk tla, dâwtnâk tla nan tlûnah pungtir hen um seh.

³Duhtak le tla, kanna ting chiau mi ruangsuaahnâk thu nan sinah rîn ka tum liauah, mi thenhlimh tla sinah lungnâk veikhat pêk rawh mi thu ah lungnâk ruangah raltuk ding hen an fawrh na ding hen nan sinah lasuikuat rîn ding hen a herh ti ka theih.

⁴Pathian thu lunglo tla a thup hen kan sinah an hawng lai le, Pathian zângfahnâk thu chu râwk hen anmah duhzia a um tum hen Jisu Krist kan Lal leh Hotu an duh lo, hi mawh hen an um ding mi tla hi a lân thawk hen Pathian lasui thu nih a sim ving rawh asi.

⁵Hi bang tla hi a ektê hen theih ver khawm ule, Lalpa nih chun Aigupta ram thawk hen Israel tla chu ruang a suah na le, chu nehnûn ah lunglotu tla chu a veihtir na zia an theihtir nawlh na ding ka duh.

⁶Vânmiñial anmah thuneiñnâk tâwk ri duhlo hen, an mun kaltâktu tla chu, mawhtir hen an umnâk ding Ni rokual tak rangah zungzâl chikchîn hen Pathian nih phuar hen mûi ah a siah na mi chu theihkumza u.

⁷Sodom leh Gomorah leh a kiangkam mi khua ah an um mi tla nih, vânmiñial tla hâwi hen hurnâk leikâng thil ti hen kalsualtu tla chu fiang tak hen simh an si hâwi hen zungzâl mei lakah rêp an si mi kha theihkumza u.

⁸Chu hâwi ber hen, hi bang minung tla nih hin langhtirnâk tla an nei le, chu nih chun an taksa lakah sualnâk a tlungtir le, tlûnlei mi rokualnâk chu an siarlo le, Pathian thuneiñnâk khawm an zauhnawmh asi.

⁹Mikael vânmiñial chungnungchem men kha, Mosi ruak thu ah anna êl liau khan, Diabol tlûnah thu rêl piak hen mawh a phurhtir ngam lo le, "Lalpa nih a nan fâi dauh seh a ti.

¹⁰Chu tla nih chun thu an theih lo mi tla chu an simsiat le, dawnruatnâk nei lo, ram sa tla hâwi hen, theihnâk anna suakpi mi nih chun anmah tla a râwk na.

¹¹An tlûn a pit! Kain lampi chu an zûl le, lawh uh hen Balaam soal lampi chu an zûl le, Kora a hel mi hâwi hen an hel le, amah hâwi hen veih hen an um rawh.

¹²Buh nan einâk ah annih tla chu nâwmtâm â buaih mi hâwi an si le, an zû rîtnâk ningzak theihlonâk hen, mah kawngkâ cho ruattu an si; vândâwm ruahtî a um lo mi thli nih a ranh mi hâwi an si, thing, tharvâng liau khawmah a rah lo mi hâwi leh thing a ram hen â phâwi zek le, a thi thlo mi hâwi an si.

¹³Tipi tlingtlawk hâwl hen an um le, an thilti ningzakkâi tak chu a phul mi hâwi an si, ârfi a vâi lemanh mi hâwi an si le, Pathian nih an rangah mûi thûk tak a siah piak na mi tla an si.

¹⁴Adam thawk hen san sarihnâk Enok nih chun chubang tla thu chu hun sâwt tak thawk hen a simkan rawh asi, "Ngâinik u, Pathian lunglotu tla nih an thilti leh an thusim ðhningkâi tak leh Pathian an simsiat ruangah, lâirêl ding hen Lalpa chu a vânmifial thenhlimh sâng tamtak hen a hawng awt," ti hen.

¹⁶Chubang tla chu chipchiartu leh mi simsâwitu tla an si le, anmah duhnâk hâwi vima hen an um le, an kê hen khâwngnâk thu dawh lo tak an sim le, anmah siremnâk cho tawng ding hen mi an sunhsak na tâwn.

¹⁷Sikhawmsele, duhtak le tla, nannih lam nih chun kan Lalpa Jisu Krist mifial tla nih thu an sim mi tla kha theihkumza u,

¹⁸"Tik madung ah chun, Pathian sunhsaklo leikângah, mah duhnâk hâwi vima a um hen, zauhnawmhtu tla an hawng um lai," ti hen nan sinah ka sim rawh kha.

¹⁹Chu tla chu, taksa mi, Thlarau ah um lo mi, murui dang siamtu tla an si.

²⁰Sikhawmsele, ka unau duhtak le tla, nan lungnâk thenhlimh ah chun mah leh mah a dirh hen um ule, Thlarau Thenhlimh thiltikhonâk hen um u.



²¹Kan Lalpa Jisu Krist nih a khuaruatnâk ruangah zungzâl nungnâk a nan pêk na mi chu ngâk hen Pathian zângfahnâk ah chun a kil u.

²²Mi, zumhmai hnâk neitu tla chu lungkham na u.

²³Mei lakah an um mi tla chu ruangsua h na ule, an nipuan an duhnâk soal nih a nawmh rawh mi tla chu fih hen, an tlûnah ÷ih bû hen zângfahnâk langhtir u.

²⁴Chun, nan tlû lonâk ding hen an vêng na khotu leh rokualnâk ah lâwptlo tak hen leh nâwmtâm kawp lo hen an siah na khotu,

²⁵kan Lalpa Jisu Krist zârah ruang hawng kan suahtu Pathian sinah cho chun, tik a lan rawh mi leh tuah leh zungzâl tiang hen, chawnglawmhnâk tla, rokualnâk tla, thunei hnâk tla a sinah um seh! Amen.



Thuphuang

Thuphuang 1

¹Jisu Krist thuphuang, Pathian nih a to-aw tla theihtir ding hen a sinah a pêk mi, thu hawng um sawm ding mi thu chu asi. Chu chu, a vânmifial mang hen, a to-aw Johan a hawng theihtir le,

²chu Johan nih chun Pathian thu leh Jisu Krist theihtirnâk thu leh a thilmuh tla chu a theihtir.

³Hi simhkannâk thu rêltu leh ngâitu leh a sungah thu â rîn mi pawmtu tla chu an thaw a suak. Hi zawng thil a hawng um ding mi tik chu a nâi rawh ruangah.

⁴Johan nih chun Asia ram ah kawhmi murui sarikh tla sinah: Um liau leh um rawh leh hawng um ding mi sinah leh a laltophah mâika ah thlarau pasarih tla thawk hen, Jisu Krist theihpitu zumhkâi tak, mithi lakah mi suak masachem leh tual ah lal tla lâirêltu thawk hen zângfahnâk leh remnâk nan sinah um seh. Hawng kan zângfah le, a thisen hen kan sual lakah mi hawng kan tlanh le,

⁶a Pathian leh Pa rianțuan ding hen a lalram ah bâwlpu ah hawng kan siamtu Jisu Krist sinah rokualnâk leh lâirêlnâk chu zungzâl hen um seh! Amen.

⁷Ngâinik u, anih chu sîm tla hen a hawng awt, mikip nih an muh lai le, a sunhtu tla khawm nih, laikulh ah phun zawzawng amah ruangah an thinlung a fâk lai. Chu hâwi asi! Amen.

⁸"Kei Alpha leh Omega ka si," Lalpa Pathian, um liau leh um rawh leh hawng um ding mi, zeizawng tikho nih chun a ti asi.

⁹Kei, Johan nan unanpa, Jisu ah hamhnâk tla, a ram leh a tuarnâk ah an bâwmpi natu hi, Pathian thu ruang leh Jisu theihtirnâk thu ruangah Patmos tikulh ti mi ah chun siah hen ka um le,

¹⁰Lalpa ni ah chun Thlarau hen ka hawng um le, ka dunglei ah tâwtawrâwt hâu hâwi hen hâu fâk tak hen,

¹¹"Na thil muh ding mi chu lasuibu ah rîn le, Kawhmi murui sarìh tla, Ephesi, Smirna, Pergamos, Thiatira, Sardis, Philadelphia leh Laodikei khua ah kuat rawh," a ti mi ka theih.

¹²Chun, a hawng ka sawnhtu chu muh ding hen ka her le, chun, ngûn meichêu tung sarìh ka muh.

¹³Meichêu tla lakah chun, minung hâwi, a kê pâr tiang hen puan â aih le, a ir ah ngûn ri hen â sâwm mi ka muh.

¹⁴Chun, a lû leh a sam chu vûr hen â bang mi samul hâwi hen a vâ, a mit tla chu meialh hâwi asi le;

¹⁵a kezaphah tla chu dâr a tlêu mi hâwi asi le, mei ah êr mi hâwi asi, a hâu chu tî tamtak khâwk hâu hâwi asi.

¹⁶A vawrhlei kut hen ârfi pasarih a put le; chun, a kê thawk hen nâmsâu hâr nih nei a suak le, a mêl chu nî sîn liau hâwi hen a chêu.

¹⁷Chun, amah chu ka muh kê hen mithi hâwi bang hen a kê bul ah ka tû rawh. Chun, anih nih chun a kut vawrhlei chu ka tlûnah a thâng le, ka sinah, "Tîh lah, kei masachem leh madungchem leh,

¹⁸a nung mi chu ka si, ka thi le, sikhawmsele, ngâinik, zungzâl rangah ka nung nawlh rawh asi. Thihnâk leh mithi khua tlûnah thuneihnâk chu ka nei ber asi.

¹⁹Chuvachun, na thil muh rawh mi tla leh thil um liau leh thil hawng um ding mi thu tla chu rîn rawh;

²⁰ka kut vawrhlei ârfi pasarih tla leh ngûn meichêu siahnâk pasarih na muh mi thuthup chu; ârfi pasarih tla chu kawhmi pasarih vânmifial tla an si, meichêu pasarih chu kawhmi pasarih tla chu an si.

Thuphuang 2

¹"Ephesi khua mi kawhmi vânmifial sinah chun rîn rawh: "A kut vawrhlei ah ârfi pasarih put hen, ngûn meichêu pasarih kiangah â zî lemanh mi nih khan hi bang thu hi a sim asi.



²Na thilti zia tla, na hamh zia leh na felfê zia tla, misual tla na sâithiam lo zia tla ka theih. Mifial si lêm lo hen mifial â ti mi tla chu na nik ber le, mi âwkrâwl an si ti na theih rawh le;

³felfênâk na nei ber le, ka min ruangah na tuar rawh le, na zuai lêm lo.

⁴Sikhawmsele, sâwinâk ka nan nei asi, na dâwtnâk masachem kha na bângtâk asi.

⁵Churuangah, na tlûk khalh rawh mi kha theihkumza le, rim hen thilti masachem kha ti nawlh rawh; chu lo chun na sinah ka hawng lai le, na rim lo chun na meichêu kha a mun ah mi ka thial ving lai.

⁶Sikhawmsele, hi hi na thatnâk chu asi, Nikola murui tla thilti na hua mi hi; chu chu kei khawm nih ka hua bâk asi.

⁷"Thlarau nih kawhmi tla sinah thu a sim mi hi nâ a nei mi nih chun theih na seh. "A nehtu vial sinah chun Pathian Dûm ah mi nungnâk thing rah ei ding hen thu ka pêk lai a ti," ti hen.

⁸"Chun, Smirna kua kawhmi vânmifial sinah chun rîn rawh: "Masachem leh madungchem a thi le, a nung nawlh mi nih khan hi bang thu hi a sim asi.

⁹Na hamh zia tla, na pâm zia tla ka theih le, sikhawmsele, na nei tung fâwn! Juda tak silo hen, Juda kan si titu, Setan murui lakah mi tla nih a nan simsâwi mi chu ka theih.

¹⁰Na tuar ding tla hi thih lah, ngâinik, Diabol nih nikhâk ah a nan siah lai le, nan lakah mi zeimaw mi rêngin ah a nan khumh na awt asi, chun, ni râ hamh nan tuar lai. Thih tiang hen zumhkâi hen um rawh, chuvachun nungnâk lallukhuh ka nan pêk lai.

¹¹"Thlarau nih kawhmi tla sinah thu a sim mi hi nâ a nei mi nih chun theih na seh! "A nehtu vial chu thih nihnâk nih zeitin khawm a ti lai lo, a ti" ti hen.

¹²"Chun, Pergamos kua kawhmi, vânmifial sinah chun rîn rawh: "Nâmsâu hâr nih nei mi nih khan hi bang thu hi a sim asi.

¹³Setan tophah umnâk ah na um mi kha ka nan theih; ka min na kil thlir le, Setan umnâk ah hawng ka theihpitu zumhkâi tak Antipa an thah liau khawm khan ka rangah na dik hen na lungnâk na thlâu lo asi.

¹⁴Sikhawmsele, tâwm sâwinâk ka nan nei asi, Balaam sîntirnâk thu pawmtu âu tla mawh nan umpi ruangah khan, Balaam nih chun Israel tla chu ruk sawnhnâk sa ei ding leh pung le lêngnâk ah tlûktir ding hen Balak chu a sîntir.

¹⁵Chubang hen, nang khawm nih Nikola murui tla sîntirnâk thu pâwmtu âu tla mawh na umpi asi.

¹⁶Chuvachun, rim rawh, chu lo chun na sinah ka hawng sawm lai le, ka kê ah nâmsâu hen ka hawng do na lai.

¹⁷"Thlarau nih kawhmi tla sinah thu a sim mi hi nâ a nei mi nih chun theih na seh! "A nehtu zawng sinah manna thuh mi chu ka pêk lai, lungvâr khawm ka pêk chiau na lai, chu lung tlûnah min thar â rîn mi hen, chu chu a tingtu cho lo nih chun âukhawm nih an theih lo, a ti" ti hen.

¹⁸"Chun, Thiatira khua kawhmi vânmifial sinah chun rîn rawh: "Pathian Fapa, a mit meialh hâwi mi, a kezaphah tla dâr hâwi a tlêu mi nih khan hi thu hi a sim asi.

¹⁹Na thilti zia tla, na zângfahnâk tla, na zumhkâinâk tla, na rianṭuan zia tla leh na felfê zia tla ka theih, na thilti madungchem tla chu a tîr mi ngâk hen a fâk dauh ti ka theih.

²⁰Sikhawmsele, sâwinâk ka nan nei, nunau Jezebel, Pathian khuavângnu â ti mi kha na sâithiam le, anih nih chun ka to-aw tla chu pung le lêngnâk leh milem sawnhnâk thil ei tla sîntir hen diklonâk ah a nan rui na asi.

²¹Chun, a sual rimnâk ding tik ka ruat piak le, sikhawmsele, a hurnâk sual chu a rim duh lo.

²²Chuvachun, anih chu tângdang pawmtu tla hen an sualnâk ihkhun ah chun fâk tak tuar ding hen ka lawnh na asi. Chu nunau hen an thilsual ti chu an rim lo chun tuah ka ti awt asi.

²³Chun, kei khawm nih a zûltu tla chu ka thah na lai le, kawhmi murui tla nih chun kei hi mi duhnâk tla leh an thinlung tla dawnruatnâk theih tu chu ka si ti an hawng ka theih lai, chun, nan thilti hâwi vima hen kan rulh na lai.

²⁴"Sikhawmsele nannih Thiatira ah mi zeimaw mi chu Setan thilthup thûk an ti mi tla leh sîntirnâk diklo thu pawm lotu tla tlûnah chun thilrit dang kan phurhtir na awt lo ti ka sim asi.

²⁵Nan nei chia lam kha ka hawng kal lân lo chu kil thlir u.

²⁶A dawngh tiang hen ka duhzia hâwi hen zumhkâi tak hen ʔuantu leh nehtu chu ka Pa sinah thuneihnâk ka tawng mi hâwi hen phun tla tlûnah thuneihnâk ka pêk na lai.

²⁷Tual bêl mân dip hen vuak mi hâwi hen thîr ʔhianʔhunh hen lâi an rêl piak na lai.

²⁸Chun, deirêl ârfi chu anmah tla ka pêk na lai.

²⁹"Thlarau nih kawhmi tla sinah thu a sim mi hi nâ a nei mi nih chun theih na seh, a ti" ti hen.

Thuphuang 3

¹"Sardis khua kawhmi vânmifial sinah chun rîn rawh: "Pathian Thlarau pasarih leh ârfi pasarih neitu nih khan hi thu hi a sim asi: Na thilti tla chu ka theih, thi ko bû hen nung min na put mi hi ka theih asi.

²Churung chun, a ʔhang le, na nei chia kha a thi dep lân ah chaktir rawh. Na thilti kha ka Pathian mitmuh hen a rangtling lo ti ka theih.

³Ê-aw ngâilo, na sual tla rim le, an sîntir mi tla leh na theih rawh mi tla kha theihkumza rawh. Na vêng lo chun mifîr hâwi hen zeî tikah na sinah ka hawng awt ti na theih lai lo.

⁴Sikhawmsele, Sardis khua ah an nipuan thiang mi tâwmtê nan um. Chu hâwi ti tlâk mi nan si ruangah, puanvâr aih hen ka sinah nan hawng lai.

⁵A nehtu vial chu hâwi hen puanvâr ahtir an si lai le, Nungnâk lasuibu ah mi an min chu ka râwk rîmâl lai lo, ka Pa mâika ah leh a vânmifial tla mâika ah an min ka phuang dauh lai.

⁶"Thlarau nih kawhmi tla sinah thu a sim mi hi nâ a nei mi nih chun theih na seh, a ti" ti hen.

⁷Chun, Philadelphia khua kawhmi vânmifial sinah chun rîn rawh: "Mi thenhlimh mi dik tak, David renh nei hen, âukhawm khâr lo ding hen awngtu leh âukhawm awng lo ding hen khârtu nih khan hi thu hi a sim asi.

⁸Na thilti zia tla ka theih; ka sîntirnâk thu tla na zûl hen zumhkâi tak hen na um le, thiltikhonâk tâwmtê na nei ti ka theih, âukhawm nih an khâr kho lo mi kawtkâ na mâika ah kan awng piak asi.

⁹Ngâinik, Setan pumhnâk in tla lakah mi, Juda tak silo hen Juda anna ti mi tla chu ka hawng fial lai le, na kê bul ah kan mâimûktir lai le, âuzawng nih ka nan zângfah ti an theih lai rawh.

¹⁰Felfê tak hen ka thupêk tla na pawm ruang khan, tual ah mi zapi an um mi tla nik ding hen, laikulh zawzawng tlûnah tik hawng tung ding mi lakah chun kei khawm nih ka nan hum lai.

¹¹Âukhawm nih na lallukhuh chu an lâk piak lo ding hen na thilneih chia kha kil thlir rawh, ka hawng tuan awt hi.

¹²A nehtu vial chu ka Pathian Biakin ah chun intung ah ka siam lai le, chu thawk chun an suak lai lo rawh. Chun, anmah lakah chun, ka Pathian min leh, ka Pathian khuapi Jerusalem thar, ka Pathian sinah mi vân thawk hen a hawng tum ding mi min chu ka rîn lai le, ka min thar khawm ka rîn lai.

¹³"Thlarau nih kawhmi tla sinah thu a sim mi hi nâ a nei mi nih chun theih na seh, a ti" ti hen.

¹⁴"Laodikei khua kawhmi vânmifial sinah chun rîn rawh: "Amen thawk hen theihpitu zumhkâi tak leh Pathian thilsiam bul nih khan hi thuchah hi a sim asi.

¹⁵Na thilti tla ka theih, na kîk lêm lo, na lum lêm lo mi hi, na kîk mawh na lum mawh ding hi ka nan duh asi!

¹⁶Lum t̄ung lo, kîk t̄ung lo hen na lum cho ruangah ka kê lak mi ka nan sâk awt asi.

¹⁷'Ka nei le, sum leh p̄ai ka chawng le, zeikhawm ka samphâng lo,' na ti le, sikhawmsele, mi ngâk̄tah tak leh zângfah kê tak na si zia tla, na p̄am zia leh takkaro leh mitchâw na si zia na theih lo asi.

¹⁸Minei na si khonâk ding hen ka sinah mi, ngûn thenhlimh châwk ding hen ka nan simh asi. Puanvâr na aih ding hen leh na takkaro ningzakkâi tak chu khuh ding leh na mit ah buaih ding hen mit fâk turpâng tla châwk ding ka nan simh asi, na muh khonâk ding hen.

¹⁹Ka dâwt hen ka zângfah mi tla chu ka fâi hen nun ka simh na tâwn, semsêngâi le, rim rawh.

²⁰Ngâinik, kawtkari ah dîr hen ka kik hi, âuzawng ka hâu theih hen kawtkâ hawng ka awnh chun, a sinah ka lût lai le, zânriah ka ei lai le, anih khawm ka sinah a ei bâk lai.

²¹A nehtu vial chu ka laltophah ah ka sinah ka totir lai le, kei khawm nih ka neh le, ka Pa sinah a laltophah ah ka to hâwi hen.

²²"Thlarau nih kawhmi tla sinah thu a sim mi hi nâ a nei mi nih chun theih na seh, a ti" ti hen.

Thuphuang 4

¹Chu nûnah chun langhtirnâk dang ka nei le, vân ah kawtkâ â awng mi chu ka muh. Chun, aw-hâu ka theih masa mi, tâwtawrâwt âwn hâu hâwi mi nih a hawng ka sawnh le, "Hinah hawng kê rawh, hi nûnah thu a hawng um ding mi tla chu ka nan zauhtir lai," a ti.

²Chun, lâkkhat ko ah Thlarau hen ka hawng um sawm le, ngâinik, vân ah chun laltophah ah chun âumawh a to.



³A mêl chu Jaspas leh sardonik lung hâwi ko hen a lang le, chunah chun laltophah kiangah chumchâ, emeral lung hâwi mi hi a kho.

⁴Chun, laltophah chu laltophah dang kul leh pali nih an kulh, laltophah ah chun upa kul leh pali chu puanvâr aih leh ngûn lallukhuh khuh hen an to.

⁵Chun laltophah thawk hen chun, mîmthlalek tla, aw-hâu tla, khuari tla chu ri urmar hen a hawng suak. Chun, meifâr pasarih laltophah mâika ah chun a alh le, chu tla chu Pathian thlarau pasarih tla chu an si.

⁶Chun, laltophah mâika ah chun tisumsumriat thlalang hâwi, kristal lung hâwi hi a um le, chun, laltophah kulh dak hen thilnung pali dung leh mâi hen a khat phak mi an um.

⁷Thilnung pakhatnâk chu chakeibaknei hâwi asi. Thilnung panihnâk chu chawpê hâwi asi. Thilnung pathumnâk chu minung hâwi asi. Thilnung palinâk chu mupi zuang liau hâwi asi.

⁸Chun, thilnung pali nih chun thla paruk chiau an nei le, an sunglei leh lênglei mit hen a khat phak, sîn leh zân hen la sak an bâng lo; "Lalpa Pathian zeizawng tikhotu, a um rawh mi leh, a um liau mi leh a hawng um ding mi chu, a thenhlimh, a thenhlimh, a thenhlimh," ti hen.

⁹Chun, thilnung pali tla nih chun laltophah ah a to mi, zungzâl hen a nung kumza mi chu la rokual tak hen an chawnglawmh hen lâwmthu an sim kipah,

¹⁰Upa kul leh pali tla chu laltophah ah a to mi mâika ah chun an lallukhuh chu siah hen zungzâl nung kumza mi chu an mâimûk le;

¹¹"Nang kan Lalpa leh kan Pathian, rokualnâk tla, chawnglawmhnâk tla, thiltikhonâk tla tawng tlâk na si. Nangnih zeizawng na siam le, nangmah duh thu hen nungnâk na pêk na asi," an ti.

Thuphuang 5

¹Chun, laltophah ah a to mi kut vawrhlei ah chun lasuibuzual, sunglei leh lênglei hen â rîn mi, singsiahnâk pasarih hen singsiah thlir mi chu ka muh.



- ²Chun, vânmifial chak tak, aw-hâu fâk tak hen, "Âu me lasuibuzual hi kêu hen a singsiahnâk tla samh tlâktu um?" ti hen a âu mi ka muh.
- ³Sikhawmsele, vân khawmah, tual khawmah, tual tang khawmah, lasuibu chu kêu hen a sunglei zauh khotu âukhawm an um lo.
- ⁴Chu lasuibu chu kêu hen a sunglei khawm zauh tlâktu âukhawm an um lo ruangah ngaihsia tak hen ka ɽap rawh.
- ⁵Chun, Upa tla lakah mi pakhat nih chun, "ɽap lah, ngâinik, chakeihaknei Juda phun ah mi, David thlâk nih khan lasuibu chu kêu ding leh a singsiahnâk pasarih tla khawm samh ding hen a neh rawh," a hawng ka ti.
- ⁶Chun, laltophah leh thilnung pali tla lâiah leh upa tla lâi chem ah chun Dawrâ Fa thah rawh mi, ki pasarih leh mit pasarih nei, a dîr mi ka muh le, chubang mit pasarih leh ki pasarih tla chu Pathian thlarau pasarih tual tûn zawzawng ah fial mi tla an si.
- ⁷Chun, Dawrâ Fa chu a va kal le, laltophah ah a to mi kut vawrhlei mi lasuibu chu a lâk rawh.
- ⁸Chun, lasuibu chu a lâk kê hen thilnung pali tla leh upa kul leh pali tla chu ɽingɽang leh ngûn berhbu rimthâw hen a khat mi put chiau hen Dawrâ Fa mâika ah chun an bawkbukhup rawh; chubang rimthâw tla chu Pathian mi tla thlachamnâk asi.
- ⁹Chun, "Nang lasuibu chu lâk hen, a singsiahnâk tla samh tlâk na si; Thah hen na um rawh le, chikip a mi tla, hawlh kip a mi tla, mikip a mi tla, phun kip a mi tla, Pathian rangah na thisen hen na châwk na.
- ¹⁰Kan Pathian rianɽuan ding hen Lalram bâwlpu ah na siam na rawh, chun, tual ah chun lâi an rêl lai," ti hen la thar an sak rawh.
- ¹¹Chun, ka zauh le, laltophah leh thilnung pali leh upa tla kiangah chun vânmifial a sîng a sîng tamtak aw-hâu chu ka theih. Thilnung tla leh upa tla leh laltophah hêl hen an dîr le, hâu fâk tak hen,

¹²"Dawrâ Fa thah rawh mi hi, thiltikhonâk tla, neih leh siahnâk tla, finghnâk tla, chaknâk tla, chawnglawmhnâk tla, rokualnâk tla, malsâwmnâk tla tawng tlâk asi," ti hen la an sak.

¹³Chun, vân leh tual tlûnah leh tual tang leh tisumsumriat sungah thilsiam chikip leh laikulh sungah an um mi zawzawng tla nih, "Laltophah ah a to mi leh Dawrâ Fa sinah chun, malsâwmnâk leh chawnglawmhnâk tla rokualnâk tla leh lârelnâk tla zungzâl hen um seh ti hen an la sak ka theih.

¹⁴Chun, thilnung pali tla nih chun, "Amen," ti hen an sâng le, upa tla khawm nih bawkbukhup hen an mâimûk rawh.

Thuphuang 6

¹Chun, Dawrâ Fa nih chun singsiahnâk pasarih lakah pakhat chu a samh liau ka muh le, chun thilnung pali lakah pakhat nih chun khuari mi hâu hâwi hen, "Hawng rawh," a ti mi ka theih.

²Chun, ka zauh le, rang ngo ka muh, a tlûnah chuan mi nih chun chanhtiang a put le, a sinah lallukhuh an pek le, neh vima ding hen a suak rawh.

³Chun, singsiahnâk panihnâk chu a samh kê hen thilnung panihnâk nih, "Hawng rawh," a ti mi ka theih.

⁴Chun, rang dang a sen mi a hawng suak nawlh lo, a tlûnah â chuan mi sinah chun tual tuknâk umtir ding hen thuneihnâk an pêk, khatlei khatlei anna thah tawnh ding hen; chun nâmsâu lianpi an pêk.

⁵Chun, singsiahnâk pathumnâk chu a samh kê hen, thilnung pathumnâk nih chun, "Hawng rawh," a ti mi ka theih; chun ka zauh le, rang dum ka muh, a tlûnah â chuan mi nih chun khinghnâk a put.

⁶Chun, thilnung pali tla lâiah chun aw-hâu hâwi hen, "Ni khat lawhman wheat fâng, khîng khat ni khat lawhman hen barley fâng khîng thum; oliv thing leh grep zûn lam chu râwk lah," a ti mi ka theih.

⁷Chun, singsiahnâk palinâk chu a samh kê hen, thilnung palinâk nih chun "Hawng rawh," a ti mi ka theih.



⁸Chun, ka zauh le, rang a dâng mi ka muh le, a tlûnah â chuan mi min chu Thihnâk an ti, a dunglei ah Mithi khua nih a hawng zûl sawm. Nâmsâu hen thah ding leh pâmnâk, rai leh sarâng hen thah na ding hen tual mun li then hen mun khat tlûnah thuneihnâk an pêk.

⁹Chun, Dawrâ Fa nih chun singsiahnâk panganâk chu a samh kê hen mâichâm tangah chun theihtirnâk thu zumhkâi tak hen an pawm mi ruangah leh Pathian ruangah an thah na mi thlarau tla ka muh.

¹⁰Annih nih chun aw-hâu fâk tak hen, "Lalpa, Zeizawng tikhotu, Mi Thenhlimh leh dik tak! Zei tiang me lâirêl lo hen tual ah an um mi tla tlûnah kan thisen suaknâk phû chu lam lo hen na um awt? ti hen an âu.

¹¹Chun, an sinah puanvâr an pêk chiauh na le, an to-aw hâwi tla leh an unau tla, anmah hâwi ber hen thah ding mi tla kha an kim ver lân lo chu anna dîn rih ding asi ti hen an simh.

¹²Chun, Dawrâ Fa nih singsiahnâk paruknâk chu a samh mi ka zauh le, chun lî thungâi a hawng a nîn le, nî chu samul puandum hâwi hen a hawng dum le, thlâ khawm thisen hâwi hen a hawng sen.

¹³Chun, ârfi tla vân thawk hen, theipi kûng thlipi nih a vuak le, a rah hel tla a tlawng mi hâwi hen tual ah an tlâ rawh.

¹⁴Chun, vân chu lasuibu an zual mi hâwi hen a tlâu rawh; chun tlâng leh tikulh kip chu an umnâk mun ah mi thial hen an um rawh.

¹⁵Chun, tual ah lal tla, lâirêltu tla, kawrsen hotu tla, minei tla, mi chak tla, sal leh sal lo tla chu pûk ah leh tlâng ah lungpi tangah tla anna thup.

¹⁶Chun, tlâng tla leh lungpi tla sinah chun, "Hawng kan denh rawh, Dawrâ Fa thinthawknâk thawk hen leh laltophah ah a to mi mitmuh lonâk ah hawng kan phenh rawh,

¹⁷an thinthawknak ni rokual tak asi rawh hi, âu nih me do hen tuar kho lai?" an ti.

Thuphuang 7



- ¹Chu nûnah chun tual ah leh tisumsumriat ah leh thing tûnah thli rerêng a lêng lonâk ding hen tual thli pali chu tleih hen tual kil li ah an dîr mi vânmifial pali ka muh.
- ²Chun, vânmifial dang, Pathian nung, singsiahnâk put hen suahlei ah a kâi mi ka muh, anih nih chun, vânmifial pali, mual tla leh tisumsumriat râwktu dingah Pathian nih a ruat mi tla sinah chun, aw-hâu fâk tak hen,
- ³"Kan Pathian to-aw tla chu an chal ah kan singsiah na lân lo chu mual leh tisumsumriat leh thing tla chu râwk lah rih u,' ti hen a âu.
- ⁴Chun, Pathian singsiahnâk hen an chal ah an singsiah zat chu ka theih. Israel thlâk phun kip a mi nuai khat leh sîng li leh sâng li an singsiah rawh asi.
- ⁵Juda phun a mi sîng khat le sâng nih, Reuben phun a mi sîng khat le sâng nih, Gad phun a mi sîng khat le sâng nih,
- ⁶Aser phun a mi sîng khat le sâng nih, Naphtali phun a mi sîng khat le sâng nih, Manaseh phun a mi sîng khat le sâng nih,
- ⁷Simeon phun a mi sîng khat le sâng nih, Levi phun a mi sîng khat le sâng nih, Isakar phun a mi sîng khat le sâng nih,
- ⁸Zebulun phun a mi sîng khat le sâng nih, Josef phun a mi sîng khat le sâng nih, Benjamin phun a mi sîng khat le sâng nih an singsiah rawh.
- ⁹Chun, chu nûnah chun ka zauh le, mi zapi cherkhet, âukhawm rêlchâwklo, phun kip lakah mi tla, chi kip lakah mi tla, mikip lakah mi tla, hawlh kip lakah mi tla, puanvâr aih hen, leh tûmkâu put hen, laltophah mâika ah leh, Dawrâ Fa mâika ah an dîr mi ka muh.
- ¹⁰Chun, chubang tla nih chun, "Kan Pathian laltophah ah a to mi leh Dawrâ Fa thawk hen kan ruangsuaahnâk a hawng tlung rawh," ti hen fâk tak hen an âu.
- ¹¹Chun, vânmifial zawzawng tla chu laltophah leh upa tla leh thilnung pali tla hêl bung hen an dîr le, laltophah mâika ah,

¹²"Amen! Malsâwmnâk tla, rokualnâk tla, finghnâk tla, lâwmthusimnâk tla, zahnâk tla, chawnglawmhnâk tla, thiltikhonâk tla, chaknâk tla, zungzâl hen kan Pathian sinah um seh, Amen," ti hen Pathian an mâimûk.

¹³Chun, upa tla lakah pakhat nih chun ka sinah, "Hi bang puanvâr aih tu tla hi âu tla me an si, a zeï thawk hen me an hawng?" ti hen a hawng ka deih.

¹⁴Chun, kei nih chun a sinah, "Pu, nangmah nih na theih dauh ko khateh," ka ti. Chun, anih nih chun ka sinah, "Hi bang tla hi nehsawhnâk fâk tak thawk hen him tak hen an hawng suak mi tla an si, an puan tla chu Dawrâ Fa thisen ah suk hen an vârtir asi,

¹⁵churuangah, Pathian laltophah mâika ah dîr hen a sîn a zân hen a rian an tuan asi; chun, laltophah ah a to mi nih chun a vêng na lai.

¹⁶An sung a vâng lai lo le, an tî khawm a hâl lai lo, nî nih a emh na lai lo le, a linhnâk khawm nih a hamhtir na lai lo.

¹⁷Dawrâ Fa laltophah lâiah a um mi chu an vêngtu asi lai le, nungnâk tiva ah a kalpi na lai; chun, Pathian nih an mit ah mi mitthli zawzawng a nâwt piak na lai," a ti.

Thuphuang 8

¹Chun, Dawrâ Fa nih chun singsiahnâk pasarihnâk chu a samh ka hen vân ah chun dârkar chanve ding chu dâisipnâk a hawng um.

²Chun, Pathian mâika ah vânmifial pasarih an dîr mi ka muh le, an sinah chun tâwtawrâwt pasarih an pêk na.

³Chun, vânmifial dang a hawng le, ngûn rimthâw duahnâk bâwm put hen mâichâm kiangah a dîr. Chun, laltophah mâika ah ngûn mâichâm tlûnah mi thenhlimh zawzawng thlachamnâk tla sapsuannâk ding hen zeilo rimthâw tamtak a sinah an pêk.

⁴Chun, Pathian mâika ah a dîr mi vânmifial kut thawk hen chun zeilo rimthâw khû leh mi thenhlimh tla thlachamnâk chu vân lei a kêi rawh.

⁵Chun, vânmifial nih chun zeilo rimthâw duahnâk bâwm chu a lâk le, mâichâm mi mei hen a khattir le, tual ah a lawnh rawh. Chun, khuarît tla, aw-hâu dang tla, mîmthlalek tla, lînîn tla a hawng um sawm rawh.

⁶Chun, vânmifial pasarih tâwtawrâwt pasarih puttu tla chu tum ding hen anna timhtuah rawh.

⁷Chun, a masachem mi nih chun a tum le, rial leh mei thisen hen chawmh mi, a hawng um sawm le, chubang tla chu tual ah lawnh asi rawh. Chun, tual mun thum ðhen hen mun khat leh thing mun thum ðhen hen mun khat chu a kâng hep, chun, belh ring zawzawng khawm a kâng ver.

⁸Chun, vânmifial panihnâk nih chun a tum le, tlâng lianpi mei nih a khangh mi hâwi hi tisumsumriat ah lawnh hen a um. Chun, tisumsumriat chu mun thum ðhen hen mun khat chu thisen ah â chang rawh.

⁹Chun, tisumsumriat ah thilsiam nungnâk nei tla chu mun thum ðhen hen mun khat an thi le, lawng tla khawm mun thum ðhen hen mun khat râwk hen an um.

¹⁰Chun, vânmifial pathumnâk nih chun a tum le, ârfi lianpi, meifâr hâwi hen a alh mi vâw thawk hen a hawng tlâ le, tiva tla leh tinungva tla chu mun thum ðhen hen mun khat a denh rawh.

¹¹(Chu ârfi min chu Khâtnâk asi) Tî mun thum ðhen hen mun khat chu a khâ hep rawh, chu tî chu an din le, mi tamtak an thi rawh.

¹²Chun, vânmifial panihnâk nih chun a tum le, nî mun thum ðhen hen mun khat leh thlâ mun thum ðhen hen mun khat leh ârfi tla khawm mun thum ðhen hen mun khat chu â râwk hep rawh; an chêunâk tla leh sîn khawm mun thum ðhen hen mun khat a tlâu le, zân khawm chu hâwi ber hen a um.

¹³Chun, ka zauh le, mupi vâw lâiah a zuang mi nih, aw-hâu fâk tak hen "Vânmifial pathum an tâwtawrâwt tum hâu hawng um ding mi ruangah, tual ah an um mi tla tlun a pit! a pit! a pit!" a ti mi ka theih.

Thuphuang 9



- ¹Chun, vânmifial panganâk nih chun a tâwtawrâwt a tum le, ârfi pakhat vânthawk hen tual ah a tâ mi ka muh le, vânmifial sinah chun khurtawdawnglo renh chu an pêk rawh.
- ²Chun, anih nih chun khurtawdawnglo chu a awng le, chun khurtawdawnglo thawk hen meialh fâk tak khû hâwi a hawng suak le, chu mei khû ruang chun nî leh boruak chu a hawng mûitir rawh.
- ³Chun, meikhû thawk chun khâubawk tla an hawng suak, tlâng cha-âi tla nih thiltikhonâk an nei hâwi hen an sinah thiltikhonâk pêk an si.
- ⁴Chun, an chal ah Pathian singsiahnâk a nei lo mi minung tla cho lo chu, tual ah belh tla, thing tla leh thlâi rerêng râwk lo ding hen simh an si.
- ⁵Chun, khâubawk tla sinah chun, chu minung tla chu thah ngâi chu thah lo hen, thla nga hamhtir ding hen thu pêk an si, an hamhtir dân chu tlâng cha-âi nih mi a seh hen a hamhtir na mi hâwi asi.
- ⁶Chun, chu thla nga sung chun mi nih thihnâk an hâwl khawmah an tawng lai lo, thih an duh lai le, thihnâk nih a tekkhalh na lai.
- ⁷Chun, khâubawk tla umdân chu rang tla râltuk ding hen anna tîm zet mi hâwi an si; ngûn lallukhuh hâwi anna khuh le, an mêl khawm minung mêl hâwi asi.
- ⁸Chun, nunau sam hâwi an nei le, an hâ khawm chakeibaknei hâ hâwi asi.
- ⁹Chun, an ir ah thîr phaw hâwi mi an nei le, an thla zâp hâu chu râltuk ding hen rang tamtak nih kari nûk hen an tek mi hâu hâwi asi.
- ¹⁰Chun, tlâng cha-âi hâwi hen tawmei leh henhnâk an nei le, an tawmei ah chun thla nga kar minung nganfâktir khonâk an nei.
- ¹¹Khurtawdawnglo lakah thuneitu vânmifial chu lal ah an nei le, Hebrai hawlh hen a min chu, "Abadon" asi le, Greek hawlh hen chun, "Apollion" asi (a umzia chu, "Râwktu" tinâk asi.)
- ¹²Tlûnpitnâk masachem chu a reh rawh le, hi nûnah tlûnpitnâk panih a hawng um awt nawlh asi.

¹³Chun, vânmifial paruknâk nih chun a tâwtawrâwt chu a tum le, Pathian mâika ah ngûn mâichâm ki tla thawk hen aw-hâu ka theih le,

¹⁴chu aw-hâu nih chun, vânmifial paruknâk tâwtawrâwt a put mi sinah chun, "Eufretis tipi ah vânmifial pali phuar hen an um mi tla kha suah na rawh!" a ti.

¹⁵Chun, chu dârkar leh ni leh thla leh kum ruat chia lakah, minung mun thum then hen mun khat thah ding hen anna tîm zet mi vânmifial pali tla chu an sût na rawh.

¹⁶Rang kêng tlûnah anna chuan mi kawrsen tla tam zia chu sîng lir hen mun sing nih (200,000,000) an si ti an ka simh.

¹⁷Chun, muhtirnâk ah chun, rang leh a tlûnah anna chuan mi ka muh le, mei leh saphir leh kê eng hâwi mi phaw an nei le, rang lû tla chu chakeibaknei lû hâwi asi le, an kê thawk hen mei leh meikhû leh kê tla a hawng suak.

¹⁸Chun, chu hamhtirnâk pathum, mei leh meikhû leh kê an kê thawk hen a hawng suak mi hen chun minung mun thum then hen mun khat chu thah an si rawh.

¹⁹Rang tla thiltikhonâk chu an kê ah leh an tawmei ah a um, an tawmei tla chu rûl hâwi asi, lû an nei le, chu hen mi nganfâk an pêk na tâwn asi.

²⁰Chun, chubang rêpnâk nih a thah bang minung tla nih chun, an thil siam tla chu bângtâk lo hen, khuri tla leh ngûn milem tla, tangka milem tla, dâr milem tla, lung milem tla, thing milem tla, zeikhawm muh kho lo, theih kho lo, kal kho lo tla chu an sawnh le an rim lêm lo.

²¹Mi an thah mi tla leh dâwi an mang mi tla, pung leh lêng an mangnâk leh fîr an mangnâk khawm an thlah lêm lo.

Thuphuang 10

¹Chun, vânmifial dang chak tak pakhat, sûm hen â thuam mi, vân thawk hen a hawng tum mi ka muh le, a lû ah chun chumchâ a kho le, a mêl chu nî hâwi asi le, a kê tla chu meizîk hâwi asi.



²Chun, a kut ah chun lasuibuzual samh chia a put le, a kê vawrhlei hen tisumsumriat a lamh le, a kehlei hen tâng a lamh;

³chun, chakeibaknei hûk hâwi hen hâu fâk tak hen a hûk rawh, chun a hûk dih rawh chun (chu mi rual hen khuarît hâu pasarih nih a zulh) khuarît pasarih tla nih a aw-hâu chu an sang bâk rawh.

⁴Chun, khuarît pasarih tla nih an aw-hâu an suah kê hen, ka rîn awt le, sikhawmsele, "Khuarît pasarih thusim tla kha pheh thlir, rîn lah" ti hen vân thawk hen aw-hâu ka theih rawh.

⁵Chun, vânmifial tisumsumriat ah leh tâng ah a dîr mi ka muh mi nih khan a kut vawrhlei vân leiah a phar le, vân, a sungah thil zeizawng siamtu, tual, a sungah thil zeizawng leh tisumsumriat a sungah thil zeizawng siamtu,

⁶zungzâl hen a um kumza mi Pathian min chu sâl hen, "Hun a tâi lai lo rawh,

⁷sikhawmsele, vânmifial pasarih nâk nih a tâwtawrâwt chu a tum tikah Pathian thuthup chu a tling lai rawh, a to-aw khuavâng tla sinah a phuang rawh hâwi khan," a ti.

⁸Chun, vân thawk hen aw-hâu ka theih mi nih khan a hawng ka sawnh nawlh le, "Tisumsumriat leh tâng ah a dîr mi vânmifial kut a mi lasuibuzual samh chia kha lâk rawh," a ti mi ka theih.

⁹Chun, vânmifial sinah chun ka va kal le, a sinah, "Lasuibuzualtê kha hawng ka pêk me," ka ti le, anih nih chun ka sinah, "Lâk le, ei hep, chun, na pawsung chu a khâtir lai le, na kê ah lam chun kuaizû hâwi hen a thlum lai," a ti.

¹⁰Chun, a kut a mi lasuibuzualtê chu ka lâk le, ka ei hep le, ka kê ah chun kuaizû hâwi hen a thlum le, ka dawlh nûnah lam chun ka pawsung chu a kê tik rawh.

¹¹Chun, "Mi tamtak tla, phun tamtak tla, hawlh tamtak tla, lal tamtak tla sinah Pathian thuchah na phuang nawlh ding asi," a hawng ka ti.

Thuphuang 11



- ¹Chun, tahnâk fung, thianthunh hâwi mi an hawng ka pêk le, "Thawk le, Pathian Biakin leh mâichâm chu tah le, a sungah sawnhtu tla khawm rêl na.
- ²Sikhawmsele, biakin lênglei kulh sung lam chu tah sih lah, chu chu phun dang sinah pêk asi rawh, annih nih chun Khua Thenhlimh chu thla sâwmli leh thla nih an lamhbêk lai.
- ³Chun, ka thu theihpitu mi panih chu ka fial lai le, salâpuan aih hen ni sâng khat zanih leh sâwmruk Pathian thu an sim lai," a ti.
- ⁴Chun, laikulh Lal mâika ah an dîr mi, theihpitu panih tla chu oliv thing panih leh meichêu panih chu an si.
- ⁵Chun, annih chu âuzawng nih nganfâk pêk an tum chun a kê thawk hen mei a hawng suak le, an leido tla chu a veih na asi. Annih tla chu âuzawng nih thah ding awttu chu thah an si lai.
- ⁶Chubang tla nih chun thu an sim kar vial chu ruah sîr lo ding hen vân pingtir khonâk an nei, an duh tik zawngah thisen ah changtir ding hen tiva tla tlûnah thuneihnâk an nei le, laikulh hi rêpnâk rai chi kip hen rêp ding hen thu an nei.
- ⁷Chun, an theihtirnâk thu chu an sim dih tikah Sarâng khurtawdawnglo thawk hen a hawng suak mi nih khan a do na lai le, a neh na lai le, a thah na lai.
- ⁸Chun, an ruak chu an Lalpa an kenhbêk mi khua rokual zâwllâi ah an siah lai le, chu khua rokual zauhtirnâk ah chun Sodom, mawh Aigupta ti asi.
- ⁹Chun, mi zapi lakah phun zawzawng tla, phun kip leh hawlh kip nih, ni thum leh sînlân an ruak tla chu an zauh lai le, a vûi ding an siang lai lo.
- ¹⁰Hi mi panih an thi ruangah, tual ah mi zapi tla chu anna lâwm lai le, lâwmnâk an siam lai le, thilpêk tla anna kuat lai, hi khuavâng panih tla nih tual ah mi zapi tla chu an hamhtir na ruangah.
- ¹¹Chun, ni thum leh sînlân nûnah chun Pathian nungnâk thaw chu an sungah a lût le, an dîr rawh, chun, a muhtu tla nih chun an tîh na rawh.

¹²Chun, khuavâng panih tla nih chun, vân thawk hen aw-hâu fâk tak hen, "Hinah hawng kêi u," ti hen an theih, chun, an leido tla nih an muh na ko bû hen vân ah sôm lakah an kêi rawh.

¹³Chun, chu liau tak chun, lî thungâi thlâk â nîn le, khoa chu mun râ then hen mun khat a chim rawh, lînîn lak chun mi sâng sarîh an thi le, an thibang tla chu thungâi an lâu le, Pathian vân ah a um mi chu an chawnglawmh rawh.

¹⁴Chun, tlûnpitnâk panihnâk chu a reh rawh le, ngâinik! tlûnpitnâk pathumnâk chu a um tuan awt rawh.

¹⁵Chun, vânmifial pasarihnâk nih chun a tâwtawrâwt chu a tum le, "Laikulh ram chu kan Lalpa leh Mesia ram a hawng si rawh, anih nih chun zungzâl hen lâi a rêl lai," ti hen vân thawk hen aw-hâu a hawng suak.

¹⁶Chun, Pathian mâika ah an laltophah ah upa kul leh pali an to mi tla chu bawkbukhup hen Pathian an mâimûk le,

¹⁷"Zeizawng tikhotu, Lalpa Pathian, um liau leh um rawh mi, na thiltikhonâk rokual tak chu lâk hen, lâirêl na dawmh rawh ruangah ka nan sawr asi!

¹⁸Lunglotu tla chu an thinthawk le, nang thinthawknâk khawm a hawng tlung bâk rawh. Mithi tla lâirêl piak tik leh na to-aw khuavâng tla sinah leh, mi thenhlimh tla sinah, na min zahtu mi lian leh mi mê tla sinah lâwmman na pêk ding tik leh tual râwktu tla chu râwk bâk na ding tik chu a hawng tlung rawh," an ti.

¹⁹Chun, vân ah Pathian biakin chu â awng le, chun, a biakin sungah Thudântuk Bâwm chu a hawng lang rawh; chun, mîmthlalek tla, aw-hâu tla, khuarît tla, lînîn tla, rial chawp tak tla thungâi a hawng um rawh.

Thuphuang 12

¹Chun, thilchê rokual tak vân ah a hawng lang le, nunau nî hen â thum le, a kê tangah thlâpa a um mi, ârfi leinîh hen siam mi lallukhuh â khuh mi a um.

²Chu nih chun nâu a pâwi le, nâu neih nganfâk tuar hen a râk rawh.

- ³Chun, thilchê dang vân ah a hawng lang nawlh le, rûlrêu sen lianpi, lû pasarih leh ki parâ a nei mi, lallukhuh pasarih â khuh mi a hawng um.
- ⁴A mei hen chun vân ârfi tla mun thum ðhen hen mnn khat a nûk le, tual ah a thlâk rawh, chun, nunau nih fa a ring ding mi chu a ring kê hen a dawlh khonâk ding hen a mâika ah a dîr ko.
- ⁵Chun, phun zawzawng tlûnah thîr ðhianðhunh hen lâirêltu dingah fapa a ring le, sikhawmsele, a fa chu Pathian sinah a laltophah ah chun lâk hen a um rawh.
- ⁶Chun, nunau chu ramkaro ah Pathian nih amah rangah mun a ruat piak mi ah chun a tek rawh, chunah ni sâng khat zanih leh sâwmruk an châwm khonâk ding hen.
- ⁷Chun, vân ah chun tuknâk a hawng um le, Mikael leh a vânmifial tla nih rûlrêu chu an do le, rûlrêu leh a mifial tla khawm nih an hawng do na bâk.
- ⁸Sikhawmsele, rûlrêu chu an neh le, amah leh a mifial tla chu vân ah um siang asi lo rawh.
- ⁹Chun, rûlrêu lianpi, Diabol mawh, Setan an ti mi, laikulh zawzawng perpettu chu tual ah an lawnh rawh, a mifial tla khawm an lawnh sih.
- ¹⁰Chun, vân ah aw-hâu fâk tak ka theih mi nih chun, "Tuah chun kan Pathian rangsuahnâk leh a thiltikhonâk leh Lal asi zia chu a langhtir le, tuah a Mesia thuneihnâk chu a langhtir rawh! Kan unau tla phiar hen Pathian mâika ah a sîn a zân hen a dîr tâwn mi chu vân thawk hen lawnh asi rawh," a ti.
- ¹¹Kan unau tla nih chun Dawrâ Fa thisen zârah leh thih ngamh rê hen thudik an phuangnâk zârah anih chu an neh rawh;
- ¹²chun, vân tla leh a sungah um mi tla a lâwm u, sikhawmsele, tual leh tisumsumriat tlûn chu a pit! Diabol nih chun tik tâwmtê cho a nei rawh ti a theih ruangah a thinthawk bû hen nan sinah a hawng ðum rawh," a ti.
- ¹³Rûlrêu nih chun tual ah lawnh asi ti a theih ka hen fapa ringtu nunau chu a râl rawh.

¹⁴Chun, nunau chu kum thum leh a sêu zauhkhenh ding hen leh rûlpi lakah a him khonâk ding hen, a mun ramkaro leiah zuang ding hen mupi thla panih an pêk.

¹⁵Chun, rûlpi nih chun chu nunau chu fenhtir ding hen tiva hâwi hen a kê lâk mi tî chu a suah rawh.

¹⁶Sikhawmsele, tual nih nunau chu a ɽangpi le, tual nih chun a kê a âng le, rûlpi nih a kê lakah tiva hâwi hen a suah mi tî chu a dawlh hep.

¹⁷Chun, Rûlrêu chu nunau tlûnah a thinthawk le, a thlak tla an um rih mi, Pathian thupêk tla zâwt hen Jisu theihtirnâk thu pawmtu tla chu do ding hen a suak rawh.

¹⁸Chun, Rûlrêu chu tipi kap ah chun a dîr rawh.

Thuphuang 13

¹Chun, sarâng, ki parâ leh lû pasarih a nei mi, tisumsumriat thawk hen a hawng suak mi ka muh le, a ki kip ah lallukhuh a um le, a lû kip ah simsiatnâk min â rîn asi.

²Chun, sarâng ka muh mi chu keitê hâwi asi le, a kê tla chu vawm kê hâwi asi le, a kê chu chakeibaknei hâwi asi; chun, rûlrêu nih sarâng chu amah thiltikhonâk leh a laltophah leh amah thuneihnâk fâk tak a pêk.

³Chun, a lû pakhat chu thih phah rê hen liamh hen a um le, sikhawmsele, a mâ chu a dam le, tual a mi zawzawng nih chê an ti le, chu sarâng chu an zûl rawh.

⁴Chun, sarâng sinah rûlrêu nih a thuneihnâk a pêk ruangah rûlrêu chu mi zapi nih an sawnh rawh, "Sarâng hâwi hi âu an um? Âu a do khotu um?" ti hen sarâng khawm chu an mâimûk.

⁵Chun, sarâng chu soal thu ɽihnungkâi tak sim ding leh thla sâwmli leh thla nih thuneihnâk pêk asi.

⁶Pathian leh a min leh, vâh ah a umnâk mun leh vâh ah an um mi zawzawng simsiat chu a dawmh rawh.

- ⁷Chun mi thenhlimh tla chu do hen neh siang an si le, chi kip tla, mikip tla, hawlh kip tla, phun kip tla tûnah thuneihnâk pêk asi.
- ⁸Chun, tual ah an um mi zawzawng lakah laikulh um lân thawk hen thah rawh mi Dawrâ Fa nungnâk lasuibu ah an min â rîn lo mi vial nih chun amah an mâimûk lai.
- ⁹"Âuzawng nâ a nei mi nih chun ngâi seh.
- ¹⁰Âuzawng tleih tumtu chu tleih hen an um lai le, nâmsâu hen thah tumtu chu nâmsâu hen thah hen a um bâk lai. Chu chu mi thenhlimh tla felfênâk leh zumhkâinâk chu asi.
- ¹¹Chun, sarâng dang tual ah a hawng suak mi ka muh le, dawrâ hâwi hen ki panih a nei le, rûlrêu hawlh hâwi hen a hawlh.
- ¹²Sarâng masa dauh thuneihnâk zawzawng kha a mitmuh ah a mang rawh, tual leh a tûnah a um mi zawzawng tla chu sarâng masa thih phah rê ding hen â liam le, a dam nawlh mi chu sawnh ding hen thu a pêk na.
- ¹³Chun, hi sarâng panihnâk nih hin mi zawzawng mitmuh ah vîn thawk hen tual ah mei tlâktir kho rê hen thilchê ti khonâk a nei.
- ¹⁴Chun, sarâng masachem mitmuh ah thilchê a ti mi hen khan tual tûnah mi zawzawng chu a perpet na rawh. Chun, sarâng nih chun nâmsâu hen thi khawp rê hen liamh hen a um le, a dam nawlh mi sarâng chawnglawmhnâk ding hen mi zawzawng chu sarâng masachem lem tuah ding hen thu a pêk na.
- ¹⁵Chun, sarâng masachem lem chu hawlh kho ding hen leh amah sawnh lotu vial thah kho ding hen sarâng panihnâk nih nungnâk thaw pêk ding hen siang asi.
- ¹⁶Chun, mi zawzawng, a lian a mê hen, a nei a pâm, to-aw leh to-aw lo tla khawm, an kut vawrhlei ah mawh, an chal ah mawh singsiahnâk a neitir na.
- ¹⁷Singsiahnâk sarâng min mawh, a min nambar mawh neitu tla cho lo nih chun âukhawm nih an châwk hen an zuar kho lo rawh.

¹⁸Hinah hin finghnâk langh khonâk a um. Theih khonâk nei mi nih chun sarâng nambar chu zâwt set seh; chu nambar chu minung ruangrûl ah asi le, chu chu zaruk leh sâwmruk leh paruk asi.

Thuphuang 14

¹Chun, ka zauh le, Dawrâ Fa Zion tlâng ah a dîr mi leh an chal ah a min leh a Pa min â rîn mi, mi nuai khat leh sîng li leh sâng li a sinah an dîr mi ka muh,

²chun, vân thawk hen zeilo hâu, tî tamtak sâitâr ah â khâwk mi hâu hâwi leh khuarît fâk tak hâu hâwi ka theih le, chun, ka hâu theih chu ẵngẵng tumtu tla nih an ẵngẵng an tum mi hâu hâwi asi.

³Laltophah mâika ah leh thilnung pali tla leh upa tla mâika ah chun la thar an sak le, chu la thar chu âukhawm nih tual a mi tlanh chia tla mi nuai khat leh sîng li leh sâng li tla cho lo nih chun anna sîn kho lo.

⁴Chubang tla chu nunau lakah â nawmh lo mi tla an si; nungâk thenhlimh hâwi an si, Dawrâ Fa kalnâk kipah zûltu tla an si, Pathian rangah leh Dawrâ Fa rangah rah masachem si ding hen minung tla lakah mi tlanh an si.

⁵Diklo nâk âwkrâwl an sim mi âu nih khawm an theih dah lo.

⁶Chun, tual ah an um mi tla, phun kip tla, chi kip tla, hawlh kip tla, mi kip tla sinah zungzâl Thâwngthâng T̄ha thuchah sim ding hen vânmifial dang vân chung sâng ah a zuang mi ka muh.

⁷Chun, anih nih chun, hâu fâk tak hen, "A lâirêl tik chu a tlung rawh ruangah Pathian ẵh ule, chawnglawmh u, tual leh vân, tisumsumriat leh tinungva tla siamtu chu mâimûk u," a ti.

⁸Chun, vânmifial panihnâk nih chun, "Babulon khua rokual ah mi pungmang nâk uain hâi, phun zawzawng dintirtu chu a tlû rawh, a tlû rawh," a ti.

⁹Chun, vânmifial pathumnâk nih chun hâu fâk tak hen, "Âuzawng nih sarâng leh a lem mâimûk hen an chal ah mawh an kut ah mawh singsiahnâk an nei chun,

¹⁰chu tla chu Pathian thinthawknâk uain, a thinthawknâk hâi ah khat dil a tleng mi dintu an si lai le, vânmifial thenhlimh tla leh Dawrâ Fa mitmuh ah mei leh kêt hen rêp an si lai.

¹¹Chu minung tla rêpnâk meikhû chu zungzâl hen a kêi lai le, sarâng leh a lem mâimûktu tla, a min singsiahnâk neitu tla vial chu a sîn a zân hen dinh ni an nei lai lo," ti hen a âu.

¹²Hinah hin mi thenhlimh Pathian thupêk tla leh Jisu lungnâk thu zâwttu tla felfênâk chu a lang asi.

¹³Chun, vâ thawk hen aw-hâu nih, "Hi hâwi hen rîn rawh, Lalpa rianṭuannâk ah an thi mi tla chu tu thawk hen an thaw a suak," a ti. Thlarau nih chun, "Chu hâwi chu asi," ti hen a sâng. Chun, "An rianṭuan hamhnâk chu an dinhtâk rawh le, an thilti nih chun a zûl na lai rawh," a ti mi ka theih.

¹⁴Chun, ka zauh le, sôm vâ ka muh, chun, sôm tlûnah minung hâwi hen ngûn lallukhuh khuh hen, favah hâr tak put hen a to mi ka muh.

¹⁵Chun, vânmifial dang Pathian biakin thawk hen a hawng suak le, sôm tlûnah a to mi sinah chun hâu fâk tak hen, ât a zâ rawh ruangah na favah kha mang le ât rawh, tual ah mi fâng a min rawh asi," a ti.

¹⁶Chun, sôm tlûnah a to mi nih chun a favah chu tual ah a thlâk le, tual mi fâng chu an ât rawh.

¹⁷Chun, vânmifial dang, vâ ah Pathian biakin thawk hen a hawng suak nawlh le, anih khawm nih favah hâr tak a put bâk.

¹⁸Chun, vânmifial dang mei tlûnah thuneitu chu mâichâm thawk hen a hawng sim nawlh le; anih nih chun hâu fâk tak hen, vânmifial favah hâr tak a put mi sinah chun "Na favah hâr tak kha mang le, tual ah grep rah sôr tla khi va ât rawh, grep rah tla a min ver rawh khi," ti hen a âu.

¹⁹Chun, vânmifial nih chun a favah chu tual ah a thlâk le, tual mi grep rah chu a ât le, grep sôrnhâk khur kâu tak, Pathian thinthawknâk grep sôrnhâk khur ah a lawnh rawh.

²⁰Chun, grep rah tla chu khuapi lênglei ah grep surnâk ah an chîl le, chun, grep surnâk khur thawk hen chun, thisên a hawng suak le, mêl zanih tiang a luang le, feet nga tiang a thûk.

Thuphuang 15

¹Chun vân ah chun singsiahnâk dang rokual tak leh chê tak ka muh le, vânmifial pasarih, rênâk pasarih puttu tla chu, chu chu rênâk madungchem chu asi, chu ri rawh chun Pathian thinthawknâk chu a dawng rawh.

²Chun, tisumsumriat thlalang hâwi mi, mei hen a chawmh mi ka muh le, sarâng leh a lêm leh a min nambar nehtu tla chu an hawng suak le, Pathian nih tîngtang a pêk na mi chu put hen tisumsumriat thlalang hâwi mi kap ah an dîr mi ka muh ber.

³Chun, Pathian to-aw Mosi la leh Dawrâfa la chu an sak le, Lalpa Pathian zeizawng tikho, na thilti tla chu a rokual hen a chê le! Nang phun kip Lalchem, na lampi tla chu a dik hen â rep asi!

⁴Lalpa, âu nih nang a nan tîh lo lai! Na rokualnâk phuang lotu âu a um lai? Nangmah lâwng na thenhlimh asi! Na thilti rep tla chu mi kip nih an muh rawh, phun kip an hawng lai le a nan sawnh lai," an ti.

⁵Chu nûn chun vân ah biakin â awng le, a sungah Pathian umnâk Puanin Thenhlimh ka muh.

⁶Chun, biakin sung thawk hen vânmifial pasarih, rênâk pasarih puttu tla chu puan thenhlimh vâ tak aih hen, an sôm ah ngûn tâisâwm sâwm hen an hawng suak.

⁷Chun, thilnung pali lakah pakhat nih chun, vânmifial pasarih tla sinah, zungzâl hen a nung kumza mi Pathian thinthawknâk hen a khat mi ngûn berhbu pasarih a pêk na.

⁸Chun, biakin chu Pathian rokualnâk leh thiltikhonâk khû hen a khat phak le, vânmifial pasarih tla rênâk pasarih chu a len lân lo chu biakin ah chun âukhawm an lût kho lo.

Thuphuang 16

- ¹Chun, biakin thawk hen hâu fâk tak hen vânmifial pasarih tla sinah, "Kal ule, Pathian thinthawknâk berhbu tla chu tual ah thlêt u," a ti mi ka theih.
- ²Chun, vânmifial pakhatnâk chu a kal le, a berhbu chu tual ah a thlêt le, chun sarâng singsiahnâk neitu leh a lem mâimûktu tla tlûnah chun masia fâk tak a hawng tlung rawh.
- ³Chun, vânmifial panihnâk nih a berhbu chu tisumsumriat ah a thlêt le, tî chu mithi thisen hâwi hen a hawng um le, chun, tisumsumriat ah thilnung chikip chu an thi ver rawh.
- ⁴Chun, vânmifial pathumnâk nih a berhbu chu tiva ah leh tinungva ah a thlêt le, thisen ah anna chang rawh.
- ⁵Chun, vânmifial tî tlûnah thuneitu nih chun, "Nang Mi Thenhlimh, a um rawh mi leh a um liau mi, na lâirêl tla chu a dik asi,
- ⁶annih nih chun mi thenhlimh leh khuavâng tla thisen an suah le, an din dingah thisen na pêk na mi hi anna dêng cho asi," a ti mi ka theih.
- ⁷Chun, mâichâm thawk hen aw-hâu nih chun "Lalpa Pathian Zeizawng tikho, na lâirêl tla chu a dik hen â rep asi," a ti mi ka theih.
- ⁸Chun, vânmifial palinâk nih chun a berhbu chu nî lakah a thlêt le, nî chu minung tla út rê emh ding hen a lân rawh.
- ⁹Chun, chu minung tla chu nî nih út rê hen emh na khawmsele, nî tlûnah thuneitu Pathian chu sawr leh chawnglawmh ngâk hen hawlhsiat an barh le, an sualnâk chu an rim lêm lo.
- ¹⁰Chun, vânmifial panganâk nih a berhbu chu sarâng laltophah ah a thlêt le, sarang ram zawzawng chu a hawng mui hep le, an nganfâk tuk ruangah an lei tla an seh le,
- ¹¹an mâ leh an nganfâk ruangah vâ Pathian chu hawlhsiat an barh le, sikhawmsele, an thilti sual chu an rim lêm lo.

¹²Chun, vânmifial paruknâk nih chun a berhbu chu Eufretis tipi ah a thlêt le, chun, saklei thawk hen lal hawng kal ding mi tla rangah lampi a um khonâk ding hen tî chu a kang rawh.

¹³Chun, rûlrêu leh sarâng leh khuavâng telê kê thawk hen thlarau nâwmtâm pathum chu-uh hâwi an hawng suak mi ka muh.

¹⁴Chun, chu tla chu khuri thlarau thilche titu tla an si. Hi thlarau pathum tla hi Zeizawng tikho Pathian ni rokual ah râltuknâk ah kalpi na ding leh laikulh lal zawzawng tla pumh na ding hen an suak rawh.

¹⁵Ngainik, mifîr hawi hen ka hawng kal awt, râlring hen nipuan aih kumza hen a um mi chu a thaw a suak, chu lo chun takkaro leh mualpho hen a um sual lai.

¹⁶Chun, thlarau nih chun mun pakhat Hebrai hawlh hen Armagedon an ti mi ah chun lal tla chu a kalpi na rawh.

¹⁷Chun, vânmifial pasarihnâk nih chun a berhbu chu boruak ah a thlêt le, chun, biakin ah laltophah thawk hen, "Â lîm rawh," ti hen aw-hâu fâk tak a hawng suak.

¹⁸Chun, mîmthlalek tla, aw-hâu tla, khuari tla, lî fâk tak â nîn le, tual ah minung siam tîr thawk hen chu hâwi hen lînîn fâk chu a um dah lo.

¹⁹Chun, kua rokual chu mun thum hen â then le, ram kip mi khuapi zawzawng chu â râwk ver rawh. Chun, Pathian nih Babulon kua rokual tak chu a theihkumza le, a thinthawknâk fâk tak uain hâi chu a dintir rawh.

²⁰Chun, tikulh zawzawng tla chu a vei le, tlâng zawzawng tla khawm a vei rawh.

²¹Chun, rialpi lian tak, khîng sâwmnga rit chiau vân thawk hen minung tla tlûnah a tlâ, chun, chu hâwi rêpnâk ruangah minung tla nih chun Pathian hawlhsiat an barh rawh.

Thuphuang 17



- ¹Chun, vânmifial pasarih, berhbu pasarih puttu lakah pakhat chu ka sinah a hawng le, "Hawng le, nunau â zuar mi minthang tak rêp ding mi, tiva tamtak kiangah khuapi rokual tak chu ka nan zauhtir lai.
- ²Tual ah lal tla nih chun anih chu an pung tâwn le, tual ah mipi tla chu duh a mangnâk uain chu dinh hen a rîttir na asi," a ti.
- ³Thlarau hen ka hawng um le, vânmifial nih ramkaro ah a hawng ka kalpi. Chun, sualnâk min hen a khat mi sarâng sen lû pasarih leh ki parâ a nei mi tlûnah nunau a to mi ka muh.
- ⁴Nunau nih chun puan senduk leh sen lâr â aih le, ngûn leh lungmantam leh aitikep lung hen â thuam le, ngûn hâi, pungmangnâk thil nâwmtâm hen a khat mi a put.
- ⁵A chal ah thuthup, "Babulon khua rokual, â zuar mi zawzawng tla nu leh laikulh ruisualtu," ti hen a min â rîn.
- ⁶Chun, chu nunau chu mi thenhlimh tla thisen leh Jisu lakah zumh an kâi ruangah thah hen an um mi tla thisen hen a rî mi ka muh le, ka muh ka hen thungai chê ka ti.
- ⁷Chun, vânmifial nih chun ka sinah, "Zeirangah chê na ti? Nunau leh a phurhtu sarâng, lû pasarih leh ki parâ a nei mi thuthup chu ka nan simh lai.
- ⁸Sarâng na muh mi kha a hawng um duak le, a um lo nawlh fâwn, khurtawdawnglo thawk hen a hawng suak lai le, veih depnâk ah a kal lai. Chun, tual ah an um mi tla, tual umtîr thawk hen nungnâk lasuibu ah min â rîn lo mi tla nih chun sarâng chu an muh tikah, a hawng um duak le, a um lo nawlh fâwn mi, a hawng lang awt nawlh mi chu chê an ti lai.
- ⁹"Hinah hin theihthiamnâk thinlung nei a herh asi. Lû pasarih chu nunau tonâk tlâng pasarih chu asi. Lal pasarih tla khawm kha an si;
- ¹⁰panga tla chu neh hen an um rawh le, pakhat nih lâi a rêl liau le, pakhat dang chu a hawng um lo rih le, a hawng um tik chun sâwtlotê cho a um ding asi.

¹¹Chun, sarâng a hawng um duak le, a um lo nawlh mi tak kha lal pariatnâk asi le, pasarih lakah pakhat kha a vei ding mi chu asi.

¹²"Chun, ki parâ na muh mi tla kha lal parâ ram a nei lo rih mi tla an si le, sikhawmsele, dârkar khat ding cho sarâng hen lal hâwi hen lâi an rêl lai.

¹³Chun, chu parâ tla nih chun thurual hen sarâng chu an thiltikhonâk leh thuneihnâk an pêk rawh.

¹⁴Chu tla nih chun Dawrâfa chu an do lai le, sikhawmsele, Dawrâfa chu hotu tla Hotu, lal tla Lal asi ruangah, amah kawh mi tla, thîm mi tla leh amah zûltu zumhkâi tla nih chun an neh na lai," a ti.

¹⁵Chun, vânmifial nih ka sinah, "Nunau â zuar mi tonâk tî na muh mi kha, mi zapi tla, phun tla, hawlh tla an si," a ti.

¹⁶Chun, ki parâ leh sarâng na muh mi nih khan nunau â zuar mi chu an hua lai le, a thilneih tla an lâk piak lai le, takkaro hen an mâk lai le, a sa khawm an ei lai le, mei hen an duah hep lai.

¹⁷Pathian thutiam chu a tling lân lo chu a duhia an tinâk ding leh, anna thurual hen an ram chu lâirêl ding hen an thiltikhonâk sarâng sinah an pêknâk ding hen Pathian nih an thinsung ah a duhtir na asi.

¹⁸Chun, "Nunau na muh mi kha khua rokual tak, tual ah lal tla tlûnah lâirêltu chu a si," a ti.

Thuphuang 18

¹Chu nûn chun, vânmifial dang thuneihnâk fâk tak nei hen vân thawk hen a hawng tum mi ka muh le, a rokualnâk nih chun tual a cherh hep.

²Vânmifial nih chun hâu fâk tak hen, "Babulon khua rokual tak, khuri tla, thlarau nâwmtâm tla, nâwmtâm kip leh vâ nâwmtâm tla umnâk chu a tlû rawh;

³a hurnâk uain rât tak chu phun zawzawng tla nih an din rawh. Tual ah lal tla nih anih chu an pung tâwn le, laikulh sawlehtu tla nih chun a duhnâk sual chu nei phahnâk ah an mang tâwn," ti hen a âu.

⁴Chun, vân thawk hen aw-hâu dang nih a sim mi ka theih le, "Ka mi le tla, a sinah mi hawng suak u, a sualnâk lakah a tel lah u, a rêpnâk lak khawmah nanna tel ding si lo.

⁵A sualnâk tla nih chun vân khawm a tawng le, Pathian nih a thilti sual khawm a theih ko.

⁶Amah nih a nan ti na mi hâwi hen va tirûl bâk u, amah thilti lehnih hen rulh bâk u. A nan dintir na mi lehnih ngâk a chak hen, a hâi lakah tleng piak bâk u.

⁷A rokualtir hen nuam a chenh zia hâwitê hen, tuarnâk leh lawksawngnâk pêkrûl bâk u. A thinlung hen chun, Lalnu ka si, numei ka si lo, lawksawngnâk rerêng ka tawng lai lo, a ti asi.

⁸Churuangah ni khat lakah amah rêpnâk chu a hawng tlung lai le, amah lâirêl piaktu Lalpa Pathian chu a rokual ruangah, anih chu rai tla, ngaihsiatnâk leh pâm nih a tlunh lai le, mei nih a khangh hep lai," a ti.

⁹Chun, tual ah lal tla amah pung tâwntu leh, a nuamsabut chenhpitu tla nih chun a kâng mi khû chu an zauh tikah,

¹⁰a rêpnâk ÷ih ruangah lât takah an dîr mi tla nih chun, "Babulon khua rokual tak chu ÷ihnung a kâi hen a tlûn a pit! Dârkar khat lak ko ah hi Babulon khua rokual tlûnah hin rêpnâk a hawng tlung ngâk chu!" an ti.

¹¹Tual ah sawlehtu tla thil chu âu khawm nih an châwk piak na lo ruangah amah chu ngaihsia tak hen an ÷appi rawh:

¹²an thil tla chu, ngûn tla, tangkarua tla, lungmantam tla âitikep lung tla, puan mangthia tla, puan senduk tla, mâimaw puan tla, puan senlâr tla, thing man tam chi kip tla, sâihâ hen siam mi thil leh thing man tam hen siam mi tla, dâr leh thîr hen siam mi tla, lungvâr hen siam mi tla hen;

¹³chun, mawsawla thing tla, rimthâw tla, rimthâw duah mi zât tla, sariak rimthâw tla, bawraw tla, murrah tla, uain tla, sariak tla, sangvut tla, fâng tla, chaw tla, dawrâ tla, rang tla, kari tla, sal leh minung nungnâk tiang hen asi.

¹⁴Tual ah sawlehtu tla nih chun, "Thil ÷ha nei ding hen na duh mi tla leh neih leh siah leh thil thaw leh thil dawh zawzawng nih a nan kaltâk rawh, na tawng nawlh lai lo rawh, an ti.

¹⁵Tual ah sawlehtu tla, amah ruangah minei an si phah mi tla chu tuarnâk ÷ih ruangah lâat tak thawk a dîr hen,

¹⁶"Khua rokual, puan mang÷hia leh puan senduk leh sen lâat aih hen, ngûn leh lungmantam leh âitikep lung hen â thuam mi chu a tûn a pit!

¹⁷"Dârkar khat ko ah chu zawng neih leh siah a thlâu rawh," ti hen amah sûn hen an ÷ap rawh. Chun, lawng hotu tla, lawng ah kal tâwntu tla, lawng ah mi tla leh tisumsumriat ah rian÷uantu tla chu lâtpi ah dîr hen,

¹⁸a kâng mi khû chu an muh le "Hi hâwi tluk hen khua rokual chu a um nawlh lai lo rawh," ti hen an âu.

¹⁹Chun, an lû ah valeidip an phulh le, ngaihsia tak a ÷ap bû hen, "Khuapi rokual tak chu a tûn a pit! A neihnâk ruangah minei si mi tla leh tisumsumriat ah lawng neitu tla chu dârkar khat lak ko ah a tlâu rawh hi," an ti.

²⁰Aw vên tla, Pathian mi tla, mifial tla, khuavâng tla a lâwm u, amah thilti hâwitê hen Pathian nih a tûnah lâi a rêl rawh.

²¹Chun, vênmifial rokual tak nih lung lianpi, fângrialnâk tî ah mi a sar le, tisumsumriat ah a lawnh le "Babulon khua rokual chu hi hâwi hen fâk tak hen lawnh asi lai le, âukhawm nih an muh nawlh lai lo rawh," a ti.

²²Chun, ÷ing÷ang tumtu tla, zeilo tum thiam tla, theikhang tumtu tla, tâwtawrâwt tumtu tla nih an tum mi, rihâu khawm nâ lakah an theih lai lo rawh; zungthiam rerêng na lakah an muh lai lo rawh, fângrialnâk rihâu khawm na sungah an theih lai lo rawh;

²³khâwnvâr khawm na sungah a chêu lai lo rawh le, pasal leh mo hâu khawm na sungah an theih nawlh lai lo, na sawlehtu tla chu tual ah mi lian tla an si le, na dâwi hen phun zawzawng na perpet na kha.

²⁴Khuapi sungah khuavâng tla leh Pathian mi thenhchinih tla thah hen an um mi tla thisen zawzawng chu muh asi ruangah Babulon chu rêp asi rawh," a ti.

Thuphuang 19

¹Chu nûn chun, vâh ah mi zapi aw-hâu fak tak hâwi hen,"Halleluia" (Pathian chu sawr u), ruangsuaahnâk tla, rokualnâk tla, thiltikhonâk tla, kan Pathian tâ asi;

²a lâirêlnâk tla chu a dik hen â rep asi, anih nih chun nunau â zuar mi rokual tak, a hurnâk ruangah tual râwktu chu a thu a chek piak rawh, a to-aw tla a thah na mi phû chu a lam piak rawh," a ti mi ka theih.

³Chun, an âu nawlh le, "Halleluia" (Pathian sawr u), khuapi a kâng mi khû chu zungzâl hen kêi seh," ti hen.

⁴Chun, upa kul leh pali leh thilnung pali tla chu an bawkbukhup le, Pathian laltophah ah a to mi chu an mâimûk le, "Amen!"Halleluia" (Pathian chu sawr u!)" an ti.

⁵Chun, laltophah thawk hen aw-hâu a hawng suak le, 'Nannih a to-aw tla leh amah zahtu mi lian leh mi mê tla, kan Pathian chu sawr u," a ti.

⁶Chun, mi zapi cherkhet aw-hâu hâwi leh, tî tamtak â khâwk mi rihâu hâwi leh khuarît fâk tak hâwi hen, "Halleluia" (Pathian chu sawr u), kan Lalpa, Pathian Zeizawng tikho chu lalchem asi,

⁷lâwptlo tak hen kan um lai le, amah kan chawnglawmh lai, Dawrâ Fa nupi neih chu a zâ rawh le, a nupi khawm â tîm zet rawh," a ti mi kha ka theih.

⁸Puan mangthia chu mi thenhlimh tla thilti rep asi ruangah, puan mangthia thiang tak, a lek mi chu aihtir ding hen pêk asi.

⁹Chun, vânmifial nih ka sinah, "Dawrâ Fa nupi neihnâk puai ah an sâwm mi tla chu an thaw a suak, ti hen rîn rawh," a hawng ka ti. Chun, vânmifial ber nih, 'Hi bang thu hi Pathian thudik chu asi,' a ti nawlh.

¹⁰Chun, amah chu sawnh ding hen a kebul ah ka kûn le, sikhawmsele, anih nih ka sinah, "Kha hâwi hen ti lah, kei chu nangmah unau leh Jisu thusim

zâwttu tla hâwi hen to-aw ka si, Pathian lam sawnh rawh,' a ti. Jisu nih thudik a sim mi chu khuavâng tla lakah thaw khumh hen thu sim asi.

¹¹Chun, vân â awng mi ka muh le, chun, rang ngo leh a tlûnah â chuan mi, zumhkâi leh diktak, an ti mi chu ka muh le, anih nih chun rep tak hen lâi a rêl le, ral a do tâwn.

¹²A mit chu meialh hâwi asi le, lallukhuh tamtak â khuh le, chun a tlûnah min rîn amah cho lo nih chun âukhawm nih an theih kho lo mi a nei.

¹³Puan thisen hen â chulh mi â aih le, a min ah chun, "Pathian thu" an ti.

¹⁴Chun, vân ah kawrsen tla nih chun, puan mangthia vâ tak aih hen rang ngo tlûnah chuan bû hen an zûl.

¹⁵Chun, a kê thawk hen namsâu hâr tak a suak le, chu hen chun phun kip a neh lai, thîr thianthunh hen lâi a rêl lai le, Pathian Zeizawng tikho thinrunhnâk fak tak grep surnâk khur ah an sur lai.

¹⁶Chun, a puan leh a kê ah min rîn, "lal tla Lal leh hotu tla Hotu," ti hen a um.

¹⁷Chun, nî lakah vânmifial a dîr mi ka muh le, anih nih chun vân lâiah vâ an zuang mi tla sinah hâu fak tak hen,

¹⁸"Lal sa tla, kawrsen hotu sa tla, mi chak sa tla, rang leh a tlûnah chuantu tla, mi zawzawng, to-aw leh to-aw lo, mi lian leh mi mê tla sa nan ei khonâk ding hen, Pathian puai rokual tak tuahnâk ah hawng a pum u," ti hen a âu.

¹⁹Chun, sarâng tla, tual a lal tla, an kawrsen tla chu, rang tlûnah a chuan mi leh a kawrsen tla do ding hen anna pûm mi ka muh.

²⁰Chun, sarâng chu an tleih le, khuavâng telê, sarâng singsiahnâk nei mi leh a lem maimûktu tla, an perpet na tâwnnâk thilchê a mitmuh ah titu tla kha an tleih sih le, an panih hen kêl hen a kêng mi meizur ah a nung hen an lawnh na.

²¹An kawrsen tla chu rang tlûnah â chuan mi kê thawk hen a suak mi nâmsâu hen thah an si rawh. Chun, vâ zawzawng tla nih chun an sa tla chu duh tâwk hen an ei rawh.

Thuphuang 20

¹Chun, vânmifial, khurtawdawnglo renh leh chikchîn lian tak put hen, vâ thawk hen a hawng tùm mi ka muh.

²Chun, rûlrêu, rûlpi tar, chu chu Diabol mawh, Setan chu a tleih le, kum sâng khat rang ding hen a phuar rawh.

³Vânmifial nih chun khurtawdawnglo ah a khumh le, a khar pang le, kum sâng a tling lân lo chu phun kip a perpet lo rawh nâk ding hen a sengh tap le, chu nûn chun sâwtlotê suah nawlh rih ding asi.

⁴Chun, laltophah tla ka muh le, a tlûnah mi an to le, an sinah lâirêlnâk an pêk na le, chun, Jisu theihtirnâk thu ruangah leh Pathian thu ruangah lû tan hen an thi mi thlarau tla leh sarâng leh a lem mâimûk lo hen, an chal ah mawh, an kut ah mawh singsiahnâk neilotu tla thlarau khawm ka muh le, chubang tla chu an nung le, Jisu Krist hen kum sâng khat lâi an rêl.

⁵Chun, mithi dang tla lam chu kum sâng khat a ral lân lo chu an nung lo rih. Hi hi thawknawlnhâk masachem chu asi.

⁶Hi thawknawlnhâk masachem ah a tel mi tla chu an thaw suak hen anna thenhlimh asi, chubang tla tlûnah chun thih nihnâk nih thu rerêng a nei lai lo le, Pathian leh Krist bâwlpu tla an si lai le, amah hen kum sâng khat lâi an rêl lai.

⁷Chun, kum sâng khat a tling tikah Setan chu a tângnâk ah mi suah hen a um lai le,

⁸tual ah phun tla, Gog leh Magog chu perpet ding leh râltuk dingah pumh na ding hen a suak lai, chubang tla tam zia chu tisumsumriat kapah sep hâwi an si.

⁹Chun, tual tlûn khat zat hen an kal le, Pathian mi le umnâk leh Pathian nih a dâwt mi khua chu an hual le, chun, vâw thawk hen mei a hawng tla le, a khangh hep na rawh.

¹⁰Chun, anmah perpettu Diabol chu, sarâng leh khuavâng telê umnâk mei leh kêk zur ah an lawnh rawh, chun, zungzâl hen sîn leh zân hen rêp hen an um lai.

¹¹Chun, laltophah lianpi vâw tak leh a tlûnah a to mi ka muh le, a mâika mi tual leh vâw an tek ving le, muh kho an si lo rawh.

¹²Chun, mithi tla, a lian a mê hen, laltophah mâika ah an dîr mi ka muh le, chun lasuibu tla chu a kêu le, chun, lasuibu dang, nungnâk lasuibu khawm a kêu le, chun, mithi tla chu an thilti lasuibu tla ah â rîn hâwitê hen lâirêl piak hen an um rawh.

¹³Chun, tisumsumriat nih a sungah mithi tla chu a suah le, thihnâk leh mithi khua tla khawm nih an sungah mithi tla chu an suah le, an ektê hen an thilti hâwitê hen lâirêl piak hen an um.

¹⁴Thihnâk leh mithi khua tla chu meizur ah an lawnh rawh. Chu chu thih nihnâk chu asi.

¹⁵Âuzawng nungnâk lasuibu ah a min rîn hen a um lo mi chu meizur ah an lawnh rawh.

Thuphuang 21

¹Chun, vâw thar leh tual thar ka muh le, vâw masa leh tual masa chu a vei rawh, tisumsumriat khawm a um lo rawh.

²Chun, khua thenhlimh Jerusalem thar chu, mo, a pasal hen a tawng ding hen dawh tak hen â thuam ziar mi hâwi hen, Pathian sin thawk hen vâw ah mi a hawng tum mi ka muh.

³Chun, laltophah thawk hen aw-hâu fâk tak hen, "Ngâinik, Pathian bâsâ chu minung lakah a hawng um rawh, anih chu an sinah a um lai le, annih tla chu

a mi le an si lai le, Pathian ngelchel chu an sinah a um lai le; an Pathian asi lai.

⁴An mit a mi mitthli zawzawng a nawt lai le, thihnâk a um lai lo rawh le, ngaihshiatnâk tla, ɽapnâk tla, nganfâk tla, a um lai lo rawh, thil masa tla chu a vei rawh," a ti mi ka theih.

⁵Chun, laltophah ah a to mi nih chun, "Ngâinik, thil zawzawng ka siam thar rawh," a ti. Chun, ka sinah, "Rîn rawh, hi bang thu hi a dik hen zumh a kâi asi," a ti.

⁶Chun, hi hawi hen a sim le, "Â lîm rawh, kei Alpha leh Omega, a bul leh a dawng ka si, a tîhâl mi zawng sinah nungnâk tiva ah mi a thawt hen ka pêk lai.

⁷A nehtu vial nih chubang tla chu ka sinah mi a tawng lai le, anih chu ka fa asi lai.

⁸Sikhawmsele, mi zer tla, lunglo tla, mi lêmtu tla, mi thahtu tla, mi hur tla, dâwithiam tla, milem sawnhtu tla leh âwkrâwl simtu tla tingvo mun chu mei leh kât hen a kâng mi zur asi, chu chu thih nihnâk chu asi.

⁹Chun, vânmifial pasarih tla lakah pakhat, berhbu pasarih khat phak hen rêpnâk pasarih puttü chu ka sinah a hawng le, "Hawng le, Mo, Dawrâ Fa nupi chu ka nan muhtir lai," a ti.

¹⁰Chun, Thlarau nih tlâng lianpi sâng takah a hawng ka kalpi le, Jerusalem khua thenhlimh Pathian rokualnâk hen a chêu mi, Pathian sinah mi, vânthawk hen a hawng ɽum mi chu a hawng ka zauhtir.

¹¹A chêu zia chu lungmantam, jasper lung hâwi hi asi, kristal lung hâwi hen a lek.

¹²Kulh rokual tak, sâng tak a nei le, kawtkâ leinih leh kawtkâ kipah vânmifial leinih an um. Kawtkâ kipah min rîn a um le, chu chu Israel phun leinih tla min asi.

¹³Saklei ah kawtkâ pathum, marlei ah pathum, simlei ah pathum, thlanglei ah pathum.

¹⁴Chun, chu khua kulh nih chun lungphum leinîh a nei le, chu lak chun Dawrâ Fa mifial leinîh min a rîn.

¹⁵Chun, a hawng ka sawnhtu nih, khua leh a kawtkâ leh a kulh chu, tah ding hen ngûn fung a put le,

¹⁶khua chu kil li asi le, a dung leh a vâng â chan asi, vânmifial nih chun khua chu fung hen chun a tah le, mêl sâng khat leh zanga asi, a dung leh a vâng, a sâng leikâng â chan rang.

¹⁷Chun, vânmifial nih kulh khawm chu minung tah dân hâwi hen a tah le, dâwng zâ leh sâwmli leh dâwng li asi.

¹⁸Chun, a kulh chu jasper lung hen siam asi, khua chu thlalang thenhlimh hâwi, ngûn thenhlimh hen siam asi.

¹⁹Chu khua kulh lungphûm tla chu lungmantam chi kip hen thuamh asi. Lungphûm masachem chu jasper lung asi le, a panihnâk chu saphir lung asi le, a pathumnâk chu kalsedoni lung asi le, a palinâk chu emeral lung asi le,

²⁰a panganâk chu sardonik lung asi le, a paruknâk chu karnelian lung asi le, a pasarihnâk chu krisolit lung asi le, a pariatnâk chu beril lung asi le, a pakuanâk chu topaz lung asi le, a parânâk chu krisopra lung asi le, a leikhatnâk chu jasin lung asi le, a leinihnâk chu amethi lung asi.

²¹Chun, kawtkâ leinîh chu âitikep lung leinîh asi, kawtkâ zawzawng chu âitikep lung pakhat chiauh hen siam asi. Chun, khua tualmâi chu ngûn thenhlimh asi le, thlalang hâwi hen lan dak muh kho asi.

²²Lalpa Pathian Zeizawng tikho leh Dawrâ Fa chu biakin asi ruangah chun ah chun biakin rerêng ka muh lo.

²³Chun, chu khua nih chun a cherhtu ding hen nî a herh lo, thlâ khawm a herh lo; Pathian rokualnâk nih a cherh le, an meichêu chu Dawrâ Fa asi.

²⁴Chun, phun kip a chêu ah an um lai le, tual ah lal tla nih an neih leh siah tla an lûtpi lai.

²⁵Chun, khuapi kawtkâ chu â awng kumza lai le, an khâr lai lo rawh, chunah chun zân a um lai lo rawh.

²⁶Phun kip nih rokualnâk leh neih leh siah an lûtpi lai.

²⁷Sikhawmsele, nâwmtâm tla leh thil dawh lo titu tla leh âwkrâwl simtu tla chu an lût lai lo; Dawrâ Fa nungnâk lasuibu ah an min â rîn mi cho an lût lai.

Thuphuang 22

¹Chun, vânmifial nih chun nungnâk tiva kristal lung hâwi hen a tlêu mi, Pathian leh Dawrâ Fa laltophah thawk hen a hawng suak mi hawng ka zauhtir.

²Chun, nungnâk thing, tiva kap khatlei vevê ah zât leinîh hen thla kip a rah mi a um le, chu thingnah tla chu phun kip damhnâk ding asi.

³Chun, chu khuapi ah chun Pathian siatbarh rerêng a um lai lo rawh le, Dawrâ Fa leh Pathian laltophah chu a um dauh lai, chun, a to-aw tla nih amah an sawnh lai.

⁴Chun, a mêl an muh lai le, an chal ah a min rîn asi lai.

⁵Chun, zân a um lai lo le, khâwnvâr chêu leh nî chêu a herh lai lo le, Lalpa Pathian chu an chêu asi ruangah, zungzâl hen lâi a rêl lai rawh.

⁶Chun, anih nih chun ka sinah, "Hi bang thu hi zumh a kâi hen a dik asi, Lalpa Pathian, khuavâng tla sinah thlarau pêtuk nih chun, thu hawng tlung sawm ding mi tla chu a to-aw tla chu zauhtir ding hen a vânmifial chu a fial asi.

⁷Chun, Jisu nih, "Ngâinik, ka hawng kal tuan awt hi, hi lasuibu ah khuavâng tla thusim zûltu vial chu an thaw a suak," a ti.

⁸Chun, kei Johan, hi bang thu zawzawng muhtu leh theihtu chu ka si. Chun, chubang thu tla ka muh hen ka theih rawh chun, a hawng ka zauhtirtu vânmifial chu sawnh ding hen a kê bulah ka bawkbukhup rawh.



⁹Chun, anih nih chun ka sinah "Hi hâwi hen ti lah, kei chu nangmah leh na unau khuavâng tla leh hi lasuibu thu zûltu tla hâwi hen to-aw ka si bâk, Pathian sawnh dauh rawh," a ti.

¹⁰Chun, anih nih chun ka sinah, "Hi lasuibu ah khuavâng tla simkannâk thu tla hi pheh lah, hi bang thil tla a hawng tung ding mi tik chu a nâi rawh hi.

¹¹Mi replo chu replo hen um ko na seh, mi nâwmtâm chu nâwmtâm hen um ko na seh, mi rep chu rep hen um ko na seh, mi thenhlimh chu thenhlimh hen um ko na seh," a ti.

¹²Chun, Jisu nih, "Ngâinik!" "Ka hawng kal tuan awt hi! Mi kip an thilti hâwi vima hen pêk na ding hen ka lâwmmann ka hawng put awt asi.

¹³Kei Alpha leh Omega, a masachem leh a madungchem, a bul leh a dawng ka si," a ti.

¹⁴An nipuan thiàng tak hen suktu leh nungnâk thing rah ei hen khuapi kawtkâ ah a lût khotu tla chu an thaw a suak.

¹⁵Lênglei ah chun, ui tla, dâwithiam tla, pungmang tla, milem sawnhtu tla, âwkrâwl sunhsaktu tla leh âwkrâwl sim mang tla chu an um lai.

¹⁶"Kei, Jisu nih, kawhmi murui tla sinah hi bang thu tla hi theihtir ding hen ka vânmifial chu ka hawng fial asi. David bulpi leh a thlâk, ârfi chêu tak, deirêl ârfi chu ka si" a ti.

¹⁷Thlarau leh mo nih chun, "Hawng rawh" an ti. A thehtu zawng nih, "Hawng rawh," ti seh. A tîhâl mi zawng chu hawng seh, nungnâk tî hi a duhtu zawng nih a thawt hen lâk seh.

¹⁸Kei, Johan nih, hi lasuibu hi simhkannâk thu thehtu zawng chu ka thehtir na asi. Âuzawng nih hi bang thu hi a sap chun, hi lasuibu ah rênâk â rîn mi tla hi Pathian nih a tlûnah a sap bâk lai.

¹⁹Chun, âuzawng nih hi lasuibu ah simhkannâk thu â rîn mi chu a veih chun hi lasuibu ah â rîn mi nungnâk thing rah leh Khua Thenhlimh ah mi a tingvo chu Pathian nih a lâk piak ving lai.

²⁰Hi thu theihtirtu nih hin, "Ka hawng kal tuan awt," a ti. Amen, hawng kal ko me, Lalpa Jisu!

²¹Lalpa Jisu zângfahnâk chu mi thenhlimh tla sinah um seh.



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES - Brasil